



New Testament

isiZulu Language

IsiZulu – Bible – New Testament

New Testament	
Umatewu	3
Umarko	73
Uluka	118
Ujohane	192
Imisebenzi	246
ElaseRoma	314
1 KwelaseKhorinte	344
2 KwelaseKhorinte	373
AseGalathiya	392
ElasEfesu	403
ElaseFiliphi	413
ElaseKholose	421
1 KwelaseThesalonika	428
2 KwelaseThesalonika	434
1 KuThimothi	438
2 KuThimothi	446
UThithusi	452
UFilimoni	456
AmaHebheru	458
EkaJakobe	480
1 KaPhetro	488
2 KaPhetro	496
1 KaJohane	501
2 KaJohane	509
3 KaJohane	510
EkaJudsi	512
IsAmbulo	515
AmaHubo (Psalms)	548

IsiZulu – Bible – New Testament

UMatewu

UMatewu 1

Uhla lokhokho bakaJesu Kristu

(Luk 3:23-38)

- ¹Nantu uhla lokhokho bakaJesu onguMesiya, wozalo lukaDavide inkosi, owayengowozalo luka-Abhrahama.
- ²UAbhrahama wazala uIsaka; uIsaka wazala uJakobe; uJakobe wazala uJuda nabafowabo.
- ³UJuda wazala oPherezi noZera kuThama; uPherezi wazala uHezroni; uHezroni wazala uRamu;
- ⁴uRamu wazala uAminandaba; uAminandaba wazala uNahashoni; uNahashoni wazala uSalimoni;
- ⁵uSalimoni wazala uBhowazi kuRahabhu; uBhowazi wazala uObhedi kuRuthi; uObhedi wazala uJese;
- ⁶uJese wazala inkosi uDavide. UDavide wazala uSolomoni kowesifazane owayekade engumkaUriya;
- ⁷uSolomoni wazala uRehobhowamu; uRehobhowamu wazala uAbhiya; uAbhiya wazala uAsa;
- ⁸uAsa wazala uJosefathi; uJosefathi wazala uJoramu; uJoramu wazala u-Uziya;
- ⁹u-Uziya wazala uJothamu; uJothamu wazala uAhazi; uAhazi wazala uHezekiya;
- ¹⁰uHezekiya wazala uManase; uManase wazala uAmoni; uAmoni wazala uJosiya;
- ¹¹uJosiya wazala uJekhoniya nabafowabo ngenkathi abakwaIsrayeli bethunjwa besiwa eBhabhiloni.
- ¹²Kwathi sebethunjelwe eBhabhiloni, uJekhoniya wazala uSalathiyeli; uSalathiyeli wazala uZerubhabheli;
- ¹³uZerubhabheli wazala uAbhiyudi; uAbhiyudi wazala uEliyakhimu; uEliyakhimu wazala uAzori;
- ¹⁴uAzori wazala uZadoki; uZadoki wazala uAkhimu; uAkhimu wazala uEliyudi;
- ¹⁵uEliyudi wazala uEleyaza; uEleyaza wazala uMathani; uMathani wazala uJakobe.
- ¹⁶UJakobe wazala uJosefa, indoda kaMariya ongunina kaJesu okuthiwa nguMesiya.

¹⁷Ngakhoke umumo wezizukulwane zonke kusukela kuAbhrahama kuze kufike kuDavide zaziqishumi nane; nalezo ezisukela kuDavide kuze kube yisikhathi sokuthunjwa kwesizwe sithuthelwa eBhabhiloni zaziqishumi nane, nalezo ezisukela kulesosikhathi kuze kufike kuMesiya zaziqishumi nane.

Ukuzalwa kukaJesu Kristu

(Luk 2:1-7)

¹⁸Ukuzalwa kukaJesu Kristu kwema kanje: Unina uMariya wayeyingoduso kaJosefa bezoshada. Kepha bengakashadi kwatholakala ukuthi uMariya usekhulelwe ngoMoya oyiNgcwele kaNkulunkulu.

¹⁹UJosefa owayezoba ngumyeni wakhe wayengumuntu oqotho; akathandanga ukumthela ngehlazo uMariya. Wayesebona ukuthi kungakuhle ukuba amale ngasese angakuvezi.

²⁰Kuthe esetshisa lemicabango wabona ingilosi yeNkosi ifika kuye ngephupho elele ithi: “Josefa, wena kaDavide! Ungesabi ukumthatha uMariya abe ngumkakho! Lomntwana amthweleyo umkhulelwe ngesu loMoya oyiNgcwele.

²¹UMariya uyozala indodana uyiqambe igama uthi nguJesu, ngoba iyosindisa abantu bayo ezonweni zabo.”

²²Konke lokhu kwenzeka ukuba kugcwaliseke okwashiwo nguSimakade endulo ngomlomo womphrofethi kwathiwa:

²³“Intombi esagcwele iyokhulelwa izale indodana bayethe igama bayibize ngelokuthi nguImanuveli” (okusho ukuthi: “UNkulunkulu unathi”).

²⁴UJosefa wavuka wakwenza lokho ayekuthunywe yingilosi yeNkosi. Wathatha uMariya waba ngumkakhe,

²⁵kepha akaze aya kuye engakabelethi. UMariya wazala indodana, uJosefa wayiqamba wathi nguJesu.

UMatewu 2

Ukufika kwezazi zasempumalanga

¹UJesu wazalelwa emzini waseBhetlehema kwelaseJudiya ngenkathi kubusa inkosi uHerodi. Kuthe esezelwe kwase kufika eJerusalema amadoda ayizingcweti zokusinga izinkanyezi. Ayevela kwelasempumalanga ehamba

²ebuza ethi: “Uphi umntwana ozelweyo oyinkosi yamaJuda na? Sabona inkanyezi ebikezela ngaye iphuma empumalanga; silapha nje sizomkhonza.”

³Kwathi ukuba inkosi uHerodi ikuzwe lokhu, yangenwa yitwetwe kanye nabo bonke abaseJerusalema.

⁴Yamema imbizo yazo zonke izikhulu zabaphristi kanye nezazimibhalo zamaJuda. Yabaphenya ibuza ukuthi umgcotshwa kaNkulunkulu uyozalelwaphi na.

⁵Bayiphendula bathi: “EBhetlehema kwelaseJudiya, njengoba kulotshwe ngesandla somphrofethi embhalweni ongcwele kwathiwa:

⁶“ ‘Wena Bhetlehema muzi wakwaJuda, awumncane neze kunabanye phakathi kwababusi bakwaJuda, ngoba kuwe kuyovela umbusi oyokwelusa ulsrayeli abantu bami.’ ”

⁷UHerodi wayesezibizela ngasese izazi zasempumalanga, waziphenyisisa ukuthi inkanyezi yabonakala nini.

⁸Wayesezithumela eBhetlehema, ethi kuzo: “Hambani nifike niphenye kahle ngalomntwana! Nithi ningamthola bese ningibikela ukuze nami ngiyomkhonza.”

⁹Inkosi yakhuluma yaqeda, izazi zemuka. Inkanyezi leyo ezaziyibone iphuma empumalanga zayibona futhi ihamba phambi kwazo yaze yema phezu kwendawo lapho umntwana ekhona.

¹⁰Kwathi zingayibona inkanyezi zajabula kakhulu kabi.

¹¹Zase zingena endlini, zabona umntwana nonina uMariya. Zaguqa zakhuleka kumntwana, zathukulula imixhaka yazo, zakhapha izipho zazethula kuye zamkhunga ngazo: igolide nempepho nenhlaka engamakha.

¹²UNkulunkulu wazixwayisa ngephupho ukuba zingabe zisabuyela enkosini uHerodi, zase zithatha enye indlela zaphindela kwelakubo.

OJosefa babalekela kwelaseGibhithe

¹³Kuthe sezihambile izazi, uJosefa wabona ingilosi yeNkosi ifika kuye ngephupho ithi: “Vuka uthathe umntwana nonina, ubalekele kwelaseGibhithe, uhlale khona uze utshelwe yimina ukuthi usungabuya. Ngoba uHerodi uzomcinga umntwana uhlose ukumbulala.”

¹⁴UJosefa wavuka, wathatha umntwana nonina, bashushumba kwesikabhadakazi beqonde eGibhithe.

¹⁵Bafike bahlala lapho kwaze kwakhothama uHerodi. Lokhu kwenzeka ukuba kugcwaliseke okwakhulunywa nguSimakade endulo ngomlomo womphrofethi lapho kuthiwa: “Ngabiza iNdodana yami ngathi ayiphume eGibhithe.”

Ukubulawa kwabantwana eBhetlehema

¹⁶Kwathi ukuba uHerodi abone ukuthi izazi zimphambile, wathukuthela wabila. Wayeselawula ukuba kuyiwe eBhetlehema nasezindaweni ezakhelene nalo, kubulawe bonke abantwana abangabafana abaneminyaka emibili ubudala nabangaphansi kwalokho. Wakwenza lokhu esusela esikhathini sokubonakala kwenkanyezi ayesitshelwe yizazi.

¹⁷Kwase kugcwaliseka okwashiwo ngomlomo womphrofethi uJeremiya kwathiwa:

¹⁸“Emzini waseRama kwezwakala izwi lokhalayo ekhahla isililo. URasheli wayekhalela abantabakhe, enqaba nokwenqaba ukuba aduduzwe, njengoba base befile.”

OJosefa babuya kwelaseGibhithe

¹⁹Kuthe lapho inkosi uHerodi isikhothame, uJosefa wabona ingilosi yeNkosi ekwelaseGibhithe, ifika kuye ngephupho

²⁰ithi: “Vuka uthathe umntwana nonina, ubuyele ezweni lakwaIsrayeli, ngoba sebefile labo ababesophe ukubulala umntwana.”

²¹UJosefa wavuka, wathatha umntwana nonina wabuyela kwelakwaIsrayeli.

²²Wezwa ukuthi inkosi uAkhelawo isibusa isifunda saseJudiya esikhundleni sikayise uHerodi, wesaba ukuya lapho. UNkulunkulu wamfikela ngephupho elamenza ukuba adlulele esifundeni saseGalile.

²³Wafike wakha emzini okuthiwa yiNazareth. Phela kwakumele kugcwaliseke kanjalo okwashiwo ngomlomo wabaphrofethi ukuthi uyobizwa kuthiwe ungumNazareth.

UMatewu 3

Ukushumayela kukaJohane umbhabhadisi

(Mark 1:1-8; Luk 3:1-18; Joh 1:19-28)

¹Kuhambe kwahamba kwavela uJohane umbhabhadisi eshumayela ehlane laseJudiya ethi:

²“Phendukani ngoba umbuso wezulu usondele.”

³Nguye uJohane okwabikezelwa ngaye ngomlomo womphrofethi uIsaya lapho kuthiwa: “Kukhona ozwakala enkenteza ehlane ethi: ‘Cabelani iNkosi indlela niqondise nemikhondo yayo!’ ”

⁴UJohane wayenesembatho esenziwe ngoboya bekameli, ezibopha ngoqhotho okhalo, ephila ngezinkumbi nezinyosi zasendle.

⁵Abantu baphuma bonke belokhu beya kuye, bevela emzini waseJerusalema nasesifundeni saseJudiya nasezweni eligudla emfuleni iJordani.

⁶Babevuma izono zabo, uJohane abesebabhabhadisa eJordani.

⁷Wabona abaningi kubafarisi nakubasadusi beza kuye ukuba babhabhadiswe, wathi kubo: “Nzalo yezinyoka! Nixwayiswe ngubani lona onitshela ukuthi ningase nilubalekele ulaka lukaNkulunkulu oluzonehlela na?”

⁸Vezani-ke izithelo zokulunga ezifakazela ukuphenduka kwenu!

⁹Ningazikhohlisi nizidude ezinhliziyweni zenu nithi: ‘Hhiya, singabozalo luka-Abrahama thina.’ Ngithi kini, uNkulunkulu angavusela uAbrahama lawamatshe abe uzalo lwakhe.

¹⁰Izembe selibekiwe eziqwini zemithi. Yilowo nalowomuthi ongavezi izithelo ezinhle uyogawulwa uphonswe emlilweni.

¹¹Nginibhabhadisa ngamanzi nina eniphendukayo. Kodwa lowo ozongilandela unamandla kunami. Angifanele ngisho nokumkhumula izicathulo. Uzonibhabhadisa ngoMoya oyiNgcwele nangomlilo.

¹²Unjengomuntu ohlezi ephethe isiqabetho sakhe sokwela, ezohlunga isivuno esibuyeni, aqoqele ukudla enqolobaneni, amakhoba awashise emlilweni ongacimiyo.”

Ukubhabhadiswa kukaJesu

(Mark 1:9-11; Luk 3:21-22)

¹³UJesu wafika eJordani evela kwelaseGalile, ezobhabhadiswa nguJohane.

¹⁴Kodwa uJohane wazama ukumenqabela ethi: “Yimi engifanele ukubhabhadiswa nguwe, ungeza kanjani kimi na?”

¹⁵UJesu wamphendula wathi: “Kuyeke kwenzeke ngoba kumele siyifeze kanje inhloso kaNkulunkulu.” Wavuma-ke uJohane.

¹⁶UJesu wabhabhadiswa maqede waphuma emanzini. Izulu lase livuleka, uJesu wabona uMoya kaNkulunkulu wehlela kuye usajuba ngesimo.

¹⁷Kwezwakala izwi livela ezulwini lithi: “Lo uyiNdodana yami engiyithandayo. Ngiyathokoza ngayo.”

UMatewu 4

Ukulingwa kukaJesu

(Mark 1:12-13; Luk 4:1-13)

¹UMoya oyiNgcwele wahola uJesu wamusa ehlane ukuba alingwe nguSathane.

²UJesu wayesezile ukudla izinsuku ezingamashumi amane nobusuku bazo, wagcina eselambile.

³Kwafika lapho umlingi onguSathane, wathi: “Uma uyiNdodana kaNkulunkulu, yisho kulawamatshe aguquke abe yizinkwa!”

⁴Wamphendula wathi: “Kulotshiwe embhalweni ongcwele kwathiwa: ‘Umuntu akaphili ngesinkwa sodwa, kepha uphila ngawo onke amazwi omlomo kaNkulunkulu.’”

⁵USathane wamthatha wamletha emzini ongcwele iJerusalema, wafika wamkhweza wema esiqongweni sethempeli,

⁶wathi kuye: “Uma uyiNdodana kaNkulunkulu, gxuma uziphonse phansi, ngoba kulotshiwe kwathiwa: “ ‘UNkulunkulu uyothuma izingilos zakhe zikusingathe zikuthwale ngezandla, hleze unyawo lwakho luqhuzuke etsheni.’”

⁷UJesu wamphendula wathi: “Kepha kulotshiwe futhi kwathiwa: ‘Ungamqali uSimakade uNkulunkulu wakho!’ ”

⁸USathane wabuye wamenyusela esiqongweni sentaba ende kakhulu wamkhangisa ngayo yonke imibuso yomhlaba nobukhazikhazi bayo,

⁹wathi kuye: “Ngiyokupha konke lokhu uma ungikhothamela ukhuleka kimi.”

¹⁰UJesu wathi kuye: “Suka Sathane! Kulotshiwe kwathiwa: ‘Wokhuleka kuSimakade uNkulunkulu wakho, ukhonze yena yedwa.’ ”

¹¹USathane wamshiya; izingilosi zaya kuJesu zafike zabungaza.

UJesu uqala umsebenzi wakhe eGalile

(Mark 1:14-15; Luk 4:14-15)

¹²Kuthe ukuba uJesu ezwe ukuthi uboshiwe uJohane umbhabhadisi, wasuka waya kwelaseGalile.

¹³Washiya eNazaretha, wadlulela emzini waseKhapphenawume ongasogwini lwechibi laseGalile ezweni lakwaZabuloni nakwaNaftali, wahlala khona.

¹⁴Lokhu kwenzeka ukuba kugcwaliseke okwashiwo ngomlomo womphrofethi ulsaya kwathiwa:

¹⁵“Wena lizwe lakwaZabuloni nawe lizwe lakwaNaftali! Nina eningasemgwaqweni ogudla ichibi nani eningaphesheya komfula iJordan! Wena Galile, sifunda sabezizwe!

¹⁶Abantu abebehlala emnyameni bakhangwe ukukhanya okukhulu; abebehlala kwelesigayegaye sethunzi lokufa ukukhanya kubakhanyisele.”

¹⁷Kusukela ngalesosikhathi uJesu waqala ukushumayela ethi: “Phendukani ngoba umbuso wezulu usondele.”

UJesu ubiza abadobi ukuba babe ngabalandeli

(Mark 1:16-20; Luk 5:1-11)

¹⁸Kwathi uJesu ehamba egudla ichibi laseGalile, welamela izelamani ezimbili, uSimoni okuthiwa nguPhetro kanye noAndreya, bedoba izinhlanzi ngenetha, nakhu phela babengabadobi.

¹⁹Wayesethi kubo: “Wozani ningilandele! Ngizonifundisa ukudoba abantu.”

²⁰Bashiya amanetha khona lapho, baba ngabalandeli bakhe.

²¹UJesu wadlulela phambili, welamela ezinye izelamani ezimbili, uJakobe noJohane, amadodana kaZebedi. Babenoyise esikebheni belungisa amanetha abo. Wababiza,

²²basishiya khona lapho isikebhe noyise, bamlandela.

UJesu uyashumayela uphilisa abaningi

(Luk 6:17-19)

²³UJesu waliguduza lonke elaseGalile, efundisa emasinagogeni abo, eshumayela indaba ethokozisayo yombuso kaNkulunkulu, ephilisa abantu abagulayo ezifweni ezinhlobonhlobo.

²⁴Udumo lwakhe lwanda kulo lonke elaseSiriya, abantu bayisa kuye bonke abagulayo ababephelelwe yizifo ngezifo nezinhlungu, ababenamadimoni nababenesithuthwane nababefe uhlangothi, wabaphilisa bonke.

²⁵Izindimbane zabantu zamlandela, ziqhamuka kwelaseGalile nasezweni elimanxuluma ayishumi naseJerusalema nakwelaseJudiya nasezweni elingaphesheya komfula waseJordani.

UMatewu 5

Intshumayelo kaJesu entabeni: Mat 5-7

¹UJesu wabona izindimbane zabantu, wayesenyukela entabeni. Wafike wahlala phansi, abafundi bakhe basondela kuye.

²Wabafundisa wathi:

Ababusisiweyo

(Luk 6:20-23)

³“Babusisiwe abampofu ngokomoya, ngoba umbuso wezulu ungowabo.

⁴Babusisiwe abalilayo, ngoba bayoduduzwa.

⁵Babusisiwe abamnene ngoba bayodla ifa lezwe elizayo.

⁶Babusisiwe abalambele ukulunga bekomele, ngoba bayosutha baneliswe.

⁷Babusisiwe abanesihawu, ngoba bayohawukelwa.

⁸Babusisiwe abanhliziyo zabo zihlanzekile, ngoba bayombona uNkulunkulu.

⁹Babusisiwe abalamulayo, ngoba bayothiwa bangamadodana kaNkulunkulu.

¹⁰Babusisiwe abahlushwa ngenxa yokulunga, ngoba umbuso wezulu ungowabo.

¹¹“Nibusisiwe lapho abantu benithuka, benihlupha, benibheca ngokuningi okungamanga, bekwenza ngesizathu sokuthi ningabami.

¹²Jabulani nithokoze, ngoba nihlalelwe umvuzo omkhulu ezulwini. Yiyo lendlela okwakuhlushwa ngayo abaphrofethi abanandulelayo.

Usawoti nokukhanya

(Mark 9:50; Luk 14:34-35)

¹³“Nina ningusawoti kubantu bomhlaba. Kepha uma usawoti usuyisiphusha, ukukhalipha kwawo kuyovuselelwa ngani na? Awusenamsebenzi walutho uvele uchithwe phandle, abantu bawunyathele.

¹⁴“Nina ningukukhanya emhlabeni. Umuzi owakhiwe entabeni awunakusitheka.

¹⁵Akokhelwa isibani bese sisithwa ngomcengezi, kodwa sichwanekwa endaweni ephakemeyo ukuba sibakhanyisele bonke abasendlini.

¹⁶Kanjalo ukukhanva kwenu akugqame phambi kwabantu, ukuba babone okuhle enikwenzayo bamdumise uYihlo osezulwini.

UJesu nomthetho

¹⁷“Ningazikhohlisi nithi ngazochitha umthetho kaMose nemfundiso yabaphrofethi! Angizelanga ukukuchitha lokhu, kodwa ukuba kufezeke.

¹⁸Ngiqinisile impela ngithi kini: Inqobo nje uma izulu nomhlaba usekhona, ngeke kwadlula kwangwaqa omncane nachashazana nje lakhe elilotshiwe emthethweni, inhloso yakho konke ingakafezeki.

¹⁹Ngakhoke, lowo ochitha ngisho nowodwa walemiyalelo yize umncane, akhuthaze nabanye ukuba bawuchithe, kuyothiwa ungomncane kunabo bonke embusweni wezulu. Kepha lowo oyigcinayo, akhuthaze nabanye ukuba bayigcine, kuyothiwa mkhulu embusweni wezulu.

²⁰Ngithi kini, uma ukulunga kwenu kungakwedluli okwezazimibhalo nabafarisi, anisoze namukelwa embusweni wezulu.

Ukuthukuthela

²¹“Nizwile ukuthi abasendulo bashayelwa umthetho othi: ‘Ungabulali; lowo obulalayo uyomiswa phambi komahluleli.’

²²Mina-ke ngithi kini: Yilowo nalowo othukuthelela umfowabo uyomiswa phambi komahluleli; lowo othi kumfowabo: ‘Lesisilima lesi!’ uyomiswa esigcawini phambi komkhandlu. Lowo othi umfowabo uyisiwula uyolahlwa yicala aphoswe esihogweni.

²³Ngakhoke uma uya elathini ukuyokwethula umnikelo kuNkulunkulu, ubusukhumbula ukuthi anizwani nomzalwane wakho,

²⁴shiya umnikelo wakho ngaselathini uphuthume kumzalwane wakho ubuyisane naye! Ubusuphindela emuva uyokwethula umnikelo wakho kuNkulunkulu.

²⁵“Shesha ubuyisane nomuntu okumangalelayo, lapho nisesendleleni nibheke esigcawini, angaze akufake emthethweni kumahluleli, umahluleli akunikele esikhonzini sikubophe.

²⁶Ngiqinisile uma ngithi, uyoboshwa uze uyikhokhe yonke inhlawulo ngisho nesenti layo.

Ukuphinga

²⁷“Nizwile ukuthi kwakunomthetho othi: ‘Ungaphingi!’

²⁸Mina-ke ngithi kini: Yilowo nalowo obuka owesifazane amkhanukele, usevele unecala lokuphinga ngenxa yalowomcabango ofike enhliziyweni yakhe.

²⁹Uma iso lakho lesokunene likukhubekisa uphambuke endleleni kaNkulunkulu, likipilite ulilahle! Kungcono ukuba ulahlekelwe yisitho esisodwa somzimba kunokuba umzimba wakho wonke uphoswe esihogweni.

³⁰Uma isandla sakho sokunene sikukhubekisa, sinqume usilahle! Kungcono ukuba ulahlekelwe yisitho esisodwa kunokuba umzimba wakho wonke uye esihogweni.

Isahlukaniso

(Mat 19:9; Mark 10:11-12; Luk 16:18)

³¹“Kwakunomthetho futhi othi: ‘Yilowo nalowo ochitha umkakhe, kumele ambhalele incwadi yesahlukaniso.’

³²Mina-ke ngithi kini: Yileyo naleyondoda echitha umkayo, engenacala lokuphinga, iyoba necala lokumphingisa uma esegana enye indoda, naleyondoda ayiganayo iyaphinga.

Ukufunga

³³“Nezwa nokuthi abasendulo bashayelwa umthetho othi: ‘Ungawafungi amanga!’ nothi: ‘Gcina izifungo zakho ozifunge kuSimakade!’

³⁴Mina-ke ngithi kini: Ningafungi nakanye! Ningalifungi izulu, ngoba liyisihlalo sobukhosi bukaMvelinqangi.

³⁵Ningawufungi umhlaba, ngoba uyisenabelo sezinyawo zakhe. Ningalifungi iJerusalema, ngoba lingumuzi weNkosi yamakhosi.

³⁶Ungalifungi ngisho nekhanda lakho, ngoba awukwazi ukuguqula nolulodwa unwele lube mhlophe kumbe lube mnyama.

³⁷Anothi ‘yebo’ kumbe nithi ‘qha’, kuphele lapho, ngoba uma nigomela kusuke sekuvela kuSathane.

Ukuphindisa

(Luk 6:29-30)

³⁸“Nezwa nokuthi kwathiwani uma kwenzekile nalimazana. Kwathiwa inhlawulo ayibe yiso ngeso, izinyo ngezinyo.

³⁹Mina-ke ngithi kini: Ningamelani nalowo onenza okubi! Uma kukhona okumbibiza esihlathini sokunene, mphendulele nesinye asishaye naso!

⁴⁰Uma kukhona ofuna ukukufaka emthethweni adle isembatho sakho, myeke athathe nengubo!

⁴¹Uma kukhona okuphoqa ukuba uhambe naye ibanga elithile elimisiweyo umthawalele impahla, qhubeka uhambe naye nelinye lesibili!

⁴²Muphe lowo ocela utho kuwe, ungalanduli kumuntu uma efuna ukutsheleka kuwe!

Ukuthanda izitha

(Luk 6:27-28, 32-36)

⁴³“Nezwa nokuthi kwakunomthetho othi: ‘Wothanda umhlobo wakho, uzonde isitha sakho!’

⁴⁴Mina-ke ngithi kini: Anothanda izitha zenu, nibakhulekele labo abanihluphayo.

⁴⁵Yikhona niyoba ngamadodana kaYihlo osezulwini. Ngoba ukhipha ilanga lakhe, bese libalela phezu kwezonaakali nabalungileyo. Izulu lina imvula yakhe phezu kwabaqotho nababi.

⁴⁶Uma nithanda abanithandayo, mvuzo muni eniyowuthola kuNkulunkulu na? Angithi nabathelisi bayakwenza lokho?

⁴⁷Uma nibingelela abahlobo benu kuphela, kukhona yini okwehlukile enikwenzayo na? Abezizwe abangakhulwayo abakwenzi lokhu na?

⁴⁸Kumele nilunge ngempela njengalokhu uYihlo osezulwini elungile.

UMatewu 6

Ukupha abampofu

¹“Uma nenza imisebenzi elungileyo, qaphelani ukuba ningayenzi phambi kwabantu bayibone. Uma niyiqhakambisa kubantu, anisayikuthola mvuzo kuYihlo osezulwini.

²“Ngakhoke uma upha abampofu, musa ukubukisa ngakho, njengoba kwenza abazenzisi emasinagogeni nesemigwaqweni ukuba batuswe yizwe. Empeleni sebewamukele umvuzo wabo.

³Uma ngabe usiza abampofu, esokhohlo sakho asingazi lutho ngalokho okwenziwa ngesokudla sakho,

⁴kodwa yiphana ngesipho sakho ngasese. UYihlo obona ekusithekeni uyokuvuza.

Ukukhuleka

(Luk 11:2-4)

⁵“Lapho nikhuleka, ningalingisi abazenzisi! Bangonontandakubukwa abakhonze ukukhuleka bemi emasinagogeni nasemigwaqweni. Ngiqinisile uma ngithi, sebewamukele umvuzo wabo.

⁶Kepha uma ukhuleka, ngena endlini yakho uvale umnyango, ubusukhuleka kuYihlo osekusithekeni. UYihlo obona ekusithekeni uyokuvuza.

⁷“Lapho nikhuleka ningabothemeleza njengabezizwe abathandaza undendende bethi uNkulunkulu uyobezwa ngalokho.

⁸Ningabalingisi! UYihlo usuke esekwazi enikuswelayo ningakakuceli.

⁹Anokhuleka nithi: “ ‘Baba wethu osezulwini! Igama lakho aliphathwe ngobungcwele!

¹⁰Umbuso wakho awufike, intando yakho ayenziwe emhlabeni njengasezulwini!

¹¹Siphe namuhla ukudla okwaneleyo!

¹²Sithethelele izono zethu njengoba nathi sibathethelela abasonayo!

¹³Ungasiholeli ekulingweni, kodwa sisindise kokubi!

[Ngokuba umbuso ungowakho namandla nobukhosi kuze kube phakade. Ameni.]

¹⁴“Ngoba uma nithethelela abantu abanonayo, uYihlo osezulwini uyonithethelela nani.

¹⁵Kodwa uma ningabathetheleli abantu, uYihlo osezulwini akayikunithethelela izono zenu.

Ukuzila ukudla

¹⁶“Lapho nizila ukudla, ningakhombisi ubuso obunyukubele njengabazenzisi abahamba bebiphile, ukuba babonwe ngabantu ukuthi bazilile. Empeleni phela sebewamukele umvuzo wabo.

¹⁷Kodwa uma wena uzila ukudla, geza ubuso bakho uzicole,

¹⁸abantu bangaboni ukuthi uzilile, kepha kubonwe kuphela nguYihlo osekusithekeni. UYihlo obona ekusithekeni uyokuvuza.

Ingcebo esezulwini

(Luk 12:33-34)

¹⁹“Ningaqongeleli ingcebo lapha emhlabeni, lapho kukhona inundu nokugqwala okungayidla, kukhona namasela agqekeza ebe.

²⁰Kodwa qongelelani ingcebo egcinwa ezulwini, lapho ingeke idliwe khona yinundu nokugqwala nalapho kungagqekezi masela khona ebe.

²¹Ngoba lapho ugcine khona ingcebo yakho, nenhliziyo yakho iyoba lapho.

Iso liyisibani somzimba

(Luk 11:34-36)

²²“Iso lakho liyisibani esikhanyisela umzimba. Uma libona kugqame, umzimba wonke usekukhanyeni,

²³kepha uma uneso elibi, umzimba wonke usuke usebumnyameni. Uma lokho-ke okukukhanyiselayo kungubumnyama, lobubumnyama bungakanani pho!

UNkulunkulu noMamona

(Luk 16:13)

²⁴“Akukho muntu ongakhonza amakhosi amabili. Kuphakathi kokuba azonde enye athande enye, noma abambelele kwenye, enye ayeyise. Ningekhonzwe uNkulunkulu kanye noMamona.

Ukukhathazeka

(Luk 12:22-31)

²⁵“Ngakhoke ngithi kini: Ningazikhathazi ngokuthi niyokuthathaphi ukudla eniyophila ngakho nezingubo eniyozembatha! Ukuphila akukukhulu yini kunokudla, nomzimba awedluli izingubo na?

²⁶Ake nibheke nazi izinyoni zindiza! Azilimi, azivuni, azinazo izinqolobane zokubuthela isivuno, nokho uYihlo osezulwini uyazondla. Aniyilo yini igugu elikhulu eledlula izinyoni na?

²⁷Ngubani phakathi kwenu okungathi ngokuzikhathaza kwakhe athasisele usuku olulodwa eminyakeni yokuphila kwakhe na?

²⁸“Nizihluphelani ngezembatho na? Ake nibheke nje nansi iminduze yasendle ikhula! Kayizikhandli izithungele izembatho,

²⁹kodwa ngithi kini, noSolomoni inkosi eyayevatha ezibukhazikhazi kayivunulanga ngisho nanjengomnduze owodwa uqhakazile.

³⁰UMvelinqangi unakekela utshani basendle abuhlobise abehlule, lobutshani obuhluma namuhla kanti buzobuye buphoswe eziko bushe ngakusasa. Akayikuninakekela kakhulu kunalokho anembese, nina eninokukholwa okuncane na?

³¹Ngakhoke ningakhathazeki ngokuthi niyodlani niphuzeni nembatheni.

³²Abezizwe abangakholwayo bazikhathaza ngakho konke lokho, kanti-ke uYihlo osezulwini uyazi ukuthi niyazidinga zonke lezizinto.

³³Kodwa qalani ngokufuna umbuso kaNkulunkulu nokulunga kwakhe, yikhona-ke eyonipha nazo zonke lezizinto.

³⁴Ngakhoke ningazihluphi ngekusasa, ngoba ikusasa liyozibonela lona izinkathazo zalo. Yilolo nalolosuku lunezinkathazo zalo ezilwaneleyo.

UMatewu 7

Ukwahlulela abanye

(Luk 6:37-38,41-42)

¹“Ningehluleli, khona uNkulunkulu engayikunehlulela.

²Ngoba niyokwahlulelwa nani ngalokho enahlulela ngakho, namukeliswe okungangesilinganiso enilinganisela ngaso abanye.

³Ungasibona kanjani isibi esisesweni lomzalwane, ube ungaluboni ugoqo olukwelakho na?

⁴Ungasho kanjani kuye uthi: ‘Ake ngikhiphe isibi esweni lakho,’ kanti kwelakho kukhona ugoqo na?

⁵Mzenzisindini! Qala ngokukhipha ugoqo olusesweni lakho, yikhona uyobona kahle bese ukhipha isibi esisesweni lomzalwane.

⁶“Ningaziphakeli izinja okungcwele, niphonse amatshe enu engceboezingulubeni, funa ziwadovadove ngamasondo ziniphendukele zinidwengule.

Ukucela nokufuna nokungqongqotha

(Luk 11:9-13; 6:31)

⁷“Celani, yikhona niyophiwa! Funani, yikhona niyothola! Ngqongqothani, yikhona niyovulelwa!

⁸Ngoba yilowo nalowo ocelayo uyaphiwa, nofunayo uyathola, nongqongqothayo uyovulelwa.

⁹Ukhona yini kini umuntu okuthi lapho indodana yakhe imcela isinkwa ayinike itshe na?

¹⁰Kuthi lapho imcela inhlanzi ayinike inyoka na?

¹¹Uma nina okuthi nibabi kangaka nikwazi kodwa ukupha abantabenu okubalungele, uYihlo osezulwini uyobapha kangakanani-ke okubalungele labo abacela kuye.

¹²“Yenzani kwabanye konke lokho enithanda ukuba bakwenze kini, ngoba yilokhu okubizwa umthetho kaMose nemfundiso yabaphrofethi.

Isango elingumngcingo

(Luk 13:24)

¹³“Ngenani ngesango elingumngcingo, ngoba isango eliya ekubhujisweni livulekile nendlela ibanzi, bebaningi abahamba ngayo.

¹⁴Isango eliya ekuphileni lingumngcingo nendlela ilukhonjwana, bambalwa abayitholayo.

Isihlahla nezithelo zaso

(Luk 6:43-44)

¹⁵“Xwayani labo abathi bangabaphrofethi bengeyibo! Beza kini bebukeka sengathi bayizimvu, kanti ngaphakathi bangamankentshane aphantayo.

¹⁶Niyobazi ngemisebenzi yabo. Kambe ziyatholakala yini izithelo zomvini esihlahleni somunga, kumbe amakhiwane ekhahasini na?

¹⁷Yilesi nalesosihlahla esihle sithela izithelo ezinhle, kodwa isihlahla esibi sithela izithelo ezimbi.

¹⁸Isihlahla singethele zithelo ezimbi sisihle, kanti futhi isihlahla singethele zithelo ezinhle sisibi.

¹⁹Yilesi nalesosihlahla esingatheli izithelo ezinhle siyonqunywa siphoswe emlilweni.

²⁰Ngakhoke niyobazi ngemisebenzi yabo lababaphrofethimbumbulu.

“Angizange ngazane nani”

(Luk 13:25-27)

²¹“Akusibo bonke abathi kimi: ‘Nkosi! Nkosi!’ abayokwamukelwa embusweni wezulu, kodwa yilabo kuphela abafeza intando kaBaba osezulwini.

²²Mhla uMvelinqangi esehlulela okokugcina baningi abayothi kimi: ‘Nkosi! Nkosi! Asiphrofethanga yini egameni lakho, sakhapha ngalo amadimoni, senza imisebenzi eminingi emangalisayo na?’

²³Sengiyobatshela ngokusobala ngithi: ‘Angizange ngazane nani. Dedani kimi lezizigilamkhuba!’

Indlu enesisekelo nengenaso

(Luk 3:47-49)

²⁴“Ngakhoke, lowo ozwa engikushoyo akwenze, uyoba njengendoda ehlakaniphileyo eyakha indlu yazinza edwaleni.

²⁵Lana uzamcolo, kwatheleka izikhukhula, kwabhenguza izivunguvungu kuleyondlu. Kepha kayidilikanga, nakhu phela yayizinze edwaleni.

²⁶Kodwa lowo ozwa engikushoyo angakwenzi, uyoba njengendoda eyisiwula eyakha indlu yayo esihlabathini.

²⁷Lana uzamcolo, kwatheleka izikhukhula, kwabhenguza iziphapho kuleyondlu, yayisibhidlika yathi hhidli.”

Igunya likaJesu

²⁸UJesu waqeda ukukhuluma, abantu kwabamangalisa ukufundisa kwakhe,

²⁹ngoba wabafundisa ngegunya engananzi; akabafundisanga njengezazimibhalo.

UMatewu 8

UJesu uphilisa umuntu onochoko

(Mark 1:40-45; Luk 5:12-16)

¹UJesu wehla entabeni walandelwa izindimbane zabantu.

²Kwasuka umuntu onochoko wafike wamkhothamela wathi: “Nkosi, uma uthanda ukungihlambulula ngiphile ungakwenza.”

³UJesu welula isandla wamphatha wathi: “Ngiyathanda, hlambuluka!” Wahlanjululwa esifweni sakhe khona lapho, waphila.

⁴UJesu wayesethi kuye: “Qaphela ungakutsheli muntu lokhu, kodwa hamba uziveze kumphristi, akuhlale! Bese wethula umhlatshelo njengoba kwayaleza uMose, ukuze kufakazeke kubantu ukuthi usuhlanjululiwe.”

UJesu uphilisa inceku yenduna yamabutho

(Luk 7:1-10)

⁵Kuthe uJesu esangena emzini waseKhaphenawume, kweza kuye induna yamabutho amaRoma, yamnxusa ukuba ayisize

⁶yathi: “Nkosi, inceku yami ilele phansi ekhaya, ife uhlangothi iphethwe kabi yizinhlungu.”

⁷UJesu wathi kuyo: “Ngiyeza ngizoyiphilisa.”

⁸Induna yamphendula yathi: “Nkosi, akungifanele ukuba ungangena kwami. Kepha khipha izwi nje, yikhona inceku yami izophila!

⁹Kwamina ngingumuntu ophethwe ngabanye, kanti nami ngiphethe amabutho. Ngiyaye ngithi komunye: ‘Hamba!’ abesehamba. Nakomunye ngithi: ‘Woza!’ abeseza. Ngithi encekwini yami ayenze into ethile, iyenze.”

¹⁰UJesu wakuzwa lokhu wababaza, wakhuluma emshungwini owawumlandela wathi: “Ngiqinisile impela, angikaze ngibone muntu wakwalsrayeli enokholo olungaka.

¹¹Kepha ngithi kini, baningi abayoqhamuka empumalanga nasentshonalanga, bahlale badle noAbrahama noIsaka noJakobe embusweni wezulu.

¹²Kodwa amadodana ombuso ayolahlwa ebumnyameni, lapho kuyoba khona ukukhala nokugedla amazinyo.”

¹³UJesu wakhuluma enduneni yamabutho wathi: “Hamba kahle! Uzokwenzelwa lokho njengoba ukholiwe.” Yaphila ngaso lesosikhathi inceku.

UJesu uphilisa umkhwekazi kaPhetro

(Mark 1:29-31; Luk 4:38-39)

¹⁴UJesu waya emzini kaPhetro. Wafike wabona umkhwekazi kaPhetro elele phansi, ephethwe ngumkhuhlane.

¹⁵Wamthinta isandla; umkhuhlane waphela, wayeselulama qede wambungaza.

UJesu uphilisa abantu abaningi ngokuhlwa

(Mark 1:32-34; Luk 4:40-41)

¹⁶Kwahwalala kwase kulethwa kuJesu abantu abaningi ababephethwe ngamadimoni. Wakhapha kubo imimoya ngezwi nje lodwa, waphilisa bonke ababegula,

¹⁷kwagcwaliseka okwashiwo ngomlomo womphrofethi uIsaya kwathiwa: “Wetshatha umthwalo wobuthakathaka bethu, wanyinyitheka nangezifo zethu.”

Abaya kuJesu befisa ukumlandela

(Luk 9:57-62)

¹⁸UJesu wabona izindimbane zabantu zimngungile wathi akuwelelwe ngaphesheya kwechibi.

¹⁹Isazimibhalo esithile sasondela safike sathi: “Mfundisi, ngiyokumlandela nomaphi lapho uya khona.”

²⁰UJesu wasiphendula wathi: “Izimpungushe zinemihume, nezinyoni zinezidleke, kepha iNdodana yesintu ayinandawo yokuthambeka uhlangothi iphumule.”

²¹Omunye kubafundi wathi: “Nkosi, bengicela ukuba ungivumele kengiyongcwaba ubaba kuqala! ”

²²UJesu wathi: “Ngilandele, ubayeke abafuleyo bangcwabane bodwa! ”

UJesu uthulisa isiphepho

(Mark 4:35-41; Luk 8:22-25)

²³Wakhwela esikebheni, elandelwa ngabafundi bakhe.

²⁴Kwagubhuka isiphepho somoya esinamandla savunguza echibini, amadlambi agubha agabha isikebhe. Kodwa uJesu wayelele.

²⁵Abafundi basondela kuye, bamvusa bathi: “Nkosi sisindise, nakhu sifa! ”

²⁶Wayesethi kubo: “Nesabani kangaka, nina eninokukholwa okuncane na? ” Wavuka wakhuza umoya nechibi, kwathula kwathi cwakalala.

²⁷Abantu base bemangala bathi: “Unhloboni lo olalelwa umoya ngisho namagagasi imbala? ”

UJesu ukhipha amadimoni kubantu ababili

(Mark 5:1-20; Luk 8:26-39)

²⁸Wafika ezweni lamaGadara elingaphesheya kwechibi laseGalile. Wanqwamana nabantu ababili bevela emathuneni. Babenamadimoni, ubudlova babo buyingozi kangangoba kwakungekho muntu owayengalokotha ahambe ngaleyondlela.

²⁹Baklabalasa bathi: “Usifunani wena Ndodana kaNkulunkulu na? Ngabe uze lapha ukuzosihanqaza ngezinhlupho singakafiki isikhathi na? ”

³⁰Buqamama kwakweluke umhlambi omkhulu wezingulube.

³¹Amadimoni azikhalela kuJesu athi: “Uma usikhipha, sidedele singene ezingulubeni! ”

³²Wathi kuwo: “Phumani nihambe! ” Ayesephuma esengena kuzo. Umhlambi wonke washo wagulukudela esiweni wagxambukela echibini, waminza.

³³Abelusi bezingulube babaleka, baya emzini bafike babika konke okwenzekileyo baxoxa eyabafokazi ababekade benamadimoni.

³⁴Abantu balowomuzi baphuma bonke bamhlangabeza uJesu. Kwathi bangambona bamncenga ukuba aphume aphele kwelakubo.

UMatewu 9

UJesu uphilisa umuntu ofe uhlangothi

(Mark 2:1-12; Luk 5:17-26)

¹UJesu wakhwela esikebheni, wawelela ngaphesheya kwechibi wabuyela kubo eKhaphenawume.

²Baletha kuye isiguli silele ohlakeni, sife uhlangothi. Kuthe lapho uJesu ebona ukukholwa kwabo, wathi kuso: “Mntanami, yima isibindi! Izono zakho zithethelelwe.”

³Izazimibhalo ezithile zase zizindla zithi: “Lomuntu uhlambalaza uNkulunkulu.”

⁴UJesu wakuzwa egazini ukuzindla kwabo, wathi: “Nikuzindlelani okubi na?”

⁵Yikuphi okulula ukukusho kumuntu, ukuthi: ‘Izono zakho zithethelelwe,’ nokuthi: ‘Sukuma uhambe?’

⁶Ngizonidelisa nibone ukuthi iNdodana yesintu inegunya lokuthethelela izono emhlabeni.” Wathi kogulayo: “Sukuma uthathe uhloka lwakho ubuyele kini!”

⁷Indoda yasukuma yabuyela kubo.

⁸Kwathi lapho abantu bekubona lokhu, besaba badumisa uMvelinqangi onike abantu igunya lokwenza izinto ezingaka.

UJesu ubiza uMatewu

(Mark 2:13-17; Luk 5:27-32)

⁹UJesu wasuka lapho, wahamba. Wadlula lapho kutheliswa khona, wabona indoda okuthiwa nguMatewu ihlezi isebenza, wathi kuyo: “Woza ungilandele!” Yayisuka njalo isiba ngumlandeli wakhe.

¹⁰Kwase kwenzeka uJesu ehlezi kwaMatewu kudliwa. Dukuduku sekufika abathelisi abaningi nezoni, sebehlala bedla kanye naye nabafundi bakhe.

¹¹Bakubone lokhu abafarisi, bese bebuza kubafundi bakhe bethi: “Angadla kanjani umfundisi wenu nabathelisi nezoni na?”

¹²Akuzwe lokhu uJesu abesethi: “Abaphilileyo abadingi nyanga kodwa idingwa ngabagulayo.

¹³Ake nihambe nifunde ukuthi imibhalo iqondeni lapho uNkulunkulu ethi: ‘Engikuthandayo yisihe, umhlatshelo qha.’ Ngoba angizelanga ukubiza abalungileyo, kodwa ngezela ukuzomema izoni.”

UJesu uchaza ngokuzila ukudla

(Mark 2:18-22; Luk 5:33-39)

¹⁴Abafundi bakaJohane umbhabhadisi baya kuJesu bafike bathi: “Abafundi bakho kabazili ngani ukudla, kodwa thina nabafarisi sibe sikuzila na?”

¹⁵UJesu wabaphendula wathi: “Kungenzeka yini ukuba nxa kushadwa ikhetho lihlale lilusizi ngenkathi umyeni esahleli nalo na? Phinde, kodwa kuyofika isikhathi lapho liyokwaphucwa khona umyeni, bese lizila-ke ngalesosikhathi.

¹⁶“Akukho muntu ochibela isiqephu esisha engutsheni endala, ngoba lesisichibi siyoshwabana siklebhule ingubo, imbobo yande kunakuqala.

¹⁷Futhi akwethiwa iwayini eliseyifumuka ezimvabeni zesikhumba esezizindala, ngoba uma kwenziwa lokho, izimvaba ziyaqhuma, kuchitheke iwayini, konakale nezimvaba. Phela ifumuka liyaye lethiwe ezimvabeni ezintsha kokubili kugcineke kahle.”

Indodakazi yomphathi wesinagoge; owesifazane owathinta ingubo kaJesu

(Mark 5:21-43; Luk 8:40-56)

¹⁸Kuthe uJesu esakhuluma nabo ngalokhu, kwasondela indoda eyayingumphathi wesinagoge, yafike yamkhothamela yathi: “Indodakazi yami isand' ukushona. Woza uyibeke izandla iphile!”

¹⁹UJesu wasuka wahamba nayo nabafundi bakhe.

²⁰Kwakukhona owesifazane owayesephathwe yisifo sokopha iminyaka eyishumi nambili. Waqhamukela uJesu ngemuva, wafike wathinta umphetho wengubo yakhe.

²¹Phela owesifazane lo wazitshela ukuthi: “Uma nje ngingathinta ingubo yakhe ngiyosinda.”

²²UJesu waphenduka, wambona wathi kuye: “Mntanami, yima isibindi! Ukukholwa kwakho kukusindisile.” Owesifazane waphila kusukela kulesosikhathi.

²³UJesu waya emzini womphathi wesinagoge, wafike wakhangwa ababebetha imitshingo kulilwa, nesixuku sixokozela.

²⁴Wayesethi: “Ake niphume lapha! Intombazane kayifile, ilele.” Bamhleka usulu.

²⁵Kuthe abantu sebekhishelwe phandle, wangena lapho intombazane yayikhona, wafike wayibamba ngesandla, yavuka.

²⁶Lendaba yaduma kulo lonke lelozwe.

UJesu uphilisa izimpumpithe ezimbili

²⁷Lapho uJesu esesuka kuleyondawo, walandelwa yizimpumpithe ezimbili zimemeza zithi: “Ndodana kaDavide, sihawukele!”

²⁸Wangena endlini izimpumpithe zaya kuye, wayesethi kuzo: “Niyakholwa yini ukuthi ngingase nginisize na?” Zaphendula zathi: “Yebo Nkosi!”

²⁹Wathinta amehlo azo wathi: “Kuzokwenzeka lokho enikukholwayo.”

³⁰Zavuleka amehlo zabona. UJesu wazidonsa ngendlebe wathi zingalokothi zitshela muntu ngokwenzekileyo.

³¹Kepha zathi zisuka nje zahamba zasakaza ngaye kulo lonke lelozwe.

UJesu uphilisa isimungulu sikhulume

³²Kuthe besasuka lababantu, kwasiwa kuJesu isimungulu esasinedimoni.

³³Kwathi ukuba idimoni liphume, isimungulu sakhuluma. Izindimbane zamangala zathi: “Ayikaze ibonwe into enje kwaIsrayeli!”

³⁴Kodwa abafarisi bathi: “Yinkosi yamadimoni akhipha ngayo amadimoni.”

UJesu ufikelwa isihe

³⁵UJesu wayehamba eguduza zonke izigodi nezigojana, efundisa emasinagogeni abo eshumayela indaba ethokozisayo yombuso kaNkulunkulu, ephilisa abagulayo ababephethwe yizifo ngezifo.

³⁶Kwathi ukuba abone izinkumbi zabantu, wafikelwa isihe ngoba babekhathazekile bethithibele kuhle kwezimvu ezingenamalusi.

³⁷Wathi kubafundi bakhe: “Isivuno sikhulu, kepha abavuni bambalwa.

³⁸Ngakhoke celani umniniso ukuba athumele izisebenzi ziye esivunweni sakhe!”

UMatewu 10

UJesu uqoka abaphostoli abayishumi nambili

(Mark 3:13-19; Luk 6:12-16)

¹UJesu wabiza abafundi bakhe abayishumi nambili basondela kuye, wabapha amandla okukhipha imimoya engcolileyo nokuphilisa abagulayo ababephethwe yizifo ngezifo.

²Nanka amagama abaphostoli abayishumi nambili: owokuqala nguSimoni okuthiwa nguPhetro nomfowabo uAndreya, uJakobe noJohane amadodana kaZebedi,

³uFiliphu noBhatolomu, uTomasi noMatewu umthelisi, uJakobe kaAlfiyose noThadiyose,

⁴uSimoni umshokobezi noJudasi Iskariyotho owagcina esethengise ngoJesu ezitheni.

Ukuthunywa kwabayishumi nambili

(Mark 6:7-13; Luk 9:1-6)

⁵UJesu wathuma laba abayishumi nambili, wabatshela wathi: “Ningayi kwelabezizwe, ningangeni nasemadolobheni aseSamariya!

⁶Kodwa yanini kwabendlu yakwaIsrayeli abayizimvu ezilahlekileyo.

⁷Lapho nihambela khona fikani nishumayele nithi: ‘Umbuso wezulu ususondele.’

⁸Philisani abagulayo, nivuse abafuleyo, niphilise abanochoko bahlanjululwe, nikiphe amadimoni. Naphiwa ngesihle, ngakhoke nani yiphani ngesihle!

⁹Ningayiphathi emakhukhwini enu imali eyigolide nesiliva nethusi,

¹⁰ningaphathi kwasikhwama sendlela, nasambatho sesibili nazimbadada naludondolo, ngoba kufanele isisebenzi siphile ngomsebenzi waso.

¹¹“Nxa ningena edolobheni noma emzini, anobhekisisa kahle ukuthi yiliphi ikhaya okufanele nikhuleke isikhundla kulo, ningenise-ke lapho nize nimuke kuleyondawo.

¹²Nalapho ningena kulelokhaya anobabingelela, nibafisele ukuthula.

¹³Uma lesisibusiso enibafisela sona sibafanele, siyoba phezu kwabo, kepha uma singabafanele siyobuyela kini.

¹⁴Uma kukhona onganamukeli kumbe engakulaleli enikushoyo, lishiyeni lelokhaya noma lesosigodi nibathuntuthele uthuli lwezinyawo zenu.

¹⁵Ngoqobo lonke, kuyothi mhla wosuku uMvelinqangi ayokwahlulela ngalo, abathambisele isigwebo abaseSodoma naseGomora kunokuba athambisele abantu balomuzi.

Izinhlupheko ezizayo

(Mark 13:9-13; Luk 21:12-17)

¹⁶“Njengoba nginithuma nje nifana nezimvu ziya phakathi kwamankentshane. Ngakhoke khaliphani njengezinyoka, nibe nhliziyomhlophe njengamajuba!

¹⁷Xwayani abantu, ngoba bayoniyisa ezigcawini zokwahlulela, banibhaxabule emasinagogeni abo.

¹⁸Niyohudulelwa phambi kwababusi namakhosi ngesizathu sokuthi ningabami, nifakaze ngami phambi kwabo naphambi kwabezizwe.

¹⁹Kodwa lapho sebeniyisa ezigcawini, ningazikhathazi ngokuthi niyophendula nithini, ngoba ngalowomzuzu niyowanikwa amazwi okuphendula.

²⁰Lokho enikushoyo kuyobe kungasaphumi kini, kodwa kuyobe sekukhuluma uMoya kaYihlo.

²¹“Umuntu uyonikela umfowabo ukuba abulawe, uyise anikele umntanakhe, abantwana bavukele abazali babo ukuba babulawe.

²²Bonke bayonizondela isizathu sokuthi ningabami. Kodwa lowo oqinisela kuze kube sekupheleni uyosindiswa.

²³Kepha uma kwenzeka benizingela emzini othile, anobalekela komunye. Ngiyaqinisa impela, iNdodana yesintu iyofika ningakawuqedi umsebenzi wenu emizini yakwalsrayeli.

²⁴“Akukho mfundi oke abe mkhulu kunalowo omfundisayo, futhi asikho isisebenzi esikhulu kunomnumzane esimsebenzelayo.

²⁵Kusuke sekwanele kumfundi uma eselingana nomfundisayo, nakuso isisebenzi uma sesilingana nesimsebenzelayo. Uma uSokhaya bemethuka ngokuthi nguBhelezabhule, kangakanani-ke abomkhaya wakhe!

Ofanele ukwesatshwa

(Luk 12:2-7)

²⁶“Ngakho yimani isibindi ningabesabi abantu! Ngoba konke okusithakeleyo kuyovezwa obala, nokufihlakeleyo kuyokwaziwa.

²⁷Lokho engikukhulume kini ebumnyameni, anokusho obala, nalokho enikuhletshelweyo kushumayeleni kudume zonke izihosha!

²⁸Ningabesabi laba ababulala umzimba, bengeke bawubulala umphefumulo. Kunalokho yesabani uNkulunkulu onamandla okubhubhisa umzimba ngisho nomphefumulo esihogweni.

²⁹Kanti imizwilili emibili ayithengiswa yini ngesenti na? Nokho awukho nowodwa umzwilili oshaywa uwe, uMvelinqangi engazi.

³⁰Kanjalo nani, uMvelinqangi wazi ngisho nesibalo sezinwele emakhanda enu.

³¹Ngakhoke yimani isibindi ningesabi! Nina niyigugu nedlula intengo yomhlambi wemizwilili.

Ukuvuma uKristu phambi kwabantu

(Luk 12:8-9)

³²“Lowo ovuma phambi kwabantu ukuthi ungowami, nami ngiyomvuma phambi kukaBaba osezulwini.

³³Kepha lowo ongiphika phambi kwabantu, nami ngiyomphika phambi kukaBaba osezulwini.

Ukuthula nokungezwani

(Luk 12:51-53; 14:26-27)

³⁴“Nize ningazikhohlisi nithi ngilapha nje ngilethe ukuthula emhlabeni! Ngangingalethe khona ukuthula, kodwa ukungezwani.

³⁵Ngangizodala ukwahlukana, ukuba kumelane indodana noyise, indodakazi nonina, umalokazana noninazala,

³⁶abomndeni womuntu bese beba yizitha zakhe.

³⁷“Lowo othanda uyise nonina kakhulu kunami, nalowo othanda indodana nendodakazi yakhe kakhulu kunami, akumfanele ukuba ngumfundi wami,

³⁸nalowo ongetshathi isiphambano sakhe angilandele, akumfanele ukuba ngumfundi wami.

³⁹Lowo ozuza ukuphila kwakhe kuzomlahlekela, nalowo okumlahlekelayo ukuphila kwakhe ngenxa yami uyokuzuza.

Abayothola umvuzo

(Mark 9:41)

⁴⁰“Lowo onemukelayo wemukela mina, kanti lowo ongemukelayo wemukela uNkulunkulu ongithumileyo.

⁴¹Labo abemukela umphrofethi ngoba engumphrofethi, bayothola umvuzo ofanele umphrofethi, nalabo abemukela olungileyo ngoba engolungile, bayothola umvuzo ofanele olungileyo.

⁴²Nginyaqinisa impela ngithi, labo abaphuzisa abe munye kulaba abancinyane abangelutho, bamuphe noma kuyiconsana nje lamanzi abandayo, ngesizathu sokuba engumfundi wami, ngeke kwenzeke bangawutholi umvuzo wabo.”

UMatewu 11

UJohane umbhabhadisi uthumela kuJesu

(Luk 7:18-35)

¹Kwathi lapho uJesu eseqedile ukuyala abafundi bakhe abayishumi nambili, wasuka lapho waya emadolobheni akulelozwe ukuba afundise ashumayele kuwo.

²UJohane umbhabhadisi wabikelwa esejele wezwa ngemisebenzi kaKristu, wayesethuma abafundi bakhe

³ukuba bambuzele bathi: “Wena unguye yini obhekiweyo ukuthi uyeza, kumbe sime silindele omunye na?”

⁴UJesu waphendula wathi: “Hambani nikulandise uJohane lokho enikuzwile nenikubonile:

⁵izimpumputhe seziyabona, izishosha seziyahamba, abanochoko bayahlanjululwa, izithulu seziyezwa, abafuleyo bayavuswa, izimpofana zishunyayezwa indaba emnandi kaNkulunkulu.

⁶Ubusisiwe lowo ongakhubeki awe ekukholweni ngenxa yami.”

⁷Aphindela emuva lawomadoda, uJesu wasala wakhuluma kubantu ngoJohane wathi: “Kambe naniyobukani ehlane na? Umhlanga untengantengiswa umoya?

⁸Qha! Naniyobukani kanti? Umuntu ogqoke izingubo ezinofonofu na? Phela labo abevatha kanjalo bangabezigodlo zamakhosi.

⁹Empeleni naniyaphi kanti? Nanithi niyofika nibone umphrofethi na? Yebo, ngithi-ke nabona lukhulu kunumphrofethi.

¹⁰Nguye uJohane okulotshwe ngaye embhalweni ongcwele kwathiwa: “‘UNkulunkulu uthi: Naso isigijimi sami engisithuma phambi kwakho, ukuba sikuhlahlele indlela.’

¹¹“Lalelani lapha nginitshela! Akukho noyedwa ozelwe yisifazane omkhulu kunoJohane umbhabhadisi. Noma kunjalo kodwa, ngisho nomncane embusweni wezulu mkhulu kunaye.

¹²Kusukela emihleni kaJohane umbhabhadisi kuze kube manje abantu baphangelana ngombuso wezulu, nabazamayo bayawufuzula bangene.

¹³Bonke abaphrofethi nomthetho kaMose babikezela ngombuso kaNkulunkulu kwaze kwafika uJohane.

¹⁴Uma nikuzwa lokho engikushoyo, uJohane unguElija lowo okwabikezelwa ngaye ukuthi uyofika.

¹⁵Onendlebe akezwe engikushoyo!

¹⁶“Kodwa ngingabafanisa nantoni abantu balemihla na? Banjengezingane zihlezi phandle zidlala amaqembu, elinye limemeza lisola

¹⁷lithi: “ ‘Sinishayeke ihlombe kodwa anisinanga, sacula ezokulila kodwa anikhalanga!’

¹⁸“Phela uJohane ufike wazila ukudla newayini, base bethi unedimoni.

¹⁹INdodana yesintu yafika yadla yapuzuza, sebethi: ‘Ake nibone! Lomuntu uyisidlakudla nenkolotsha, umngani wabathelisi nezoni.’ Phela inhlakanipho kaNkulunkulu ibonakalisa ngomphumela wayo ukuthi iqinisile.”

Imizi engaphendukiyo

(Luk 10:13-15)

²⁰Kabaphendukanga abantu baleyomizi lapho uJesu enza khona imisebenzi yakhe eminingi emangalisayo. Wabasola-ke wathi:

²¹“Maye we Khorazini! Maye we Bhetsayida! Ngoba lezizimanga ezenziwe kuni, ukuba zazenziwe eThire naseSidoni, abantu balapho ngabe bazishaya kudala bembatha amasaka bazisola babhuquza othulini baphenduka.

²²Ngqiqinisile ngempela, mhla wosuku uMvelinqangi ayokwahlulela ngalo, uyobathambisela isigwebo abaseThire naseSidoni kunokuba athambisele nina.

²³Nawe Khaphenawume! Uthi kambe uyophakanyiselwa ezulwini na? Phinde, uyokwehliselwa kwelabafileyo. Ngoba lemisebenzi emangalisayo eyenziwe kuwe, ukuba yayenziwe eSodoma, ngabe lowomuzi usakhile nanamuhla.

²⁴Ngithi kuwe, mhla wosuku uMvelinqangi ayokwahlulela ngalo, uyobathambisela isigwebo abaseSodoma kunokuba athambisele wena.”

Ukuphumula kutholakala kuJesu

(Luk 10:21-22)

²⁵UJesu wakhuluma kulesosithuba wathi: “Baba, wena obusa izulu nomhlaba! Ngiyakubonga ngiyakubabaza wena ozifihlileyo lezizinto kwabahlakaniphileyo nabayizazi kepha wazambulela abayizingane.

²⁶Yebo Baba, kuthande wena ukuba kube njalo!

²⁷“UBaba ukwethule konke esandleni sami. Akakho ngaphandle kukaYise owaziyo ukuthi iNdodana ingubani. Akakho nowaziyo ukuthi uYise ungubani, ngaphandle kweNdodana nalabo ethanda ukumambula kubo.

²⁸“Wozani kimi nina nonke enikhandlekileyo nenisindwa yimithwalo, ukuze nginiphumuze.

²⁹Ngimnene ngithobile, ngakhoke zethweseni ijoka lami nifunde kimi, yikhona izinhliziyu zenu ziyophunyuzwa.

³⁰Ngoba ijoka lami alinzima, nomthwalo enginethwesa wona ulula.”

UMatewu 12

Abafundi bakha izikhwebu kuyisabatha

(Mark 2:23-28; Luk 6:1-5)

¹Akubanga nsuku ngaki uJesu wadabula emasimini kuyisabatha. Abafundi bakhe balamba, base bebhonyula izikhwebu badla.

²Bakubuke lokhu abafarisi bese bethi kuye: “Awubheke! Abafundi bakho benza okungemthetho ukuba kwenziwe kuyisabatha.”

³Kodwa wabaphendula wathi: “Kanifundanga yini ngesenzo sikaDavide mhla elambile kanye neqembu lakhe?

⁴Wangena endlini kaNkulunkulu, badla izinkwa ezazethulwe kuNkulunkulu, yize noma kwakungemthetho ukuba azidle yena neqembu lakhe, kepha zidliwa abaphristi kuphela.

⁵Anifundanga yini futhi emthethweni ukuthi kuyaye kuthi ngamasabatha abaphristi baweqe umthetho wesabatha ethempelini, nokho bangabi nacala na?

⁶Ngithi-ke kukhona lukhulu kunethempeli lapha.

⁷Embhalweni ongcwele uNkulunkulu uthi: ‘Engikuthandayo yisihe, umhlatshelelo qha.’ Ukuba benazi ukuthi lokhu kuqonda ukuthini, beningeke nibalahle abangenacala.

⁸Ngoba iNdodana yesintu iyinkosi yesabatha.”

Umuntu owayenesandla esishwabeneyo

(Mark 3:1-6; Luk 6:6-11)

⁹UJesu wasuka lapho waya esinagogeni labo.

¹⁰Kwakukhona kulo umuntu owayenesandla esishwabeneyo. Babuza uJesu bathi: “Kungumthetho yini ukuba kuphiliswe ngosuku lwesabatha na? ” Besho ngoba befuna izaba zokummangalela.

¹¹Wayesethi kubo: “Uma omunye wenu enemvu eyodwa, ibisikhalakathela emgodini kuyisabatha, akayibambi ayikhiphe na?

¹²Pho umuntu usengalinganiswa nemvu na? Ngakhoke sivunyelwe emthethweni ukuba simsize ngesabatha.”

¹³Wayesethi kulowomuntu: “Yelula isandla! ” Waselula, saphila safana nesinye.

¹⁴Abafarisi baphuma esinagogeni, bamakhela uzungu lokumbulala uJesu.

Inceku ekhethiweyo kaNkulunkulu

¹⁵UJesu wakuzwa lokho washiya kuleyondawo. Walandelwa ngabaningi, waphilisa bonke abagulayo.

¹⁶Wabadonsa ngendlebe wathi bagamvezi ukuthi ungubani.

¹⁷Lokhu kwenzeka ukuba kugcwaliseke okwashiwo ngomlomo womphrofethi ulsaya kwathiwa:

¹⁸“Nansi inceku yami engiyikhethileyo. Ngiyayithanda, ngithokoza ngayo. Ngiyokwehlisela kuyo uMoya wami, ishumayeze abezizwe ngobuqotho bami.

¹⁹Ngeke idazisane nkani namuntu, ibange umsindo iklabalase emigwaqweni.

²⁰Umhlanga ofcekileyo ayiyikuwaphula, icime nempokwe yesibani efiyozayo. Iyokhuthazela ilwele ukulunga kuze kunqobe;

²¹izizwe zonke ziyobeka ithemba egameni layo.”

UJesu uchaza ngoBhelezabhule

(Mark 3:20-30; Luk 11:14-23; 12:10)

²²Bayisa kuJesu umuntu owayenedimoni; wayeyimpumpithe, futhi eyisimungulu. UJesu wamphilisa, wabona wakhuluma.

²³Izixuku zakhela imilomo zonke, zathi: “Lo akasiyo yini iNdodana kaDavide na?”

²⁴Kwathi ukuba abafarisi bakuzwe lokhu bathi: “Yinkosi yamadimoni uBhelezabhule kuphela, lomuntu akhipha ngaye amadimoni.”

²⁵Kodwa uJesu wakwazi abakuzindlayo wathi kubo: “Yilowo nalowombuso oqhekeka ulwe wodwa uyokuwa. Yilowo nalowomuzi noma umndeni omelene wodwa uyochitheka.

²⁶Uma uSathane ezichitha, phela ngabe kusho ukuthi umbuso wakhe umelene wodwa. Pho ungema kanjani na?

²⁷Uma ngabe kunguBhelezabhule engikhipha ngaye amadimoni, pho abalandeli benu bona bawakhipha ngani na? Yibo asebenilahla ngecala.

²⁸Kepha uma ngikhipha amadimoni ngoMoya kaNkulunkulu, kusho ukuthi umbuso kaNkulunkulu usufikile kini.

²⁹“Ukhona ongalokotha angenele isiqhwaga aphanje impahla yaso, engaqalanga wasibopha na? Bese kuba yima ephanga-ke endlini yaso.

³⁰“Lowo ongahambisani nami umelene nami; nalowo ongangibuthisi uma ngiqoqa, empeleni uyachitha.

³¹Ngakhoke ngithi kini, zonke izono zabantu nayo yonke inhlamba yabo iyothethelelwa, kodwa ukuhlambalaza uMoya kaNkulunkulu ngeke kwathethelelwa.

³²Yilowo nalowo okhuluma okuphambene neNdodana yesintu uyothethelelwa. Kodwa lowo okhuluma okuphambene noMoya oyiNgcwele kayikuthethelelwa kulomhlaba ngisho nakwelizayo.

Isihlahla nezithelo zaso

(Luk 6:43-45)

³³“Kuphakathi kokuthi nincome isihlahla, nezithelo zaso nithi zinhle, noma nigxeke isihlahla, nezithelo zaso nithi zimbi. Isihlahla siyaye saziwe ngezithelo zaso.

³⁴Nzalo yezinyoka! Ningakhuluma kanjani okulungileyo nonakele kangaka na? Ngoba umlomo womuntu uphahluka lokho okumbusa enhliziyweni yakhe.

³⁵Umuntu olungileyo uveza okuhle okuvela enhliziyweni enhle, nomuntu omubi uveza okubi okuvela enhliziyweni embi.

³⁶“Ngithi kini, mhla wosuku uMvelinqangi ayokwahlulela ngalo, umuntu ngomuntu uyozilanda ngalelo nalelogama eliyize ake walikhuluma.

³⁷Ubusuwahlulelwa ngamazwi akho, likuthethe kumbe likulahle icala.”

Isizukulwane esonakeleyo sifuna isibonakaliso

(Mark 8:11-12; Luk 11:29-32)

³⁸Sekusuka abathile bezazimibhalo nabafarisi sebethi kuJesu: “Mfundisi, sifuna ukuba ukhombise ngesibonakaliso ukuthi uvela kuNkulunkulu.”

³⁹Wabaphendula wathi: “Abantu balemihla bayisizukulwane esonakeleyo esihlubuka uNkulunkulu! Bafuna isibonakaliso, kodwa kabazukhonjiswa sibonakaliso ngaphandle kwalokho okwavela umphrofethi uJona.

⁴⁰UJona wayesesiswini senhlanzi enkulu izinsuku ezintathu nobusuku bazo. Kanjalo futhi, iNdodana yesintu iyolala emathunjini omhlaba izinsuku ezintathu nobusuku bazo.

⁴¹Kuyothi mhla uMvelinqangi esewahlulela umhlaba, amadoda aseNiniva avuke ekufeni kanye nesizukulwane salemihla, asibeke icala silahlwe. Ngoba aphenduka mhlazana eshunyayezwa nguJona, kodwa ngithi, kukhona lukhulu kunoJona lapha.

⁴²Kuyothi mhla uMvelinqangi esewahlulela umhlaba, indlovukazi yakwaShebha ivuke ekufeni kanye nesizukulwane salemihla, isibeke icala silahlwe. Ngoba yasuka le kwamamangalahlwa yababela kuSolomoni iyocobela ubuhlakani, kodwa ngithi, kukhona lukhulu kunoSolomoni lapha.

Umoya omubi obuyela emuva

(Luk 11:24-26)

⁴³“Kuthi ungaphuma kumuntu umoya ongcobileyo, ulibhekise ogwadule, uzule ucinga indawo ongaphumula kuyo, kodwa ungayitholi.

⁴⁴Ubusuthi: ‘Ngizobuyela kulendlu engasuka kuyo!’ Ubusubuyela kuyo, uyifice ingenabani, isishanelwe kahle.

⁴⁵Uyasuka lapho, ulanda eminye imimoya eyisikhombisa emibi kakhulu kunawo, ingenise yonke ihlale lapho. Ngasekugcineni lowomuntu kumonakalele kakhulu kunakuqala. Yilokho-ke okuyokwehlela isizukulwane esonakeleyo salemihla.”

Izihlobo zikaJesu zangempela

(Mark 3:31-35; Luk 8:19-21)

⁴⁶Kuthe uJesu esakhuluma kubantu, kwase kufika unina nabafowabo, bema phandle befuna ukukhuluma naye.

⁴⁷Kukhona owabika wathi: “Mfundisi, nangu unyoko nabafowenu bemi phandle bafuna ukukhuluma nawe.”

⁴⁸Waphendula wathi: “Ngubani okungathiwa ungumame? Ngobani okungathiwa bangabafowethu na?”

⁴⁹Wayesekhomba ngakubafundi bakhe wathi: “Nampa abangumame nabafowethu!”

⁵⁰Ngoba yilowo nalowo owenza intando kaBaba osezulwini ungumfowethu nodadewethu nomame.”

UMatewu 13

Umzekeliso ngomhlwanyeli

(Mark 4:1-9; Luk 8:4-8)

¹Kuthe ngalo lelolanga uJesu waphuma endlini wayofundisa ngasechibini, wafike wahlala phansi.

²Kwabuthana izindimbane zabantu zamngunga waze wangena esikebheni wahlala, isixuku sonke simi osebeni.

³Washumayela ngezinto eziningi ebalandisa imizekeliso. Wathi: “Kwasuka umuntu wahamba wayohlwanyela.

⁴Enye imbewu yaqathakela ngasendleleni ehlwanyela, izinyoni zafika zayicosha.

⁵Enye yaqathakela endaweni eyidwala elalinomhlabashana. Yamila ngokushesha njengoba umhlabathi wawungajulile okutheni.

⁶Ilanga laphuma, kwathi lingabalela izithombo zahwamuka, zabuna ngoba izimpande zazo zazingajulile.

⁷Kodwa enye yaqathakela emhlabathini onehlozi lameva, okwathi lingamila lakhula laminyanisa izithombo.

⁸Kepha enye yaqathakela emhlabathini oyimvunde yathela ukudla. Yaveza izinhlamvu eziyikhulu, enye yaveza ezingamashumi ayisithupha, enye zaba ngamashumi amathathu.

⁹Onendlebe akezwe engikushoyo! ”

Inhloso yokubalandisa imizekeliso

(Mark 4:10-12; Luk 8:9-10)

¹⁰Abafundi baya kuJesu bafike bambuza bathi: “Yini ubalandise imizekeliso njalo uma ushumayeza abantu na? ”

¹¹Waphendula wathi: “Nina senikuphiwe ukuzazi izimfihlo zombuso wezulu, kodwa bona kabakuphiwe.

¹²Ngoba lowo onotho uyophiwa kweve, kepha lowo ongenalutho uyokwephucwa ngisho nalokho anakho.

¹³Ngishumayela ngibalandise imizekeliso ngoba bayabuka kodwa nokho kababoni, bayezwa kodwa nokho kabezwisisi, kabaqondi.

¹⁴Sekugcwaliseka ngabo isiphrofetho sikaIsaya lapho uNkulunkulu ethi: “ ‘Niyokuzwa uqobo lokuzwa kepha aniyikuqonda, nibone uqobo lokubona kepha kunganikhanyeli.

¹⁵Ngoba sezaba lukhuni izinhliziyi zalesisizwe, badla umvimbandlebe, bavala amehlo, ukuba bangaboni ngamehlo abo bezwe ngezindlebe zabo, izinhliziyi zabo zihlakaniphe, baphenduke ngibaphilise.’

¹⁶“Ayadela amehlo enu ngoba ayabona, zibusisiwe nezindlebe zenu ngoba ziyezwa.

¹⁷Ngiqinisile ngiyanitshela ngithi, babebaningi abaphrofethi nabantu abalungileyo ababelangazelela ukubona lokhu enikubona kwenzeka, kepha kabakubonanga, bezwe nalokhu enikuzwayo, kepha kabakuzwanga.

UJesu uchaza umzekeliso ngomhlwanyeli

(Mark 4:13-20; Luk 8:11-15)

¹⁸“Lalelani lapha nginichazele ngomzekeliso womhlwanyeli!

¹⁹Kuyaye kuthi njalo uma abantu bezwa kukhulunywa ngombuso kaNkulunkulu, bengaqondi ukuthi kuthiwani, bese kufika uSathane asuse lokho okuhlwanyelwe ezinhliziyweni zabo, kufane nembewu ehlwanyelwe endleleni.

²⁰Leyo eyahlwanyelwa endaweni eyidwala ichaza ngalabo abalizwayo izwi, basheshe balemukele balithokozele.

²¹Kabanazimpande ezijulile, kodwa balibamba okwesikhashana nje; kuthi bangafikelwa yizinsizi bahlushwe ngenxa yalo, basheshe bawe ekukholweni.

²²Leyo eyahlwanyelwa emhlabathini onehlozi lameva ichaza ngalabo abalizwayo izwi, kepha ngenxa yokunaka kwabo ezomhlaba nokuluthwa yingcebo liminyaniswe, bangabe besathela neze.

²³Kodwa leyo eyahlwanyelwa emhlabathini oyimvunde ichaza ngalabo abalizwayo izwi libachachele, bathele okuhle okuphindwe ngekhulu, abanye ngamashumi ayisithupha, abanye ngamashumi amathathu.”

Umzekeliso wokhula ensimini yamabele

²⁴Wabuye wabaxoxela omunye umzekeliso wathi: “Umbuso wezulu unjengomuntu ehlwanyele imbewu enhle ensimini yakhe.

²⁵Kuthe kusalelwe, kwafika isitha sahlwanyela ukhula phakathi kwamabele, sasuka sahamba.

²⁶Kuthe lapho amabele eseyikhaba esekhahlela, lwavumbuka nokhula.

²⁷Izisebenzi zaya kumnininsimu, zafike zathi: ‘Mnumzane, ubungatshalanga yini imbewu enhle ensimini yakho na? Pho lolukhula lubekwa yini lapha?’

²⁸Wayesephendula wathi: ‘Umuntu oyisitha owenze lokhu.’ Zambuza zathi: ‘Ufuna silusiphule na?’

²⁹Kodwa wathi: ‘Qha, nizosuke nilusiphule bese kusiphuka namabele.

³⁰Salani seniluyeka kukhule konke ndawonye kuze kufike inkathi yokuvuna. Kuyothi sekuvunwa bese ngithi kubavuni: Qoqani ukhula kuqala nilubophe izithungu luyoshiswa, kodwa amabele niwathuthele enqolobaneni yami!’ ”

Umzekeliso wohlamvana lwesihlahla sikamasitadi

(Mark 4:30-32; Luk 13:18-19)

³¹Wabuye wabalandisa omunye umzekeliso wathi: “Umbuso wezulu unjengohlamvana lwesihlahla sikamasitadi oluthathwa ngumuntu alutshale esivandeni sakhe.

³²Ngobuncane balo lwedlula zonke ezinye ezikhona. Kodwa lapho lukhula khona luhluma lwedlule zonke izilimo. Luba yisihlahla, izinyoni zize zakhele izidleke zazo emagatsheni aso.”

Umzekeliso wemvubelo

(Luk 13:20-21)

³³Wabaxoxela omunye umzekeliso wathi: “Umbuso wezulu unjengemvubelo ethathwa ngowesifazane, ayifake empushini yemicengezi emithathu emikhulu, ayixove, lemvubelo ibilise inhlama ize ikhukhumale yonke.”

UJesu ubalandisa imizekeliso

(Mark 4:33-34)

³⁴Konke lokhu uJesu wayekukhuluma kubantu ebalandisa imizekeliso. Kwakuyaye kuthi njalo lapho exoxa indaba abalandise imizekeliso,

³⁵ukuze kugcwaliseke okwashiwo ngomlomo womphrofethi kwathiwa: “Ngizokhuluma ngilande imizekeliso, Ngidalule okwakuyimfihlo kusukela umhlaba wadabuka.”

UJesu uchaza umzekeliso wokhula

³⁶Wahlakaza abantu wangena endlini. Abafundi bakhe beza kuye bafike bathi: “Sichazele ukuthi usho ukuthini lomzekeliso wokhula olusensimini.”

³⁷Waphendula wathi: “Ohlwanyela imbewu enhle yiNdodana yesintu.

³⁸Insimu ngumhlaba, imbewu enhle isho abombuso kaNkulunkulu. Ukhula lusho labo ababuswa nguSathane,

³⁹yena sitha esihlwanyela ukhula. Ukuvuna kuwukuphela komhlaba; abavuni yizingilosi.

⁴⁰Njengoba ukhula lubuthwa lushiswe emlilweni, kuyoba njalo nasekupheleni komhlaba.

⁴¹INdodana yesintu iyothumela izingilosi zayo, zihlunge embusweni wayo bonke labo abakhubekisa abanye bawe ekukholweni, nalabo abayizigilamkhuba,

⁴²zibaphose esithandweni somlilo, lapho beyokhala khona bagedle amazinyo.

⁴³Abalungileyo bayokhanya njengelanga embusweni kaYise uNkulunkulu. Onendlebe akezwe engikushoyo!

Umzekeliso womcebo ofihliweyo

⁴⁴“Umbuso wezulu unjengomcebo ufihlwe ensimini. Bese umuntu ezithela kuwo maqede awuthukuse. Ujabula yedwa ahambe athengise ngakho konke okwakhe, athenge leyonsimu.

Umzekeliso wetshe lengcebo eliyigugu

⁴⁵“Umbuso wezulu futhi unjengomhwebi ehlwaya amatshe engceboamahle,

⁴⁶okuthi angathola libe linye lentengo enkulu, ahambe athengise ngakho konke anakho abeselithenga.

Umzekeliso wenetha lokudoba

⁴⁷“Umbuso wezulu futhi unjengabadobi bephonsa inetha elwandle, libambe inhlanganisela yezinhlanzi.

⁴⁸Uma seligcwele balidonsela osebeni. Bahlala phansi, bahlunge ezidliwayo bazifake ezitsheni; bese kuthi lezo ezingadliwayo bazilahle.

⁴⁹Kuyoba njalo-ke ekupheleni komhlaba. Izingilosi ziyofika ziqembule ababi kwabalungileyo,

⁵⁰ziphonse ababi esithandweni somlilo lapho beyokhala khona bagedle amazinyo.”

Okusha nokudala

⁵¹UJesu wayesethi: “Kunichachele yini konke lokhu esengikushilo na? ”
Baphendula bathi: “Yebo, sizwe kahle.”

⁵²Wathi kubo: “Ngakhoke yilowo nalowo oyaziyo imibhalo engcwele efundisiwe ngombuso wezulu, unjengomninindlu onyomula amagugu amasha namadala emgodleni wakhe.”

UJesu bayamenqaba eNazareth

(Mark 6:1-6; Luk 4:16-30)

⁵³Kwathi lapho uJesu eseqedile ukulanda lemizekeliso wasuka kuleyondawo,

⁵⁴waphindela kwelakubo eNazareth. Wafike wafundisa esinagogeni labo. Bamangala kakhulu, bathi: “Lomuntu ukuthathaphi lokhukuhlakanipha okungaka nalawamandla okwenza izimangaliso na?”

⁵⁵Akasiyo yini indodana yombazi na? Ingani unina nguMariya, nabafowabo ngoJakobe noJosefa noSimoni noJudasi?

⁵⁶Odadewabo asihlezi nabo bonke lapha phakathi kwethu na? Ngabe lomuntu wakuthathaphi konke lokhu na? ”

⁵⁷Base bemkhipha inyumbazana. Kodwa uJesu wathi kubo: “Inyanga yaziswa kulo lonke izwe, kepha ayinaludumo kwelakubo nakwabakwabo imbala.”

⁵⁸Ngenxa yokungakholwa kwabo akenzanga misebenzi eminingi emangalisayo lapho.

UMatewu 14

Ukubulawa kukaJohane umbhabhadisi

(Mark 6:14-29; Luk 9:7-9)

¹Kuleyonkathi uHerodi inkosi eyayibusa elaseGalile yezwa ngoJesu.

²Yathi ezincekwini zayo: “NguJohane umbhabhadisi lona ovuke kwabafileyo; yingakho nje enza lemisebenzi emangalisayo.”

³Phela inkosi uHerodi yayikade idumele uJohane yambopha ngamaketango, yangquma ejele ikhwezelwa nguHerodiya umkaFiliphu owayengumfowabo wenkosi.

⁴Ngoba uJohane wayekade ethi: “Akumthetho ukuba ukipite naye.”

⁵Inkosi yayifisa ukumbulala, kepha yesaba abantu, ngoba bemazisa ngokuthi ungumphrofethi.

⁶Kuthe mhla uHerodi egubha umkhosi ekhumbula usuku lokuzalwa kwakhe, indodakazi kaHerodiya yasinela izimenywa. Yamhlaba umxhwele uHerodi

⁷waze wafunga wagomela wathi kuyo: “Cela noma yini oyithandayo, ngikuphe yona! ”

⁸Yayisisho lokho eyayikufunzwe ngunina, yathi: “Ngiphe ikhanda likaJohane umbhabhadisi khona lapha lilethwe ngogqoko!”

⁹Inkosi yadangala kabi impela, kepha ngenxa yesethembiso eyayisifunge phambi kwezimenywa yakhipha izwi lokuba intombazane inikwe.

¹⁰Yathumela ejele ukuba uJohane anqunywe ikhanda,

¹¹lase lilethwa ngogqoko entombazaneni, yalithatha yalidlulisela kunina.

¹²Abafundi bakaJohane baya bafike bathatha isidumbu sakhe basimbela. Bahamba babikela uJesu.

Izinkulungwane eziyisihlanu ziphiwa ukudla

(Mark 6:30-44; Luk 9:10-17; Joh 6:1-14)

¹³Kwathi ukuba uJesu akuzwe lokho, wasuka kuleyondawo ngesikebhe, waya endaweni eyihlane ukuba abe yedwa. Kuthe ukuba izihlwele zabantu zikuzwe lokhu, zasuka ngezinyawo zivela ezigodini ngezigodi zamlandela, zaya lapho ekhona.

¹⁴UJesu waphuma esikebheni wakhangwa uquqaba lwabantu, wayesefikelwa isihe, waphilisa abagulayo babo.

¹⁵Kuthe sekuhwalele abafundi basondela kuye bafike bathi: “Lendawo iyihlane, futhi nelanga selishonile. Tshela abantu bahlakazeke, baye emizini bazithengele okudliwayo.”

¹⁶Waphendula wathi: “Akudingekile ukuba bahambe. Bapheni nina badle!”

¹⁷Base bethi kuye: “Sinezinkwa lapha eziyisihlanu nezinhlanzi ezimbili kuphela.”

¹⁸Wathi: “Kuletheni lapha kimi!”

¹⁹Wathi abantu mabahlale phansi etshanini. Wathatha izinkwa eziyisihlanu nezinhlanzi ezimbili, wabhekisa amehlo ezulwini wabonga kuNkulunkulu. Wayesehlephula izinkwa, wazinika abafundi, base bezabela abantu.

²⁰Badla bonke besutha. Kwabuthwa imvuthuluka, kwagcwaliswa amaqoma ayishumi nambili.

²¹Amadoda adlayo lapho alinganiselwa ezinkulungwaneni eziyisihlanu, bengabalwa abesifazane nabantwana.

UJesu uhamba phezu kwamanzi

(Mark 6:45-52; Joh 6:15-21)

²²UJesu wayesebaphoqelela abafundi bakhe ukuba bangene esikebheni, bamendulele baye ngaphesheya kwechibi, ngenkathi esahlakaza abantu.

²³Kuthe esekwenzile lokho, wenyukela yedwa entabeni eyokhuleka. Sekuhlwile uJesu wayesalokhu eyedwa kuleyondawo;

²⁴kepha ngalesosikhathi isikebhe sase siqhelelene ibanga elikhulu nasogwini. Sashukunyiswa ngamagagasi, ngoba umoya wawuvunguza uphambana nabo.

²⁵Kwathi kusebusukwaneni ngemuva kokukhala kwezinkukhu zesibili, uJesu weza ngakubo ehamba phezu kwamanzi.

²⁶Lapho bembona ehamba phezu kwamanzi, bethuka kabi. Babethi ngumungcwi, base besho ngengila bethukile.

²⁷UJesu waphuthuma wabakhulumisa wathi: “Yimani isibindi, yimi bo, ningesabi!”

²⁸UPhetro waphendula wathi: “Nkosi, uma kunguwe ngempela, shono ngihambe phezu kwamanzi ngize kuwe!”

²⁹UJesu wathi kuye: “Woza!” Nempela uPhetro waphuma esikebheni, wahamba phezu kwamanzi waqonda kuJesu.

³⁰Kodwa lapho ebona ukuthi umoya uyavunguza wethuka, wayeseqala ukuzika. Wakhala wathi: “Nkosi, ngisindise!”

³¹UJesu welula isandla, wamphuthuma wambamba wathi: “Wena onokukholwa okuncane, ungabazeleni na?”

³²Bakhwela esikebheni, umoya wawusuthula.

³³Ababesikebheni baguqa ngamadolo bamkhulekela uJesu bethi: “Ngempela uyiNdodana kaNkulunkulu!”

UJesu uphilisa abagulayo eGenezareth

(Mark 6:53-56)

³⁴Bawelela ngaphesheya kwechibi baphumela ogwini ezweni laseGenezareth.

³⁵Abantu baleyondawo bambona qede uJesu, bathumela kulo lonke lelozwe, kwasiwa kuye zonke iziguli,

³⁶bafike bamnxusa ukuba azivumele zithinte okungenani umphetho nje wengubo yakhe; bonke abawuthintayo baphiliswa.

UMatewu 15

Amasiko abantu basendulo

(Mark 7:1-13)

¹Abafarisi nezazimibhalo ababevela eJerusalema basondela kuJesu, bafike bambuza bathi:

²“Kwenziwa yini ukuba abafundi bakho baphambane namasiko abantu basendulo? Ngoba uma sebezokudla kabazihlambi izandla ngokwesiko.”

³Waphendula wathi: “Nina uqobo niweqelani umyalo kaNkulunkulu nilandele amasiko enu na?”

⁴Ngoba uNkulunkulu wathi: 'Yazisa uyihlo nonyoko!' wabuye wathi: 'Lowo ohlambalaza uyise noma unina akabulawe.'

⁵Kepha nina nifundisa ukuthi, uma umuntu etshela uyise kumbe unina ethi: 'Ebengizokusiza ngakho sengikwahlukanisele uNkulunkulu,'

⁶akasaphoqekile lomuntu ukuba azise uyise. Ngalokhu anikushayi mkhuba okushiwo nguNkulunkulu, niyaye nikuchithe ngokufundisa amasiko enu.

⁷Bazenzisindini! Kanti wayeqinisile umphrofethi uIsaya lapho ebikezela amazwi kaNkulunkulu ayewasho ngani ethi:

⁸" 'Lesisizwe singidumisa ngomlomo nje, kepha izinhliziyi zabo zikude nami.

⁹Ukungikhonza kwabo kuyize nje; bafundisa imithetho eshaywe ngabantu kube sengathi ivela kimi! ' "

Okungcolisa umuntu abe ngongahlanzekile

(Mark 7:14-23)

¹⁰UJesu wabiza isixuku sasondela kuye wathi kuso: "Lalelani lapha ningizwe kahle!

¹¹Akusikho okungena ngomlomo okungcolisa umuntu abe ngongahlanzekile; kepha okuphuma emlonyeni yikhona okumngcolisayo."

¹²Abafundi base besondela kuye bafike bathi: "Uyazi nje ukuthi lokhu obukusho kubacunulile abafarisi na? "

¹³Kepha waphendula wathi: "Yilesa nalesosithombo esingatshalwanga nguBaba osezulwini siyosishulwa.

¹⁴Bayekeni benjalo! Bayizimpumpethe ezihola ezinye. Uma izimpumpethe ziholana, zokhalakathela emgodini zombili."

¹⁵UPhetro wathi: "Sichazele ukuthi lomzekeliso usho ukuthini! "

¹⁶UJesu wathi: "Kanti nani anikaqondi namanje na?

¹⁷Aniboni yini ukuthi konke okungena ngomlomo kuya esiswini, bese kuphuma ngasese na?

¹⁸Kodwa lokho okuphuma emlonyeni kuvela enhliziyweni bese kumngcolisa umuntu abe ngongahlanzekile.

¹⁹Ngoba enhliziyweni kuvela imicabango emibi ebanga umuntu ukuba abulale, aphinge, enze nokunye okunjalo okungcolileyo, ebe, afakaze amanga agxeke.

²⁰Yilokho-ke okungcolisa umuntu, kodwa ukudla ngezandla zingahlanjiwe ngokwesiko akumngcolisi umuntu."

Ukukholwa kowesifazane wakwaKhanana

(Mark 7:24-30)

²¹UJesu wasuka lapho, waqonda endaweni eseduze nemizi yaseThire naseSidoni.

²²Kwakukhona kulelozwe owesifazane othile ongowakwaKhanana. Waya kuJesu wafike wamemeza wathi: “Nkosi Ndodana kaDavide, ngihawukele; indodakazi yami ikhathazwa kabi yidimoni.”

²³Akaze amphendula. Abafundi baya kuJesu, bafike bamncenga bathi: “Menzele akufunayo asuke lapha! Ulokhu esilandela esifundekela ngomsindo.”

²⁴UJesu wathi: “Ngithunyelwe kuphela kubantu besizwe sakwaIsrayeli abayizimvu ezilahlekileyo.”

²⁵Owesifazane waya wafike wakhothama phambi kwakhe wathi: “Nkosi ngisize!”

²⁶UJesu wathi: “Akulungile ukuba kuthathwe ukudla kwabantwana kuphonselwe izinja.”

²⁷Owesifazane wamphendula wathi: “Yebo, kunjalo Nkosi, izinja ziyaye ziyidle kodwa imvuthuluka eqathaka ogqokweni lwabaninizo.”

²⁸UJesu wayesethi kuye: “Awu, mame! Kwaze kwakukhulu ukukholwa kwakho! Kuzokwenzeka lokho okufunayo.” Indodakazi yaphila ngaso lesosikhathi.

UJesu uphilisa abantu abaningi

²⁹UJesu wasuka lapho, wahamba wagudla ichibi laseGalile. Wenyukela entabeni wafike wahlala phansi.

³⁰Izindimbane zabantu zaya kuye zilethe izinyonga nezimpumputhe nezishosha nezimungulu nabanye abaningi. Zafike zababeka ngasezinyaweni zakhe, wabaphilisa.

³¹Abantu bamangala lapho bebona ukuthi izimungulu seziyakhuluma, izishosha sezisindile, izinyonga seziyahamba, izimpumputhe seziyabona. Base bedumisa uNkulunkulu wakwaIsrayeli.

Izinkulungwane ezine ziphiwa ukudla

(Mark 8:1-10)

³²UJesu wabiza abafundi bakhe basondela, wathi kubo: “Ngifikelwa yisihe ngalezizinkumbi zabantu. Sebehlale nami izinsuku ezintathu, manje bazodlani? Angithandi ukuba bahambe belambile, ngoba hleze bapatalale nasendleleni sebegoduka.”

³³Abafundi baphendula bathi: “Pho kulelihlane umuntu angakuthathaphi ukudla okungenela zonke lezizinkumbi zabantu na?”

³⁴UJesu wababuza wathi: “Ninezinkwa ezingaki?” Baphendula bathi: “Ziyisikhombisa, nezinhlanzana ezimbalwa.”

³⁵Wahlalisa abantu phansi.

³⁶Wathatha izinkwa eziyisikhombisa nezinhlanzi, wabonga kuNkulunkulu wazihlephula, wazinika abafundi, base bezabela isixuku.

³⁷Badla bonke besutha. Kwase kubuthwa invuthuluka, kwagcwaliswa amaqoma ayisikhombisa.

³⁸Abadlayo lapho babeyizinkulungwane ezine, bengabalwa abesifazane nabantwana.

³⁹Wahlakaza abantu, wangena esikebheni waya ezweni laseMagadani.

UMatewu 16

Inkani yabafarisi befuna isibonakaliso

(Mark 8:11-13; Luk 12:54-56)

¹Abafarisi nabasadusi baya kuJesu besophe ukumhila. Bathi kakhombise ngesibonakaliso ukuthi unamandla avela ezulwini.

²Kodwa wabaphendula wathi: “Uma nibona amayezi ebhejile lapho seliyoshona, niyaye nithi: ‘Lizobalela nasebukhweni bezinja.’

³Uma nivuka ekuseni nibona amayezi ebhejile lisithile, nithi: ‘Lizophendula namuhla.’ Niyakwazi ukufunda izimpawu ezibonakala esibhakabhakeni; pho nehlulwa yini ukuqonda izibonakaliso zalemihla?

⁴Abantu balemihla bayisizukulwane esonakeleyo esihlubuka uNkulunkulu. Bafuna isibonakaliso, kodwa kabazukukhonjiswa sibonakaliso ngaphandle kwalokho okwavela umphrofethi uJona.” Wasuka wabashiya kanjalo.

Imvubelo yabafarisi nabasadusi

(Mark 8:14-21)

⁵Kwathi lapho abafundi sebewelega ngaphesheya kwechibi, kwahlaluka ukuthi bakhohlwe umphako.

⁶UJesu wathi kubo: “Hlalani niqaphele, nixwaye imvubelo yabafarisi nabasadusi!”

⁷Bakuzindla lokhu bebodwa bethi: “Ukusho lokhu ngoba singaphathanga sinkwa.”

⁸UJesu waphawula ukuthi bacabangani wayesethi: “Nizikhathazelani ngokuthi aninasinkwa, nina bokukholwa okuncane na?”

⁹Ngabe kusahlwe ngci engqondweni yenu na? Anisakhumbuli yini mhla ngihlephula izinkwa eziyisihlanu ngabela izinkulungwane eziyisihlanu, ukuthi kwasala amaqoma amangaki na?

¹⁰Nangamhla ngihlephula izinkwa eziyisikhombisa ngabela izinkulungwane ezine, ukuthi kwasala iziqabetho ezingaki na?

¹¹Akunichacheli ngani ukuthi bengingakhulumi kini ngezinkwa na? Xwayani imvubelo yabafarisi nabasadusi!”

¹²Kwase kubachachela abafundi ukuthi ubengabaxwayisi ngemvubelo ebilisa isinkwa, kodwa ubeqonde imfundiso yabafarisi nabasadusi.

Ubufakazi bukaPhetro ngoJesu

(Mark 8:27-30; Luk 9:18-21)

- ¹³Kwathi lapho uJesu esefikile endaweni eseduze nomuzi waseKhesariya Filippi, wabuza kubafundi bakhe wathi: “Abantu bathi iNdodana yesintu ingubani na?”
- ¹⁴Bamphendula bathi: “Kukhona abathi unguJohane umbhabhadisi, abanye bathi unguElija, kanti-ke nabanye bathi unguJeremiya noma omunye kubaphrofethi.”
- ¹⁵Wayesethi: “Pho nina nithi ngingubani na?”
- ¹⁶USimoni Phetro wamphendula wathi: “UnguMesiya, iNdodana kaNkulunkulu ophilayo.”
- ¹⁷UJesu wathi kuye: “Ubusisiwe wena Simoni kaJona, ngoba leliqiniso kawulembulelwanga ngumuntu walomhlaba, kodwa ulembulelwe nguBaba osezulwini.
- ¹⁸Nami-ke ngiyaqinisa ngithi kuwe: Wena unguPhetro. Kulelidwala ngiyobeka isisekelo sebandla lami, ngisho nokufa imbala ngeke kulizamazamise kulinqobe.
- ¹⁹Wena ngiyokunika izihluthulelo eziyigunya lombuso wezulu. Konke oyokubopha emhlabeni kuyobe kuboshiwe nasezulwini, oyokukhulula emhlabeni kuyobe kukhululiwe nasezulwini.”
- ²⁰Wayesexwayisa abafundi, wathi bangatsheli muntu ukuthi unguMesiya.

UJesu ubikezela ukufa kwakhe

(Mark 8:31 - 9:1; Luk 9:22-27)

- ²¹Kwasukela ngalesosikhathi uJesu waqala ukuchazela abafundi ukuthi kumele aye eJerusalema afike ahlupheke kabi, izigele nezikhulu zabaphristi kanye nezazimibhalo zimhluphe, abulawe, avuke ngosuku lwesithathu.
- ²²UPhetro wayesemdonsele eceleni, wamkhuza wathi: “Phinde, Nkosi! Lokhu akungenzeki kuwe!”
- ²³Waphendukela kuPhetro wathi: “Deda kimi Sathane! Ungivimba entweni okufanele ngiyenze, ngoba izinto awuzibuki ngeso likaNkulunkulu, kodwa uzibuka ngamehlo abantu.”
- ²⁴UJesu wayesethi kubafundi bakhe: “Uma umuntu ethanda ukuba ngumlandeli wami, akazidele etshathe isiphambano sakhe angilandele.
- ²⁵Ngoba lowo ofuna ukuhlenga ukuphila kwakhe kuyomlahlekela, kepha odela ukuphila kwakhe ngenxa yami uyokuzuza.
- ²⁶Kungamsiza ngani umuntu ukuba azuze konke okomhlaba, kepha alahlekelwe ngukuphila kwakhe na? Ngeke akuthenge ngalutho ukuphila kwakhe kubuye kuye.
- ²⁷INdodana yesintu iyokuza nezingilosi zayo ngobukhosi bukaYise, ibisivuza lowo nalowo njengalokho akwenzileyo.

²⁸Ake nilalele nginitshele! Kukhona abanye lapha abangayikuthathwa ukufa besahlalele ukufika kosuku abayobona iNdodana yesintu iza ngalo ngenkazimulo yobukhosi.”

UMatewu 17

UJesu uguquka esinye isimo

(Mark 9:2-13; Luk 9:28-36)

¹Kwadlula izinsuku eziyisithupha uJesu wathatha uPhetro nezelamani oJakobe noJohane, wemuka nabo benyukela entabeni ende, bebodwa.

²Waguquka bembuka, ubuso bakhe bakhazimula njengelanga, nezingubo zakhe zaba mhlophe zaxhophha.

³Khona lapho babona uMose kanye noEliza bekhuluma naye.

⁴UPhetro wathi kuJesu: “Nkosi, kube kuhle kabi ukuba sibe lapha. Uma uthanda, ngizomisa lapha amadokodo amathathu, elakho nelikaMose nelikaEliza!”

⁵Kuthe engakaligwinyi, bethuka ngefu elicwazimulayo libasithibeza, bese kuzwakala izwi efwini lithi: “Lo uyiNdodana yami engiyithandayo nengithokoza ngayo. Lalelani ekushoyo!”

⁶Abafundi bezwa bafikelwa uvalo, bathi mbo ngobuso emhlabathini.

⁷UJesu waya kubo wafike wabathinta wathi: “Vukani, nime isibindi ningesabi!”

⁸Bavusa amakhanda baqalaza, kodwa kababona muntu, babona uJesu kuphela.

⁹Kuthe besehla entabeni uJesu wabaxwayisa wathi: “Ningalokothi nitshele muntu ngalombono, iNdodana yesintu ingakavuki kwabafuleyo.”

¹⁰Abafundi bambuza bathi: “Zikusho ngani izazimibhalo ukuthi kumele kufike uEliza kuqala na?”

¹¹Waphendula wathi: “Kunjalo, kofika uEliza ezohlela konke.

¹²Kodwa-ke ngiyanitshela ukuthi sewafika uEliza, kepha kabambonanga, benza kuye abakuthandayo. Ngokunjalo bayoyiphatha kabi ngisho neNdodana yesintu.”

¹³Kwase kubachachela-ke abafundi ukuthi ukhuluma ngoJohane umbhabhadisi.

UJesu uphilisa umfana onedimoni

(Mark 9:14-29; Luk 9:37-43a)

¹⁴Babuyela esixukwini, kwafike kwaguqa umuntu phambi kukaJesu

¹⁵wathi: “Nkosi, hawukela indodana yami! Iphethwe yisithuthwane siyihlupha kabi, sekukaningi iphoseka emlilweni nasemanzini.

¹⁶Bengiyilethe lapha kubafundi bakho, kepha behlulekile ukuyiphilisa.”

¹⁷UJesu wathi: “Hhawu, loluhlobo lwabantu abonakeleyo abangenalo ukhoho! Koze kube nini ngihlezi nani na? Ngiyonibekezelela kuze kube nini na? Mletheni lapha kimi!”

¹⁸UJesu walikhuza idimoni lase liphuma kumfana; waphila ngaso lesosikhathi.

¹⁹Abafundi basondela kuJesu bambuza bebodwa bathi: “Sehlulwe yini ukukhipha idimoni kumfana na?”

²⁰Wabaphendula wathi: “Yingoba ninokhoho oluncane. Niyabona! Ukuba beninokhoho olungangohlamvana lwesihlahla sikamasitadi, beniyothi kulentaba ayisuke lapha iye laphaya, ngempela isuke. Akukho lutho eniyokwehluleka ukulwenza.

[²¹Kodwa umoya onjengalowo unqotshwa kuphela ngokukhuleka nokuzila ukudla.]”

UJesu uyaphinda ubikezela ukufa kwakhe

(Mark 9:30-32; Luk 9:43b-45)

²²Kwathi lapho sebeqoqene eGalile, uJesu wathi kubafundi: “INDodana yesintu izonikelwa ezandleni zabantu,

²³bayibulale, kodwa ivuke ngosuku lwesithathu.” Base bedabuka kakhulu.

Intela yethempeli

²⁴Kuthe sebefikile eKhaphenawume, omabhalane bentela yethempeli basondela kuPhetro bambuza bathi: “Ngabe umfundisi wenu uyayikhokha nje intela yethempeli na?”

²⁵Waphendula wathi: “Uyayikhokha.” Kuthe uPhetro esengene endlini, uJesu wamkhulumisa kuqala wathi: “Uthini wena Simoni ngalokhu? Amakhosi alomhlaba ayibiza kobani intela yempahla nentela yekhanda na? Ayibiza emadodaneni awo noma kubafo na?”

²⁶Waphendula wathi: “Kubafo.” UJesu wayesethi: “Ngakhoke amadodana akhululekile, ukuba angakhokhi.

²⁷Nokho ukuba singabacunuli, hamba uye echibini, ufike uphose udobo lwakho. Inhlanzi oyoyibamba kuqala, uyoyivula umlomo uthole uhlamvu lwemali, bese uluthatha ususithelela sobabili.”

UMatewu 18

Ngubani omkhulu embusweni wezulu?

(Mark 9:33-37; Luk 9:46-48)

¹Abafundi basondela kuJesu ngalesosikhathi, bafike bambuza bathi: “Ngabe ngubani omkhulu kunabanye embusweni wezulu na?”

²UJesu wabiza umntwana, wammisa phakathi kwabo

³wathi: “Ake nilalele nginitshela! Uma ningaphenduki nibe njengabantwana, anisoze namukelwa embusweni wezulu.

⁴Lowo ozithobayo abe njengalomntwana, nguye omkhulu kunabanye embusweni wezulu.

⁵Lowo owemukela umntwana abe munye onje ngenxa yami, wemukela mina.

Izikhubekiso

(Mark 9:42-48; Luk 17:1-2)

⁶“Okhubekisa abe munye nje kulaba abancane abakholwa kimi, amwise ekukholweni, bekungangcono koluwomuntu ukuba kuboshelwe inguzunga yetshe entanyeni yakhe, aminziswe lapho ulwandle lujule khona.

⁷Maye kulomhlaba ngenxa yezikhubekiso! Kumele zibe khona, kodwa nakho kulowomuntu ezivela ngaye!

⁸“Nquma isandla sakho nonyawo lwakho, lezizitho uzilahle uma zikukhubekisa! Kungcono kuwe ukuba ungene ekuphileni okuphakade uyingini noma uyisinqekle kunokuba uphonswe emlilweni ongacimekiyo, unezandla nezinyawo zombili.

⁹Neso lakho uma likukhubekisa, likipilite, ulilahle! Kungcono ukuba ungene ekuphileni okuphakade uneso elilodwa kunokuba uphonswe emlilweni wesihogo unamehlo omabili.

Umzekeliso wemvu elahlekileyo

(Luk 15:3-7)

¹⁰“Qaphelani ningabukeli phansi noyedwa nje kulaba abancane. Ngqiqinisile impela, izingilosi zabo zihlala njalo zibubhekile ubuso bukaBaba osezulwini.

[¹¹INdodana yesintu izele ukusindisa okulahlekileyo.]

¹²“Nithi angenze njani umuntu enezimvu eziyikhulu abesedukelwa ngeyodwa kuzo na? Akazishiyi yini edlelweni zonke lezi ezingamashumi ayisishiyagalolunye nesishiyagalolunye, ahambe ayofuna lena elahlekileyo na?

¹³Nginyanitshela impela ngithi, uyoyijabulela kakhulu lemvu uma eseyitholile kunalezo ezingamashumi ayisishiyagalolunye nesishiyagalolunye ebezingalahlekile.

¹⁴Kanjalo noYihlo osezulwini akathandi ukuba kulahleke noyedwa nje kulaba abancane.

Ukubonisa umzalwane

(Luk 17:3)

¹⁵“Uma umzalwane wakho ekona, yana kuye ufike umbonise iphutha lakhe ninodwa. Uma elivuma uyobe umzuzile umzalwane wakho.

¹⁶Kodwa uma engalivumi, thatha oyedwa noma ababili uhambe nabo ubuyele kuye, ukuze ‘konke okudingidwayo kuqiniswe ngofakazi ababili noma abathathu’.

¹⁷Uma engafuni ukubezwa, bikela ibandla! Kodwa uma esaqhubeka, enqaba ukulalela ngisho nebandla, akabe njengongakholwayo nomthelisi .

Ukubopha nokukhulula

¹⁸“Ngiyaqinisa impela ngithi, konke enikubophayo emhlabeni kuyobe kuboshiwe nasezulwini, nalokho enikukhululayo emhlabeni kuyobe kukhululiwe nasezulwini.

¹⁹“Futhi ngithi kini, uma ababili kini lapha emhlabeni bevumelana ngento ethize beyicela ngomkhuleko, uBaba osezulwini uyobenzela yona.

²⁰Ngoba lapho kuhlangele khona ababili noma abathathu ngegama lami, ngikanye nabo lapho.”

Umzekeliso ngesisebenzi esingathetheleli

²¹UPhetro wasondela kuJesu wafike wabuza wathi: “Nkosi, ngiyomthethelela kangaki umzalwane wami uma elokhu engona na? Kuze kube kasikhombisa na?”

²²UJesu wamphendula wathi: “Qha, akungabi kasikhombisa nje, kodwa akube kasikhombisa kuphindwe ngamashumi ayisikhombisa.

²³Uyabona-ke, embusweni wezulu uNkulunkulu ubusa njengenkosi eyayiqonde ukubonisana nezisebenzi zayo ukuthi kufanele ziyikhokhele malini.

²⁴Kuthe isaqala nje ukubala, kwaletswa isisebenzi okwakufanele ziyikhokhele izigidi zezimali.

²⁵Sehluleka ukukhokha, ngakhoke ukuba kukhokhwe leyomali inkosi yathi akuthengiswe ngaso kanye nomkaso nabantwana baso, sidliwe yonke impahla.

²⁶Isisebenzi sakhothama phambi kwenkosi, sazikhalela sathi: ‘Ngibekezelele, ngizokukhokhela konke!’

²⁷Inkosi yasadabukela lesosisebenzi, yasixolela, yalesula icala laso, yasidedela.

²⁸“Yathi iphuma leyondoda yahlangana nomunye walabo esebenza kanye nabo. Wayefanele ukuyikhokhela imali engangezinhlamvu eziyikhulu zesiliva. Yambamba ngobhongwana, yamklinya ithi: ‘Yikhokhe yonke imali yami!’

²⁹Lesisisebenzi sazilahla phansi, sazikhalela kuyo sathi: ‘Ngibekezelele, ngizokukhokhela!’

³⁰Kepha yenqaba, kunalokho yahamba yathi masiboshwe size ziyikhokhe yonke imali.

³¹Ezinye izisebenzi zakubona lokhu zakhathazeka kakhulu, zakubikela inkosi konke.

³²Inkosi yasibiza lesosisebenzi yathi kuso: ‘Hawu, sonakalindini! Ngakuxolela lonke icala lakho lapho uzikhalela kimi.

³³Bekungafanele yini ukuba nawe usizwele lesisisebenzi njengoba nami ngakuzwela na?'

³⁴Inkosi yathukuthela yathelwa ngamanzi, yasinikela ezikhonzini zayo ukuba sijeziwe size siyikhokhe yonke imali.

³⁵Naye-ke uBaba osezulwini uyokwenze njalo kini kulowo ongathetheleli umzalwane wakhe ngenhliziyo yonke."

UMatewu 19

UJesu ufundisa ngesahlukaniso

(Mark 10:1-12)

¹Kuthe uJesu eseyiphethile lenkulumo, wasuka kwelaseGalile waya ezweni laseJudiya elingaphesheya komfula iJordan.

²Walandelwa yizindimbane zabantu, waziphilisa lapho.

³Kwasondela kuye abafarisi besophe ukumhila. Bambuza bathi: "Kungumthetho yini ukuba indoda ichithe umkayo noma ngasiphi isizathu na?"

⁴Waphendula wathi: "Anifundanga yini embhalweni ongcwele ukuthi ekuqaleni uMvelinqangi wadala abantu baba ngowesilisa nowesifazane na?"

⁵Wathi: 'Ngakhoke indoda ayodela uyise nonina inamathele kumkayo, laba bobabili babe nyamanye.'

⁶UJesu wagcina ngokuthi: "Ngakhoke kabasebabili, kepha sebenyamanye. Lokhoke osekuhlanganiswe nguMvelinqangi akungahlukaniswa muntu!"

⁷Abafarisi bambuza bathi: "Kwakungani pho ukuba uMose ayaleze athi indoda ingamchitha umkayo ngokumnika incwadi yesehlukaniso na?"

⁸Waphendula wathi: "UMose wanivumela ukuba nibachithe omkenu, ngoba ninamakhanda alukhuni. Kodwa kwakungenjalo ekuqaleni kwendalo.

⁹Ngithi kini, leyondoda echitha umkayo ngaphandle kokuba enecala lokuphinga ibisiganwa ngomunye iyaphinga."

¹⁰Abafundi bathi kuye: "Uma ngabe kunjalo phakathi kwendoda nomkayo kungangcono ukungaganani."

¹¹Waphendula wathi: "Lemfundiso ayinakwamukelwa yibo bonke abantu, kuphela yilabo abakunikwe nguNkulunkulu ukuba bayamukele.

¹²Kukhona labo abangeganwe ngoba bedaleke kanjalo, kukhona abangenakuganwa ngoba abanye bebathenile. Kukhona nabanye abazimisele ukungaganani, bezithiba ngoba besebenzela umbuso wezulu. Lowo ongayamukela lemfundiso akayemukele!"

UJesu ubusisa abantwana

(Mark 10:13-16; Luk 18:15-17)

¹³Bayisa izingane kuye ukuba azibeke izandla azikhulekele, kodwa abafundi babakhuza babavimbela.

¹⁴Kepha uJesu wathi: “Bayekeni abantwana beze kimi, ningabavimbeli, ngoba umbuso wezulu ungowabanje.”

¹⁵Wayesebabusisa ebabeka izandla, wahamba.

Insizwa ecebileyo

(Mark 10:17-31; Luk 18:18-30)

¹⁶Kwaqhamuka insizwa yeza kuJesu yambuza yathi: “Mfundisi, kumele ngenzeni elungileyo ukuba ngithole ukuphila okuphakade na? ”

¹⁷UJesu waphendula wathi: “Ungibuzelani ngokwenza okulungileyo na? Munye kuphela olungileyo. Uma uthanda ukufinyelela ekuphileni okuphakade, gcina imiyalo yakhe! ”

¹⁸Insizwa yambuza yathi: “Usho miphi imiyalo na? ” Wathi kuyo: “Yile: ‘Ungabulali; ungaphingi; ungebi; ungafakazi amanga;

¹⁹yazisa uyihlo nonyoko! ’ nalowo othi: ‘Wothanda wonke umuntu ngothando ozithanda ngalo! ’ ”

²⁰Insizwa yathi: “Ngiyigcinile yonke lemiyalo. Yikhuphi okunye okusileleyo na? ”

²¹Wayiphendula wathi: “Uma ufuna ukuba ulunge uphelele, hamba uthengise ngakho konke onakho, wabele abampofu, yikhona uyoba nengcebo ezulwini. Usungeza-ke ungilandele! ”

²²Kuthe insizwa ingakuzwa lokhu yahamba umoya wayo udikibele, ngoba yabe iyisigwili.

²³UJesu wathi kubafundi bakhe: “Lalelani lapha nginitshela! Kulukhuni kuyitshe ukuba isicebi singene embusweni wezulu!

²⁴Yebo ngiyanitshela ngithi, kulula ukuba ikameli lichushe entunjani yosungulo kunokuba isicebi singene embusweni wezulu.”

²⁵Kuthe abafundi bangakuzwa lokhu bamangala kakhulu base bethi: “Pho uma kunjalo, kungasindiswa bani na? ”

²⁶UJesu wababheka wathi kubo: “Abantu bangekwenze lokhu, kepha uNkulunkulu akehlulwa lutho.”

²⁷UPhetro wayesethi kuJesu: “Nakhu thina, silahle phansi konke ebesinakho salandela wena. Siyotholani na? ”

²⁸UJesu waphendula wathi: “Ngiyaqinisa impela ngithi, kuyothi mhla iNdodana yesintu ihlala esihlalweni sayo sobukhosi ezweni elisha, nani-ke eningilandelayo nihlale ezihlalweni zobukhosi eziyishumi nambili nibuse izizwe eziyishumi nambili zakwaIsrayeli.

²⁹Lowo odela izindlu zakhe noma abafowabo noma odadewabo noma uyise noma unina noma abantwana noma amasimu, konke lokhu ekwenzela mina, uyophiwa kuphindwe ngekhu, bese edla ifa lokuphila okuphakade.

³⁰Into nje, abaningi abangabokuqala manje, bayoba ngabokugcina, nabaningi abangabokugcina manje babe ngabokuqala.

UMatewu 20

Izisebenzi esivandeni somvini

¹“Niyabona, umbuso wezulu unjengomninindlu ephuma ekuseni kakhulu eyoqasha izisebenzi zesivini sakhe.

²Okuthe esivumelene nazo ukuthi yilowo nalowo uzohola uhlamvu lwemali eyisiliva ngosuku, wazithumela ukuba ziyosebenza esivini sakhe.

³Wabuye wasuka ngesikhathi sokufudumala kwelanga, waya lapho kubuthana khona abafuna umsebenzi, wabona abanye bemile bengenzi lutho.

⁴Wathi kubo: ‘Nani hambani niyosebenza esivini sami; ngizonikhokhela iholo elikahle.’

⁵Bahamba-ke. Waphindela eminibebade nangesikhathi santambama waqasha.

⁶Lase libantubahle waphindela, wabona abanye bemile. Wababuza wathi: ‘Nimeleni lapha usuku lonke, ningenzi lutho na?’

⁷Bamphendula bathi: ‘Yingoba singaqashwa muntu.’ Wayesethi kubo: ‘Hambani nani niyosebenza esivini sami!’

⁸“Kwathi selishonile umnisisivini wathi enduneni yomsebenzi: ‘Biza izisebenzi uziholele, uqale ngalabo abafike muva ugcine ngabafike kuqala!’

⁹Labo ababeqashwe selibantubahle baholelwa uhlamvu olulodwa emunye.

¹⁰Ngenkathi befika abokuqala, babethi bazohola bedlule abanye, kodwa nokho bathola uhlamvu olulodwa emunye.

¹¹Bahola qede base bekhononda kumnisisivini

¹²bathi: ‘Laba bamuva basebenze isikhashana nje, nokho ubalinganise nathi, thina esidonse kanzima usuku lonke sishiswa yilanga.’

¹³Umnisisivini waphendula omunye wathi: ‘Mngane wami, angikuqoli! Asivumelananga yini ngohlamvu olulodwa ngosuku na?’

¹⁴Thatha okungokwakho uphume uphele lapha. Kepha nakulona wamuva kuthande mina ukumholela nilingane.

¹⁵Kanti anginalungelo lokwenza engikuthandayo ngezinto zami na? Usuze waneso elibi ngoba ngiphana na? ’ ’ ”

¹⁶UJesu waphetha ngokuthi: “Ngakhoke abamuva bayoba ngabokuqala, abokuqala babe ngabokugcina.”

Sekungokwesithathu uJesu ebikezela ukufa kwakhe

(Mark 10:32-34; Luk 18:31-34)

¹⁷Kuthe uJesu esenyukela eJerusalema, wathatha abayishumi nambili waqhela nabo. Babesindleleni wayesethi kubo:

¹⁸“Lalelani, senyukela eJerusalema manje. INdodana yesintu izonikelwa ezikhulwini zabaphristi kanye nezazimibhalo. Zizoyinqumela ukufa,

¹⁹ziyinikele kwabezizwe, bayenze inhlekisa, bayibhaxabule, bayibethele esiphambanweni, kepha ivuke ekufeni ngosuku lwesithathu.”

Isicelo sikaJakobe noJohane

(Mark 10:35-45)

²⁰UmkaZebedi wasondela namadodana akhe amabili kuJesu, wamkhothamela wafaka isicelo.

²¹UJesu wambuza wathi: “Ukhala ngani na? ” Waphendula wathi: “Ngethembise ukuthi lamadodana ami omabili ayohlala akuphahle ebukhosini bombuso wakho, enye ibe ngakwesokunene sakho, nenye ngakwesokhohlo.”

²²UJesu wathi: “Anazi ukuthi nifunani nina. Ningakumela yini ukuphuza indebe yokuhlupheka engizoyiphuza na? ” Bamphendula bathi: “Singakwenza.”

²³UJesu wayesethi kubo: “Yebo, niyoyiphuza indebe yokuhlupheka kwami, kodwa akukhona okwami ukuhlalisa ngakwesokunene nangakwesokhohlo sami. Lezozikhundla zingezalabo asebazilungiselwa nguBaba.”

²⁴Abayishumi bakuzwa lokho base bezicasukela izelamani ezimbili.

²⁵UJesu wababiza bonke basondela, wathi kubo: “Niyazi ukuthi ababusi bezizwe banamandla phezu kwazo, nezikhulu ziyazibusa ngalabo ezibaphetheyo.

²⁶Akufanele kube njalo kini, kodwa lowo ofuna ukuba mkhulu phakathi kwenu akabe yinceku yabanye,

²⁷lowo ofuna ukuba ngowokuqala akabe yisisebenzi senu.

²⁸Kunjengoba iNdodana yesintu ingezile ukuba ibe nezinceku, kodwa ize ukuba ibe yinceku yabanye, idele ukuphila kwayo kube yisihlengo sokukhulula abaningi.”

UJesu uphilisa izimpumpithe ezimbili

(Mark 10:46-52; Luk 18:35-43)

²⁹Baphuma emzini waseJerikho, uJesu walandelwa uquqaba olukhulu.

³⁰Kwakuhlezi izimpumpithe ezimbili eceleni kwendlela. Zathi zingezwa ukuthi kudlula uJesu, zamemeza zathi: “Nkosi, Ndodana kaDavide, sihawukele! ”

³¹Isixuku sabakhuza, kepha sabe sisathe abathule, baqala phansi basho kakhulu bathi: “Nkosi, Ndodana kaDavide, sihawukele!”

³²UJesu wema, wabamemeza wababuza wathi: “Nifuna ukuba nginenzeleni na?”

³³Bamphendula bathi: “Nkosi, ukuba usivule amehlo sibone.”

³⁴UJesu wafikelwa yisihe, wabathinta amehlo. Bavuleka amehlo babona ngaso lesosikhathi, base bemlandela.

UMatewu 21

UJesu ungena ngodumo eJerusalema

(Mark 11:1-11; Luk 19:28-40; Joh 12:12-19)

¹Basondela eJerusalema, bafika emzaneni waseBhetfage ngaseNtabeni yemiHlwathi. UJesu wathuma abafundi ababili,

²wathi kubo: “Hambani niye kunankuya umuzi. Niyofike nibone imbongolo ikhulekiwe inenkonyane. Zithukululeni nizilethe kimi!

³Uma ngabe kukhona onikhulumisayo, anothi: ‘INkosi iyazidinga, kodwa izosheshe izibuyise.’”

⁴Lokhu kwenzeka ukuba kugcwaliseke okwashiwo ngomlomo womphrofethi lapho kuthiwa:

⁵“Memezalani emzini waseZiyoni nithi: ‘Nansi iNkosi yakho iza kuwe, immene, igibele imbongolo, inkonyane yesilwane esiboshelwayo.’”

⁶Abafundi bahamba-ke, benza njengoba uJesu ebatshelile.

⁷Bayisa imbongolo nenkonyane kuJesu, bendlala izingubo zabo emihlane yazo, wagibela.

⁸Kwasuka abantu abanengi esixukwini bendlala izingubo zabo endleleni. Abanye bahlusula amahlamvu ezihlahla bawendlala endleleni.

⁹Umshungu wabantu owawuhamba ngaphambili nowawumlandela wamemeza wathi: “Bayede, Ndodana kaDavide! Ayibongwe ngegama likaSimakade leNkosi abayibika ukuthi iyeza! Khuzani ubayede kweliphezulu!”

¹⁰Kuthe esangena eJerusalema, umuzi wonke wahlokoma waphithizela. Abantu base bebuza bethi: “Ngabe ngubani lo?”

¹¹Izihlwele zabantu zathi: “Lo, nguJesu umphrofethi waseNazaretha kwelaseGalile.”

Ukuhlanzwa kwethempeli

(Mark 11:15-19; Luk 19:45-48; Joh 2:13-22)

¹²UJesu wangena ethempelini, waxosha ababethengiselana ngempahla kulo. Wagumbuqela amatafula alabo ababeshintshela abantu imali, waketula nezihlalo zababethengisa ngamajuba.

¹³Wathi kubo: “Embhalweni ongcwele uNkulunkulu uthi: ‘Indlu yami iyobizwa ithiwe yindlu yokukhuleka.’ Kepha nina manje seniyenza umgede wabaphangi!”

¹⁴Izimpumpethe nezinyonga zaya kuJesu ethempelini, waziphilisa.

¹⁵Kepha izikhulu zabaphristi kanye nezazimibhalo zathukuthela lapho zibona izimangaliso azigilayo, zizwa nabantwana bememeza ethempelini bethi: “Bayede, Ndodana kaDavide!”

¹⁶Zathi kuye: “Uyabezwa nje ukuthi bathini?” UJesu waphendula wathi: “Impela ngiyabezwa! Aniyifundanga yini imibhalo engcwele ethi: “‘Ubongelwa yizingane neziyoyo, ngemilomo yazo uzakhele udumo?’”

¹⁷Wasuka emzini wabashiya kanjalo waya eBhethani wahlwelwa khona.

UJesu uqalekisa umkhiwane

(Mark 11:12-14,20-24)

¹⁸Kuthe esebuyela eJerusalema ngakusasa ekuseni, waphathwa yiphango.

¹⁹Welamela umkhiwane ngendlela. Waya kuwo, wafica amaqabunga odwa. Wayesethi kuwo: “Ngeke uphinde usathela nanini!” Umkhiwane wavele woma ngaso lesosikhathi.

²⁰Abafundi bayibona lento, bakhaxa imilomo. Bambuza bathi: “Umkhiwane wome kánjani masinyane kangaka?”

²¹UJesu waphendula wathi: “Nginyanitshela impela ngithi, uma nikhholwa ningangabazi, ningakwenza lokhu engikugile kulomkhiwane. Kungabi yilokhu kuphela, kodwa niyotshela lentaba nithi: ‘Zimbuka lapha uphondeke olwandle,’ yenze njalo.

²²Uma nikhholwa niyokwamukeliswa noma yini eniyicela ngomkhuleko.”

Umbuzo ngegunya likaJesu

(Mark 11:27-33; Luk 20:1-8)

²³UJesu wabuyela ethempelini. Kuthe esafundisa, izikhulu zabaphristi kanye nezigele zamaJuda zeza kuye zambuza zathi: “Ukwenza lokhu ngagunya lini? Ngabe ngubani owakunika leligunya na?”

²⁴UJesu waphendula wathi: “Ngizoke nginibuze nami umbuzo owodwa vo. Uma ningiphendula, nami-ke ngizonitshela ukuthi ngikwenza lokhu ngagunya lini.

²⁵UJohane umbhabhadisi walithathaphi igunya lokubhabhadisa, walinikwa nguNkulunkulu noma walithatha kubantu na?” Base behlanganisa amakhanda bathi: “Uma sithi walinikwa nguNkulunkulu uzothi kithi: ‘Pho animkholwanga ngani uJohane na?’”

²⁶Kanti-ke futhi uma singathi walithatha kubantu sizozeqhatha nomphakathi, ngoba phela bonke bathi uJohane wayengumphrofethi.”

²⁷Base bemphendula uJesu bathi: “Kasazi.” Wathi kubo: “Nami-ke angisanitsheli ukuthi ngikwenza lokhu ngagunya lini.

Umzekeliso ngamadodana amabili

²⁸“Nina nibona kanjani kulokhu? Kukhona umuntu owayenamadodana amabili. Waya kweyokuqala wafike wathi: ‘Ndodana, hamba uyosebenza esivinini sami namhlanje!’

²⁹Yenqaba yathi: ‘Angifuni.’ Kepha yabuye yazishaya yahamba.

³⁰Waya kwenye indodana wafike wayithuma nayo. Lendodana yathi: ‘Kulungile baba ngizoya,’ kepha ayiyanga.

³¹Kulamadodana amabili iyiphi eyenza intando kayise na? ” Bamphendula bathi: “Eyokuqala.” Wayesethi-ke uJesu kubo: “Ake nilalele nginitshela! Abathelisi nezindlindwa bayanincintela bangene kuqala kunani embusweni kaNkulunkulu.

³²Ngoba uJohane umbhabhadisi weza kini ezonikhomba indlela elungileyo, anaze namkholwa, kodwa abathelisi nezindlindwa bakholwa. Yize nikubona lokho, anibuyanga niguquke nimkholwe.”

Umzekeliso ngabaqashi besivini

(Mark 12:1-12; Luk 20:9-19)

³³UJesu wathi: “Ake nizwe nanku omunye umzekeliso! Kukhona umninindlu owatshala isivini, wasibiyela ngogange. Phakathi kwaso wagweda isikhamo sewayini etsheni, wakha idladla lokulinda. Lesisivini wasiqashisa kubalimi, wasuka waya ezweni elikude.

³⁴Kwafika isikhathi sokuvuna wathumela izinceku zakhe kubaqashi besivini ukuba zilande isivuno esiyinzuzo yakhe.

³⁵Bazidumela izinceku zakhe, enye bayidinda, enye-ke bayibulala, enye bayikhanda ngamatshe.

³⁶Wabuye wathumela ezinye izinceku eziningi kunakuqala, kepha bazenzakalisa nalezo.

³⁷Ekugcineni wabathumela indodana yakhe ethi: ‘Indodana yami bayoyihlonipha.’

³⁸Kodwa abaqashi besivini bayibona base becebisana bathi: ‘Nansi indlalifa! Asiyihlanganye siyibulale sidle ifa layo!’

³⁹Basho bayidumela bayihudulela ngaphandle kwesivini bayibulala.

⁴⁰“Umninisivini uyobenze njani lababaqashi mhla efikayo?”

⁴¹Baphendula bathi: “Uyobhubhisa lezizinswelaboya aqashise ngesivini kwabanye abazomnika inzuzo yakhe ngesikhathi esifaneleyo.”

⁴²UJesu wathi: “Anizange nayifunda yini imibhalo engcwele ethi: “‘Itshe lokwakha elaliwa ngabakhi bethi liyinto engenamkhuba, kwaba yilona sisekelo njengensika

ephase indlu. Lokhu kungukwenza kukaSimakade, kuyasimangalisa kakhulu ukukubona.’

⁴³“Ngakhoke ngiyanitshela ngithi, uNkulunkulu uyonaphuca umbuso wakhe awunikeze isizwe esiyoveza izithelo ezinhle.

[⁴⁴Lowo owela phezu kwalelitshe wophihlizeka; kanti-ke nalowo eliwela phezu kwakhe liyomgaya abe yizicucu.]”

⁴⁵Kuthe ukuba izikhulu zabaphristi kanye nabafarisi bezwe imizekeliso kaJesu, kwabakhanyela ukuthi ubhekise kubo.

⁴⁶Babefuna ukumbamba, kodwa nokho besaba izixuku, ngoba zazithi ungumphrofethi.

UMatewu 22

Umzekeliso womshado

(Luk 14:15-24)

¹UJesu wabuye wakhuluma kubantu ebalandisa imizekeliso, wathi:

²“Umbuso wezulu singawufanisa nalokhu: Kukhona inkosi eyalungiselela umshado wendodana yayo.

³Yathumela izinceku zayo ukuba zifike zitshele izimenywa ukuthi sezingeza emshadweni, kodwa zenqaba.

⁴Yabuye yathumela kwabamenyiweyo ezinye izinceku ziphethe umlayezo wokuthi: ‘Idili selihleliwe, kwahlatshwa izinkabi namathole anonileyo, konke sekulungile. Wozani emshadweni!’

⁵Kodwa abazange banake nakunaka, bahamba baziye emisebenzini yabo; omunye waya ensimini yakhe, omunye esitolo sakhe;

⁶abanye badumela izinceku zayo bazithela ngehlazo bazibulala.

⁷Inkosi yathukuthela yagana unwabu, yathumela amabutho ayo, afike abhubhisa labababulali, abuye ashisa nomuzi wabo.

⁸Yayisithi ezincekwini zayo: ‘Idili lomshado selihleliwe, kodwa kumenywe abantu abangafanele.

⁹Hambani niye ezinhlanganweni zemigwaqo nifike nibamemele emshadweni bonke enibatholayo!’

¹⁰Izinceku zahamba zaya emigwaqweni, zaqoqa bonke abantu, ababi nabalungileyo, ezazingase zibathole. Abantu bagcwala indlu baminyana.

¹¹“Inkosi yangena ukuzobona izimenywa, yakhangwa umuntu owayengayigqokile ingubo yomshado.

¹²Yambuza yathi: ‘Mhlobo, ungene kanjani lapha ungayigqokile ingubo yomshado na?’ Kepha wakhungatheka akaphendula.

¹³Inkosi yathi ezincekwini: ‘Mbopheni izandla nezinyawo, nimphonse phandle ebumnyameni lapho kuyoba khona ukukhala nokugedla amazinyo.’ ”

¹⁴UJesu waphetha ngokuthi: “Baningi abamenyiweyo kodwa bambalwa abakhethiweyo.”

Umbuzo ngentela

(Mark 12:13-17; Luk 20:20-26)

¹⁵Abafarisi basuka lapho bakha icebo lokuthi bangamhila kanjani uJesu.

¹⁶Bathumela kuye abafundi babo bekanye nabeqembu likaHerodi. Bafike bathi: “Mfundisi, siyazi ukuthi uqinisile. Ufundisa indlela kaNkulunkulu ngobuqotho. Awuthengi mehlo amuntu, ngoba ubunjani bomuntu awubushayi mkhuba.

¹⁷Yisho-ke sizwe ukuthi wena uthini ngentela! Kuphambene yini nomthetho ukuba sithelele ikhanda kuKhesari inkosi yombuso waseRoma na? ”

¹⁸Kodwa uJesu wabuphawula ububi babo wathi: “Bazenzisindini, ningicuphelani?

¹⁹Ngikhombiseni uhlamvu lwemali yentela! ” Bamnika uhlamvu.

²⁰Wababuza wathi: “Ngokabani umfanekiso okuloluhlamvu, wona lombhalo ngokabani na? ”

²¹Bamphendula bathi: “NgokaKhesari.” Wayesethi-ke kubo: “Mnikeni uKhesari okukaKhesari, uNkulunkulu nimnike okukaNkulunkulu! ”

²²Kuthe ukuba bakuzwe lokho bamangala kakhulu. Base bemshiya kanjalo bemuka.

Umbuzo ngokuvuka kwabafileyo

(Mark 12:18-27; Luk 20:27-40)

²³Abasadusi bayaye bathi akukho kuvuka kwabafileyo. Kwasuka abathile kubo baya kuJesu ngalo lolosuku,

²⁴bathi: “Mfundisi, uMose wathi: ‘Uma indoda ifa ingazele, umfowabo akangene umfelokazi avuse umuzi womufi.’

²⁵Kwakukhona izelamani eziyisikhombisa kulendawo yakithi. Esokuqala saganwa, safa singazele sashiya umkaso kumfowabo.

²⁶Senze njalo nesesibili nesesithathu kwaze kwafika kwesesikhombisa.

²⁷Wabagcinela umfelokazi wayesefa naye.

²⁸Pho woba ngumkabani kulaba abayisikhombisa mhla kuvuka abafileyo na? Inyani wayekade ebagane bonke.”

²⁹UJesu waphendula wathi: “Neduke ngempela nina ngoba aniyazi imibhalo engcwele, aniswaqondi namandla kaNkulunkulu.

³⁰Phela labo asebevukile kwabafileyo kabasaganani, kodwa bayoba njengezingilosi zezulu.

³¹Mayelana nendaba yokuthi abafileyo bayavuka, kanifundanga yini embhalweni ongcwele akushoyo kini uMvelinqangi lapho ethi:

³²‘Mina nginguNkulunkulu ka-Abhrahama, nginguNkulunkulu kalsaka, nginguNkulunkulu kaJakobe’ na? UnguNkulunkulu wabaphilayo, labo anguNkulunkulu wabo kabafile.’”

³³Kwathi ukuba abantu bakuzwe lokhu, yabamangalisa imfundiso kaJesu.

Umyalo omkhulu

(Mark 12:28-34; Luk 10:25-28)

³⁴Kwabuthana abafarisi sebezile ukuthi uJesu ubavale imilomo abasadusi.

³⁵Omunye kubo oyisazimibhalo esophe ukuhila uJesu wambuza wathi:

³⁶“Mfundisi, yimuphi umyalo omkhulu emthethweni na? ”

³⁷Wamphendula wathi: “ ‘Wothanda uSimakade uNkulunkulu wakho ngenhliziyo yakho yonke nangomphefumulo wakho wonke nangengqondo yakho yonke! ’

³⁸Yilowo-ke umyalo wokuqala nomkhulu kuneminye.

³⁹Owesibili ufana nawo, uthi: ‘Wothanda omunye ngothando ozithanda ngalo! ’

⁴⁰Lemiyalo yomibili iyizinsika eziphase wonke umthetho kaMose nemfundiso yabaphrofethi.”

Umbuzo ngeNdodana kaDavide

(Mark 12:35-37; Luk 20:41-44)

⁴¹Kwathi lapho abafarisi sebebuthene, uJesu wababuza wathi:

⁴²“Nithini ngoMesiya na? UyiNdodana kabani na? ” Baphendula bathi: “EkaDavide.”

⁴³Wababuza wathi: “Kungani ukuba uDavide, kuthi lapho eholwa nguMoya oyiNgcwele, abize uMesiya ngeNkosi yakhe athi:

⁴⁴“ ‘USimakade wathi eNkosini yami: Hlala ngakwesokunene sami ngize ngingqobe izitha zakho zithele kuwe! ’

⁴⁵“Uma uDavide inkosi embiza ngeNkosi yakhe, pho useyiNdodana yakhe kanjani manje? ”

⁴⁶Behluleka bonke ukumphendula. Kusukela mhla lowo akubangakho muntu owaba nesibindi sokumbuza utho uJesu.

UMatewu 23

UJesu uxwayisa ngezazimibhalo nabafarisi

(Mark 12:38-39; Luk 11:43,46; 20:45-46)

- ¹UJesu wayesekhuluma-ke kubantu nakubafundi bakhe
- ²wathi: “Izazimibhalo nabafarisi bagunyaziwe ukuba bachaze ngomthetho kaMose.
- ³Ngakhoke kwenzeni konke abanitshela khona nikugcine, kodwa ningabalingisi, ngoba bashumayela into ngapha, benze enye ngalena.
- ⁴Ngemfundiso yabo bashaya imithetho eyimithwalo enzima eyesinda abantu, kodwa bona bebe bengazihluphi nakancane nje ngokubathwalisa.
- ⁵Yonke imisebenzi yabo bayenzela ukuba babukwe yizwe. Amabhande abo okukhuleka bawanweba abe banzi, nezivatho zabo bazifaka amayikayika amade.
- ⁶Bathanda ukuhlonishwa bahlaliswe nezikhulu emikhosini, babekwe ezihlalweni eziphambili ezindlini zokusonta.
- ⁷Bathanda ukukhulekelwa embuthanweni, babizwe ngabantu ngokuthi ‘Rabi’ .
- ⁸Kepha nina ningavumi ukubizwa ngokuthi ‘Rabi’, ngoba ningabazalwane nonke, munye zwi umfundisi wenu.
- ⁹Ningabizi muntu emhlabeni ngokuthi ‘Baba’, ngoba munye uYihlo osezulwini;
- ¹⁰futhi ningabizwa ngokuthi ningabaholi, ngoba munye umholi wenu, uMesiya.
- ¹¹Kodwa lowo omkhulu kini akabe yinceku yenu.
- ¹²Yilowo nalowo ofuna ukuzenza mkhulu uyothotshiswa, nalowo ozithobayo uyophakanyiswa abe mkhulu.”

UJesu usola ukuzenzisa kwabo

(Mark 12:40; Luk 11:39-42,44,52; 20:47)

- ¹³“Nakho kini zazimibhalo nabafarisi! Bazenzisindini, nivimbela abantu ukuba bangangeni embusweni wezulu, nibe nina ningangeni kanti futhi niyabanqabela abafuna ukungena kuwo.
- [¹⁴“Nakho kini zazimibhalo nabafarisi! Bazenzisindini, nilutha abafelokazi nisizakale ngabo, nibephuce amafa abo. Nikhuleka undendende nibukisa. Ngakhoke niyojeziswa ngokwedlulele ngecala lenu.]
- ¹⁵“Nakho kini zazimibhalo nabafarisi! Bazenzisindini, nihamba nidabule izilwandle niqede amazwe ukuba nithole abe munye ophendukela enkolweni, kuthi uma senimtholile nimonakalise abe mubi kakhulu, afanele isihogo ngokuphindiwe kunani.
- ¹⁶“Nakho kini baholi abaphuphuthekayo enifundisa nithi: ‘Uma umuntu efunga ithempeli ukufunga kwakhe akusho lutho, kodwa uma efunga igolide elisethempelini, siyambopha isifungo sakhe.’

¹⁷Ziwula eziphuphuthekayo! Yikuphi okukhulu phakathi kwegolide nethempeli okuyilona elenza ukuba igolide libe ngcwele na?

¹⁸Nibuye nifundise nithi: 'Uma umuntu efunga ilathi, ukufunga kwakhe akusho lutho, kodwa uma efunga umnikelo phezu kwalo, isifungo sakhe siyisibopho.'

¹⁹Naze nayizimpumpethe bo! Yikuphi okukhulu phakathi komnikelo nelathi okuyilona elenza ukuba umnikelo ube ngcwele na?

²⁰Lowo-ke osuke efunga ilathi ufunga lona nakho konke okuphezu kwalo.

²¹Nalowo ofunga ithempeli ufunga lona noNkulunkulu ohlezi kulo.

²²Nalowo ofunga izulu ufunga isihlalo sobukhosi bukaMvelinqangi kanye noMvelinqangi ohlezi kuso.

²³"Nakho kini zazimibhalo nabafarisi! Bazenzisindini, ninikela ngokweshumi kweziyoliso kodwa anikunaki okubalulekileyo emthethweni njengobuqotho nobubele nokwethembeka. Bekufanele nikwazise lokhu nikwenze, ningakuyeki-ke okunye.

²⁴Baholi abaphuphuthekayo! Nikhetha insensane kwenizokuphuza, kodwa nigwinye amakameli.

²⁵"Nakho kini zazimibhalo nabafarisi! Bazenzisindini, nigeza ingaphandle lenkezo nesitsha sokudlela, kanti ingaphakathi ligcwele izinto eniziqhwage ngobugovu.

²⁶Mfarisi ophuphuthekayo! Qala ngokugeza ingaphakathi lenkezo, bese liyahlanzeka nengaphandle layo.

²⁷"Nakho kini zazimibhalo nabafarisi! Bazenzisindini, nifana namathuna ahuqwe ngomcako omhlophe, ingaphandle lawo libukeka kahle, kodwa ingaphakathi lawo ligcwele amathambo ezidumbu nakho konke ukungcola.

²⁸Kanjalo futhi ingaphandle lenu libukeka kubantu sengathi lihle, kanti ingaphakathi ligcwele ukuzenzisa nokonakala."

UJesu ubikezela ngesijeziso sabo

(Luk 11:47-51)

²⁹"Nakho kini zazimibhalo nabafarisi! Bazenzisindini, nibeka amatshe emadlinzeni abaphrofethi, nihlobise namathuna abalungileyo.

³⁰Bese nithi: 'Ukuba sasikhona emihleni yokhokho, sasingeke sahlanganyela nabo lapho kuchithwa igazi labaphrofethi.'

³¹Ngalawo nizilahla nina, nivuma ukuthi niyinzalo yalabo ababebulala abaphrofethi.

³²Salani senikufeza lokhu okwaqalwa ngokhokho benu!

³³Zinyokandini, nzalo yamabululu! Niyosinda kanjani ekwahlulelweni ningaphonswa esihogweni na?

³⁴Niyabona-ke! Nginithumela abaphrofethi nabahlakaniphileyo nezazi. Abanye babo niyobabulala, abanye nibabethele eziphambanweni. Abanye-ke nibabhaxabule emasinagogeni, nibazingele imizi ngemizi.

³⁵Liyobuzwa kini lonke leligazi elingenacala elachithwa emhlabeni kusukela kwelika-Abela owayelungile, kuze kufike kwelikaZakariya umntakaBharakhiya enambulalela egcekeni phakathi kwethempeli nelathi.

³⁶Ngiqinisile impela, isijeziso sakho konke lokhu siyoba phezu kwesizukulwane salemihla.”

UJesu ulilela iJerusalema

(Luk 13:34-35)

³⁷“Jerusalema, we Jerusalema! Ubulala abaphrofethi, ubakhanda ngamatshe labo uNkulunkulu abathumela kuwe. Kukaningi nje ngilokhu ngilangazelela ukuqoqa abantu bakho ngibakhoselise, njengesikhukhukazi sikhoselisa amatshwele phansi kwamaphiko aso, kodwa anivumanga.

³⁸Ngakhoke seniyozi bonela nina, umuzi wenu ufulathelwe uyoba yibhuqe.

³⁹Ngithi kini, kusukela manje aniyuphinde ningibone kuze kube ngamhla nithi: “ ‘Ayibongwe ngegama likaSimakade leNkosi abayibika ukuthi iyeza! ’ ”

UMatewu 24

UJesu ubikezela ngokudilizwa kwethempeli

(Mark 13:1-2; Luk 21:5-6)

¹UJesu waphuma ethempelini wahamba, abafundi basondela kuye, bamkhombisa izakhiwo zethempeli.

²Wathi kubo: “Niyakubona konke lokhu na? Ngiqinisile uma ngithi, akukho litshe lapha eliyosala liqhwakele phezu kwelinye elingayikudilizelwa phansi.”

Ukufika kokuhlupheka nosizi

(Mark 13:3-13; Luk 21:7-19)

³Wayehlezi eNtabeni yemiHlwathi. Abafundi basondela kuye bambuza bebodwa bathi; “Awusitshela, kuyokwenzeka nini lokhu na? Sibonakaliso sini esiyokhomba isikhathi sokubuya kwakho nomhla wokuphela? ”

⁴UJesu wabaphendula wathi: “Qaphelani ningedukiswa muntu!

⁵Kuyovela abaningi abayoshaya sengathi bayimi, bathi: ‘NginguMesiya,’ badukise abaningi.

⁶Niyokuzwa isaho sokulwa namahemuhemu empi ezizweni, kodwa qaphelani ningabi natwetwe. Kumele kwenzeke lokhu, kodwa-ke umhla wokuphela uyobe ungakafiki.

⁷Ngoba izizwe ziyovukelana, nemibuso iphendukelane, kubhoke indlala, kuzamazame umhlaba izindawo ngezindawo.

⁸Zonke lezizinsizi ziseyizalinga nje ezandulelayo, njengemihelo yowesifazane kanduba abelethe.

⁹“Bayonithatha-ke baninikele ukuba nihlushwe nibulawe. Ziyonizonda zonke izizwe ngoba ningabami.

¹⁰Ngalesosikhathi abaningi bayokhubeka bahlubuke ekukholweni, bakhaphelane, bazondane.

¹¹Kuyovela abaningi abayothi bangabaphrofethi bengeyibo, badukise abantu abaningi.

¹²Kuyobhoka ubudlwembe kuze kudambe uthando kwabaningi.

¹³Kodwa lowo oqiniselayo kuze kube sekupheleni uyosindiswa.

¹⁴Lendaba emnandi yombuso kaNkulunkulu iyomenyezelwa kuwo wonke umhlaba ibe ngubufakazi ezizweni zonke, kandukuba kufike umhla wokuphela.

Usizi oluhlasimulisayo

(Mark 13:14-23; Luk 21:20-24)

¹⁵“Niyobona umhlola oyisinengiso esinyantisayo usendaweni engcwele, lowo akhuluma ngawo uDanyela umprofethi.” (Ofunda lokhu akaqonde ukuthi kusho ukuthini!)

¹⁶“Ngalesosikhathi labo abakhe eJudiya mabaphephele ezintabeni.

¹⁷Oyobe ephezu kophahla lwendlu akangabe esabuyela endlini ukuthatha impahla yakhe.

¹⁸Oyobe esemasimini akangabuyeli emuva alande izingubo zakhe!

¹⁹Ngiyazisa ngabakhulelweyo nabancelisayo ngalezonsuku!

²⁰Khulekani ukuba ukubaleka kwenu kungabi sebusika noma kube mhla kuyisabatha!

²¹Ngoba usizi lwalesosikhathi luyokwedlulela kakhulu. Alukaze lubonwe olunjengalo kuze kube namhla lokhu selokhu uMvelinqangi adala umhlaba, lungephinde futhi lubonwe nanini.

²²Ukuba uNkulunkulu ubengasinciphisanga isikhathi salolosizi, bekungayikusinda muntu, kodwa-ke uyosinciphisa ngenxa yalabo abayikhethele lakhe.

²³“Uma ngalesosikhathi nizwa umuntu ethi kini: ‘Ake nibheke nangu uMesiya!’ noma athi: ‘Nanguya!’ nize ningamkholwa!

²⁴Ngoba kuyovela abayothi banguMesiya bengesiye nabayothi bangabaphrofethi bengeyibo, baveze izibonakaliso ezinkulu bagile izimanga, uma kungenzeka bedukise abekhethele likaNkulunkulu.

²⁵Lalelani lapha! Senginixwayisile ngakho konke kungakenzeki.

²⁶“Ngakhoke uma abantu bethi kini: ‘Nango usehlane!’ ningayi lapho! Noma bethi: ‘Nangu endlini!’ ningakukholwa lokho!

²⁷Ngoba iNdodana yesintu iyofika njengezulu libaneka emkhathini kusukela empumalanga kuye kushaye entshonalanga.

²⁸“Amanqe ayobuthana lapho kukhona khona isidumbu.”

Ukuza kweNdodana yesintu

(Mark 13:24-27; Luk 21:25-28)

²⁹“Masinyane nje emveni kosizi lwalezonsuku “ ‘ilanga liyofiphala, inyanga ife ingabe isakhanya, izinkanyezi zitshuze ziqathake esibhakabhakeni, amaviyo omkhathi wezulu azanyazanyiswe aphambuke emizileni yawo.’

³⁰“Bese kuqhamuka isibonakaliso seNdodana yesintu emkhathini. Izizwe zonke zomhlaba ziyolila zibone iNdodana yesintu emkhathini iza ngamafu inamandla nenkazimulo enkulu.

³¹Kuyokhala icilongo lisho kakhulu, ibisithumela izingilosi zayo ziqoqe abekhethelo layo emagumbini omane omhlaba, kuze kube semikhawulweni yawo.

Isifundo esitholakala emkhiwaneni

(Mark 13:28-31; Luk 21:29-33)

³²“Fundani isifundo kulokho okuyaye kwenzeka emkhiwaneni. Lapho amagatsha eseluhlaza emqumbe, kuhluma amaqabunga, niyaye nazi ukuthi selethwese.

³³Ngokunjalo-ke nani uma nibona konke lokhu kwenzeka, niyokwazi ukuthi iNdodana yesintu isiseduze isemabaleni.

³⁴Ngiqinisile ngiyanitshela ngithi, lesisizukulwane asiyikudlula kungakenzeki konke lokhu.

³⁵Kuyodlula izulu nomhlaba, kodwa amazwi ami awasoze adlula.

Alwaziwa usuku nesikhathi

(Mark 13:32-37; Luk 17:26-30, 34-36)

³⁶“Kepha akukho muntu owaziyo ukuthi lokhu kuyokwenzeka ngaluphi usuku nangasiphi isikhathi. Akwazi ngisho nazingilosi zezulu naNdodana yesintu imbala, kwazi uBaba kuphela.

³⁷Ukufika kweNdodana yesintu kuyoba njengasemihleni kaNowa.

³⁸Ezinsukwini ungakafiki uzamcolo abantu babedla bephuza beganiselana kwaze kwaba ngamhla uNowa engena emkhunjini.

³⁹Babengazi nokuthi lidumephi kwaze kwafika uzamcolo wabakhukhula bonke. Kuyoba njalo nangamhla iNdodana yesintu iza.

⁴⁰Ngalolosuku amadoda amabili ayobe esebenza ensimini, kuthathwe enye, enye isale,

⁴¹abesifazane ababili bagaye exihibeni, kuthathwe omunye, omunye asale.

⁴²Hlalani nilindile ngoba anazi ukuthi iNkosi yenu iyofika ngaluphi usuku.

⁴³Kuhle nazi ukuthi, ukuba umninindlu ubelazi isela ukuthi liyofika nini ngobusuku, ubeyohlala elindile angaliyeki ligqekeze indlu yakhe.

⁴⁴Ngakhoke hlalani niqaphile, ngoba iNdodana yesintu iyofika ningazelele.

Inceku ethembekile nengathembekile

(Luk 12:41-48)

⁴⁵“Ngubani oyinceku ethembekileyo nehlakaniphileyo, inkosi yayo eyibeke ukuba yabele izisebenzi ukudla kwazo ngesikhathi esifaneleyo na?”

⁴⁶Iyadela leyonceku inkosi yayo eyoyifika isaqhuba kahle.

⁴⁷Ngiyaqinisa impela ngithi, inkosi yayo iyoyibeka induna phezu kwempahla yayo yonke.

⁴⁸Kodwa uma eyinceku embi, uyozikhohlisa athi: ‘Hhiya, inkosi yami izolibala,’

⁴⁹abeseshaya izisebenzi akanye nazo, alibale ukudla nokuphuza utshwala kanye nezidakwa.

⁵⁰Uma eqhuba kanjalo, inkosi yakhe iyofika ngolunye usuku engazelele nangesikhathi engalindele,

⁵¹imjezise kanzima, imlahle kanye nabazenzisi lapho kuyoba khona ukukhala nokugedla amazinyo.

UMatewu 25

Umzekeliso ngezintombi eziyishumi

¹“Ngalesosikhathi embusweni wezulu kuyoba njengezintombi eziyishumi ezathatha izibani zazo zaphuma, zahlangabeza umyeni.

²Eziyisihlanu kuzo zaziyiziwula, eziyisihlanu zazihlakaniphile.

³Ngoba lezo eziyiziwula zathatha izibani zazo zashiya amafutha,

⁴kodwa ezihlakaniphileyo zathatha izibani zazo kanye nezitsha ezinamafutha.

⁵Kuthe umyeni esalibele, zonke zozela zalala.

⁶“Kwamenyezwa phakathi kwamabili kwathiwa: ‘Nangu umyeni eza! Phumani nimhlangabeze!’

⁷Zavuka zonke lezontombi, zalungisa izibani zazo.

⁸Eziyiziwula zathi kwezihlakaniphileyo: ‘Ake nisichathazele kwawenu amafutha, ngoba izibani zethu seziyacima!’

⁹Ezihlakaniphileyo zaphendula zathi: ‘Ngeke asanele thina kanye nani! Hambani niyozithengela awenu esitolo!’

¹⁰Kuthe zisahambile zisayothenga, wafika umyeni. Lezo ezazizilungisele zangena nomyeni edilini lomshado, kwavalwa emnyango.

¹¹“Dukuduku bese zifika lezi ezinye izintombi zithi: ‘Nkosi, nkosi! Sicela usivulele singene!’

¹²Kodwa umyeni wenqaba wathi: ‘Empeleni, anginazi ukuthi ningobani nina.’”

¹³UJesu waphetha ngokuthi: “Hlalani nilindile, ngoba anilwazi usuku nesikhathi!”

Umzekeliso ngamathalente

(Luk 19:11-27)

¹⁴“Embusweni wezulu kuyoba njengomuntu owayezohambela ezweni elikude. Wabiza izinceku zakhe, wazithuma ukuba ziqaphele impahla yakhe.

¹⁵Yileyo naleyonceku wayinika amathalente angangamandla ayo. Enye wayinika amathalente ayisihlanu, enye aba mabili, enye laba linye. Wayesesuka eseya ezweni elikude.

¹⁶Inceku eyayinikwe amathalente ayisihlanu yaphuma ngokushesha yasebenzisa leyomali, yazuza ngayo amanye ayisihlanu ngaphezulu.

¹⁷Kanjalo futhi inceku eyayinikwe amathalente amabili yayisebenzisa imali, yazuza amanye amabili.

¹⁸Kodwa inceku eyayinikwe ithalente elilodwa yasuka yemba umgodi, yathukusa kuwo imali yenkosi yayo.

¹⁹“Emuva kwesikhathi eside inkosi yalezizinceku yabuya, yafike yathi maziylandise ukuthi ziqhube kanjani.

²⁰Inceku eyayinikwe amathalente ayisihlanu yeza yalenta amanye ayisihlanu yathi: ‘Nkosi, wanginika amathalente ayisihlanu. Awubheke nanka amanye ayisihlanu engiwazuzile.’

²¹Inkosi yathi: ‘Halala, nceku ethembekileyo usebenze kahle! Njengoba wethembekile kokuncane, ngizokubeka uphathe okukhulu. Ngena uthokoze kanye nami!’

²²Yeza inceku eyayinikwe amathalente amabili, yafike yathi: ‘Nkosi, wanginika amathalente amabili. Nanka amanye amabili engiwazuzile!’

²³Inkosi yathi: ‘Halala, nceku ethembekileyo usebenze kahle! Njengoba wethembekile kokuncane, ngizokubeka uphathe okukhulu. Ngena uthokoze kanye nami!’

²⁴Inceku eyayinikwe ithalente elilodwa yeza, yafike yathi: ‘Nkosi, ngiyakwazi ukuthi unenhliziyi elukhuni, uvuna lapho ungatshalanga khona, ufule lapho unghlwaneyelanga khona.

²⁵Ngathathe ngesaba ngase ngiyithukusa emhlabathini imali yakho. Yithathe nansi!’

²⁶Inkosi yayo yayisithi kuyo: ‘Uyinceku embi evilaphayo! Ubuvele wazi ukuthi ngivuna lapho ngingatshalanga khona, ngifule lapho ngingahlwaneyelanga khona.

²⁷Ngakhoke bekufanele uyithathe imali yami uyigcine ebhange, ngiyithole yonke isinenzalo mhla ngibuyayo.

²⁸Nina, yithatheni njengamanje lemali ekuye, niyinike lowaya onamathalente ayishumi!

²⁹Ngoba yilowo nalowo onotho uyophiwa enezelelwe kuchichime, lowo ongenalutho uyokwephucwa ngisho nalokho okuncane anakho.

³⁰Yithatheni lenceku engemntuwalutho, niyiphonse phandle ebunnyameni lapho kuyoba khona ukukhala nokugedla amazinyo.’

Ukwahlulela kokugcina

³¹“Lapho iNdodana yesintu iza ngobukhosi bayo nezingilosi zonke ziyingungile, iyohlala esihlalweni sayo sobukhosi,

³²abantu bezizwe zonke babuthane phambi kwayo, ibaqembule bahlukane, njengomelusi ehlukanisa izimvu nezimbuzi.

³³Iyomisa izimvu ngakwesokunene sayo, izimbuzi zibe ngakwesokhohlo.

³⁴INkosi ibisithi kulabo abangakwesokunene sayo: ‘Wozani nina enibusisiwe nguBaba! Wozani nidle ifa lombuso enawulungiselwa kusukela mhla kudalwa umhlaba.

³⁵Ngoba ngangilambile nangipha ukudla, ngomile nangiphuzisa amanzi. Ngangiyisihambi nangingenisa emizini yenu

³⁶ngihambaze nangembulela; ngangigula nangihambela, ngiboshiwe nangivakashela.’

³⁷Abalungileyo bayothi: ‘Nkosi, sakubona nini ulambile sakupha ukudla, kumbe womile sakuphuzisa amanzi?’

³⁸Kunini lapho sakubona uyisihambi sakungenisa emizini yethu, nalapho uhambaze sakwembulela na?

³⁹Kunini lapho sakubona ugula noma uboshiwe sakuhambela na?’

⁴⁰INkosi iyobaphendula ithi: ‘Niyabona, lokho enakwenzela oyedwa walababafowethu abancane abangelutho, impela nakwenzela mina.’

⁴¹“Ibisithi kulabo abangakwesokhohlo: ‘Sukani phambi kwami, nina eniqalekisiweyo, niye emlilweni ovutha ungunaphakade, olungiselwe uSathane nezingilosi zakhe.

⁴²Ngoba ngangilambile nangincisha ukudla, ngomile aningiphuzisanga.

⁴³Ngangiyisihambi kodwa aningingenisanga emizini yenu, ngangihambaze kodwa aningembulelanga. Ngangigula, ngangiboshiwe kodwa aningihambelanga.’

⁴⁴Bese bethi kuyo: ‘Nkosi, kunini lapho sakubona ulambile, womile, uyisihambi, uhambaze, ugula, uboshiwe, kodwa asakusiza na?’

⁴⁵Ibisithi kubo: ‘Ngiqinisile ngithi, lokho eningakwenzelanga oyedwa walaba abancane abangelutho, anikwenzanga nakimi.’

⁴⁶Laba-ke bosiba ekujezisweni okuphakade, kodwa abalungileyo baye ekuphileni okuphakade.”

UMatewu 26

Izikhulu zihlose ukubulala uJesu

(Mark 14:1-2; Luk 22:1-2; Joh 11:45-53)

¹Kwathi uJesu angaqeda ukukusho konke lokhu, wathi kubafundi bakhe:

²“Niyazi ukuthi kuzodlula izinsuku ezimbili kushaye iPhasika. INdodana yesintu isiyonikelwa ukuba ibethelwe esiphambanweni.”

³Kwabuthana izikhulu zabaphristi kanye nezigele zamaJuda kwaKhayifase umphristi omkhulu.

⁴Bacebisana ngokuthi uJesu abambambe ngobuqili bambulale.

⁵Kepha bathi: “Ake simyeke ngomkhosi, hleze kusuke izibhelu phakathi kwabantu!”

UJesu ugcotshwa ngamakha eBethani

(Mark 14:3-9; Joh 12:1-8)

⁶UJesu wayeseBethani emzini kaSimoni owayebizwa ngokuthi onochoko.

⁷Kwathi esadla kwasondela kuye owesifazane, ephethe isitsha esakhiwe ngetshe lealabhasta. Sasinamakha awuketshezi, umfuma wakwanokusho obiza kakhulu. Owesifazane wathela amakha ekhanda likaJesu waligcoba.

⁸Kwathi lapho abafundi bekubona lokhu, bacasuka bathi: “Kudlalelwani ngamakha kanje na?”

⁹Abengathengiswa, kuzuzwe imali eningi inikwe abampofu.”

¹⁰UJesu waphawula ukuthi bayakhononda, wathi kubo: “Nimkhathazelani lomame na? Ungenzele lukhulu.

¹¹Izimpofana nihlala ninazo njalo. Kepha mina angihlezi nani njalo.

¹²Umzimba wami uwugcobe ngalamakha, wawulungiselela ukumbelwa kwawo.

¹³Nginyaqinisa impela ngithi, nomaphi lapho lendaba emnandi kaNkulunkulu iyoshunyayelwa khona emhlabeni wonke, kuyokhulunywa nangalokhu akwenzileyo, abantu bamkhumbule.”

UJudasi wethembisa ukuthengisa ngoJesu

(Mark 14:10-11; Luk 22:3-6)

¹⁴Kwasuka omunye kwabayishumi nambili othiwa nguJudasi Iskariyotho, waya ezikhulwini zabaphristi,

¹⁵wafike wathi: “Niyongiholela malini uma ngininika yena na? ” Base bembalela imali engangezinhlamvu ezingamashumi amathathu esiliva, bamnika.

¹⁶Kwasukela lapho wayesecuthela ithuba elingamlungela ukuba achilizele uJesu kubo.

Badla iwundlu lePhasika

(Mark 14:12-21; Luk 22:7-14, 21-23; Joh 13:21-30)

¹⁷Kwafika usuku lokuqala lomkhosi wokudla isinkwa esingenamvubelo. Abafundi baya kuJesu bathi: “Ufuna sikulungiselephi ukuba udle iwundlu lePhasika na? ”

¹⁸Wathi mabahambe baye kumuntu othize emzini, bafike bathi kuye: “UMfundisi uthi: ‘Isikhathi sami sesisondele. Ngiza kwakho ngizokudla iwundlu lePhasika nabafundi bami.’ ”

¹⁹Abafundi benza njengoba betshelwe nguJesu, base belungisela iPhasika.

²⁰Kwahlwa, uJesu wafike wahlala wadla nabafundi abayishumi nambili.

²¹Kuthe besadla wathi: “Lalelani lapha nginitshela! Phakathi kwenu kukhona ozothengisa ngami ezitheni.”

²²Badangala bambuza ngamunye bathi: “Ngabe yimi Nkosi na? ”

²³Kodwa waphendula wathi: “Lowo ogcobhoza isinkwa sitsheni sinye nami, nguye kanye ozothengisa ngami.

²⁴INdodana yesintu izokwemuka ukwemuka impela njengoba kushiwo ngayo embhalweni ongcwele, kepha maye kulomuntu oyothengisa ngeNdodana yesintu! Kwakuyomlungela lomuntu ukuba wayengazalwanga! ”

²⁵UJudasi owayezomkhaphela wabuza wathi: “Ngabe yimi Rabi na? ” Wamphendula wathi: “Usushilo! ”

Ukumiswa kwesidlo seNkosi

(Mark 14:22-26; Luk 22:15-20; 1 Khor 11:23-26)

²⁶Kuthe besadla uJesu wathatha isinkwa, wabonga kuNkulunkulu, wasihlephula wasinika abafundi bakhe wathi: “Thathani nidle; lokhu kungumzimba wami.”

²⁷Wayesethatha indebe yewayini, wabonga kuNkulunkulu wabanika wathi: “Yiphuzeni nonke,

²⁸ngoba lokhu kuyigazi lami eliqinisa isivumelwano sikaNkulunkulu, elichithelwa abaningi ukuba kuthethelelwe izono.

²⁹Ngithi kini, kusukela manje angisayuphinde ngikuphuze okwesithelo somvini kuze kube ngamhla sengiyophuza nani iwayini elisha embusweni kaBaba.”

³⁰Bahuba elokubonga, bemuka baya eNtabeni yemiHlwathi.

UJesu ubikezela ukuphika kukaPhetro

(Mark 14:27-31; Luk 22:31-34; Joh 13:36-38)

³¹UJesu wathi kubo: “Niyongihlamuka nonke ngabo lobubusuku. Ngoba embhalweni ongcwele uNkulunkulu uthi: “ ‘Ngiyogadla kumalusi afe, umhlambi wezimvu uhlakazeke.’

³²“Kodwa lapho sengivukile kwabafuleyo, ngiyonandulela ngiye eGalile.”

³³UPetro wamphendula wathi: “Angisoze ngakuhlamuka mina noma sebekushiya bonke.”

³⁴UJesu wathi kuye: “Lalela lapha ngikutshele! Kubo lobubusuku banamuhla, iqhude lingakakhali, uyobe usungiphike kathathu.”

³⁵UPetro waphendula wathi: “Ngeke ngikuphike ngisho sengibulawa kanye nawe.” Basho njalo bonke abafundi.

UJesu ukhuleka eGetsemane

(Mark 14:32-42; Luk 22:39-46)

³⁶Wayesefika-ke uJesu nabafundi kuleyondawo ethiwa yiGetsemane. Wathi kubo: “Hlalani lapha, ngisayokhuleka laphaya.”

³⁷Wathatha uPhetro namadodana amabili kaZebedi, waqhela nabo. Wafikelwa usizi, wakhathazeka emoyeni.

³⁸Wayesethi kubo: “Umoya wami ulusizi kabi, ngiyafa ubuhlungu. Hlalani lapha nilinde kanye nami! ”

³⁹Waqhubeka ibangana, wathi mbo ngobuso wakhuleka wathi: “Baba, lendebe yobunzima ayidede kimi uma kungenzeka! Nokho akungayi ngokuthanda kwami, kodwa akuye ngentando yakho! ”

⁴⁰Wabuyela kubafundi wabafica bezumekile. Wathi kuPhetro: “Awu! Kodwa beningelinde ngisho nomzuzwana nje kanye nami na?”

⁴¹Lindani nikhuleke ingaze nehlelwe ukulingwa! Umoya womuntu uyavuma, kepha imvelo yakhe ibuthakathaka.”

⁴²Wabuye wasuka ngokwesibili wafike wakhuleka wathi: “Baba, uma lendebe yenhlupheko ingenakudeda kimi, kodwa kube kumele ngiyiphuze, ayenziwe intando yakho!”

⁴³Kuthe esabuyela kubo, wabafica belele futhi, ngoba izinkophe zabo zazisindwa ubuthongo.

⁴⁴Wabuye wabashiya wafike wakhuleka ngokwesithathu, waphinda wona lawomazwi.

⁴⁵Waphinde wabuyela kubafundi, wafike wathi: “Kanti nisalele niphumule namanje na? Sesifikile isikhathi sokuba iNdodana yesintu ichilizelwe ezandleni zezoni.

⁴⁶Sukumani sihambe! Lowo othengisa ngami nangu eza!”

Ukukhashelwa nokuboshwa kukaJesu

(Mark 14:43-50; Luk 22:47-53; Joh 18:3-12)

⁴⁷Kwathi uJesu engakaligwinyi, qathatha uJudasi, omunye wabayishumi nambili. Wayehamba nesixuku esikhulu sabantu behlome izinkemba namawisa, bethunywe yizikhulu zabaphristi kanye nezigele zamaJuda.

⁴⁸Umkhapheli lona wayekade evumelene nabo ngesibonakaliso abayombona ngaso uJesu, wathi: “Lowo engiyombingelela ngimange, kuyobe kunguye kanye enimfunayo; anombopha!”

⁴⁹UJudasi wasondela masinyane kuJesu wafike wathi: “E Rabi!” Esho embingelela emanga.

⁵⁰Kodwa uJesu wathi kuye: “Mngane, bekuyilento oze ngayo!” Base besondela, sebemdumela uJesu bembopha.

⁵¹Omunye kulabo ababemi noJesu wagqashula inkemba, wagadla esisebenzini somphristi omkhulu, wasihhebhula indlebe.

⁵²UJesu wayesethi kuye: “Phindisela inkemba yakho emgodleni, ngoba bonke abasebenzisa inkemba bayobulawa ngenkemba.

⁵³Awuboni yini ukuthi ngingacela kuBaba, abesengithumela amaviyo ngamaviyo ezingilosi zingivikele na?

⁵⁴Pho sekungaze kugcwaliseke kanjani okushiwo yimibhalo engcwele ukuthi kumele kwenzekile lokhu na?”

⁵⁵Kulowomzuzwana uJesu wabuza esixukwini wathi: “Uma benibabele ukungibamba bese ningaze niphume nihlome ngezinkemba namawisa, sengathi ngingumphangi na? Bengihlezi ethempelini ngifundisa mihla kepha nangangibopha.

⁵⁶Kepha konke lokhu kwenzekile ukuba kufezeke imibhalo yabaphrofethi.” Base bemhlamuka bonke abafundi babaleka.

UJesu uphambi komkhandlu

(Mark 14:53-65; Luk 22:54-55, 63-71; Joh 18:12-14, 19-24)

⁵⁷Labo ababebophe uJesu bamqhuba bamusa kwaKhayifase umphristi omkhulu. Kwakubuthene kwakhe izazimibhalo nezigele.

⁵⁸UPhetro walandela buqamama kwaze kwaba semabaleni esigodlo kwamphristi omkhulu. Wangena ngaphakathi emabaleni, wafike wahlala nogqayinyanga, ukuba abone isiphetho.

⁵⁹Zazama izikhulu zabaphristi nomkhandlu wonke ukwakhela uJesu ubufakazi bamanga abulawe.

⁶⁰Kodwa kabutholakalanga yize kwase kuvele ofakazi bamanga abaningi. Kwaze kwavela ababili ngasekugcineni

⁶¹bathi: “Lomuntu wathi: ‘Ngingadiliza ithempeli likaNkulunkulu, ezinsukwini ezintathu ngibuye ngilakhe futhi.’ ”

⁶²Umpthristi omkhulu wasukuma wathi kuJesu: “Awuphenduli ngalutho lapho bekumangalela na? ”

⁶³Kodwa uJesu wathula du. Umpthristi omkhulu wathi kuye: “Sitshele iqiniso phambi kukaNkulunkulu ophilayo ukuthi ngabe unguMesiya iNdodana kaNkulunkulu na.”

⁶⁴UJesu wamphendula wathi: “Usushilo! Kodwa ngithi kini, kamuva niyoyibona iNdodana yesintu ihlezi ngakwesokunene sikaSomandla, iza ngamafu ezulu.”

⁶⁵Umpthristi omkhulu waklebhula izembatho zakhe wathi: “Usehlambalaze uNkulunkulu! Pho sisazobenzani ofakazi na? Nakho-ke, nizizwele emhlambalaza!

⁶⁶Nithini kulokho? ” Bamphendula bathi: “Icala liyamlahla! Akabulawe! ”

⁶⁷Base bemfela ngamathe ebusweni, bamshaya ngenqindi, abanye kubo bammukula ezihlathini

⁶⁸bathi: “We Mesiya! Ake usitshele ukuthi ushaywe ngubani! Ake ubholofide sizwe! ”

UJesu uphikwa nguPhetro

(Mark 14:66-72; Luk 22:56-62; Joh 18:15-18, 25-27)

⁶⁹UPhetro wayehlezi emabaleni esigodlo. Wasukelwa yintombazane eyayisebenza kwamphristi omkhulu yafike yathi: “Nawe kade uhamba noJesu waseGalile.”

⁷⁰Kodwa waphika phambi kwabo bonke wathi: “Angiyazi lento oyishoyo! ”

⁷¹Wasuka waya esangweni, wabonwa ngenye intombazane. Yasho kwababelapho yathi: “Lo kade ehamba noJesu waseNazaretha.”

⁷²Wafunga waphika futhi ethi: “Angimazi nakumazi lomuntu! ”

⁷³Emuva kwesikhashana ababelapho basondela kuPhetro bafike bathi: “Kuyiqiniso impela ukuthi nawe ungomunye wabo. Udalulwa yindlela otekela ngayo.”

⁷⁴Waqanganisa wafunga wagomela wathi: “Angimazi lomuntu! ” Washo njalo maqede kwakikiliga iqhude.

⁷⁵UPhetro wayeseyakhumbula lapho uJesu ekhuluma ethi: “Iqhude lingakakhali uyobe usungiphike kathathu.” Waphumela phandle wakhala ezimathonsi.

UMatewu 27

UJesu usiwa kuPilatu

(Mark 15:1; Luk 23:1-2; Joh 18:28-32)

¹Kwathi kungasa zonke izikhulu zabaphristi kanye nezigele zamaJuda zanquma ukuba abulawe uJesu.

²Bamgiga ngezintambo, bamqhuba bamnikela kuPilatu ulusibalukhulu embusweni wamaRoma.

Ukufa kukaJudasi

(ImiSeb 1:18-19)

³Kuthe ukuba uJudasi owayemchilizele ezitheni abone ukuthi uJesu uselahlwe yicala, wafikelwa ukuzisola. Wathatha izinhlamvu ezingamashumi amathathu zemali eyisiliva, waziphindisela ezikhulwini zabaphristi kanye nezigele

⁴wathi: “Ngonile, ngakhaphela kini umuntu osezobulawa engenacala.” Kodwa bamphendula bathi: “Akudokwe ligayelwe thina lelo! Zibonele wena!”

⁵Wathatha imali wayintshinga ethempelini wahamba waziphanyeka.

⁶Kodwa izikhulu zabaphristi zayicosha lemali zathi: “Akumthetho ukuba ifakwe esikhwameni sebandla, ngoba iyimali yegazi.”

⁷Zanquma ukuba kuthengwe ngayo insimu yombumbi, ibe yindawo yokungcwaba izihambi.

⁸Ngakhoke lensimu isabizwa ngokuthi yiNsimu yeGazi kuze kube namuhla.

⁹Kwase kuyagcwaliseka okwashiwo ngomlomo womphrofethi uJeremiya kwathiwa: “Base bethatha amashumi amathathu ezinhlamvu zemali eyisiliva, inani elalilinganiswe ngabakwaIsrayeli ukuba bamthenge ngalo.

¹⁰Bathenga ngazo insimu yombumbi, njengoba ngitshelwe yiNkosi uSomandla.”

UPilatu uphenya uJesu

(Mark 15:2-5; Luk 23:3-5; Joh 18:33-38)

¹¹UJesu wamiswa phambi kukalusibalukhulu, owambuza wathi: “Wena uyinkosi yamaJuda na?” Waphendula wathi: “Nguwena okushoyo.”

¹²Izikhulu zabaphristi kanye nezigele zamethwesa amacala, akaze aphenhula nakanye.

¹³UPilatu wathi kuye: “Auwwezwa yini amacala angaka abakwethwesa wona na?”

¹⁴Kepha uJesu akazange amphenhule nakokukodwa. Lokhu kwammangalisa kabi ulusibalukhulu.

UJesu ugwetshwa ukuba abulawe
(Mark 15:6-15; Luk 23:13-25; Joh 18:39-19:16)

¹⁵Kwakuyaye kuthi minyaka yonke ngomkhosi wePhasika ulusibalukhulu akhululele abantu isiboshwa sibe sinye, leso abaziqokele sona.

¹⁶Ngaleyonkathi kwakukhona isiboshwa esaziwayo esasithiwa nguJesu Bharabha.

¹⁷Kuthe abantu sebebuthene, uPilatu wathi kubo: “Nifuna ukuba nginikhululele bani, uJesu Bharabha kumbe uJesu okuthiwa nguMesiya na?”

¹⁸Ngoba phela wayazi ukuthi bamnikele kuye ngoba bemfela umona uJesu.

¹⁹Kwathi uPilatu esahlezi esigcawini samacala, umkakhe wathumela kuye wathi: “Ungayingeni indaba yalowomuntu olungileyo, ngoba umoya wami ukhathazekile namuhla, angizange ngilale ngimphupha.”

²⁰Kodwa izikhulu zabaphristi nezigele zase zikhwezele izixuku ukuba zicele kukhululwe uBharabha, kubulawe uJesu.

²¹Ulusibalukhulu wabuza kubantu wathi: “Yimuphi kulaba ababili enifuna ukuba nginikhululele yena na?” Bamphenhula bathi: “UBharabha.”

²²UPilatu wathi kubo: “Pho bese ngimenze njani uJesu okuthiwa nguMesiya na?” Basho bonke bathi: “Kabethelwe esiphambanweni!”

²³Kodwa wathi: “Ngoba enze cala lini na?” Kepha kwaba yima beqonga kakhulu bethi: “Kabethelwe!”

²⁴UPilatu wabona ukuthi akusekho masiza, kanti futhi hleze kusuke isibhelu, wayesethatha amanzi phambi kwezihlwele zabantu, wahlamba izandla bebuka, wathi: “Anginacala egazini lalomuntu! Zenzeleni nina!”

²⁵Izihlwele zamemeza zathi: “Igazi lakhe liyokhalela thina nabantabethu.”

²⁶UPilatu wayesebakhululela uBharabha, kodwa wathi akubhaxabulwe uJesu. Wayesemnikela emabuthweni ukuba ambethele esiphambanweni.

Amabutho abhinqa uJesu
(Mark 15:16-20; Joh 19:2-3)

²⁷Amabutho kalusibalukhulu amthatha uJesu angena naye esigodlweni, afike aqoqa lonke ibutho ukuba limbunganye.

²⁸Amhlabula izingubo, amembathisa isevatho esibomvu tebhu,

²⁹aphica umqhele wamahlamvu anameva, amnqwazisa wona. Amphathisa induku yomhlanga ngesandla sokunene, amkhulekela emguqele, ambhinqa athi: “Bayede, ume njalo nkosi yamaJuda!”

³⁰Amfela ngamathe ahlwitha induku, elokhu emshaya ngayo ekhanda.

³¹Lapho esezidelisile ngokumenza inhlekisa, amhlabula isevatho amembathisa izingubo zakhe, ahamba naye aya kombethela esiphambanweni.

UJesu ubethelwa esiphambanweni

(Mark 15:21-32; Luk 23:26-43; Joh 19:17-27)

³²Kuthe amabutho esesindleleni ahlanguana nomuntu waseSayirene okuthiwa nguSimoni. Amphoqa ukuba etshathe isiphambano sikaJesu.

³³Bafika endaweni ethiwa yiGolgotha okusho ukuthi kusoGebhezini lweKhanda.

³⁴Amnikeza iwayini elixutshwe nesibabane ukuba aliphuze, kodwa wathi angalinambitha wala ukuliphuza.

³⁵Ambethela esiphambanweni, ayesehlukaniselana ngezingubo zakhe enza inkatho,

³⁶ahlala phansi emqaphile.

³⁷Ngenhla kwekhanda lakhe ayechome lombhalo wokwazisa icala lakhe: “Lo unguJesu inkosi yamaJuda.”

³⁸Kwabethelwa abaphangi ababili eziphambanweni kanye naye, omunye engakwesokunene sakhe, omunye engakwesokhohlo.

³⁹Ababedlula ngendlela babemnqekuzela amakhanda, bemhlambalaza

⁴⁰bethi: “Ingani phela wena ubuzodiliza ithempeli, ubuye ulakhe ngezinsuku ezintathu! Yehla phela esiphambanweni uzisindise uma uyiNdodana kaNkulunkulu!”

⁴¹Zasho njalo nezikhulu zabaphristi kanye nezazimibhalo nezigele zitekula ngaye zithi:

⁴²“Wasindisa abanye, kodwa akakwazi ukuzisindisa yena. Nanso phela ingonyama yakwaIsrayeli! Akehle manje esiphambanweni, bese simkholwa.

⁴³Wethembele kuNkulunkulu, akamsindise manje uma emthanda, ngoba phela wathi: ‘NgiyiNdodana kaNkulunkulu.’”

⁴⁴Nabaphangi imbala ababebethelwe kanye naye eziphambanweni babesho njalo nabo bemkhaca.

Ukufa kukaJesu

(Mark 15:33-41; Luk 23:44-49; John 19:28-30)

⁴⁵Kwahlwa eminibebade, izwe lonke lambozwa yisigayegaye sobumnyama obakhasa phansi kwaze kwaba ntambama.

⁴⁶Kwakungezithuba zantambama ngehora lesithathu, uJesu wadazuluka wathi: “Eli, Eli lema sabakthani?” okusho ukuthi: “Nkulunkulu wami, Nkulunkulu wami, ungilahleleni na?”

⁴⁷Abanye kulabo ababemi lapho bemuzwa bathi: “Lo umemeza uEliza.”

⁴⁸Omunye wabo waphuthuma khona lapho wathatha isiponji, wasicwilisa sathi ciki iwayini elimuncu. Wasichoma othini, wamsondezela sona ukuba asimunce.

⁴⁹Kodwa abanye bathi: “Ake sibone phela ingabe uEliza uzofika yini amsindise na.”

⁵⁰UJesu wabuye wamemeza futhi ngezwi elikhulu, wafa.

⁵¹Indwangu ehenqa ngaphakathi ethempelini yadabuka kabili kusukela phezulu kwaze kwayoshaya phansi. Umhlaba wamazama, amadwala aqhekezeka,

⁵²amangcwaba avuleka, abaningi abangcwele ababefile bavuka,

⁵³baphuma emangcwabeni. Emuva kokuvuka kukaJesu bangena emzini ongcwele iJerusalema, babonwa ngabantu abaningi.

⁵⁴Induna namabutho ayo ayeqaphe uJesu kwathi bangabona kuzamazama umhlaba kwenzeka nezinye izigigaba, base besaba kakhulu bathi: “Impela lo ubeyiNdodana kaNkulunkulu.”

⁵⁵Kwakukhona abesifazane abaningi ababebukela bemele kude. Babekade behamba noJesu bemsebenzela besuka kwelaseGalile.

⁵⁶Phakathi kwabo kwakukhona uMariya waseMagdala noMariya, unina kaJakobe noJosefa, nonina wamadodana kaZebedi.

Ukulondolozwa kwesidumbu sikaJesu egodini

(Mark 15:42-47; Luk 23:50-56; Joh 19:38-42)

⁵⁷Kwase kuyahwalala. Kwakukhona isicebi somuntu waseArimathiya othiwa nguJosefa, naye engumfundi kaJesu.

⁵⁸Waqonda kuPilatu, wafike wamcela isidumbu sikaJesu. UPilatu wathi akasinikwe.

⁵⁹UJosefa wathatha isidumbu, wasithandela ngendwangu yelineni ehlanzekile.

⁶⁰Wayesilondoloza egodini lakhe elalingumhume ayeligumbe etsheni. Wagingqa inguzunga yetshe, wavala ngayo umnyango wethuna, wahamba.

⁶¹UMariya waseMagdala kanye naloMariya omunye babehlezi lapho, bebhakene nasethuneni.

Ukulindwa kwethuna likaJesu

⁶²Kwasa ngakusasa kuyisabatha kwabuthana izikhulu zabaphristi kanye nabafarisi, kwayiwa kuPilatu.

⁶³Bafike bathi: “Nkosi, siyakhumbula ukuthi kuthe esaphila lomkhohlisi wathi: ‘Ngiyovuka ngosuku lwesithathu emuva kokufa kwami.’”

⁶⁴Ngakhoke thumela ukuba ithuna lakhe lilindwe kuze kudlule izinsuku ezintathu, abafundi bakhe bangasintshontshi isidumbu, bese betshela abantu ukuthi uvukile kwabafuleyo, lawamanga abo abe yinkohliso embi eyedlula eyokuqala.”

⁶⁵UPilatu wathi: “Thathani nampa abalindi, nihambe nabo nifike nililinde ithuna ngokubona kwenu.”

⁶⁶Bahamba-ke bafike balilinda, bavala itshe lalo ngengcino, base bebashiya abalindi ukuba baliqaphe.

UMatewu 28

Ukuvuka kukaJesu ekufeni

(Mark 16:1-8; Luk 24:1-12; Joh 20:1-10)

¹Kwathi sekudlule isabatha, ngeSonto kuseluvivi, uMariya waseMagdala naloMariya omunye bahamba bayobona ithuna.

²Kuthe ngaso lesosikhathi umhlaba wazamazama ngesihluku esibi. Ingilosi yeNkosi yehla ezulwini, yafike yagingqa itshe yalisusa emnyango wethuna, yaqhwakela kulo.

³Yayibukeka ikhanya njengonyazi, isembatho sayo simhlophe okweqhwa.

⁴Kuthe abalindi bangayibona kwaphela nasozwanini, baquleka kwangathi bafule.

⁵Ingilosi yakhuluma kwabesifazane yathi: “Musani ukwesaba! Ngiyazi ukuthi nifuna uJesu obebethelwe.

⁶Kekho lapha, uvukile ekufeni njengoba asho. Wozani nibone lapho ebelele khona!

⁷Phuthumani kubafundi bakhe nibabikele nithi: ‘Uvukile kwabafuleyo. Uyanandulela uya eGalile. Kulapho niyombona khona.’ Senginitshelile-ke.”

⁸Basheshe basuka ethuneni, bephethwe uvalo benokujabula okukhulu, bagijima bayobikela abafundi bakhe.

⁹Base behlangana noJesu endleleni. Wababingelela, beza bamguqela babamba izinyawo zakhe, bakhuleka kuye.

¹⁰UJesu wathi kubo: “Musani ukwesaba! Hambani nitshela abafowethu ukuba baye eGalile; kulapho bayofike bangibone khona.”

Umbiko wabalindi

¹¹Kuthe abesifazane besesindleleni kwasuka abanye babalindi, baya emzini bafike babikela izikhulu zabaphristi ngakho konke okwenzekileyo.

¹²Izikhulu zabaphristi zabuthana kanye nezigele, zahlanganisa icebo, zase zifumbathisa abalindi ngemali enkulu,

¹³zathi kubo: “Anothi abafundi bakhe bafike ebusuku bantshontsha isidumbu sakhe nilele.

¹⁴Uma lokhu kufika ezindlebeni zikalusibalukhulu, nize ningakhathazeki. Siyomchazela kahle simbonise nina ningahlushwa lutho.”

¹⁵Abalindi bathatha imali benza njengoba beyaliwe. Lamahemuhemu anda phakathi kwamaJuda. Alokhu ekhona kuze kube namuhla.

Ukuthunywa kwabayishumi nanye

(Mark 16:14-18; Luk 24:36-49; Joh 20:19-23; ImiSeb 1:6-8)

¹⁶Abafundi abayishumi nanye baya eGalile kuleyontaba ababeyilayelwe nguJesu.

¹⁷Kwathi lapho bembona bamguqela bakhuleka kuye, kodwa abanye bangabaza.

¹⁸UJesu wasondela wathi kubo: “Ngiphiwe amandla onke ezulwini nasemhlabeni.

¹⁹Hambani nenze izizwe zonke zibe ngabafundi bami, nibabhabhadise ngegama likaYise neleNdodana neloMoya oyiNgcwele,

²⁰nibafundise ukugcina konke enginiyale ngakho. Niyabona, mina ngihamba nani imihla yonke kuze kube sekupheleni komhlaba.”

UMarko

UMarko 1

Ukushumayela kukaJohane umbhabhadisi

(Mat 3:1-12; Luk 3:1-18; Joh 1:19-28)

- ¹Indaba emnandi elanda ngoJesu Kristu, iNdodana kaNkulunkulu, iqala kanje.
- ²Embhalweni ongcwele womphrofethi uIsaya kulotshwe kwathiwa: “UNkulunkulu uthi: ‘Nasi isigijimi sami engisithuma phambi kwakho ukuba sikuhlahlele indlela.’”
- ³Kukhona ozwakala enkenteza ehlane ethi: ‘Cabelani iNkosi indlela, niqondise nemikhondo yayo!’ ”
- ⁴Nempela-ke kwavela uJohane umbhabhadisi eshumayela ehlane ethi: “Phendukani nibhabhadiswe, bese kuthethelelwa izono zenu!”
- ⁵Abantu besifunda saseJudiya nabomuzi waseJerusalema baphuma bonke belokhu beya kuye. Babevuma izono zabo, abesebabhabhadisa emfuleni iJordani.
- ⁶UJohane wayegqoka isembatho esenziwe ngoboya bekameli, azibophe ngoqhotho okhalo, edla izinkumbi nezinyosi zasendle.
- ⁷Wayeyaye amemezele athi: “Ngilandelwa ngonamandla kunami. Angifanele ngisho nokukhothama ngithukulule imichilo yezicathulo zakhe.
- ⁸Mina benginibhabhadisa ngamanzi, kodwa yena uzonibhabhadisa ngoMoya oyiNgcwele.”

Ukubhabhadiswa kukaJesu

(Mat 3:13-17; Luk 3:21-22)

- ⁹Akubanga nsuku ngaki wafika uJesu evela eNazaretha kwelaseGalile, wabhabhadiswa nguJohane eJordani.
- ¹⁰Wanele waphuma nje emanzini, wabona izulu livuleka, kwehlela kuye uMoya oyiNgcwele usajuba ngesimo.
- ¹¹Kwezwakala izwi livela ezulwini lithi: “Wena uyiNdodana yami engiyithandayo. Ngiyathokoza ngawe.”

Ukulingwa kukaJesu

(Mat 4:1-11; Luk 4:1-13)

- ¹²UMoya oyiNgcwele waqhubezela uJesu ngaso lesosikhathi ukuba aye ehlane.
- ¹³Kwaphela izinsuku ezingamashumi amane elingwa nguSathane ehlezi ehlane, kunezilwane zasendle. Izingilosi zafike zabungaza.

UJesu uqala umsebenzi wakhe eGalile

(Mat 4:12-17; Luk 4:14-15)

¹⁴Ngemuva kokuboshwa kukaJohane umbhabhadisi, uJesu waya kwelaseGalile, washumayela indaba kaNkulunkulu ethokozisayo.

¹⁵Wathi: “Sekuyiso isikhathi, umbuso kaNkulunkulu usondele! Phendukani nikholwe indaba ethokozisayo!”

UJesu ubiza abadobi ukuba babe ngabalandeli

(Mat 4:18-22; Luk 5:1-11)

¹⁶Kwathi uJesu egudla ichibi laseGalile, welamela uSimoni noAndreyu wakwabo kaSimoni bedoba izinhlanzi ngenetha, nakhu phela babengabadobi.

¹⁷UJesu wathi kubo: “Wozani ningilandele! Ngizonifundisa ukudoba abantu.”

¹⁸Bashiya amanetha khona lapho, baba ngabalandeli bakhe.

¹⁹Waqhubeka ibangana, welamela uJakobe noJohane, amadodana kaZebedi. Babesesikebheni belungisa amanetha.

²⁰Wababiza khona lapho, bashiya uZebedi uyise esikebheni kanye nezisebenzi eziqashiweyo, bamlandela.

Umuntu onomoya ongcolileyo

(Luk 4:31-37)

²¹Bangena emzini waseKaphenawume. UJesu wangena esinagogeni ngosuku lwesabatha wafundisa.

²²Kwabamangalisa ukufundisa kwakhe, ngoba wafundisa ngegunya engananazi, akabafundisanga njengezazimibhalo.

²³Esinagogeni labo kwaqhamuka umuntu khona lapho owayenomoya ongcolileyo. Lomuntu waklabalasa wathi:

²⁴“Usifunani wena Jesu waseNazareth na? Usuzosibhubhisa na? Ngiyakwazi ukuthi ungubani wena Ngcwele kaNkulunkulu.”

²⁵UJesu wakhaca umoya ongcolileyo wathi: “Thula umsindo! Phuma kuye!”

²⁶Wawusumhlukumeza umuntu uklabalasa, waphuma kuye.

²⁷Bamangala bonke babuzana bathi: “Kuyini lokhu? Yimfundiso entsha yomuntu onegunya! Kanti nemimoya engcolileyo uyikhuza imlalele!”

²⁸Washeshe waba nedumela kulo lonke laseGalile.

UJesu uphilisa umkhwekazi kaSimoni

(Mat 8:14-15; Luk 4:38-39)

²⁹Base bephuma esinagogeni, baya emzini kaSimoni benoAndreyu; oJakobe noJohane behamba nabo.

³⁰Umkhwekazi kaSimoni wayephethwe ngumkhuhlane umlalise phansi. UJesu wabikelwa ngaye,

³¹wasondela, wamphakamisa ngesandla. Lowo obegula walulama emkhuhlaneni, wayesebabungaza.

UJesu uphilisa abantu abaningi kusihlwa

(Mat 8:16-17; Luk 4:40-41)

³²Ilanga lashona kwahwalala, kwase kulethwa kuJesu bonke ababephethwe yizifo namadimoni.

³³Kwabuthana abantu bomuzi wonke ngasemnyango.

³⁴Waphilisa abantu abaningi ababephethwe yizifo ngezifo, wakhipha namadimoni amaningi. Akawavumelanga ukuba akhulume, ngoba ayemazi ukuthi ungubani.

UJesu uphuma uphumo lokushumayela

(Luk 4:42-44)

³⁵UJesu wavuka entathakusa wathi shelele waya endaweni eyihlane wafika wakhuleka.

³⁶USimoni kanye nababenaye baphuma bamthungatha.

³⁷Bamthola bathi kuye: “Bakufuna bonke.”

³⁸Wabaphendula wathi: “Asiqhubeke sihambele nakwezinye izigodi ezakhelene nalapha ukuba ngishumayeke nakhona, ngoba yilowo umsebenzi engeza ngawo.”

³⁹Wahamba eshumayela emasinagogeni abo kulo lonke elaseGalile, ekhipha namadimoni kubantu.

UJesu uphilisa umuntu onochoko

(Mat 8:1-4; Luk 5:12-16)

⁴⁰Kwasuka umuntu onochoko waya kuJesu, wafike waguqa wamnxusa wathi: “Uma uthanda ukungihlambulula ngiphile ungakwenza.”

⁴¹UJesu wafikelwa yisihe welula isandla wamphatha wathi: “Ngiyathanda, hlambuluka!”

⁴²Lwaphela khona lapho uchoko kumuntu, wahlanjululwa waphila.

⁴³UJesu wammukisa ngaso lesosikhathi, wamdonsa ngendlebe wathi:

⁴⁴“Qaphela ungathi vu nakubani ngalokhu, kodwa hamba uziveze kumphristi akuhlole. Bese wethula umhlatshelo wokuhlanjululwa kwakho njengoba kwayaleza uMose, bese kufakazeka kubantu ukuthi usuhlanjululiwe.”

⁴⁵Kepha lomuntu wahamba eyifafaza lendaba kulo lonke. Ngokwanda kwayo uJesu akabe esakwazi ngisho nokulubeka ndawo abonwe, kepha wayesezihlalela endle, abantu bejinge beya kuye beqhamuka nxazonke.

UMarko 2

UJesu uphilisa umuntu ofe uhlangothi

(Mat 9:1-8; Luk 5:17-26)

¹Kwadrula izinsukwana uJesu wabuyela eKhaphenawume. Kwezakala ukuthi ubuyile usekhaya.

²Kwakungebantu abaya kuye kwaze kwasweleka indawo ngisho nasebaleni imbala. Wayebashumayeza izwi likaNkulunkulu.

³Kwalethwa kuye umuntu ofe uhlangothi, ethwelwe ngabantu abane.

⁴Kepha kabakwazanga ukumfinyelelisa kuJesu, ngoba kwakuvimbe isinyokotho. Base beqaqa uphahla lwendlu maqondana noJesu. Kwathi kungavuleka isikhala, isiguli basehlisela endlini ngohlaka.

⁵UJesu wakubona ukukholwa kwabo wathi kogulayo: “Mntanami, izono zakho zithethelelwe.”

⁶Ezinye izazimibhalo ezazihlezi lapho zazindla zathi:

⁷“Lo angakusho kanjani lokhu na? Uhlambalaza uNkulunkulu. Ngubani ongathethelela izono ngaphandle kukaNkulunkulu kuphela?”

⁸UJesu wakubamba emoyeni wakhe abakuzindlayo, wathi kubo: “Nizindlelani kanjena na?”

⁹Yikuphi okulula ukukusho kulesisiguli, ukuthi: ‘Izono zakho zithethelelwe,’ nokuthi: ‘Sukuma uthathe uhlaka lwakho uhambe?’

¹⁰Ngizonidelisa nibone ukuthi iNdodana yesintu inegunya lokuthethelela izono emhlabeni.” Wayesethi kogulayo:

¹¹“Sukuma wena, uthathe uhlaka lwakho ubuyele kini!”

¹²Indoda yasukuma, yathatha uhlaka lwayo yahamba bebuka bonke. Bamangala kabi, badumisa uMvelinqangi bathi: “Asikaze sikubone okunje!”

UJesu ubiza uLevi

(Mat 9:9-13; Luk 5:27-32)

¹³UJesu wabuye waphuma, wagudla echibini laseGalile. Izihlwele zazilokhu zibuthana kuye azifundise.

¹⁴Kuthe edlula lapho kutheliswa khona, wabona uLevi ka-Alfiyose ehlezi esebenza, wathi kuye: “Woza ungilandele!” ULevi wayesesuka njalo eseba ngumlandeli wakhe.

¹⁵Emuva kwalokhu uJesu wafike wahlala kwaLevi kudliwa. Phakathi kwalabo ababehlezi bedla kanye naye nabafundi bakhe, kwakukhona abathelisi nezoni eziningi. Bangingi phela abantu abanje ababehamba noJesu bemlandela.

¹⁶Izazimibhalo ezithile zeqembu labafarisi zithe ukuba zimbone edla nezoni nabathelisi, zabuza kubafundi bakhe zathi: “Angadla kanjani nabathelisi nezoni na?”

¹⁷Wakuzwa lokhu uJesu wathi kubo: “Abaphilileyo abadingi nyanga, kodwa idingwa ngabagulayo. Angizelanga ukubiza abalungileyo, kodwa ngezela ukuzomema izoni.”

UJesu uchaza ngokuzila ukudla

(Mat 9:14-17; Luk 5:33-39)

¹⁸Abafundi bakaJohane umbhabhadisi kanye nabafarisi babeyaye bazile ukudla. Abantu base beya kuJesu bafike bathi: “Abafundi bakho abakuzili ngani ukudla, kodwa abafundi bakaJohane kanye nababafarisi bebe bekuzila na?”

¹⁹UJesu wabaphendula wathi: “Kungenzeka yini ukuba nxa kushadwa ikhetho lizile ngenkathi umyeni esahlezi nalo na? Phinde, uma umyeni esalokhu ephakathi kwabo ngeke bazile.

²⁰Kodwa kuyofika isikhathi lapho beyokwaphucwa khona umyeni, bese bezila-ke ngalolosuku.

²¹“Akukho muntu ochibela isiqephu esisha engutsheni endala. Uma ekwenza lokho, isichibi siyoshwabana siklebhule ingubo, imbobo ibisiba nkulu kunakuqala.

²²Futhi akukho muntu owetha iwayini eliseyifumuka ezimvabeni zesikhumba esezizindala, ngoba uma ekwenza lokho ifumuka liyobila, izimvaba ziqhume, kuchitheke iwayini, konakale nezimvaba. Phela ifumuka lethiwa ezimvabeni ezintsha.”

Abafundi bakha izikhwebu kuyisabatha

(Mat 12:1-8; Luk 6:1-5)

²³Langathize uJesu wadabula emasimini kuyisabatha. Kuthe besahamba, abafundi basukela izikhwebu bazibhonyula.

²⁴Abafarisi bathi kuye: “Awubheke! Bayenzelani lento kuyisabatha, ibe ingavunyiwe na?”

²⁵Wabaphendula wathi: “Kanti anizange nifunde yini ngesenzo sikaDavide mhla enephango lokudla, yena kanye neqembu lakhe sebelambile?”

²⁶Wangena endlini kaNkulunkulu ngesikhathi kuphethe uAbhiyatha umphristi omkhulu. Wadla izinkwa ezazethulwe kuNkulunkulu, nanxa kwakungemthetho ukuba umuntu azidle ngaphandle kwabaphristi kuphela. Wazidla waze wapha nabeqembu lakhe.”

²⁷UJesu wathi kubo: “Isabatha lamiselwa ukusiza umuntu; umuntu kadalelwanga ukubuswa yisabatha.

²⁸Ngakhoke iNdodana yesintu iyinkosi neyesabatha.”

UMarko 3

Umuntu owayenesandla esishwabeneyo

(Mat 12:9-14; Luk 6:6-11)

¹UJesu wabuye wangena esinagogeni. Kwakukhona lapho umuntu owayenesandla esishwabeneyo.

²Bamqaphela uJesu befuna ukubona ukuthi uzomphilisa yini lomuntu kuyisabatha na. Babefuna phela izaba zokummangalela.

³Washo kulowo osandla sakhe sishwabene wathi: “Sukuma uze lapha ngaphambili!”

⁴Wababuza wathi: “Yikuphi okuvumelekile ngokomthetho ukuba kwenziwe kuyisabatha, ukusiza umuntu noma ukumlimaza, ukuhlenga impilo noma ukubulala na?” Kepha bawuhlaba inhlali nje.

⁵Waphosa amehlo ngakubo wacasuka, wadabuka ngoba izinhliziyi zabo zazilukhuni benenkani, wayesethi kumuntu: “Yelula isandla!” Waselula, sase siphila.

⁶Abafarisi baphuma esinagogeni, bahlanganisa masinyane nabeqembu likaHerodi, bamakhela uzungu lokumbulala uJesu.

Kubuthene izixuku ngasechibini laseGalile

⁷UJesu wemuka nabafundi bakhe, baya ngasechibini laseGalile. Izindimbane zabantu zamlandela ziqhamuka eGalile. Kwaya kuye nabantu ababevela eJudiya

⁸naseJerusalema naseIdumiya nangale komfula iJordani nangasemizini yaseThire naseSidoni. Lezizinkumbi zabantu zaya kuJesu lapho zizwa ngakho konke ayekwenza.

⁹Ngenxa yobuningi babantu wathuma abafundi bakhe ukuba bamlungisele isikebhe hleze abantu bamminyanise.

¹⁰Phela wayesephilise abantu abaningi, ngakhoke bonke ababenezifo baphangelana ngaye ukuba bamthinte.

¹¹Imimoya engcolileyo ibe isambone qede izilahle phambi kwakhe imemeze ithi: “Wena uyiNdodana kaNkulunkulu.”

¹²Kepha wayijakada ukuba ingalokothi imdalule ukuthi ungubani.

UJesu uqoka abaphostoli abayishumi nambili

(Mat 10:1-4; Luk 6:12-16)

¹³UJesu wakhuphukela entabeni, wababiza beza kuye labo ayebafuna.

¹⁴Waqoka abayishumi nambili ababezohamba naye abathume ukuba bayoshumayela,

¹⁵babe namandla okukhipha amadimoni.

¹⁶Wabamisa-ke laba abayishumi nambili: uSimoni amqamba ngelikaPhetro,

¹⁷uJakobe noJohane amadodana kaZebedi, abaqamba igama lokuthi nguBhowanegesi, okusho ukuthi ngoZululihlomile,

¹⁸uAndreya noFiliphu, uBhatolomu noMatewu, uTomasi noJakobe ka-Alfiyose, uThadiyose noSimoni umshokobezi,

¹⁹noJudasi Iskariyotho owagcina esethengise ngoJesu ezitheni.

UJesu uchaza ngoBhelezabhule

(Mat 12:22-32; Luk 11:14-23; 12:10)

²⁰Wabuyela ekhaya, kwaphinda futhi kwabuthana izinkumbi zabantu; akwabe kusabakho thuba lokuba uJesu nabafundi bakhe badle ukudla kodwa lokhu.

²¹Abakubo kwathi bangakuzwa lokho banikela khona sebeyomlanda, ngoba kwase kuthiwa: “Usangene, kaseyedwa!”

²²Kukhona izazimibhalo ezafika zivela eJerusalema. Zazimhlambalaza zithi: “Ungenwe nguBhelezabhule”, zabuye zathi: “Inkosi yamadimoni yiyona lena akhipha ngayo amadimoni.”

²³Wathi isixuku asisondele, wasilandisa imizekeliso wathi: “USathane angazichitha kanjani na?”

²⁴Uma umbuso uqhekeke walwa wodwa, lowombuso awunakuma.

²⁵Uma umndeni wehlukene phakathi, lowomuzi awusoze wema.

²⁶Uma umbuso kaSathane ungase uqhekeke ulwe wodwa ngeke ume, sekuwukuwa kwawo njalo lokho.

²⁷“Akukho muntu ongangenela isiqhwaga aphanje impahla yaso, engaqalanga wasibopha, bese kuba yima ephanga endlini yaso.

²⁸“Ngiqinisile impela uma ngithi kini, zonke izono zabantu nayo yonke inhlamba yabo iyothethelelwa, noma sebemthuke uNkulunkulu kwaze kweqa.

²⁹Kodwa lowo ohlambalaza uMoya oyiNgcwele kayikuthethelelwa nanini, unecala lokona kwaphakade.”

³⁰Ngoba uJesu babemthuke bathi: “Ungenwe ngumoya ongcolile.”

Izihlobo zikaJesu zangempela

(Mat 12:46-50; Luk 8:19-21)

³¹Kwase kufika unina nabafowabo bakaJesu. Bema phandle, bathumela ukuba abizwe.

³²Kwakukhona abantu behlezi bemngungile; bathi kuye: “Mfundisi nangu unyoko nabafowenu phandle, bayakufuna.”

³³UJesu wabaphendula wathi: “Ngobani okungathiwa bangumame nabafowethu na?”

³⁴Waphosa amehlo kwababehlezi bemngungile wathi: “Nampa abangumame nabafowethu!”

³⁵Ngoba lowo owenza intando kaNkulunkulu ungumfowethu nodadewethu nomame.”

UMarko 4

Umzekeliso ngomhlwanyeli

(Mat 13:1-9; Luk 8:4-8)

¹UJesu wabuye futhi wafundisa abantu ngasechibini laseGalile. Kwabuthana kuye izihlwele zabantu zamngunga waze wangena wahlala esikebheni echibini, isixuku sonke simi osebeni.

²Wayebafundisa okuningi ebalandisa imizekeliso. Ekufundiseni kwakhe wathi kubo:

³“Lalelani! Kwasuka umuntu wahamba wayohlwanyela.

⁴Enye imbewu yaqathakela ngasendleleni ehlwanyela, izinyoni zafika zayicosha.

⁵Enye yaqathakela endaweni eyidwala elalinomhlabashana ongengakanani. Yamila ngokushesha njengoba umhlabathi wawungajulile okutheni.

⁶Kwathi ukuba libalele ilanga izithombo zahwamuka zabuna, ngoba izimpande zazo zazingajulile.

⁷Enye yaqathakela emhlabathini onehlozi lameva, okwathi lingamila lakhula laminyanisa izithombo, azabe zisachuma ukuba zithele.

⁸Enye yaqathakela emhlabathini oyimvunde, yamila yakhula yathela, yaveza izinhlamvu ezingamashumi amathathu, enye yaveza ezingamashumi ayisithupha, enye zaba yikhulu.”

⁹Wayesethi: “Onendlebe akezwe engikushoyo!”

Inhloso yokubalandisa imizekeliso

(Mat 13:10-17; Luk 8:9-10)

¹⁰Kuthe lapho uJesu esesele yedwa nabayishumi nambili kanye nabanye ababemlandela, base bembuza ukuthi leimizekeliso isho ukuthini.

¹¹Waphendula wathi: “Nina isiyanikhanyela imfihlo yombuso kaNkulunkulu, kepha-ke kulabo abangakabi ngabalandeli konke kuza kubo ngemizekeliso

¹²ukuze kuthi “ ‘noma bebona uqobo lokubona kepha kungabakhanyeli, noma bezwa uqobo lokuzwa kepha kungabachacheli, bangaphenduki babuyele kuNkulunkulu abathethelele izono zabo’.”

UJesu uchaza umzekeliso ngomhlwanyeli

(Mat 13:18-23; Luk 8:11-15)

¹³UJesu wathi kubo: “Kodwa uma ningawuqondi lomzekeliso, pho ningayiqonda kanjani into engumzekeliso na?

¹⁴Lokhu akuhlwanyelayo lomuntu kuyizwi likaNkulunkulu.

¹⁵Leyombewu eyaqathakela ngasendleleni ichaza ngalabo okuthi, lapho izwi lihlwanyelwa ezinhliziyweni zabo, balizwe kepha uSathane asheshe afike acoshe izwi ebelihlwanyelwe kubo.

¹⁶Naleyo eyahlwanyelwa endaweni eyidwala ichaza ngalabo okuthi bangalizwa izwi basheshe balemukele balithokozele,

¹⁷kepha kabanazimpande ezijulile, balibamba okwesikhashana nje; kuthi bangafikelwa yizinsizi bahlushwe ngenxa yezwi, basheshe behluleke bawe ekukholweni.

¹⁸Abanye bafana nembewu eyahlwanyelwa emhlabathini onehlozi lameva; bayilabo abalizwayo izwi,

¹⁹kepha ukunaka ezomhlaba nokuluthwa yingcebo nokukhangwa ngokunye kungena enhliziyweni, kuliminyanise izwi, bangabe besathela neze.

²⁰Kodwa labo abafaniswa nembewu eyahlwanyelwa emhlabathini oyimvunde, yilabo abalizwayo izwi balemukele, bathele okuhle okuphindwe ngamashumi amathathu, abanye ngamashumi ayisithupha, abanye ngekhulu.”

Isibani esisithwa ngomcengezi

(Luk 8:16-18)

²¹UJesu wathi kubo: “Konje isibani sike sokhelwe yini silethwe endlini, bese sisithwa ngomcengezi noma sibekwa phansi kombhede na? Angithi sichwanekwa endaweni ephakemeyo?

²²Phela konke okusithekileyo kuyodalulwa, kanti futhi ayikho imfihlo engayikuvela obala.

²³Onendlebe akezwe engikushoyo! ”

²⁴Wayesethi kubo: “Qaphelani ukuthi nizwani! UNkulunkulu uyonamukelisa okungangesilinganiso enizilinganisela ngaso, abuye anezezelele.

²⁵Ngoba lowo onotho uyophiwa enezelelwe; lowo ongenalutho uyokwephucwa ngisho nalokho anakho.”

Umzekeliso wembewu ezimilela ngokwayo

²⁶Wabuye wathi kubo: “Umbuso kaNkulunkulu unjengomuntu ehlwanyela imbewu ensimini.

²⁷Ubusuku nemini, elele kumbe engalele, imbewu iyamila ize ikhule, ebe yena engazi ukuthi lokhu kwenzeka kanjani.

²⁸Umhlabathi ngokwawo uveza ukudla, kuqale ngohlanga lukhule bese lubhaceka, kugcine ngesikhwebu esivuthwe saphelela.

²⁹Kuthi kungabeletha ukudla ensimini kuqede, abeselandelisa ngesikela ngoba sekuyisikhathi sokuvuna.”

Umzekeliso wohlamvana lwesihlahla sikamasitadi

(Mat 13:31-32; Luk 13:18-19)

³⁰UJesu wathi: “Singawufanisa nani umbuso kaNkulunkulu? Singawuchaza ngamuphi umzekeliso na?”

³¹Unjengohlamvana lwesihlahla sikamasitadi olutshalwa emhlabathini. Ngobuncane balo lwedlula zonke emhlabeni.

³²Kepha lapho selutshaliwe lumila lukhule lube yisihlahla esikhulu kunemifino yonke etshaliweyo esivandeni, sibe namagatsha amakhulu ahlangeneyo anomthunzi, izinyoni zize zakhele izidleke kuwo.”

UJesu ubalandisa imizekeliso

(Mat 13:34-35)

³³UJesu washumayeza abantu izwi likaNkulunkulu, ebalandisa imizekeliso eminingi enjalo, kwaya ngokulingana nalokho ababekwazi ukukuqonda.

³⁴Bekuthi njalo uma ebaxoxela indaba abalandise imizekeliso yodwa, bese kuba yima echazela abafundi bakhe konke kamuva esesele nabo bodwa.

UJesu uthulisa isiphepho

(Mat 8:23-27; Luk 8:22-25)

³⁵Ngalolosuku sekuhlwile uJesu wathi kubafundi: “Ake siwelele ngaphesheya kwechibi!”

³⁶Basishiya isixuku bahamba ngesikebhe ayesegebhe kuso. Kwakukhona nezinye izikebhe ezazipekezelana nabo.

³⁷Kwagubhuka isiphepho somoya esinamandla, amadlambi atheleka esikebheni aze acishe asigabha.

³⁸Kepha uJesu wayesemuva esikebheni elele ubuthongo eqamele. Bamvusa bathi: “Mfundisi, uzithela ngabandayo sifa na?”

³⁹Wavuka wawukhuza umoya, wathulisa ichibi wathi: “Thula uthi du!” Umoya wanqamuka khona lapho, kwathula kwathi cwaka.

⁴⁰Wayesethi kubafundi: “Nesabani kangaka? Anikabi nakukholwa namanje na?”

⁴¹Lwabashaya lwabeqa, babuzana bathi: “Hawu! Muntu muni lo olalelwa umoya ngisho namagagasi imbala na?”

UMarko 5

UJesu ukhipha idimoni kumuntu kwelamaGerasa

(Mat 8:28-34; Luk 8:26-39)

¹Bafika ngaphesheya kwechibi laseGalile ezweni lamaGerasa.

²UJesu wanele waphuma esikebheni, wanqwamana nomuntu owayenomoya ongcolileyo. Lomuntu wayephuma emathuneni

- ³lapho ayehlala khona. Kwakungekho muntu owayengambamba ambophe ngisho nangeketango.
- ⁴Wayeseke waboshwa kanihgi izinyawo nezandla ngamaketango, kodwa wayewagqabula, awanqamunqamule nje, engasenakunqotshwa muntu.
- ⁵Wayedamane eklabalasa ezibenga ngamatshe ubusuku nemini emathuneni nasemagqumeni.
- ⁶Kuthe ukuba lomuntu abone uJesu esebuqamama, wagijima waya kuye wamkhothamela,
- ⁷wampompoloza wathi: “Kodwa ungifunani wena Jesu, Ndodana kaNkulunkulu oPhezukonke na? Ngikufungisa uNkulunkulu, ngiyeke ungangihanqazi ngezinhluho!”
- ⁸Ngoba uJesu wayekade ethe: “Wena moya ongolileyo, phuma kulomuntu!”
- ⁹UJesu wambuza wathi: “Ungubani igama lakho na? ” Wamphendula wathi: “Siliviyo lamabutho empi, ngoba sibaningi.”
- ¹⁰Wayesefundekela uJesu ukuba angayixoshi kuleyondawo lemimoya engcolileyo.
- ¹¹Kwakweluke umhlambi omkhulu wezingulube entabeni yalapho.
- ¹²Yayisizikhalela imimoya engcolileyo ithi: “Sithumele ezingulubeni, singene kuzo!”
- ¹³Wayivumela. Imimoya engcolileyo yaphuma kumuntu yangena ezingulubeni; umhlambi owawubalelwa ezinkulungwaneni ezimbili wagulukudela esiweni, wagxambukela echibini, waminza.
- ¹⁴Abelusi bezingulube babaleka babikela abantu emzini nasemaphandleni. Abantu beza bazozibonela lesosehlakalo.
- ¹⁵Baya kuJesu, nebala bayibona indoda ebikade inebutho lamadimoni ihlezi isigqokile sekubuye nomqondo; lwabashaya uvalo.
- ¹⁶Laba ababeyibonile lento bayixoxa kubantu bebazekela ngokwakukade kwenzeka ohlanyeni, nokwavelela izingulube.
- ¹⁷Bamncenga uJesu ukuba aphume aphele ezweni labo.
- ¹⁸Ngenkathi uJesu engena esikebheni, indoda eyayikade inamadimoni yacela ukuba ihambe naye.
- ¹⁹Kepha uJesu wayenqabela wathi: “Phindela kwabakini, ubalandise konke iNkosi ekwenzele khona, nokuthi ikuhawukele kanjani!”
- ²⁰Yahamba-ke yayisimemezela ezweni elimadolobha ayishumi ngalokho ayenzele khona uJesu. Bamangala bonke bekuzwa lokho.

Indodakazi kaJayiro; owesifazane owathinta ingubo kaJesu

(Mat 9:18-26; Luk 8:40-56)

- ²¹UJesu wawela ngesikebhe wabuyela ngaphesheya kwechibi. Kwabuthana izindimbane kuye lapho ngasechibini.
- ²²Kwafika indoda enguJayiro igama, ingomunye wabaphathi esinagogeni. Yathi ukuba imbone uJesu yazilahla phambi kwakhe,
- ²³yamfundekela yathi: “Indodakazi yami iyalayela, sekubonwa kusile. Woza uyibeke izandla isinde iphile!”
- ²⁴UJesu wahamba nayo. Walandelwa umshungu omkhulu ummpintshile.
- ²⁵Kwakukhona owesifazane owayesephathwe yisifo sokopha iminyaka eyishumi nambili.
- ²⁶Wayesehlupheke kakhulu, esechithe konke anakho eqothulwa yizinyanga zimelapha, kungekho kwelulama, empeleni kwasengathi zikubangela phambili.
- ²⁷Wayeseke wezwa ngoJesu, ngakhoke wachusha phakathi kwabantu, waqhamukela uJesu ngemuva, wafike wathinta ingubo yakhe.
- ²⁸Lomame wazitshela ukuthi: “Uma ngike ngathinta okungenani izingubo zakhe nje ngiyosinda.”
- ²⁹Ukopha kwanqamuka khona lapho, wezwa emzimbeni ukuthi usesindile esifweni ebesimhlupha.
- ³⁰Kwathi angazizwa uJesu ukuthi sekuphume kuye amandla okuphilisa, waphendukela masinyane esixukwini, wabuza wathi: “Ngubani ongithinte izingubo zami na?”
- ³¹Abafundi bamphendula bathi: “Ungathi ubona ukuthi abantu bakuminyanise kanje, ube usabuza ukuthi ngubani okuthintile na?”
- ³²Waqalaza wabheka ukuthi ngabe ngubani okwenzile lokhu.
- ³³Owesifazane wayekwazi kodwa okwase kwenzeke kuye, wasondela enovalo ethuthumela, wazilahla phambi kukaJesu, walanda lonke iqiniso.
- ³⁴UJesu usethi kuye: “Mntanami, ukukholwa kwakho kukusindisile. Uhambe nokuthula, usindile esifweni ebesikuhlupha.”
- ³⁵Kuthe uJesu esakhuluma kwafika abanye bevela emzini kaJayiro, babika bathi: “Indodakazi yakho kayisekho. Usamkhathazelani uMfundisi na?”
- ³⁶UJesu wakuzwa abakushoyo wathi kuJayiro: “Ungesabi, kholwa kuphela!”
- ³⁷Akavumelanga muntu ukuba amlandele, ngaphandle kukaPhetro noJakobe noJohane wakwabo kaJakobe.
- ³⁸Bafika emzini kaJayiro, uJesu wakhangwa yisiphithiphithi, abantu bedazuluka bekihla isililo.

³⁹Wangena endlini wathi kubo: “Niwubangelani umsindo ngalesisililo enisikhihlayo na? Intombazane kayifile, ilele.”

⁴⁰Bamhleka usulu. Wayesebakhiphela phandle bonke, wesuka noyise nonina wentombazane kanye nabathathu ayenabo, wangena lapho intombazane yayikhona.

⁴¹Wayibamba ngesandla, wathi: “*Thalitha khumi!*”, okuhunyushwa kuthiwe: “Ntombazanyana, ngithi kuwe: Vuka!”

⁴²Intombazana yavuka yathi gubhubhu, yazihambela (yayineminyaka eyishumi nambili ubudala). Bakhhexa imilomo bemangele.

⁴³Wabadonsa ngendlebe wathi bangalokothi batshele muntu ngokwenzekileyo, wathi abayiphakele idle.

UMarko 6

UJesu bayamenqaba eNazareth

(Mat 13:53-58; Luk 4:16-30)

¹UJesu wasuka lapho waya kwelakubo eNazareth, ehamba nabafundi.

²Wafundisa esinagogeni kuyisabatha. Abantu babefike ngezinkani. Bamuzwa bamangala bathi: “Lomuntu ukuthathaphi lokhu na? Kuhlakanipha kuni lokhu akuphiweyo? Zimangaliso zini lezi azenza ngezandla zakhe?”

³Akusiye yini umbazi lo, indodana kaMariya engumfowabo kaJakobe noJosesi noJudasi noSimoni na? Akubona odadewabo laba abalapha phakathi kwethu na?” Base bemkhipha inyumbazana.

⁴UJesu wathi kubo: “Inyanga yaziswa kulo lonke izwe, kepha ayinaludumo kwelakubo nasezihlotsheni zayo nakwabakwabo imbala.”

⁵Wayengenandlela yokwenza imisebenzi emangalisayo lapho, ngaphandle kokubeka izandla ezigulini ezimbalwa ezaphilayo.

⁶Kwammangalisa ukungakholwa kwabo.

Ukuthunywa kwabayishumi nambili

(Mat 10:5-15; Luk 9:1-6)

UJesu waguduza izigodi zangalapho efundisa.

⁷Wabiza abayishumi nambili basondela kuye, wabathuma ngababili. Wabanika amandla okukhipha imimoya engcolileyo kubantu.

⁸Wathi bangaphathi lutho ekuhambeni kwabo ngaphandle kodondolo kuphela; bangaphathi sinkwa, nasikhwama sokwethekela, namali emakhukhwini;

⁹bafake izimbadada, kepha bangasiphathi isambatho sesibili.

¹⁰Wathi kubo: “Hlalani kulelokhaya eningenise kulo, nize nimuke kuleyondawo!”

¹¹Uma kukhona lapho benqaba ukunamukela khona bengezwa, bashiyeni nibaxwayise ngokubathuntuthela uthuli lwezinyawo zenu.”

¹²Bahamba-ke abaphostoli, bashumayeza abantu ukuba baphenduke.

¹³Bakhipha amadimoni amaningi, bagcoba iziguli eziningi ngamafutha zaphila.

Ukubulawa kukaJohane umbhabhadisi

(Mat 14:1-12; Luk 9:7-9)

¹⁴Inkosi uHerodi yezwa ngokwenzekayo, ngoba igama likaJesu lase lidumile ebantwini. Abanye babethi: “NguJohane umbhabhadisi ovuke kwabafuleyo; yingakho nje enza lemisebenzi emangalisayo.”

¹⁵Kepha abanye bathi: “NguEliza.” Abanye-ke bathi: “Ngumphrofethi onjengomunye wabasendulo.”

¹⁶Kodwa kwathi uHerodi angezwa ngalezizinto, waxakeka wathi: “Usevuke waphila uJohane umbhabhadisi lona engamquma ikhanda.”

¹⁷Phela uHerodi nguye owayekade edumele uJohane wambopha wamgquma ejele. Inkosi yayikhwezelwa nguHerodiya umkaFiliphu eyayikipite naye. UFiliphu wayengumfowabo wenkosi.

¹⁸UJohane phela wayekade ethi kuHerodi: “Akumthetho ukuba ukipite nomkamfowenu.”

¹⁹Ngakhoke uHerodiya wayesembambela amagqubu uJohane, efisa ukuba abulawe. Kepha wayengenandlela

²⁰ngoba uHerodi wayemesaba uJohane, emazi ukuthi ungumuntu olungileyo nongcwele, ngakhoke ede emvikela. Kwakuthi angamuzwa eshumayela axoveke kakhulu emoyeni, nokho kodwa akuthakasele ukumuzwa.

²¹Ithuba elikahle uHerodiya waze walithola mhla uHerodi egubha umkhosi ekhumbula usuku lokuzalwa kwakhe. Wayememe izikhulu zesigodlo sakhe nezinduna zempi kanye neziphakanyiswa zaseGalile.

²²Indodakazi kaHerodiya lowo yangena endlini yabasinela. Yabahlaba umxhuwele oHerodi nezimenywa zakhe. Inkosi yayisithi entombazaneni: “Cela noma yini oyithandayo, ngikuphe yona! ”

²³Yaze yafunga yagomela yathi: “Noma ungacelani kimi ngizokupha, ngisho kungaba yingxenye yombuso wami.”

²⁴Yaphuma intombazana yaya kunina, yafike yambuza yathi: “Ngizocelani na? ” Wathi: “Cela ikhanda likaJohane umbhabhadisi! ”

²⁵Yabuyela enkosini isidumo yacela-ke yathi: “Ngifuna ungiphe khona manje nje ikhanda likaJohane umbhabhadisi lilethwe ngogqoko.”

²⁶Inkosi yadangala, umzimba washona phansi, kepha ngenxa yesifungo eyayisenze phambi kwezimenywa, yaba manqikanqika ukuyilandulela intombazana.

²⁷Yathumela ugqayinyanga ngaso lesosikhathi ukuba alethe ikhanda likaJohane. Waya ejele wafike wamnquma ikhanda,

²⁸wabuya eliphethe ngogqoko, wafike walinika intombazana; yayisilidlulisela kunina.

²⁹Kwathi bangakuzwa lokhu abafundi bakaJohane, base belanda isidumbu sakhe basimbela.

Izinkulungwane eziyisihlanu ziphiwa ukudla

(Mat 14:13-21; Luk 9:10-17; Joh 6:1-14)

³⁰Abaphostoli babuthana kuJesu, bamlandisa ngakho konke ababekwenzile nababekufundisile.

³¹Wathi kubo: “Ake sithi shelele sibe sodwa endaweni eyihlane, nihlabe ikhefu.” Ngoba kwakude kufika abantu abaningi bephuma bengena, uJesu nabafundi bakhe ababe besathola nathuba lokudla imbala.

³²Basuka bahamba ngesikebhe, baya endaweni eyihlane ukuba babe bodwa.

³³Nokho baningi abababonayo besuka, baphawula ukuthi nguJesu nabafundi bakhe. Bagijimela lapho, beqhamuka kuzo zonke izigodi begijima, babashekelela.

³⁴Kuthe ephuma nje esikebheni wakhangwa uquqaba lwabantu. Wafikelwa yisihe, ngoba babenjengezimvu ezingamelusi; wabafundisa okuningi.

³⁵Kuthe sekuhlwa abafundi basondela kuye bafike bathi: “Lendawo iyihlane, futhi selishonile.

³⁶Batshela bahlakazeke baye emaphandleni nasemizini eseduzane ukuba bazithengele okuya ngasethunjini! ”

³⁷UJesu wabaphendula wathi: “Bapheni nina badle! ” Base bebuza bethi: “Usho ukuthi sesizohamba thina sithenge izinkwa ezibiza imali engangezinhlamvu zesiliva ezingamakhulu amabili, sibaphe badle na? ”

³⁸Wathi kubo: “Ake niyobheka ukuthi ninezinkwa ezingaki! ” Kuthe sebezazi ukuthi zingaki bambikela bathi: “Izinkwa eziyisihlanu nezinhlanzi ezimbili.”

³⁹Wabathuma ukuba bahlele bonke abantu ngezigaba, babahlalise etshanini.

⁴⁰Bahlala-ke abantu ngezinhla, amanye amaqembu eyikhulu labantu, amanye engamashumi ayisihlanu.

⁴¹Wathatha izinkwa eziyisihlanu nezinhlanzi ezimbili, wabhekisa amehlo ezulwini wabonga kuNkulunkulu. Wayesehlephula izinkwa, wazinika abafundi ukuba bazabe. Wacaza nezinhlanzi ezimbili, bazabelwa bonke.

⁴²Badla bonke besutha.

⁴³Kwabuthwa imvuthuluka yezinkwa nezinhlazi, kwagcwaliswa amaqoma ayishumi nambili.

⁴⁴Amadoda adlayo lapho ayeyizinkulungwane eziyisihlanu.

UJesu uhamba phezu kwamanzi

(Mat 14:22-33; Joh 6:15-21)

⁴⁵UJesu waphoqelela abafundi bakhe ukuba bangene esikebheni ngaso lesosikhathi, bamendulele baye eBhetsayida ngaphesheya kwechibi, ngenkathi esahlakaza abantu.

⁴⁶Wabavalelisa wahamba wayokhuleka entabeni.

⁴⁷Kwahlwa abafundi bephakathi nechibi ngesikebhe, uJesu esalokhu esele yedwa endle.

⁴⁸Wabona ukuthi siyabashikilisa isikebhe lapho besigwedla, ngoba umoya wawuvunguza uphambana nabo. Kwathi kusesebusukwaneni ngemuva kokukhala kwezinkukhu zesibili uJesu weza ngakubo ehamba phezu kwamanzi. Wayeqonde ukubaceza adlule.

⁴⁹Kodwa lapho bembona ehamba phezu kwamanzi babethi ungumungcwini, basho ngengila bekhala.

⁵⁰Phela bamuthi nhla bonke bethuka kabi. Washeshe wabakhulumisa wathi: "Yimani isibindi, yimi bo, ningesabi!"

⁵¹Waya kubo wakhwela esikebheni, umoya wawusudamba. Bethuka bamangala kakhulu kabi, basambatheka.

⁵²Phela umqondo wabo wawungakachachelwa ngesimanga esasenzeke ezinkweni, kwakulokhu kusathe ngci engqondweni yabo.

UJesu uphilisa abagulayo eGenezareth

(Mat 14:34-36)

⁵³Bawelela ngaphesheya kwechibi bafika ezweni laseGenezareth, bakhunga isikebhe.

⁵⁴Kwathi besehla kuso, abantu bambona uJesu.

⁵⁵Basabalala nesifunda sonke, bathwala iziguli ngezinhlaka, baziya lapho bezwe kuthiwa ungakhona.

⁵⁶Nakuphi lapho aya khona emizaneni nasemizini nasemaphandleni bayisa kuye iziguli ezinkundleni. Bamnxusa ukuba avume zithinte okungenani umphetho wengubo yakhe; bonke abawuthintayo baphiliswa.

UMarko 7

Amasiko asendulo

(Mat 15:1-9)

- ¹Kwabuthana kuJesu abafarisi nezazimibhalo ezithize ezazivela eJerusalema.
- ²Baphawula ukuthi abanye babafundi bakhe badla ngezandla ezingahlanzekile, okusho ukuthi zazingahlanjiwe ngokwesiko.
- ³Phela abafarisi kanye namaJuda onke babambelele emasikweni abasendulo: kabadli bengahlambanga izandla ngokomthetho.
- ⁴Ngisho nokudla okuvela endalini kabakudli bengakakugezi . Kukhona neminye imicikilisho eminingi engamasiko abo abayigcina ngokucophelela, enjengendlela yokugeza izinkomishi nezimbiza nezitsha zethusi .
- ⁵Ngakhoke abafarisi nezazimibhalo bambuza bathi: “Kwenziwa yini ukuba abafundi bakho bangahambisi ngokwamasiko abadala? Bavele badle nje ngezandla ezingahlanzekile.”
- ⁶Wabaphendula wathi: “Habe! Impela kanti wayeqinisile umphrofethi ulsaya lapho ebikezela ngani bazenzisindini, njengoba uNkulunkulu esho embhalweni ethi: “ ‘Lesisizwe singidumisa ngomlomo nje, kepha izinhliziyi zabo zikude nami.
- ⁷Ukungikhonza kwabo kuyize nje; bafundisa imithetho eshaywe ngabantu kube sengathi ivela kimi! ’ ”
- ⁸Waqhubeka wathi: “Niyeka umyalo kaNkulunkulu, nibambelele emasikweni abantu.”
- ⁹Wabuye wathi: “Maye! Senathola isu elihle lokuchitha umyalo kaNkulunkulu bese nigcina amasiko enu!
- ¹⁰UMose wathi: ‘Yazisa uyihlo nonyoko!’ wabuye wathi: ‘Ohlambalaza uyise noma unina akabulawe.’
- ¹¹Kepha nina nifundisa ukuthi, uma umuntu etshela uyise kumbe unina ethi: ‘Ebengizokusiza ngakho sengikwahlukanisele uNkulunkulu ,’
- ¹²lomuntu akasavunyelwe ukuba asize uyise noma unina.
- ¹³Ngalokhu nikwenza ubala okushiwo nguNkulunkulu, nikuchithe ngokufundisa amasiko enu enawamukela kokhokho. Kuningi okunye enikwenzayo okufana nalokhu.”

Okungcolisa umuntu abe ngongahlanzekile

(Mat 15:10-20)

- ¹⁴UJesu wabuye wabiza isixuku sasondela kuye, wathi kuso: “Lalelani lapha ningizwe kahle nonke!
- ¹⁵Akukho lutho umuntu aludlayo lungene kuye olungamngcolisa abe ngongahlanzekile; kepha yilokho okuphuma kuye okumngcolisayo.
- [¹⁶Onendlebe akezwe engikushoyo!]”

¹⁷Wehlukana nabantu qede wangena endlini, abafundi bakhe bambuza ukuthi lomzekeliso uqondeni.

¹⁸Waphendula wathi: “Kanti nani anikuzwa engikushoyo na? Aniboni yini ukuthi lokho umuntu akudlayo kungene ngaphakathi kuye kungemngcolise na?”

¹⁹Phela akungeni enhliziyweni, kodwa kungena esiswini kubuye kuphume ngasese.” (Ngokusho njalo wayechaza ukuthi konke ukudla kuhlanzekile.)

²⁰Waqhubeka wathi: “Yilokho okuqhamuka kumuntu okumngcolisa abe ngongahlanzekile.

²¹Ngoba kuvela ngaphakathi enhliziyweni yomuntu imicabango emibi edala ukuhlobonga nokweba nokubulala

²²nokuphinga nokukhanuka nenkohlakalo nenkohliso namanyala nomona nokugxeka nokuziqhayisa nobuwula.

²³Bonke lobububi buqhamuka ngaphakathi, bungcolise umuntu.”

Ukukholwa kowesifazane ongowezizwe

(Mat 15:21-28)

²⁴UJesu wasuka lapho, waqonda endaweni eseduze nomuzi waseThire. Wangenisa emzini othile, akaze athanda ukuba kwaziwe lokho; kepha kwakungenzeke ukuba ahlale ezifihlile.

²⁵Kwakukhona owesifazane othile owayenendodakazi esencane inomoya ongcolileyo. Wezwa ngoJesu waya kuye, wafike wazilahla phambi kwakhe.

²⁶Owesifazane lo wayengesiyi umJuda, ngokuzalwa engowaseFenisiya kwelaseSiriya. Wanxusa uJesu ukuba akhiphe idimoni endodakazini yakhe leyo.

²⁷UJesu wathi kuye: “Akudle kuqala abantwana abazalwa ekhaya benele; akulungile ukuba kuthathwe ukudla kwabantwana kuphoselwe izinja.”

²⁸Owesifazane wamphendula wathi: “Yebo Nkosi, izinja ziyaye ziyidle kodwa imvuthuluka yabantwana ewa ogqokweni.”

²⁹UJesu wayesethi kuye: “Awu! Ukhulumile mame, usungabuyela ekhaya! Idimoni liphumile kumntanakho.”

³⁰Owesifazane wabuyela kubo, wafica umntwana ecambalele, idimoni seliphumile.

UJesu uphilisa isithulu esiyisimungulu

³¹UJesu wasuka esigodini saseThire, wanqamula eSidoni, wadabula esifundeni esimadolobha ayishumi ephikelele echibini laseGalile.

³²Bayisa kuye isithulu esasinamalimi, bamnxusa ukuba asibeke izandla siphile.

³³Wasithatha waqhela naso kubantu, wasifaka iminwe yakhe ezindlebeni, wasininda ulimi ngamathe akhe.

³⁴Wabhekisa amehlo ezulwini, wabubula wathi kuso: “*Efatha!*” okusho ukuthi: “Vuleka!”

³⁵Zavuleka izindlebe zaso khona lapho, nolimi lwaso lwathukuluka sakhuluma kwaqonda.

³⁶UJesu wabaxwayisa abantu ukuba bangakutsheli muntu lokhu, kepha kwaba sengathi ubaqhubela phambili ukuba lendaba bayandise izwe lonke.

³⁷Abantu bamangala okwehlula ukwenza bathi: “Ukwenze kahle konke; uvula ngisho nezithulu zizwe nezimungulu zikhulume.”

UMarko 8

Izinkulungwane ezine ziphiwa ukudla

(Mat 15:32-39)

¹Akubanga nsuku ngaki kwaphinde kwabuthana izindimbane zabantu. Babengasenalutho abangaludla, uJesu wayesebiza abafundi bakhe basondela, wathi kubo:

²“Ngifikelwa yisihe ngalezizinkumbi zabantu. Sebehlale nami izinsuku ezintathu, manje bazodlani?”

³Uma ngibabuyisela emakhaya belambile bayopatalala nasendleleni, ngoba abanye babo bavela kude.”

⁴Abafundi baphendula bathi: “Pho kulelihlane umuntu angakuthathaphi ukudla okungenela lababantu na?”

⁵Wababuza wathi: “Ninezinkwa ezingaki?” Baphendula bathi: “Ziyisikhombisa.”

⁶Wahlalisa abantu phansi. Wathatha izinkwa eziyisikhombisa, wabonga kuNkulunkulu wazihlephula, wazinika abafundi bakhe ukuba bazabele abantu. Basabela-ke isixuku.

⁷Babephethe izinhlanzana ezimbalwa. UJesu wabonga kuNkulunkulu, wathi nazo azabelwe abantu.

⁸Badla-ke besutha: kwase kubuthwa imvuthuluka, yaba yiziqabetho eziyisikhombisa.

⁹Ababelapho babebalelwa ezinkulungwaneni ezine. Wabavalelisa bagoduka.

¹⁰Wangena esikebheni ngaso lesosikhathi kanye nabafundi, baya ngaseDalmanutha.

Inkani yabafarisi befuna isibonakaliso

(Mat 16:1-4)

¹¹Abafarisi baya kuJesu bafike baqophisana naye. Babesophe ukumhila, ngakhoke bathi akaveze isibonakaliso esikhomba ukuthi unamandla avela ezulwini.

¹²UJesu wabubula ngokudangala okukhulu wathi: “Kodwa yini lesisizukulwane salemihla silokhu safuna isibonakaliso? Ngiyanitshela impela ngithi, akukho sibonakaliso basithola lapha.”

¹³Wabashiya kanjalo, waphindela esikebheni wamuka nabafundi bakhe bawelela ngaphesheya kwechibi.

Imvubelo yabafarisi nekaHerodi

(Mark 16:5-12)

¹⁴Abafundi babekhohlwe umphako, bephethe isinkwa esisodwa kuphela esikebheni.

¹⁵UJesu wabaxwayisa wathi: “Hlalani niqaphele, nixwaye imvubelo yabafarisi neyenkosi uHerodi!”

¹⁶Base befakana imilomo bethi: “Ukusho lokhu ngoba singenasinkwa.”

¹⁷UJesu waphawula ukuthi bathini, wathi: “Nisholani ukuthi aninasinkwa na? Anikaboni yini niqonde namanje? Ngabe kusahlwe ngci engqondweni yenu na?”

¹⁸Njengoba ninamehlo nje aniboni yini? Njengoba ninezindlebe nje anizwa yini? Anisakhumbuli

¹⁹mhla ngihlephula izinkwa eziyisihlanu ngabela izinkulungwane eziyisihlanu na? Nagcwalisa amaqoma emvuthuluka amangaki na? ” Bamphendula bathi: “Ishumi nambili.”

²⁰UJesu wabuza wathi: “Mhla ngihlephula izinkwa eziyisikhombisa ngabela izinkulungwane ezine, nagcwalisa iziqabetho zemvuthuluka ezingaki na? ” Bamphendula bathi: “Eziyisikhombisa.”

²¹Wathi kubo: “Ngabe namanje kusahlwile engqondweni yenu na? ”

UJesu uphilisa impumputhe eBhetsayida

²²Bafika emzini waseBhetsayida. Kwasiwa kuye impumputhe, wanxuswa ukuba ayithinte.

²³Wayibamba ngesandla, wayikhiphela ngaphandle komuzi, wayininda ngamathe emehlweni wayibeka izandla, wayibuza wathi: “Kukhona okubonayo na? ”

²⁴Yavula amehlo yathi: “Ngibona abantu, kodwa babukeka njengezihlahla ezihambayo.”

²⁵Waphinda wayiphatha amehlo elapheka, avuleka nge, yakubona konke kwachacha.

²⁶UJesu wayesemtshela ukuba abuye kubo wathi: “Ungabe usaphindela naseBhetsayida! ”

Ubufakazi bukaPhetro ngoJesu

(Mat 16:13-20; Luk 9:18-21)

²⁷UJesu wahamba nabafundi bakhe baphikelela emizaneni eseduze nomuzi waseKhesariya Filippi. Besesindleleni uJesu wababuza wathi: “Abantu bathi ngingubani na?”

²⁸Baphendula bathi: “Kuthiwa unguJohane umbhabhadisi, kodwa abanye bathi unguElija, abanye-ke bathi ungomunye wabaphrofethi.”

²⁹Wababuza wathi: “Pho nina nithi ngingubani na?” UPhetro wamphendula wathi: “UnguMesiya umgcotshwa.”

³⁰UJesu wayesexwayisa abafundi, wathi bangakhulumi kumuntu ngaye.

UJesu ubikezela ukufa kwakhe

(Mat 16:21-28; Luk 9:22-27)

³¹UJesu wayesefundisa abafundi ukuthi kumele iNdodana yesintu ihlupheke kabi, izigele nezikhulu zabaphristi kanye nezazimibhalo ziyihluphe ziyikhiphe inyumbazane, ibulawe, ivuke emuva kwezinsuku ezintathu.

³²Lokhu wakukhuluma ngokusobala. UPhetro wamdonsela eceleni, wathi makangakhulumi kanjalo.

³³Kepha uJesu waphenduka wabhaka ngakubafundi, wakhuza uPhetro wathi: “Deda kimi Sathane! Izinto awuzibuki ngeso likaNkulunkulu, kodwa uzibuka ngamehlo abantu.”

³⁴Wabiza isixuku kanye nabafundi basondela kuye wathi kubo: “Uma umuntu ethanda ukuba ngumlandeli wami, akazidele etshathe isiphambano sakhe angilandele.

³⁵Ngoba lowo ofuna ukuhlenga ukuphila kwakhe kuyomlahlekela, kepha odela ukuphila kwakhe ngenxa yami nangenxa yevangeli, ukuphila kwakhe kuyolondeka.

³⁶Kungamsiza ngani umuntu ukuba azuze konke okomhlaba, kepha alahlekelwe ngukuphila kwakhe na?

³⁷Ngeke akuthenge ngalutho ukuphila kwakhe kubuyele kuye.

³⁸Uma umuntu enezinhloni ngami nangamazwi ami phambi kwesizukulwane salemihla esingathembekile nesonakeleyo, nayo iNdodana yesintu iyoba nezinhloni ngaye mhla izayo nezingilosi ezingcwele ngobukhosi bukaYise.”

UMarko 9

¹Wathi kubo: “Ake nilalele nginitshele! Kukhona abathile lapha abangayikuthathwa ukufa besahlalele ukufika kwesikhathi abayobona uNkulunkulu ebusa kuso ngamandla.”

UJesu uguquka esinye isimo

(Mat 17:1-13; Luk 9:28-36)

²Kwadlula izinsuku eziyisithupha uJesu wathatha uPhetro noJakobe noJohane, wemuka nabo benyukela entabeni ende. Babebodwa lapho. Waguquka bembuka,

³izingubo zakhe zaba mhlophe zakhazimula zaxhophha amehlo. Akukho muntu emhlabeni ongahlanza izingubo zikhanye kangakaya.

⁴Base bebona uEliza kanye noMose bekhuluma noJesu.

⁵UPhetro wathi kuye: “Rabi , kube kuhle kabi ukuba sibe lapha. Asisale sesimisa amadokodo amathathu, elakho nelikaMose nelikaEliza!”

⁶Phela wayengasazi nokuthi angathini, ngoba base bephelile wuvalo.

⁷Kwaba khona ifu elabasithibezayo, kwezwakala izwi efwini lithi: “Lo uyiNdodana yami engiyithandayo; lalelani ekushoyo!”

⁸Bathi qala qala masinyane kodwa bangabona muntu, ngaphandle kukaJesu owayesele nabo.

⁹Kuthe besehla entabeni uJesu wabadonsa ngendlebe wathi: “Ningalokothi nitshele muntu ngenikubonileyo, iNdodana yesintu ingakavuki kwabafileyo!”

¹⁰Banamathela kulamazwi babuzana ukuthi kuyini ukuvuka kwabafileyo.

¹¹Bambuza bathi: “Zikusho ngani izazimibhalo ukuthi kumele kufike uEliza kuqala na?”

¹²Waphendula wathi: “Kunjalo, uEliza uyofika kuqala ezohlela konke. Pho imibhalo engcwele ikusho ngani ukuthi iNdodana yesintu iyohlushwa kakhulu ibukelwe phansi na?”

¹³Kodwa-ke ngiyanitshela ngithi sewafika uEliza, kepha benza umathanda kuye, kwanjengoba kulotshiwe ngaye embhalweni ongcwele.”

UJesu uphilisa umfana onomoya oyisimungulu

(Mat 17:14-21; Luk 9:37-43a)

¹⁴Babuyela kubafundi babafica bengungwe yisixuku, kukhona nezazimibhalo ezaziqagulisana nabo.

¹⁵Isixuku sonke sanele sambona uJesu samangala kakhulu, samphuthuma sambingelela.

¹⁶Wabuza kubafundi wathi: “Nidazisana nkani zini nalaba na?”

¹⁷Kwaphendula indoda esihlweleni yathi: “Mfundisi bengize kuwe ngilethe indodana yami. Ingenwe ngumoya oyisimungulu.

¹⁸Ude uyidumela uyilahle phansi, ikhihlize amagwebu igedle amazinyo, yome ibe uqhotho. Ngibacelile abafundi bakho ukuba bawukhiphe kodwa behluleka.”

¹⁹UJesu wathi kubo: “Hhawu, loluhlobo lwabantu abangenalo ukholo! Koze kube nini ngihlezi nani na? Ngonibekezelela kuze kube nini na? Mletheni kimi!”

²⁰Base bemlethela umfana. Kwathi ukuba umoya omubi umuthi nhla uJesu, wadumela umfana umshaya phansi, wangqasha wakhohliza amagwebu.

²¹UJesu wabuza kuyise wathi: “Kwamqala nini lokhu na? ” Waphendula wathi: “Wakhula nakho.

²²Kuvamisile ukuba lomoya umsukele, uthi awumqede umphonsa emlilweni nasemanzini. Uma kukhona ongakwenza, sihawukele usisize! ”

²³UJesu wathi kuye: “Uthi uma kukhona engingakwenza? Yebo, okholwayo angakwenza konke.”

²⁴Washo ngelikhulu uyise womfana wathi: “Ngiyakholwa, ngisize kulokhukungakholwa kwami! ”

²⁵UJesu wabona isinyokotho sibabunganyela, wakhuza umoya ongcolileyo wathi: “Moya oyisimungulu nesithulu, kusho mina ngithi kuwe: Phuma uphele kuye! ”

²⁶Umoya waklabalasa, wahlukumeza umfana kabi, wawusuphuma kuye, umfana walala wathi ja, iningi laze lathi usefile.

²⁷Kepha uJesu wambamba ngesandla, wamvusa wamsukumisa.

²⁸Kuthe uJesu esefikile ekhaya, abafundi behlezi naye bebodwa, bambuza bathi: “Sehlulwe yini ukuwukhipha lomoya na? ”

²⁹Waphendula wathi: “Ngumkhuleko kuphela onganqoba umoya onje, akukho okunye.”

UJesu uyaphinda ukubikezela ukufa kwakhe

(Mat 17:22-23; Luk 9:43b-45)

³⁰Base besuka kuleyondawo, baqhubekela phambili badabula kwelaseGalile. Akathandanga ukuba lokho kwaziwe muntu,

³¹ngoba wayefundisa abafundi bakhe. Wathi kubo: “INdodana yesintu izonikelwa ezandleni zabantu bayibulale, kodwa ivuke ngosuku lwesithathu emuva kokufa kwayo.”

³²Kabaqondanga ukuthi ngabe uthini, kepha besaba ukumbuza.

Ngubani omkhulu kunabanye?

(Mat 18:1-5; Luk 9:46-48)

³³Bafika eKhaphenawume. Kuthe sebesekhaya wababuza wathi: “Beniqagulisana ngani endleleni na? ”

³⁴Kepha bawuhlaba inhlali, ngoba babekade bephikisana endleleni bebanga ubukhulu.

³⁵Wahlala phansi, wamemeza abayishumi nambili basondela kuye. Usethi kubo: “Lowo ofuna ukuba ngowokuqala akabe ngowokugcina, azibeke phansi abe yisisebenzi sabo bonke.”

³⁶Wathatha umntwana, wammisa phakathi kwabo. Wamgona wathi kubo:

³⁷“Lowo owemukela umntwana abe munye onje ngenxa yami wemukela mina; lowo-ke ongemukelayo akemukeli mina nje, wemukela uNkulunkulu ongithumileyo.”

“Lowo ongamelene nathi uhambisana nathi”

(Mat 10:42; Luk 9:49-50)

³⁸UJohane wathi kuJesu: “Mfundisi, kade sibona umuntu ebiza igama lakho lapho ekhipha amadimoni. Sase siyamkhuza simvimba, ngoba engahambisani nathi.”

³⁹UJesu waphendula wathi: “Ningabomkhuza; phela lowo obiza igama lami lapho enza izimangaliso, ngeke asheshe angiphendukele angigxibhe.

⁴⁰Ngoba lowo ongamelene nathi uhambisana nathi.

⁴¹Lowo oniphuzisa amanzi ngoba ningabakaMesiya, ngiyaqinisa impela ngithi, uyovuzwa ngalokho.

Izikhubekiso

(Mat 18:6-9; Luk 17:1-2)

⁴²“Okhubekisa abe munye kulaba abancane abakholwa kimi amwise ekukholweni, bekungangcono kulowomuntu ukuba kuboshelwe inguzunga yetshe entanyeni yakhe, aphonswelwandle aminze.

⁴³Ngakhoke uma isandla sakho sikukhubekisa, sinqume! Kungcono kuwe ukuba ungene ekuphileni okuphakade uyingini kunokuba uye esihogweni, emlilweni ongacimekiyo unezandla zombili.

[⁴⁴‘Yindawo ezimpethu zayo zingafi, indawo emlilo wayo ungacimeki.’]

⁴⁵Uma unyawo lwakho lukukhubekisa, lunqume! Kungcono ukuba ungene ekuphileni okuphakade uyisinqekle kunokuba uphonswe esihogweni unezinyawo zombili. [⁴⁶‘Yindawo ezimpethu zayo zingafi, indawo emlilo wayo ungacimeki.’]

⁴⁷Neso lakho uma likukhubekisa, likipilite! Kungcono ukuba ungene embusweni kaNkulunkulu uneso elilodwa kunokuba uphonswe esihogweni unamehlo omabili.

⁴⁸‘Yindawo ezimpethu zayo zingafi, indawo emlilo wayo ungacimeki.’

⁴⁹“Yilowo nalowo uyovivinywa ngomlilo njengokudla kuyoliswa ngosawoti.

⁵⁰Kuhle ukunonga ngosawoti, kepha uma usuphenduke isiphusha, kuyovuselelwa kanjani ukukhalipha kwawo na? Yibani ngusawoti wempela, nihlalisane ngokuthula!”

UMarko 10

UJesu ufundisa ngesehlukaniso

(Mat 19:1-12; Luk 16:18)

¹UJesu wasuka kuleyondawo waya kwelaseJudiya, wawelela kwelingaphesheya komfula iJordan. Kwabuye kwakhandana izihlwele kuye, waphinde wazifundisa njengenhlayenza.

²Kwase kusondela abafarisi besophe ukumhila. Bambuza bathi: “Kungumthetho yini ukuba indoda ichithe umkayo na?”

³Wabaphendula wathi: “Kanti uMose waniyaleza wathini na?”

⁴Bathi kuye: “UMose wavumela indoda ukuba ichithe umkayo ngenchwadi yesehlukano.”

⁵UJesu wathi kubo: “Waloba wanibekela lomthetho, ngoba nje ninamakhanda alukhuni.

⁶Kodwa ekuqaleni lapho ekudala konke uMvelinqangi, ‘wadala abantu baba ngowesilisa nowesifazane.

⁷Ngakhoke indoda iyodela uyise nonina inamathele kumkayo,

⁸labababili babe nyamanye.’ ” UJesu wagcina ngokuthi: “Ngakhoke kabasebabili kepha sebenyamanye.

⁹Lokho-ke osekuhlanganiswe nguMvelinqangi akungahlukaniswa muntu!”

¹⁰Kuthe sebefikile ekhaya, abafundi babuye bambuza ngaloludaba.

¹¹Wabaphendula wathi: “Leyondoda echitha umkayo ibisiganwa ngomunye, inecala lokuphinga kumkayo.

¹²Nowesifazane olahla umyeni wakhe agane enye indoda uyaphinga.”

UJesu ubusisa abantwana

(Mat 19:13-15; Luk 18:15-17)

¹³Bayisa izingane kuye ukuba aziphathe ngezandla, kodwa abafundi babakhuza babavimbela.

¹⁴UJesu wakubona lokhu, wacasuka, wathi: “Bavumeleni abantwana beze kimi, ningabavimbeli, ngoba umbuso kaNkulunkulu ungowabanje.

¹⁵Ngiyanitshela ngithi, bonke labo abangawemukeli umbuso kaNkulunkulu njengomntwana, akasoze ababuse nempela.”

¹⁶Wabagona, wababeka izandla wababusisa.

Indoda ecebileyo

(Mat 19:16-30; Luk 18:18-30)

¹⁷Kuthe lapho esezoqhubeka nohambo lwakhe, indoda ethile yagijimela kuye, yanguqela yambuza yathi: “Mfundisi olungileyo, ngingenze njani ukuze ngidle ifa lokuphila okuphakade na?”

- ¹⁸UJesu wayibuza wathi: “Ukuthathaphi ukuthi ngingolungileyo? Kakho olungileyo, nguMvelinqangi kuphela.
- ¹⁹Angithi uyayazi imiyalo ethi: ‘Ungabulali; ungaphingi; ungebi; ungafakazi amanga; ungaqilizeli muntu; yazisa uyihlo nonyoko!’ ”
- ²⁰Yaphendula yathi: “Mfundisi, ngiyigcinile yonke lemiyalo kwasebusheni bami.”
- ²¹UJesu wayibuka, wezwa eyithanda wathi kuyo: “Kusasilele okukodwa ongakakwenzi. Hamba uthengise ngakho konke onakho wabele abampofu, yikhona uyoba nengcebo ezulwini. Usungeza-ke ungilandele.”
- ²²Indoda yajabha, yahamba umoya wayo udikibele lapho izwa lawamazwi, ngoba yayicebile.
- ²³UJesu waphosa amehlo ngakubafundi bakhe wathi kubo: “Wo kulukhuni kuyitshe ukuba izicebi zingene embusweni kaNkulunkulu!”
- ²⁴Lamazwi akhe abethusa abafundi. Kodwa uJesu waphinde wathi: “Bantabami, kulukhuni kabi ukuba umuntu angene embusweni kaNkulunkulu.
- ²⁵Yebo, kulula ukuba ikameli lichushe entunjeni yosungulo kunokuba isicebi singene embusweni kaNkulunkulu.”
- ²⁶Bakhexa imilomo babuzana bodwa bathi: “Pho uma kunjalo, kungasindiswa bani na?”
- ²⁷UJesu wababheka wathi kubo: “Abantu bangekwenze lokhu, kodwa uNkulunkulu angakwenza, ngoba uNkulunkulu akehlulwa lutho.”
- ²⁸UPhetro wayesethatha wathi kuJesu: “Nakhu thina, sikushiye phansi konke ebesinakho, salandela wena.”
- ²⁹UJesu wathi: “Ngियाqinisa impela ngithi, lowo odela indlu noma abafowabo noma odadewabo noma unina noma uyise noma abantwana noma amasimu, konke lokhu ekwenzela mina nevangeli,
- ³⁰uyophiwa lowo okuningi okuphindwe ngekhulu esekhona lapha emhlabeni. Anikwe izindlu, abafowabo, odadewabo, onina, abantwana, amasimu, ahlupheke nokho, abesethola ukuphila okuphakade ezweni elizayo.
- ³¹Into nje, abaningi abangabokuqala bayoba ngabokugcina, abaningi abangabokugcina babe ngabokuqala.”

Sekungokwesithathu uJesu ebikezela ukufa kwakhe

(Mat 20:17-19; Luk 18:31-34)

- ³²Babenyuka ngendlela bebheke eJerusalema. UJesu wayehamba phambi kwabo, abafundi bemangele nabantu ababelandela besovalweni. UJesu wabuye wathatha abayishumi nambili waqhela nabo, wabalandisa ngokuzomehlela

³³wathi: “Lalelani, sesenyukela eJerusalema manje. INdodana yesintu izonikelwa ezikhulwini zabaphristi kanye nezazimibhalo. Zizoyinqumela ukufa ziyinikele kwabezizwe,

³⁴bayenze inhlekisa, bayifele ngamathe, bayibhaxabule bayibulale, kepha ivuke emuva kwezinsuku ezintathu.”

Isicelo sikaJakobe noJohane

(Mat 20:20-28)

³⁵Amadodana kaZebedi oJakobe noJohane basondela kuJesu bathi: “Mfundisi, kukhona esicela ukuba usenzele khona.”

³⁶Wababuza wathi: “Yini enifuna ukuba nginenzele yona na? ”

³⁷Baphendula bathi: “Ukuba sihlale nawe sikuphahle lapho ususebukhosini bombuso wakho, omunye abe ngakwesokunene sakho, omunye ngakwesokhohlo.”

³⁸UJesu wathi kubo: “Anazi ukuthi nifunani nina. Ningakumela yini ukuphuza indebe yokuhlupheka engiyiphuzayo, nibhabhadiswe ngombhabhadiso wosizi engibhabhadiswa ngawo na? ”

³⁹Baphendula bathi: “Singakwenza.” UJesu wathi kubo: “Yebo niyoyiphuza indebe yokuhlupheka kwami, nibhabhadiswe ngombhabhadiso wami.

⁴⁰Kodwa akukhona okwami ukuhlalisa ngakwesokunene nangakwesokhohlo sami. Lezozikhundla zingezalabo asebazilungiselwa.”

⁴¹Abayishumi bakuzwa lokho base becasukela oJakobe noJohane.

⁴²UJesu wababiza bonke basondela, wathi kubo: “Niyazi ukuthi laba okuthiwa babusa izizwe banamandla phezu kwazo, nezikhulu ziyazibusa ngalabo ezibaphetheyo.

⁴³Akunjalo kodwa kini. Lowo ofuna ukuba mkhulu phakathi kwenu, akabe yinceku yabanye,

⁴⁴nalowo ofuna ukuba ngowokuqala akabe yisisebenzi sabo bonke.

⁴⁵Nayo iNdodana yesintu yayingezanga ukuba ikhonzwe, kodwa yayize ukuba ikhonze abanye, idele ukuphila kwayo kube yisihlengo sokukhulula abaningi.”

UJesu uphilisa uBhathimiyose impumputhe

(Mat 20:29-34; Luk 18:35-43)

⁴⁶Bafika emzini waseJerikho. UJesu waphuma kulowomuzi, ehamba nabafundi bakhe noquqaba olukhulu lwabantu. Kwakunempumputhe ihlezi eceleni kwendlela inqiba; ibizwa ithiwe nguBhathimiyose umfokaThimiyose.

⁴⁷Yathi ingezwa ukuthi lo odlulayo nguJesu waseNazaretha, yamemeza yathi: “Yesu, Ndodana kaDavide, ngihawukele! ”

⁴⁸Yakhuzwa abantu abaningi, kepha babe besathe ayithule, yaqala phansi yasho kakhulu yathi: “Ndodana kaDavide ngihawukele!”

⁴⁹UJesu wema wathi: “Ake nimbize!” Base beyimemeza impumputhe bethi kuyo: “Yima isibindi! Uyakubiza, sukuma!”

⁵⁰Yasukuma yathi lacu, yalahla phansi ingutshana yayo, yaya kuJesu.

⁵¹Usethi kuyo uJesu: “Uthanda ukuba ngikwenzeleni na?” Impumputhe iphendule ithi: “Rabhuni, ukuba ungivule amehlo.”

⁵²UJesu wathi kuyo: “Hamba, ukukholwa kwakho kukusindisile!” Yavuleka amehlo yabona ngaso lesosikhathi, yangena indlela yamlandela.

UMarko 11

UJesu ungena ngodumo eJerusalema

(Mat 21:1-11; Luk 19:28-40; Joh 12:12-19)

¹Babesebuqamama naseJerusalema besondela emizaneni yaseBhetfage naseBhethani ngaseNtabeni yemiHlwathi. UJesu athume abafundi ababili,

²athi kubo: “Hambani niye kunankuya umuzi! Niyothi ningena nje kuwo bese nibona kukhulekwe inkonyane yembongolo engakaze igitshelwe muntu. Yithukululeni niyilethe lapha!”

³Uma kukhona othi kini: ‘Nenzani lapho?’ anothi: ‘INKosi iyayidinga, izosheshe iyibuyise.’”

⁴Bahamba-ke, nebala bayifika inkonyane ngaphandle emgwaqweni ikhulekwe eduze kwesithumbanja sendlu; bayithukulula.

⁵Abathile kwababemi lapho bathi: “Nenzani, nathukulula inkonyane na?”

⁶Babaphendula njengoba beyalwe nguJesu, base bebadedela-ke.

⁷Abafundi bayisa inkonyane kuJesu, bendlala izingubo zabo emhlane wayo, wagibela.

⁸Abantu abaningi bendlala izingubo zabo endleleni, abanye bahlusula amahlamvu ezihlahla endle bawendlala.

⁹Labo ababehamba phambili nababemlandela bamemeza bathi: “Bayede! Ayibongwe ngegama likaSimakade leNkosi ebhekiweyo ukuthi iyeza!”

¹⁰Libuyile, awume njalo umbuso kababa uDavide! Khuzani ubayede kweliphezulu!”

¹¹UJesu wayesetheleka eJerusalema, waye wangena ethempelini. Waqalaza yonke indawo, wayesephuma nabayishumi nambili waya eBhethani, ngoba kwase kuqala ukuqundeka amehlo.

UJesu uqalekisa umkhiwane

(Mat 21:18-19)

¹²Kuthe sebevela eBhethani ngakusasa, uJesu waphathwa yiphango.

¹³Welamela buqamamana umkhiwane onamaqabunga, wahamba eyobheka ukuthi angase atholeni kuwo. Waya kuwo wafica amaqabunga odwa, ngoba kwakungakabi yisikhathi samakhiwane.

¹⁴Washo emkhiwaneni wathi: “Akukho muntu nanini oyophinde adle isithelo esivela kuwe.” Abafundi bakhe bamuzwa ekhuluma kanjalo.

Ukuhlanzwa kwethempeli

(Mat 21:12-17; Luk 19:45-48; Joh 2:13-22)

¹⁵Bafika eJerusalema, uJesu wangena ethempelini. Waxosha ababethengiselana ngempahla kulo. Wagumbuqela amatafula alabo ababeshintshela abantu imali, waketula nezihlalo zababethengisa ngamajuba.

¹⁶Akaze avumela muntu ukuba anqamule nemithwalo emabaleni ethempeli.

¹⁷Wafundisa abantu wathi kubo: “Akulotshiwe yini embhalweni ongcwele okushiwo nguNkulunkulu ethi: ‘Indlu yami iyobizwa ithiwe yindlu okuyokhuleka kuyo abantu bezizwe zonke?’ Kepha nina manje seniyenze umgede wabaphangi.”

¹⁸Izikhulu zabaphristi kanye nezazimibhalo zakuzwa lokhu, zase zifuna isu lokungudluza. Phela zazimesaba, ngoba izihlwele zabe zithathekile ngokufundisa kwakhe.

¹⁹Kwathi kungahlwa waphuma nabafundi eJerusalema.

Isifundo salokho okwenzeka emkhiwaneni

(Mat 21:20-22)

²⁰Kuthe sebebuya ekuseni ngakusasa bedlula ngendlela, babona umkhiwane usuwome kusukela phezulu kwaze kwashaya phansi ezimpandeni.

²¹UPhetro wakhumbula indaba yangayizolo, wayesethi kuJesu: “Rabi, awubheke! Umkhiwane owuqalekisileyo usuwomile.”

²²UJesu wathi kubo: “Thembelani kuNkulunkulu!

²³Uma kungahle kube khona ongatshela lentaba athi kuyo: ‘Zimbuka lapha uphoseke elwandle!’ ngiyaqinisa impela ngithi, uyokwenzelwa lokho uma engangabazi enhliziyweni yakhe kodwa ekholwa ukuthi akushoyo kuzokwenzeka.

²⁴Ngakhoke ngithi kini: Konke enikucelayo nikhuleka, kholwani ukuthi nikutholile, yikhona niyokwamukeliswa.

²⁵Uma nisukuma nikhuleka, thethelelani labo eninamagqubu nabo, yikhona noYihlo osezulwini ezonithethelela izono zenu.

[²⁶Uma ningabathetheleli abanye, noYihlo osezulwini akayikunithethelela izono zenu.]”

Umbuzo ngegunya likaJesu

(Mat 21:23-27; Luk 20:1-8)

- ²⁷UJesu nabafundi babuye bafika eJerusalema. Kuthe esahamba phakathi ethempelini, izikhulu zabaphristi kanye nezazimibhalo nezigele zeza kuye,
- ²⁸zambuza zathi: “Ukwenza lokhu ngagunya lini na? Ngabe ngubani owakunika leligunya na?”
- ²⁹UJesu waphendula wathi: “Ngizoke nginibuze umbuzo owodwa. Ngiphenduleni, nami-ke ngizonitshela ukuthi ngikwenza lokhu ngagunya lini.
- ³⁰UJohane umbhabhadisi walithathaphi igunya lokubhabhadisa, walinikwa nguNkulunkulu noma walithatha kubantu na? Ngiphenduleni kulokho?”
- ³¹Base behlanganisa amakhanda bethi: “Uma sithi walinikwa nguNkulunkulu uzothi: ‘Pho animkholwanga ngani uJohane na?’
- ³²Kanti-ke futhi uma singathi walithatha kubantu, phinde! ” — besaba isixuku, ngakhoke bazikhuza, ngoba phela bonke babethi uJohane wayengumphrofethi woqobo.
- ³³Base bephendula bethi: “Kasazi.” UJesu wathi kubo: “Nami-ke angizukunitshela ukuthi ngikwenza lokhu ngagunya lini.”

UMarko 12

Umzekeliso ngabaqashi besivini

(Mat 21:33-46; Luk 20:9-19)

- ¹Wakhuluma-ke kubo ebalandisa imizekeliso ethi: “Umuntu watshala isivini, wasibiyela ngogange. Wagweda isikhamo sewayini etsheni, wakha idladla lokulinda. Lesisivini wasiqashisa kubalimi, wahambela kwelikude.
- ²Kwafika isikhathi sokuvuna wathumela inceku kubaqashi besivini ukuba ilande ingxenye yesivuno.
- ³Badumela inceku bayidinda, bayiphindisela emuva ivathazela.
- ⁴Umninisivini wabuye wathumela enye inceku. Leyo bayiphophotha ikhanda, bayithela ngehlazo.
- ⁵Wabuye wathumela enye, nayo bayibulala. Benze njalo nakwezinye eziningi: kukhona ezadindwayo nezabulawayo.
- ⁶Wayesesele noyedwa zwi angamthuma. Kwakuyindodana yakhe ayithanda kakhulu. Wabathumela yona ekugcineni ethi: ‘Indodana yami bayoyihlonipha.’
- ⁷Kodwa abaqashi laba bacebisana bathi: ‘Nansi indlalifa! Asiyihlanganyele siyibulale, sidle ifa layo!’
- ⁸Basho bayidumela bayibulala, baphonsa isidumbu sayo ngaphandle kwesivini.
- ⁹Umninisivini uyokwenze njani lapho na? Uyofika ababhubhise lababalimi, aqashise ngesivini kwabanye.

¹⁰Aniwufundanga yini lombhalo ongcwele othi: “ ‘Itshe lokwakha elaliwa ngabakhi bethi liyinto engenamkhuba, kwaba yilona sisekelo njengensika ephase indlu.

¹¹Lokhu kungukwenza kukaSimakade, kuyasimangalisa kakhulu ukukubona.’ ”

¹²Babefuna ukumbamba ngoba kwabakhanyela ukuthi lomzekeliso uwubhekise kubo. Kepha besaba isixuku, ngakhoke bamshiya kanjalo bahamba.

Umbuzo ngentela

(Mat 22:15-22; Luk 20:20-26)

¹³Kwathunyelwa abafarisi nabeqembu likaHerodi, baya kuJesu besophe ukumhila ngemibuzo.

¹⁴Bafika bathi kuye: “Mfundisi, siyazi ukuthi uqotho. Awuthengi mehlo amuntu, ngoba ubunjani bomuntu awubushayi mkhuba. Ufundisa indlela kaNkulunkulu ngobuqotho. Kuphambene yini nomthetho ukuba sithelele ikhanda kuKhesari inkosi yombuso waseRoma na? Silithelele noma singalitheleli na? ”

¹⁵Kodwa wakubona ukumbuluza kwabo wathi: “Ningicuphelani na? Lethani lapha uhlamvu lwemali ngilubone! ”

¹⁶Bamnika uhlamvu. Wababuza wathi: “Ngokabani umfanekiso okuloluhlumvu, wona lombhalo ngokabani na? ” Bamphendula bathi: “NgokaKhesari.”

¹⁷UJesu wathi: “Mnikeni uKhesari okukaKhesari, uNkulunkulu nimnike okukaNkulunkulu! ” Wabamangalisa kakhulu.

Umbuzo ngokuvuka kwabafileyo

(Mat 22:23-33; Luk 20:27-40)

¹⁸Abasadusi bayaye bathi akukho kuvuka kwabafileyo. Kwasuka abathile kubo baya kuJesu bambuza bathi:

¹⁹“Mfundisi, uMose wasilobela umthetho wathi uma indoda ifa ishiya umfelokazi ingazele, umfowabo wendoda akamngene avuse umuzi womufi.

²⁰Kwakukhona izelamani eziyisikhombisa. Esokuqala saganwa, safa singazele.

²¹Esesibili sangena umfelokazi, safa singazele. Senze njalo nesesithathu.

²²Amukho owazala kuye kulaba abayisikhombisa. Wafa nomfelokazi ekugcineni.

²³Pho woba ngumkabani kulaba mhla bevuka ngosuku lokuvuka kwabafileyo na? Ingani wayekade ebagane bonke laba abayisikhombisa.”

²⁴UJesu waphendula wathi: “Imibhalo engcwele aniyazi, namandla kaNkulunkulu aniwaqondi, akuyikho yini lokhu okubanga ukuba neduke kangaka na?

²⁵Phela asebevukile kwabafileyo kabasaganani, kodwa bayoba njengezingilosi zasezulwini,

²⁶Mayelana nendaba yokuthi abafileyo bayavuka, anifundanga yini encwadini kaMose na? Kulotshiwe endabeni yehlozi elavuthayo ukuthi uMvelinqangi wakhuluma kuye wathi: ‘Mina nginguNkulunkulu ka-Abrahama, nginguNkulunkulu kaIsaka, nginguNkulunkulu kaJakobe.’

²⁷UnguNkulunkulu wabaphilayo, labo anguNkulunkulu wabo kabafile. Neduke ngempela nina.”

Umyalo omkhulu

(Mat 22:34-40; Luk 10:25-28)

²⁸Isazimibhalo esithile sabezwa bephikisana, sabona ukuthi uJesu ubaphendule kahle. Sasondela sambuza sathi: “Yimuphi umyalo omkhulu phakathi kwayo yonke na?”

²⁹UJesu wasiphendula wathi: “Umyalo omkhulu yilo: ‘Lalelani Israyeli! USimakade uNkulunkulu wethu unguSimakade yedwa zwi.’

³⁰Wothanda uSimakade uNkulunkulu wakho ngenhliziyo yakho yonke nangomphefumulo wakho wonke nangengqondo yakho yonke nangamandla akho onke!’

³¹Umyalo wesibili yilo: ‘Wothanda omunye ngothando ozithanda ngalo!’ Awukho omunye umyalo owedlula lena.”

³²Isazimibhalo sase sithi kuJesu: “Ushaye emhlozeni Mfundisi, uqinisile impela laphe uthi uMvelinqangi uyedwa zwi, akakho omunye ngaphandle kwakhe.

³³Ukumthanda ngenhliziyo yonke nangengqondo yonke nangamandla onke, uthande omunye umuntu ngothando ozithanda ngalo, kungcono kakhulu kunokunikela ngeminikelo eshiswayo nangemihlatshelo.”

³⁴UJesu wabona ukuthi isazimibhalo siphendule kahle impela, wayesethi kuso: “Akusekude ukuba ungene embusweni kaNkulunkulu.” Emuva kwalokho akukho muntu owabuye walokotha wabuza utho kuJesu.

Umbuzo ngeNdodana kaDavide

(Mat 22:41-46; Luk 20:41-44)

³⁵Kuthe uJesu efundisa ethempelini wabuza wathi: “Izazimibhalo zingasho kanjani ukuthi uMesiya uyiNdodana kaDavide na?”

³⁶Ingani uDavide uqobo lwakhe wahlolwa nguMoya oyiNgcwele ukuba akhulume athi: “USimakade washo eNkosini yami wathi: Hlala ngakwesokunene sami ngize ngingqobe izitha zakho zithele kuwe!’

³⁷“Kwayena uDavide inkosi umbiza ngeNkosi yakhe. Pho useyiNdodana yakhe kanjani manje?”

UJesu usola izazimibhalo

(Mat 23:1-36; Luk 20:45-47)

Izixuku zonke zamuzwa uJesu zamjabulela.

³⁸Ubefundisa athi: “Xwayani izazimibhalo! Zithanda ukuhamba zembethe izevatho ezinde, zikhulekelwe embuthanweni.

³⁹Ziqoka izihlalo eziphambili ezindlini zokusonta, zifuna ukuhlonishwa zihlaliswe nezikhulu emikhosini.

⁴⁰Zikhuleka undendende zibukisa, kanti zilutha abafelokazi zisizakale ngabo zibephuce amafa abo. Ziyोजेजिस्वा ngokwedlulele ngecala lazo.”

Umnikelo womfelokazi

(Luk 21:1-4)

⁴¹UJesu wayehlezi ethempelini maqondana nesitsha somnikelo, ebuka abantu benikela. Izicebi eziningi zafike zanikela kakhulu.

⁴²Nomfelokazi oyimpofana wafike wanikela ngezinhlamvana ezimbili zemali ezingangentengo yesenti kuphela.

⁴³UJesu wabiza abafundi bakhe basondela, wathi kubo: “Niyabona! Impela lempofana yomfelokazi inikele kakhulu kunabo bonke.

⁴⁴Ngoba bonke laba bathathe kokuningi abanakho banikela kwasala, kodwa lomfelokazi, kulobubuphofu ayibo, udele konke anakho wanikela ngabezophila ngakho.”

UMarko 13

UJesu ubikezela ngokudilizwa kwethempeli

(Mat 24:1-2; Luk 21:5-6)

¹Waphuma ethempelini, omunye kubafundi bakhe wafike wathi kuye: “Mfundisi, awubheke lamatshe nalezizakhiwo! Zaze zazinhle!”

²UJesu waphendula wathi: “Uyazibona lezizindlu ezinkulukazi na? Akukho litshe esiyosala liqhwakele phezu kwelinye elingayikudilizelwa phansi.”

Ukufika kokuhlupheka nosizi

(Mat 24:3-14; Luk 21:7-19)

³Wayehlezi eNtabeni yemiHlwathi ngaphesheya kwesihosha ebhekene nethempeli. OPhetro noJakobe noJohane noAndreya bafike bambuza bathi:

⁴“Awusitshela, kuyokwenzeka nini lokhu okushilo na? Sibonakaliso sini esiyokhomba isikhathi sokufezeka kwakho konke lokhu na?”

⁵UJesu wathi kubo: “Qaphelani ningedukiswa muntu!

⁶Kuyovela abaningi abayoshaya sengathi bayimi, bathi: ‘Nginguye uMesiya,’ badukise abaningi.

⁷Ningabi natwetwe lapho nizwa kuthiwa impi isibambene eduze, nizwa nokuthi kuyalwiwa emazweni asekuveni; kumele kwenzeke lokhu, kodwa-ke umhla wokuphela uyobe ungakafiki.

⁸Ngoba izizwe ziyovukelana, nemibuso iphendukelane, kuzamazame umhlaba izindawo ngezindawo, kubhoke nendlala. Lezizinsizi ziseyizalinga nje ezandulelayo, njengemihelo yowesifazane kanduba abelethe.

⁹“Nina-ke hlalani niqaphele! Bayonimisa ezigcawini zamacala, banidinde emasinagogeni. Niyokuma phambi kwababusi namakhosi ngesizathu sokuthi ningabami, nifakaze ngami phambi kwabo.

¹⁰Ngoba kumele indaba emnandi kaNkulunkulu imenyezelwe ezizweni zonke kuqala.

¹¹Lapho sebenibophile banimisa ezigcawini, ningazihluphi ngokuthi niyothini, nizikhathaze isikhathi singakafiki, kodwa khulumani lokho okunifikelayo ngalowomzuzu. Ngoba kuyobe kungasakhulumi nina, kuyobe sekukhuluma uMoya oyiNgcwele ngomlomo wenu.

¹²Umuntu uyonikela umfowabo ukuba abulawe, uyise anikele umntanakhe, abantwana bavukele abazali babo ukuba babulawe.

¹³Bayonizonda bonke ngoba ningabami. Kodwa lowo oqiniselayo kuze kube sekupheleni uyosindiswa.

Usizi oluhlasimulisayo

(Mat 24:15-28; Luk 21:20-24)

¹⁴“Niyobona umhlola oyisinengiso esinyantisayo umi endaweni lapho ungafanele ukuba khona.” (Ofunda lokhu akaqonde ukuthi kusho ukuthini!) “Ngalesosikhathi labo abakhe eJudiya mabaphephele ezintabeni.

¹⁵Oyobe ephezu kophahla lwendlu akangabe esabuyela endlini ukuthatha impahla yakhe.

¹⁶Oyobe esemasimini akangabuyeli ekhaya alande izingubo zakhe.

¹⁷Ngiyazisa ngabakhulelweyo nabancelisayo ngalezonsuku!

¹⁸Khulekani ukuba lunganehleli lolusizi kusebusika!

¹⁹Ngoba usizi lwalezonsuku luyokwedlulela kakhulu. Alukaze lubonwe olunjengalo kuze kube namhla lokhu, selokhu uMvelinqangi adala umhlaba, lungephinde futhi lubonwe nanini.

²⁰Ukuba iNkosi ibingasinciphisanga isikhathi salolusizi, bekungayikusinda muntu, kodwa-ke isinciphisile ngenxa yalabo abayikhethelo layo.

²¹“Uma ngalesosikhathi nizwa umuntu ethi kini: ‘Ake nibheke nangu uMesiya!’ noma athi: ‘Nanguya!’ nize ningamkholwa lowo!

²²Ngoba kuyovela abayothi banguMesiya bengesiye nabayothi bangabaphrofethi bengesibo, baveze izibonakaliso, bagile izimanga, uma kungenzeka bedukise abekhethelo likaNkulunkulu,

²³Qaphani-ke nina! Senginixwayisile ngakho konke kungakenzeki.

Ukuza kweNdodana yesintu

(Mat 24:29-31; Luk 21:25-28)

²⁴“Ngalezonsuku emuva kwalolusizi “ ‘ilanga liyofiphala, inyanga ife ingabe isakhanya,

²⁵izinkanyezi zitshuze ziqathake esibhakabhakeni, imikhosi yomkhathi wezulu izanyazanyiswe iphambuke emizileni yayo.’

²⁶“Sebeyoyibona-ke iNdodana yesintu iza ngamafu, inamandla amakhulu nenkazimulo.

²⁷Iyothumela izingilosi emagumbini omane omhlaba iqoqe abekhethele layo nasemikhawulweni yomhlaba nezulu.

Isifundo esitholakala emkhiwaneni

(Mat 24:32-35; Luk 21:29-33)

²⁸“Fundani isifundo kulokho okuyaye kwenzeka emkhiwaneni! Lapho amagatsha eseluhlaza emqumbe, kuhluma amaqabunga, niyaye nazi ukuthi selethwese.

²⁹Ngokunjalo-ke nani uma nibona lokhu kwenzeka, niyokwazi ukuthi iNdodana yesintu isiseduze isemabaleni!

³⁰Ngiqinisile ngiyanitshela ngithi, lesisizukulwane asiyikudlula kungakenzeki konke lokhu.

³¹Kuyodlula izulu nomhlaba, kodwa amazwi ami awasoze adlula.

Alwaziwa usuku nesikhathi

(Mat 24:36-44)

³²“Kepha akukho muntu owaziyo ukuthi lokhu kuyokwenzeka ngaluphi usuku nangasiphi isikhathi. Akwazi ngisho nazingilosi zasezulwini naNdodana yesintu imbala, kwazi uBaba kuphela.

³³Qaphelani nilinde, ngoba kanazi ukuthi isikhathi siyofika nini.

³⁴Kunjengomuntu ehambela ezweni elikude. Ushiya umuzi wakhe uphethwe yizisebenzi zakhe. Kuthi lesa naleso asilawulele umsebenzi esizowenza, ayale umlindisango ukuba ahlale eqaphile.

³⁵Hlalani nilindile, ngoba kanazi ukuthi umnimumuzi uyofika nini. Ningeke nazi noma uyofika kusihlwa noma phakathi kwamabili noma ngokukhala kwezinkukhu noma ngokuphuma kwelanga.

³⁶Akangazumisi anifce nilele!

³⁷Lokhu engikusho kini ngikusho kubo bonke ngithi: Qaphelani! ”

UMarko 14

Izikhulu zihlose ukubulala uJesu

(Mat 26:1-5; Luk 22:1-2; Joh 11:45-53)

¹Kwase kusele izinsuku ezimbili ukuba kushaye iPhasika kudliwe isinkwa esingenamvubelo. Izikhulu zabaphristi kanye nezazimibhalo zaziqamekela uJesu ukuba zimbophe ngobuqili zimbulale.

²Zazithi: “Ake simyeke ngomkhosi, hleze kusuke izibhelu phakathi kwabantu!”

UJesu ugcotshwa ngamakha eBhethani

(Mat 26:6-13; Joh 12:1-8)

³UJesu wayeseBhethani emzini kaSimoni owayebizwa ngokuthi onochoko. Kwathi esadla kwasondela kuye owesifazane ephethe isitsha setshe lealabhasta. Sasinamakha awuketshezi okuthiwa yinardi, umfuma wakwanokusho obiza kakhulu. Owesifazane waphohloza isitsha, wathela amakha ekhanda likaJesu.

⁴Kepha abathile bacasuka bavungama bodwa bathi: “Kudlalalwani ngamakha kanje na?”

⁵Abengathengiswa lawamakha, kuzuzwe imali eningi yeve ezinhlamvini zesiliva ezingamakhulu amathathu kuphiwe abampofu.” Base bemthethisa.

⁶Kepha uJesu wathi kubo: “Myekeni, nimkhathazelani? Ungenzele lukhulu.

⁷Izimpofana nihlala ninazo njalo. Uma nithanda ukubenzela okuhle, ningakwenza noma nini. Kepha mina angihlezi nani njalo.

⁸Wenze lokho okungangamandla akhe: walungiselela umzimba wami ukumbelwa kwawo, wawugcoba ngingakafi.

⁹Ngiyaqinisa impela ngithi, nomaphi lapho indaba emnandi kaNkulunkulu iyoshunyayelwa khona emhlabeni wonke, kuyokhulunywa nangalokhu akwenzileyo, abantu bamkhumbule.”

UJudasi wethembisa ukuthengisa ngoJesu

(Mat 26:14-16; Luk 22:3-6)

¹⁰UJudasi Iskariyotho, omunye wabayishumi nambili, wasuka waya ezikhulwini zabaphristi ehlose ukuthengisa ngoJesu kuzo.

¹¹Zeza, zajabula zafa zamethembisa imali. Wayesecuthela ithuba elingamlungela ukuba amchilizele kuzo.

Badla iwundlu lePhasika

(Mat 26:17-25; Luk 22:7-14,21-23; Joh 13:21-30)

¹²Kwafika usuku lokuqala lomkhosi wokudla isinkwa esingenamvubelo, ilanga okwakuhlathwa ngalo iwundlu lePhasika. Abafundi babuza kuJesu bathi: “Ufuna ukuba siyephi sikulungisele udle iwundlu lePhasika na?”

¹³Wathuma abafundi ababili wathi kubo: “Hambani niye emzini! Niyohlangana nendoda ithwele imbiza yamanzi. Yilandeleni,

¹⁴bese kuthi lapho ingena khona, nifike nibuze kumninindlu nithi: ‘UMfundisi uthe asimbuzele ukuthi, iphi indlu angadlela kuyo iwundlu lePhasika nabafundi bakhe na?’

¹⁵Useyonikhombisa indlu enkulu phezulu esihleliwe kwaphelela konke, bese nisilungisela kuyo.”

¹⁶Abafundi basuka-ke bangena eJerusalema, bafica kunjengoba ebeshilo uJesu; base belungisela iwundlu lePhasika.

¹⁷Kwahlwa waya khona nabayishumi nambili.

¹⁸Kuthe besadla uJesu wathi: “Lalelani lapha nginitshela! Phakathi kwenu kukhona odla kanye nami ozothengisa ngami ezitheni.”

¹⁹Badangala bambuza ngamunye bathi: “Ngabe yimi na?”

²⁰UJesu wathi kubo: “Ungomunye wabayishumi nambili, yena kanye ogcobhoza isinkwa sitsheni sinye nami.

²¹INdodana yesintu izokwemuka ukwemuka impela njengoba kushiwo ngayo embhalweni ongcwele, kepha maye kulomuntu ozothengisa ngeNdodana yesintu! Kwakuyomlungela lomuntu ukuba wayengazalwanga!”

Ukumiswa kwesidlo seNkosi

(Mat 26:26-30; Luk 22:15-20; 1 Khor 11:23-25)

²²Kuthe besadla uJesu wathatha isinkwa, wabonga kuNkulunkulu, wasihlephula wabanika sona wathi: “Minani, lokhu kungumzimba wami.”

²³Wabuye wathatha indebe yewayini, wabonga kuNkulunkulu wabanika. Bayiphuza bonke.

²⁴Wathi kubo: “Lokhu kuyigazi lami elichithelwa abaningi, eliqinisa isivumelwano sikaNkulunkulu.

²⁵Ngiyanitshela ngithi, angisayuphinde nempela ngikuphuze okwesithelo somvini kuze kube ngamhla sengiyophuza iwayini elisha embusweni kaNkulunkulu.”

²⁶Bahuba elokubonga, bemuka baya eNtabeni yemiHlwathi.

UJesu ubikezela ukuphika kukaPhetro

(Mat 26:31-35; Luk 22:31-34; Joh 13:36-38)

²⁷UJesu wathi kubo: “Niyongihlamuka nonke, njengoba uNkulunkulu esho embhalweni ongcwele ethi: “ ‘Ngiyogadla kumalusi afe, izimvu zihlakazeke.’

²⁸“Kodwa lapho sengivukile kwabafuleyo ngiyonandulela ngiye eGalile.”

²⁹UPhetro wathi: “Ngeke ngikuhlamuke mina ngisho noma sebekuhlamuka bonke.”

³⁰UJesu wathi kuye: “Lalela lapha ngikutshela! Kubo lobubusuku banamuhla, iqhude lingakakhali nakabili, uyobe usungiphike kathathu wena.”

³¹UPhetro waphikelela wathi: “Ngeke ngikuphike ngisho sengibulawa kanye nawe.” Basho njalo bonke abafundi.

UJesu ukhuleka eGetsemane

(Mat 26:36-46; Luk 22:39-46)

³²Bafika endaweni ethiwa yiGetsemane, wathi kubafundi: “Hlalani lapha, ngisayokhuleka.”

³³Wathatha uPhetro noJakobe noJohane waqhela nabo. Wafikelwa usizi, wakhathazeka kabi emoyeni.

³⁴Wayesethi kubo: “Umoya wami ulusizi kabi, ngiyafa ubuhlungu. Hlalani lapha nilinde!”

³⁵Waqhubeka ibangana, wazilahla phansi wanxusa ukuba kudede kuye lomzuzu wokuhlupheka uma kungenzeka.

³⁶Wathi: “*Abba*, Baba, ungakwenza konke wena. Yisuse kimi lendebe yobunzima! Nokho akungayi ngokuthanda kwami, kodwa akuye ngentando yakho!”

³⁷Wabuyela kubo wabafica bezumekile. Wathi kuPhetro: “We Simoni, kanti ulele? Kodwa ubungelinde ngisho nomzuzwana ube munye nje?”

³⁸Lindani nikhuleke ingaze nehlelwe ukulingwa! Umoya womuntu uyavuma, kepha imvelo yakhe ibuthakathaka.”

³⁹Wahamba futhi wafike wakhuleka, waphinda wona lawomazwi.

⁴⁰Wabuye wabuyela kubo, wabafica belele, ngoba izinkophe zabo zazisindwa ubuthongo. Behluleka ukuthi bangathini kuye.

⁴¹Kuthe uJesu esebuya okwesithathu emkhulekweni, wathi kubo: “Kanti nisalele niphumule namanje! Kwanele! Sekuyiso isikhathi. Nakho-ke, iNdodana yesintu isichilizelwa ezandleni zezoni.

⁴²Sukumani sihambe! Lowo othengisa ngami nangu eza.”

Ukukhashelwa nokuboshwa kukaJesu

(Mat 26:47-56; Luk 22:47-53; Joh 18:3-12)

⁴³Kuthe engakaligwinyi kwatheleka uJudasi, omunye wabayishumi nambili. Wayehamba nesixuku sabantu behlome ngezinkemba namawisa, bethunywe yizikhulu zabaphristi kanye nezazimibhalo nezigele.

⁴⁴Umkhapheli lona wayekade evumelene nabo ngesibonakaliso abayombona ngaso uJesu, wathi: “Lowo engiyombingelela ngimange, kuyobe kunguye kanye enimfunayo. Anombopha nimqhube ningamdedeli!”

⁴⁵Kwathi angafika uJudasi wasondela masinyane kuJesu wathi: “E Rabi!” Esho embingelela emanga.

⁴⁶Base bemdumela uJesu bembopha.

⁴⁷Kodwa omunye kulabo ababemi lapho wagqashula inkemba yakhe, wagadla esisebenzini somphristi omkhulu wasihhebhula indlebe.

⁴⁸UJesu wababuza wathi: “Uma benibabele ukungibamba bese ningaze niphume nihlome ngezinkemba namawisa sengathi ngingumphangi na?”

⁴⁹Benginani ethempelini ngifundisa mihla kepha nangangibopha. Kodwa bekumele kufezeke lokho okwabikezelwa emibhalweni engcwele.”

⁵⁰Base bemhlamuka bonke babaleka.

⁵¹Ibhungu elithile lalandela uJesu lizembathele indwangu yelineni kuphela. Balibamba,

⁵²kodwa ladlubulundela, indwangu yalo yasala kubo, lashaya lachitha linqunu.

UJesu uphambi komkhandlu

(Mat 26:57-68; Luk 22:54-55,63-71; Joh 18:13-14,19-24)

⁵³UJesu bamqhuba bamusa kwamphristi omkhulu, kwase kuhlanguana zonke izikhulu zabaphristi kanye nezigele nezazimibhalo.

⁵⁴UPhetro walandela buqamama, waze wangena ngaphakathi emabaleni esigodlo kwamphristi omkhulu. Wahlala lapho, otha umlilo kanye nogqayinyanga.

⁵⁵Zazama izikhulu zabaphristi nomkhandlu wonke ukwakha ubufakazi bokubeka uJesu icala ukuba abulawe, kodwa kabutholakalanga.

⁵⁶Kwavela abaningi bemcindezela ngobufakazi bamanga, kodwa ubufakazi babo abuhlangananga.

⁵⁷Kwaze kwasuka abathile bafakaza bemqambela amanga bathi:

⁵⁸“Samuzwa thina ethi: ‘Lelithempeli elakhiwe ngezandla ngiyolidiliza, ezinsukwini ezintathu ngibuye ngakhe elinye elingakhiwe ngezandla zabantu.’ ”

⁵⁹Kodwa ngisho nobufakazi balaba abuhlangananga.

⁶⁰Umpthristi omkhulu wasukuma phambi kwabo, wabuza kuJesu wathi: “Awuphenduli ngalutho lapho bekumangalela na? ”

⁶¹Kodwa uJesu wathula du, akaze aphenhula. Umpthristi omkhulu wabuye wambuza wathi: “Unguye uMesiya iNdodana yoBongekayo na? ”

⁶²UJesu wathi: “Nginguye. Niyoyibona iNdodana yesintu ihlezi ngakwesokunene sikaSomandla, iza ngamafu ezulu.”

⁶³Umpthristi omkhulu waklebhula izembatho zakhe wathi: “Sisazobenzani ofakazi na?”

⁶⁴Nizizwele nina ehlambalaza uNkulunkulu. Nithini kulokhu? ” Bamlahla bonke ngecala uJesu banquma ukuba abulawe.

⁶⁵Abanye bamfela ngamathe, bamboza amehlo, bamshaya ngenqindi bathi kuye: “Bholofida sizwe, ushaywe ngubani? ” Nogqayinyanga imbala bammukula.

UJesu uphikwa nguPhetro

(Mat 26:69-75; Luk 22:56-62; Joh 18:15-18,25-27)

⁶⁶UPhetro wayesemabaleni esigodlo, kwafika enye yamantombazana ayesebenza kwamphristi omkhulu.

⁶⁷Yabona uPhetro otha, yamuthi njo ngamehlo yathi: “Nawe kade uhamba nalomNazaretha uJesu.”

⁶⁸Kepha uPhetro waphika. Wathi: “Angiqondi ukuthi uthini. Angiyizwa nalento oyishoyo.” Wayesephumela ngaphandle egcekeni.

⁶⁹Lentombazane yambona yakhuluma futhi kulaba ababezimele lapho yathi: “Lo ungomunye wabo.”

⁷⁰Kepha wabuye waphika. Emuva kwesikhashana ababelapho bathi kuPhetro: “Kuyiqiniso impela ukuthi ungomunye wabo, ngoba nawe ungowaseGalile.”

⁷¹Kodwa waqanganisa wafunga wagomela wathi: “Angimazi lomuntu enikhuluma ngaye.”

⁷²Washo njalo maqede kwakikiliga iqhude ngokwesibili. UPhetro wayeseyakhumbula lapho uJesu ekhuluma ethi: “Iqhude lingakakhali kabili uyobe usungiphike kathathu.” Waqhumuka wakhala.

UMarko 15

UJesu uphambi kukaPilatu

(Mat 27:1-2,11-14; Luk 23:1-5; Joh 18:28-38)

¹Kwasa maqede kwahlangana wonke umkhandlu, izikhulu zabaphristi kanye nezigele nezazimibhalo, zahlanganisa inkulumo. Bagiga uJesu ngezintambo, bamqhuba bamnikela kuPilatu.

²UPilatu wambuza wathi: “Wena uyinkosi yamaJuda na? ” Wamphendula wathi: “Nguwena okushoyo.”

³Izikhulu zabaphristi zase zimethwesa amacala amaningi.

⁴UPilatu waphinde wambuza wathi: “Awuziphenduleli na? Uyawezwa nje lamacala angaka abakwethwesa wona.”

⁵Kepha akabange esamphendula. Lokhu kwammangalisa kabi uPilatu.

UJesu ugwetshwa ukuba abulawe

(Mat 27:15-26; Luk 23:13-25; Joh 18:39 — 19:16)

⁶Kwakuyaye kuthi minyaka yonke ngomkhosi wePhasika uPilatu akhululele abantu isiboshwa sibe sinye, leso abasicelayo.

⁷Kwakukhona isiboshwa esigama laso linguBharabha, siboshwe kanye nabashokobezi ngecala lokususa izibhelu nokubulala.

⁸Izihlwele zakhuphukela kwaPilatu, zamnxusa ukuba aphinde abazwele njengenhlayenza.

⁹Wababuza wathi: “Nifuna ukuba nginikhululele inkosi yamaJuda na?”

¹⁰Phela wayazi ukuthi izikhulu zabaphristi zimnikele kuye ngoba zimfela umona uJesu.

¹¹Kepha izikhulu zabaphristi zashishizela isixuku ukuba sithi uPilatu akasikhululele uBharabha kunoJesu.

¹²UPilatu waphinda waliphonsa kubantu wathi: “Pho bese ngimenze njani lona enithi uyinkosi yamaJuda na?”

¹³Impendulo yabo kwaba ukuba bahlokome bathi: “Mbethele esiphambanweni!”

¹⁴UPilatu wathi kubo: “Ngoba enze cala lini na?” Kepha kwaba yima beqonga kakhulu bethi: “Mbethele!”

¹⁵UPilatu wabakhululela uBharabha enzela ukujabulisa abantu. Wakhipha izwi lokuba uJesu abhaxabulwe, anikelwe emabuthweni ambethele esiphambanweni.

Amabutho abhinqa uJesu

(Mat 27:27-31; Joh 19:2-3)

¹⁶Amabutho angenisa uJesu ngaphakathi emabaleni esigodlo, afike amema lonke ibutho.

¹⁷Amembathisa isevatho esibubende, aphica umqhele wamahlamvu anameva amnqwazisa wona.

¹⁸Ayesebhinqa ethi: “Bayede, ume njalo nkosi yamaJuda!”

¹⁹Ayelokhu emqwala ekhanda ngenduku emfela ngamathe, emguqela emkhothamela.

²⁰Kuthe lapho esezidelisile ngokumenza inhlekisa, amhlabula isevatho esibubende amembathisa izingubo zakhe, ahamba naye eseyombethela esiphambanweni.

UJesu ubethelwa esiphambanweni

(Mat 27:32-44; Luk 23:26-43; Joh 19:17-27)

²¹Kwadlula umuntu othile ngendlela, evela enkangala. WayenguSimoni waseSayirene, uyise kaAleksanda noRufasi. Amabutho amphoqa ukuba etshathe isiphambano sikaJesu.

²²Amqhuba uJesu amusa endaweni ethiwa yiGolgotha, okusho ukuthi kusoGebhezini lweKhanda.

- ²³Wanikezwa lapho iwayini, lixutshwe nenhlaka ebabayo yokuqeda izinhlungu ethiwa yimure, kepha wala ukuliphuza.
- ²⁴Amabutho ambethela esiphambanweni, ehlukaniselana ngezingubo zakhe, enza inkatho yokuthi yilowo nalowo uzotholani.
- ²⁵UJesu wabethelwa ekuseni ngehora lesishiyagalolunye.
- ²⁶Isaziso secala lakhe sasilotshwe kwathiwa: “Inkosi yamaJuda.”
- ²⁷Kwabethelwa abaphangi ababili eziphambanweni kanye naye, omunye engakwesokunene, omunye engakwesokhohlo.
- ²⁸Wafezeka kanjalo umbhalo ongcwele othi: “Wabalwa kanye nezelelesi.”
- ²⁹Ababedlula ngendlela babemnqekuzela amakhanda bemhlambalaza bethi: “Ashila! Ingani phela wena ubuzodiliza ithempeli ubuye ulakhe ngezinsuku ezintathu!
- ³⁰Zisindise phela wehle esiphambanweni! ”
- ³¹Zasho njalo nezikhulu zabaphristi kanye nezazimibhalo, zitekulisana ngaye zithi: “Wasindisa abanye, kodwa akakwazi ukuzisindisa yena.
- ³²Akehle phela esiphambanweni loMesiya wenu ingonyama yakwaIsrayeli sibone, bese sikhulwa.” Nalabo imbala ababebethelwe kanye naye eziphambanweni babemkhaca.

Ukufa kukaJesu

(Mat 27:45-56; Luk 23:44-49; Joh 19:28-30)

- ³³Kwahlwa eminibebade, izwe lonke lambozwa yisigayegaye sobumnyama obakhasa phansi kwaze kwantambama.
- ³⁴Kuthe ntambama ngehora lesithathu uJesu wadazuluka wathi: “*Eloyi, Eloyi, lema sabakthani?*” lokhu kuhunyushwa ngokuthi: “Nkulunkulu wami, Nkulunkulu wami, ungilahleleni na? ”
- ³⁵Abanye kulabo ababemi lapho bemuzwa bathi: “Niyamuzwa! Umemeza uElija.”
- ³⁶Omunye wabo waphuthuma wacwilisa isiponji sathi ciki iwayini elimuncu. Wasichoma othini wamsondezela sona ukuba asimunce, ekhuluma belu ethi: “Ake sibone phela ingabe uElija uzofika amethule yini esiphambanweni! ”
- ³⁷UJesu wayeselayela wamemeza ngezwi elikhulu wafa.
- ³⁸Indwangu ehenqa ngaphakathi ethempelini yadabuka kabili, kusukela phezulu kwaze kwayoshaya phansi.
- ³⁹Induna yamabutho eyayimi ibhekene naye yambona efa kanje, yayisithi: “Impela lomuntu ubeyiNdodana kaNkulunkulu! ”

⁴⁰Kwakukhona nabesifazane ababebukela bemele kude. Phakathi kwabo kwakukhona uMariya waseMagdala noMariya unina kaJakobe, lowo owayengomncane, ongunina kaJosefi futhi, noSalome.

⁴¹Laba-ke babekade behamba noJesu bemsebenzela eseseGalile. Kwakukhona nabanye besifazane abaningi ababenyukele eJerusalema kanye naye.

Ukulondolozwa kwesidumbu sikaJesu egodini

(Mat 27:57-61; Luk 23:50-56; Joh 19:38-42)

⁴²Kwase kuyahwalala. KwakungoLwesihlanu, usuku lokulungisela olusuke lwandulela isabatha,

⁴³okuyikhona okwasusa phansi uJosefa waseArimathiya. Wabe eyisigele esihloniphekayo, naye uqobo engumuntu owayebheke ukufika kombuso kaNkulunkulu. Waqunga isibindi waqonda kuPilatu, wacela isidumbu sikaJesu.

⁴⁴Kwammangalisa uPilatu ukuthi kanti usefile, wayesebiza induna yamabutho wayibuza ukuthi sesiside yini isikhathi uJesu efile.

⁴⁵Kuthe angakuzwa lokhu ngenduna yamabutho, wadedela isidumbu sanikezwa uJosefa,

⁴⁶owasuka lapho wathenga indwangu yelineni. Kuthe esesethulile isidumbu, wasithandela ngayo wasilondoloza egodini elalingumhume ogunjwe etsheni. Wayesegingqa inguzunga yetshe avala ngayo umnyango wethuna.

⁴⁷UMariya waseMagdala kanye noMariya unina kaJosefi baqaphelisisa ukuthi uJesu ubekwaphi.

UMarko 16

Ukuvuka kukaJesu ekufeni

(Mat 28:1-8; Luk 24:1-12; Joh 20:1-10)

¹Kwadlula usuku lwesabatha, oMariya waseMagdala noSalome noMariya unina kaJakobe bathenga amakha okuba bayogcoba isidumbu sikaJesu.

²Basuka baya ethuneni kuseluvivi ngeSonto, usuku olulandela isabatha. Ithe iphuma inhlamvu yelanga base bengakhona.

³Babehamba bebuzana bethi: “Kudela owazi ukuthi ngubani oyosigingqela itshe lisuke emnyango wethuna?”

⁴Kuthe uma bebheka kanti litshendini usugudluziwe! Phela kwakuyinguzunga yetshe.

⁵Sebeyangena-ke ethuneni, bakhangwe yibhungu lihlezi ngakwesokudla, lembethe ezimhlophe ezinde; bashaywe uvalo.

⁶Kodwa lathi kubo: “Ningethuki! Anifuni yena nje uJesu waseNazaretha obebethelwe! Uvukile ekufeni, kekho lapha. Ake nibuke nansi nendawo ebebembeke kuyona!

⁷Hambani-ke nibikele abafundi bakhe kanye noPhetro, nithi: ‘UJesu uyanandulela uya eGalile. Kulapho niyomfica khona nimbone njengoba asho kini.’ ”

⁸Abesifazane baphuma babaleka ethuneni bethuthumela bekhungathekile. Kabayitshelanga muntu lento, ngoba babesaba.

Isiphetho sakudala sendaba emnandi elotshwe nguMarko:

UJesu uzibonakalisa kuMariya waseMagdala

(Mat 28:9-10; Joh 20:11-18)

[⁹Kuthe uJesu esevukile ekufeni kuseluvivi ngeSonto, usuku olulandela isabatha, waqala wazibonakalisa kuMariya waseMagdala, lowo ayekade emkhiphe amadimoni ayisikhombisa.

¹⁰UMariya wahamba waxoxela labo ababekade behamba noJesu. Babesadabukile bedinda isililo.

¹¹Kwathi lapho bezwa ukuthi uJesu uyaphila nokuthi uMariya umbonile, kabaze bakholwa.

UJesu uzibonakalisa kubafundi ababili

(Luk 24:13-35)

¹²Wabuye wazibonakalisa esengesinye isimo, wabonwa ngabafundi ababili ababelibhekise emaphandleni.

¹³Nalabo-ke babuyela emuva baxoxela abanye abafundi, kodwa phinde ukuba babakholwe.

UJesu uthuma abaphostoli abayishumi nanye

(Mat 28:16-20; Luk 24:36-49; Joh 20:19-23; ImiSeb 1:6-8)

¹⁴Kamuva wazibonakalisa nakwabayishumi nanye ebafica bedla. Wabasola ngoba basuke bangabaza, benqaba ukukholwa labo abase bembone ngamehlo esevukile ekufeni.

¹⁵Abesethi-ke kubo: “Phumani nihambele kuwo wonke umhlaba, nimemezele kuso sonke isintu indaba kaNkulunkulu ejabulisayo.

¹⁶Lowo oyokholwa abhabhadiswe uyosindiswa, kepha ongakholwayo uyolahlwa.

¹⁷Abakholwayo bayophawuleka ngalezizibonakaliso: bayokhipha amadimoni kubantu ngegama lami, bakhulume izilimi abangazaziyo,

¹⁸baphathe izinyoka ngezandla. Uma bephuza ubuthi obubulalayo kabayikuvelelwa lutho olubi. Bayobeka izandla kwabagulayo basinde.”

UJesu wenyukela ezulwini

(Luk 24:50-53; ImiSeb 1:9-11)

¹⁹Kuthe lapho iNkosi uJesu isikhulume kubafundi yaqeda, yase yenyuselwa ezulwini yahlala ngakwesokunene sikaNkulunkulu

²⁰Abafundi bahamba-ke bashumayela yonke indawo. INkosi yayisebenzelana nabo, izeza izibonakaliso ezaziqinisa izwi ababelishumayela.]

Esinye isiphetho sakudala:

[9 Kodwa abesifazane baya koPhetro nababenaye, bababikela kafushane ngakho konke abakutsheliweyo. 10 Emuva kwalokho uJesu mathupha wathumela abafundi ukuba bashumayele indaba emnandi yesindiso yaphakade, lendaba engcwele eyohlala ikhona njalo, bayimemezele yonke indawo kusukela empumalanga kuze kube sentshonalanga.]

ULuka

ULuka 1

Ukwethulwa kwalencwadi kuTofilasi

¹Banengi asebeke bazama ukuqoqela ndawonye balobe umlando wezigigaba ezehlakala phakathi kwethu.

²Bakuloba lokho njengoba nathi sakwemukela kulabo abazibonela ngamehlo kwasekuqaleni, beyizikhonzi ezimemezela indaba emnandi kaNkulunkulu.

³Ngizijubile-ke nami, emuva kokucwaninga konke ngokucophelela okukhulu ukusuka nokuhlala kwakho, ukuba ngikulobebe ngikulandise ngalezizehlakalo ngononina, Tofilasi ohloniphekayo,

⁴ukuba ulazi iqiniso elikhona laleyomfundiso ozwileyo ngayo.

Kubikezelwa ukuzalwa kukaJohane umbhahadisi

⁵Ngemihla kaHerodi inkosi eyayibusa elakwaJuda kwakukhona umphristi owayebizwa ngelikaZakariya. Wayengowomunxa wezikhonzi zesigaba sika-Abhiya. Umkakhe wayengowendlu ka-Aroni; igama lakhe enguElizabethe.

⁶Babehamba ngokulunga bobabili phambi kukaNkulunkulu, bemsulwa begcina yonke imiyalo nezimiso zeNkosi uSomandla.

⁷Babengenabantwana, njengoba uElizabethe wayeyinyumba, kanti-ke futhi bobabili base bekhulile.

⁸Kwenzeka-ke uZakariya waphatha inkonzo yobuphristi endlini kaNkulunkulu, ngoba kwase kufike ithuba lokuba kusebenze isigaba somunxa wezikhonzi ayekuwo.

⁹Ngokwesiko labaphristi, babenza inkatho yokuthi ngubani ozongena ethempelini leNkosi ashise impepho, inkatho yadla uZakariya.

¹⁰Uquqaba lonke lwabantu lwalulindele ngaphandle kwethempeli lukhuleka ngenkathi kushiswa impepho.

¹¹Kwamemfuka ingilosi yeNkosi, wayibona imi ngakwesokunene selathi lokushisa impepho.

¹²Wathi angayibona uZakariya washaywa uvalo lwameqa.

¹³Kepha ingilosi yathi kuye: “Yima isibindi Zakariya, ungesabi! UNkulunkulu uwuzwile umkhuleko wakho. Umkakho uElizabethe uyokuzalela indodana oyoyiqamba uthi nguJohane.

¹⁴Uyothokoza wesase ngayo, abanengi bajabule ngokuzalwa kwayo,

¹⁵Ngoba iyoba yisilomo phambi kweNkosi uSomandla. Ayiyikuphuza lutho oluvutshelweyo noludakisayo. UMoya oyiNgcwele uyoyingena ugcwale kuyo isesesiswini sikanina.

¹⁶Iyophendula abaningi besizwe sakwaIsrayeli babuyele eNkosini uNkulunkulu wabo.

¹⁷Iyoba yisigijimi esandulela uNkulunkulu, ibe nomoya namandla njengomphrofethi uElija. Iyokwenza oyise babuyisane nabantwana, abantu abangalaleli baphenduke babe nenhliziyo eqotho, yenze nabantu beNkosi balungele ukufika kwayo.”

¹⁸UZakariya wayibuza ingilosi wathi: “Ngiyobona ngani ukuthi kuyoba njalo na? Ingani mina sengiyixhegu nomkami naye usegugile.”

¹⁹Ingilosi yamphendula yathi: “Mina nginguGabriyeli, inceku emi njalo phambi kukaMvelinqangi. Ungithumile ukuba ngikhulume kuwe ngikubikele lezizindaba ezimnandi.

²⁰Lalela-ke, uyoba yisimungulu, ungakhulumi kuze kufike usuku lokufezeka kwalamagama. Ngoba awuwakholwanga amazwi ami ayogcwaliseka sekufike isikhathi.”

²¹Uquqaba lwabantu lwalulokhu lumlindele uZakariya, lumangele ukuthi kazi ulitshaziswe yini ethempelini.

²²Kuthe esephuma wehluleka ukukhuluma nabo. Kwase kubakhanyela ukuthi ubone umbono ethempelini. Wayelokhu ekhuluma ngezandla nje, waba yisimungulu.

²³Kwathi kungaphela izinsuku zakhe zokukhonza ethempelini wabuyela ekhaya.

²⁴Emuva kwalesosikhathi uElizabethe umkakhe wakhulelwa, wagonqa ekhaya izinyanga eziyisihlanu engabonwa langa,

²⁵ethi: “Ngingci, iNkosi yaze yangisiza yakuqeda ukwedeleleka kwami phakathi kwabantu!”

Kubikezelwa ngokuzalwa kukaJesu

²⁶Kuthe sekuyinyanga yesithupha ekhulelwe uElizabethe, uMvelinqangi wathumela ingilosi uGabriyeli emzini othile kwelaseGalile okuthiwa yiNazaretha.

²⁷Yaya entombini, ingoduso kaJosefa, indoda eyayingeyozalo lwenkosi uDavide. Igama lentombi kwakunguMariya.

²⁸Ingilosi yafike yambingelela yamthopha yathi: “E! wena obusisiweyo, iNkosi inawe.”

²⁹Wethuka lapha ezwa lawo, wazibuza ukuthi kazi kubingelela kuni lokhu na.

³⁰Ingilosi yayisithi kuye: “Mariya, yima isibindi ungesabi! UNkulunkulu ukujabulele.

³¹Lalela! Uzokhulelwa uzale umfana umethe igama uti nguJesu.

³²Udumo lwakhe luyoba lukhulu, abizwe ngokuthi uyiNdodana yoPhezukonke. INkosi uNkulunkulu iyombeka abe yinkosi abuse esihlalweni sobukhosi bukaDavide uyise.

³³Uyobusa isizwe sakwaJakobe ungunaphakade, umbuso wakhe ume njalo.”

³⁴UMariya wayesethi engilosini: “Lokhu kungenzeka kanjani kimi njengoba ngingayazi indoda na?”

³⁵Ingilosi yamphendula yathi: “UMoya oyiNgcwele uzokwehlela kuwe, oPhezukonke akusibekela ngamandla akhe. Ngakhoke lomntwana oyozalwa kuyothiwa uyingcwele, uyiNdodana kaNkulunkulu.

³⁶Awubheke nje uElizabethhe isihlobo sakho, naye eseguge kangaka ukhulelwe umfana. Sekuyinyanga yesithupha le ekhulelwe, lowo obaziwa ngokuthi uyinyumba.

³⁷Phela uNkulunkulu akahlulwa lutho.”

³⁸Wayesezethula uMariya ethi: “Ngiyincekukazi yeNkosi! Akwenzeke kimi lokho okushoyo!” Ingilosi yamshiya yemuka.

UMariya uvakashela uElizabethhe

³⁹Akalibalanga uMariya, wazilungisela wahamba ngokuphangisa waya kwelezintaba esigodini esithile kwelaseJudiya.

⁴⁰Wangenisa kwaZakariya; wafike wabingelela uElizabethhe.

⁴¹UElizabethhe wanele ukuzwa uMariya embingelela, kwadlala ingane esiswini. Kwase kungena uMoya oyiNgcwele wagcwala kuye,

⁴²UElizabethhe wamemeza wathi: “Ubusisiwe kunabo bonke abesifazane, ibusisiwe nengane oyikhulelweyo!

⁴³Kodwa bekutheni nje nempela, ngavakashelwa unina weNkosi yami?

⁴⁴Kuthe lapho siqala ukuzwakala isibingelelo sakho kimina, kwajabula ingane yadlala, yaxhumaxhuma esiswini sami.

⁴⁵Ubusisiwe wena owakholwayo ukuthi kuyofezeka konke lokhu okwashiwo yiNkosi kuwena.”

Ukubongela kukaMariya

⁴⁶Wayesethi uMariya: “Inhliziyo yami iyaphuphuma ibongela ubukhulu beNkosi,

⁴⁷umoya wami wethaba kakhulu ngoNkulunkulu uMsindisi wami.

⁴⁸Uyinakile incekekazi yakhe ingelutho; kusukela manje izizukulwane zonke ziyongibongela zithi ngibusisiwe,

⁴⁹ngoba uSomandla ungenzele lukhulu, ngempela igama lakhe lingcwele.

⁵⁰Ubenzela isihawu abamesabayo ezizukulwaneni zilandelane.

⁵¹Ukhombise amandla engalo yakhe, wabachitha abanhliziyo zizigabisayo.

⁵²Uwise ababusi esihlalweni sobukhosi, wenyusa abantukazana baphakama.

⁵³Abalambileyo wabenelisa ngezicolo, abacebileyo wabamukisa bevathazela.

⁵⁴Umhlengile uIsrayeli inceku yakhe, wakhumbula

⁵⁵isethembiso sakhe ayekade esenza kokhokho sokuthi uyohawukela uAbhrahama nabazukulu bakhe ungunaphakade.”

⁵⁶UMariya wahlala kwaElizabethhe okungaba yizinyanga ezintathu wayesebuyela ekhaya.

Ukuzalwa kukaJohane umbhabhadisi

⁵⁷Kwase kufika isikhathi sokuba uElizabethhe abelethe; wazala indodana.

⁵⁸Omakhelwane bakhe nezihlobo zakhe bezwa ukuthi iNkosi imenzele isihawu esingaka, bathokoza naye.

⁵⁹Bafika ngosuku lwesiphohlango mhla umntwana esokwa; bethi bazomqamba ngelikayise bathi unguZakariya,

⁶⁰kodwa unina wabaphikisa wathi: “Qha, akunjalo! Uzoqanjwa athiwe nguJohane.”

⁶¹Bathi kuye: “Akakho noyedwa kwabakini obizwa ngaleligama.”

⁶²Base bekhuluma ngezandla bebuza kuyise ukuthi umntwana uzokwethiwa ngaliphi igama na.

⁶³Wacela uqwembe waloba kulo wathi: “NguJohane igama lakhe.” Bamangala bonke.

⁶⁴Kwabe sekuvuleka umlomo wakhe khona lapho, kwathombuluka nolimi lwakhe, wakhuluma wabonga uMvelinqangi.

⁶⁵Omakhelwane bafikelwa uvalo bonke. Zonke lezizigigaba zaba sematheni kulo lonke elezintaba zaseJudiya.

⁶⁶Labo abakuzwayo lokhu bazindla ngakho bonke bathi: “Kazi uyoba yini lomntwana?” Nebala, iNkosi yamsingatha ngesandla sayo.

Ukubongela nokubikezela kukaZakariya

⁶⁷UMoya oyiNgcwele wangena wagcwala kuZakariya, uyise womntwana, waphrofetha wathi:

- ⁶⁸“Ayibongwe iNkosi uNkulunkulu kaIsrayeli ngoba ihambele abantu bayo yabahlenga.
- ⁶⁹Yasiphakamisela owuphondo lwensindiso, ongowozalo lukaDavide inceku yayo.
- ⁷⁰Yakwazisa lokhu kwasendulo ngomlomo wabaphrofethi bayo abangcwele.
- ⁷¹Yethembisa ukusisindisa ezitheni zethu nasesandleni sabo bonke abasizondayo,
- ⁷²ukuba ibenzele isihawu okhokho ikhumbule isivumelwano sayo esingcwele,
- ⁷³isifungo eyasifunga kukhokho uAbrahama
- ⁷⁴sokusikhulula ezandleni zezitha zethu isivumele siyikhonze singenaluvalo,
- ⁷⁵singcwele singenacala phambi kwayo zonke izinsuku zokuphila kwethu.
- ⁷⁶Wena-ke mntanami, kothiwa ungumphrofethi woPhezukonke, wandulele iNkosi uyicabele indlela,
- ⁷⁷ukhanyisele abantu bayo ngensindiso lapho bethethelelwa izono zabo.
- ⁷⁸UNkulunkulu wethu onesisa nobubele uyosithumela ukukhanya kwaphezulu okufana nokuphuma kwenhlamvu yelanga,
- ⁷⁹kubakhanyisele abahlezi esigayegayeni sobumnyama obuyithunzi lokufa, ukuba sihambe ngendlela yokuthula.”
- ⁸⁰Wakhula-ke umntwana waqina ngokomoya, wahlala ehlane kwaze kwaba usuku lokuba aziveze kwabakwalsrayeli.

ULuka 2

Ukuzalwa kukaJesu

(Mat 1:18-25)

- ¹UAgustu, ingonyama yombuso waseRoma, ngaleyomihla wakhipha isimemezelo sokuthi abezwe lonke alibusayo ababhalise amagama abo, babalwe.
- ²Lokhukubhalisa kokuqala kwenzeka ngenkathi uKhwiriniyu ebusa kwelaseSiriya.
- ³Bahamba-ke bonke bayobhalisa, yilowo nalowo waya esigodini sakubo.
- ⁴NoJosefa wesuka kwelaseGalile emzini waseNazaretha, waya kwelaseJudiya emzini womndeni wenkosi uDavide okuthiwa yiBhetlehema, ngoba phela wayengowozalo lukaDavide.
- ⁵Wayezobhalisa kanye noMariya ingoduso yakhe. UMariya wayesekhulelwe.
- ⁶Kuthe sebeseBhetlehema kwafika isikhathi sokuba abelethe.
- ⁷Wazibula ngendodana, wayisonga ngendwangu, wayilalisa emkhombeni odlela izinkomo, ngoba kwakungekho sikhundla endlini yezihambi.

Abelusi nezingilosi

⁸Kulesosigodi kwakukhona abelusi bezimvu ababelinde umhlambi wabo ekhaphelweni ngobusuku.

⁹Kwamemfuka ingilosi yeNkosi, yema phambi kwabo, inkazimulo yeNkosi yabahaqa kwakhanya nxazonke. Bashaywa uvalo bathuthumela,

¹⁰kepha ingilosi yathi kubo: “Yimani isibindi ningethuki! Nginilethele nazi izindaba ezimnandi ezizojabulisa abantu bonke bathokoze kakhulu.

¹¹Namhlanje, kubo lobubusuku, umsindisi wenu uzelwe emzini kaDavide. UnguMesiya iNkosi.

¹²Nasi isibonakaliso eniyombona ngaso: niyofica usana lusongwe ngendwangu lulele emkhombeni wezinkomo.”

¹³Ngokuphazima kweso kwavela kanye nengilosi uquqaba lwamaviyo asezulwini, ludumisa uNkulunkulu luthi:

¹⁴“Akudunyiswe uMvelinqangi kweliphezulu, ukuthula kuvame emhlabeni kubantu athokoza ngabo!”

¹⁵Kwathi zingemuka izingilosi sezibuyela ezulwini, abelusi babonisana bathi: “Asinikele khona eBhetlehem sivozibonela lesisigameko esisitshelwe yiNkosi!”

¹⁶Baphangisa baya khona, bafica uMariya noJosefa nosana lulele emkhombeni.

¹⁷Kuthe sebembonile umntwana base belanda ngalokho ababekutshelwe yingilosi ngaye.

¹⁸Bonke abakuzwayo lokhu kwabamangalisa abakutshelwa ngabelusi.

¹⁹UMariya wazilonda zonke lezizinto, wazetshisa enhliziyweni yakhe.

²⁰Abelusi baphindela emuva, bedumisa bebonga uNkulunkulu ngakho konke abakuzwile nabakubonile kunjengoba bekutsheliwe.

Ukusokwa kukaJesu

²¹Kwaphela izinsuku eziyisiphohlango umntwana wasokwa. Waqanjwa ngokuthi nguJesu, igama alethiwa yingilosi unina engakakhulelwa.

UJesu usiwa ethempelini ukuba ethulwe kuSimakade

²²Kwafika isikhathi sokuhlunjululwa kwabo ngokosiko lomthetho kaMose. Baya nomntwana eJerusalema ukuba bamethule eNkosini uSomandla.

²³Ngoba kulotshiwe emthethweni weNkosi ukuthi: “Yilelo nalelozibulo lesilisa liyokwahlukaniselwa uSimakade.”

²⁴Bayonikela nangomhlatshelo omiswe emthethweni weNkosi: ngamahobhe amabili noma amaphuphu amabili ejuba.

²⁵Kwakukhona umuntu eJerusalema ogama lakhe linguSimiyoni. Wayengumuntu olungileyo, esaba uNkulunkulu ebheke ukufika kwalowo ozoduduza isizwe sakwaIsrayeli. UMoya oyiNgcwele wawukuye;

²⁶phela wawukwembulile kuye ukuthi akayukufa engakamboni umgcotshwa weNkosi.

²⁷USimiyoni waya ethempelini eqhutshwa nguMoya oyiNgcwele. Umntwana uJesu walethwa ngabazali ethempelini ukuba bamenzele usiko olumiswe emthethweni.

²⁸USimiyoni wamthatha wamgona, wabonga uNkulunkulu wathi:

²⁹“Nkosi Somandla, sal' usuyivumela inceku yakho igoduke ngokuthula, ngoba ususifezile isethembiso sakho,

³⁰amehlo ami ayibonile insindiso yakho

³¹owayihlela nce ziyibone izizwe zonke.

³²Ingukukhanya okukhanyisela abezizwe, nenkazimulo kubantu bakho uIsrayeli.”

³³Kwabamangalisa oyise nonina lokho okwashiwo ngengane yabo.

³⁴USimiyoni wabacelela isibusiso, wayesethi kuMariya unina womntwana: “Uyabona lomntwana ukhethelwe ukuba abaningi bakwaIsrayeli bawe ngaye, kusindiswe abaningi futhi ngaye. Uyoba yisibonakaliso esiphikiswayo,

³⁵kuvele obala imizindlo yabaningi. Yebo, usizi luyoyihlaba njengenkamba neyakho inhliziyo imbala.”

³⁶Kwakukhona umphrofetikazi owayesekhulile impela. Igama lakhe lalinguHana, indodakazi kaPhenuweli yomndeni wakwa-Asheri. Wagana esemncane, washonelwa ngumyeni wakhe emuva kweminyaka eyisikhombisa eshadile.

³⁷Wahlala-ke engumfelokazi, manje wayeseneminyaka engamashumi ayisishiyagalombili nane ubudala. Wayengasuki ethempelini, ekhonza uNkulunkulu imini nobusuku, ezila ukudla ekhuleka.

³⁸Wasondela kubo khona lapho, wafike wadumisa uNkulunkulu. Wakhuluma njalo ngalomntwana kubo bonke ababelindele ukuba iJerusalema lihlengwe.

OJosefa babuyela eNazaretha

³⁹Kuthe sebeqede konke okufanele kwenziwe ngokomthetho weNkosi, babuyela kwelaseGalile baya eNazaretha emzini wakubo.

⁴⁰Umntwana wakhula waba namandla, wagcwala ubuhlakani; isibusiso sikaNkulunkulu sasiphezu kwakhe.

UJesu usethempelini esengumfana

⁴¹Bekuthi minyaka yonke abazali bakaJesu baye eJerusalema emkhosini wePhasika.

- ⁴²Kwathi lapho uJesu eseneminyaka eyishumi nambili ubudala, baya emkhosini njengokwejwayelekile.
- ⁴³Zaphela izinsuku zomkhosi babuyela ekhaya, kodwa uJesu wasala eJerusalema, abazali bakhe bengazi.
- ⁴⁴Babethi usemshungwini wabantu ababuyayo. Bahamba usuku olulodwa, base bemfuna phakathi kwezihlobo nabangane.
- ⁴⁵Kabamtholanga, base bephindela eJerusalema beyomfuna khona.
- ⁴⁶Bamthola ethempelini emuva kwezinsuku ezintathu. Wayehlezi engungwe ngabafundisayo, ebalalele abuye ababuze nemibuzo.
- ⁴⁷Bonke ababemuzwa ekhuluma bamangala kakhulu ngokukhalipha kwezimpendulo zakhe.
- ⁴⁸Abazali bakhe bamangala lapho bembona, unina wayesethi kuye: “Mntanami, uyenzelani lento kithi na? Awubheke, sikhathazeke kakhulu sihamba sikufuna noyihlo!”
- ⁴⁹Wabaphendula wathi: “Beningifunelani? Beningazi yini ukuthi kumele ngibe sendlini kaBaba na?”
- ⁵⁰Kepha akubachachelanga ukuthi uthini.
- ⁵¹Wabuyela nabo eNazaretha, wabahlonipha kukho konke. Unina wakulondoloza konke lokhu enhliziyweni yakhe.
- ⁵²UJesu wakhula ngengqondo nangomzimba ejatshulelwa nguNkulunkulu nangabantu.

ULuka 3

Ukushumayela kukaJohane umbhabhadisi

(Mat 3:1-12; Mark 1:1-8; Joh 1:19-28)

- ¹Kwakungunyaka weshumi nesihlanu wokubusa kukaThibheriyu ingonyama yaseRoma; uPhontu Pilatu engulusibalukhulu kwelaseJudiya, uHerodi ebusa elaseGalile, uFiliphu umfowabo ebusa isifunda saseIthureya naseTrakhonithi, uLisaniya ebusa elaseAbhilene.
- ²UHanase wayengumphristi omkhulu ekanye noKhayifase. Kwafika izwi likaNkulunkulu kuJohane umntakaZakariya esehlane.
- ³Walihamba lonke izwe eligudla umfula iJordan, eshumayeza abantu ethi: “Phendukani nibhabhadiswe, bese kuthethelelwa izono zenu.”
- ⁴Kulotshwe ngaye emqulwini oqukethe amazwi omphrofethi uIsaya kwathiwa: “Kukhona ozwakala enkenteza ehlane ethi: ‘Cabelani iNkosi indlela niqondise nemikhondo yayo.’”

- ⁵Yonke imihosha iyogcwaliswa, zonke izintaba namagquma atubukale, izindlela ezimazombe zithwishike, imigoxigoxi itubeke ibe yithafa.
- ⁶Abantu bonke bayozibonela ngawabo ukuthi uNkulunkulu uyasindisa.’ ”
- ⁷Izindimbane zabantu zaya kuJohane ukuba azibhabhadise. Wathi kuzo: “Nzalo yezinyoka! Nixwayiswe ngubani lona onitshela ukuthi ningase nilubalekele ulaka lukaNkulunkulu oluzonehlela na?”
- ⁸Vezani-ke izithelo zokulunga ezifakazela ukuphenduka kwenu, ningazidudi ezinhliziyweni zenu nithi: ‘Hhiya, singabozalo luka-Abhrahama thina!’ Ngithi kini, uNkulunkulu angavusela uAbhrahama lawamatshe abe uzalo lwakhe.
- ⁹Izembe selibekiwe eziqwini zemithi. Yilowo nalowomuthi ongavezi izithelo ezinhle uyogawulwa uphoswe emlilweni.”
- ¹⁰Abantu bambuza bathi: “Pho, kufanele senze njani na? ”
- ¹¹Waphendula wathi: “Lowo onezambatho ezimbili akabele ongenaso; onokudla akakucazelane nabanye! ”
- ¹²Nabathelisi beza kuye ukuba babhabhadiswe bathi: “Mfundisi, ngabe senze njani na? ”
- ¹³Wathi kubo: “Uma nithelisa, ningeqisi kulokho okusemthethweni! ”
- ¹⁴Namabutho ambuza athi: “Thina-ke senze njani na? ” Wawaphendula wathi: “Ningathathi lutho kumuntu ngobudlova noma ngokumxabhelela, kepha yaneliswani ngamaholo enu! ”
- ¹⁵Abantu babelindele ngethemba bezindla bonke bezibuza ukuthi, kazi uJohane lo unguMesiya na.
- ¹⁶Wayesebatshela bonke ethi: “Mina nginibhabhadisa ngamanzi; uyeza lowo onamandla kunami. Angifanele ngisho nokuthukulula imichilo yezicathulo zakhe. Uzonibhabhadisa ngoMoya oyiNgcwele nangomlilo.
- ¹⁷Unjengomuntu ophatha iqoma lakhe lokwela, azohlunga ngalo isivuno esibuyeni, aqoqele ukudla enqolobaneni yakhe, amakhoba awashise emlilweni ongacimiyo.”
- ¹⁸Wayala abantu nangokunye okuningi, wabashumayeza ngendaba kaNkulunkulu ejabulisayo.
- ¹⁹UJohane wakhuzisa ngisho nenkosi uHerodi emthethisela ukukupita noHerodiya umkamfowabo wenkosi. Wayisola nangazo zonke ezinye izenzo zayo ezimbi.
- ²⁰Inkosi uHerodi yayisinezela ezenzweni zayo ezimbi ngokuvalela uJohane ejele.

Ukubhabhadiswa kukaJesu

(Mat 3:13-17; Mark 1:9-11)

²¹UJohane wabhabhadisa bonke abantu, noJesu wafike wabhabhadiswa. Kuthe emi ekhuleka, kwavuleka izulu,

²²uMoya oyiNgcwele wehlela kuye usajuba ngesimo somzimba. Kwezwakala izwi livela ezulwini lithi: “Wena uyiNdodana yami engiyithandayo. Ngiyathokoza ngawe.”

Uhla lokhokho bakaJesu

(Mat 1:1-17)

²³Ngenkathi uJesu eqala umsebenzi wakhe wayeneminyaka elinganiselwa emashumini amathathu ubudala. Abantu babethi uyindodana kaJosefa kaEli

²⁴kaMathathi kaLevi kaMelkhi kaJanayi kaJosefa

²⁵kaMathathiya ka-Amosi kaNahume kaHesli kaNagayi

²⁶kaMahathi kaMathathiya kaShimeyi kaJoseki kaJoda

²⁷kaJohanani kaResa kaZerubhabheli kaSalathiyeli kaNeri

²⁸kaMelkhi ka-Adi kaKhosamu kaElmadamu kaEri

²⁹kaJoshwa kaEliyeza kaJorimu kaMathathi kaLevi

³⁰kaSimiyoni kaJuda kaJosefa kaJonamu kaEliyakhimu

³¹kaMeleya kaMena kaMathatha kaNatana kaDavide

³²kaJese kaObhedi kaBhowazi kaSalimoni kaNahashoni

³³ka-Aminandaba ka-Admini ka-Arni kaHezroni kaPherezi kaJuda

³⁴kaJakobe kaIsaka ka-Abhrahama kaThera kaNahori

³⁵kaSerugi kaRegu kaPhelegi kaEbheru kaShela

³⁶kaKhenani ka-Aphaksadi kaShemu kaNowa kaLameki

³⁷kaMethusela kaEnokhi kaJaredi kaMahalaleli kaKhenani

³⁸kaEnose kaSethi ka-Adamu kaNkulunkulu.

ULuka 4

Ukulingwa kukaJesu

(Mat 4:1-11; Mark 1:12-13)

¹UJesu wabuya eJordani, egcwele uMoya oyiNgcwele. UMoya wamhola wamyisa ehlane,

²walingwa lapho nguSathane izinsuku ezingamashumi amane. Wayengadli lutho ngazo zonke lezonsuku, zadlula wayeselamba.

³USathane wathi kuye: “Uma uyiNdodana kaNkulunkulu, tshela lelitshe liguquke isinkwa!”

⁴UJesu wamphendula wathi: “Kulotshiwe embhalweni ongcwele kwathiwa: ‘Umuntu akaphili ngesinkwa sodwa.’”

⁵USathane wamenyusela endaweni ephezulu, ngokuphazima kweso wamkhangisa ngayo yonke imibuso yomhlaba,

⁶wathi kuye: “Ngiyokupha lemibuso yonke kanye nobukhazikhazi bayo kube ngokwakho, ngoba ngiwanikiwe amandla okuphatha lokhu, ngikunika noma ngubani engithanda ukumnika khona.

⁷Ngakhoke uma ungikhothamela ukhuleka kimi kuyoba ngokwakho konke.”

⁸UJesu waphendula wathi: “Kulotshiwe kwathiwa: ‘Wokhuleka kuSimakade uNkulunkulu wakho, ukhonze yena yedwa!’”

⁹USathane wamthatha wamletha eJerusalema, wafike wamkhweza wema esiqongweni sethempeli, wathi kuye: “Uma uyiNdodana kaNkulunkulu, gxuma lapha uziphose phansi,

¹⁰ngoba kulotshiwe kwathiwa: “ ‘UNkulunkulu uyothuma izingilosi zakhe ukuba zikulenge,’

¹¹“nokuthi: “ ‘Ziyokusingatha zikuthwale ngezandla hleze unyawo lwakho luqhuzuke etsheni.’”

¹²UJesu wamphendula wathi: “Umbhalo ongcwele uthi: ‘Ungamqali uSimakade uNkulunkulu wakho!’”

¹³Kuthe uSathane eseqede ukulinga uJesu ngalezizindlela ezahlukeneyo, wamshiya ukuba abuye ngesinye isithuba.

UJesu uqala umsebenzi wakhe eGalile

(Mat 4:12-17; Mark 1:14-15)

¹⁴UJesu waphindela kwelaseGalile enamandla oMoya oyiNgcwele, wayeseba sematheni kulo lonke lelozwe.

¹⁵Wayefundisa emasinagogeni abo, bemncoma bonke.

UJesu bayamenqaba eNazareth

(Mat 13:53-58; Mark 6:1-6)

¹⁶UJesu wafika emzini waseNazareth lapho akhulela khona. Kuthe ngosuku lwesabatha waya esinagogeni njengenhlayenza. Wasukuma ukuba afunde imibhalo engcwele.

¹⁷Wanikezwa incwadi yomphrofethi uIsaya. Wasombulula umqulu, wabona indawo lapho kulotshwe khona kwathiwa:

¹⁸“UMoya kaSimakade ukimi ngoba ungigcobile ukuba ngishumaye izindaba ezimnandi ezimpofaneni. Ungithumile ukuba ngimemezele inkululeko kwabathunjiweyo nokuthi izimpumpethe zibone, ngikhulule abacindezelweyo,

- ¹⁹ngimemezele unyakamuhle wobubele bukaSimakade.”
- ²⁰Wagoqa umqulu wawubuyisela encekwini yesinagoge, wahlala phansi. Bonke ababesinagogeni bamgqolozela.
- ²¹Wathatha inkulumo yakhe wathi kubo: “Namhlanje lombhalo ongcwele ugcwalisekile njengoba niwuzwile ufundwa.”
- ²²Bambabaza bonke bemangele, bethathekile lapho bemuzwa ekhuluma lamagama amnandi omusa. Bathi: “Lo akasiyo yini indodana kaJosefa na?”
- ²³Wathi kubo: “Akubuzwa nakubuzwa ukuthi nizongikhuzela nithi: ‘Nyanga ake uzelaphe phela!’ nibuye nithi: ‘Phinda ukwenze nalapha kwelakini lokho abasitshela ukuthi wakwenza eKhaphenawume!’”
- ²⁴Waqhubeka wathi: “Lalelani lapha nginitshele! Akukho mphrofethi oke athandwe kwelakubo!
- ²⁵Eqinisweni ngempela, ngezinsuku zikaElija umphrofethi kwakungeyibo nabo abafelokazi ezweni lakwaIsrayeli, ngenkathi izulu lomisile iminyaka emithathu nezinyanga eziyisithupha, kubhoke umadlantule wendlala.
- ²⁶Nokho uElija akathunyelwanga ukuba asize ngisho noyedwa walababafelokazi, kepha wathunyelwa kumfelokazi emzini waseZarepta ngaseSidoni.
- ²⁷Nababephethwe uchoko babebaningi kwaIsrayeli ngezinsuku zomphrofethi uElisha, nokho akubangakho muntu kubo owaphiliswa wahlanjululwa, kwaba nguNamani umSiriya kuphela.”
- ²⁸Bonke ababesinagogeni kwathi bangakuzwa lokho bathukuthela bathelwa ngamanzi.
- ²⁹Basuka bamdumela bamkhiphela ngaphandle komuzi. Wawakhiwe phezu kwegquma elinesiwa. Bamqhuba baze bafika onqenqemeni lwesiwa, beqonde ukumkhalakathisela kuso.
- ³⁰Kodwa wamane wachusha phakathi kwabo nje wemuka.

Umuntu ongenwe ngumoya ongcolileyo

(Mark 1:21-28)

- ³¹Wehlela emzini waseKhaphenawume kwelaseGalile. Wafundisa abantu bakhona kuyisabatha.
- ³²Kwabamangalisa ukufundisa kwakhe ngoba ukukhuluma kwakhe kwakungokumuntu ongunya.
- ³³Kwakukhona esinagogeni indoda eyayingenwe yidimoni, umoya ongcolileyo. Yaklabalasa yasho ngengila yathi:
- ³⁴“Kodwa usifunani wena Jesu waseNazaretha na? Usuzosibhubhisa na? Ngiyakwazi ukuthi ungubani wena Ngcwele kaNkulunkulu.”

³⁵UJesu walikhaca idimoni wathi: “Thula umsindo! Phuma kuye!” Lase liyidikliza phansi phakathi kwesixuku, laphuma ingenamcothu.

³⁶Lwabashaya lwabeqa bonke uvalo, babuzana bathi: “Hhawu! Okuphuma emlonyeni wakhe! Ukhuluma ngegunya nangamandla, akhuze imimoya engcolileyo iphume!”

³⁷Wayeseduma kulo lonke lelozwe.

UJesu uphilisa umkhwekazi kaSimoni

(Mat 8:14-15; Mark 1:29-31)

³⁸Wasuka waphuma esinagogeni waya emzini kaSimoni. Umkhwekazi kaSimoni wayephethwe kabi ngumkhuhlane, base bemnxusa uJesu ukuba amsize.

³⁹UJesu wasondela wamengama, wakhuza umkhuhlane, wawusuphela. Obegula wasukuma khona lapho, wababungaza.

UJesu uphilisa abantu abaningi kusihlwa

(Mat 8:16-17; Mark 1:32-34)

⁴⁰Kwathi selishona ilanga bonke baya kuJesu belethe abagulayo babo ababephethwe yizifo ngezifo; wababeka izandla ngamunye wabaphilisa.

⁴¹Namadimoni imbala aphuma kwabangingi ememeza ethi: “Wena uyiNdodana kaNkulunkulu!” Kepha wawakhuza akawavumela ukuba akhulume, ngoba ayemazi ukuthi unguMesiya.

UJesu uphuma uphumo lokushumayela

(Mark 1:35-39)

⁴²Wathi shelele kuseluvivi ngakusasa waya endaweni eyihlane. Abantu bamfuna baze bamthola lapho ekhona, bazama ukumvimba ukuba angemuki kubo.

⁴³Kepha wathi kubo: “Kumele ngishumayele indaba emnandi yombuso kaNkulunkulu nakwezinye izigodi, ngoba yilokho engathunyelwa ukuba ngikwenze.”

⁴⁴Wayeseqhubeka eshumayela emasinagogeni kulo lonke lakwaJuda.

ULuka 5

Abadobi babamba inqwaba yezinhlanzi

(Mat 4:18-22; Mark 1:16-20)

¹Ngelinye ilanga uJesu wayemi ngasechibini laseGenezareth. Abantu baphangelana basondela kuye ukuba bezwe izwi likaNkulunkulu.

²Wabona izikebhe ezimbili ziqhinqe osebeni. Abadobi babesaphumile begeza amanetha.

³Wangena kwesinye sazo okwakungesikaSimoni. UJesu wathi kuye akathi ukusiqhelukisa kancane osebeni. Wayesehlala phansi wafundisa abantu ezinze esikebheni.

⁴Kwathi angaqeda ukukhuluma wathi kuSimoni: “Ake uqhubekele lapho kujule khona, nehlixe amanetha enu nidobe izinhlanzi.”

⁵USimoni waphendula wathi: “Nkosi sishikeke ubusuku bonke asabamba lutho. Kodwa ngizowehlisa amanetha ngoba sekusho wena.”

⁶Bakwenza lokho. Akunhlanzi abazibambayo, kwaze kwathi akugqashuke amanetha.

⁷Baze baqhweba abangani babo ababekwesinye isikebhe ukuba bazobelekelela. Beza bafike bazigcwalisa phama izikebhe zombili ngezinhlazi zacishe zacwila izikebhe.

⁸USimoni Phetro wabona okwenzekayo, waguqa phambi kukaJesu wathi: “Qhela kimi Nkosi, ngoba ngiyisoni!”

⁹Phela wayemangele kakhulu kanye nabo bonke abanye ababenaye ngenqwabakazi yezinhlanzi abase bezibambile.

¹⁰Kwamangala ngisho noJakobe noJohane, amadodana kaZebedi, ababesebenza kanye noSimoni. UJesu wathi kuSimoni: “Yima isibindi, ungesabi! Usuzodoba abantu kusukela manje.”

¹¹Izikebhe bazigwedlela osebeni, bashiya konke phansi baba ngabalandeli bakhe.

UJesu uphilisa umuntu onochoko

(Mat 8:1-4; Mark 1:40-45)

¹²Kuthe ekwesinye isigodi salapho, indoda eyayiphihlike yaphela uchoko, yambona yafike yazilahla phambi kwakhe, yamncenga yathi: “Nkosi, uma uthanda ukungihlambulula ngiphile ungakwenza.”

¹³UJesu welula isandla wayiphatha wathi: “Ngiyathanda, hlambuluka!” Uchoko lwaphela khona lapho, yaphila.

¹⁴Wayiyala wathi: “Ungatsheli muntu, kepha hamba uziveze kumphristi, akuhlole! Bese wethula umhlatshelo wokuhlanjululwa kwakho njengoba kwayaleza uMose, khona kuzofakazeka kubantu ukuthi usuhlanjululiwe.”

¹⁵Nokho udumo lukaJesu lwanda ngokushesha ezweni. Kwakubuthana izindimbane zabantu ukuba zimuzwe ziphiliswe ezifweni zazo.

¹⁶Kepha wayejinge ehamba ayothandaza ehlane.

UJesu uphilisa umuntu ofe uhlangothi

(Mat 9:1-8; Mark 2:1-12)

¹⁷Wayefundisa ngelinye ilanga. Kwakuhlezi lapho abafarisi nabayizazimthetho ababevela emizaneni yonke kwelaseGalile nakwelaseJudiya naseJerusalema; iNkosi uSomandla yayinaye waba namandla okuphilisa.

¹⁸Kwafika amadoda elethe isiguli esasife uhlangothi esithwele ngohlaka. Azama ukusingenisa asibeke phambi kukaJesu.

¹⁹Ehluleka ukungena ngoba kwakuvimbe isinyokotho sabantu. Ayesekhwela ophahleni lwendlu eseluqaqa, ehlisa isiguli ngohlaka, asibeka phambi kukaJesu phakathi kwabantu.

²⁰Kuthe lapho uJesu ebona ukukholwa kwawo wathi kuso: “Ndoda! Izone zakho zithethelelwe.”

²¹Izazimibhalo nabafarisi base bezindla bethi: “Ngubani lo ohlambalaza uNkulunkulu na? Ngubani ongathethelela izono ngaphandle kukaNkulunkulu kuphela?”

²²UJesu wayesekuqonda ukuzindla kwabo, wababuza wathi: “Nizindlelani kanjena na?”

²³Yikuphi okulula ukukusho kumuntu, ukuthi: ‘Izone zakho zithethelelwe,’ nokuthi: ‘Sukuma uhambe’ na?”

²⁴Ngizonidelisa nibone ukuthi iNdodana yesintu inegunya lokuthethelela izono emhlabeni.” Wayesethi kogulayo: “Sukuma wena, uthathe uhlaka lwakho ubuyele kini!”

²⁵Indoda yasukuma khona lapho bebuka, yathatha uhlaka eyayikade ilele kulo, yabuyela kubo idumisa uMvelinqangi.

²⁶Bamangala kabi bonke, badumisa uMvelinqangi bethukile bathi: “Awu! Sibone izimanga namuhla.”

UJesu ubiza uLevi

(Mat 9:9-13; Mark 2:13-17)

²⁷Wayesephuma-ke uJesu esehamba. Wabona umthelisi okuthiwa nguLevi ehlezi esebenza lapho kutheliswa khona, wathi kuye: “Woza ungilandele!”

²⁸Wayesesuka eshiya konke phansi, eseba ngumlandeli wakhe.

²⁹ULevi wenzela uJesu idili elikhulu emzini wakhe. Babedla nesixuku esikhulu sabathelisi nabanye abantu.

³⁰Kwavungama abafarisi, ikakhulu izazimibhalo ezingabeqembu labo, bathi kubafundi bakhe: “Ningadla kanjani nibuye niphuze nabathelisi nezoni na?”

³¹UJesu wabaphendula wathi: “Abaphilileyo abadingi nyanga, kodwa idingwa ngabagulayo.

³²Angizelanga ukuzobiza abalungileyo ukuba baphenduke, kodwa ngezela ukuzomema izoni.”

UJesu echaza ngokuzila ukudla

(Mat 9:14-17; Mark 2:18-22)

³³Bathi kuye: “Abafundi bakaJohane umbhabhadisi bahlala bezila ukudla bakhuleke, nabafundi babafarisi imbala benze njalo, kodwa abakho bayadla bayaphuza, kabazili.”

³⁴UJesu wabaphendula wathi: “Kungenzeka yini ukuba nxa kushadwa, ikhetho lizile ngenkathi umyeni esahlezi nalo na?”

³⁵Phinde, kodwa kuyofika isikhathi lapho liyokwaphucwa khona umyeni; bese lizila-ke ngalezozinsuku.”

³⁶Wayesebaxoxela umzekeliso wathi: “Akukho muntu oklebhula isichibi engutsheni entsha, achibele ngaso ingubo endala. Ngoba uma enze njalo uyoyona ingubo entsha, kanti futhi nesichibi sengubo entsha singezwani nendala.

³⁷Futhi akukho muntu owetha iwayini eliseyifumuka ezimvabeni ngoba uma ekwenza lokho, ifumuka liyobila, izimvaba ziqhume, kuchitheke iwayini, konakale nezimvaba.

³⁸Phela ifumuka kufanele lethiwe ezimvabeni ezintsha.

³⁹Kanti akakho othi esephuze iwayini elidala abuye afune ifumuka, ngoba phela uzothi elidala limnandi.”

ULuka 6

Abafundi bakha izikhwebu kuyisabatha

(Mat 12:1-8; Mark 2:23-28)

¹Ngelinye ilanga wadabula emasimini kuyisabatha. Abafundi bakhe basuke babhonyula izikhwebu bazihulula badla.

²Abanye kubafarisi base bethi: “Nikwenzelani lokho okungemthetho ukuba nikwenze kuyisabatha na? ”

³UJesu wabaphendula wathi: “Kanti anifundanga yini ngesenzo sikaDavide mhla elambile kanye neqembu lakhe?

⁴Wangena endlini kaNkulunkulu wathatha izinkwa ezazethulwe kuNkulunkulu, wadla waze wapha nabeqembu lakhe, nanxa kwakungemthetho ukuba umuntu azidle, zidliwa ngabaphristi kuphela.”

⁵UJesu wayesethi kubo: “INDodana yesintu iyinkosi yesabatha.”

Umuntu owayenesandla esishwabeneyo

(Mat 12:9-14; Mark 3:1-6)

⁶Kwelinye isabatha uJesu waya esinagogeni wafundisa. Kwakukhona lapho umuntu osandla sakhe sokunene sasishwabene.

⁷Izazimithetho nabafarisi bamqaphela befuna ukubona ukuthi uzophilisa yini kuyisabatha na. Babefuna phela izaba zokummangalela.

⁸UJesu wayekwazi ukuzindla kwabo wayesekhuluma endodeni enesandla esishwabeneyo wathi: “Sukuma ume lapha ngaphambili! ” Yasukuma yema.

⁹Wayesethi kubo: “Ngiyanibuza ukuthi yikuphi okuvumelekile ngokomthetho ukuba kwenziwe kuyisabatha, ukusiza umuntu noma ukumlimaza, ukuhlenga impilo noma ukuyichitha na?”

¹⁰Waphosa amehlo ngakubo bonke wayesethi kuleyondoda: “Yelula isandla!” Yakwenza lokho sase siphila.

¹¹Bathukuthela bathelwa ngamanzi, bahlanganisa amakhanda bathi kodwa bangamenze njani uJesu.

UJesu uqoka abaphostoli abayishumi nambili

(Mat 10:1-4; Mark 3:13-19)

¹²Akubanga sikhathi esingakanani uJesu wasuka waya entabeni ukuba akhuleke khona. Wahlala ubusuku bonke ekhuleka kuNkulunkulu.

¹³Kuthe sekusile wamemeza abafundi bakhe basondela kuye. Waqoka abayishumi nambili kubo, wabuye wababiza laba ngokuthi bangabaphostoli.

¹⁴KwakunguSimoni, lona amqamba futhi ngelikaPhetro, nomfowabo uAndreya, uJakobe noJohane, uFiliphu noBhatolomu,

¹⁵uMatewu noTomasi, uJakobe ka-Alfiyose noSimoni okuthiwa ngumshokobezi,

¹⁶uJudasi kaJakobe noJudasi Iskariyotho owaphenduka umkhapheli.

UJesu uyashumayela uphilisa abaningi

(Mat 4:23-25)

¹⁷UJesu wehla entabeni nabaphostoli wafike wema endaweni eyithafa. Kwakukhona isixuku sabafundi kanye nezindimbane zabantu ababeqhamuka kulo lonke elaseJudiya neJerusalema nemfunda egudla olwandle eduze nemizi yaseThire naseSidoni.

¹⁸Babeye kuye ukuba bamuzwe baphiliswe ezifweni zabo. Nalabo-ke ababephehwe yimimoya engcolileyo baphiliswa.

¹⁹Sazama ukumthinta sonke lesisixuku, ngoba kwavela kuye amandla, wabaphilisa bonke.

Izibusiso nezinhlupheko

(Mat 5:1-12)

²⁰Wabhaka ngakubafundi bakhe wathi: “Nibusisiwe nina enimpofu ngoba umbuso kaNkulunkulu ungowenu.

²¹Nibusisiwe nina enilambayo manje ngoba niyosutha naneliswe. Nibusisiwe nina enikhala izinyembezi, ngoba niyohleka nodwa.

²²“Nibusisiwe uma abantu benizonda, benizondela isizathu sokuthi ningabeNdodana yesintu, banihlulule, banithuke, banukubeze amagama enu bathi nibabi.

²³Thokozani ningcingcize mhla lokho kwenzeka! Niyabona-ke, nihlalelwe umvuzo omkhulu ezulwini, ngoba okhokho babo benze njalo kubaphrofethi.

²⁴“Kepha nakho kini nina enicebileyo, ngoba ninethezekile nenelisiwe.

²⁵Nakho kini nina enisuthayo manje, ngoba niyolamba. Nakho kini nina enihlekayo manje, ngoba niyolila nikhale ezimathonsi.

²⁶“Nakho kini uma abantu bonke benitusa bekhuluma kahle ngani, ngoba okhokho babo benze njalo kubaphrofethimbumbulu.

Ukuthanda izitha

(Mat 5:38-48; 7:12)

²⁷“Kepha nina enikuzwayo lokhu engikushoyo, ngithi kini: “Thandani izitha zenu nibaphathe kahle abanizondayo,

²⁸nibacelele isibusiso abaniqualekisayo, nibakhulekele abanonayo!

²⁹“Lowo okumukula esihlathini, mphendulele esinye asishaye naso; nalowo okwephuca ingubo, mdedele athathe nesembatho!

³⁰Lowo nalowo ocela utho kuwe, muphe! Uma kukhona okwaphuca impahla yakho, ungayibizi!

³¹Yenzani kwabanye abantu lokho enithanda ukuba bakwenze kini!

³²“Uma nithanda abanithandayo, kukhona yini eningahle nituswe ngakho na? Phela nezoni ziyabathanda abazithandayo nazo.

³³Uma nenza okuhle kulabo abenza okuhle kini, kukhona yini eningatuswa ngakho na? Ngisho nezoni imbala zenze njalo.

³⁴Uma nitshaleka labo enethemba ukuthi bayonibuyisela, kukhona yini eningahle nituswe ngakho na? Ngisho nezoni ziyatshalekana ukuze kubuye lokho ezetshalekise ngakho.

³⁵Ngithi thandani izitha zenu, nenze okuhle nitshalekise ningabheke kubuyiselwa. Uma nenze njalo niyovuzwa kakhulu: niyoba ngamadodana oPhezukonke, ngoba unomusa kwababi nabangabongiyo.

³⁶Yibani nobubele njengalokhu uYihlo osezulwini enobubele!

Ukwahlulela abanye

(Mat 7:1-5)

³⁷“Ningehluleli, yikhona uNkulunkulu engayikunahlulela nani; ningalahli muntu ngecala, yikhona ningayikulahlwa ngecala. Thethelelani, yikhona niyothethelelwa nani.

³⁸Yiphani, yikhona niyophiwa nani. Niyophiwa kakhulu, kuthelwe eziqabethweni zenu ngesilinganiso esanele esigqishiwe sashukuziswa sagcwaliswa saze

sachichima. Phela nani niyokwamukeliswa okungangesilinganiso enilinganisela ngaso abanye.”

³⁹Wayesebaxoxela umzekeliso othi: “Kambe impumputhe ingayihola enye na? Aziyikukhalakathela emgodini zombili na?”

⁴⁰Akukho mfundi oke abe mkhulu kunalowo omfundisayo, kepha kuthi lowo nalowo esefundile abe ngangomfundisayo.

⁴¹“Ungasibona kanjani isibi esisesweni lomzalwane ube ungaluboni ugoqo olukwelakho na?”

⁴²Ungasho kanjani kuye uthi: ‘Mzalwane ake ngikhiphe isibi esweni lakho!’ wena ube ungaluboni ugoqo olusesweni lakho na? Mzenzisindini! Qala ngokukhipha ugoqo olusesweni lakho, yikhona uyobona kahle bese ukhipha isibi esisesweni lomzalwane.

Isihlahla nezithelo zaso

(Mat 7:16-20; 12:33-35)

⁴³“Akukho sihlahla sathela izithelo ezimbi sisihle, kanti futhi isihlahla singethele zithelo ezinhle sisibi.

⁴⁴Isihlahla saziwa ngezaso izithelo. Esihlahleni somunga akukhiwa makhiwane, nasesihlahleni sameva akukhiwa zithelo zomvini.

⁴⁵Umuntu olungileyo uveza okuhle okuvela ekujuleni kwenhliziyo enhle, nomuntu omubi uveza okubi okuvela ebubini bakhe. Ngoba umlomo womuntu ukhuluma lokho okumbusa enhliziyweni.

Indlu enesisekelo nengenaso

(Mat 7:24-27)

⁴⁶“Nide ningibizelani nithi: ‘Nkosi! Nkosi!’ nibe ningakwenzi enginitshela khona na?”

⁴⁷Lowo oza kimi ezwe engikushoyo akwenze ngizonibonisa ukuthi ungumuntu onjani.

⁴⁸Unjengomuntu okwathi ngenkathi akha indlu, wemba kwajula wabeka isisekelo sendlu phezu kwedwala. Umfula wagcwala wadla izindwani, izikhukhula zeza zatheleka ngamandla kuleyondlu, kodwa zehluleka ukuyinyakazisa nakhu phela yayakhiwe kahle.

⁴⁹Kodwa lowo ozwa engikushoyo angakwenzi unjengomuntu owakha indlu emhlabathini ingenasisekelo. Kuthe izikhukhula zingatheleka kuleyondlu yadilika khona lapho, yabhidlika yaphela nya.”

ULuka 7

UJesu uphilisa inceku yenduna yamabutho

(Mat 8:5-13)

- ¹Kwathi uJesu angaqeda konke ayekusho kubantu waya wangena emzini waseKhaphenawume.
- ²Kwakunomuntu lapho owayeyinduna yamabutho amaRoma. Wagulelwa yinceku yakhe eyisilomo yabangwa nezibi.
- ³Yezwa lenduna ngoJesu, yayisithumela izigele zamaJuda kuye ukuba zimnxuse eze azophilisa inceku yayo.
- ⁴Zafika kuJesu zambelesela zathi: “Kuyifanele impela ukuba uyisize lenduna.
- ⁵Iyasithanda isizwe sakithi; yiyo eyasakhela indlu yokusonta.”
- ⁶UJesu wahamba nazo. Kuthe esekudebuduze nakwanduna yathumela kuye abangane bayo abathile ukuba bafike bathi: “Nkosi ungazihluphi, akungifanele ukuba ungangena kwami.
- ⁷Ngakhoke ngibone kungangifanele ukuba ngize kuwe mathupha. Kepha khipha izwi nje, inceku yami iphile.
- ⁸Kwamina ngingumuntu ophethwe ngabanye, kanti nami ngiphethe amabutho. Ngiyaye ngithi komunye: ‘Hamba!’ abesehamba. Ngithi komunye: ‘Woza!’ abeseza. Ngithi encekwini yami ayenze into ethile, iyenze.”
- ⁹UJesu wakuzwa lokho wababaza, waphendukela emshungwini owawumlandela wathi: “Ngithi kuni, angikaze ngikubone ukukholwa okungaka ngisho nakwaIsrayeli imbala.”
- ¹⁰Izithunywa zabuyela emzini wenduna zafica inceku isiphilile.

UJesu uvusa indodana yomfelokazi ekufeni

- ¹¹Akubanga sikhathi esingakanani uJesu waya emzini okuthiwa kuseNayini. Waphelekezelwa ngabafundi bakhe nezindimbane zabantu.
- ¹²Kuthe esesondele ngasesangweni lomuzi wahlangana nomngcwabo. Umufi wayeyindodana eyodwa kunina owayengumfelokazi. Unina waphelekezelwa ngumshungu omkhulu wabantu balowomuzi.
- ¹³INkosi yambona yafikelwa yisihe yathi: “Mus' ukukhala!”
- ¹⁴Yasondela yafike yathinta uhlaka lwesidumbu; ababeluthwele bema. Yayisithi: “Nsizwa, ngithi kuwe: Vuka!”
- ¹⁵Umufi wavuka ohlakeni wahlala, wakhuluma. UJesu wayesembuyisela kunina.
- ¹⁶Behlelwa uvalo bonke, badumisa uNkulunkulu bathi: “Kuvele umphrofethi omkhulu phakathi kwethu!” Babuye bathi: “UNkulunkulu ubahambele abantu bakhe!”
- ¹⁷Lezizindaba zaxoxwa ngoJesu, zasakazeka nalo lonke elakwaJuda nezindawo ezakhelene nalo.

UJohane umbhabhadisi uthumela kuJesu

(Mat 11:2-19)

- 18**UJohane umbhabhadisi walandiswa konke lokhu ngabafundi bakhe. Wabiza ababili kubo
- 19**wabathuma ukuba bambuzele eNkosini uJesu ukuthi: “Wena unguye yini obhekiweyo ukuthi uyeza, kumbe sime silindele omunye na?”
- 20**Lamadoda afika kuye athi: “UJohane umbhabhadisi usithumele kuwe ukuba simbuzele ukuthi: ‘Wena unguye yini obhekiweyo ukuthi uyeza, kumbe sime silindele omunye na?’ ”
- 21**Ngalowomzuzu uJesu waphilisa abaningi ababehlushwa yizifo nezinhlungu nemimoya emibi; wasiza nabaningi ababeyizimpumpithe wabavula amehlo babona.
- 22**Wayesewaphendula-ke lawamadoda wathi: “Hambani nikulandise uJohane lokho enikubonile nenikuzwile: izimpumpithe seziyabona, izishosha seziyahamba, abanochoko bayahlanjululwa, izithulu seziyezwa, abafileyo bayavuka, izimpofana zishunyayezwa indaba emnandi kaNkulunkulu.
- 23**Ubusisiwe umuntu ongakhubeki awe ekukholweni ngenxa yami.”
- 24**Zaphindela emuva izithunywa zikaJohane, uJesu wasala wakhuluma ngaye kubantu wathi: “Kambe naniyobukani ehlane na? Umhlanga untengantengiswa wumoya?”
- 25**Qha! Naniyobukani kanti? Umuntu ogqoke izingubo ezinofonofu na? Phela labo abevatha ezibukhazikhazi bekhomba ngophakathi bangabezigidlo zamakhosi.
- 26**Empeleni naniyobukani? Umphrofethi? Yebo, ngithi-ke nabona lukhulu kunomphrofethi.
- 27**Nguye lowo uJohane okulotshwe ngaye embhalweni kwathiwa: “‘UNkulunkulu uthi: Nasi isigijimi sami engisithuma phambi kwakho ukuba sikuhlahlele indlela.’”
- 28**“Ngithi kini, akakho noyedwa ozelwe yisifazane omkhulu kunoJohane umbhabhadisi. Noma kunjalo, kodwa ngisho nomncinyane embusweni kaNkulunkulu mkhulu kunaye.
- 29**Bonke abantu abamuzwayo, ngisho nabathelisi, bakuthobela okushiwo nguNkulunkulu, babhabhadiswa nguJohane.
- 30**Kepha abafarisi nezazimthetho bakuchithile lokho uNkulunkulu akuhlose ngabo, abaze babhabhadiswa nguJohane.
- 31**“Kodwa ngingabafanisa nantoni abantu balemihla, ngingathi banjani nje?”
- 32**Banjengezingane zihlezi phandle zidlala amaqembu zimemeza zisolana zithi: “‘Sinishaye ihlombe kodwa anisinanga, sacula ezokulila kodwa anikhalanga!’”

³³“Phela uJohane umbhabhadisi ufike wazila ukudla newayini, kepha nina nithi unedimoni.

³⁴INdodana yesintu ifike yadla yaphuza, senithi: ‘Ake nibone! Lomuntu uyisidlakudla nenkolotsha, umngani wabathelisi nezoni.’

³⁵Kodwa bonke abemukela inhlakanipho kaNkulunkulu bayiveza ngokusobala ukuthi iyiqiniso.”

UJesu ekhaya likaSimoni umfarisi

³⁶Omunye wabafarisi wamema uJesu ukuba azokudla kwakhe. Waya emzini walomfarisi, wafike wahlala wadla.

³⁷Kwakukhona kuleyondawo owesifazane oyisonakali. Wezwa ukuthi uJesu umenywe kwamfarisi, waya khona ephethe isitsha sealabhasta, sinamakha awuketshezi, umfuma wakwanokusho.

³⁸Owesifazane wayemi ngemuva kukaJesu eduze kwezinyawo zakhe, ekhala izinyembezi. Wamatisa izinyawo zikaJesu ngezinyembezi, ezesula ngezinwele zakhe, edamane anga izinyawo ezigcoba ngamakha lawo.

³⁹Kuthe umfarisi omeme uJesu angayibona lento, wazindla wathi: “Ukuba lendoda ibingumphrofethi, ibiyomazi lomfazi oyithintayo ukuthi ungubani nokuthi isimilo sakhe sinjani, ibiyomazi ukuthi uyisonakali.”

⁴⁰UJesu wayesethi kumfarisi: “Simoni, kukhona engifuna ukukutshela khona.” Waphendula wathi: “Khuluma Mfundisi!”

⁴¹Wathi uJesu: “Amadoda amabili ayebileke imali kumtshelakisi othile. Enye yawo yayebileke izinhlamvu zesiliva ezingamakhulu amahlanu, enye zingamashumi amahlanu.

⁴²Lamadoda ehluleka ukumkhokhela, wayesewaxolela omabili, wesula icala lawo. Manje-ke iyiphi kuwo eyomthanda kakhulu na?”

⁴³USimoni waphendula wathi: “Phela yileyo ayixolela icala elikhulu.” Wathi uJesu: “Ushaye emhloeni!”

⁴⁴Wakhomba owesifazane wathi kuSimoni: “Uyambona lomame? Ngifike kwakho, kawanginika manzi okugeza izinyawo. Kepha yena umatise izinyawo zami ngezinyembezi zakhe, wazesula ngezinwele zakhe.

⁴⁵Wena awuzange ungange ngenkathi ngingena kwakho, kepha selokhu ngifikile lapha yena udamane anga izinyawo zami.

⁴⁶Awungigcobanga ngamafutha ekhanda, kepha yena ubelokhu engiqhola izinyawo ngamakha.

⁴⁷Ngakhoke ngithi kuwe: Izono zakhe lezi eziningi kangaka zithethelelwe, yingakho nje ekhombise uthando olukhulu. Lowo othethelelwe icala elincane, wokhombisa uthando oluncane.”

⁴⁸UJesu wayesethi kowesifazane: “Izono zakho zithethelelwe.”

⁴⁹Labo ababedla kanye noJesu base befakana imilomo bathi: “Kanti ungubani lo okwazi nokuthethelela izono na?”

⁵⁰Kodwa uJesu wathi kowesifazane: “Ukukholwa kwakho kukusindisile. Hamba nokuthula!”

ULuka 8

Abesifazane ababehamba noJesu

¹Wabuye wahamba ephuma engena edabula izigodi nezigojana, eshumayela indaba emnandi yombuso kaNkulunkulu. Wayekanye nabayishumi nambili,

²ehambisana nabesifazane ayekhiphe kubo imimoya emibi, wabaphilisa nasezifweni. KwakungoMariya waseMagdala okwakukhishwe kuye amadimoni ayisikhombisa,

³noJwana umkaKhuza, induna yesigodlo senkosi uHerodi, noSusana nabanye abesifazane abaningi. Laba-ke babelekelela ngababenakho, besebenzela uJesu nabafundi bakhe.

Umzekeliso ngomhlwanyeli

(Mat 13:1-9; Mark 4:1-9)

⁴Kwaqhamuka abantu bevela izigodi ngezigodi belokhu bezile kuJesu. Kwathi sekubuthene izindimbane zabantu wabaxoxela lomzekeliso:

⁵“Kwasuka umuntu wahamba wayohlwanyela. Enye imbewu yaqathakela ngasendleleni ehlwanyela. Yanyathelwa ngabantu, izinyoni zayicosha.

⁶Enye yaqathakela endaweni eyidwala elalinomhlabashana. Yathi ingamila izithombo zabuna ngenxa yokweswela umswakama.

⁷Enye yaqathakela emhlabathini onehlozi lameva. Lathi lingamila lakhula kanye nezithombo laziminyanisa.

⁸Enye yaqathakela emhlabathini oyimvunde. Yamila, yathela ukudla okuphindwe ngekhulu.” UJesu wayesememeza ethi: “Onendlebe akezwe engikushoyo!”

Inhloso yokubalandisa imizekeliso

(Mat 13:10-17; Mark 4:10-12)

⁹Abafundi bambuza uJesu ukuthi lomzekeliso usho ukuthini na.

¹⁰Wabaphendula wathi: “Nina senikuphiwe ukuzazi izimfihlo zombuso kaNkulunkulu. Kanti-ke abanye bakuthola ngemizekeliso ukuba “ ‘kuthi bebona kodwa bangaboni, kuthi bezwa kodwa bangaqondi.’ ”

UJesu uchaza umzekeliso ngomhlwanyeli

(Mat 13:18-23; Mark 4:13-20)

¹¹“Nakhu-ke okuqondwe ngalomzekeliso: Imbewu iyizwi likaNkulunkulu.

¹²Leyo eyaqathakela endleleni ichaza ngalabo okuthi belizwile izwi kufike uSathane alikhiphe ezinhliziyweni zabo ukuze bangakholwa basindiswe.

¹³Leyo eyaqathakela endaweni eyidwala ichaza ngalabo okuthi bangalizwa izwi balemukele balithokozele. Kodwa kabanazimpande ezijulile, bakholwa isikhashana nje, kuthi lapha belingwa bawe ekukholweni.

¹⁴Leyo eyaqathakela emhlabathini onehlozi lameva ichaza ngalabo abalizwayo izwi kepha ekuhambeni kwabo besekulomhlaba baxinwe yizinkathazo nengcebo nezinjabulo zalokhukuphila, bafane nezikhwebu ezingaveziyo.

¹⁵Imbewu eyaqathakela emhlabathini oyimvunde ichaza ngalabo abalizwayo izwi, balilonde enhliziyweni elungileyo nethembekile, baphikelele baze bathele okuhle.

Isibani esisithwa ngesitsha

(Mark 4:21-25)

¹⁶“Akukho muntu owokhela isibani abesesisitha ngesitsha kumbe asibeke ngaphansi kombede; kodwa sichwanekwa endaweni ephakemeyo, ukuba abangena endlini babone ukukhanya.

¹⁷Phela konke okufihlakeleyo kuyovezwa obala, nokuyimfihlo kuyokwaziwa kuvele obala.

¹⁸“Qaphelani-ke ukuthi nizwa kanjani; ngoba lowo onotho uyophiwa enezelelwe; ongenalutho uyokwephucwa ngisho nalokho abethi unakho.”

Izihlobo zikaJesu zangempela

(Mat 12:46-50; Mark 3:31-35)

¹⁹Unina nabafowabo bakaJesu baya kuye. Behluleka ukufinyelela kuye, lokhu phela babevinjwe yisixuku.

²⁰Wayesebikelwa ukuthi unina nabafowabo bemi phandle bafuna ukumbona.

²¹UJesu waphendula wathi: “Umame nabafowethu yilabo abalizwayo izwi likaNkulunkulu bese bekwenza elikushoyo.”

UJesu uthulisa isiphepho

(Mat 8:23-27; Mark 4:35-41)

²²Langalimbe wakhwela esikebheni nabafundi bakhe, wayesethi kubo: “Ake siwelele ngaphesheya kwechibi!” Base beyahamba-ke.

²³Kuthe besawela wazunywa ubuthongo, walala. Kwashweza isiphepho somoya sehla sabhenguza echibini, amanzi aqala ukugcwala esikebheni, sebesengozini.

²⁴Basondela kuye bamvusa bathi: “Nkosi, Nkosi, nakhu sifa!” Wavuka wakhuza umoya namadlambi, abohla kwathi cwaka.

²⁵Wathi kubo: “Sekuye ngaphi ukukholwa kwenu na?” Bashaywa uvalo bemangele, babuzana bathi: “Hawu! Muntu muni lo? Ukhuza isiphepho ngisho namaza amlalele!”

UJesu ukhipha idimoni kumuntu waseGerasa

(Mat 8:28-34; Mark 5:1-20)

- ²⁶Baqhubekela ezweni elakhelene nomuzi waseGerasa. Ungaphesheya kwechibi, ubhekene nesifunda saseGalile.
- ²⁷UJesu waphumela ogwini, wanqwamana nendoda ivela kulomuzi iphethwe ngamadimoni. Yayisinesikhathi eside ihamba inqunu, ingahlali endlini, ihlala emathuneni.
- ²⁸Yambona uJesu yaklabalasa yazilahla phambi kwakhe yasho ngengila yathi: “Ungifunani wena Jesu, Ndodana kaNkulunkulu oPhezukonke na? Ngiyakuncenga ukuba ungangihanqazi ngezinhluho.”
- ²⁹Ngoba wayekade ekhuze umoya ongolileyo ukuba uphume kulomuntu. Phela wawuhleze umbhozomela umhlukumeze. Babeyaye bamgige ngamaketango, bamqhoboshe namaqakala bameluse, kodwa amane awagqabule nje, idimoni limhadulise ehlane.
- ³⁰UJesu wambuza wathi: “Ungubani igama lakho na? ” Wamphendula wathi: “Siyiviyo lamabutho empi,” nakhu phela ayemaningi amadimoni ayemngene.
- ³¹Amncenga uJesu ukuba angawathumeli kwalasha.
- ³²Kwakweluke umhlambi omkhulu wezingulube eqeleni lalapho. Amadimoni ayesezikhalela kuJesu acela ukungena ezingulubeni, wawavumela.
- ³³Aphuma-ke njalo endodeni angena ezingulubeni. Umhlambi washo wagulukudela esiweni, wagxambukela echibini waminza.
- ³⁴Kuthe ukuba abelusi babone osekwenzekile, babaleka, bafike bawuhlaba bawulawula emzini nasemaphandleni.
- ³⁵Abantu basuka baya khona bayozibonela okwakwenzekile. Bafike kuJesu, bafica lendoda okwakukhishwe kuyo amadimoni, isihlezi ngasezinyaweni zakhe, igqokile isiphila nasemqondweni. Lwabashaya lwabeqa uvalo.
- ³⁶Ababeyibonile lento baxoxela abafikayo ukuthi lusinde kanjani uhlanya.
- ³⁷Bonke abantu balelozwe lamaGerasa banxusa uJesu ukuba aphume aphele lapho, ngoba base bephethwe uvalo olukhulu. Wakhwela esikebheni waphindela emuva.
- ³⁸Indoda okwakukhishwe kuyo amadimoni yancenga uJesu ukuba ihambe naye. Kepha wayibuyisela emuva wathi:
- ³⁹“Phindela kini ufike uxoxe ukuthi kukhulu kangakanani uMvelinqangi akwenzele khona! ” Indoda yawuhamba wonke lowomuzi imemezela ukuthi kukhulu kangakanani uJesu ayenzele khona.

Indodakazi kaJayiro; owesifazane owathinta ingubo kaJesu

(Mat 9:18-26; Mark 5:21-43)

- ⁴⁰UJesu wabuyela emuva wafike wathokozelwa yizihlwele, ngoba phela babemlindele bonke.
- ⁴¹Kwafika indoda eyayingumphathi wesinagoge, igama layo linguJayiro. Yafike yazilahla phambi kukaJesu, yamnxusa ukuba aye emzini wayo,
- ⁴²ngoba indodakazi yayo okwakungukuphela kwayo yayigula ibangwa nezibi. Kwakuyingane eseminyakeni eyishumi nambili. Kuthe esesendleleni uJesu wangungwa umshungu wabantu bamminyana.
- ⁴³Kwakukhona owesifazane owayesephathwe yisifo sokopha, sesineminyaka eyishumi nambili samqala. Wayesephundlwe yizinyanga zamqeda, esechithe konke ayenakho, kepha kungekho muntu owayengase amelaphe, asinde.
- ⁴⁴Waqhamukela uJesu ngemuva, wafike wathinta umphetho wengubo yakhe. Kwanqamuka khona lapho ukopha.
- ⁴⁵UJesu wabuza wathi: “Ngubani lona ongithintayo? ” Baphika bonke, uPhetro wayesethi: “Nkosi, ingani izixuku zikungungile ziyakuminyana.”
- ⁴⁶Kepha uJesu wathi: “Ukhona ongithintile, ngoba ngiwezwile amandla okuphilisa ephuma kimi.”
- ⁴⁷Owesifazane wabona ukuthi usedalulekile wasondela ethuthumela, wafike wazilahla phambi kwakhe. Washo phambi kwabo bonke, ebatshela ngokumbangele ukuba amthinte nangokwelapheka kwakhe ngokushesha.
- ⁴⁸UJesu wathi kuye: “Mntanami, ukukholwa kwakho kukusindisile. Hamba nokuthula!”
- ⁴⁹Kuthe esakhuluma kwatheleka umuntu evela kwaJayiro, wabika wathi: “Indodakazi yakho ishonile. Ungabe usamkhathaza uMfundisi!”
- ⁵⁰UJesu wakuzwa lokhu wathi kuye: “Yima isibindi ungesabi! Kholwa nje kuphela, yikhona izophila!”
- ⁵¹Wafika kwaJayiro akaze avumela muntu ukuba angene naye endlini, ngaphandle kukaPhetro noJohane noJakobe, kanye noyise nonina womntwana.
- ⁵²Iziboni zazikhala zonke zililela intombazane. Kepha uJesu wathi: “Musani ukukhala! Kayifile, ilele.”
- ⁵³Bamhleka usulu, ngoba babazi ukuthi ifile.
- ⁵⁴Kodwa uJesu wayibamba ngesandla, wamemeza wathi: “Vuka mntanami!”
- ⁵⁵Ukuphila kwayo kwabuya yasukuma ngaso lesosikhathi, uJesu wathi abayiphakele idle.
- ⁵⁶Abazali bayo bamangala kakhulu, kepha wabakhuza wathi bangalokothi batshela muntu ngokwenzekileyo.

ULuka 9

Ukuthunywa kwabaphostoli abayishumi nambili

(Mat 10:5-15; Mark 6:7-13)

- ¹Wabiza abayishumi nambili baqoqana kuye, wabanika amandla negunya lokukhipha onke amadimoni nokuphilisa ababephethwe yizifo.
- ²Wabathuma ukuba bahambe bashumayele indaba yombuso kaNkulunkulu, baphilise abagulayo.
- ³Wabayala wathi: “Ningaluhlinzeki uhambo lwenu; ningaphathi ludondolo nasikhwama sendlela, namphako, namali, ngisho nasambatho sesibili.
- ⁴Hlalani kulelokhaya eningenise kulo, nize nimuke kuleyondawo.
- ⁵Uma abantu benganamukeli, shiyani kulesosigodi, nibaxwayise ngokubathuntuthela uthuli lwezinyawo zenu.”
- ⁶Bahamba-ke, badabula imizi ngemizi. Babeshumayela indaba emnandi kaNkulunkulu yonke indawo, bephilisa nabagulayo.

Ukubulawa kukaJohane umbhabhadisi

(Mat 14:1-12; Mark 6:14-29)

- ⁷UHerodi, inkosi eyayibusa elaseGalile, wezwa ngakho konke okwenzekayo; amdida kakhulu amahemuhemu osizwile. Abanye babethi uJohane umbhabhadisi uvukile kwabafuleyo,
- ⁸abanye bethi uElija ubonakele, abanye-ke bethi kuvuke omunye wabaphrofethi basendulo.
- ⁹UHerodi wathi: “UJohane ngamnquma ikhanda wafa; pho ngabe sekungubani lo esengizwa lezizinto ngaye na? ” Wayelokhu ezama ukuba abonane noJesu.

Izinkulungwane eziyisihlanu ziphiwa ukudla

(Mat 14:13-21; Mark 6:30-44; Joh 6:1-14)

- ¹⁰Abaphostoli babuyela kuJesu, bafike bamlandisa ngakho konke abakwenzileyo. Wasuka wahamba nabo, baya bodwa emzini okuthiwa yiBhetsayida.
- ¹¹Kuthe izihlwele zingezwa ngalokho, zamlandela. Wabemukela kahle, wakhuluma kubo ebandisa ngombuso kaNkulunkulu, wasiza labo ababedinga ukuphiliswa.
- ¹²Kuthe lapho ilanga seliya ngonina, abayishumi nambili baya kuye bafike bathi: “Badedele abantu baye emizini nasemaphandleni aseduzane, bazifunele isikhundla sokulala, bathole okuya ngasethunjini, ngoba lendawo iyihlane! ”
- ¹³Kepha waphendula wathi: “Bapheni nina badle! ” Bathi kuye: “Sinezinkwa eziyisihlanu nezinhlanzi ezimbili kuphela. Usho ukuthi sesingahamba sithengele sonke lesisixuku ukudla na? ”

¹⁴Amadoda ayelapho belu ayelinganiselwa ezinkulungwaneni eziyisihlanu. UJesu wathi kubafundi: “Bahlaliseni ngamaqembu, lilinye libe nabantu abangaba ngamashumi ayisihlanu!”

¹⁵Bakwenza lokho babahlalisa-ke abantu bonke.

¹⁶Wathatha izinkwa eziyisihlanu nezinhlanzi ezimbili, wabhekisa amehlo ezulwini, wabonga kuNkulunkulu. Wayesekuhlephula lokhukudla, wakunika abafundi ukuba bakwabele abantu.

¹⁷Badla bonke besutha. Kwabuthwa imvuthuluka yokudla, yaba ngamaqoma ayishumi nambili.

Ubufakazi bukaPhetro ngoJesu

(Mat 16:13-19; Mark 8:27-29)

¹⁸Ngelinye ilanga uJesu wayekhuleka yedwa enabafundi bakhe kuphela. Wababuza wathi: “Abantu bathi ngingubani na?”

¹⁹Baphendula bathi: “Kuthiwa unguJohane umbhabhadisi, kodwa abanye bathi unguElija, abanye-ke bathi kuvuke ekufeni omunye wabaphrofethi basendulo.”

²⁰Wayesethi: “Pho nina nithi ngingubani na?” UPetro waphendula wathi: “UnguMesiya, umgcotshwa kaNkulunkulu.”

UJesu ubikezela ukufa kwakhe

(Mat 16:20-28; Mark 8:30 - 9:1)

²¹UJesu wabadonsa ngendlebe ukuba bangakutsheli muntu lokho.

²²Wathi: “Kumele iNdodana yesintu ihlupheke kabi, izigele nezikhulu zabaphristi kanye nezazimibhalo ziyihluphe ziyikhiphe inyumbazane, ibulawe, ivuke ngosuku lwesithathu.”

²³Wathi kubo bonke: “Uma umuntu ethanda ukuba ngumlandeli wami, akazidele, etshathe isiphambano sakhe imihla namalanga, angilandele!

²⁴Ngoba lowo ofuna ukuhlenga ukuphila kwakhe kuyomlahlekela, kepha odela ukuphila kwakhe ngenxa yami, kuyohlala kuhlengekile.

²⁵Kungamsiza ngani umuntu ukuba azuze konke okomhlaba, kepha yena alahleke abhubhe na?

²⁶Uma umuntu enezinhloni ngami nangamazwi ami, iNdodana yesintu iyoba nezinhloni ngaye mhla izayo nezingilosu ezingcwele ngenkazimulo yayo nangobukhosi bukaYise.

²⁷Ake nilalele nginitshela! Kukhona abanye lapha abangayikuthathwa ukufa besahlalele ukufika kwesikhathi abayobona uNkulunkulu ebusa kuso.”

UJesu uguquka esinye isimo

(Mat 17:1-8; Mark 9:2-8)

²⁸Kwadlula izinsuku ezingaba yisishiyagalombili uJesu wathatha uPhetro noJohane noJakobe, wenyukela nabo entabeni ukuba ayokhuleka.

²⁹Kuthe esakhuleka kwaguquka ubuso bakhe, nezingubo zakhe zaba mhlophe zaxhophha amehlo.

³⁰Khona lapho kwabonakala amadoda amabili ekhuluma naye. KwakunguMose noEliza.

³¹Babonakala benenkazimulo, bebhunga naye ngokushiya kwakhe lomhlaba, afe eJerusalema afeze isu likaNkulunkulu.

³²OPhetro babelele zwi, kwathi bangaphaphama babona inkazimulo kaJesu, emi nalawamadoda amabili.

³³Ngenkathi uJesu eshlukana nawo, uPhetro wathi kuye: “Nkosi, kube kuhle kabi ukuba sibe lapha. Asisale sesimisa amadokodo amathathu, elakho nelikaMose nelikaEliza!” Phela uPhetro wayengasazizwa nokuthi uthini.

³⁴Kuthe esakhuluma kwafika ifu labasithibeza, abafundi base befikelwa ukwesaba lapho libamboza.

³⁵Kwezwakala izwi efwini lithi: “Lo uyindodana yami engiyikhetheleyo; lalelani ekushoyo!”

³⁶Kuthe selizwakele izwi, babona uJesu esesele yedwa. Abafundi bawuhlaba inhlali, lokho ababekubonile kabakutshela muntu ngaleyomihla.

UJesu uphilisa umfana onomoya ongcolileyo

(Mat 17:14-18; Mark 9:14-27)

³⁷Behla entabeni ngakusasa, izindimbane zahlangabeza uJesu.

³⁸Kwamemeza indoda esixukwini yathi: “Ngiyacela Mfundisi, ngibonele nansi indodana yami, ingukuphela kwayo vo.

³⁹Kusuka umoya omubi uyidumele iklabalase, uyihlukumeze ize ikhihlize amagwebu. Kuthi uqambe ujokola uyishiye isiyimvithi.

⁴⁰Nginxuse abafundi bakho ukuba bawukhiphe, behluleka.”

⁴¹UJesu waphendula wathi: “Hhawu loluhlobo lwabantu abonakeleyo abangenalo ukholo! Koze kube nini ngihlezi nani nginibekezelela na? Mlethe lapha umntanakho!”

⁴²Kwathi lapho umfana esasondela, idimoni lamdumela, lamshaya phansi wangqasha. UJesu wakhuza umoya ongcolileyo, wawukhipha kumfana waphila; wayesembuyisela kuyise.

⁴³Bamangala kakhulu bonke lapha bebona kusebenza amandla amakhulu kaMvelinqangi.

UJesu uyaphinda ubikezela ukufa kwakhe

(Mat 17:22-23; Mark 9:30-32)

Kuthe abantu besabambe ongezansi, bemangaliswe yikho konke ayekwenzile uJesu, wathi kubafundi bakhe:

⁴⁴“Lalelani engikushoyo! INdodana yesintu izonikelwa ezandleni zabantu.”

⁴⁵Lenkulumo yakhe kabayiqondanga ukuthi isho ukuthini; umqondo wayo wawufihlakele kubo ungabachacheli, kepha besaba ukumbuza ngayo.

Ngubani omkhulu kunabanye?

(Mat 18:1-5; Mark 9:33-37)

⁴⁶Kwavela ukuphikisana phakathi kwabafundi, bebanga ubukhulu.

⁴⁷UJesu wakuphawula ukuzindla kwezinhliziyi zabo, wathatha umntwana, wammisa eceleni kwakhe,

⁴⁸wathi kubo: “Owemukela lomntwana ngenxa yami wemukela mina; lowo-ke ongemukelayo wemukela uNkulunkulu ongithumileyo. Lowo omncane kini nonke engelutho, nguye omkhulu.”

“Ongamelene nani uhambisana nani”

(Mark 9:38-40)

⁴⁹UJohane wathi: “Nkosi, kade sibona umuntu ebiza igama lakho lapho ekhipha amadimoni. Sase siyamkhuza simvimba, ngoba engahambisani nathi.”

⁵⁰UJesu waphendula wathi: “Ningabomkhuza, ngoba lowo ongamelene nani uhambisana nani.”

Emzaneni oseSamariya benqaba ukwamukela uJesu

⁵¹Kwathi sekusondele izinsuku zokuba enyuselwe ezulwini, waqunga wabhekisa amabombo eJerusalema,

⁵²wayesethumela izithunywa phambili. Zaya emzaneni kwelaseSamariya ukuba zimkhulekele isikhundla.

⁵³Kepha abantu bakhona kabamamukelanga, ngoba ebabele eJerusalema.

⁵⁴Abafundi bakhe oJakobe noJohane bakubona lokhu bathi: “Nkosi, uyathanda yini ukuba sibize umlilo ezulwini wehle ubaqothule na?”

⁵⁵Kepha waphenduka wabakhuza.

⁵⁶Base bedlulela kwesinye isigodi.

Abaya kuJesu befisa ukumlandela

(Mat 8:19-22)

⁵⁷Kwathi besahamba umuntu othile wathi kuye: “Ngiyokumlandela nomaphi lapho uya khona.”

⁵⁸UJesu waphendula wathi: “Izimpungushe zinemihume, nezinyoni zinezidleke, kepha iNdodana yesintu ayinandawo yokuthambeka uhlangothi iphumule.”

⁵⁹Wayesethi komunye: “Ngilandele!” Kepha waphendula wathi: “Bengicela ukuba ungivumele kengiyongcwaba ubaba kuqala!”

⁶⁰UJesu wathi: “Bayeke abafileyo bangcwabane bodwa, wena uhambe uyoshumayela umbuso kaNkulunkulu!”

⁶¹Omunye wathi: “Ngizokulandela kodwa bengicela ukuba kengivalelise kwabasekhaya kuqala!”

⁶²UJesu wathi kuye: “Umuntu akawufanele umbuso kaNkulunkulu uma elokhu eqalaza emuva kanti usebambe igeja waqala ukulima.”

ULuka 10

UJesu uthuma abangamashumi ayisikhombisa nambili

¹INkosi yabuye yakhetha abanye abangamashumi ayisikhombisa nambili. Yabathuma ngababili ukuba bayandulele, baye kuzo zonke izigodi nezindawo eyayihlose ukuya kuzo.

²Yathi kubo: “Isivuno sikhulu kepha abavuni bambalwa. Ngakhoke celani umniniso ukuba athumele izisebenzi ziye esivunweni sakhe!

³Hambani! Njengoba nginithuma nje nifana namawundlu ezimvu eya phakathi kwamankentshane.

⁴Ningaphathi sikhwama semali nesokwethekela nazicathulo! Ningachithi isikhathi ngokubingelela!

⁵Kulelo nalelokhaya enifika kulo anobingelela nithi: ‘E! Ukuthula lapha ekhaya!’

⁶Uma kukhona lapho umuntu efanelwe yisibusiso sokuthula, lesisibusiso sokuthula enimcelela sona siyomehlela, kepha uma kungenjalo sobuyela kini.

⁷Hlalani kulelokhaya nidle niphuze lokho abanipha khona, ngoba kusifanele isisebenzi ukuba sivuzwe ngomsebenzi waso. Ningabophuma ningena amakhaya!

⁸Uma nifika endaweni benamukela, yidlani lokho abaniphakela khona,

⁹nelaphe abagulayo kuleyondawo nithi kubantu: ‘Sekuseduze ukuba uNkulunkulu amise umbuso wakhe phakathi kwenu.’

¹⁰Kodwa uma nifika endaweni benganamukeli, yanini emigwaqweni nithi:

¹¹‘Lomuzi wenu siwuthuntuthela ngothuli lwezinyawo zethu imbala, kodwa hlalani nazi ukuthi uNkulunkulu usezomisa umbuso wakhe abuse.’

¹²Ngithi kini, mhla uMvelinqangi esehlulela okokugcina, abantu balomuzi bayojeziswa kanzima kunabantu baseSodoma.

Imizi engaphendukiyo

(Mat 11:20-24)

¹³“Maye we Khorazini! Maye we Bhetsayida! Ngoba lezizimanga ezenziwe kini, ukuba zazenziwe eThire naseSidoni, abantu balapho ngabe baphenduka kudala, bembatha amasaka, bazisola babhuquza othulini.

¹⁴Kuyothi mhla uMvelinqangi esewahlulela umhlaba abathambisele isigwebo abaseThire naseSidoni kunokuba athambisele nina.

¹⁵Nawe Khaphenawume! Uthi kambe uyophakanyiselwa ezulwini na? Phinde, uyokwehliselwa kwelabafileyo.”

¹⁶UJesu wayesethi kubafundi bakhe: “Lowo onizwayo, nami uyangizwa, noniqhubukushayo uqhubukusha mina, kodwa ongiqhubukushayo uqhubukusha uNkulunkulu ongithumileyo.”

Abangamashumi ayisikhombisa nambili babuyela kuJesu

¹⁷Abangamashumi ayisikhombisa nambili babuyela kuJesu beneme, bafike bathi: “Nkosi, namadimoni ayasithobela lapho siphethe igama lakho.”

¹⁸Wabaphendula wathi: “Ngabona uSathane ewa ezulwini, ehla njengonyazi.

¹⁹Niyabona, ngininike igunya lokuba nidovadove ngezinyawo izinyoka nofezela, ninqobe impi yonke kaSathane oyisitha; akukho okuyonilimaza.

²⁰Kodwa ningakujabuleli ukuthi imimoya iyanithobela; jabulani ngoba amagama enu abhalisiwe ezulwini!”

UJesu ufikelwa ukujabula

(Mat 11:25-27; 13:16-17)

²¹UJesu wehlelwa uMoya oyiNgcwele ngaso lesosikhathi, wajabula kakhulu, wathi: “Baba, wena obusa izulu nomhlaba! Ngiyakubonga ngiyakubabaza wena ozifihlileyo lezizinto kwabahlakaniphileyo nabayizazi kepha wabambulela zona labo abayingane. Yebo Baba, kuthande wena ukuba kube njalo!

²²“UBaba ukwethule konke esandleni sami. Akakho ngaphandle kukaYise owaziyo ukuthi iNdodana ingubani. Akakho nowaziyo ukuthi uYise ungubani, ngaphandle kweNdodana nalabo ethanda ukumambula kubo.”

²³UJesu waphendukela kubafundi wakhuluma nabo bebodwa wathi: “Abusisiwe amehlo abona lezizinto enizibona zenzeka.

²⁴Nginyanitshela impela, amakhosi nabaphrofethi abaningi basendulo babefisa ukukubona lokhu enikubona kwenzeka, kepha kabakubonanga, bezwe nalokhu enikuzwayo, kepha kabakuzwanga.”

Umzekeliso ngomSamariya onesihawu

²⁵Isazimthetho esithile sazama ukuhila uJesu samsukela sathi: “Mfundisi, yini okumele ngiyenze ukuba ngidle ifa lokuphila okuphakade na?”

²⁶UJesu wasibuza wathi: “Ithini imibhalo engcwele? Uyilanda uthini imiyalo kaNkulunkulu na?”

²⁷Saphendula sathi: “ ‘Wothanda uSimakade uNkulunkulu wakho ngenhliziyo yakho yonke nangomphefumulo wakho wonke nangamandla akho onke nangengqondo yakho yonke; uthande umakhelwane wakho ngothando ozithanda ngalo.’ ”

²⁸UJesu wayesethi kuso: “Ushaye khona! Kwenze-ke lokhu nce uphile! ”

²⁹Nokho sasifuna ukuzihlanguza, ngakhoke sathi kuJesu: “Ngubani kanti umakhelwane wami na? ”

³⁰UJesu waphendula wathi: “Indoda ethile yahamba, isuka eJerusalema yehlela eJerikho. Yazithela ezinswelaboyeni, zayihlubula, zayishaya zayishiya ulimi, zemuka yasala idindilizile.

³¹Kwase kwenzeka kwehlaumphristi wadlula ngaleyondlela. Kodwa kwathi angayithi nhla indoda, wachezuka wedlula.

³²NomLevi wenze njalo, kwathi angafika kuleyondawo wayibona indoda, naye wagwegwesa wedlula.

³³Kepha kwaqhamuka umuntu waseSamariya ezihambela evela kude. Naye wazithela kuyo. Kwathi angayibona wafikelwa yisihe.

³⁴Waya kuyo, wafike wagcoba amanxeba ayo ngamafutha newayini, wawabopha. Wayithwala ngembongolo yakhe, wayisa endlini yezihambi, wayigcina khona.

³⁵Kwasa ngakusasa wakhokhela umninindlu ngezinhlamvu ezimbili zemali eyisiliva, wathi kuye: ‘Uze ungibhekele lendoda; uma ungena ezindlekweni ezingaphezu kwalemali, ngiyokukhokhela mhla ngibuyayo.’

³⁶Ngokubona kwakho, yimuphi kulaba abathathu owaba ngumakhelwane walendoda eyazithela ezinswelaboyeni na? ”

³⁷Saphendula isazimthetho sathi: “Yilowo owayihawukelayo.” UJesu wathi kuso: “Hamba-ke nawe wenze njalo! ”

UJesu uhambela uMata noMariya

³⁸Wangena emzaneni othile ehamba nabafundi bakhe. Owesifazane othiwa nguMata wamngenisa kwabo.

³⁹Wayenodadewabo othiwa nguMariya owahlala phansi eduze nezinyawo zeNkosi, walalela ikhuluma.

⁴⁰Kepha uMata wayematasatasa esebenza endlini. Waya wema phambi kukaJesu wathi: “Nkosi, akukuthinti yini ukuthi udadewethu ungiyekelela ngedwa ngibulawe ngumsebenzi na? Mtshela azongelekelela! ”

⁴¹INkosi yayisimphendula ithi: “Mata, lalala lapha Mata! Uyazihlupha uzikhathaza ngezinto eziningi,

⁴²kodwa okudingekayo kunye vo. UMariya uzikhethela isabelo okuyisona sisihle. Ngeke asaphucwe muntu.”

ULuka 11

UJesu ufundisa ngomkhuleko

(Mat 6:9-15; 7:7-11)

¹Ngelinye ilanga uJesu wayekhuleka endaweni ethile. Kuthe eseqedile, omunye kubafundi wathi: “Nkosi, sifundise ukukhuleka, njengoba noJohane wafundisa abafundi bakhe!”

²UJesu wathi kubo: “Uma nikhuleka anothi: “ ‘Baba, igama lakho aliphathwe ngobungcwele! Umbuso wakho awufike!

³Siphe ukudla okwaneleyo imihla ngemihla!

⁴Sithethelele izono zethu, ngoba nathi siyabathethelela bonke abasonayo. Ungasiholeli ekulingweni! ’ ”

⁵Wathi kubo: “Ake ngithi unomngane, ubusuya kuye kwesikabhadakazi ufike umngqongqozele uthi: ‘Mhlobo wami, ngisize ungenanele izinkwana ezintathu, ngizokubuyisela.

⁶Nakhu ngifikelwe ngumhlobo wami. Uyedlula, kepha manje kwami kukwadlulawafa.’

⁷Lowomngane akuphendule esendlini athi: ‘Musa ukungifundekela wena! Sengize ngavala nasemnyango, sesilele nabantwana, ngeke ngisavuka ngikwenanele.’

⁸Nizozwa-ke! Noma ebengezukuphela akunike okudingayo njengoba ungumngane wakhe, nakanjani kodwa uyogcina esevukile akunike konke okhala ngakho, ngoba yilokhu umbelesele.

⁹Ngakhoke ngithi kini: Celani, yikhona niyophiwa! Funani, yikhona niyothola! Ngqongqothani, yikhona niyovulelwa!

¹⁰Ngoba yilowo nalowo ocelayo uyaphiwa, nofunayo uyathola, nongqongqothayo uyovulelwa.

¹¹Wena baba ozeleyo! Uma indodana yakho ikucela inhlanzi, ungayinika yini inyoka, kodwa uyincishe inhlanzi na?

¹²Kumbe ikucele iqanda, wena uyinike ufezela na?

¹³Uma nina okuthi nibabi kangaka nikwazi kodwa ukupha abantabenu okubalungele, uBaba osezulwini uyobapha kangakanani-ke labo abacela kuye isiphiwo esingumoya oyiNgcwele! ”

UJesu uchaza ngoBhelezabhule

(Mat 12:22-30; Mark 3:20-27)

- ¹⁴UJesu wake wakhapha idimoni eliyisimungulu. Lithe lingaphuma maqede umuntu wakhuluma. Izixuku zamangala,
- ¹⁵kodwa abanye babo bagxibha bathi: “NguBhelezabhule inkosi yamadimoni akhipha ngayo amadimoni.”
- ¹⁶Abanye babesophe ukumhila uJesu, base bethi akaveze isibonakaliso sokuthi unegunya lasezulwini.
- ¹⁷Kodwa wayekwazi abakuzindlayo wayesethi: “Yilowo nalowombuso oqhekeka ulwe wodwa uyokuwa, kudilikelane izindlu.
- ¹⁸Ngakhoke uma umbuso kaSathane ulwa wodwa, ungema kanjani na? Nina nithi nguBhelezabhule engikhipha ngaye amadimoni.
- ¹⁹Uma ngabe kunguye engikhipha ngaye amadimoni, pho abalandeli benu bona bawakhipha ngani na? Yibo asebenilahla ngecala.
- ²⁰Kepha uma ngikhipha amadimoni ngomunwe kaNkulunkulu, kusho ukuthi umbuso kaNkulunkulu usufikile kini.
- ²¹“Uma isiqhwaga sihlome saphelela silinde umuzi waso, izimpahla zaso zilondekile.
- ²²Kodwa uma kufika osehlulayo ngamandla asihlasele asinqobe, uyosephuca izikhali ebesigabe ngazo, asiphange impahla ayabe.
- ²³“Lowo ongahambisani nami umelene nami, nalowo ongangibuthisi uma ngiqoqa, empeleni uyachitha.

Umoya omubi obuyela emuva

(Mat 12:43-45)

- ²⁴“Kuthi ungaphuma kumuntu umoya ongcolileyo, ulibhekise ogwadule, uzule ucinga indawo ongaphumula kuyo. Uma ungayitholi ubusuthi: ‘Ngizobuyela emuva kulendlu engasuka kuyo!’
- ²⁵Ubusubuyela kuyo uyifice ishanelwe kahle.
- ²⁶Uyasuka lapho ulande eminye imimoya eyisikhombisa emibi kunawo, ingene yonke ihlale lapho. Ngasekugcineni lowomuntu onakalelwe kakhulu kunakuqala.”

Ukubusiseka kwempela

- ²⁷Kuthe uJesu angasho lokhu, owesifazane esixukwini wamemeza wathi: “Siyadela lesosisu owavundla kuso, abusisiwe namabele owawancelayo!”
- ²⁸UJesu waphendula wathi: “Yebo kunjalo, kepha okukhulu yilokhu ukuthi: Babusisiwe abalizwayo izwi likaNkulunkulu, bakwenze elikushoyo.”

Isizukulwane esonakeleyo sifuna isibonakaliso

(Mat 12:38-42; Mark 8:12)

²⁹Abantu babuthana baya ngokwanda, uJesu wayesethi kubo: “Abantu balemihla bayisizukulwane esonakeleyo. Bafuna isibonakaliso, kodwa kabazukhonjiswa sibonakaliso ngaphandle kwalokho okwavela umphrofethi uJona.

³⁰Waba yisibonakaliso kubantu baseNiniva. Kanjalo futhi iNdodana yesintu iyoba yisibonakaliso kubantu balemihla.

³¹Kuyothi mhla uMvelinqangi esewahlulela umhlaba, indlovukazi yakwaShebha ivuke ekufeni kanye nesizukulwane salemihla, isibeke icala silahlwe. Ngoba yasuka le kwamamangalahlwa yababela kuSolomoni iyocobela ubuhlakani, kodwa ngithi, kukhona lukhulu kunoSolomoni lapha.

³²NabaseNiniva bayovuka ekufeni kanye nesizukulwane salemihla mhla uMvelinqangi esewahlulela umhlaba, basibeke icala silahlwe. Ngoba baphenduka mhlazana beshunyayezwa nguJona, kodwa ngithi, kukhona lukhulu kunoJona lapha.

Iso liyisibani somzimba

(Mat 5:15; 6:22-23)

³³“Akukho muntu owokhela isibani abesesibeka engosini noma asisithe ngomcengezi. Kepha uyaye asichwaneke endaweni ephakemeyo ukuba abangena endlini babone ukukhanya.

³⁴Iso lakho liyisibani esikhanyisela umzimba. Uma libona kugqame, umzimba wonke usekukhanyeni, kepha uma uneso elibi, umzimba usuke usebumnyameni.

³⁵Ngakhoke nakekela hleze lokho okukukhanyiselayo kuphenduke ubumnyama!

³⁶Uma umzimba wakho wonke ukhanyiselwe kungekho ndawo kuwo esebumnyameni, uyokhanya nge kube sengathi ukhanyiswa yisibani esibhekiswe kuwe.”

UJesu usola abafarisi nezazimthetho

(Mat 23:1-36; Mark 12:38-40; Luk 20:45-47)

³⁷Kuthe esakhuluma, wamenywa ngumfarisi ukuba ayokudla kwakhe. Wangena endlini wasondela etafuleni.

³⁸Umfarisi wamangala ebona uJesu edla engahlambile.

³⁹Kodwa iNkosi uJesu yathi kuye: “Nina bafarisi nigeza ingaphandle lezinkezo nezitsha zokudlela, kanti ingaphakathi lenu ligcwele ukuhaha nokonakala.

⁴⁰Ziwula! UMvelinqangi owadala ingaphandle akadalanga nengaphakathi na?

⁴¹Kodwa-ke yibani nesihe niphe abampofu okusezitsheni zenu, yikhona konke konilungela kuhlanzeke.

⁴²“Nakho kini bafarisi! Ninikela ngokweshumi kweziyoliso nemifino enhlobonhlobo, kodwa anikunaki ukuhamba ngobuqotho nokuthanda uNkulunkulu. Bekufanele nikwazise lokhu nikwenze, ningakuyeki-ke okunye.

⁴³“Nakho kini bafarisi! Nithanda ukuhlala ezihlalweni eziphambili ezindlini zokusonta, nikhulekelwe embuthanweni.

⁴⁴Nakho kini! Nifana namaliba angasabonakali, abantu abawanyathela bengawaboni.”

⁴⁵Omunye wezazimthetho wathi kuye: “Mfundisi, phela uyaseyisa nathi uma ukhuluma kanje.”

⁴⁶Waphendula wathi: “Nakho nakini zazimthetho! Imfundiso yenu iyimithwalo enzima eniyethwesa abantu, kepha nina nibe ningazihluphi nakancane nje ngokubathwalisa.

⁴⁷Nakho kini! Nibeka amatshe emadlinzeni abaphrofethi, bona kanye laba ababulawa ngokhokho benu.

⁴⁸Ngalokho nifakazela izenzo zokhokho benu ukuthi niyavumelana nazo. Babulala abaphrofethi, nina-ke senibeka amatshe emadlinzeni abo.

⁴⁹Ngakhoke wayesesho lowo oyinhlakanipho kaNkulunkulu wathi: ‘Ngiyobathumela izinceku zami, abaphrofethi nabaphostoli. Ezinye zazo bayozibulala, ezinye bazihluphe.’

⁵⁰Igazi labo bonke abaphrofethi eselachithwa kusukela mhla kudabuka umhlaba, liyobuzwa kulesisizukulwane,

⁵¹kuqale ngelika-Abela kuze kufike kwelikaZakariya owabulawelwa egcekeni eliphakathi kwelathi nethempeli. Impela ngithi kini, liyobuzwa nakanjani kulesisizukulwane.

⁵²“Nakho kini zazimthetho! Ninqohe nesihluthulelo senqolobane yolwazi. Kwanina aningenanga, kanti nalabo ababethanda ukungena nibavimbele.”

⁵³Wasuka lapho, izazimibhalo nabafarisi base beqala bemphatha ngonya. Bangeqa ngemibuzo eminingi,

⁵⁴besophe ukumhila khona bezoba nezaba zokumbeka icala.

ULuka 12

UJesu uxwayisa ngokuzenzisa

(Mat 10:26-27; 16:6; Mark 8:15)

¹Kwabuthana uquqaba lwabantu baze banyathelana. UJesu washo kubo, eqondise ikakhulu kubafundi bakhe wathi: “Xwayani imvubelo yabafarisi engokuzenzisa.

²Konke okusithakeleyo kuyovezwa obala, nokufihlakeleyo kuyokwaziwa.

³Ngakhoke konke enakukhuluma ebumnyameni kuyovela obala, nalokho enikuhlebele umuntu endlebeni ngasese kuyoduma zonke izihosha.

Ofanele ukwesatshwa

(Mat 10:28-31)

⁴“Lalelani lapha bangane bami! Ningabesabi laba ababulala umzimba, bengenakwenza lutho olunye ngaphandle kwalokho.

⁵Ngizonibonisa ukuthi kufanele nesabe bani. Mesabeni uNkulunkulu okuthi esembulele umuntu abuye abe negunya lokumphosa esihogweni. Impela, ngithi kini: Mesabeni uNkulunkulu!

⁶“Kanti imizwilili emihlanu ayithengiswa yini ngamasenti amabili? Nokho uMvelinqangi akawukhohlwa ngisho nowodwa wayo.

⁷Wazi ngisho nesibalo sezinwele emakhanda enu ukuthi singakanani. Ngakhoke yimani isibindi ningesabi! Nina niyigugu nedlula intengo yomhlambi wemizwilili.

Ukuvuma uKristu phambi kwabantu

(Mat 10:32-33; 12:32; 10:19-20)

⁸“Ngithi-ke kini, uma umuntu evuma phambi kwabantu ukuthi ungowami, iNdodana yesintu iyomvuma phambi kwezingilosi zikaNkulunkulu.

⁹Kepha ongiphika phambi kwabantu naye uyophikwa phambi kwezingilosi zikaNkulunkulu.

¹⁰“Yilowo nalowo okhuluma okuphambene neNdodana yesintu uyothethelelwa, kodwa ohlambalaza uMoya oyiNgcwele kayikuthethelelwa.

¹¹“Uma benihudulela emasinagogeni naphambi kwababusi neziphathimandla, ningazikhathazi ngokuthi kazi niyoziphendulela kanjani nithini.

¹²UMoya oyiNgcwele uyonifunza ngalowomzuzu amazwi eniyowasho.”

Umzekeliso ngesicebi esiyisithutha

¹³Kwakukhona umuntu esixukwini owathi kuye: “Mfundisi, tshela umfowethu ukuba ahlukanelane nami ifa!”

¹⁴Waphendula wathi: “Ngubani ongimise ukuba ngahlulele kumbe ngabe ifa lakwenu na?”

¹⁵Wabuye wathi kubo bonke: “Qaphelani ningahahi, ngoba ukuphila komuntu okuyikhonakhona akuyi ngobuningi bengcebo yakhe.”

¹⁶Wayesebaxoxela umzekeliso wathi: “Isicebi esithile savuna ukudla okuningi emhlabathini waso.

¹⁷Sazindla sathi: ‘Anginandawo eyanele yokugcina isivuno sami. Pho ngizokwenze njani?’

¹⁸Sase sithi: ‘Ngizokwenze nje! Ngizodiliza izinqolobane zami, ngakhe ezinkulu kunazo, ukuze ngilondolozwe kuzo konke ukudla nezimpahla zami.

¹⁹Bese ngitshela inhliziyo yami ngithi: Wena usubekelele izimpahla eziningi eziyokwanela iminyakanyaka. Sale usuhlala phansi, udle uphuze ubuse!’

²⁰Kodwa uNkulunkulu wathi kuso: ‘Sithuthandini! Uzokufa ngabo lobubusuku. Ziyokuba ngezikabani zonke lezizimpahla osuziqongelele na?’ ”

²¹UJesu wagcina ngokuthi: “Sinjalo-ke isiphetho somuntu onqwabela ingcebo kodwa ebe engacebile ngokukaNkulunkulu.”

Ukukhathalela nokukhathazeka

(Mat 6:25-34)

²²Wayesethi kubafundi bakhe: “Ngakhoke ngithi kini: Ningazikhathazi ngokuthi niyokuthathaphi ukudla eniyophila ngakho nezingubo eniyozembatha!

²³Ukuphila kukhulu kunokudla, nomzimba wedlula izingubo.

²⁴Ake nibheke nje! Amagwababa kawalimi, kawavuni, kawanazilulu nazingolobane; nokho uyawondla uMvelinqangi. Nina niyigugu elingakanani pho, nedlula izinyoni!

²⁵Ngubani phakathi kwenu okungathi ngokuzikhathaza kwakhe athasisele usuku olulodwa eminyakeni yokuphila kwakhe na?

²⁶Njengoba ningenamandla okwenza into ewubala kangaka, pho nizihluphelani ngokunye na?

²⁷Ake nibheke nje nansi iminduze yasendle ikhula! Kayizikhandli izithungele izembatho, kodwa ngiyantshela impela, ngisho noSolomoni inkosi eyayevatha ezibukhazikhazi, kayivunulanga ngisho nanjengomnduze owodwa uqhakazile.

²⁸UMvelinqangi unakekela utshani abuhlobise abehlule, lobutshani obuhluma endle namuhla kanti buzobuye buphoswe eziko bushe ngakusasa. Akayikuninakekela kakhulu kunalokho anembese, nina eninokukholwa okuncane na?

²⁹Ningalokhu nikhathalele ukuthi niyodlani niphuzeni, ningakhathazeki!

³⁰Abezizwe abangakholwayo balomhlaba bayazikhathaza ngalokho, kanti-ke nina ninoYihlo ezulwini owaziyo ukuthi niyazidinga lezozinto.

³¹Kunalokho, funani umbuso kaNkulunkulu, yikhona-ke eyonipha nalezozinto.

Ingcebo esezulwini

(Mat 6:19-21)

³²“Nina mhlambi wami omncane, yimani isibindi ningesabi! Kuyintando kaYihlo ukuba umbuso wakhe ube ngowenu.

³³Thengisani ngeninakho, nabele abampofu! Zihlinzekeni ngezikhwama zemali eziqinileyo ezingagugiyo, nibe nengcebo engapheliyo ezulwini, lapho kungafinyeleli sela khona, kungoni nundu khona.

³⁴Ngoba lapho nigcine khona ingcebo yenu, nenhliziyo yenu iyoba lapho.

Izisebenzi ezihlala zilindile

- ³⁵“Hlalani niqaphile, izinkalo zenu ziboshiwe nezibani zenu zikhanya!
- ³⁶Yibani njengezisebenzi ezilindele inkosi yazo ezobuya emsindweni, ziyivulele ngokushesha lapho ifika ingqongqoza.
- ³⁷Ziyadela lezozisebenzi eziyoficwa yinkosi yazo zingalele zilindile mhla ifika. Ngiyaqinisa impela ngithi, iyokhumula isembatho ifingqe imikhono ihlalise izisebenzi zayo etafuleni iziphakele.
- ³⁸Ziyadela lezozisebenzi inkosi yazo eyozifika zilindile, noma kukwesikabhadakazi noma kusentathakusa.
- ³⁹Kuhle nazi ukuthi: ukuba umninindlu ubesazi isikhathi isela eliyofika ngaso, ubengeyekelele ligqekeze indlu yakhe.
- ⁴⁰Nani-ke hlalani nilindile, ngoba iNdodana yesintu iyofika ngesikhathi eningayibhekile ngaso.”

Inceku ethembekile nengathembekile

(Mat 24:45-51)

- ⁴¹UPhetro wathi: “Nkosi, lomzekeliso uwubhekise kithi noma kubantu bonke na?”
- ⁴²INkosi uJesu yaphendula yathi: “Ngubani oyinceku ethembekileyo nehlakaniphileyo, inkosi yayo eyoyibeka induna yomuzi wayo, ukuba yabele izisebenzi ukudla ngesikhathi esifaneleyo na?”
- ⁴³Iyadela leyonceku uma inkosi yayo iyoyifika isaqhuba kahle.
- ⁴⁴Ngiyaqinisa impela ngithi, iyoyibeka induna phezu kwakho konke enakho.
- ⁴⁵Kepha uma leyonceku ifikelwa ngumcabango wokuthi; ‘Hhiya, inkosi yami izolibala, iphuze ukufika,’ ibisishaya izisebenzi zesilisa nezesifazane, ilibale ukudla nokuphuza utshwala, idakwe,
- ⁴⁶inkosi yayo iyofika ngolunye usuku, inceku ingazelele, ngesikhathi engasaziyo, iyijezise kanzima, iyilahle nabangakholwayo.
- ⁴⁷“Inceku okuthi yazi ukuthi inkosi ifunani kepha ingaqikeleli ukulalela, iyoshaywa imivimbo eminingi.
- ⁴⁸Kepha leyo okuthi ngokungazi kwayo yenze lokho okuzoyibangela isijeziso, iyoshaywa imivimbo embalwa. Kuyobizwa okuningi kulowo owabelwe okuningi, kubhekwe okuningi kakhulu kulowo ophiwe okuningi kakhulu.

UJesu ubanga ukwahlukana

(Mat 10:34-36)

- ⁴⁹“Ngize ukuba ngithungele umlilo emhlabeni; ngifisa sengathi ngabe usuyavutha!
- ⁵⁰Kukhona umbhabhadiso engizobhabhadiswa ngawo; ngaphambi kokuba lokhu kufezeke ngisalokhu ngiyaluza emoyeni wami.

⁵¹Kambe nithi ngilapha nje ngilethe ukuthula emhlabeni na? Phinde! Kepha ngeza lapha ukuba ngidale ukwahlukana.

⁵²Kusukela manje umuzi onabantu abahlanu uyokwahlukana, abathathu bamelane nababili, ababili bamelane nabathathu.

⁵³Bayokwahlukana, kumelane uyise nendodana, indodana noyise, unina nendodakazi, indodakazi nonina, uninazala nomalokazana, umalokazana noninazala.”

Ukuqonda izibonakaliso zezikhathi

(Mat 16:2-3)

⁵⁴Wabuye wathi kubantu: “Uma nibona libuyisa umzansi nisheshe nithi: ‘Hhawu! Lizokuna,’ nempela line.

⁵⁵Uma nibona inyanga ibheke phezulu, nithi: ‘Lizobalela nasebukhweni bezinja,’ nempela kube njalo.

⁵⁶Bazenzisindini! Niyakwazi ukufunda izimpawu ezibonakala emhlabeni nasesibhakabhakeni; pho nehlulwa yini ukuqonda izibonakaliso zalemihla na?

Buyisana noxabene naye!

(Mat 5:25-26)

⁵⁷“Kwenziwa yini ukuba ningakuboni okufanele ukuba nikwenze na?

⁵⁸Uma umuntu ekumangalela, mncenge nibuyisane naye nisesendleleni nisabheke enkosini, angaze akufake emthethweni kumahluleli, umahluleli akunikele esikhonzini sikubophe.

⁵⁹Ngithi kuwe, uyoboshwa uze uyikhokhe yonke inhlawulo ngisho nesenti layo.”

ULuka 13

Ongaphenduki uyobhubha

¹Kuthe ngalesosikhathi kwafika abantu bamlandisa ngabaseGalile ababebulewe nguPilatu ngenkathi bethula iminikelo yabo ethempelini; igazi labo laxutshwa negazi lemihlatshelo yabo.

²Wabaphendula wathi: “Nibona ukuthi lababantu behlelwe yilokhu ngoba beyizoni ezinkulu ukwedlula abanye abantu baseGalile na?

³Akunjalo nginitshela, kodwa uma ningaphenduki niyobhubha nonke njengabo.

⁴Nalaba abayishumi nesishiyagalombili abadilikelwa umbhoshongo waseSilowama wababulala, nibona ukuthi babeyizoni ezinkulu ukwedlula bonke abantu baseJerusalema na?

⁵Ngiyanitshela ngithi akunjalo, kodwa uma ningaphenduki niyofa nonke njengabo.”

Umzekeliso womkhiwane ongatheli

⁶Wabalandisa lomzekeliso: “Umuntu wayetshale umkhiwane esivinini sakhe. Waya kuwo efuna amakhiwane, kodwa wangawathola.

⁷Wathi esisebenzini esilima isivini: ‘Uyabona nje ukuthi sekuphele iminyaka emithathu ngilokhu ngiza kulesisihlahla ngifuna amakhiwane, kepha ngingawatholi. Ugawule! Yini ubelokhu ugugisa inhlabathi lomuthi?’

⁸Siphendule sithi: ‘Mnumzane, uyeke ungawugawuli nonyaka! Ngizowuhlakulela ngimbe ngasesiqwini sawo, ngifake umquba.

⁹Hleze uthele ngonyaka ozayo. Uma ungatheli, kulapho-ke usungasho uthi angiwugawule.’ ”

Owesifazane ogula ngeqolo uphiliswa kuyisabatha

¹⁰Wayefundisa kwelinye lamasinagoge kuyisabatha.

¹¹Kwakukhona owesifazane owayephethwe umoya omubi usungulise iminyaka eyishumi nesishiyagalombili. Wayeseluqhoshwana engasakwazi ngisho nokuma aqonde.

¹²Kuthe uJesu angambona, wammemeza wathi akeze kuye, wayesethi: “Mame, usuphilisiwe esifweni sakho.”

¹³Wambeka izandla; walulama ngaso lesosikhathi owesifazane, wadumisa uNkulunkulu.

¹⁴Umpathi wesinagoge wayeseyacasuka ngoba uJesu ephilisa kuyisabatha, esethi kubantu: “Kukhona izinsuku eziyisithupha okufanele sisebenze ngazo. Anokuza niphilise ngalezonsuku, kungabi ngosuku lwesabatha!”

¹⁵INkosi uJesu yamphendula yathi: “Wo! Nina bazenzisi! Ukhona yini phakathi kwenu ongathi yena akayikhiphi inkabi noma imbongolo yakhe esibayeni, ayiqhube ayiphuzise ngisho kuyisabatha na?”

¹⁶Ake nibheke nangu owesifazane ongowozalo luka-Abrahama! Useboshwe nguSathane iminyaka eyishumi nesiphohlongo. Bekungafanele yini ukuba akhishwe ebugqilini besifo sakhe ngosuku lwesabatha na?”

¹⁷Kuthe ukuba abaphendule kanje, bafikelwa ngamahloni labo ababemelene naye. Izixuku zajabula ngemisebenzi yonke emangalisayo ayenzayo.

Umzekeliso wohlamvana lwesihlahla sikamasitadi

(Mat 13:31-32; Mark 4:30-32)

¹⁸Wayesethi-ke: “Uyinto enjani umbuso kaNkulunkulu na? Singawufanisa nani nje?”

¹⁹Unjengohlamvana lwesihlahla sikamasitadi oluthathwa ngumuntu alutshale esivandeni sakhe. Isithombo sikhula sibe yisihlahla, izinyoni zize zakhele izidleke emagatsheni aso.”

Umzekeliso ngemvubelo

(Mat 13:33)

²⁰Wabuye wathi: “Umbuso kaNkulunkulu ngingawufanisa nani na?”

²¹Unjengemvubelo ethathwa ngowesifazane, ayifake empushini yemicengezi emithathu emikhulu, ayixove, lemvubelo ibilise inhlama ize ikhukhumale yonke.”

Umanyango ongumngcingo

(Mat 7:13-14,21-23)

²²UJesu waguduza izigodi nezigojana, ehamba efundisa elibhekise eJerusalema.

²³Wabuzwa umuntu wathi: “Nkosi, kanti bambalwa yini abasindiswayo na? ”
Wathi kubo:

²⁴“Fuzulani ningene ngomnyango ongumngcingo! Ngithi kini, baningi abayozama ukungena kodwa behluleke.

²⁵“Kuyothi umninindlu angasuka avale emnyango, nifike nime ngaphandle ningqongqoze nithi: ‘Nkosi, sivulele!’ Abesehendula athi: ‘Anginazi lapho nivela khona.’

²⁶Niphendule-ke nithi: ‘Yithi esasidla siphuza nawe; wawufundisa ezigodini zakithi.’

²⁷Kodwa uyophinda aniphendule athi: ‘Anginazi lapho nivela khona. Dedani nonke lapha lezizigilamkhuba!’

²⁸Niyokhala nignedle amazinyo nxa senibona oAbhrahama noIsaka noJakobe nabaphrofethi bonke besembusweni kaNkulunkulu kodwa nina nibe nikhishelwe ngaphandle.

²⁹Abantu bayoqhamuka empumalanga nasentshonalanga, eningizimu nasenyakatho, bangene embusweni kaNkulunkulu bahlale badle.

³⁰Niyabona, abangabokugcina bayoba ngabokuqala, kanti abokuqala bayoba ngabokugcina.”

UJesu ulilela iJerusalema

(Mat 23:37-39)

³¹Kwasuka ngaso lesosikhathi abanye abafarisi abathile baya kuJesu bafike bathi kuye: “Phuma uphele kulendawo, ngoba inkosi uHerodi ifuna ukukubulala.”

³²Wabaphendula wathi: “Hambani nitshela leyompungushe ukuthi ngisakhipha amadimoni, ngiphilise abagulayo namuhla nangomuso, umsebenzi wami ngize ngiwuqede ngomhlomunye.

³³Nokho-ke, kumele ngiqhubeke nohambo lwami namuhla nangomuso nangomhlomunye, ngoba eJerusalema kulapho umphrofethi efanele ukubulawelwa khona, kungabi kwenye indawo.

³⁴“Jerusalema, we Jerusalema! Ubulala abaphrofethi ubakhanda ngamatshe abathunyelwe nguNkulunkulu kuwe. Kukangaki nje ngilokhu ngilangazelela

ukuqoqa abantu bakho ngibakhoselise, njengesikhukhukazi sikhoselisa amatshwele phansi kwamaphiko aso, kodwa anivumanga.

³⁵Ngakhoke seniyozibonela nina, umuzi wenu ufulathelwe. Ngithi kini, aniyuphinde ningibone kuze kube ngamhla nithi: “ ‘Ayibongwe ngegama likaSimakade leNkosi abayibika ukuthi iyeza! ’ ”

ULuka 14

UJesu uphilisa umuntu onesikhukhukhu

¹Wahamba ngelinye isabatha waya kokudla kwamfarisi owayeyisigele. Kunabantu ababemqaphele.

²Nango-ke umuntu ephethwe yisikhukhukhu esesondela kuye.

³UJesu abesebuza izazimibhalo nabafarisi athi: “Umthetho uyavuma yini ukuba kuphiliswe kuyisabatha, noma akuvunyiwe na? ”

⁴Kepha bawuhlaba inhlali nje. Wayesethinta isiguli ngesandla, saphila, wasidedela sahamba.

⁵Wathi kubo: “Ngubani phakathi kwenu okungathi uma indodana noma inkabi yakhe ikhalakathela esizibeni, angayiphuthumi ayikhiphe noma kuyisabatha na? ”

⁶Behluleka ukumphendula kulokho.

Okufanele kwenziwe yizimenywa nangummemi

⁷Kwathi lapho ebona abamenyiweyo beziqokela izihlalo eziphambili, wabaxoxela umzekeliso wathi:

⁸“Uma umenywe emshadweni, ungahlali esihlalweni esiphambili, ngoba hleze kungene isimenywa esihlonishwa ngaphezu kwakho,

⁹lowo onimemileyo nobabili abesethi kuwe: ‘Deda kuhlale lo!’ Usuyoba namahloni lapho usuyohlala endaweni esemuva.

¹⁰Kodwa uma umenyiwe, ngena uye endaweni esemuva, yikhona okumemileyo ezokuza kuwe athi: ‘Mhlobo wami, woza uzohlala ngaphambili!’ Yikhona uyohlonipheka sebekubuka bonke omenywe nabo.

¹¹Ngoba yilowo nalowo oziphakamisayo uyothotshiswa, kanti lowo ozithobayo uyophakanyiswa.”

¹²Wathi kommemileyo: “Uma unedili emini noma kusihlwa, ungabamemi abangane bakho nabafowenu nomndeni nomakhelwane abayizicebi, ingaze babuye bakumeme nawe, ngaleyondlela uthole umvuzo wakho.

¹³Kodwa uma uhlabile, mema abampofu nabakhubazekileyo nezinyonga nezimpumpethe.

¹⁴Yikhona-ke uyobusiseka ngoba bengeke bakukhokhela. Uyothola umvuzo mhla abalungileyo bevuswa ekufeni.”

Umzekeliso wedili elikhulu

(Mat 22:1-10)

¹⁵Omunye walabo ababedla naye wakuzwa lokhu wathi: “Ubusisiwe lowo oyomenywa aye edilini lombuso kaNkulunkulu!”

¹⁶UJesu wathi kuye: “Umuntu wazenzela isiphihli sedili, wakhipha isimemo.

¹⁷Kwathi kungalunga konke wathumela inceku kwabamenyiweyo ukuba ifike ithi: ‘Wozani edilini, sekulungile konke!’

¹⁸Kepha baxolisa bonke, yilowo nalowo ebeka izaba zakhe. Owokuqala wathi: ‘Ngithenge indawo, kumele ngihambe ngiyoyihlola. Uze ungixolisele impela, angiphumeleli!’

¹⁹Omunye wathi: ‘Ngithenge iqambi lezinkabi eziyishumi, ngisazolinga ukuzibophela. Uze ungixolisele impela, angizukuphumelela!’

²⁰Omunye-ke wathi: ‘Kade ngisinelwa zolo lokhu, ngakhoke ngiyehluleka ukuya edilini.’

²¹Inceku yabuyela emuva, yafike yabikela umnumzane lawomagama. Wathukuthela wabila wathi kuyo: ‘Phuthuma emigwaqweni nasemihubheni yomuzi, ulande abampofu nabakhubazekileyo nezimpumputhe nezinyonga, ubalethe lapha!’

²²Inceku yabuya, yafike yathi: ‘Mnumzane, sengikwenzile lokho obungithume khona, kepha isekhona indawo.’

²³Umnumzane wayesethi encekwini: ‘Phuma uye emigwaqweni nasezindleleni emaphandleni, ufike ubagqogqe obaficayo lapho ukuba beze, ukuze indlu yami igcwale!’

²⁴Impela ngithi kini, bonke labo ababemenyiwe ngeke bakuthi mbibi ukudla kwedili lami.’”

Kubizani ukuba ngumlandeli kaJesu

(Mat 10:37-38)

²⁵Kwakunezixuku zabantu ababehamba noJesu, wayesephendukela kubo ethi:

²⁶“Umuntu oza kimi angebe ngumlandeli wami uma engemdele uyise nonina nomkakhe nabantabakhe nabafofawo nodadewabo, ngisho nempilo yakhe.

²⁷Lowo ongetshathi isiphambano sakhe angilandele angebe ngumfundi wami.

²⁸Uma uqonde ukwakha isithabathaba sendlu, kawuqali yini uhlolisise zonke izindleko ezizodaleka, ubusuzibuza ukuthi unayo yini imali eyaneleyo yokwakha uqede na?

²⁹Uma ungakwenzi lokhu, hleze kuthi lapho usubeke isisekelo wehluleke ukwakha. Bese bekubhinqa bonke abakubonayo lokhu,

³⁰bathi: 'Hhoshi, ake nimbheke lomuntu! Waqala ukwakha, kodwa wehluleka ukuyiqedela indlu.'

³¹Uma inkosi izobhekana nenye empini, kayiqali yini idle amathambo ekhanda, izibuze ukuthi kungayilungela yini ukuhlasela ngamabutho ayizinkulungwane eziyishumi lapho ihlangabezana nabafo abeza nezinkulungwane ezingamashumi amabili.

³²Uma kungenjalo iyothumela amanxusa nemikhonzo kubafo, ithele kubo besekude.

³³Kanjalo-ke akukho muntu phakathi kwenu ongaba ngumfundi wami uma engadeli konke anakho.

Usawoti ophuphile

(Mat 5:13; Mark 9:50)

³⁴"Usawoti uyisinongo esiyolisayo, kepha uma usuyisiphusha, ukukhalipha kwawo kuyovuselelwa ngani na?"

³⁵Awusafanele ukuba usetshenziswe emasimini nasemqubeni imbala, kodwa uyachithwa. Onendlebe akezwe engikushoyo!"

ULuka 15

Umzekeliso wemvu elahlekileyo

(Mat 18:12-14)

¹Abathelisi nezoni babelokhu beya kuJesu beyomuzwa bonke.

²Abafarisi nezazimibhalo bakhononda ngalokho bathi: "Lomuntu wemukela izoni aze adlelane nazo imbala."

³UJesu wabalandisa lomzekeliso wathi:

⁴"Uma omunye kini enezimvu eziyikhulu bese kweduka eyodwa kuzo, akazishiyi edlelweni yini zonke lezi ezingamashumi ayisishiyagalolunye nesishiyagalolunye, ahambe ayofuna lena elahlekileyo aze ayithole na?"

⁵Athi angayithola ayetshathe ejabula.

⁶Ubuyela nayo ekhaya, ameme izihlobo nomakhelwane, athi kubo: 'Ngibongeleni bakwethu, ngoba sengiyitholile imvu yami ebilahlekile!'

⁷Ngithi kini, ngokunjalo kuyothokozwa kakhulu ezulwini ngesoni esisodwa esiphendukayo, ukuthokoza kwakhona kube ngaphezu kokuthokozela abalungileyo abangamashumi ayisishiyagalolunye nesishiyagalolunye abazibona bengakudingi ukuphenduka.

Umzekeliso wohlamvu lwemali

⁸“Uma owesifazane enezinhlamvu eziyishumi zemali eyisiliva bese kweduka olulodwa kuzo, akokheli isibani yini ashanele indlu, alubhudule aze aluthole na?”

⁹Athi angaluthola ameme izihlobo nomakhelwane, athi kubo: ‘Ngibongeleni bo, ngoba sengilutholile uhlamvu lwesiliva obelungedukele!’

¹⁰Ngithi kini, zithokoza kanjalo-ke izingilosi zikaNkulunkulu ngesoni esisodwa esiphendukayo.”

Umzekeliso ngendodana eyayibhungukile

¹¹Waqhubeka wathi: “Kukhona umuntu owayenamadodana amabili.

¹²Encane yathi kuyise: ‘Baba, ngabele ifa lami!’ Nempela uyise wawehlukanisela ifa amadodana.

¹³Akubanga nsuku ngaki, indodana encane yaqoqa konke okwakungokwayo, yathola ngakho imali, yashaya yachitha yaya kwelikude. Yafika lapho, yasaphaza ifa layo ekonakaleni.

¹⁴Yaligumuza yalishaya yalibhuqa nya. Kwaze kwafika umadlantule wendlala kulelozwe, yalamba.

¹⁵Yasuka yaqashwa yisakhamuzi kulelozwe. Sayithumela endle ukuba iyokwelusa izingulube.

¹⁶Yafisa sengathi ingashaya esibomvu ngokudla okuphakelwa izingulube, kepha kayikuphiwanga muntu.

¹⁷Yayisibuya ingqondo, kwasa ngokunye, yathi: ‘Ziningi kangakanani pho izisebenzi zikababa ngisho nezibamba itoho ezidla ukudla zize zikubuke, kepha mina ngibulawa yindlala lapha.

¹⁸Ngizosuka ngiye kubaba ngifike ngithi: Baba nginecala, ngonile kuNkulunkulu ngona nakuwe.

¹⁹Angisafanele ukuba kuthiwe ngiyindodana yakho. Sale usungenza isisebenzi sakho kanye nalezo ezibamba itoho!’

²⁰Yayisisuka njalo isibuyela kuyise. “Kuthe isekude nekhaya uyise wayibona, wafikelwa yisihe. Wagijima wayihlangabeza, wafike wayigona wayanga.

²¹Yayisithi kuye: ‘Baba nginecala, ngonile kuNkulunkulu ngona nakuwe. Angisafanele ukuba kuthiwe ngiyindodana yakho.’

²²Kepha uyise wathi ezincekwini zakhe: ‘Sheshani nilethe ingubo yakwanokusho nimembathise, nimfake indandatho nezicathulo!’

²³Bese nikhetha ithole elikhulupheleyo, nilihlabe sidle sibuse.

²⁴Ngoba lendodana yami ibifile, manje isiyaphila. Ibilahlekile, kodwa isitholakele.’ Base bebusa-ke.

²⁵“Indodana enkulu yayingekho, isemasimini. Ekubuyeni kwayo, isisondele ngasekhaya, yezwa kuhlatshelwa kusinwa.

²⁶Yayisibiza enye yezinceku, yayibuza ukuthi ngabe kwenze njani.

²⁷Inceku yaphendula yathi: ‘Phela umnawakho ubuyile, uyihlo wayesemhlabisa ithole elikhulupheleyo, ebonga ukubuyela kwakhe ekhaya esaphila.’

²⁸Yathukuthela indodana enkulu, yenqaba ukungena endlini. Uyise waphuma wayincenga ukuba ingene.

²⁹Kepha yathi kuyise: ‘Awubheke! Yonke leminyaka ngikusebenzela, angikaze ngeqe nowodwa umthetho wakho. Nokho awuzange unghlabele ngisho izinyane lodwa leli, ukuba ngidle ngibuse nezihlobo zami.

³⁰Kodwa lendodana yakho yalishaya yalibhuqa ifa lakho ilidla nezindindwa. Njengoba isibuyile-ke manje, usuyihlabisa ithole elikhulupheleyo!’

³¹Uyise wayiphendula wathi: ‘Mntanami! Ngihlala nawe lapha, konke okwami kungokwakho.

³²Kepha bekufanele sibuse sijabule, ngoba lomfowenu ubefile, manje useyaphila; ubelahlekile, kodwa useholakele.’ ”

ULuka 16

Umzekeliso ngenceku engathembekile

¹Wabuye wathi kubafundi bakhe: “Kukhona isicebi esasisetshenzelwa yinduna. Yamangalelwa kwathiwa ikhwabanisa impahla yaso.

²Sayibiza sathi kuyo: ‘Yini lena engiyizwa ngawe na? Ngilandise ngomsebenzi wakho wokuphatha, ngoba ngeke usaqhubeka nokuphatha.’

³Yacabanga yathi: ‘Ngizoshonaphi njengoba inkosi yami ingixosha emsebenzini wokuphatha na? Anginamandla okugqoma, nginamahloni okuhamba nginxiba.

⁴Nakhu-ke engizokwenza ukuba abantu bangingenise emizini yabo mhla ngaxoshwa ebuduneni bami!’

⁵Yayisibabiza ngamunye labo ababenecala lokungamkhokheli umnumzane, yathi kowokuqala: ‘Bekufanele umkhokhele okungakanani umnumzane na?’

⁶Waphendula wathi: ‘Imiphongolo yamafutha eyikhulu.’ Yathi kuye: ‘Thatha nansi incwadi yecala lakho, uhlale phansi njengamanje ulobe ukuthi unecala lemiphongolo engamashumi ayisihlanu!’

⁷Yayisithi komunye: ‘Wena-ke kufanele ukhokhe into engakanani na?’ Wathi: ‘Amasaka kakolweni ayikhulu.’ Yathi kuye: ‘Thatha nansi incwadi yecala lakho, ulobe ukuthi unecala lamashumi ayisishiyagalombili!’

⁸Umnumzane wayibabaza lenduna engathembekile, njengalokhu yayikhombise ubuhlakani. Phela abantu balomhlaba bahlakaniphile ekwenzeni kwabo kunabantu bokukhanya.

⁹“Ngithi kini, sebenzisani ingcebo yalomhlaba ongalungile, nizitholele ngayo abangane okuyothi mhla isiphelile banamukele ekhaya lasezulwini.

¹⁰Lowo owethembekile ezintweni ezincane wethembekile nakwezinkulu; ongathembekile ezintweni ezincane kathembekile nakwezinkulu.

¹¹Uma ningethembeki mayelana nengcebo yalomhlaba ongalungile, ngubani ongase anethembe aninike ingcebo eyonayona na?

¹²Uma ningethembeki kokwabanye, ngubani oyoninika lokho okungokwenu na?

¹³“Akukho nceku engakhonza amakhosi amabili. Kuphakathi kokuba izonde enye ithande enye, noma ibambelele kwenye, enye iyeyise. Ningekhonzze uNkulunkulu kanye noMamona.”

Umthetho nombuso kaNkulunkulu

(Mat 11:12-13)

¹⁴Abafarisi bamuzwa ekusho konke lokho, base bemklolodela, ngoba babeyikhonze kabi imali.

¹⁵Wathi kubo: “Yinina kanye enizishaya abalungileyo phambi kwabantu, kepha uMvelinqangi uyakwazi okusezinhliziyweni zenu. Ngoba lokho okutuseka kubantu kuyisinengiso phambi kukaNkulunkulu.

¹⁶“Umthetho kaMose nemibhalo yabaphrofethi kwasebenza kwaze kwaba yinkathi kaJohane umbhabhadisi. Kusukela kuleyonkathi yilokhu kushunyayelwa izindaba ezithokozisayo ngombuso kaNkulunkulu; yilowo nalowo uyafuzula ukuba angene kulombuso.

¹⁷Kepha kulula ukuba kudlule izulu nomhlaba kunokuba kusuke ichashazana nje likangwaqa elilotshwe emthethweni.

UJesu ufundisa ngesehlukaniso

(Mat 5:31-32; 19:9; Mark 10:11-12)

¹⁸“Indoda echitha umkayo ibisiganwa ngomunye, iyaphinga. Nendoda eganwa ngowesifazane owahlukanisile, iyaphinga.

Isicebi noLazaru

¹⁹“Kukhona injinga eyayigqoka izingubo zakwanokusho ezibukhwebezane, izitika imihla ngemihla, ikhomba ngophakathi.

²⁰Kodwa ngasesangweni lomuzi wayo kwakulele ihlwempu okuthiwa nguLazaru, umzimba walo uphihlike izilonda.

²¹Lalilangazelela ukudla imvuthuluka ewa esithebeni sesicebi. Nezinja imbala zazifike zilikhothe izilonda ezazichicha.

²²Lelihlwempu lafa; izingilosi zalithwala zafike zalihlalisa noAbhrahama edilini. Sase siyafa naso isicebi, sangcwatshwa.

²³Kwathi lapho sesisezweni labafuleyo siphethwe yizinhlungu ezinkulu, senyusa amehlo sabona uAbhrahama kude laphaya ehlezi noLazaru.

²⁴Samemeza sathi: 'Baba Abhrahama, ngihawukele! Thuma uLazaru ukuba agcobhoze isihloko somunwe wakhe emanzini afike apholise ulimi lwami, ngoba sengifile yizinhlungu kulomlilo.'

²⁵Kodwa uAbhrahama wathi: 'Ndodana, khumbula ukuthi wawutamuza umbuso emhlabeni, kepha uLazaru ehlupheka engenalutho. Manje useyathokoza lapha, kepha wena usuyahlupheka.'

²⁶Nangaphandle kwalokho kukhona igebe elikhulu phakathi kwethu nani, ukuze labo abafuna ukusuka lapha baye kini behluleke, nani ningaweli nize ngapha.'

²⁷Isicebi sathi: 'Baba ngiyakuncenga ukuba uthumele uLazaru emzini kababa,

²⁸aye kubafowethu abayisihlanu, afike abaxwayise hleze nabo beze kulendawo yobuhlungu.'

²⁹UAbhrahama waphendula wathi: 'Abafowenu banemithetho kaMose nemibhalo yabaphrofethi; abalalele yona!'

³⁰Sase sithi: 'Angiboni baba ukuthi bayoyizwa, kodwa uma kungase kube khona ovuka kwabafuleyo aye kubo, bayophenduka bakholwe!'

³¹Kodwa uAbhrahama wathi: 'Uma bengakulaleli okushiwo nguMose nabaphrofethi, ngeke bakholwe ngisho noma kungavuka bani kwabafuleyo.'"

ULuka 17

Izikhubekiso

(Mat 18:6-7,21-22; Mark 9:42)

¹Wathi kubafundi bakhe: "Zohlala zikhona nakanjani izikhubekiso, kodwa nakho kulowomuntu ezivela ngaye!

²Bekungangcono kuye ukuba kuboshelwe inguzunga yetshe entanyeni yakhe, aphonswa olwandle, kunokuba akhubekise abe munye kulaba abasanda kuphenduka, amwise ekukholweni.

³Ngakhoke qaphelani! "Uma umzalwane enza isono mkhuze; uma ezisola mthethelele!

⁴Ubomthethelela ngisho noma esekona kasikhombisa ngosuku, kodwa abuye axolise kuwe kasikhombisa athi: 'Ngikonile.'"

Amandla okukholwa

⁵Abaphostoli bathi eNkosini uJesu: "Sandisele ukukholwa kwethu!"

⁶INkosi yaphendula yathi: “Ukuba beninokholo, ngisho noma lungaze lube ngangohlamvana lwesihlahla sikamasitadi, beningathi kulesisihlahla esikhulu samajikijolo asisimbuke endaweni yaso simile olwandle, bese sinilalela.

“Siyizisebenzi nje”

⁷“Uma isisebenzi sakho sifika sivela ekulimeni noma ekwaluseni, ungasho yini kuso sisanda kufika ngakho kodwa, uthi asihlale phansi sidle, ungakadli wena na?

⁸Phinde! Kepha uyaye uthi kuso: ‘Hlamba izandla, ungilungisele ukudla uphake ngidle ngiphuze; emuva kwalokho nawe usungadla.’

⁹Siyanconywa yini isisebenzi uma sisuke senze lokho obekuvele kungumsebenzi waso na? Qha!

¹⁰Kanjalo nani akothi lapho senikufezile konke okungumsebenzi wenu nithi: ‘Siyizisebenzi ezingatheni; besenza lokho obekuvele kungumsebenzi wethu.’ ”

UJesu uphilisa amadoda ayishumi aphethwe wuchoko

¹¹Wayelibhekise eJerusalema wanqamula phakathi kwelaseSamariya nelaseGalile.

¹²Kwathi esezofika esigodini esithile wanqwamana namadoda ayishumi ayephethwe uchoko. Ema buqamama naye,

¹³amemeza athi: “Nkosi Jesu, sihawukele! ”

¹⁴UJesu wawabona qede wathi kuwo: “Hambani niziveze kubaphristi banihlole! ” Amadoda ahlanjululwa esahamba endleleni.

¹⁵Enye yawo yanele yabona ukuthi isiphilisiwe, yabuyela emuva, yasho kakhulu ngengila idumisa uMvelinqangi.

¹⁶Yazilahla phambi kukaJesu imbonga. YayingeyaseSamariya.

¹⁷UJesu wabuza wathi: “Abaphilisiwanga baba yishumi na? Pho baphi abayisishiyagalolunye?

¹⁸Akubange kusabuya noyedwa nje ukuzobonga uNkulunkulu ngaphandle kwalomuntu wabezizwe na? ”

¹⁹Wayesethi kuye: “Sukuma uhambe! Ukukholwa kwakho kukusindisile.”

Ukufika kombuso kaNkulunkulu

(Mat 24:23-28,37-41)

²⁰Abafarisi bambuza ukuthi uNkulunkulu uyoqala nini ukubusa na. Wabaphendula wathi: “Umbuso kaNkulunkulu awufiki ubonwa.

²¹Akuyikushiwo kuthiwe: ‘Nakho-ke, uNkulunkulu useyabusa lapha! ’ kumbe kuthiwe: ‘Useyabusa laphaya! ’ Ingani phela uNkulunkulu ubusa phakathi ezinhliziyweni zenu.”

²²Wayesethi kubafundi: “Siyeza isikhathi lapho niyofisa ukuyibona iNdodana yesintu, noma kungaba usuku olulodwa nje ibusa, kodwa aniyikuyibona.

²³Bayothi kini: ‘Niyayibona, nansiya!’ noma bathi: ‘Bhekani, nansi!’ Ningabhuduzeli niye lapho benikhombisa khona!

²⁴Mhla iNdodana yesintu ifika iyoba njengezulu libaneka emkhathini, kuye kushaye emaphethelweni ezulu nxazonke.

²⁵Kodwa kungakenzeki konke lokho kumele ihlupheke kabi, abantu balemihla bayicwase.

²⁶Ezinsukwini ezandulela ukufika kweNdodana yesintu kuyoba njengasemihleni kaNowa.

²⁷Babedla bephuza beganiselana kwaze kwaba ngamhla uNowa engena emkhunjini, kwase kufika uzamcolo, wababhuhisa bonke.

²⁸Kwaba njalo nasemihleni kaLothi, bedla bephuza behweba belima bakha nezindlu,

²⁹kodwa mhla ephuma emzini waseSodoma kwehla ikloba lomlilo wesibabule ezulwini wababhuhisa bonke.

³⁰Kuyoba njalo nangamhla iNdodana yesintu isibonakala ifika ngenkazimulo.

³¹“Ngalolosuku, oyobe ephezu kophahla lwendlu eshiye impahla yakhe endlini akangabe esabuyela eyoyithatha! Ngokunjalo noyobe esemasimini akangabe esaphindela ekhaya!

³²Khumbulani okwehlela umkaLothi!

³³Lowo ofuna ukulonda ukuphila kwakhe kuyomlahlekela, kepha lowo okumlahlekelayo kuyolondolozwa.

³⁴Ngithi kini, ngalobobusuku amadoda amabili ayobe elele ndawonye, kuthathwe enye, enye isale;

³⁵kugaye abesifazane ababili exhibeni kuthathwe omunye, omunye asale.

[³⁶Amadoda amabili ayobe esebenza emasimini kuthathwe enye, enye isale.]”

³⁷Abafundi bambuza bathi: “Nkosi, kuyokwenzekaphi lokho na?” Wayesebaphendula wathi: “Amanqe ayobuthana lapho kukhona khona isidumbu.”

ULuka 18

Umzekeliso ngomfelokazi nomahluleli

¹Wabalandisa umzekeliso ebakhombisa ukuthi kufanele bakhuleke njalo bangalahli ithemba. Wathi kubo:

²“Kwakukhona umahluleli emzini othile. Lendoda yayingamesabi uNkulunkulu, ingenandaba namuntu.

³Kulowomuzi kwakukhona nomfelokazi owayelokhu eya kulomahluleli afike athi kuye: ‘Ake ungizwele odabeni lwami nalomuntu esibhekene naye ecaleni!’

⁴Kwamthatha isikhathi eside umahluleli elokhu engafuni, kepha kuthe ekugcineni wakhuluma yedwa wathi: ‘Yize noma ngingamesabi uNkulunkulu, ngingakhathali ngamuntu,

⁵kodwa lomfelokazi ujinga engifundekela, ngakhoke ngizomzwela ukuba angabelokhu eza lapha kimi hleze ngizukeke.’ ”

⁶INkosi yaqhubeka yathi: “Ake nizwe ukuthi uthini umahluleli okhohlakeleyo!

⁷Nithi kambe uNkulunkulu kayikubazwela yini abekhethe lakhe abakhala kuye imini nobusuku, abaphendulele na? Nithi uyokwephuza ukubasiza na?

⁸Nginyanitshele ngithi uyosheshe abazwele. Kodwa mhla iNdodana yesintu izayo, iyolufica yini emhlabeni ukhohlo olungako kubantu na? ”

Umzekeliso ngomfarisi nomthelisi

⁹Wabuye wabalandisa lomzekeliso abathile ababezethemba ukuthi balungile, bebukela phansi abanye, wathi:

¹⁰“Kwasuka amadoda amabili aya ethempelini ukuba akhuleke, enye ingumfarisi, enye ingumthelisi.

¹¹Umfarisi wema yedwa wakhuleka wathi: ‘Nkulunkulu ngiyakubonga ngoba angifani nabanye abantu; angiphangi, angikhohlakele, angiphingi. Angifani ngisho nalomthelisi.

¹²Ngizila ukudla kabili ngeviki, nginikela ngokweshumi kukho konke engikuzuzayo.’

¹³Kepha umthelisi wema kude, akathanda ngisho nokubhekisa ubuso bakhe ezulwini, wathwala izandla wakhothama ngokwesaba, wathi: ‘Nkulunkulu, hawukela mina soni!’

¹⁴Ngithi kini, okunguyena owabuyela ekhaya ethethwe yicala, ngumthelisi kunomfarisi. Ngoba yilowo nalowo oziphakamisayo uyofojiswa, kodwa lowo ozithobayo uyophakanyiswa.”

UJesu ubusisa abantwana

(Mat 19:13-15; Mark 10:13-16)

¹⁵Bayisa ngisho nabantwana abancane kuye ukuba ababeke izandla. Abafundi bakubona lokhu babakhuza.

¹⁶Kodwa uJesu wathi abalethwe, wayesethi: “Bavumeleni abantwana beze kimi, ningabavimbeli, ngoba umbuso kaNkulunkulu ungowabanje.

¹⁷Ngiyanitshela ngithi, bonke labo abangawemukeli umbuso kaNkulunkulu njengomntwana, akasoze ababuse nempela.”

Isikhulu esicebileyo

(Mat 19:16-30; Mark 10:17-31)

¹⁸Isikhulu esithile sabuza uJesu sathi: “Mfundisi olungileyo, ngingenze njani ukuba ngidle ifa lokuphila okuphakade na?”

¹⁹UJesu wasibuza wathi: “Ungibizelani ngokuthi ngingolungileyo? Kakho olungileyo, nguMvelinqangi kuphela.

²⁰Uyayazi imiyalo ethi: ‘Ungaphingi; ungabulali; ungebi; ungafakazi amanga; yazisa uyihlo nonyoko!’ ”

²¹Saphendula sathi: “Ngiyigcinile yonke lemiyalo kwasebusheni bami.”

²²Kwathi ukuba uJesu akuzwe lokho, wathi kuso: “Kusasilele into eyodwa ongakayenzi: thengisa ngakho konke onakho wabele abampofu, yikhona uyoba nengcebo ezulwini. Usungeza-ke ungilandele.”

²³Kuthe ukuba sizwe lelo sephuka umoya, ngoba sasiyisigwili.

²⁴UJesu wasibona ukuthi sesijabhile wathi: “Wo, kulukhuni kuyitshe ukuba izicebi zingene embusweni kaNkulunkulu!

²⁵Impela, kulula ukuba ikameli lichushe entunjani yosungulo kunokuba isicebi singene embusweni kaNkulunkulu.”

²⁶Abamuzwa esho njalo bathi: “Pho uma kunjalo, ngubani ongasindiswa na?”

²⁷Wathi kubo: “Lokho angekwenze umuntu, uNkulunkulu angakwenza.”

²⁸UPhetro wathi: “Thina sidele konke ebesinakho, salandela wena.”

²⁹UJesu wathi kubo: “Ngiyaqinisa impela ngithi, yilowo nalowo odela indlu noma umkakhe noma abafowabo noma abazali noma abantwana ngenxa yombuso kaNkulunkulu,

³⁰uyobuye aphiwe ngokuphindiwe kaningi esesemhlabeni, abesethola ukuphila okuphakade ezweni elizayo.”

Sekungokwesithathu uJesu ebikezela ukufa kwakhe

(Mat 20:17-19; Mark 10:32-34)

³¹Wabizela eceleni abayishumi nambili, wathi kubo: “Lalelani, sesenyukela eJerusalema lapho kuzogcwaliseka khona konke okwalotshwa ngesandla sabaphrofethi bebikezela ngeNdodana yesintu.

³²Izonikelwa kwabezizwe, ibe yinhlekisa, bayidlove, bayifele ngamathe,

³³bayibhaxabule, bayibulale, kepha ivuke ngosuku lwesithathu.”

³⁴Kabazange baqonde lutho lwalokhu, umqondo wakho wawufihliwe kubo. Babengazi ukuthi ukhuluma ngani.

UJesu uphilisa impumpithe enqibayo

(Mat 20:29-34; Mark 10:46-52)

³⁵Wasondela emzini waseJerikho, kuhlezi lapho impumpithe inqiba eceleni kwendlela.

³⁶Yathi ingezwa uquqaba ludlula yabuza ukuthi kwenze njani.

³⁷Bayitshela bathi lo odlulayo nguJesu waseNazaretha.

³⁸Yayisimemeza ithi: “Jesu, Ndodana kaDavide, ngihawukele!”

³⁹Abantu ababengaphambili bayikhuza, kepha babe besathe ayithule yaqala phansi yasho kakhulu yathi: “Ndodana kaDavide, ngihawukele!”

⁴⁰UJesu wayesema esethi mayilethwe. Kuthe ukuba isondele wayibuza wathi:

⁴¹“Ubuthanda ukuba ngikwenzeleni na?” Yamphendula yathi: “Nkosi yami, ukuba ungivule amehlo ngibone.”

⁴²UJesu wathi kuyo: “Vuleka ubone! Ukukholwa kwakho kukusindisile.”

⁴³Yavuleka amehlo yabona khona lapho, yamlandela uJesu ibongela uMvelinqangi. Izixuku zakubona lokhu zadumisa uMvelinqangi.

ULuka 19

UJesu noZakewu

¹Wangena emzini waseJerikho, wadabula kuwo eqonde ukudlulela phambili.

²Kwakukhona indoda ethiwa nguZakewu Yabe iyinhloko yabathelisi, icebile.

³Yayifuna ukuzibonela ukuthi uJesu ungubani, kepha yehluleka ngenxa yesixuku, ngoba yayimfushane ngethambo.

⁴Yagijimela phambili, yakhwela esihlahleni somthombe ukuba imbone kahle, ngoba wayezodlula ngalapho.

⁵UJesu wafika ngakuleyondawo, waphosa amehlo phezulu esihlahleni, wathi: “Zakewu, shesha wehle lapho, ngoba kumele ngingenise kwakho namuhla.”

⁶UZakewu wehla eshesha, wafika wamngenisa ngokujabula.

⁷Abantu bayibuka lento, bakhonona bonke bathi: “Lomuntu ungenisa emzini wesoni!”

⁸Kepha uZakewu wasukuma wavela obala wakhuluma eNkosini uJesu wathi: “Nkosi, sengizokwabela abampofu ingxenye yalokho enginakho. Uma kukhona umuntu engimqolile, ngiyombuyisela sekuphindwe kane.”

⁹UJesu wathi kuye: “Insindiso kaNkulunkulu isifikile kulomuzi namuhla. Naye phela ungowozalo luka-Abhrahama.

¹⁰INdodana yesintu ize ukuzofuna abalahlekileyo ibasindise.”

Umzekeliso wezinhlamvu zegolide

(Mat 25:14-30)

¹¹Kuthe abantu besalalele ekhuluma lokho, wabuye walandelisa ngomzekeliso. Wayeseduze neJerusalema, sebethembile ukuthi uNkulunkulu uzomisa umbuso wakhe maduzane.

¹²Ngakhoke wathi: “Kukhona umuntu wasebukhosini owayezoya kwelikude, kuzofika kugidwe lapho umkhosi wokubekwa kwakhe, kanduba abuye azobusa.

¹³Wabiza izinceku zakhe eziyishumi, wazinika ngayinye uhlamvu lwemali eyigolide, wayesethi kuzo: ‘Thathani lemali nisale niyizalanisa ngize ngibuye!’

¹⁴Kodwa abantu ayezobabusa babemzonda, base bemlandelisa ngamanxusa ayezofike athi: ‘Asifuni ukubuswa yilomuntu.’

¹⁵“Wafike wabekwa waba yinkosi, wayesebuyela emuva. Wathi engena nje wabiza lezozinceku ayezimize imali, ukuba ezwe ukuthi zizuzeni lapho ziyizalanisa.

¹⁶Eyokuqala yafike yakhuleka yathi: ‘Wena wakomkhulu! Uhlamvu lwakho lwegolide luzalanisiwe kwatholakala eziyishumi ngaphezulu.’

¹⁷Wathi kuyo: ‘Halala nceku, usebenze kahle! Njengoba ubuwethembekile ezintweni ezincane ngizokubeka uphathe imizi eyishumi.’

¹⁸Eyesibili yafike yathi: ‘Wena wakomkhulu! Luzalanisiwe uhlamvu lwakho lwegolide, kwatholakala eziyisihlanu ngaphezulu.’

¹⁹Wathi kuyo: ‘Wena-ke uzophatha imizi eyisihlanu.’

²⁰Kwase kusuka enye yafike yathi: ‘Nkosi, thatha nantu uhlamvu lwakho lwegolide! Ngalusonga kahle ngendwangu, ngalulondoloza.

²¹Phela ngangikwesaba, ngoba unenhliziyi elukhuni, uyakuqhwaga okungesikho okwakho, uvune lapho ungahlwanyelanga khona.’

²²Wayesethi kuyo: ‘Thula, nceku embi! Ngizokugweba ngamagama akho. Njengoba ubukwazi ukuthi nginenhliziyi elukhuni, ngiqhwaga lokho okungesikho okwami, ngivune lapho ngingahlwanyelanga khona,

²³pho awuthathanga ngani imali yami wayoyigcina ebhange, khona ngizoyithola isinenzalo mhla ngibuyayo na?’

²⁴Wayesekhuluma ezincekwini ezazimi lapho wathi: ‘Nina, mephuceni loluhlamlamvu lwegolide, nilunike lowaya oneziyishumi!’

²⁵Zathi: ‘Kodwa nkosi, uvele unazo nje eziyishumi!’

²⁶Waphendula wathi: ‘Ngiyanitshela ngithi, yilowo nalowo onotho uyophiwa enezelelwe; lowo ongenalutho uyokwephucwa ngisho nalokho okuncane anakho.

²⁷Kodwa lezizitha zami ezazithi kazifuni ukubuswa yimi, ziletheni lapha nizibhokode ngomkhonto ngibuka!’ ”

UJesu ungena ngodumo eJerusalema

(Mat 21:1-11; Mark 11:1-11; Joh 12:12-19)

²⁸Wakusho lokho wabahola phambili waqonda eJerusalema.

²⁹Wasondela emizaneni yaseBhetfage naseBethani ngasegqumeni elibizwa ngokuthi yiNtaba yemiHlwathi, wathuma abafundi bakhe ababili,

³⁰wathi: “Hambani niye kunankuya umuzi! Niyothi ningangena kuwo nibone kukhulekwe inkonyane yembongolo engakaze igitshelwe muntu. Yithukululeni niyilethe lapha!

³¹Uma kukhona obuza ukuthi niyithukululelani anothi: ‘INkosi iyayidinga.’ ”

³²Laba ababethunyiwe bahamba, nembala bakuthola kunjengoba ayeshilo uJesu.

³³Kuthe besayithukulula inkonyane, abaniniyo babuza bathi: “Niyithukululelani na?”

³⁴Baphendula bathi: “INkosi iyayidinga.”

³⁵Base beyiletha kuJesu. Bendlala izingubo zabo emhlane wayo, bamgibelisa.

³⁶Kuthe esahamba, abantu bendlala izingubo zabo endleleni.

³⁷Wasondela ngasekwehleni kweNtaba yemiHlwathi. Isixuku sonke sabafundi sathokoza, saqala ukuhlokoma sidumisa uMvelinqangi ngazo zonke izimangaliso esase sizibonile sathi:

³⁸“Ayibongwe ngegama likaSimakade leNkosi abayibika ukuthi iyeza. Ukuthula ezulwini nodumo kweliphezulu!”

³⁹Kwase kusuka abanye abafarisi ababesemshungwini sebethi kuye: “Mfundisi, khuza abafundi bakho!”

⁴⁰Wathi kubo: “Ngithi kini, uma kungathula laba, kungamemeza amatshe imbala.”

⁴¹Wasondela emzini waseJerusalema, kwathi angawubona wawukhalela izinyembezi.

⁴²Wathi: “Yek' ukuba ubukwazi namuhla lokho okungakulethela ukuthula! Kepha kusitheziwe, awukuboni.

⁴³Kuyofika izinsuku lapho izitha zakho ziyokwakhela izingange zikuhaqe zikuhlanganisele phakathi.

⁴⁴Ziyoqotha imbokodo nesisekelo, zibhubhise abantu abakhe kuwe. Aziyikushiya itshe liqhwakele phezu kwelinye, ngoba awubonanga ukuthi sekufike isikhathi sokuhanjelwa kwakho nguNkulunkulu ezokusindisa.”

Ukuhlanzwa kwethempeli

(Mat 21:12-17; Mark 11:15-19; Joh 2:13-22)

⁴⁵Wangena ethempelini, waxosha abathengisayo,

⁴⁶wathi kubo: “Embhalweni ongcwele uNkulunkulu uthi: ‘Indlu yami iyoba yindlu yokukhuleka.’ Kepha nina manje seniyenze umgede wabaphangi.”

⁴⁷Wayefundisa ethempelini imihla ngemihla. Izikhulu zabaphristi kanye nezazimibhalo nabaholi besizwe babefuna ukumgudlukisa,

⁴⁸kodwa bathiyeka bengazi ukuthi bangamthola kanjani, ngoba izixuku zazilokhu zinamathele kuye, zifuna ukumuzwa.

ULuka 20

Umbuzo ngegunya likaJesu

(Mat 21:23-27; Mark 11:27-33)

¹Ngelinye ilanga uJesu wayefundisa ethempelini eshumayeza abantu indaba emnandi. Kweza kuye izikhulu zabaphristi kanye nezazimibhalo nezigele,

²zafike zathi: “Ake usitshela, ukwenza lokhu ngagunya lini? Ngabe ngubani owakunika leligunya na?”

³Waphendula wathi: “Nami ake nginibuze umbuzo! Ngitsheleni ukuthi,

⁴uJohane umbhabhadisi walithathaphi igunya lokubhabhadisa, walinikwa nguNkulunkulu noma walithatha kubantu na?”

⁵Zase zihlanganisa amakhanda zithi: “Uma sithi walinikwa nguNkulunkulu uzothi: ‘Animkholwanga ngani uJohane na?’

⁶Kanti-ke futhi uma singathi walithatha kubantu, sonke isixuku sizosikhanda ngamatshe, ngoba phela bonke bayeneliswa ukuthi uJohane wayengumphrofethi.”

⁷Zase ziphendula zithi kazazi ukuthi walithathaphi.

⁸UJesu wayesethi kuzo: “Nami-ke angisanitsheli ukuthi engikwenzayo ngikwenza ngagunya lini.”

Umzekeliso ngabaqashi besivini

(Mat 21:33-46; Mark 12:1-12)

⁹Walandisa abantu lomzekeliso: “Umuntu watshala isivini, wasiqashisa kubalimi, wahambela kwelikude, wafike wahlala isikhathi eside.

¹⁰Sekuvunwa wathumela inceku kubaqashi besivini ukuba ilande ingxenye yesivuno eyinzuzo yakhe. Kepha bayidinda inceku bayiphindisela emuva ivathazela.

¹¹Wabuye wathumela enye inceku, naleyo bayidinda bayithela ngehlazo, bayiphindisela emuva ivathazela.

¹²Wabuye wathumela eyesithathu; nayo bafike bayilimaza, bayixosha.

¹³Umninisivini wathi: 'Sengizokwenze njani-ke manje? Ngizothumela indodana yami engiyithanda kakhulu; mhlawumbe bayoyihlonipha.'

¹⁴Abaqashi bayibona bafakana imilomo bathi: 'Nansi indlalifa! Asiyibulale sidle ifa layo!'

¹⁵Base beyikhiphela ngaphandle kwesivini bayibulala. "Uyobenze njani-ke umninisivini na?"

¹⁶Uyofika ababhuhise, abeseqashisa ngesivini kwabanye." Kuthe ukuba bakuzwe lokhu bathi: "Hhayi, akungenzeki lokhu!"

¹⁷UJesu wababuka wathi kubo: "Uchaza ukuthini lombhalo ongcwele uma uthi: " 'Itshe lokwakha elaliwa ngabakhi bethi liyinto engenamkhuba, kwaba yilona sisekelo njengensika ephase indlu'?"

¹⁸"Yilowo nalowo owela phezu kwalelotshe uyophihlizeka kanti-ke nalowo eliwela phezu kwakhe liyomgaya abe yizicucu."

¹⁹Izazimibhalo nezikhulu zabaphristi zase zifuna ukumbopha uJesu khona lapho, ngoba zazizwe kahle ukuthi lomzekeliso uwubhekise kuzo. Nokho zesaba abantu.

Umbuzo ngentela

(Mat 22:15-22; Mark 12:13-17)

²⁰Babelindele ithuba lokuba bamhile. Ngakhoke bathumela kuye izimpimpi, ukuba zizidlise satshanyana zizenze abathembekile, khona zizothola amazwi ezingambamba ngawo zimthwale zimuthi qithi emthethweni phambi kukalusibalukhulu.

²¹Zafike zambuza zathi: "Mfundisi, siyazi ukuthi lokho okushoyo nokufundisayo kulungile impela nokuthi ubunjani bomuntu awubushayi mkhuba. Ufundisa indlela kaNkulunkulu ngobuqotho.

²²Kuphambene yini nomthetho ukuba sithethele ikhanda kuKhesari inkosi yombuso waseRoma na?"

²³Kodwa wabubona ubuqili babo wathi:

²⁴"Ngikhombiseni uhlamvu lwemali! Ngokabani umfanekiso negama elikuyo na?" Bamphendula bathi: "NgokaKhesari."

²⁵Wathi kubo: "Ngakhoke mnikeni uKhesari okukaKhesari, uNkulunkulu nimnike okukaNkulunkulu!"

²⁶Behluleka ukumhila phambi kwabantu ngamazwi akhe. Base bethula du, bemangaliswe yimpendulo yakhe.

Umbuzo ngokuvuka kwabafileyo

(Mat 22:23-33; Mark 12:18-27)

- ²⁷Abasadusi bayaye bathi akukho kuvuka kwabafileyo. Kwasuka abathile kubo baya kuJesu bafike bambuza
- ²⁸bathi: “Mfundisi, uMose wasilobela umthetho wathi: ‘Uma indoda ifa ishiya umfelokazi ingazele, umfowabo wendoda makamngene avuse umuzi womufi.’
- ²⁹Kwakukhona izelamani eziyisikhombisa. Esokuqala saganwa, safa singazele.
- ³⁰Esesibili sase singena umfelokazi.
- ³¹Sesishonile wangenwa ngesesithathu. Zamngena zonke, asikho kulezi eziyisikhombisa esazala kuye. Zafa zonke
- ³²kwase kulandela nomfelokazi.
- ³³Pho, njengoba wake waba ngumfazi wabo bonke laba abayisikhombisa, woba ngumkabani-ke mhla kuvuka abafileyo na? ”
- ³⁴UJesu waphendula wathi: “Lapha emhlabeni abantu bayaganiselana,
- ³⁵kepha labo okuyothiwa kubafanele ukuphila ezweni elizayo sebevukile kwabafileyo, kabayikuganana.
- ³⁶Abasayikufa ngoba bayoba njengezingilosi. Bangamadodana kaNkulunkulu njengoba sebevukile kwabafileyo.
- ³⁷NoMose imbala ukubeka ngokusobala encwadini yakhe ukuthi kukhona ukuvuka kwabafileyo. Endabeni yehlozi elavuthayo ubiza uSimakade ngoNkulunkulu ka-Abhrahama noNkulunkulu kaIsaka noNkulunkulu kaJakobe.
- ³⁸UnguNkulunkulu wabaphilayo; labo anguNkulunkulu wabo kabafile, ngoba kuyena bonke bangabaphilayo.”
- ³⁹Ezinye zezazimibhalo zathi: “Mfundisi, ukhulume wabehlula! ”
- ⁴⁰Emuva kwalokho abalokothanga bambuze utho uJesu.

Umbuzo ngeNdodana kaDavide

(Mat 22:41-46; Mark 12:35-37)

- ⁴¹Wababuza wathi: “Bangasho kanjani ukuthi uMesiya uyiNdodana kaDavide na?
- ⁴²Ngoba encwadini yamaHubo uDavide uqobo lwakhe uthi: “ ‘USimakade wathi eNkosini yami: Hlala ngakwesokunene sami
- ⁴³ngize nginqobe izitha zakho zithele kuwe! ’
- ⁴⁴“UDavide umbiza ngeNkosi yakhe, pho useyiNdodana yakhe kanjani manje? ”

UJesu usola izazimibhalo

(Mat 23:1-36; Mark 12:38-40; Luk 11:37-54)

- ⁴⁵Wakhuluma kubafundi bakhe, abantu bonke belalele wathi:

⁴⁶“Xwayani izazimibhalo! Zikhonze ukuhamba zembethe izevatho ezinde, zithanda nokukhulekelwa embuthanweni, zibekwe ezihlalweni eziphambili ezindlini zokusonta, zihlonishwe zihlaliswe nezikhulu emikhosini.

⁴⁷Zikhuleka undendende zibukisa, kanti zilutha abafelokazi zisizakale ngabo zibaphuce amafa abo. Ziyोजेजिसवा ngokwedlulele ngecala lazo.”

ULuka 21

Umnikelo womfelokazi

(Mark 12:41-44)

¹Waphosa amehlo wabona izicebi zinikela esitsheni somnikelo ethempelini.

²Wabona nomfelokazi oyimpofana enikela ngezinhlamvana ezimbili zemali.

³Wayesethi: “Niyabona! Impela lomfelokazi eyimpofana nje unikele wabedlula bonke.

⁴Ngoba bonke laba bathathe kokuningi abanakho banikela kwasala, kodwa lomfelokazi ebuphofini bakhe ayibo udele konke abezophila ngakho.”

UJesu ubikezela ngokudilizwa kwethempeli

(Mat 24:1-2; Mark 13:1-2)

⁵Sekuzwakala abathile betusa ubuhle bethempeli bencoma ukuhlotshiswa kwalo ngamatshe akwanokusho nangezipo ezinhle ezethulwe kuNkulunkulu. UJesu wathi kubo:

⁶“Siyeza isikhathi lapho konke lokhu enikubonayo manje kuyobhidlizwa kudilizelwe phansi, kungasali nelilodwa itshe liqhwakele phezu kwelinye.”

Izibonakaliso nokuhlupheka

(Mat 24:3-14; Mark 13:3-13)

⁷Bambuze bathi: “Mfundisi! Kuyokwenzeka nini lokhu na? Sibonakaliso sini esiyokhomba isikhathi sokwenzeka kwalokhu na?”

⁸Waphendula wathi: “Qaphelani banganedukisi! Ngoba kuyovela abaningi abayoshaya sengathi bayimi bathi: ‘Nginguye uMesiya,’ babuye bathi: ‘Isikhathi sifikile!’ Nize ningabalandeli!

⁹Ningabi natwetwe lapho nizwa amahemuhemu ezimpi nezibhelu; kumele kwenzeke lokhu kuqala, kodwa-ke umhla wokuphela uyobe ungakafiki.”

¹⁰Waqhubeka wathi: “Izizwe ziyovukelana, nemibuso iphendukelane,

¹¹umhlaba uzamazame kakhulu, kubhoke indlala nobhubhane izindawo ngezindawo. Niyokhangela okwesabisayo nezibonakaliso ezinkulu zivela emkhathini.

¹²“Kodwa kungakenzeki konke lokhu bayonidumela banibophe, banizingele baniqulise amacala emasinagogeni, banigqume ejele. Niyokuma ezigcawini zamacala phambi kwamakhosi nababusi ngesizathu sokuthi ningabami.

- ¹³Lokhu sekuyoba yilona thuba lenu lokuba nifakaze ngami.
- ¹⁴Nize ningakhathazeki ngokuthi kazi niyoziphendulela nithini, nizindle ngakho singakafiki isikhathi.
- ¹⁵Ngoba mina ngiyonifunza amazwi ahlakaniphileyo bese kuthi bonke labo enibhekene nabo behluleke ukumelana nani baniphikise.
- ¹⁶Niyochilizelwa ezitheni ngisho nangabazali nabafowenu nezihlobo nabangane. Kuyobulawa abanye benu.
- ¹⁷Bayonizonda bonke ngoba ningabami.
- ¹⁸Kodwa aniyikuthola myocu .
- ¹⁹Uma niqinisela niyokuzuza ukuphila kwenu.

UJesu ubikezela ngokuchithwa kweJerusalema

(Mat 24:15-22; Mark 13:14-20)

- ²⁰“Kothi ningabona impi yabafo isilihaqile iJerusalema bese nazi ukuthi sesifikile isikhathi sokuchithwa kwalo.
- ²¹Ngalesosikhathi labo abakhe eJudiya mabaphephele ezintabeni, labo abangaphakathi eJerusalema baphume baphele kulo, labo abasemaphandleni bangabe besalubeka ngaphakathi.
- ²²Ngoba kuyobe sekuyizona nsuku zokujeziswa lezo, ukuba kugcwaliseke konke okulotshwe emibhalweni engcwele.
- ²³Ngiyazisa ngabakhulelweyo nabancelisayo ngalezonsuku! Kuyoba khona ukuhlupheka okukhulu emhlabeni, ulaka lukaNkulunkulu lwehlele phezu kwalesisizwe.
- ²⁴Abanye bayocekelwa phansi ngenkemba, abanye baye ekuthunjweni emazweni ngamazwe omhlaba. Abezizwe bayolishaya baliqothule iJerusalema lisale lingumbhidlika kuze kuphele isikhathi sabo sokulibusa.

Ukuza kweNdodana yesintu

(Mat 24:29-31; Mark 13:24-27)

- ²⁵“Kuyoba khona izibonakaliso elangeni nasenyangeni nasezinkanyezini. Izizwe zomhlaba ziyoba lusizi, kuphele nasozwanini ngenxa yokuhlokoma kolwandle namadlambi.
- ²⁶Abantu bayoqedwa uvalo, bankeme benetwetwe lalokho okuzokwehlela umhlaba; ngoba amabandla omkhathi wezulu ayozyanyanyiswa aphambuke emizileni yawo.
- ²⁷Sebeyoyibona-ke iNdodana yesintu iza ngefu, inamandla nenkazimulo enkulu.
- ²⁸Uma nibona sekuqala ukwenzeka konke lokhu, anophakama nime ngezinyawo niqunge isibindi, ngoba usuku lokuhlengwa kwenu selusondele.”

Isifundo esitholakala emkhiwaneni

(Mat 24:32-35; Mark 13:28-31)

²⁹Wabalandisa umzekeliso wathi: “Ake nibheke nanku umkhiwane kanye nazo zonke izihlahla!

³⁰Kuyaye kuthi lapho sekuhluma amaqabunga azo, bese niyazibonela nani ukuthi lethwese.

³¹Ngokunjalo-ke uma nibona lokhu kwenzeka, niyokwazi ukuthi umbuso kaNkulunkulu ususondele.

³²Ngiqinisile ngiyanitshela ngithi, lesisizukulwane asiyikudlula kungakenzeki konke lokhu.

³³Kuyodlula izulu nomhlaba, kodwa amazwi ami awasoze adlula.

Ukuqaphela kudingekile

³⁴“Qaphelani ningathatheki nitamase nidakwe nizikhathaze ngeminako yalokhukuphila, hleze lolosuku lunizume,

³⁵lunibambe njengogibe. Ngoba luyobabhabha bonke abantu bomhlaba.

³⁶Hlalani niqaphile nikhuleka, nicele amandla okuphunyula kukho konke lokhu okuyokwenzeka, nize nime phambi kweNdodana yesintu.”

³⁷Kwakuyaye kuthi emini afundise ethempelini kulezonsuku, kodwa kusihlwa ahambe aye egqumeni elithiwa yiNtaba yemiHlwathi ahlwelwe khona.

³⁸Bonke abantu babevuka ekuseni baye ethempelini ukuba bamuzwe efundisa.

ULuka 22

Icebo lokubulala uJesu

(Mat 26:1-5,14-16; Mark 14:1-2,10-11; Joh 11:45-53)

¹Kwase kusondele umkhosi wokudla isinkwa esingenamvubelo othiwa yiPhasika.

²Izikhulu zabaphristi kanye nezazimibhalo zazifuna amaqhinga okuthi uJesu zingamgudlukisa kanjani isinyenyela ngoba zazesaba abantu.

³USathane wayesengena kuJudasi okuthiwa nguSkariyotho owayebalwa nabayishumi nambili.

⁴UJudasi wasuka waya ezikhulwini zabaphristi nezinduna ezazengamele ogqayinyanga ethempelini, wafike wabhunga nazo ukuthi angamchilizela kanjani uJesu kuzo.

⁵Zajabula zafa, zamethembisa imali.

⁶Wavuma-ke uJudasi, wayesecuthela ithuba elingamlungela ukuba achilizele uJesu kuzo kungekho bantu abaningi.

Ukulungiselwa komkhosi wePhasika

(Mat 26:17-25; Mark 14:12-21; Joh 13:21-30)

⁷Lwafika-ke usuku olungaliyo lomkhosi wokudla isinkwa esingenamvubelo okuhlathwa ngalo iwundlu lePhasika.

⁸UJesu wathuma uPhetro noJohane wathi kubo: “Hambani nisilungisele ukuba sidle iwundlu lePhasika!”

⁹Bambuza bathi: “Ufuna sililungiselephi na?”

¹⁰Wayesethi: “Lalelani lapha! Nizothi nje nisangena emzini nihlangane nendoda ithwele imbiza yamanzi. Yilandeleni, niye lapho ingena khona,

¹¹nifike nithi kumninindlu: ‘UMfundisi uthe asofike simbuzele ukuthi kuphi lapho engadlela khona iwundlu lePhasika nabafundi bakhe na.’

¹²Useyonikhombisa indlu enkulu esihleliwe bese nilungisela kuyo.”

¹³Basuka-ke bafica kunjengoba ebeshilo; base belungisela iwundlu lePhasika.

Ukumiswa kwesidlo seNkosi

(Mat 26:26-30; Mark 14:22-26; 1 Khor 11:23-25)

¹⁴Safika-ke isikhathi, uJesu wahlala wadla iwundlu lePhasika nabaphostoli.

¹⁵Wathi kubo: “Bengikulangazelele kabi ukuba leliwundlu lePhasika ngilidle nani ngingakahlushwa.

¹⁶Ngithi kini, angisayukuphinde ngilidle kuze kufezeke inhloso yalo embusweni kaNkulunkulu.”

¹⁷Wathatha indebe yewayini, wabonga kuNkulunkulu, wathi kubo: “Thathani lokhu niphuzisane!

¹⁸Ngithi kini, kusukela manje angisayukuphinde ngikuphuze okwesithelo somvini kuze kufike isikhathi sombuso kaNkulunkulu.”

¹⁹Wasethatha isinkwa, wabonga kuNkulunkulu, wasihlephula wasinika abafundi wathi: “Lokhu kungumzimba wami [onikelwa ngenxa yenu. Kwenzeni lokhu ukuba ningikhumbule.”

²⁰Kanjalo futhi wathatha nendebe yewayini sebedlile, wabanika wathi: “Lendebe iyisivumelwano esisha sikaNkulunkulu esiqiniswa yigazi lami elichithelwa nina.]

²¹“Kodwa, lowo ozothengisa ngami nangu sidla sithebeni sinye naye!

²²INdodana yesintu izokwemuka ukwemuka impela njengoba uNkulunkulu anquma, kepha maye kulomuntu ozothengisa ngayo ezitheni!”

²³Base bebuzana ukuthi ngabe ngubani phakathi kwabo ongase enze into enjengaleyo.

Abafundi babanga ubukhulu

²⁴Kwasuka impikiswano kubafundi ukuthi ngabe ngubani phakathi kwabo okungathiwa mkhulu kunabanye.

²⁵Wathi kubo: “Lapha emhlabeni amakhosi ayaye abe namandla phezu kwabantu bawo, neziphathimandla zaziwa ngokuthi zingabasizi bomphakathi.

²⁶Akufanele kube njalo kini, kodwa omkhulu kini makabe njengomncane kunabo bonke, umbusi abe njengesisebenzi.

²⁷Ngubani omkhulu kunomunye, yilowo obheke ukuba aphakelwe noma yisisebenzi esimphekela ukudla na? Akuyena lowo obheke ukuba aphakelwe na? Kepha mina ngilapha phakathi kwenu ngiyisisebenzi.

²⁸“Nina-ke benilokhu ninami kubo bonke ubunzima bami.

²⁹Senginikeza amandla okubusa, njengalokhu noBaba wanginikeza lawamandla.

³⁰Embusweni wami niyodla niphuze esithebeni sami, nihlale ezihlalweni zobukhosi nahlulele izizwe eziyishumi nambili zabantu bakwaIsrayeli.

UJesu ubikezela ukuphika kukaPhetro

(Mat 26:31-35; Mark 14:27-31; Joh 13:36-38)

³¹“Simoni, lalela lapha Simoni! USathane usecele ilungelo lokuba anivivinye njengomlimi ehlunga amabele emakhobeni.

³²Nokho ngikunxusele ngacela ukuba ukukholwa kwakho kuvuthe kungacishi. Nawe-ke, lapho usuphendukile wakholwa, uze ukhuthaze abafowenu baqine!”

³³UPetro waphendula wathi: “Nkosi, sengikulungele ukuboshwa ngisho nokubulawa kanye nawe.”

³⁴UJesu wathi: “Lalela lapha Phetro! Iqhude lingakakhali ngalobubusuku banamuhla, uyobe usungiphike kathathu uthi awungazi.”

Isikhwama semali nesokwethekela, nezicathulo

³⁵Wayesethi kubo: “Kukhona yini enake nakweswela mhla nginithuma ngithi ningaphathi sikhwama semali nesokwethekela nazicathulo na? ” Baphendula bathi: “Qha, asiswelanga lutho.”

³⁶Wayesethi: “Kepha kwehlukile manje. Onesikhwama semali akasiphathe, ngokunjalo akangasishiyi nesokwethekela; lowo ongenankemba akathengise ngengubo yakhe athenge inkemba.

³⁷Ngoba ngithi kini, kumele kube njengoba kulotshiwe ngami embhalweni ongcwele ukuthi: ‘Wabalwa kanye nezelelesi.’ Impela, sekuyafezeka okwashiwo ngami.”

³⁸Base bethi: “Nkosi, nazi izinkemba ezimbili!” Waphendula wathi: “Kwanele.”

UJesu useNtabeni yemiHlwathi uyakhuleka

(Mat 26:36-46; Mark 14:32-42)

³⁹Waphuma emzini wemuka. Njengenhlayenza waya eNtabeni yemiHlwathi; abafundi bahamba naye.

⁴⁰Kwathi bangafika endaweni ayebabele kuyo, wathi kubo: “Khulekani ukuba ningehlelwa ukulingwa!”

⁴¹Wasuka kubo waqhela ibangana elingangomjikijelo wetshe, wafike waguqa wakhuleka.

⁴²Wathi: “Baba, uma uthanda, yisuse kimi lendebe yobunzima! Nokho, akungayi ngentando yami, kodwa kuye ngeyakho!”

[⁴³Wabona ingilosi ivela ezulwini yafike yammisa isibindi.

⁴⁴Wafikelwa ubuhlungu obukhulu obamzuka emoyeni, wazabalaza ngomkhuleko ejulile. Wajuluka kwaphuma izithukuthuku ezinjengamathonsi egazi, zaconsela emhlabathini.]

⁴⁵Waqeda ukukhuleka wasukuma wabuyela kubafundi. Wabafica bezumekile, bezukwe usizi.

⁴⁶Wafike wathi kubo: “Nilaleleni na? Vukani, nikhuleke ingaze nehlelwe ukulingwa.”

Ukukhashelwa nokuboshwa kuJesu

(Mat 26:47-56; Mark 14:43-50; Joh 18:3-11)

⁴⁷Kwathi engakaligwinyi kwatheleka isixuku sabantu siholwa nguJudasi, omunye wabayishumi nambili. Wasondela kuJesu ukuba amange.

⁴⁸Kepha uJesu wathi: “Judasi, kodwa impela uyayikhaphela ezitheni iNdodana yesintu ngokuyanga na?”

⁴⁹Laba ababenoJesu bakubona okwase kuzokwenzeka bathi: “Nkosi, sigadle yini ngenkemba na?”

⁵⁰Omunye wabo wagalela esisebenzini somphristi omkhulu, wasihhebhula indlebe yesokunene.

⁵¹Kepha uJesu wathi: “Yekani, sekwanele!” Wayesethinta indlebe yesisebenzi yaphola.

⁵²Wabhekisa kulabo ababezombopha, izikhulu zabaphristi nezinduna zogqayinyanga bethempeli nezigele, wathi kubo: “Bese ningaze niphume nihlome ngezinkemba namawisa sengathi ngingumphangi na?”

⁵³Benginani nsukuzasa ethempelini, kepha aningenzanga lutho. Nokho, yithuba lenu leli, sekubusa amandla obumnyama.”

UPhetro uphika uJesu

(Mat 26:57-58,69-75; Mark 14:53-54,66-72; Joh 18:12-18,25-27)

⁵⁴Babembopha njalo uJesu bamqhuba bamusa kwamphristi omkhulu; uPhetro walandela buqamama.

⁵⁵Babasa umlilo phakathi negceke, bahlala phansi bawungunga. UPhetro wahlala kanye nabo.

⁵⁶Intombazana esebenza kwamphristi omkhulu yambona ehlezi otha, yamuthi njo ngamehlo yathi: “Naye lo kade ehamba noJesu.”

⁵⁷Kodwa uPhetro waphika wathi: “Ntombazane, ngithi angimazi nakumazi! ”

⁵⁸Kwadolula isikhashana, enye indoda yambona uPhetro yathi: “Nawe ungomunye wabo! ” Kepha wayiphendula wathi: “Hhayi wena muntu, angisiye! ”

⁵⁹Kwadolula isikhathi esingangehora, enye indoda yaphikelela yathi: “Lomuntu ungowaseGalile! Impela, kade ehamba naye.”

⁶⁰Kepha wayiphendula wathi: “Hhayi wena ndoda, angikwazi lokho okushoyo bo! ” Kwathi esakhuluma nje, lakikiliga iqhude.

⁶¹INkosi uJesu yaphenduka yambheka uPhetro, wayesekhumbula amazwi eNkosi lapho ithi: “Iqhude lingakakhali ngalobubusuku banamuhla, uyobe usungiphike kathathu.”

⁶²Waphumela phandle wakhala ezimathonsi.

Ukubhinqwa nokushaywa kukaJesu

(Mat 26:67-68; Mark 14:65)

⁶³Amadoda ayelinde uJesu ahlekisa ngaye amdinda.

⁶⁴Ammboza amehlo athi kuye: “Ake usitshela ukuthi ushaywe ngubani! Ake ubholofide sizwe! ”

⁶⁵Basho nokunye okuningi bemhlambalaza.

UJesu uphambi komkhandlu

(Mat 26:59-66; Mark 14:55-64; Joh 18:19-24)

⁶⁶Kwathi sekusile kwabuthana izigele zamaJuda nezikhulu zabaphristi kanye nezazimibhalo, zayisa uJesu emkhandlwini wazo.

⁶⁷Zathi kuye: “Uma unguMesiya, kuhle usitshela! ” Waphendula wathi: “Uma nginitshela anisoze nakholwa;

⁶⁸uma nginibuza ngeke niphendule.

⁶⁹Kodwa kamuva iNdodana yesintu iyohlala ngakwesokunene sikaNkulunkulu uSomandla.”

⁷⁰Bambuza bonke bathi: “Ngabe usho ukuthi uyiNdodana kaNkulunkulu na? ” Wabaphendula wathi: “Kusho nina ukuthi ngiyiyo.”

⁷¹Base bethi: “Sisazobenzani ubufakazi, njengoba sesizizwele thina ekusho ngomlomo wakhe!”

ULuka 23

UJesu uphambi kukaPilatu

(Mat 27:1-2,11-14; Mark 15:1-5; Joh 18:28-38)

¹Kwasuka isixuku sonke, saqhuba uJesu samusa kuPilatu,

²safike samethwesa icala sathi: “Lomuntu simfice edukisa isizwe sakithi, ethi asingayitheli intela yengonyama yaseRoma, esho nokuthi unguMesiya, inkosi ezobusa.”

³UPilatu wambuza wathi: “Wena uyinkosi yamaJuda na?” Wamphendula wathi: “Nguwena okushoyo.”

⁴UPilatu wakhuluma ezikhulwini zabaphristi nakubantu wathi: “Angitholi cala kulomuntu.”

⁵Kepha baphikelela bathi: “Ngalemfundiso yakhe udala uthuthuva kulo lonke elaseJudiya, kusuka kwelaseGalile kuze kufike nalapha.”

UJesu uphambi kukaHerodi

⁶Kwathi angakuzwa lokho uPilatu wabuza ukuthi lomuntu ngabe ungowaseGalile na?

⁷Wezwa ukuthi uqhamuka esifundeni esiphethwe nguHerodi inkosi, wayesemthumela kuyo; phela ngalezonsuku nayo yayiseJerusalema.

⁸Yayikade ilokhu yafisa ukubona uJesu njengoba yayisizwe okuningi ngaye. Ngakhoke yajabula yafa lapho imbona. Phela yayithemba ukuthi izombona enza isimangaliso.

⁹Yambuza okuningi, kepha uJesu akayiphendulanga.

¹⁰Izikhulu zabaphristi kanye nezazimibhalo zema lapho, zibhokile zimethwesa amacala.

¹¹UHerodi wamjivaza wamenza inhlekisa ekanye namabutho akhe. Wamvunulisa ngengubo ekhazimulayo wambuyisela kuPilatu.

¹²Kwakukade kukhona ubutha phakathi kukaHerodi noPilatu, kodwa ngalolosuku bathelelana amanzi.

UJesu ugwetshwa ukuba abulawe

(Mat 27:15-26; Mark 15:6-15; Joh 18:39 - 19:16)

¹³UPilatu wabizela ndawonye izikhulu zabaphristi kanye nezigele nabantu,

¹⁴wathi kubo: “Lomuntu nimlethe lapha kimi nithi wedukisa abantu. Sengiliqulile icala lakhe phambi kwenu; angitholi cala kukho konke enimmangalela ngakho.

¹⁵NoHerodi imbala katholanga cala kuye, ngoba nangu usembuyisele kithi. Akenzanga lutho olufanele isigwebo sokufa.

¹⁶Ngakhoke uzobhaxabulwa bese ngimdedela.” [¹⁷Kwakunomkhuba owawumphoqa ukuba abakhululele isiboshwa sibe sinye njalo ngomkhosi wePhasika.]

¹⁸Uquqaba lonke lwabantu lwamemeza lwathi: “Akafe lo, usikhululele uBharabha!”

¹⁹UBharabha wayeyisiboshwa, egqunywe ejele ngenxa yezibhelu ezazenzeke emzini nangecala lokubulala.

²⁰UPilatu wayefuna ukumdedela uJesu, ngakhoke wabuye wakhuluma kubantu.

²¹Kepha babelokhu bememezile bethi: “Mbethele, mbethele esiphambanweni!”

²²UPilatu wabuza ngokwesithathu wathi: “Ngoba enze cala lini na? Angiboni cala elifanele isigwebo sokufa. Ngakhoke ngizombhaxabula adedelwe.”

²³Kepha babelokhu bememezile bethi uJesu akabethelwe; makhathaleni kwamehlula uPilatu ukumemeza kwabo.

²⁴Ngakhoke wakhapha isinqumo wathi akwenziwe lokho abakufunayo.

²⁵Wabakhululela umuntu ababemcelile owayegqunywe ejele ngenxa yezibhelu necala lokubulala, kodwa walahlela uJesu kubo ukuba kwenziwe kuye ukuthanda kwabo.

UJesu ubethelwa esiphambanweni

(Mat 27:32-44; Mark 15:21-32; Joh 19:17-27)

²⁶Amabutho athatha uJesu amuka naye. Kuthe esahamba, adumela umuntu othiwa nguSimoni waseSayirene, owayevela enkangala. Ametshathisa isiphambano walandela ngemuva kukaJesu.

²⁷UJesu walandelwa umshungu omkhulu, kukhona nabesifazane ababebalisa bemkhalela izinyembezi.

²⁸Waphenduka wababheka wathi: “Zintombi zaseJerusalema, musani ukungikhalela mina! Zikhaleleni nina nabantwana benu.

²⁹Ngoba iyeza imihla lapho kuyothiwa: ‘Ziyadela izinyumba nezisu ezingazalanga namabele angancelisanga!’

³⁰Bese bebiza izintaba bathi: ‘Dilikelani phezu kwethu! Nani magquma sigqibeni!’

³¹Ngoba uma benze nje esihlahleni esiseluhlaza, koba njani kwesomileyo na?”

³²Kwakukhona futhi izelelesi ezimbili ababeziqhuba ziyobulawa kanye naye.

³³Bafika endaweni okuthiwa kusoGebhezini lweKhanda, bambethela esiphambanweni. Kwabethelwa nezelelesi eziphambanweni, esinye singakwesokunene sakhe, esinye singakwesokhohlo.

[³⁴UJesu wathi: “Baba, bathethelele ngoba kabazi ukuthi benzani!”] Bahlukaniselana izingubo zakhe ngokwenza inkatho.

³⁵Kwakumi izixuku zibukela, kepha izigele zazimklolodela zithi: “Phela wasindisa abanye; akazisindise yena uma enguMesiya, okhethiweyo kaNkulunkulu!”

³⁶Nawo amabutho amenza inhlekisa. Aya kuye afike amnikeza iwayini elimuncu

³⁷athi: “Konje uthi uyinkosi yamaJuda! Zisindise phela!”

³⁸Ngenhla kwekhanda lakhe kwakuchonywe lombhalo: “Lo uyinkosi yamaJuda.”

³⁹Nesinye sezelelesi ezaziphanyekwe lapho samhlambalaza sathi: “Ingani wena unguMesiya phela! Zisindise ubuye usisindise nathi!”

⁴⁰Kodwa lesi esinye sase sisikhuza sithi: “Kanti wena awumesabi yini uNkulunkulu, yize noma unqunyelwe ukufa njengaye na?”

⁴¹Sisifanele thina lesisigwebo, ngoba sijezielwa izenzo zethu, kepha lona akenzanga lutho olubi.”

⁴²Sase sithi: “Jesu, uze ungikhumbule mhla uthatha ubukhosi embusweni wakho!”

⁴³UJesu wathi kuso: “Ngiyaqinisa impela, namhlanje uzoba nami ePharadisi.”

Ukufa kukaJesu

(Mat 27:45-56; Mark 15:33-41; Joh 19:28-30)

⁴⁴Kwakungezikhathi zaseminibebade. Kwahlwa, izwe lonke lambozwa yisigayegaye sobumnyama obakhasa phansi kwaze kwaba ntambama ngehora lesithathu,

⁴⁵ilanga lifiphele. Indwangu ehenqa ngaphakathi ethempelini yadabuka kabili.

⁴⁶UJesu wamemeza waqonga wathi: “Baba, nginikela umoya wami ezandleni zakho!” Wayalela maqede wafa.

⁴⁷Induna yamabutho yabona okwenzekayo, yadumisa uNkulunkulu yathi: “Ngempela lomuntu ubelungile!”

⁴⁸Zonke izixuku ezazibuthene lapho zizobukela lesisehlakalo, kwathi sezikubonile okwenzekayo zabuyela emakhaya, abantu behamba bekhwixwe imikhono bedabukile.

⁴⁹Bonke abangane bakhe kanye nabesifazane ababemlandele kusukela eGalile, babemele kude bebuka konke okwenzekayo.

Ukulondolozwa kwesidumbu sikaJesu egodini

(Mat 27:57-61; Mark 15:42-47; Joh 19:38-42)

- ⁵⁰Kukhona indoda eyayilungile iqotho ithiwa nguJosefa. Yabe iyisigele,
⁵¹kodwa kayivumelananga nesinqumo nokwenza komkhandlu. Yayakhe eArimathiya, umuzi waseJudiya. Yayilindele ukufika kombuso kaNkulunkulu.
⁵²Yaqonda kuPilatu yamcela isidumbu sikaJesu.
⁵³Yasethula esiphambanweni, yasithandela ngendwangu yelineni, yasilondoloza egodini elalingumhume ogunjwe etsheni; leligodi lalingakaze lilale sidumbu.
⁵⁴KwakungoLwesihlanu, sekuzoqala isabatha.
⁵⁵Abesifazane ababesuke noJesu eGalile balandela, bafike balibona ithuna nesidumbu sikaJesu sibekwa kulo.
⁵⁶Base bebuyela emakhaya, balungisa amakha nezigcobo ababezokwekhatha ngakho isidumbu. Baphumula ngesabatha njengoba kusho umthetho.

ULuka 24

Ukuvuka kukaJesu ekufeni (Mat 28:1-10; Mark 16:1-8; Joh 20:1-10)

- ¹Kwathi ngosuku olulandela isabatha, kuyiSonto kusantwela ezansi, abesifazane baya ethuneni bephethe amakha abase bewalungisile.
²Bafica itshe selingqiwe lasuka emnyango wethuna.
³Bangena, kepha kabasificanga isidumbu seNkosi uJesu.
⁴Kuthe besasambathekile ngalokhu, kwatheleka amadoda amabili embethe izingubo ezazimhlophe zixhopho amehlo, afike ema phambi kwabo.
⁵Bethuka kabi, bagebisa amakhanda babheka phansi; amadoda ayesethi kubo: “Nimfunelani ophilayo lapha kwabafileyo na?”
⁶Akekho lapha; uvukile. Khumbulani akusho kini eseseGalile,
⁷ukuthi iNdodana yesintu kumele inikelwe ezandleni zezoni, ibethelwe esiphambanweni, ivuke ngosuku lwesithathu.”
⁸Base bewakhumbula amazwi kaJesu.
⁹Babuya ethuneni, bafike babalandisa konke lokhu abayishumi nanye bebonke kanye nabanye.
¹⁰Abesifazane kwakungoMariya waseMagdala noJwana noMariya unina kaJakobe kanye nabanye besifazane ababenabo. Bakulandisa abaphostoli lokhu,
¹¹kepha lombiko kwaba sengathi uyimbude nje, kabaze bawukholwa.
[¹²Kodwa uPhetro wathathela ngejubane waya ethuneni; wafike walunguza, wabona izindwangu zelineni zodwa. Wabuyela ekhaya kusammangalisile lokhu okwakwenzekile.]

Abafundi ababili baya Emawusi

(Mark 16:12-13)

- ¹³Kwasuka abafundi ababili ngalo lolusuku balibhekisa emzaneni okuthiwa kusEmawusi, ongaba amakhilomitha ayishumi nanye kusuka eJerusalema.
- ¹⁴Babehamba bexoxa ngayo lendaba eyenzekile.
- ¹⁵Bathi besakhuluma bephendulana, uJesu wasondela wahambisana nabo.
- ¹⁶Bambona kodwa kwabacashela ukuthi ungubani.
- ¹⁷Wathi kubo: “Ndaba zini lezi enihamba nizikhuluma nibuzana ngazo na? ” Base bema, bebukeka bedabukile.
- ¹⁸Omunye wabo okuthiwa nguKlophase wabuza wathi: “Ungowokufika yini lapha eJerusalema? Kusho ukuthi nguwe wedwa kuphela ongazi lutho ngezinto ezenzeke lapha kulezizinsukwana ezidlule na? ”
- ¹⁹Wathi: “Zinto zini ezenzekile na? ” Bamphendula bathi: “Lezozinto ezenzeke kuJesu waseNazaretha. Ubengumphrofethi onamandla amakhulu awabonakalise ngezenzo nangamazwi phambi kukaNkulunkulu nakubantu bonke.
- ²⁰Izikhulu zabaphristi kanye nezigele zamaJuda zamdonsela esigcawini ukuba agwetshwe abulawe, wabethelwa esiphambanweni.
- ²¹Thina bese sethamba sithi nguye oyohlenga isizwe sakwaIsrayeli. Okunye futhi, sikhuluma nje sekudlule izinsuku ezintathu kwenzekile.
- ²²Naphezu kwalokho, abanye besifazane bakithi basethusile. Bavuke ekuseni baya ethuneni,
- ²³kepha kabaze basifika isidumbu sakhe. Babuya bafike bathi belamele ngisho nombono wezingilosi ezithe uyaphila udla amabele.
- ²⁴Abanye bethu esikanye nabo bayile ethuneni. Bafice nebala kunjengoba abesifazane besilandisile, kodwa yena uqobo lwakhe kabambonanga.”
- ²⁵Wathi kubo: “Hhawu, lezizithutha lezi! Nithatha kade ukukukholwa konke okwashiwo abaphrofethi!
- ²⁶Kanti bekungamele yini ukuba uMesiya ehlelwe yilokhukuhlupheka, abesengena enkazimulweni yobukhosi bakhe na? ”
- ²⁷Wabachazela kusukela ezincwadini zikaMose nemibhalo yonke yabaphrofethi, ekhomba konke okubikezelwe ngaye emibhalweni engcwele.
- ²⁸Base bekudebuduze nomzana ababeya kuwo. Washaya sengathi uyadlula,
- ²⁹kepha bamxina bathi: “Woza uhlale nathi! Nanti nelanga seliya ngonina, kuyahlwa.” Wangenisa kubo, wahlala nabo.

³⁰Kwathi sebezokudla wathatha isinkwa, wabonga kuNkulunkulu, wabahlephulela sona.

³¹Kwase kuthi dwe emehlweni abo, kwayima bembonayo; kodwa wanyamalala kubo.

³²Bakhuluma bodwa bathi: “Akukhudumalanga ezinhliziyweni kwamnandi yini endleleni lapho ekhuluma nathi esichazela imibhalo engcwele na?”

³³Basuka khona lapho, babuyela eJerusalema, bafica abafundi abayishumi nanye bebuthene kanye nabanye ababenabo,

³⁴bekhuluma bethi: “Impela, iNkosi ivukile, yazibonakalisa kuSimoni.”

³⁵Nalaba ababili base belandisa ngokwenzeke kubo endleleni, nokuthi babone ngokuhlephula kwayo isinkwa ukuthi kanti yiNkosi lena.

UJesu uzibonakalisa kubafundi bakhe

(Mat 28:16-20; Mark 16:14-18; Joh 20:19-23; ImiSeb 1:6-8)

³⁶Kwathi besalandisa ngalokho, yabonakala uqobo lwayo isimi phakathi kwabo, yababingelela yathi: “Ukuthula!”

³⁷Bethuka kwaphela nasozwanini, bethi babona umungcwini.

³⁸Kepha yathi kubo: “Nethuswa yini kangaka? Yini nifikelwe ukungabaza ezinhliziyweni zenu na?”

³⁹Bukani nazi izandla zami nezinyawo zami, ningibone kahle ukuthi yimi! Ngithinteni nizwe ukuthi yimina nginenyama namathambo, phela umungcwini awunakho lokhu!”

⁴⁰Yakusho lokhu qede yayisibakhombisa izandla nezinyawo zayo.

⁴¹Kepha kabakholwanga, kwaba sengathi bayaphupha ngenxa yokujabula kakhulu bemangele. Yayisibabuza ithi: “Ninakho yini okudliwayo na?”

⁴²Bayinika iqatha lenyama yenhlanzi echochobalisiweyo,

⁴³yalithatha yalidla bebuka.

⁴⁴Yathi kubo: “Yilokhu enganginitshela khona ngisenani, ukuthi kumele kufezeke konke okulotshwe ngami emthethweni kaMose nasemibhalweni yabaphrofethi nasencwadini yamaHubo.”

⁴⁵Yayisibakhanyisela, kwavuleka izingqondo zabo ukuba bakwazi ukuqonda imibhalo engcwele.

⁴⁶Yathi kubo: “Kulotshwe kuyo kwathiwa uMesiya uyohlushwa, avuke kwabafuleyo ngosuku lwesithathu,

⁴⁷nokuthi izizwe zonke kusukela eJerusalema zoshunyayezwa ukuphenduka nokuthethelelwa kwezono ngegama lakhe.

⁴⁸Nina ningofakazi balezizinto.

⁴⁹Niyabona, ngiyothumela kini lokho uBaba anethembise khona. Kepha anohlala lapha emzini nize namukeliswe amandla avela ezulwini.”

UJesu wenyukela ezulwini

(Mark 16:19-20; ImiSeb 1:9-11)

⁵⁰Waphuma nabo emzini wabahola baze bafika eBhethani, waphakamisa izandla wababusisa.

⁵¹Esababusisa wemuka kubo, wenyuselwa ezulwini.

⁵²Bakhothama bakhuleka kuye, base bebuyela eJerusalema bethokoza kakhulu.

⁵³Babelokhu besethempelini bedumisa uNkulunkulu.

UJohane

UJohane 1

Yena oyiZwi wazalwa waba ngumuntu

- ¹Ekuqaleni umhlaba ungakadalwa, lowo oyiZwi wayevele esekhona. Lowo oyiZwi wayekanye noMvelinqangi, lowo oyiZwi wayenguMvelinqangi.
- ²Yena lowo wayekhona ekuqaleni ekuMvelinqangi.
- ³Konke kwaba khona ngaye; akukho lutho olwadalwayo olungavelanga ngaye.
- ⁴Nguye owayengumthombo wokuphila; lokhukuphila kwalethe ukukhanya kubantu,
- ⁵ukukhanya okukhanya ebumnyameni, kungasoze kwahlulwa wubumnyama.
- ⁶UMvelinqangi wathumela isigijimi sakhe, umuntu okwakuthiwa nguJohane.
- ⁷Weza ezofakazela ukukhanya ukuba bonke bamuzwe bakholwe.
- ⁸Yena-ke wayengesikho ukukhanya, kepha weza ezofakazela ukukhanya.
- ⁹Wayeza lapha emhlabeni lowo ongukukhanya koqobo okukhanyisa isintu sonke.
- ¹⁰Wayekhona lapha emhlabeni, umhlaba wabe ukhona ngaye, kodwa wawungamazi ukuthi ungubani.
- ¹¹Weza kwelakubo, kodwa abakubo abamamukelanga.
- ¹²Kepha yilowo nalowo omamukelayo, labo abakholwa kuye bamethembe, wabapha bonke ilungelo lokuba ngabantwana bakaNkulunkulu.
- ¹³Laba bangabantwana bakaNkulunkulu, bengazelwe ngokwegazi nenyama noma ngokufisa kwemvelo yomuntu noma ngokuthanda kwendoda, kepha bezelwe nguNkulunkulu.
- ¹⁴Lowo oyiZwi wazalwa waba ngumuntu, wahlala phakathi kwethu egcwele umusa neqiniso. Sayibona inkazimulo yobukhosi bakhe, inkazimulo yozelwe yedwa ayeyiphiwe nguYise.
- ¹⁵UJohane wafakaza ngaye, wamemeza ngezwi elikhulu wathi: “Nguye ebengikhuluma ngaye ngithi: ‘Lowo ozayo emuva kwami mkhulu kunami kukho konke, ngoba wayekhona ngingakabi bikho.’”
- ¹⁶Egcwele umusa wasibusisa sonke, senzelwa umusa waze welakanyana.
- ¹⁷Umthetho sawunikwa ngoMose, umusa neqiniso kweza ngoJesu Kristu.
- ¹⁸Akakho oseke wabona uMvelinqangi; iNdodana yakhe ezelwe yodwa yasambulela ukuthi ungubani, uqobo lwayo inguMvelinqangi ihlezi eduze kukaYise.

Ubufakazi bukaJohane umbhabhadisi

(Mat 3:1-12; Mark 1:2-8; Luk 3:15-17)

- ¹⁹Umkhandlu wamaJuda eJerusalema wathumela abaphristi nabaLevi kuJohane umbhabhadisi ukuba bafike bambuze bathi: “Wena ungubani na? ” Kuthe uma bembuza wayesefakaza,
- ²⁰wachachisa ngokusobala wathi: “Angisiye uMesiya.”
- ²¹Bambuza bathi: “Kanti ungubani na? UnguElija na? ” Wabaphendula wathi: “Qha, angisiye.” Bambuza futhi bathi: “UnguMphrofethi na? ” Wathi: “Chabo! ”
- ²²Base bethi: “Sitshele-ke ukuthi ungubani! Kufanele sibuyisele impendulo kulabo abasithumileyo. Uthi ungubani na? ”
- ²³Wabaphendula wathi: “Ngiyilowo abikezela ngaye umphrofethi uIsaya wathi: “ ‘Kukhona ozwakala ememeza ehlane ethi: Hlelebani niqondise indlela yeNkosi! ’ ”
- ²⁴Abanye balabo ababethunyelwe kuJohane babengabafarisi.
- ²⁵Bafike bambuza bathi: “Uma ungesiye uMesiya noma uElija noma uMphrofethi, pho ubhabhadiselani na? ”
- ²⁶UJohane wabaphendula wathi: “Mina ngibhabhadisa ngamanzi, kodwa kukhona omi phakathi kwenu eningamazi ukuthi ungubani.
- ²⁷Uyeza emuva kwami, kodwa angifanele ngisho nokuthukulula imichilo yezicathulo zakhe.”
- ²⁸Konke lokhu kwenzeka eBhethani ngaphesheya komfula iJordani, lapho uJohane wayebhabhadisa khona.

IWundlu likaMvelinqangi

- ²⁹Ngakusasa uJohane wabona uJesu eza kuye, wayesethi: “Nanti iWundlu likaMvelinqangi elisusa izono zomhlaba!
- ³⁰Linguye engangikhuluma ngaye ngithi: ‘Emuva kwami kuza umuntu omkhulu kunami, ngoba wayekhona ngingakabi bikho.’
- ³¹Ngangingamazi ukuthi ungubani, kodwa mina ngafika nganibhabhadisa ngamanzi ukuze yena aziwe kubantu bakwaIsrayeli.”
- ³²UJohane wafakaza wathi: “Ngawubona uMoya oyiNgcwele usajuba ngesimo wehla ezulwini, wafike wahlala phezu kwakhe.
- ³³Ngangingazi ukuthi nguyelowo, kodwa uNkulunkulu owangithumayo ukuba ngibhabhadise ngamanzi wathi kimi: ‘Lowo oyombona kwehlela kuye uMoya oyiNgcwele uhlale phezu kwakhe, nguyelowo obhabhadisa ngoMoya oyiNgcwele.’
- ³⁴Mina ngakubona kwenzeka, sengiyafakaza ngithi, lo uyiNdodana kaNkulunkulu.”

Abafundi bokuqala bakaJesu

- ³⁵Ngangomuso uJohane wayemi kuleyondawo nabafundi bakhe ababili.
- ³⁶Wabona uJesu edlula, wathi: “Nanti iWundlu likaMvelinqangi!”
- ³⁷Abafundi ababili bathi uma bemuzwa ekusho lokhu base belandela uJesu.
- ³⁸UJesu waphenduka wababona bemlandela, wababuza wathi: “Nifunani na? ” Bathi: “Rabi (okusho ukuthi Mfundisi), uhlalaphi na? ”
- ³⁹Waphendula wathi: “Wozani nibone! ” Lase limathunzi. Bahamba noJesu bafike babona lapho ehlala khona, base behlala naye ngalolusuku.
- ⁴⁰UAndreya umfowabo kaSimoni Phetro wayengomunye walabo ababili abalandela uJesu sebewezwile amazwi kaJohane.
- ⁴¹UAndreya waqala wabona umfowabo uSimoni, wathi kuye: “Simtholile uMesiya” (leligama lithi nguKristu).
- ⁴²Wathatha uSimoni wamusa kuJesu. UJesu wambuka maqede wathi: “Igama lakho unguSimoni kaJohane; usuzobizwa ngokuthi nguKhefase” (okusho ukuthi nguPhetro).

UJesu ubiza uFiliphu noNathaniyeli

- ⁴³Ngakusasa uJesu wanquma ukuya eGalile. Wafica uFiliphu, wathi kuye: “Woza ungilandele!”
- ⁴⁴UFiliphu wayengowaseBhetsayida, umuzi okwakuhlala kuwo uAndreya noPhetro.
- ⁴⁵UFiliphu wathola uNathaniyeli, wathi kuye: “Simtholile lowo uMose aloba ngaye emthethweni, ngisho nabaphrofethi imbala. NguJesu waseNazaretha, indodana kaJosefa.”
- ⁴⁶UNathaniyeli wabuza wathi: “Kukhona yini okuhle okungavela eNazaretha na? ” UFiliphu wathi: “Woza uzibonele!”
- ⁴⁷Kuthe uJesu angabona uNathaniyeli eza, wakhuluma ngaye wathi: “Nangu umIrayeli woqobo ongenankohliso!”
- ⁴⁸UNathaniyeli wambuza wathi: “Ungazelaphi na? ” Wamphendula wathi: “Ngikubonile uhlezi ngaphansi komkhiwane uFiliphu engakakubizi.”
- ⁴⁹UNathaniyeli wathi: “Rabi, wena uyiNdodana kaNkulunkulu! UyiNkosi, iNgonyama yakwaIrayeli!”
- ⁵⁰UJesu wathi kuye: “Ngabe usuyakholwa njalo ngoba nje ngithe ngikubonile uhlezi ngaphansi komkhiwane na? Usazobona okukhulu kunalokhu.”
- ⁵¹Waqhubeka wathi: “Ngियाqinisa impela ngithi, niyobona izulu livulekile, izingilosu zikaNkulunkulu zehla zenyuka phezu kweNdodana yesintu.”

UJohane 2

Udwendwe lwaseKhana

- ¹Ngosuku lwesithathu kwasina udwendwe emzini waseKhana kwelaseGalile. Kwakukhona nonina kaJesu.
- ²NoJesu nabafundi bakhe babemenyiwe.
- ³Kwaphela iwayini, unina wathi kuye: “Kabasenalw iwayini.”
- ⁴UJesu waphendula wathi: “Anginakutshelwa uwena mame. Ithuba lami alikazilethi.”
- ⁵Unina wathi ezincekwini: “Yenzani noma yini anitshela yona!”
- ⁶AmaJuda anesiko eliphathelene nokuhlamba izandla. Ngakhoke kwakubekwe lapho izimbiza zamanzi eziyisithupha. Zazakhiwe ngetshe, iyinye yayingagcwala amalitha abalelwa ekhulwini.
- ⁷UJesu wathi ezincekwini: “Gcwalisani lezizimbiza ngamanzi! ” Izinceku zazigcwalisa zakhuza phezulu.
- ⁸Wayesethi kuzo: “Ake nicakulele usigozolo!” Zamcakulela,
- ⁹wafike wawathi qhabu. Amanzi manje ayesehenduke iwayini. Wayengazi ukuthi leliwayini livelephi, kodwa izinceku ezazimcakulele amanzi zazazi. Wayesebiza umyeni wathi kuye:
- ¹⁰“Wonke umuntu uyaye akhiphe iwayini elimnandi kuqala, bese kuthi uma abantu sebephuze badela, alandelise ngelinye elingemnandi kangako, kepha wena usagodle iwayini elimnandi kuze kube manje.”
- ¹¹UJesu wenza lesisimangaliso sakhe sokuqala eKhana kwelaseGalile, wabukhombisa ngalendlela ubukhosi bakhe, abafundi base bekhulwa kuye.
- ¹²Emuva kwalokhu waya nonina nabafowabo nabafundi eKhaphenawume, bafike bahlala izinsuku ezimbalwa.

Ukuhlanzwa kwethempeli

(Mat 21:12-13; Mark 11:15-17; Luk 19:45-46)

- ¹³Kwasondela iPhasika umkhosi wamaJuda, uJesu wenyukela eJerusalema.
- ¹⁴Wafica abantu bethengisa ngezinkomo nezimvu namajuba ethempelini, abanye behlezi beshintshela abantu imali.
- ¹⁵Wayesephotha isibhaxu ngezintambo wabakhipha bonke ethempelini, kanye nezimvu nezinkomo. Wasakaza imali yalabo ababeshintshela abantu, wagumbuqela amatafula abo.
- ¹⁶Kulaba ababethengisa ngamajuba wathi: “Kususeni lokhu lapha! Musani ukwenza indlu kaBaba indawo yokuthengisela!”
- ¹⁷Abafundi base bekhumbula okulotshwe embhalweni ongcwele ukuthi: “Ukushisekela indlu yakho kuyongizuka.”

¹⁸Izikhulu zamaJuda zase zimbuza zithi: “Sibonakaliso sini okhombisa ngaso igunya lokwenza lokhu?”

¹⁹UJesu waphendula wathi: “Dilizani lelithempeli, ngizolivusa ngezinsuku ezintathu.”

²⁰AmaJuda ambuza athi: “Uthi uzobuye ulakhe ngezinsuku ezintathu lelithempeli elakhiwa iminyaka engamashumi amane nesithupha na?”

²¹Kepha uJesu wayeqonde ithempeli elingumzimba wakhe.

²²Kuthe lapho esevusiwe kwabafileyo, abafundi bakhe bakhumbula ukuthi wakusho lokhu. Base bekholwa umbhalo ongcwele nalokho uJesu ayekushilo.

UJesu wazi ubunjani bomuntu

²³Kuthe eseJerusalema emkhosini wePhasika, baningi abantu abakholwa kuye nxashane bebona izimangaliso azenzayo.

²⁴Kodwa uJesu akazange abhobokelane nabo, ngoba wayebazi bonke nobunjani babo.

²⁵Kwakungadingekile ukuba atshelwe ngabo, ngoba wayezazela okusenhliziyweni yomuntu.

UJohane 3

UJesu noNikodima

¹Kwakukhona isigele samaJuda okwakuthiwa nguNikodima. Sasingomunye wabeqembu labafarisi.

²Saya kuJesu ebusuku, safike sathi: “Rabi, siyazi ukuthi ungumfundisi othunywe nguNkulunkulu, ngoba akakho ogila lezizimanga ozenzayo uma uNkulunkulu engenaye.”

³UJesu waphendula wathi: “Lalela lapha ngikutshele! Uma umuntu engazelwe kabusha ngeke awubone umbuso kaNkulunkulu.”

⁴UNikodima wabuza wathi: “Umuntu angabuye azalwe kanjani esemdala na? Akakwazi neze ukubuye angene esiswini sikanina aphinde azalwe ngokwesibili.”

⁵UJesu waphendula wathi: “Ngiqinisile uma ngithi kuwe, akakho ongangena embusweni kaNkulunkulu ngaphandle kokuba azalwe ngamanzi nangoMoya oyiNgcwele.

⁶Ngokwemvelo umuntu uzalwa enesono, nguMoya oyiNgcwele omzala ngokomoya.

⁷Ungamangali uma ngithi kumele nizalwe nonke kabusha!

⁸Umoya uvunguza uye lapho uthanda ukuya khona. Uyawuzwa umsindo wawo, kodwa awuwazi umoya lapho uqhamuka khona nalapho uqonde khona. Kunjalo kulowo nalowo ozelwe ngoMoya oyiNgcwele.”

⁹UNikodima wathi: “Kungenzeka kanjani lokhu na?”

¹⁰UJesu wathi kuye: “Usho ukuthi awukwazi lokhu, wena ongumfundisi owaziwayo kwaIsrayeli na?”

¹¹Ngiyakutshela ngithi, ngempela sikhuluma ngesikwaziyo, sifakaze ngalokho esikubonileyo, kodwa anivumi ukwamukela ubufakazi bethu.

¹²Uma nginitshela ngezinto zalapha emhlabeni kodwa nenqabe ukukholwa, pho niyokholwa kanjani uma nginitshela ngezindaba zasezulwini na?

¹³Phela akakho noyedwa walapha emhlabeni oseke wenyukela ezulwini, ngaphandle kwalowo owehla ezulwini, iNdodana yesintu.

¹⁴“UMose waphakamisa inyoka ebunjwe ngethusi, wayichoma othungweni ehlane; kanjalo neNdodana yesintu kumele iphakanyiswe,

¹⁵ukuze kuthi lowo nalowo okholwa kuyo athole ukuphila okuphakade.

¹⁶UNkulunkulu wawuthanda umhlaba waze wanikela ngeNdodana yakhe ezelwe yodwa, ukuba yilowo nalowo okholwa kuyo angabhubhi kodwa athole ukuphila okuphakade.

¹⁷UNkulunkulu akayithumelanga iNdodana yakhe emhlabeni ukuba izolahla umhlaba ngecala kodwa ukuba umhlaba usindiswe ngayo.

¹⁸“Okholwa kuyo akalahlwa, kodwa ongakholwayo uselahliwe, ngoba engakholwanga eNdodaneni kaNkulunkulu ezelwe yodwa.

¹⁹Ukulahlwa ngecala kuhamba kanje: Ukukhanya kwafika emhlabeni, kodwa abantu baqoka ubumnyama kunokukhanya ngoba imisebenzi yabo imibi.

²⁰Yilowo nalowo owenza ububi uzonda ukukhanya. Ngeke aye ekukhanyeni, ngoba akafuni ukuba imisebenzi yakhe idalulwe.

²¹Kepha lowo olandela iqiniso uya ekukhanyeni, ukuze kubonakale ngokusobala ukuthi akwenzayo ukwenza esebunyeni noNkulunkulu.”

UJesu noJohane umbhabhadisi

²²Emuva kwalokhu uJesu nabafundi bakhe baya ezweni laseJudiya, wafike wahlala nabo isikhathi ebhabhadisa.

²³UJohane naye wayebhabhadisa Enoni eduze naseSalimi, ngoba kuleyondawo kwakunamanzi amaningi. Abantu babeya kuye ababhabhadise.

²⁴Lokhu kwenzeka uJohane engakagqunywa ejele.

²⁵Kwaba khona impikiswano phakathi komJuda othile nabafundi bakaJohane mayelana nokuhlanjululwa.

²⁶Baya kuJohane bathi kuye: “Rabi, lona owafakaza ngaye, owayekanye nawe phesheya komfula iJordan, uyabhabhadisa. Sebeye kuye bonke abantu.”

²⁷UJohane waphendula wathi: “Umuntu angemukele lutho engaluphiwe nguNkulunkulu.

²⁸Nina ngokwenu ningangifakazela ukuthi ngathi: ‘Angisiye uMesiya mina, kodwa ngiyisigijimi esithunywe ngaphambi kwakhe.’

²⁹Umyeni yilowo osuke esenomlobokazi; kodwa lowo osuke emise umyeni engumngane wakhe uyaye ajabule nokujabula uma ezwa izwi lomyeni. Ngakhoke ukuthokoza kwami kuphelele manje.

³⁰Kufanele udumo lwakhe lwande, olwami lunciphe.

Lowo ovela phezulu ezulwini

³¹“Lowo ovela phezulu mkhulu ngaphezu kwakho konke, kanti lowo ovela emhlabeni ungumuntu womhlaba, ukhuluma ngezinto zalomhlaba. Lowo ovela ezulwini mkhulu ngaphezu kwakho konke.

³²Ufakaza ngakubonileyo nakuzwayo, kodwa akakho owemukela ubufakazi bakhe.

³³Owemukela ubufakazi bakhe uyakusekela ukuthi uNkulunkulu uqinisile.

³⁴Lowo othunywe nguNkulunkulu ukhuluma amazwi kaNkulunkulu, ngoba uNkulunkulu umuphe ngokuphelele uMoya oyiNgcwele engagodli lutho.

³⁵UYise uyayithanda iNdodana yakhe, ukwethule konke ezandleni zayo.

³⁶Okholwa eNdodaneni uyophila phakade, kepha lowo ongayikholwa iNdodana ngeke akubone ukuphila okuphakade, kodwa uNkulunkulu uyobelokhu emthukuthelele.”

UJohane 4

UJesu nowesifazane waseSamariya

¹Abafarisi bezwa ukuthi uJesu uzuza abhabhadise abafundi abaningi kunabakaJohane umbhabhadisi.

(²Empeleni uJesu uqobo lwakhe wayengabhabhadisi muntu, kwakubhabhadisa abafundi bakhe.)

³Ngakhoke kwathi uJesu angakuzwa lokhu, wemuka eJudiya wabuyela eGalile.

⁴Indlela eya lapho yayidabula ezweni laseSamariya.

⁵Wafika kwelaseSamariya emzini othiwa yiSikhari. Kwakungekude naleyonsimu uJakobe ayipha indodana yakhe uJosefa.

- ⁶Kulensimu kwakukhona umthombo kaJakobe. UJesu wayesekhathele yindlela, wafike wahlala emthonjeni. Kwakuseminibebade.
- ⁷Kwafika owesifazane womSamariya ezokukha amanzi. UJesu wathi kuye: “Ake ungikhelele ngiphuze!”
- ⁸Phela abafundi bakhe babesaye emzini beyothenga ukudla.
- ⁹Owesifazane waseSamariya waphendula wathi: “Wena ungumJuda ungasho kanjani kimi uthi angikuphuzise ngingumSamariya na?” (Phela amaJuda kawadlalani namaSamariya.)
- ¹⁰UJesu waphendula wathi: “Ukuba ubusazi isipho sikaNkulunkulu nokuthi ngubani ocela ukuba umphuzise, ngabe ucela kuye, abesekupha amanzi aqabulayo anempilo.”
- ¹¹Owesifazane wathi kuye: “Nkosi yami, kawuphethe sitsha sokukha, kanti-ke futhi umthombo ujulile. Pho uzowakhaphi lawamanzi aqabulayo na?”
- ¹²Usho ukuthi wena umkhulu kunokhokho uJakobe na? Nguye owasipha lomthombo. Waphuza kuwo yena kanye namadodana akhe nemihlambi yakhe.”
- ¹³UJesu wamphendula wathi: “Yilowo nalowo ophuza lawamanzi uyophinde ome.
- ¹⁴Kepha ophuza lamanzi engimupha wona akasoze aphinde ome. Amanzi engimupha wona ayoba yisiphethu ngaphakathi kuye esiphuphuma amanzi aletha ukuphila okuphakade.”
- ¹⁵Owesifazane wathi: “Nkosi yami, ngiphe lawamanzi ukuba ngingaphinde ngome, ngingabe ngiseza lapha ngizokukha amanzi!”
- ¹⁶UJesu wathi kuye: “Hamba ubize umyeni wakho uze naye lapha!”
- ¹⁷Waphendula owesifazane wathi: “Anginandoda.” UJesu wathi kuye: “Usho ngakhona uma uthi awunandoda.
- ¹⁸Sewake waba namadoda ayisihlanu, nalena onayo manje kakusiyo eyakho. Ngakhoke uqinisile.”
- ¹⁹Owesifazane wathi: “Nkosi yami, sengiyabona ukuthi ungumphrofethi wena.
- ²⁰Okhokho bethu thina maSamariya babekhonza uNkulunkulu kulentaba, kepha nina maJuda nithi kuseJerusalema lapho kufanele simkhonze khona.”
- ²¹UJesu wathi kuye: “Ngikholwe engikushoyo! Siyeza isikhathi lapho ningayikumkhonza uBaba kulentaba ngisho naseJerusalema.
- ²²Nina maSamariya niyakhonza kodwa nibe ningazi ukuthi nikhonzani. Kepha thina maJuda siyazi ukuthi yini esiyikhonzayo. Ngoba insindiso ivela emaJudeni.

- ²³Nokho isikhathi siyeza, impela sesifikile, lapho kuyothi labo abakhonza uBaba ngokweqiniso bamkhonze ngoMoya nangeqiniso ngoba uBaba ufuna bona abamkhonza kanjalo.
- ²⁴UMvelinqangi unguMoya, ngakhoke abamkhonzayo abamkhonze ngoMoya nangeqiniso.”
- ²⁵Owesifazane wathi kuye: “Ngiyazi ukuthi uyeza uMesiya okuthiwa unguKristu. Uyofika asitshela konke.”
- ²⁶UJesu wathi kuye: “Nginguye, mina lo engikhuluma nawe.”
- ²⁷Ngaleyonkathi abafundi bakhe babuya, bafike bamangala nxa bemfica ekhuluma nowesifazane. Kepha akakho noyedwa wabo owabuza kowesifazane ukuthi ufunani noma abuze kuJesu athi: “Ukhulumelani naye na?”
- ²⁸Owesifazane washiya imbiza yakhe yamanzi, waya emzini wafike wathi kubantu:
- ²⁹“Ake nizobona umuntu ongitshela konke esengake ngakwenza! Nithi ngabe unguMesiya na?”
- ³⁰Base besuka emzini baya kuJesu.
- ³¹Ngesikhathi esahambile owesifazane, abafundi bancenga uJesu bathi: “Rabi, sicela ukuba udle!”
- ³²Kodwa wathi: “Mina nginokudla engikudlayo nina eningazi lutho ngakho.”
- ³³Abafundi base bebuzana bodwa bethi: “Ngabe ukhona yini omlethele ukudla na?”
- ³⁴UJesu wathi kubo: “Ukudla kwami kungukwenza intando kaBaba ongithumileyo, ngifeze umsebenzi anginike wona.
- ³⁵“Ninesisho esithi: ‘Kusasele izinyanga ezine bese kuvunwa.’ Lalelani lapha nginitshela! Yenyusani amehlo nibheke emasimini! Asemhlophe, ukudla sekuvuthiwe kulungele ukuvunwa.
- ³⁶Umuntu ovunayo wemukela umvuzo wakhe, abuthe izithelo zokuphila okuphakade. Ngakhoke umhlwanyeli nomvuni bayojabula bobabili.
- ³⁷Siqinisile isisho esithi: ‘Omunye uyahlwanyela, omunye avune.’
- ³⁸Mina nginithumele ukuba nivune lapho ningalimanga khona. Kwalima abanye, nina nathola umvuzo ngomsebenzi wabo.”
- ³⁹Maningi amaSamariya alowomuzi akholwa kuJesu ngoba owesifazane wayekhulume ngaye wathi: “Ungitshela konke engake ngakwenza.”
- ⁴⁰Kwathi ukuba amaSamariya afike kuJesu, amncenga ukuba ahlale nawo. Wahlala nawo izinsuku ezimbili.

⁴¹Bakholwa baba baningi kabi lapho bemuzwa eshumayela.

⁴²Base bethi kowesifazane: “Kasisakholwa ngoba sizwe wena usilandisa. Sesizizwele ngokwethu, siyazi ukuthi impela ungumsindisi womhlaba.”

UJesu uphilisa indodana yenduna

⁴³Emuva kwalezonsuku ezimbili uJesu wasuka lapho, waya eGalile.

⁴⁴Ngoba wayelikhiphe yena uqobo wathi: “Umphrofethi akadunyiswa kwelakubo.”

⁴⁵Kuthe uma efika eGalile, abantu bakhona bamemukela kahle, njengoba babebone konke ayekwenza eJerusalema ngomkhosi wePhasika; phela nabo babeyile lapho.

⁴⁶UJesu waya eKhana kwelaseGalile, lapho ayekade eguqule khona amanzi abaywayini. Emzini waseKhaphenawume kwakukhona induna yenkosi eyayigulelwa yindodana yayo.

⁴⁷Kuthe ukuba izwe ukuthi uJesu usefikile kwelaseGalile evela kwelaseJudiya, yaya kuye. Yafike yamncenga ukuba ehlele eKhaphenawume afike aphilise indodana yayo ngoba kwase kubonwa kusile.

⁴⁸UJesu wathi enduneni: “Anifuni ukukholwa nina uma ningaboni zibonakaliso nezimangaliso kuqala.”

⁴⁹Induna yaphendula yathi: “Nkosi, phuthuma wehle angaze afe umntanami!”

⁵⁰UJesu wathi kuyo: “Goduka! Indodana yakho iphilile.” Lomuntu walikholwa izwi elashiwo nguJesu, wahamba.

⁵¹Kuthe esesendleleni ehla, izinceku zamhlangabeza zathi: “Umntanakho uyaphila.”

⁵²Wabuza izinceku ukuthi bekungasikhathi sini lapho umntanakhe eqala ukululama. Zaphendula zathi: “Umkhuhlane umyeke izolo ngemuva nje kweminibebade.”

⁵³Uyise wayesekhumbula ukuthi bekungalesosikhathi lapho uJesu ethi kuye: “Indodana yakho iphilile.” Wakholwa nomuzi wakhe.

⁵⁴Kwase kuyisimangaliso sesibili lesi uJesu esenza emveni kokuba esefikile eGalile evela eJudiya.

UJohane 5

UJesu uphilisa isiguli eBethesda

¹Emuva kwalokho kwagidwa umkhosi wamaJuda eJerusalema, uJesu waya kuwo.

²EJerusalema kunechibi eduze kweSango leziMvu. Lizungelezwe yimihubhe eyisihlanu yokuphumula. Lelichibi ngesiHebheru lithiwa yiBethesda.

- ³Kwakuyaye kulale abantu abaningi kulemihubhe, izimpumpethe nezinyonga nabafe uhlangothi. [Babelindele ukuzanyazanyiswa kwechibi.]
- ⁴Kwakudamane kwehla ingilosi yeNkosi, ifike iphehle amanzi echibi, bese kuthi lowo ongene kuqala emuva kokuphehlwa kwawo, asinde esifweni esimphehthayo, noma ngabe kuyisifo sini.]
- ⁵Kwakukhona umuntu lapho owayesegule iminyaka engamashumi amathathu nesishiyagalombili.
- ⁶UJesu wabona lendoda ilele lapho, eyazi ukuthi isinesikhathi eside yagula, wathi kuyo: “Uyathanda ukusinda na?”
- ⁷Yamphendula yathi: “Nkosi, anginamuntu lapha ongangisiza angifake echibini, nxa sekuphehlwa amanzi alo. Nxa ngizama ukungena, kusuka omunye angene kuqala kunami.”
- ⁸UJesu wathi kuyo: “Sukuma uthathe ucansi lwakho uhambe!”
- ⁹Indoda yasinda khona lapho, yathatha ucansi lwayo yazihambela. Kwenzeka lokhu mhla wesabatha.
- ¹⁰Izikhulu zamaJuda zase zithi kulomuntu ophilisiweyo: “Namuhla yisabatha, akumthetho ukuba uthwale ucansi.”
- ¹¹Waphendula wathi: “Lomuntu ongiphilisayo uthe angithathe ucansi lwami ngihambe.”
- ¹²Bambuza bathi: “Ngubani lomuntu okutshela ukuba uthathe ucansi lwakho uhambe na?”
- ¹³Kodwa lendoda eyayiphilisiwe yayingazi ukuthi ngubani. Kwakukhona izihlwele zabantu kuleyondawo; ngakhoke uJesu wayeseyedukele.
- ¹⁴Kamuva uJesu wayifika isethempelini, wathi kuyo: “Usindile manje! Ungabe usona funa wehlelwe ngokubi kunalokhu!”
- ¹⁵Indoda yahamba yatshela izikhulu zamaJuda ukuthi nguJesu oyiphilisiwe.
- ¹⁶AmaJuda ayeseqala ukumzingela uJesu ngoba nje ephilise kuyisabatha.
- ¹⁷UJesu wathi kuwo: “UBaba usaqhubeka namanje nomsebenzi wakhe, nami-ke ngiyasebenza.”
- ¹⁸Kuthe angasho njalo, izikhulu zamaJuda kwayima zifikelwa yisithukuthezi sokumbulala, kungekuphela ngoba echitha umthetho wesabatha, kodwa ngoba ebuye wathi uyiNdodana kaNkulunkulu, ngalendlela ezenza olingana noNkulunkulu.

Igunya leNdodana kaNkulunkulu

- ¹⁹UJesu wakhuluma emaJudeni wathi: “Lalelani lapha nginitshele! INdodana ayikwazi ukwenza lutho ngokwayo, yenza lokho kuphela ebona kwenziwa nguYise.
- ²⁰Phela uYise uyayithanda iNdodana, uyibonisa konke akwenzayo. Woyibonisa ngisho nemisebenzi emikhulu kunale, nimangale.
- ²¹UYise uvusa abafileyo abaphe ukuphila, kanjalo neNdodana ibapha ukuphila labo ethanda ukubapha khona.
- ²²UYise akahluleli muntu kodwa unike iNdodana igunya lokuba yahlulele,
- ²³ukuze bonke bahloniphe iNdodana njengoba behlonipha uYise. Ongayihloniphi iNdodana kamhloniphi noYise oyithumileyo.
- ²⁴“Niyabona! Impela lowo ozwa engikushoyo akholwe kongithumileyo, ukuphila okuphakade unakho. Akayikwahlulelwa, kodwa usephumile ekufeni wadlulela ekuphileni.
- ²⁵Ngqiqinisile ngiyanitshela ngithi, isikhathi siyeza, impela sesifikile, lapho abafileyo beyozwa iphimbo leNdodana kaNkulunkulu, nalabo abalizwayo bathole ukuphila.
- ²⁶UYise uqobo ungumthombo wokuphila, kanjalo neNdodana yakhe uyenze yaba ngumthombo wokuphila.
- ²⁷Wayinika negunya lokwahlulela, ngoba iyiNdodana yesintu.
- ²⁸Kunganimangalisi lokhu; isikhathi siyeza lapho bonke abaleleyo emathuneni bayolizwa iphimbo layo,
- ²⁹bavuke baphume kuwo. Labo abenze okulungileyo bayovuka baphile ungunaphakade, nalabo abenze ububi nabo bayovuka balahlwe.

Ubufakazi ngoJesu

- ³⁰“Mina ngeke ngenze lutho ngokwami, kodwa ngehlulela njengalokho engikutshelwa nguBaba. Ngehlulela ngokulunga, ngoba angenzi intando yami kepha ngenza intando kaBaba ongithumileyo.
- ³¹“Uma ngifakaza ngizithetha, ubufakazi bami abuqinisile.
- ³²Kodwa kukhona omunye ongifakazelayo, ngiyazi ukuthi lokho akufakaza ngami kuyiqiniso.
- ³³Nina nathumela kuJohane umbhabhadisi, wayeselifakazela iqiniso.
- ³⁴Angigabe ngabufakazi bamuntu; lokhu ngikusho ukuze nisindiswe.
- ³⁵UJohane singamfanisa nesibani esivuthayo nesikhanyisayo. Nina nanithanda ukuzijabulisa ngokukhanya kwaso okwesikhashana nje.

- ³⁶Kodwa kukhona okunye okungifakazelayo ngobufakazi obudlula obukaJohane. Yimisebenzi leyo engiyabelwe nguBaba ukuba ngiyifeze. Lemisebenzi engiyenzayo iyangifakazela ukuthi ngithunywe nguBaba.
- ³⁷NoBaba ongithumileyo ungifakazele. Anizange nilizwe iphimbo lakhe, nibone nesiqu sakhe.
- ³⁸Izwi lakhe alihlali ezinhliziyweni zenu, ngoba animkholwa lowo amthumileyo.
- ³⁹Nicwaninga imibhalo engcwele ngoba nithi nizothola ukuphila okuphakade kuyo. Kanti-ke yiyo lemibhalo engifakazelayo.
- ⁴⁰Nokho anifuni ukuza kimi ukuba nithole ukuphila okuphakade.
- ⁴¹“Angibhekile ukudunyiswa ngabantu.
- ⁴²Kodwa ngiyanazi ukuthi aninalo uthando, animthandi uNkulunkulu.
- ⁴³Ngize ngegunya likaBaba kepha aningemukelanga; kodwa uma omunye ezizela ngokwakhe engagunyaziwe, niyomamukela.
- ⁴⁴Niyathanda ukudumisana nodwa, kodwa anilufuni udumo oluvela kulowo okunguyena yedwa uNkulunkulu. Pho-ke kungenzeka kanjani ukuba nikholwe?
- ⁴⁵Ningacabangi ukuthi yimina engiyonethwesa icala kuBaba! UMose enigabe ngaye, nguye kanye oyonethwesa icala.
- ⁴⁶Ukuba namkholwa uMose ngabe nangikholwa ngami, ngoba waloba ngami.
- ⁴⁷Njengoba ningakukholwanga akulobayo, kungenzeka kanjani ukuba nikukholwe engikushoyo na?”

UJohane 6

Izinkulungwane eziyisihlanu ziphiwa ukudla

(Mat 14:13-21; Mark 6:30-44; Luk 9:10-17)

- ¹Kamuva uJesu wawelela ngaphesheya kwechibi laseGalile okubuye kuthiwe ngelaseThibheriya.
- ²Izindimbane zabantu zamlandela, ngoba zibona izimangaliso zakhe zokuphilisa iziguli.
- ³UJesu wenyukela entabeni nabafundi bakhe, bafike bahlala phansi.
- ⁴Kwase kusondele iPhasika umkhosi wamaJuda.
- ⁵UJesu wenyusa amehlo, wakhanga uquqaba olukhulu lusondela kuye.
- ⁶Wayesethi kuFiliphu: “Singazithengaphi izinkwa ezanele ukuba kudle lababantu na?” (Wakusho lokhu emvivinya; empeleni wayekwazi yena ayezokwenza.)

⁷UFiliphu waphendula wathi: “Izinkwa ezingabiza imali engaphezu kwamakhulu amabili ezinhlamvu zesiliva zingeke zenele ukuba yilowo nalowo athole ngisho nengcosana nje.”

⁸Omunye umfundi, uAndreya umfowabo kaSimoni Phetro, wathi kuJesu:

⁹“Nangu umfana onezinkwa zebhali eziyisihlanu nezinhlanzi ezimbili, kepha bekuyini lokhu kubantu abangaka na?”

¹⁰UJesu wathi kubafundi: “Hlalisani abantu!” (Kwakukhona utshani obuningi kuleyondawo.) Base behlala abantu. Amadoda ayelapho ayebalelwa ezinkulungwaneni eziyisihlanu.

¹¹UJesu wathatha izinkwa, wabonga kuNkulunkulu, wayesebabela ababehlezi lapho. Wenze njalo nangezinhlanzi; abantu badla beneliswa.

¹²Kwathi bangesutha, uJesu wathi kubafundi bakhe: “Buthani imvuthuluka, kungachitheki lutho!”

¹³Base beyibutha yonke, kwagcwala amaqoma ayishumi nambili emvuthuluka yezinkwa eziyisihlanu zebhali ezazidliwe ngabantu.

¹⁴Abantu babona lesisimangaliso sikaJesu bathi: “Ngempela, lo nguyena Mphrofethi obhekiweyo ukuthi uyeza emhlabeni!”

¹⁵Kwamkhanyela uJesu ukuthi sebehlose ukumphoqa bambeke inkosi, wayesethi nyelele elibhekise entabeni ukuba abe yedwa.

UJesu uhamba phezu kwamanzi

(Mat 14:22-27; Mark 6:45-52)

¹⁶Kuthe sekuhwalala, abafundi bakhe behlela echibini,

¹⁷bafike bangena esikebheni, baphindela emuva bawela ichibi bebheke eKhaphenawume. Kwahlwa uJesu engakafiki kubo.

¹⁸Kwavunguza umoya onamandla uzamazamisa amaza.

¹⁹Kuthe abafundi sebegwedle isikebhe ibanga elingaba ngamakhilomitha ayisihlanu noma ayisithupha, babona uJesu ehamba phezu kwamanzi eya ngokusondela esikebheni, base befikelwa ukwesaba.

²⁰Wathi kubo: “Yimi bo, yimani isibindi ningesabi!”

²¹Babefuna ukumngenisa esikebheni, base befinyelela ngokushesha lapho babeqonde khona.

Izihlwele zifuna uJesu

²²Ngakusasa izihlwele zabantu ezazisasele ngaphesheya kwechibi zabona ukuthi besisinye isikebhe nokuthi uJesu akahambanga ngaso kanye nabafundi bakhe kodwa babehambe bodwa.

²³Ezinye izikebhe ezazivela eThibheriya zafika ogwini eduze kwendawo lapho abantu babedle khona isinkwa emuva kokuba iNkosi isibongile.

²⁴Kwathi ukuba abantu babone ukuthi uJesu akekho lapho ngisho nabafundi bakhe, bangena ezikebheni baya eKhapenawume befuna uJesu.

UJesu uyisinkwa sokuphila

²⁵Abantu bamthola ngaphesheya kwechibi bathi kuye: “Rabi, ufike nini lapha?”

²⁶UJesu wabaphendula wathi: “Eqinisweni lempela, beningangifuni ngoba niziqonda izimangaliso zami ukuthi zithini, kodwa beningifunela izinkwa lezi enazidla nesutha.

²⁷Musani ukusebenzela ukudla okuphelayo! Sebenzelani ukudla okungapheliyo okuninika ukuphila okuphakade. Kungukudla eniyokwabelwa yiNdodana yesintu, ngoba uNkulunkulu uYise uyishaye uphawu oluyigunyazayo.”

²⁸Base bembuza bethi: “Yini esinagayenza ukuba sifeze imisebenzi efunwa nguNkulunkulu na?”

²⁹UJesu waphendula wathi: “Umsebenzi kaNkulunkulu ukuba nikholwe kulowo amthumileyo.”

³⁰Bambuza bathi: “Simangaliso sini ozosenza sisibone sikhholwe kuwe? Uzokwenzani na?”

³¹Okhokho badla imana ehlane njengoba umbhalo ongcwele uthi: “UNkulunkulu wabapha isinkwa esivela ezulwini badla.’”

³²UJesu wathi: “Ngoqobo lonke, isinkwa uMose anipha sona sasingesona esivela ezulwini, kodwa nguBaba onipha isinkwa soqobo esivela ezulwini.

³³Ngoba isinkwa sikaNkulunkulu siyilowo owehla ezulwini ukuba abele abasemhlabeni ukuphila.”

³⁴Bathi kuye: “Nkosi, siphe njalo lesisinkwa!”

³⁵UJesu wathi kubo: “Mina ngiyisinkwa sokuphila. Lowo oza kimi kasoze alamba, nalowo okholwa kimi kasoze oma.

³⁶“Kodwa kunjengoba ngishilo kini ukuthi ningibonile, nokho anikhholwa.

³⁷Bonke labo uBaba angipha bona bayoza kimi, nalowo oza kimi angisoze ngamlahla.

³⁸Ngoba angehlanga ezulwini ukuba ngenze eyami intando, ngehla ukuba ngenze intando kaBaba ongithumileyo.

³⁹Kuyintando yalowo ongithumileyo ukuba ngingalahlekelwa ngisho nangoyedwa walabo anginike bona, kodwa ngibavuse bonke ekufeni ngomhla wokuphela.

- ⁴⁰Ngoba lokhu kuyintando kaBaba ukuba yilowo nalowo obona iNdodana nokholwa kuyo abe nokuphila okuphakade. Ngiyomvusa ngomhla wokuphela.”
- ⁴¹AmaJuda akhonona ngoba uJesu ethe: “Ngiyisinkwa esehle ezulwini.”
- ⁴²Athi: “Lomuntu kasiye yini uJesu, indodana kaJosefa na? Siyamazi uyise nonina. Pho angasho kanjani ukuthi wehle ezulwini na? ”
- ⁴³UJesu waphendula wathi: “Ningakhononi phakathi kwenu!
- ⁴⁴Umuntu angeza kimi kuphela uma uBaba ongithumileyo emholela kimi. Ngiyomvusa ekufeni ngomhla wokuphela.
- ⁴⁵Abaphrofethi basendulo baloba bathi: ‘Bonke bayoba ngabafundiswe nguNkulunkulu.’ Yilowo nalowo oseke wamuzwa uBaba wafunda kuye uyaye eze kimi.
- ⁴⁶Akungoba kukhona oseke wabona uBaba, ngaphandle kwalona ovela kuNkulunkulu; nguyena obone uBaba.
- ⁴⁷“Ngiqinisile uma ngithi kini, okholwayo unakho ukuphila okuphakade.
- ⁴⁸Mina ngiyisinkwa sokuphila.
- ⁴⁹Okhokho benu badla imana ehlane kodwa badlula bafa.
- ⁵⁰Kepha lesisinkwa esehla ezulwini siyiloluhlobo okuthi umuntu angaludla angabe esafa.
- ⁵¹Mina ngiyisinkwa esiphilisayo esehle ezulwini. Umuntu odla lesisinkwa uyophila ungunaphakade. Lesisinkwa engiyophana ngaso singumzimba wami, ngisinika umhlaba ukuba uphile.”
- ⁵²AmaJuda aphikisana abuzana odwa athi: “Lomuntu angasinika kanjani umzimba wakhe ukuba siwudle na? ”
- ⁵³UJesu wathi kubo: “Ngiqinisile ngiyanitshela ngithi, uma ningawudli umzimba weNdodana yesintu niphuze igazi layo, akukho kuphila kini.
- ⁵⁴Umuntu odla umzimba wami aphuze igazi lami unokuphila okuphakade, ngiyomvusa ekufeni ngomhla wokuphela.
- ⁵⁵Ngoba umzimba wami ungukudla isibili, negazi lami liyisiphuzo isibili.
- ⁵⁶Odlala umzimba wami aphuze igazi lami uhlala ekimi nami ngihlala ngikuye.
- ⁵⁷UBaba ophilayo ungithumile, ngiphila ngaye. Kanjalo futhi lowo odlala mina uyophila ngami.
- ⁵⁸Sinjalo-ke lesisinkwa esehle ezulwini. Asinjengesinkwa esadliwa ngokhokho benu badlula bafa. Odlala lesisinkwa uyophila ungunaphakade.”
- ⁵⁹UJesu wakusho lokhu efundisa esinagogeni eKhaphenawume.

Amazwi okuphila okuphakade

- ⁶⁰Abaningi babalandeli bakaJesu kwathi bangakuzwa lokhu base bethi: “Lemfundiso ilukhuni. Ngubani ongayimela na?”
- ⁶¹UJesu wezwa igazi limtshela ukuthi bayakhonona ngalokhu, ngakhoke wathi kubo: “Lokhu kuyanicasula na?”
- ⁶²Ningathini uma ningase nibone iNdodana yesintu yenyukela lapho yayikhona na?
- ⁶³Ukuphila kuvela ngoMoya kaNkulunkulu, amandla omuntu awasizi ngalutho. Amazwi engiwakhulume kini anguMoya kaNkulunkulu, angukuphila.
- ⁶⁴Nokho abanye benu kabakholwa.” UJesu wayaze kusukela ekuqaleni ukuthi ngobani abangakholwayo nokuthi ngubani ozothengisa ngaye ezitheni.
- ⁶⁵Wayesethi: “Yingakhoke ngithe kini akekho ongeza kimi uma engakuphiwe nguBaba.”
- ⁶⁶Abaningi babalandeli bakhe kwathi bangakuzwa lokho bahlehla, ababe besahamba naye.
- ⁶⁷UJesu wayesebuza abayishumi nambili wathi: “Nani senifuna ukungishiya na?”
- ⁶⁸USimoni Phetro wamphendula wathi: “Nkosi, sikushiye siye kubani na? Amazwi okuphila okuphakade akuwe.
- ⁶⁹Siyakholwa, siyazi ukuthi nguwe oyiNgcwele kaNkulunkulu.”
- ⁷⁰UJesu wamphendula wathi: “Anginikhethanga yini nina eniyishumi nambili na? Kepha omunye wenu ungasathane?”
- ⁷¹Wayegudlise kuJudasi umntakaSimoni Iskariyotho, omunye wabayishumi nambili, owayezogcina esechilizele uJesu ezitheni.

UJohane 7

Ukungakholwa kwabafowabo bakaJesu

- ¹Emuva kwalokhu uJesu wahambahamba eGalile, engathandi ukubonakala ehamba kwelaseJudiya, ngoba izikhulu zamaJuda zazicuthele ukumbulala.
- ²Kwase kusondele umkhosi wamadokodo ogidwa ngamaJuda.
- ³Abafowabo bakaJesu bathi kuye: “Suka lapha uye kwelaseJudiya ukuze abalandeli bakho nabo babone imisebenzi oyenzayo!”
- ⁴Akukho muntu owenza utho esithe uma efuna ukwaziwa. Njengoba uyenza lemisebenzi, ziveze obala kubantu bonke ukuze waziwe.”
- ⁵Nabafowabo imbala kabakholwanga kuye.

⁶UJesu wathi kubo: “Ithuba lami alikazilethi, kodwa nina noma yisiphi isikhathi sinilungele.

⁷Ngeke unizonde umhlaba, kodwa mina uyangizonda ngoba ngifakaza ngemisebenzi yawo ukuthi mibi.

⁸Nina hambani niye emkhosini! Mina angiyi lapho, ngoba ithuba lami alikafiki.”

⁹Wakusho lokhu, wasala eGalile.

UJesu usemkhosini wamadokodo

¹⁰Kodwa kuthe abafowabo sebehambile baya emkhosini, naye uJesu waya kuwo. Lokho akakwenzanga obala, kodwa wakwenza isinyenyela.

¹¹Izikhulu zamaJuda zazimcinga emkhosini. Zabuza zathi: “Ngabe uphi na?”

¹²Izihlwele zabantu zavungazela ngaye kakhulu. Abanye bathi: “Ungumuntu olungileyo.” Abanye-ke baphika bathi: “Qha, wedukisa abantu.”

¹³Kodwa akukho muntu owaphumela obala wakhuluma ngaye, ngoba babesaba izikhulu zamaJuda.

¹⁴Kuthe umkhosi usuphakathi naphakathi, uJesu wangena ethempelini wafundisa.

¹⁵Izikhulu zamaJuda zamangala zathi: “Ngabe lomuntu uluthathaphi ulwazi olungaka, njengoba engafundile nje?”

¹⁶UJesu waphendula wathi: “Engikushoyo akusiyona imfundiso yami, kodwa kuvela kongithumileyo.

¹⁷Wonke umuntu ofuna ukwenza intando kaBaba uyokwazi ukuthi engikufundisayo ngikuthatha kuNkulunkulu yini noma ngizikhulumela okwami nje.

¹⁸Umuntu ozikhulumela okwakhe usuke ezifunela udumo lwakhe. Kodwa ofuna udumo lwalowo omthumileyo uqinisile, akanankohliso neze.

¹⁹UMose akaninikanga umthetho yini na? Kodwa awugcinwa muntu phakathi kwenu. Nifuna ukungibulalelani pho?”

²⁰Izihlwele zaphendula zathi: “Awu suka! Unedimoni wena! Ngubani ofuna ukukubulala?”

²¹UJesu waphendula wathi: “Ngasenza saba sinye isimangaliso, nisamangele nonke.

²²Niyaye nisoke umntwana ngisho nangesabatha, ngoba uMose wayethe anosoka amadodana enu ngosuku lwesiphohlongo ezelwe. (Nokho lomthetho awuveli kuMose wavela kokhokho benu.)

²³Uma nikwazi ukusoka umntwana kuyisabatha ukuze nigcine umthetho kaMose, pho yini ningithukuthelele uma ngisindise umuntu waphila saka mhla kuyisabatha na?

²⁴Ningahluleli ngokubuka kwamehlo, kodwa yahlulelani ngobuqotho! ”

UJesu unguMesiya na?

²⁵Kwase kukhuluma abathile baseJerusalema bathi: “Akuyena yini lomuntu izikhulu ezifuna ukumbulala na?

²⁶Ake nibheke! Ukhuluma isidanasi, kepha zithule azisho lutho kuye. Ngabe mhlawumbe seziyazi yini izikhulu ukuthi lona unguMesiya na?

²⁷Kodwa mhla uMesiya eza, akukho muntu oyomazi lapho evela khona, kepha lomuntu siyamazi lapho evela khona.”

²⁸UJesu wayefundisa ethempelini, wamemeza ngezwi elikhulu wathi: “Konje nithi niyangazi, nazi nokuthi ngivelaphi na! Angizizelanga mina ngokwami, kodwa lowo onguYenayena ungithumile. Nina animazi,

²⁹kodwa mina ngiyamazi ngoba ngivela kuye, nguye ongithumileyo.”

³⁰Base befuna ukumbamba, kodwa akukho muntu owake wazama ukumdumela, ngoba isikhathi sakhe sasingakafiki.

³¹Ezihlweleni kwakukhona abantu abaningi abakholwa kuye base bethi: “Mhla uMesiya eza, nisho ukuthi uyokwenza izimangaliso eziningi ezedlula ezenziwa yilomuntu na? ”

Kuthunyelwa ogqayinyanga ukuba babophe uJesu

³²Abafarisi bezwa abantu bevungazela besho lezozinto ngoJesu. Base besuka kanye nezikhulu zabaphristi, bathumela ogqayinyanga ukuba bambophe.

³³UJesu wathi: “Ngisahleli nani isikhashana, bese ngibuyela kuBaba ongithumileyo.

³⁴Niyongifuna kepha aniyikungithola, ngoba ngeke niye lapho ngiyobe ngikhona.”

³⁵Izikhulu zamaJuda zabuzana zodwa zathi: “Yikuphi lapho ethi uzoya khona singabe sisamthola na? Nithi uzoya kwabakithi asebasakazeka izwe lonke, afike afundise abezizwe na?

³⁶Phela uthi siyomfuna singamtholi, abuye athi ngeke siye lapho eyobekhona. Ngabe usho ukuthini na? ”

Imifula yamanzi aphilisayo

³⁷Kuthe ngosuku olwalulukhulu kakhulu okwaphethwa ngalo umkhosi, uJesu wasukuma wamemeza ngezwi elikhulu wathi: “Uma kukhona owomileyo, akeze kimi aphuze!

³⁸Okholwa kimi kuyogobhoza enhliziyweni yakhe imifula yamanzi aphilisayo, njengoba kusho imibhalo engcwele.”

³⁹Wayekukhuluma lokhu mayelana noMoya oyiNgcwele ababezowemukela abakholwa kuye. Ngalesosikhathi uMoya wawungakemukelwa muntu, ngoba uJesu wayengakanikwa udumo.

Ukungezwani phakathi kwabantu ngoJesu

⁴⁰Base bemuzwa abanye ezihlweleni ekhuluma kanjalo, bathi: “Impela unguMphrofethi lomuntu!”

⁴¹Abanye bathi: “UnguMesiya!” Kepha abanye bathi: “UMesiya ngeke avele eGalile!”

⁴²Awusho yini umbhalo ongcwele ukuthi uMesiya uyoba ngowozalo lwenkosi uDavide avele eBhetlehem, umzana okwakuhlala kuwo uDavide na?”

⁴³Kwadaleka ukungezwani ngaye ezixukwini.

⁴⁴Abanye babefuna ukumbamba, kodwa akukho muntu owamthintayo.

Ukungakholwa kwezikhulu zamaJuda

⁴⁵Ogqayinyanga babuyela ezikhulwini zabaphristi nakubafarisi. Zababuza zathi: “Animlethanga ngani na?”

⁴⁶Ogqayinyanga baphendula bathi: “Akukho muntu osewake wakhulumisa okwakhe!”

⁴⁷Abafarisi bathi kubo: “Kanti nani uniluthile na?”

⁴⁸Ukhona yini ezikhulwini noma kubafarisi enake namuzwa ethi ukholwa kuye na?

⁴⁹Kepha loluntukazana aluwazi umthetho kaMose, ngakhoke luqalekisiwe.”

⁵⁰UNikodima, omunye wabafarisi owake waya kuJesu, wayesethi kubo:

⁵¹“Umthetho uyasivumela yini ukuba silahle umuntu ngecala singakamuzwa, sizwe ukuthi wenzeni na?”

⁵²Baphendula bathi: “Konje nawe ungowaseGalile na? Hlolisisa kahle imibhalo engcwele, uzothola ukuthi akukho mphrofethi ongowokudabuka kwelaseGalile!”

Owesifazane owabanjwa ephinga

[⁵³Babuyela bonke emakhaya, kodwa uJesu waya eNtabeni yemiHlwathi.

UJohane 8

²Waphindela ethempelini ekuseni kakhulu ngakusasa. Sonke isixuku saya kuye samngunga, wahlala phansi wabafundisa.

³Izazimibhalo nabafarisi baletha kuye owesifazane owayebanjwe ephinga. Bammisa ogelweni phakathi kwabo bonke.

- ⁴Base bethi kuJesu: “Mfundisi, lomuntu wesifazane ubanjwe oqotsheni ephinga.
- ⁵UMose wasiyaleza emthethweni wathi abanje abakhandwe ngamatshe bafe. Wena-ke uthini?”
- ⁶Bakusho lokho besophe ukumhila uJesu ukuze babe nebhaxa lokumethwesa icala. Kepha uJesu wagoba, waloba ngomunwe emhlabathini.
- ⁷Babelesela bembuza. UJesu waphakama, wathi kubo: “Akuqale ongenasono phakathi kwenu amshaye ngetshe!”
- ⁸Waphinde wagoba, waloba emhlabathini.
- ⁹Lapho bekuzwa lokho, basuka bathi monyu monyu ngamunye, kwaqala ngabadala kubo. UJesu wasala yedwa, nowesifazane wayemi lapho phambi kwakhe.
- ¹⁰UJesu waphakama wathi: “Sifazane, sebeshonephi? Akakho yini okulahle ngecala na?”
- ¹¹Waphendula wathi: “Ngisho noyedwa, Nkosi!” UJesu wathi kuye: “Nami angikulahli. Hamba, ungaphindi wone!”]

UJesu ungukukhanya komhlaba

- ¹²UJesu wabuye wakhuluma kubantu wathi: “Mina ngingukukhanya komhlaba. Ongilandelayo ngeke adukuze emnyameni, kodwa uyoba nokukhanya okuyomdonsela ekuphileni.”
- ¹³Abafarisi bathi kuye: “Manje uyazifakazela, ngakhoke ubufakazi bakho abunasisindo.”
- ¹⁴UJesu wathi: “Qhabo bo, noma ngizifakazela, kodwa engikushoyo kuyiqiniso, ngoba ngiyazi ukuthi ngivelaphi nokuthi ngiyaphi. Nina anazi ukuthi ngivelaphi nokuthi ngiyaphi.
- ¹⁵Nina nehlulela ngokomhlaba, kanti mina angehluleli muntu.
- ¹⁶Kodwa uma ngehlulela, ukwehlulela kwami kuqotho, ngoba angikwenzi ngedwa; uBaba ongithumileyo unami.
- ¹⁷Kulotshiwe emthethweni wenu ukuthi uma ababili befakaza, ubufakazi babo buyokuma.
- ¹⁸Mina ngiyazifakazela, kanti noBaba ongithumileyo uyafakaza ngami.”
- ¹⁹Bambuza bathi: “Uphi pho uyihlo na?” UJesu waphendula wathi: “Aningazi mina, animazi ngisho noBaba. Ukuba beningazi mina beniyomazi noBaba.”
- ²⁰UJesu wakusho lokhu lapho efundisa ethempelini ngasohlangothini lwezitsha zomnikelo. Akukho muntu owambophayo, ngoba isikhathi sakhe sasingakafiki.

“Ngeke niye lapho ngiya khona”

²¹Wabuye wathi kubo: “Ngiyomuka bese ningifuna, kodwa niyofela ezonweni zenu. Ngeke niye lapho ngiya khona.”

²²Izikhulu zamaJuda zase zithi: “Uthi lona ngeke siye lapho eya khona. Ngabe kusho ukuthi uzozibulala na?”

²³UJesu waphendula wathi: “Nina ningabalapha emhlabeni, kodwa mina ngivela kweliphezulu. Ningabantu balomhlaba, kodwa mina angisiye walomhlaba.

²⁴Yingakho nginitshelile ngathi niyofela ezonweni zenu. Niyofela ezonweni zenu uma ningakhulwa ukuthi nginguye okhona.”

²⁵Bambuza bathi: “Ungubani na?” UJesu waphendula wathi: “Ngisakhulumelani nje nani na?”

²⁶Kuningi engingakusho ngani nginahlulele. Kepha uBaba ongithumileyo uqinisile. Umhlaba ngiwutshela kuphela lokho engikuzwe kuye.”

²⁷Babengaqondi ukuthi ukhuluma kubo ngoYise osezulwini.

²⁸UJesu wathi kubo: “Nxa seniyiphakamisile iNdodana yesintu, niyokwazi ukuthi nginguye okhona. Bese nazi ukuthi angenzi lutho ngegunya lami, kodwa kuphela lokho engikutshelwe nguBaba.

²⁹Lowo ongithumileyo unami, akangishiyile ngiyinhlwa, ngoba ngilokhu ngenza lokho okuthandeka kuye.”

³⁰Baningi abamuzwa ekukhuluma lokhu bakholwa kuye.

“Iqiniso liyonikhulula”

³¹UJesu wakhuluma kulawomaJuda ayekholwa kuye wathi: “Uma nibambelela emfundisweni yami niyigcine, ningabafundi bami isibili,

³²niyolazi iqiniso, iqiniso liyonikhulula.”

³³Abantu baphendula bathi: “Thina singabozalo luka-Abhrahama, asizange sibe yizigqila zamuntu. Usho ukuthini uma uthi siyokhululwa na?”

³⁴UJesu wathi kubo: “Ake nilalele nginitshelwe! Wonke umuntu owonayo uyisigqila sesono.

³⁵Isigqila asihlali emndenini umlibe, kodwa indodana ihlala ingeyakhona njalo.

³⁶Uma iNdodana inikhulula, niyoba ngabakhululekile ngempela.

³⁷Ngiyazi ukuthi ningabozalo luka-Abhrahama. Nokho nifuna ukungibulala, ngoba imfundiso yami ayitholi ndawo kinina.

³⁸Mina ngikhuluma ngento engiyibone kuBaba, kodwa nina nenza enikutshelwe nguyihlo.”

³⁹Bamphendula bathi: “Ubaba nguAbhrahama.” UJesu wathi: “Ukuba impela benizalwa nguAbhrahama beniyokwenza imisebenzi ka-Abhrahama.

⁴⁰Kodwa manje nifuna ukungibulala, mina kanye onitshele iqiniso engilizwe kuNkulunkulu. UAbrahama kazange ayenze into enjengalena.

⁴¹Nenza imisebenzi kayihlo.” Baphendula bathi: “Thina asiyizo izingane zesihlahla; sinoBaba munye, uNkulunkulu.”

⁴²UJesu wathi kubo: “Ukuba uNkulunkulu ubenguYihlo beniyongithanda, ngoba ngilapha nje ngivela kuNkulunkulu. Angizizelanga ngokuthanda kwami, kodwa nguye owangithumayo.

⁴³Kwenziwa yini kunganikhanyeli enginitshela khona na? Yingoba ningeyimele imfundiso yami.

⁴⁴Ningabakayihlo uSathane, nithanda ukufeza izifiso zakhe. Wayengumbulali kusukela ekuqaleni, engazange ame eqinisweni, ngoba alikho neze iqiniso kuye. Uma ekhuluma amanga usuke enza khona impela okusegazini lakhe, ngoba unguhukabhejane noyise wamanga.

⁴⁵Mina-ke, ngoba nakhu nginitshela iqiniso, anithandi ukungikholwa.

⁴⁶Ngubani kini ongaqinisa athi nginesono na? Uma iqiniso ngilikhuluma, pho aningikholwa ngani na?

⁴⁷Lowo ovela kuNkulunkulu uzwa amazwi kaNkulunkulu. Nina-ke aniveli kuNkulunkulu, ngakhoke anikulaleli engikushoyo.”

“UAbrahama engakazalwa mina ngikhona”

⁴⁸AmaJuda athi kuye: “Akulona yini iqiniso lokhu esikushoyo ukuthi ungumSamariya futhi unedimoni na? ”

⁴⁹UJesu waphendula wathi: “Anginadimoni mina, kodwa ngidumisa uBaba, nina-ke niyangijivaza.

⁵⁰Mina angizifuneli olwami udumo. Kodwa ukhona olufunayo okunguyena engumahluleli.

⁵¹Ngiyaqinisa impela ngithi, lowo ogcina imfundiso yami akasoze afa nanini.”

⁵²AmaJuda athi kuye: “Impela yima kusikhanyelayo manje ukuthi idimoni unalo! UAbrahama wafa, nabaphrofethi bafa, kodwa wena usathi lowo ogcina imfundiso yakho akasoze afa nanini.

⁵³Umkhulu ngaphi wena kunoAbrahama ukhokho esazifela na? Bafa futhi abaphrofethi. Ucabanga ukuthi uyini nje lena ozenza yona? ”

⁵⁴UJesu waphendula wathi: “Uma ngizidumisa mina, udumo lwami luyize. NguBaba onginika udumo, lowo enithi unguNkulunkulu wenu.

⁵⁵Animazi, kepha mina ngiyamazi. Uma ngingase ngithi angimazi, ngabe ngiqamba amanga njengani. Kodwa ngiyamazi, ngigcina izwi lakhe.

⁵⁶Uyihlo uAbrahama wakuthokozela kakhulu ukuthi wayezobona isikhathi sokufika kwami; wasibona wajabula.”

⁵⁷AmaJuda athi kuye: “Awukahlanganisi kwaminyaka engamashumi ayisihlanu, kodwa uthi wabona uAbrahama na?”

⁵⁸UJesu waphendula wathi: “Ngoqobo lonke, uAbrahama engakazalwa mina ngikhona.”

⁵⁹Ayeseconsa amatshe ezomjikijela ngawo, kodwa uJesu wawedukela wasuka wemuka ethempelini.

UJohane 9

UJesu uphilisa indoda eyazalwa iyimpumpethe

¹Kuthe uJesu edlula ngendlela wabona indoda elokhu yazalwa iyimpumpethe.

²Abafundi bakhe bambuza bathi: “Rabi, kwakone bani, nguye lona noma abazili bakhe angaze azalwe eyimpumpethe na?”

³UJesu waphendula wathi: “Ayonanga lendoda ngisho nabazali bayo, kodwa kwenzeka lokhu ukuba kubonakaliswe amandla kaMvelinqangi kuyo.

⁴Simelwe ukufeza imisebenzi kaBaba ongithumileyo kusesemini; buyeza ubusuku lapho kungasenakusebenza muntu.

⁵Uma ngisesemhlabeni ngingukukhanya okukhanyisa emhlabeni.”

⁶Wakusho lokhu wafela amathe emhlabathini, wacuba udaka ngamathe. Wayeseninda amehlo empumpethe ngalo,

⁷esethi kuyo: “Hamba ufike ugeze echibini laseSilowama!” (Leligama lihunyushwa ngokuthi ngoThunyiweyo). Indoda yahamba yafike yageza, yabuya isibona.

⁸Omakhelwane bayo kanye nalabo ababekade beyibona inqiba bathi: “Akusiye nje lomuntu owayehlala enqiba na?”

⁹Abanye bathi: “Impela nguye,” kodwa abanye bathi: “Qha, akuyena, kodwa ufana naye.” Lendoda yathi: “Nginguye.”

¹⁰Bayibuza bathi: “Pho amehlo akho avuleke kanjani na?”

¹¹Waphendula yathi: “Lomuntu othiwa nguJesu ucube udaka, wangininda ngalo emehlweni, wayesethi angihambe ngigeze eSilowama. Ngaya-ke ngafike ngeza ngavuleka amehlo.”

¹²Bambuza bathi: “Uphi lomuntu na?” Waphendula wathi: “Angazi.”

Abafarisi baphenya ngokuphiliswa kwempumpethe

¹³Babemthatha njalo bemqhuba bemusa kubafarisi lomfokazi obekade eyimpumpethe.

- ¹⁴UJesu ucube udaka mhlazana kuyisabatha, emelapha emehlo.
- ¹⁵Abafarisi nabo bambuza umfokazi ukuthi kwenzeka kanjani ukuba abone na. Wathi kubo: “Unginde ngodaka emehlweni, ngahamba ngageza, manje sengiyabona.”
- ¹⁶Abanye abafarisi bathi: “Lomuntu owenze lokhu kaveli kuNkulunkulu, ngoba akawuhloniphi umthetho wesabatha.” Abanye bathi: “Umuntu oyisoni angazenza kanjani izimangaliso ezinje? ” Base benqamukana phakathi.
- ¹⁷Abafarisi bayibuza futhi lendoda eyayikade iyimpumputhe bathi: “Wena-ke uthini ngaye, njengoba ekuvule amehlo wabona na? ” Yaphendula yathi: “Ungumphrofethi! ”
- ¹⁸Izikhulu zamaJuda azikholwanga ukuthi lendoda yake yayimpumputhe yayisiyabona, zaze zabiza abazali bayo,
- ¹⁹zababuza zathi: “Ngabe yindodana yenu le enithi yazalwa ingaboni na? Pho kwenzeka kanjani ukuba ibone manje? ”
- ²⁰Abazali bayo baphendula bathi: “Esikwaziyo ukuthi uyindodana yethu, futhi wazalwa eyimpumputhe.
- ²¹Kodwa esingakwaziyo ukuthi kwenzeka kanjani ukuba abone. Asazi nokuthi ngubani omelaphe wabona. Mbuzeni nina, usekhulile mdala, angaziphendulela.”
- ²²Abazali bayo bakusho lokhu ngoba besaba izikhulu zamaJuda. Phela zase zivumelene ukuthi lowo ovuma ukuthi uJesu unguMesiya uyonqunywa ebandleni.
- ²³Yingakho abazali bayo bathi: “Usekhulile; uzozikhulumela.”
- ²⁴Zabuye zayimemeza ngokwesibili lendoda eyayizalwe iyimpumputhe, zathi kuyo: “Khuluma iqiniso phambi kukaNkulunkulu! Siyazi ukuthi lomuntu uyisoni.”
- ²⁵Indoda yaphendula yathi: “Angikwazi ukuthi uyisoni yini noma akayiso; kuye nje vo engikwaziyo, ukuthi bengiyimpumputhe kepha manje sengiyabona.”
- ²⁶Zayibuza zathi: “Wenzi kuwe na? Ukwelaphe kanjani emehlweni na? ”
- ²⁷Yaphendula yathi: “Kade nginitshela, kodwa anaze nalalela. Nithandelani ukuba ngiphinde engikushilo na? Ngabe nani nifuna ukuba ngabafundi bakhe na? ”
- ²⁸Base beyijakaja bathi kuyo: “Nguwe ongumfundi walomuntu, thina singabafundi bakaMose.
- ²⁹Siyazi ukuthi uNkulunkulu wakhuluma kuMose, kodwa lomuntu asimazi lapho evela khona.”
- ³⁰Indoda yaphendula yathi: “Kuyamangalisa ukuthi animazi lapho evela khona, ingani ungelaphe amehlo ngabona.

³¹Siyazi ukuthi uNkulunkulu akazilaleli izoni; ulalela labo abamhloniphayo benze intando yakhe.

³²Selokhu kwathi nhlo nake nezwaphi kuthiwa kunomuntu owelapha amehlo omuntu owazalwa eyimpumpithe?

³³Ukuba lomuntu ubengaveli kuNkulunkulu ubengeke enze lutho.”

³⁴Bamphendula bathi: “Wazalwa uyisoni, wena usungafundisa thina na? ” Base bemxosha.

Ubumpumpithe ngokomoya

³⁵UJesu wezwa ukuthi lendoda bayixoshile. Kuthe angayithola wayibuza wathi: “Uyakholwa yini eNdodaneni yesintu na? ”

³⁶Yamphendula yathi: “Ngitshele Nkosi ukuthi ingubani bese ngikholwa kuyo! ”

³⁷UJesu wathi kuyo: “Usuyibonile, yiyo le ekhuluma nawe manje.”

³⁸Yathi: “Nkosi, ngiyakholwa! ” Yayisikhuleka kuye.

³⁹UJesu wathi: “Ngeza lapha emhlabeni ukuba ngahlulele, ukuze izimpumpithe zibone, kuthi labo abebevele bebona babe yizimpumpithe.”

⁴⁰Kwakukhona abafarisi abathile ababenaye lapho. Bamuzwa esho njalo, bambuza bathi: “Usho ukuthi nathi siyizimpumpithe na? ”

⁴¹UJesu wabaphendula wathi: “Ukuba beniyizimpumpithe beningeke nibe necala; kodwa manje nithi niyabona. Ngakhoke nohlala ninesono.”

UJohane 10

UJesu uzekelisa ngesibaya sezimvu

¹UJesu wathi: “Eqinisweni lempela, umuntu ongangeni ngesango esibayeni sezimvu, kodwa efohla kwenye indawo, ngempela uyisela nomphangi.

²Ongena ngesango ungumelusi wezimvu.

³Umlindisango uyaye amvulele, izimvu zizwe iphimbo lakhe, abesebiza ezakhe ngamagama, azihole azikhiphe esibayeni.

⁴Uzikipha zonke ezakhe azihole, bese zimlandela izimvu, ngoba ziyalazi iphimbo lakhe.

⁵Ngeke zimlandele umuntu wokuhamba ongaziwayo, kodwa zombalekela, ngoba zingalazi iphimbo labantu bokuhamba.”

⁶UJesu wabalandisa lokhu ezekelisa, kodwa akubakhanyelanga ukuthi zinto zini ayebatshela zona.

UJesu ungumalusi olungileyo

- ⁷UJesu wabuye wathi: “Ngiqinisile uma ngithi kini, mina ngiyisango lesibaya sezimvu.
- ⁸Bonke abafike kuqala kunami bangamasela nabaphangi, kodwa izimvu azibezwanga.
- ⁹Mina ngiyisango, uma umuntu engena ngami uyoindiswa, angene aphume aklabe edlelweni.
- ¹⁰Isela lingena kuphela ukuba lebe libulale libhubhise. Mina kodwa ngize lapha ukuba bathole ukuphila, babe nakho kuvame.
- ¹¹“Mina ngingumalusi olungileyo. Umalusi olungileyo udela ukuphila kwakhe ngenxa yezimvu.
- ¹²Umuntu osuke eqashiwe, izimvu zingezona ezakhe, engesiye futhi umelusi wazo, unele abone inkentshane ligasela abaleke ashiye izimvu bese lifika lizidwengula zihlakazeke.
- ¹³Ingani uqashiwe, akanamsebenzi nezimvu.
- ¹⁴Mina ngingumalusi olungileyo. Ngiyazazi ezami, nazo futhi ziyangazi,
- ¹⁵njengalokhu ngaziwa nguBaba nami ngimazi uBaba. Ngidela ukuphila kwami ngenxa yezimvu.
- ¹⁶Nginezinye izimvu futhi ezingesizo ezalesisibaya. Kumele ngiziqoqe nazo. Ziyolizwa iphimbo lami, bese ziba mhlambi munye zonke, onomalusi oyedwa.
- ¹⁷“UBaba uyangithanda ngoba ngidela ukuphila kwami ngibuye ngikuzuze futhi.
- ¹⁸Akukho muntu ongephuca ukuphila kwami, kodwa ngikudela ngokuthanda kwami. Nginamandla okukudela, nginamandla okubuye ngikuzuze. Yilokhu uBaba angithume ukuba ngikwenze.”
- ¹⁹Abuye anqamukana phakathi amaJuda ngenxa yalamazwi akhe.
- ²⁰Amaningi kuwo athi: “Unedimoni, useyahlanya! Nimlalele ukuthini nje? ”
- ²¹Kodwa abanye bathi: “Umuntu onedimoni ngeke akhulume kanje. Idimoni lingawavula yini amehlo ezimpumpithe zibone? ”

AmaJuda aqhubukusha uJesu

- ²²Kwase kugidwa umkhosi kukhunjulwa ukuvulwa kwethempeli, ugujwa emzini waseJerusalema.
- ²³Kwakusebusika; uJesu wayehamba phakathi ethempelini emhubheni okuthiwa ngokaSolomoni.
- ²⁴AmaJuda ayesemhaqa uJesu ambuza athi: “Koze kube nini singakuqondi ukuthi uyiliphi? Uma unguMesiya, sitshele ngokusobala! ”

- ²⁵UJesu waphendula wathi: “Nginitshelile, kodwa anikholwanga. Imisebenzi engiyenza ngegunya likaBaba iyangifakazela
- ²⁶kodwa anikholwa, ngoba aniyizo izimvu zami.
- ²⁷Izimvu zami ziyalizwa iphimbo lami, ngiyazazi, ziyangilandela.
- ²⁸Ngizinika ukuphila okuphakade, ngeke zibhubhe nanini. Aziyukuhlwithwa muntu esandleni sami.
- ²⁹Lokho engikunikwe nguBaba kukhulu kunakho konke. Akukho muntu ongazihlwitha lezizimvu zami esandleni sikaBaba.
- ³⁰Mina noBaba simunye.”
- ³¹AmaJuda aphinde acosha amatshe ukuba amkhande ngawo.
- ³²UJesu wathi kuwo: “Nginibonise imisebenzi eminingi eyizicolo evela kuBaba. Yimuphi walemisebenzi eningikhandela wona ngamatshe na? ”
- ³³AmaJuda amphendula athi: “Asikukhandi ngamatshe nje ngenxa yemisebenzi yakho emihle, kodwa sikukhanda ngenxa yokuhlambalaza kwakho uNkulunkulu. Wena ungumuntu nje, kodwa uzenza uNkulunkulu! ”
- ³⁴UJesu waphendula wathi: “Akulotshiwe yini emthethweni wenu lawamazwi kaNkulunkulu athi: “ ‘Ngithe mina: Nina ningonkulunkulu.’ ”
- ³⁵“Umbhalo ungechithwe, noNkulunkulu wababiza ngokuthi bangonkulunkulu abantu labo okweza kubo izwi lakhe.
- ³⁶Pho mina engakhethwa nguBaba ngahlukaniselwa ukuba ngithunyelwe emhlabeni, ningasho kanjani ukuthi ngihlambalaza uNkulunkulu ngoba ngithe ngiyiNdodana yakhe na?
- ³⁷Uma ngingayenzi imisebenzi kaBaba, ninazo-ke izaba zokungakholwa kimi!
- ³⁸Kodwa uma ngiyenza, kholwani okungenani lokho okufakazelwa yimisebenzi, noma ningakholwa kimi! Yikhona niyokwazi niqonde ngokupheleleyo ukuthi uBaba ukimi nami ngikuBaba sihlange.”
- ³⁹AmaJuda aphinde azama ukumbamba, kodwa waphunyula.
- ⁴⁰UJesu waphindela ngaphesheya komfula iJordani endaweni lapho uJohane ayekade ebhabhadisela khona, wafike wahlala lapho.
- ⁴¹Kwasuka abantu abaningi baya kuye bafike bathi: “UJohane akenzanga zimangaliso, kodwa konke ayekusho ngalomuntu kuyiqiniso.”
- ⁴²Baba baningi abakholwa kuye kuleyondawo.

UJohane 11

Ukufa kukaLazaru

- ¹Kwagula indoda ethile, igama layo linguLazaru. WayengowaseBhethani, umzana okwakuhlala kuwo uMariya nodadewabo uMata.
- ²Nguye phela loMariya owagcoba iNkosi uJesu ngomfuma emesula izinyawo ngezinwele zakhe. Kwakugula umfowabo uLazaru.
- ³Odadewabo base bethumela kuJesu bathi: “Nkosi, umngane wakho omkhonzileyo uyagula.”
- ⁴Wezwa uJesu wathi: “Isiphetho salokhukugula ngeke kugcine ngokufa nje kuphela, kodwa kuzobonakaliswa ngakho ubukhosi bukaNkulunkulu, iNdodana kaNkulunkulu izitholele udumo ngakho.”
- ⁵UJesu wayebathanda oMata nodadewabo noLazaru.
- ⁶Kuthe esebikelwe ukuthi uLazaru uyagula wahlala izinsuku ezimbili kuleyondawo ayekuyo.
- ⁷Dukuduku usethi kubafundi bakhe: “Asiphindele eJudiya!”
- ⁸Abafundi bathi kuye: “Rabi, akukapholi maseko amaJuda kade efuna ukukukhanda ngamatshe, usafuna ukubuyela khona na?”
- ⁹UJesu wathi: “Angithi imini inamahora ayishumi nambili na? Uma umuntu ehamba emini akakhubeki ngoba uyakubona ukukhanya okukhanyisa lomhlaba.
- ¹⁰Kodwa uma ehamba ebusuku uyakhubeka, ngoba akukhanyi kuye.”
- ¹¹Wakusho lokho maqede wathi kubo: “Umhlobo wethu uLazaru ulele, ngizoya ngifike ngimvuse ebuthongweni.”
- ¹²Abafundi bamphendula bathi: “Nkosi, uma elele uzolulama.”
- ¹³UJesu wayeqonde ukuthi uLazaru useshonile, kodwa bona babethi ukhuluma ngokulala ubuthongo.
- ¹⁴UJesu wabatshela ngokusobala wathi: “ULazaru ufile.
- ¹⁵Kube kuhle nokho ukuba ngingabi bikho. Ngiyajabula ngenxa yenu ngoba lokho kuyonenza nikholwe. Asiye kuye manje!”
- ¹⁶UTomasi okuthiwa nguDidimu wathi kubafundi ayekanye nabo: “Asihambeni nathi sife kanye naye!”

UJesu ungukuvuka nokuphila

- ¹⁷UJesu wafika wathola ukuthi sekuphele izinsuku ezine uLazaru angcwatshwa.
- ¹⁸IBhethani laliseduze naseJerusalema, liqhelelene nalo ngamakhilomitha amathathu.
- ¹⁹Kwakufika amaJuda amaningi ezokhuza, aduduze uMata noMariya ngokushonelwa kwabo ngumfowabo.

²⁰Kwathi ukuba uMata ezwe ukuthi uJesu uyeza, waphuma wamhlangabeza, kodwa uMariya wahlala endlini, akaze aphuma.

²¹UMata wathi kuJesu: “Nkosi, ukuba ubukhona umfowethu ngabe akafanga.

²²Kodwa ngiyazi ukuthi ngisho namanje uNkulunkulu uyokunika noma yini oyicela kuye.”

²³UJesu wathi: “Umfowenu uzovuka futhi.”

²⁴UMata wamphendula wathi: “Ngiyazi ukuthi uyovuka mhla kuvuka abafileyo ekupheleni komhlaba.”

²⁵UJesu wathi kuye: “Mina ngingukuvuka nokuphila. Okholwa kimi, noma angafa kodwa uyophila.

²⁶Wonke umuntu ophilayo ekholwa kimi akasoze afa nanini. Uyakukholwa yini lokhu na? ”

²⁷Waphendula wathi: “Yebo Nkosi, ngiyakholwa ukuthi unguMesiya iNdodana kaNkulunkulu ebhekiweyo ukuthi iyeza emhlabeni.”

UJesu uyakhala

²⁸Esekushilo lokhu uMata wasuka wambizela ngasese udadewabo uMariya, wafike wathi kuye: “UMfundisi usefikile, uthi angikubize.”

²⁹Kuthe uMariya angakuzwa lokho wathi lacu wahamba wamhlangabeza.

³⁰UJesu wayengakafiki emzaneni lowo, kodwa esekuleyondawo lapho uMata ayemhlangabeze khona.

³¹Endlini kwakukhona amaJuda ayeduduza uMariya. Kuthe angambona ethi lacu ephuma, asuka amlandela. Ayethi uyokhala ethuneni.

³²UMariya wafika kuleyondawo uJesu ayekuyo. Kuthe angambona wazilahla phambi kwakhe wathi: “Nkosi ukuba ubukhona umfowethu ngabe akafanga.”

³³Kuthe lapho uJesu embona ekhala, kukhala ngisho namaJuda ayenaye, wathinteka kakhulu emoyeni, ekhathazekile,

³⁴wayesebabuza ethi: “Nimngcwabephi na? ” Bamphendula bathi: “Nkosi, woza ubone! ”

³⁵UJesu wakhala.

³⁶AmaJuda ayesethi: “Ake nibheke ukuthi ubemthanda kangakanani! ”

³⁷Kepha amanye awo athi: “Lo wavula amehlo empumputhe yabona. Pho ubengevimbe yini ukuba uLazaru angafi? ”

Ukuvuswa kukaLazaru ekufeni

³⁸UJesu wayesekhathazeka kakhulu futhi emoyeni, waya ethuneni. Lalingumhume, ligibekelwe ngenguzunga yetshe ekungeneni kwalo.

³⁹UJesu wathi: “Susani lelitshe! ” UMata udadewabo kamufi wathi: “Nkosi, useyanuka ngoba sekudlule izinsuku ezine.”

⁴⁰UJesu wathi kuye: “Angikutshelanga yini ukuthi uma ukholwa uyobona ubukhosi bukaNkulunkulu? ”

⁴¹Bayisusa-ke inguzunga yetshe. UJesu wenyusela amehlo phezulu wakhuleka wathi: “Baba, ngiyakubonga ngoba uyangizwa.

⁴²Ngiyazi ukuthi ungizwa njalo, kodwa ngikusho lokhu ngenxa yalababantu abemi lapha, ukuba bakholwe ukuthi nguwe ongithumileyo.”

⁴³Wakusho lokho, wayesememeza ngelikhulu wathi: “Lazaru, phuma! ”

⁴⁴Umufi waphuma ethandelwe ngezindwangu ezandleni nasezinyaweni, ubuso bakhe bushuqulwe ngesiqephu sendwangu. UJesu wathi kubo: “Mthukululeni, nimyeke ahambe! ”

Icebo lokubulala uJesu

(Mat 26:1-5; Mark 14:1-2; Luk 22:1-2)

⁴⁵Kuthe amaJuda amaningi ayekade eye kuMariya esebona akwenzile uJesu akholwa kuye.

⁴⁶Kodwa amanye awo aya kubafarisi, afike abaxoxela okwenziwe nguJesu.

⁴⁷Izikhulu zabaphristi kanye nabafarisi base bebiza umkhandlu bathi: “Sizokwenze njani njengoba lomuntu enze imigilingwane eminingi na?”

⁴⁸Uma simyeka aqhubeke kanje, bonke abantu bazokholwa kuye, bese kufika amaRoma abhubhise ithempeli lethu nesizwe sakithi.”

⁴⁹Omunye wabo, uKhayifase, owayengumphristi omkhulu ngalowonyaka wathi kubo: “Naze nayizithutha bo!

⁵⁰Aniboni ukuthi kunilungele ukuba kufe umuntu oyedwa ngenxa yesizwe sakithi, kunokuba isizwe sonke sibhujiswe.”

⁵¹Phela, lokhu ayekusho kwakungasuki kuye nje, kodwa ngenxa yokuthi wayengumphristi omkhulu ngalowonyaka, wabikezela ukuthi uJesu uzofela isizwe samaJuda,

⁵²angagcini ngokufela isizwe nje, kodwa afe ukuba aqoqele ndawonye abantwana bakaNkulunkulu abahlakazekileyo babe munye.

⁵³Kwasukela ngalelolangi izikhulu zamaJuda zenza icebo lokubulala uJesu.

⁵⁴Ngakhoke akabange esahamba obala kwelaseJudiya, kodwa wemuka waya endaweni eseduze nehlane emzini okuthiwa yiEfrayimu, wafike wahlala lapho nabafundi bakhe.

⁵⁵Kwasondela iPhasika, umkhosi wamaJuda. Usuku lomkhosi lwalungakafiki, kwase kwenyukela eJerusalema abantu abaningi ababevela emaphandleni, ukuba bagcine isiko lokuhlanjululwa.

⁵⁶Babefuna uJesu bemi ethempelini, bafakana imilomo bathi: “Ake nisho! Nithi ngabe uyeza emkhosini na?”

⁵⁷Izikhulu zabaphristi kanye nabafarisi babekhiphe izwi lokuthi lowo ongahle amazi lapho ekhona, akobabikela nce bambophe.

UJohane 12

UJesu ugcotshwa ngomfuma eBhethani

(Mat 26:6-13; Mark 14:3-9)

¹Kwathi sekusele izinsuku eziyisithupha kushaye iPhasika, uJesu waya eBhethani lapho kwakuhlala khona uLazaru, indoda ayeyivuse ekufeni.

²Benzela uJesu idili ukuba bambungaze. UMata wayaba ukudla etafuleni. ULazaru wayengomunye wababehlezi bedla noJesu.

³UMariya wayesethatha ingxenye yelitha yamakha omfuma okuthiwa yinardi, umfuma wakwanokusho wentengo enkulu. Wawuthela ezinyaweni zikaJesu, wamesula ngezinwele zakhe; indlu yonke yathaphuka amakha.

⁴Omunye wabafundi, uJudasi Iskariyotho owayezochilizela uJesu ezitheni wathi:

⁵“Lomfuma wakwanokusho awuthengiswanga ngani ukuba kuzuzwe imali eyizinhlamvu zesiliva ezingamakhulu amathathu bese inikwa abampofu na?”

⁶Wakusho lokhu, kungengoba ekhathalela abampofu kodwa ngoba wayeyisela. Wayengumphathisikhwama edamane eyikhwabanisa imali esikhwameni.

⁷Kepha uJesu wathi: “Myekeni owesifazane! Phela, ubewagcinile lawamakha aze angigcobe ngawo namuhla, kulungiselwe ukumbelwa kwesidumbu sami.

⁸Izimpofana niyohlala ninazo njalo, mina anizukuba nami njalo.”

Izikhulu zabaphristi zihlose ukubulala uLazaru

⁹Sase sizwa isixuku esikhulu samaJuda ukuthi uJesu useBhethani. Sanikela khona, singayile kuye kuphela, kodwa sifuna ukubona noLazaru ayemvuse ekufeni.

¹⁰Kepha izikhulu zabaphristi zakha icebo lokuba zimbulale noLazaru,

¹¹ngoba phela lendaba yakhe yabanga amaJuda amaningi ukuba abahlamuke akholwe kuJesu.

UJesu ungena ngodumo eJerusalema

(Mat 21:1-11; Mark 11:1-11; Luk 19:28-40)

¹²Ngakusasa izihlwele zabantu ezaziye emkhosini wePhasika zezwa ukuthi uJesu uyeza eJerusalema.

¹³Zase zithatha amahlamvu esundu, zaphuma zamhlangabeza zamemeza zathi: “Bayede! Ayibongwe ngegama likaSimakade leNkosi abayibika ukuthi iyeza! Ume njalo, Nkosi yakwaIsrayeli!”

¹⁴UJesu wafica imbongolo, wayigibela, njengoba kulotshiwe embhalweni ukuthi:

¹⁵“Yima isibindi ungesabi wena muzi waseZiyoni! Nansi iNkosi yakho iza igibele inkonyane yembongolo!”

¹⁶Abafundi bakhe kabakuqondanga lokho ngalesosikhathi, kodwa kwathi uJesu esenikwe udumo lwenkazimulo kaNkulunkulu, bakhumbula ukuthi umbhalo ongcwele wakukhuluma lokhu ngaye nokuthi abantu bakwenza lokhu kuye.

¹⁷Isixuku esasikade sinaye mhla evusa uLazaru ekufeni ethi akaphume ethuneni, samfakazela.

¹⁸Kuthe lapho izihlwele zabantu sezizwile ukuthi wenze lesisimangaliso zamhlangabeza.

¹⁹Abafarisi base befakana imilomo bethi: “Niyabona nje ukuthi anilungelwa lutho! Ake nimbheke, ulandelwa yizwe lonke.”

Abezizwe abathile bafuna ukubona uJesu

²⁰Kwakukhona abathile bezizwe phakathi kwalababantu abenyukela eJerusalema ukuba bakhuleke khona ngesikhathi somkhosi.

²¹Baya kuFiliphu (owayengowaseBhetsayida kwelaseGalile), bafike bathi: “Mnumzane, besifisa ukubona uJesu.”

²²UFiliphu wasuka wayotshela uAndreya, base beya bobabili, bafike batshela uJesu.

²³UJesu wabaphendula wathi: “Sekuyiso isikhathi sokuba iNdodana yesintu ithole udumo.

²⁴Nginyanitshela impela ngithi, uma uhlamvu lwamabele lutshalwa emhlabathini lungaboli, luyohlala lunjalo luwuhlamvu olulodwa, kodwa uma lubola lumile luyothela inqwaba yamabele.

²⁵Othanda ukuphila kwakhe kuyomlahlekela, kanti-ke ozonda ukuphila kwakhe lapha emhlabeni, uyokulonda ukuba athole ukuphila okuphakade.

²⁶Uma umuntu efuna ukuba yinceku yami, akangilandele; lapho ngikhona, nenceku yami iyakuba lapho. Uma umuntu engikhonza, uBaba uyomazisa lowo.

UJesu ubikezela ukufa kwakhe

²⁷“Umoya wami ulusizi manje. Ngizothini na? Ngithi: Baba ngisindise ungikhiphe kulesisikhathi sobunzima, na? Cha, ngezela lesisizathi, ukuba lesisikhathi sobunzima singehlele.

²⁸Baba, liphakamise igama lakho libe nodumo! ” Kwase kuzwakala izwi livela ezulwini lithi: “Ngiliphakamisile laba nodumo; ngizolenza ukuba liphinde lidunyiswe.”

²⁹Abantu ababemi lapho balizwa izwi. Abanye bathi beliduma, abanye kodwa bathi: “Kukhulume ingilosi kuye.”

³⁰Kepha uJesu wathi kubo: “Lelizwi elizwakeleyo belingafikele mina, kodwa belifikele nina.

³¹Lomhlaba usuyehlulelwa manje, umbusi walomhlaba usezochithwa.

³²Uma mina sengiphakanyisiwe emhlabeni ngiyobadonsa bonke abantu beze kimi.”

³³Wakusho lokho ebonakalisa indlela ayokufa ngayo.

³⁴Abantu baphendula bathi: “Sezwa kushiwo emthethweni kuthiwa uMesiya uyophila ungunaphakade. Usho kanjani wena ukuthi kumele iNdodana yesintu iphakanyiswe na? Ingubani yona leNdodana yesintu na? ”

³⁵UJesu waphendula wathi: “Ukukhanya kusazohlala nani isikhashana nje. Qhubekani nohambo kusakhanya, ningaze nihlwelwe, ngoba umuntu ohamba ebumnyameni usuke engazi ukuthi uyaphi.

³⁶Uma kusekhona ukukhanya phakathi kwenu, kholwani ukukhanya, ukuba nibe ngabantu bokukhanya.”

Ukungakholwa kwabantu

Wakusho lokhu uJesu qede wabedukela.

³⁷Kwala noma esenze izimangaliso ezingako phambi kwabo, kabaze bakholwa kuye.

³⁸Ngalesisenzo kwagcwaliseka elashiwo ngumphrofethi uIsaya mhla ethi: “Nkosi, ngubani obengase awukholwe umlayezo esawuzwayo na? Ngubani obengase aqonde ukuthi kusebenze isandla sikaSimakade kulento na? ”

³⁹Ngakhoke babengekholwe, ekubeni uIsaya wayeseke wathi futhi:

⁴⁰“UNkulunkulu ufiphaze amehlo abo, wazenza zaba lukhuni izinhliziyi zabo, ingaze babone ngamehlo abo, izinhliziyi zabo zihlakaniphe, babuyele kimi ngibaphilise.”

⁴¹UIsaya wakusho lokhu ekhuluma ngoJesu, ngoba wayeseke wayibona inkazimulo yobukhosi bakhe.

⁴²Nokho naphakathi kwezigele imbala zaba ziningi ezakholwa kuye, kodwa ngenxa yabafarisi aziphumelanga obala ukuze zinganqunywa ebandleni.

⁴³Zazithanda ukutiswa ngabantu kunokuba zituswe nguNkulunkulu.

Abantu bayokwehlulelwa ngamazwi kaJesu

⁴⁴UJesu wamemeza wathi: “Okholwa kimi ukholwa kuBaba ongithumileyo, engakholwa kimi kuphela.

⁴⁵Nalowo ongibonayo ubona ongithumileyo.

⁴⁶Ngize lapha emhlabeni ngiwukukhanya, ukuba bonke abakholwa kimi bangahlali besemnyameni.

⁴⁷Uma umuntu ezwa engikushoyo angakugcini, angiyikumahlulela mina. Angizanga lapha ukuba ngahlulele umhlaba, kodwa ngeza lapha ukuba ngisindise umhlaba.

⁴⁸Owala mina, enqaba ukwamukela amazwi ami, kukhona okumehlulelayo. Izwi engilikhulumileyo yilona eliyomahlulela ngosuku lokuphela.

⁴⁹Ngoba lokho engikushoyo akusuki kimi nje, kodwa uBaba ongithumileyo nguyena okhiphe umyalo ngakho konke okufanele ngikusho ngikukhulume.

⁵⁰Ngiyazi ukuthi umyalo wakhe uletha ukuphila okuphakade. Ngakhoke engikushoyo ngikukhuluma njengalokhu uBaba engitshelile.”

UJohane 13

UJesu ugeza izinyawo zabafundi bakhe

¹Umkhosi wePhasika wawususemnyango. UJesu wayazi ukuthi sekuya ngakhona ukuba awushiye lomhlaba abuyele kuYise. Wayelokhu ebathande njalo abangabakhe emhlabeni; wayesebakhombisa ngokusobala ukubathanda kwakhe .

²Kwakudliwa kusihlwa. USathane wayesewufakile umoya kuJudasi Iskariyotho umntakaSimoni, ukuba achilizele uJesu ezitheni.

³Yize noma uJesu wayazi ukuthi uYise ukwethule konke ezandleni zakhe, naphezu kokuba ezazi yena ukuthi ungokaNkulunkulu lapho evela khona, ubuyela kuNkulunkulu,

⁴wasukuma nokho kusadliwa wakhumula isembatho sakhe, wathatha indwangu wayibhinca okhalo.

⁵Wathela amanzi emcengezini, wayesebageza izinyawo abafundi, wabesula ngendwangu ayeyibhince okhalo.

⁶Wafika kuSimoni Phetro, UPhetro wayesethi kuye: “Nkosi, uyalokotha impela ungigeza izinyawo na?”

⁷UJesu wamphendula wathi: “Engikwenzayo ungekuqonde manje, kodwa kuyokukhanyela kamuva.”

⁸UPhetro wathi kuye: “Awusoze wangigeza izinyawo ngisho sekuthiwani!” UJesu wamphendula wathi: “Uma ngingenakukugeza awuseyena owami.”

⁹USimoni Phetro wathi kuye: “Nkosi, musa ukungigeza izinyawo zodwa, ngigeze izandla nekhanda futhi!”

¹⁰UJesu wathi: “Umuntu osegezile usuke esehlanzeke okwempela, sekusele kuphela ukuba ageze izinyawo. Nina-ke senihlambulukile, kodwa anihlambulukile nonke.”

¹¹Wayevele emazi ukuthi ungubani ozothengisa ngaye ezitheni, yingakhoke athi: “Anihlambulukile nonke.”

¹²Kuthe uJesu esebagezile izinyawo wathatha isembatho sakhe wagqoka, wahlala phansi wazinja. Wathi kubo: “Niyayiqonda yini lento engiyenze kini na?”

¹³Ningibiza nithi: ‘Mfundisi!’ nithi: ‘Nkosi!’ Nikusho ngakhona, ngoba ngiyikho lokho.

¹⁴Uma-ke mina engiyiNkosi noMfundisi wenu nginigezile izinyawo, kufanele ukuba nani nigezane izinyawo.

¹⁵Senginzelele isibonelo, ukuba nani nenze njengoba kade ngenza kinina.

¹⁶Empeleni phela isisebenzi kasisikhulu kunomnumzane esimsebenzelayo, nesithunywa kasisikhulu kunosithumileyo.

¹⁷Uma nikwazi lokhu nibusisekile uma nikwenza.

¹⁸“Angikhulumi ngani nonke, ngiyazi ukuthi bangobani engibakhethileyo. Kodwa lokhu kuyenzeka ukuze kugcwaliseke okushiwo ngumbhalo ongcwele othi: “‘Lowo ebengidla sithebeni sinye naye usengiphendukele wangenzela ubunyoka.’”

¹⁹“Nginitshela lokhu manje kungakenzeki, ukuze kuthi uma sekwenzeka nikhholwe ukuthi nginguye okhona.

²⁰Niyabona! Impela, lowo owemukela engimthumileyo wemukela mina, lowo-ke ongemukelayo wemukela uBaba ongithumileyo.”

UJesu ubikezela ukuchilizelwa kwakhe ezitheni

(Mat 26:20-25; Mark 14:17-21; Luk 22:21-23)

²¹UJesu esekushilo lokho, wakhathazeka emoyeni, wakhuluma ngokusobala wathi: “Lalelani lapha nginitshela! Omunye phakathi kwenu uzongichilizela ezitheni.”

²²Abafundi babhekana bodwa besambathekiswa ukuthi ngabe uqondise kubani.

²³Omunye wabafundi, lowo owayethandwa kakhulu nguJesu, wayehlezi eduze kwakhe etafuleni.

²⁴USimoni Phetro wamqhweba, wathi akambuze ukuthi ukhuluma ngobani.

²⁵Lomfundi wayeseyama ngakuJesu, wambuza wathi: “Nkosi, ngubani lowo na?”

²⁶UJesu waphendula wathi: “Yilowo engizomgobhozela ucezu lwesinkwa ngimnike lona.” Wayeselugcobhoza-ke, walunika uJudasi umfokaSimoni Iskariyotho.

²⁷UJudasi walwamukela ucezu maqede uSathane wangena kuye. UJesu wathi kuye: “Ozokwenza, kwenze masinyane!”

²⁸Akukho muntu owakhanyelwayo kwabasetafuleni ukuthi uJesu ukusholoni lokhu kuJudasi.

²⁹Njengoba kwakunguJudasi owayephatha isikhwama semali, abanye babo babethi uJesu ubemtshela ukuba ayothenga ababekudinga emkhosini, kumbe emthuma ukuba abele abampofu.

³⁰UJudasi walwamukela-ke ucezu lwesinkwa maqede waphuma. Kwase kuhlwile.

Umyalo omusha

³¹Kuthe uJudasi esephumile, uJesu wathi: “INdodana yesintu yethweswe udumo, noNkulunkulu wathola udumo ngayo.

³²Njengoba uNkulunkulu ethole udumo ngayo, uNkulunkulu uyoyinika udumo lwenkazimulo yakhe, ayinike lona masinyane.

³³Bantabami, ngisazoke ngihlale nani okwesikhashana nje. Niyongifuna, kodwa sengiyanitshela nani lokho engakusho ezikhulwini zamaJuda ngathi: ‘Ningeze naya lapho ngiya khona.’

³⁴Ngininika nanku umyalo omusha othi: Thandanani! Kufanele ukuba nithandane nani ngalolothando enginithande ngalo.

³⁵Bonke abantu bayonazi ukuthi ningabafundi bami uma nithandana.”

UJesu ubikezela ukuphika kukaPhetro

(Mat 26:31-35; Mark 14:27-31; Luk 22:31-34)

³⁶USimoni Phetro wabuza kuye wathi: “Nkosi, uyaphi na?” UJesu waphendula wathi: “Ungengilandele okwamanje lapho ngiya khona, kodwa uyongilandela kamuva.”

³⁷UPetro wathi kuye: “Nkosi, ngingekulandele ngani kwamanje na? Ngiyodela ukuphila kwami ngenxa yakho.”

³⁸UJesu waphendula wathi: “Uthi uyodela ukuphila kwakho ngenxa yami na? Ngiqinisile uma ngithi, iqhude lingakakhali uyobe usungiphike kathathu.

UJohane 14

UJesu uyindlela eya kuYise

¹“Umoya wenu awungakhathazeki! Kholwani kuNkulunkulu, nikhholwe nakimi futhi!

- ²Emzini kaBaba kunezindlu eziningi. Ukuba bekungenjalo, bengiyonitshela yini ukuthi ngiyahamba ngiyonilungisela indawo?
- ³Uma sengihambile ngafike nganilungisela indawo, ngobuya nginilande, nihlale nami lapho ngikhona.
- ⁴Niyayazi indlela eya kuleyondawo lapho ngiya khona.”
- ⁵UTomasi wabuza wathi: “Nkosi, asazi ukuthi uyaphi, pho sizoyazi kanjani indlela na?”
- ⁶UJesu wathi kuye: “Mina ngiyindlela neqiniso nokuphila, akukho muntu ongaya kuBaba uma engangeni ngami.
- ⁷Ukuba benazi mina, beniyomazi noBaba; kusukela manje niyamazi senimbonile.”
- ⁸UFiliphu wathi kuye: “Nkosi, sikhombise uYihlo saneliswe.”
- ⁹UJesu waphendula wathi: “Sengihlale nani isikhathi eside; usho ukuthi awukangazi namanje Filiphu? Lowo oseke wangibona usembonile noBaba. Pho ungasho kanjani uthi: ‘Sikhombise uYihlo!’ na?”
- ¹⁰Awukholwa yini ukuthi mina ngikuBaba, uBaba ukimi simunye na? Lokho engikusho kini akusuki kimi nje. UBaba ohlala ekimi, nguye owenza imisebenzi yakhe.
- ¹¹Kholwani lokhu engikushoyo ukuthi mina ngikuBaba, uBaba ukimi. Okungenani kholwani ngenxa yalemisebenzi!
- ¹²Ngियाqinisa ngithi kini, okholwayo kimi uyokwenza izimangaliso ezifana nalezi engizenzayo, enze ngisho nezinkulu ezedlula lezi, ngoba sengiya kuBaba,
- ¹³bese nginenzela noma yini eniyicelayo ngegama lami, uBaba athole udumo ngeNdodana.
- ¹⁴Uma kukhona utho eningicela lona ngegama lami, ngiyolwenza.

UJesu ubethembisa uMoya oyiNgcwele

- ¹⁵“Uma ningithanda niyogcina imiyalo yami.
- ¹⁶Ngocela uBaba abeseninika omunye uMduduzi oyohlala nani njalo,
- ¹⁷onguMoya weqiniso. Abomhlaba bangemamukele, ngoba kabamboni, kabamazi. Kodwa nina niyamazi, ngoba uhlala nani njalo, ukinina.
- ¹⁸“Angiyikunishiya niyizintandane; ngobuya ngize kini.
- ¹⁹Emuva kwesikhashana abomhlaba kabasayikungibona, kodwa nina niyongibona, ngoba mina ngiyaphila, nani niyophila futhi.
- ²⁰Ngalolosuku niyoqonda ukuthi mina ngikuBaba nokuthi mina ngikini, nani nikimi simunye.

- ²¹“Lowo owemukela imiyalo yami ayigcine uyangithanda. UBaba uyomthanda lowo ongithandayo; nami-ke ngomthanda ngizibonakalise kuye.”
- ²²UJudasi (kungesiye uJudasi Iskariyotho) wayesethi: “Nkosi, yini eyenza ukuba uzibonakalise kithi, kodwa ungazibonakalisi kwabomhlaba na?”
- ²³UJesu wamphendula wathi: “Uma umuntu engithanda, uyoyigcina imfundiso yami. UBaba uyomthanda, mina noBaba siyoya kuye sifike sikhale naye.
- ²⁴Lowo ongangithandiyo akayigcini imfundiso yami. Imfundiso eniyizwileyo ayisiyo eyami, kodwa ivela kuBaba ongithumileyo.
- ²⁵“Lokhu ngikukhulume kini ngisahlezi nani.
- ²⁶UMduduzi, uMoya oyiNgcwele, oyothunyelwa nguBaba ngegama lami, uyonifundisa anikhumbuze konke enginitshela khona.
- ²⁷“Nginishiya nokuthula, nginipha ukuthula okukimi. Angininiki ukuthula okufana nokwasemhlabeni. Ningakhathazeki emoyeni nesabe!
- ²⁸Nizwile ukuthi ngithe kini: ‘Ngiyahamba, kodwa ngiyabuya futhi ngiza kini.’ Ukuba beningithanda benizokujabulela ukuya kwami kuBaba, ngoba uBaba mkhulu kunami.
- ²⁹Nginitshelile ngalokhu kungakenzeki, ukuze nikholwe uma sekwenzeka.
- ³⁰Angisayikukhuluma nani ngelule, ngoba umbusi omubi walomhlaba uyeza; akanalutho olukimi angangithinta ngalo.
- ³¹Nokho kuhle umhlaba wazi ukuthi uBaba ngiyamthanda nokuthi ngenza njengalokhu uBaba engiyalezile. “Sukumani sihambe!”

UJohane 15

UJesu ungumvini wempela

- ¹“Mina ngingumvini wempela, uBaba ungumlimi.
- ²Lelogatsha elisuke limile kimi kepha lingatheli uyalisusa, kuthi leli elithelayo alithene linqunteke kahle, nce lithele kakhulu.
- ³Senivele nahlanzeka ngenxa yamazwi engiwakhulume kini.
- ⁴Hlalani nikimi, nami ngikhale ngikini. Igatsha lingethele ngokwalo; lingathela kuphela uma limile emvinini. Kanjalo-ke nani ningethele uma ningahlali nikimi.
- ⁵“Mina ngingumvini, nina ningamatsha. Ohlala ekimi nami ngikuye uyothela kakhulu, ngoba akukho lutho eningakwenza ngaphandle kwami.
- ⁶Uma umuntu engahlali ekimi, uyoba njengegatsha elintshingweyo lase loma khehle. Amatsha lawo aqoqelwa ndawonye aphonswa emlilweni ashe.

- ⁷Uma nihlala nikimi namazwi ami ehlala kini, niyocela noma yini eniyithandayo, niyiphiwe.
- ⁸Ngokuthela kakhulu nibonisa khona ukuthi ningabafundi bami, uBaba athole udumo.
- ⁹Nginithandile njengalokhu uBaba engithandile, ngakho hlalani nisothandweni enginithanda ngalo.
- ¹⁰Uma nigcina imiyalo yami niyohlala othandweni lwami, njengalokhu nami ngiyigcinile imiyalo kaBaba ngihlala othandweni lwakhe.
- ¹¹“Nginitshelile lokhu yikhona ukuthokoza kwami kuzogxila kini nokuthokoza kwenu kuphelele.
- ¹²Umyalo wami yiwo lona ukuba nithandane njengalokhu nami nginithandile.
- ¹³Alukho uthando olukhulu olwedlula ukuba umuntu adele ukuphila kwakhe afele abahlobo bakhe.
- ¹⁴Ningabahlobo bami uma nenza lokho enginiyaleza khona.
- ¹⁵Angisanibizi ngokuthi niyizisebenzi zami, ngoba isisebenzi singeze sakwazi okwenziwa yilowo esimsebenzelayo. Kodwa nginibiza ngokuthi ningabahlobo bami, ngoba nginitshela ngakho konke engikuzwe kuBaba.
- ¹⁶Nina aningikhethanga, kepha yimina enganikhethayo. Nganiqoka ukuba nihambe nishumayele kubantu, kuvele izithelo, izithelo zomsebenzi wenu zihlale zikhona njalo, yikhona uBaba ezonipha noma yini eniyicela ngegama lami.
- ¹⁷Yilokhu-ke enginiyaleza ngakho, ukuba nithandane.

Inzondo yabomhlaba

- ¹⁸“Uma abomhlaba benizonda, nize nikhumbule ukuthi baqala bazonda mina.
- ¹⁹Ukuba beningabomhlaba bebeyonithanda abomhlaba ngoba ningabakhona. Kodwa nganenyula kulomhlaba, anisibo abawo, yingakho nje umhlaba unizonda.
- ²⁰Khumbulani ukuthi ngithe kini: ‘Isisebenzi kasisikhulu kunomnumzane esimsebenzelayo.’ Uma bangihlupha mina, bayonihlupha nani. Uma bawagcina amazwi ami, bayowagcina nawenu.
- ²¹Kodwa bayonenza konke lokhu ngesizathu sokuthi ningabami, ngoba kabamazi uBaba ongithumileyo.
- ²²Ukuba bengingezanga lapha ngafike ngakhuluma kubo, bebengayikuba nacala. Kepha manje kabanazaba ngesono sabo.
- ²³Ozonda mina uzonda noBaba.

²⁴Ukuba bengingazenzanga izimangaliso phakathi kwabo ezingakaze zenziwe ngomunye, bebengayikuba nacala. Kepha manje sebekubonile engikwenzileyo, nokho basizonda sobabili noBaba.

²⁵Kodwa lokhu kwenzeka ukuze kugcwaliseke okulotshwe emibhalweni yabo ukuthi: “ ‘Bangizondela into engekho.’

²⁶“UMduduzi uyeza, uMoya weqiniso ophuma kuBaba. Ngiyomthumela kini evela kuBaba, afike angifakazele.

²⁷Nani niyongifakazela ngoba benihamba nami kwasekuqaleni.

UJohane 16

¹“Ngikukhulumile lokhu kini ukuze ningakhubeki nihlubuke ekukholweni.

²Bayoninquma ebandleni; siyeza isikhathi lapho kuyothi bonke abanibulalayo bathi bethula umnikelo kuNkulunkulu ngalokho.

³Bayokwenza kini lokhu ngoba bengazange bamazi uBaba, bengazange bangazi nami.

⁴Kodwa ngikukhulume lokhu ukuze kuthi uma sekufika inkathi yokuba kwenzeke nikhumbule ukuthi nganginitshelile.

Umsebenzi woMduduzi onguMoya oyiNgcwele

“Ekusukeni angikushongo lokhu kini, ngoba bengisahleli nani.

⁵Manje ngiyemuka ngibuyela kuBaba ongithumileyo, nokho akukho muntu kini ongibuza ukuthi ngiyaphi.

⁶Kodwa manje inhliziyo yenu isisuke yalusizi ngoba sengikhulume kanje kinina.

⁷Nginitshela iqiniso ngithi kunilungele ukuba ngimuke, ngoba uma ngingamuki uMduduzi kayikuza kini. Kodwa uma ngimuka ngiyomthumela kini.

⁸Uma esefika uyohlalukisa obala ukweduka kwabantu bomhlaba mayelana nokona nokulunga nokwahlulelwa.

⁹Bedukile mayelana nokona, ngoba bengakholwa kimi.

¹⁰Bedukile ngokulunga njengoba ngiya kuBaba, ningebe futhi nisangibona.

¹¹Bedukile ngokwahlulelwa njengoba umbusi omubi walomhlaba kudala ehlulelwe.

¹²“Kuningi ebengisazonitshela khona, kodwa ngeke nikumele okwamanje.

¹³Kodwa uma esefika lowo onguMoya weqiniso, uyoniholela kulo lonke iqiniso. Akayikuzikhulumela okwakhe, kodwa uyosho lokho akuzwayo, anibikele ngezinto ezizayo.

¹⁴Uyongilethela udumo, ngoba uyothatha lokho engikushoyo anitshela khona.

¹⁵Konke uBaba anakho kungokwami; yingakho nje ngithe uMoya weqiniso uyothatha engikushoyo unitshele khona.

Ukudabuka nokuthokoza

¹⁶“Emuva kwesikhashana anisayikungibona, kudlule isikhashana futhi bese ningibona.”

¹⁷Abanye babafundi bakhe bafakana imilomo bathi: “Uqonde ukuthini uma ethi kithi: ‘Emuva kwesikhashana anisayikungibona, kudlule isikhashana futhi, bese ningibona,’ nokuthi: ‘Ngiya kuBaba’ na?”

¹⁸Usho ukuthini uma ethi: ‘Emuva kwesikhashana’ na? Asimuzwa ukuthi uqondeni.”

¹⁹UJesu wayazi ukuthi babefuna ukumbuza, wayesethi kubo: “Ngithe: ‘Emuva kwesikhashana anisayikungibona, kudlule isikhashana futhi bese ningibona.’ Ngabe yilokho enibuzana ngakho nodwa na?”

²⁰Ngiyanitshela ngithi, ngempela nina niyokhala nilile, kodwa abomhlaba bayothokoza; nina niyodabuka, kodwa ukudabuka kwenu kuyophenduka kube yintokozo.

²¹Nxa owesifazane esebeletha uba lusizi ngoba usuke eshelelwa, kodwa uma esebelethile uyazikhohlwa izinhlungu ebezimphethe, athokoze ngoba usenomntwana.

²²Nani nilusizi manje kodwa ngizobuye nginibone, nibuye nithokoze futhi emoyeni ngokuthokoza eningekwaphucwe muntu.

²³“Ngalolosuku aniyikungibuza lutho. Ngiyaqinisa impela ngithi, uBaba uyoninika enikucelayo ngegama lami.

²⁴Kuze kube manje beningakaceli lutho ngegama lami. Celani yikhona niyophiwa, bese ukuthokoza kwenu kuphelela.

Ukunqotshwa kwabomhlaba

²⁵“Ngisebenzise amagama ayimpica lapho ngikukhuluma kini lokhu. Siyeza kodwa isikhathi lapho ngingasayikukhuluma kini ngicashise inkulumo, kodwa nginitshela ngoBaba ngamazwi asobala.

²⁶Ngalolosuku niyocela ngegama lami. Akuyikudingeka ukuba nginicelele kuBaba,

²⁷ngoba uBaba uqobo uyanithanda ngenxa yokuba ningithandile, nakholwa ukuthi ngavela kuMvelinqangi.

²⁸Ngavela kuBaba ngeza lapha emhlabeni; sengiyawushiya lomhlaba ngibuyela kuBaba.”

²⁹Abafundi bakhe base bethi kuye: “Manje usukhuluma ngokusobala, awusayicashisi inkulumo.

³⁰Sesiyazi ukuthi wazi konke, akusadingekile ukuba ubuzwe muntu. Yilokhu okusenza ukuba sikholwe ukuthi uvela kuMvelinqangi.”

³¹UJesu wabaphendula wathi: “Seniyakholwa yini na?

³²Niyabona! Siyeza isikhathi, yebo sesifikile manje, lapho niyohlakazeka nonke, yilowo nalowo athathe indlela yakhe, ningishiye ngedwa. Nokho-ke angingedwa, ngoba uBaba unami.

³³Lokhu ngikushilo kini ukuba nibe nokuthula nisebunyeni nami. Emhlabeni niyahlupheka, kodwa yimani isibindi ningesabi, ngoba ngiwunqobile umhlaba.”

UJohane 17

Umkhuleko kaJesu enxusela abafundi bakhe

¹UJesu wakusho lokho, wayesenyusa amehlo wabheka ezulwini, wakhuleka wathi: “Baba, sekuyiso isikhathi. Yinike udumo iNdodana yakho, nce wena uthole udumo ngeNdodana.

²Uyinyikile amandla phezu kwesintu sonke, ukuze ibanike ukuphila okuphakade bonke labo oyinike bona.

³Ukuphila okuphakade yilokhu ukuba bakwazi wena Nkulunkulu uSimayedwa onguyenayena, bazi noJesu Kristu omthumileyo.

⁴Ngiluhamisile udumo lwakho emhlabeni, ngawufeza lowomsebenzi owanginika wona ukuba ngiwenze.

⁵Manje Baba, nginike udumo njengoba ngikuwe, lolodumo engangivele nginalo ngisekuwe umhlaba ungakadalwa.

⁶“Ngibazisile ukuthi ungubani lababantu ongiphe bona owabenyula kwabomhlaba. Bebengabakho, wawusunginika bona. Baligcinile izwi lakho,

⁷sebeyazi manje ukuthi konke ongiphe khona kuvela kuwe.

⁸Amazwi owawasho kimi ngiwadlulisele kubo, bawemukela. Kubakhanyekele kwasobala ukuthi ngavela kuwe. Bayakholwa ukuthi nguwana ongithumile.

⁹“Ngiyabakhulekela. Angikhulekeli abomhlaba, kodwa labo onginike bona ngibakhulekela ngoba bebengabakho.

¹⁰Konke enginakho kungokwakho, nalokho onakho kungokwami; ngilutholile udumo ngabo.

¹¹Ngiza kuwe manje, angisezukuhlala emhlabeni kodwa bona basesemhlabeni. Baba ongcwele, balonde ngamandla egama lakho onginike lona, ukuba babe munye njengalokhu mina nawe simunye.

¹²Ngenkathi ngisenabo ngibalondile ngamandla egama lakho onginike lona. Ngabavikela, akukho noyedwa kubo owabhubha ngaphandle kwalomuntu

owayemiselwe ukubhubha, ukuba kugcwaliseke okulotshwe embhalweni ongcwele.

¹³Manje ngiza kuwe; ngikukhuluma lokhu ngisesemhlabeni, ukuba ukuthokoza kwami kuhlale kubo ngokupheleleyo.

¹⁴Amazwi owawasho kimi ngiwadlulisele kubo, abomhlaba base bebazonda, ngoba bengesibo abomhlaba, njengalokhu nami ngingesiye owomhlaba.

¹⁵Angiceli ukuba ubasuse emhlabeni, kodwa ngicela ukuba ubavikele kuSathane.

¹⁶Kabasibo abalomhlaba, njengalokho nami ngingesiye owomhlaba.

¹⁷Bangcwelise ngeqiniso; izwi lakho liyiqiniso.

¹⁸Njengalokhu wangithumela emhlabeni nami-ke ngibathumele emhlabeni.

¹⁹Ngenxa yabo ngiyazethula kuwe ngingcwele, ukuba nabo bangcweliswe ngeqiniso, babe ngabehlukaniselwe wena.

²⁰“Anginxuseli bona bodwa kodwa nalabo abayokholwa kimi ngenxa yokufakaza kwalaba.

²¹Baba, ngiyabaxusela bonke laba ukuba babe munye njengalokhu simunye, wena ukimi nami ngikuwe, ukuba nabo babe sebunyeni bethu, abomhlaba bakholwe ukuthi nguweni ongithumileyo.

²²Ngibanikile udumo owanginika lona, ukuba babe munye njengalokhu thina simunye.

²³Mina ngikubo, wena ukimi, nabo ababe munye ngokuphelele, ukuze abomhlaba bazi ukuthi nguweni ongithumileyo nokuthi ubathandile njengalokhu wangithanda.

²⁴“Baba, ngifuna ukuba labo onginike bona babe nami futhi nabo lapho ngikhona, nce babone udumo onginike lona, ngoba wangithanda ungakadalwa umhlaba.

²⁵Baba, wena olungileyo, abomhlaba kabakwazi wena, kodwa mina ngiyakwazi, nalaba bayazi ukuthi nguweni ongithumileyo.

²⁶Ngibazisile ukuthi ungubani, ngizoqhubeka nokubazisa, ukuze uthando lwakho owangithanda ngalo lube kubo, nami ngibe kubo.”

UJohane 18

UJesu ukhashelwa ezitheni uyaboshwa

(Mat 26:47-56; Mark 14:43-50; Luk 22:47-53)

¹Kwathi uJesu esekushilo lokhu, wasuka nabafundi bakhe bawelela ngaphesheya komfundlana iKhidroni. Kwakukhona isivande semihlwathi kuleyondawo. UJesu nabafundi bakhe bangena kuso.

²UJudasi okunguyena owathengisa ngoJesu ezitheni wayeyazi leyondawo, ngoba uJesu wayevamise ukuya kuyo nabafundi bakhe.

³UJudasi walanda isigejane samabutho amaRoma kanye nogqayinyanga ababethunyelwe yizikhulu zabaphristi kanye nabafarisi, wabahola baya kulesisivande. Babehlome ngezikhali, bephethe iziketekete nezihlonti.

⁴UJesu wayekwazi konke okuzomehlela, waziveza obala, wafike wathi kubo: “Nifuna bani na?”

⁵Bamphendula bathi: “UJesu waseNazaretha.” Wayesethi: “Yimina.” UJudasi owamchilizela ezitheni wayemi nabo.

⁶Ngenkathi uJesu ethi kubo: “Yimina”, bahlehla nyovane bashayeka phansi.

⁷UJesu wabuye wababuza wathi: “Nifuna bani na?” Bathi: “UJesu waseNazaretha.”

⁸UJesu wathi: “Ingani ngishilo ngathi yimina. Uma kuyimina enimfunayo bayekeni laba bahambe!”

⁹Wakusho lokhu ukuba kugcwaliseke amazwi ayewashilo athi: “Baba, angilahlekelwanga ngisho nangoyedwa kulabo onginike bona.”

¹⁰USimoni Phetro wagqashula inkemba ayeyiphethe, wagadla ngayo esisebenzini somphristi omkhulu, wasihhebhula indlebe yesokunene. Igama lesisebenzi kwakunguMalkosi.

¹¹UJesu wathi kuPhetro: “Buyisela inkemba emgodleni! Akufanele yini ngiphuze indebe yokuhlupheka uBaba anginike yona na?”

UJesu usiwa phambi komphristi omkhulu

(Mat 26:57-58; Mark 14:53-54; Luk 22:54)

¹²Asuka amabutho amaRoma nomphathi wawo nogqayinyanga bamaJuda, babamba uJesu bambopha.

¹³Baqala bamusa kuHanase ngoba wayengumukhwe kaKhayifase owayengumphristi omkhulu ngalowonyaka.

¹⁴Phela uKhayifase nguye oweluleka izikhulu zamaJuda ukuthi kubalungele ukuba umuntu oyedwa afele isizwe sonke.

UJesu uphikwa nguPhetro

(Mat 26:69-70; Mark 14:66-68; Luk 22:55-57)

¹⁵USimoni Phetro nomunye umfundi balandela uJesu. Lomfundi wayaziwa ngumphristi omkhulu. Wangena kanye noJesu emageckeni akwumphristi omkhulu,

¹⁶kepha uPhetro wasala ngaphandle emi ngasesangweni. Wayesesuka lomfundi omunye owayaziwa ngumphristi omkhulu, esephindela phandle. Wafike wakhuluma nentombazane eyayisesangweni, wangena kanye noPhetro.

¹⁷Intombazane eyayisesangweni yathi kuPhetro: “Ungomunye nawe wabafundi balomuntu, phika!” UPhetro wayiphendula wathi: “Qha, angiyena.”

¹⁸Izisebenzi kanye nogqayinyanga babebase umlilo wamalahle, bewungungile botha. Naye uPhetro waya wafike wotha nabo.

Umphristi omkhulu ubuza uJesu

(Mat 26:59-66; Mark 14:55-64; Luk 22:66-71)

¹⁹Umphristi omkhulu wabuza uJesu ngabafundi bakhe nangemfundiso yakhe.

²⁰UJesu wamphendula wathi: “Ngikhulume obala phambi kwabantu bonke. Bengilokhu ngifundisa emasinagogeni nasethempelini lapho kuhlanguanela khona onke amaJuda, angikhulumanga lutho ngasese.

²¹Ungibuzelani? Buza kulabo ababengizwa ngikhuluma, ubabuze ukuthi ngathini kubo. Bayakwazi engakushoyo.”

²²Kuthe uJesu esekushilo lokhu, omunye wogqayinyanga owayemi lapho wayesesuka esemumkela ethi kuye: “Unasibindi sini sokuphendula umphristi omkhulu kanjena na?”

²³UJesu waphendula wathi: “Uma kukhona okubi engikushilo, shono ukuthi kubi ngani! Kodwa uma kuyiqiniso engikushilo, pho ungishayelani na?”

²⁴UJesu wayelokhu eboshiwe, uHanase wayesemthumela kuKhayifase umphristi omkhulu.

UPhetro uphika uJesu ngokwesibili

(Mat 26:71-75; Mark 14:69-72; Luk 22:58-62)

²⁵USimoni Phetro wayelokhu emi otha umlilo. Bambuza bathi: “Uyaphika ukuthi nawe ungomunye wabafundi bakhe na?” Kodwa uPhetro waphika walala ngomhlane wathi: “Angisiye.”

²⁶Esinye sezisebenzi zomphristi omkhulu, esasiyisihlobo saleyondoda uPhetro ayeyihhebhule indlebe, sambuza sathi: “Kanti angikubonanga yini unaye esivandeni na?”

²⁷UPhetro waphika futhi. Khona manjalo kwakikiliga iqhude.

UJesu uphambi kukaPilatu

(Mat 27:1-2, 11-14; Mark 15:1-5; Luk 23:1-5)

²⁸Base bemthatha uJesu kwaKhayifase bamusa esigodlweni sikalusibalukhulu. Kwakusekuseni kakhulu. Izikhulu zamaJuda kazingenanga esigodlweni, ziqikelele ukuhlala zihlanzekile ngokosiko zingangcoli, kanti zizokudla iwundlu lePhasika.

²⁹UPilatu waphuma waya kuzo, wafike wathi: “Lomuntu nimethwesa cala lini na?”

³⁰Zaphendula zathi: “Besingeke simlethe kuwe ukuba ubengenzanga cala.”

³¹UPilatu wathi kuzo: “Mthatheni nimehlulele nina ngokomthetho wakini! ” Zaphendula zathi: “Akumthetho ukuba sibulale umuntu.”

³²Lokhu kwenzeka ukuba kufezeke amazwi kaJesusu lapho ebonisa ukuthi uzokufa kanjani.

³³UPilatu wabuye waphindela esigodlweni, wabiza uJesusu wambuza wathi: “Wena uyinkosi yamaJuda na? ”

³⁴UJesusu waphendula wathi: “Ukusho lokhu wena ngokwakho noma mhlawumbe bakhona yini abakutshela ngami na? ”

³⁵UPilatu waphendula wathi: “Kanti ngingumJuda yini mina? Isizwe sakini nezikhulu zabaphristi yizona ezikunikele kimi. Wenzeni na? ”

³⁶UJesusu wathi: “Umbuso wami awusiwo owalomhlaba. Ukuba umbuso wami ubungowalomhlaba, amabutho ami abezongilwela nginganikelwa ezikhulwini zamaJuda. Kodwa-ke umbuso wami awusiwo owalapha.”

³⁷UPilatu wambuza wathi: “Hhawu, kanti uyinkosi ngempela yini? ” UJesusu waphendula wathi: “Kusho wena ukuthi ngiyinkosi. Ngazalelwa ukuba ngimele iqiniso, ngeza lapha emhlabeni ngaleyonhloso. Wonke umuntu othanda iqiniso uyangilalela.”

³⁸UPilatu wathi: “Iqiniso! Yini yona leyo? ”

UJesusu ugwetshwa ukuba abulawe

(Mat 27:15-31; Mark 15:6-20; Luk 23:13-25)

Wabuye waphumela phandle, wafike wathi emaJudeni: “Mina ngokwami angimtholi enecala.

³⁹Kodwa ngokwesiko lenu ngiyaye nginikhululele isiboshwa sibe sinye ngePhasika. Niyathanda yini ukuba nginikhululele inkosi yamaJuda na? ”

⁴⁰Amemeza aqonga athi: “Qha, asimfuni lo! Sifuna uBharabha! ” UBharabha wayengumphangi.

UJohane 19

¹UPilatu wayesethatha uJesusu esethi akabhaxabulwe.

²Amabutho aphica umqhele wamahlamvu anameva amnqwazisa wona, amembathisa isevathu esibubende.

³Aya kuye afike athi: “Bayede, ume njalo nkosi yamaJuda! ” Ayesemmukula.

⁴UPilatu wabuye waphumela phandle wathi kubantu: “Lalelani lapha! Ngizomkhipha ngimlethe kini, nizibonele nina ukuthi angitholi cala kuye.”

⁵UJesusu waphuma ethwele umqhele onameva nesevathu esibubende. UPilatu wathi kubo: “Mbukeni nangu umuntu! ”

⁶Kwathi ukuba zimbone izikhulu zabaphristi nogqayinyanga basethempelini, bamemeza baqonga bathi: “Mbethele, mbethele! ” UPilatu wathi kubo: “Mthatheni nina nimbethele esiphambanweni! Mina angimtholi enecala.”

⁷AmaJuda aphenhula athi: “Sinowethu umthetho thina! Ngokwalomthetho kufanele afe, ngoba uzishaya iNdodana kaNkulunkulu.”

⁸Kwathi ukuba uPilatu akuzwe lokhu, waqala phansi washaywa uvalo kakhulu.

⁹Wangena futhi esigodlweni, wabuza kuJesu wathi: “Ungowaphi lapho uvela khona? ” Kodwa uJesu wawuhlaba inhlali.

¹⁰UPilatu wathi kuye: “Awufuni ukukhuluma kimi? Awazi yini ukuthi nginamandla okukukhulula, nginamandla okukubethela? ”

¹¹UJesu waphendula wathi: “Ubungeke ube namandla phezu kwami ungawaphiwanga nguNkulunkulu; ngakhoke lomuntu onginikele kuwe unecala elikhulu kunawe.”

¹²Kwasukela lapho uPilatu wafuna ukumdedela. Kodwa amaJuda amemeza athi: “Uma uke wadedela lo, awusiye umngane kaKhesari ingonyama yaseRoma, ngoba umuntu osuke ezishaya inkosi uzeqhatha noKhesari.”

¹³Kwathi ukuba uPilatu ezwe lawamazwi, wakhiphela uJesu phandle, waqhwakela esihlalweni somahluleli endaweni okuthiwa yisiGcawu esiGandaywe ngamaTshe. NgesiHebheru kuthiwa yiGabhatha.

¹⁴Kwakusemini ngosuku olwandulela umkhosi wePhasika. UPilatu wathi emaJudeni: “Nansi inkosi yenu! ”

¹⁵Amemeza athi: “Mbulale! Mbulale! Mbethele! ” UPilatu wabuza wathi: “Nithi angibethele inkosi yenu na? ” Izikhulu zabaphristi zamphendula zathi: “Asinankosi ngaphandle kwengonyama uKhesari! ”

¹⁶UPilatu wayeselahlala uJesu kubo ukuba abethelwe esiphambanweni.

UJesu ubethelwa esiphambanweni

(Mat 27:32-44; Mark 15:21-32; Luk 23:26-43)

Bamthatha uJesu bahamba naye.

¹⁷Waphuma etshathe isiphambano sakhe, wafika endaweni ethiwa kusoGebhezini lweKhanda; ngesiHebheru kuthiwa yiGolgotha.

¹⁸Bafike babethela eziphambanweni uJesu kanye nabanye ababili ngapha nangapha kwakhe, bemphahle phakathi.

¹⁹UPilatu wakhipha isaziso esilotshiweyo esakhwezwa esiphambanweni. Sasilotshiwe sathiwa: “UJesu waseNazaretha, inkosi yamaJuda.”

²⁰AmaJuda amaningi asifunda lesisaziso, ngoba indawo lapho uJesu ayebethelwe khona yayiseduze nomuzi waseJerusalema. Sasilotshwe ngesiHebheru nangesiLatini nangesiGriki.

²¹Izikhulu zabaphristi bamaJuda zase zithi kuPilatu: “Mus' ukuloba uthi: ‘Inkosi yamaJuda,’ kodwa loba uthi: ‘Lomuntu wathi uyinkosi yamaJuda.’ ”

²²UPilatu waphendula wathi: “Esengikulobile ngikulobile.”

²³Kuthe amabutho esembethele uJesu esiphambanweni, athatha izingubo zakhe azehlukanisa amaqoqwana amane, yilelobutho lathola uphawini walo. Athatha nesevatho sakhe esasiyindwangu engenamthungo yelukiwe yonke uthi lwayo.

²⁴Abonisana odwa athi: “Asingasidabuli, kodwa asenze inkatho sibone ukuthi siyoba ngesikabani”. Lokhu kwenzeka ukuba kugcwaliseke okushiwo umbhalo ongcwele othi: “Izingubo zami behlukaniselana ngazo nangesevatho sami benza inkatho.” Yilokho-ke okwenziwa ngamabutho.

²⁵Eduze kwesiphambano sikaJesu kwakumi unina nodadewabo kanina noMariya umkaKlophase noMariya waseMagdala.

²⁶UJesu wabona unina, wabona nomfundi ayemthanda kakhulu emi lapho, wathi kunina: “Mame, nansi indodana yakho! ”

²⁷Wayesethi kumfundi: “Ndodana, nangu unyoko! ” Kusukela ngalesosikhathi umfundi lowo wathatha unina kaJesu wafike wamhlalisa kubo.

Ukufa kukaJesu

(Mat 27:45-56; Mark 15:33-41; Luk 23:44-49)

²⁸UJesu wayazi ukuthi konke sekufezekile. Ukuze kugcwaliseke umbhalo ongcwele wathi: “Ngomile.”

²⁹Kwakukhona lapho isitsha esasigcwele iwayini elimuncu. Bathatha isiponji basicwilisa sathi ciki iwayini elimuncu, basicoma othini lwehisophe, bamsondezela sona emlonyeni.

³⁰Walimunca iwayini wayesethi: “Sekufezekile.” Wagebisa ikhanda, walayela wafa.

UJesu ugwazwa uhlangothi

³¹KwakungoLwesihlanu, usuku lokulungisela isabatha. Kwakungafanele ukuba izidumbu zababethelweyo zilenge eziphambanweni ngosuku lwesabatha, ngoba kwakuyisabatha elikhulu. Ngakhoke izikhulu zamaJuda zaya kuPilatu, zacela ukuba kwaphulwe imilenze yababethelweyo, kwehliswe izidumbu zabo eziphambanweni.

³²Amabutho ayeseya-ke kubafokazi ababebethelwe noJesu afike abafohloza imilenze ngokulandelana.

³³Kuthe uma sekungoJesu athola ukuthi usefile, akabe esayaphula imilenze yakhe.

³⁴Kodwa elinye lamabutho lamhlaba uhlangothi ngomkhonto, maqede wopha igazi namanzi.

³⁵Lowo owabona kwenzeka lokhu ufakaze ngakho ukuze nani nikholwe. Akufakazayo kuyikho impela, uyazi ukuthi ukhuluma iqiniso.

³⁶Lokhu kwenzeka ukuba kugcwaliseke okushiwo ngumbhalo ongcwele othi: “Akuyikwaphulwa nelilodwa lamathambo akhe.”

³⁷Kukhona nomunye umbhalo othi: “Bayoze bambone ngamehlo abamgwazayo.”

Ukulondolozwa kwesidumbu sikaJesu egodini

(Mat 27:57-61; Mark 15:42-47; Luk 23:50-56)

³⁸Kamuva kwase kusuka uJosefa waseArimathiya, waya kuPilatu, wafike wacela imvume yokwethula isidumbu sikaJesu. Wayengumlandeli kaJesu, kodwa efihla, ngoba wayesaba izikhulu zamaJuda. UPilatu wamvumela. Wasethula-ke isidumbu.

³⁹Kwafika noNikodima, yena lowo owake weza kuJesu ngakusihlwa. Wayephethe amakha, isithako senhlaka nenhlaba esingaba ngamashumi amathathu amakhilogramu.

⁴⁰Basithatha isidumbu sikaJesu, basithandela ngezindwangu zelineni besiqhola ngamakha njengokwesiko lamaJuda uma kungcwatshwa.

⁴¹Kwakukhona isivande sezihlahla ngasendaweni uJesu ayebethelwe kuyo. Esivandeni kunegodi elalingakaze lilale sidumbu.

⁴²Njengoba kwakulusuku lokuba amaJuda alungisele isabatha, balondoloza isidumbu sikaJesu kuleligodi, ngoba laliseduze.

UJohane 20

Ukuvuka kukaJesu ekufeni

(Mat 28:1-10; Mark 16:1-8; Luk 24:1-12)

¹Kuthe entathakusa yangeSonto kusemnyama, uMariya waseMagdala waya ethuneni. Wafika isisusiwe inguzunga yetshe eyayisemnyango wethuna.

²Wagijima waya kuSimoni Phetro nalomfundi uJesu ayemthanda kakhulu, wathi kubo: “INKosi bayikhiphile ethuneni, asazi ukuthi bayibekephi.”

³UPhetro nalomfundi omunye base besuka beya ethuneni.

⁴Baya begijima bobabili, kodwa lomfundi omunye wagijima wamshiya uPhetro, wafika kuqala ethuneni.

⁵Wayesefola wabona kukhona izindwangu zelineni, kodwa akaze angena.

⁶USimoni Phetro wamlandela wafike wangena ethuneni. Wabona kukhona izindwangu zelineni,

⁷nesiqephu sendwangu esasikade sishuqule ikhanda. Lesisiqephu sasingekho kulezi ezinye izindwangu zelineni, kodwa sasisongwe sabekwa sodwa.

⁸Naye lomfundi owayefike kuqala ethuneni wangena, wazibonela wakholwa.

⁹Phela babengakawuqondi umbhalo ongcwele othi bekumele uJesu avuke kwabafuleyo.

¹⁰Abafundi basuka baphindela ekhaya.

UJesu uzibonakalisa kuMariya waseMagdala

(Mark 16:9-11)

¹¹UMariya wayemi ekhala ngaphandle kwethuna. Kuthe esakhala wafola wabuka phakathi ethuneni,

¹²wabona izingilosi ezimbili zembethe izingubo ezimhlophe. Zazihlezi lapho isidumbu sikaJesu sasikade sibekwe khona, enye yazo ingasekhanda, enye ingasezinyaweni.

¹³Zambuza zathi: “Muntu wesifazane, ukhalelani na? ” Waphendula wathi: “Bayithathile iNkosi yami, angazi ukuthi bayibekephi.”

¹⁴Wakusho lokhu, washingila wabheka emuva, welamela uJesu emi lapho, kodwa engazi ukuthi nguJesu.

¹⁵UJesu wathi kuye: “Dadewethu, ukhalelani na? Ufuna bani na?” UMariya wayethi lona ngumlimi wesivande, wathi kuye: “Mnumzane, uma kunguwe omthathileyo, ngilayeke lapho umbeke khona, ukuze ngihambe ngimthathe.”

¹⁶UJesu wathi kuye: “Mariya! ” UMariya wabheka ngakuye, wasabela ngesiHebheru wathi: “Rabhuni (okusho ukuthi Mfundisi)!”

¹⁷UJesu wathi kuye: “Ungangithinti, ngoba angikenyukeli kuBaba. Kodwa hamba uye kubafowethu ufike ubatshela ukuthi: ‘Ngiyeniyuka ngiya kuBaba onguYihlo, uNkulunkulu wami onguNkulunkulu wenu futhi.’ ”

¹⁸UMariya waseMagdala wahamba waya kubafundi wafike wabaxoxela ukuthi uyibonile iNkosi yamtshela lokhu.

UJesu uzibonakalisa kubafundi bakhe

(Mat 28:16-20; Mark 16:14-18; Luk 24:36-49)

¹⁹Kwase kuhlwile ngalolosuku, kuyiSonto abafundi bebuthene bezivalele endlini ngokwesaba izikhulu zamaJuda. UJesu wafike wema phakathi kwabo, wababingelela wathi: “Ukuthula bazalwane!”

²⁰Wakusho lokhu wabakhombisa izandla nohlangothi lwakhe. Abafundi bajabula badela lapha bebona iNkosi.

²¹UJesu wabuye wathi kubo: “Ukuthula! Njengalokhu uBaba angithuma, nami ngiyanithuma.”

²²Wakusho lokhu wasephefumulela kubo wathi: “Yemukelani uMoya oyiNgcwele!”

²³Labo enibathethelela izono zabo zithethelelwe, kanti-ke eningabathetheleli izono zabo zohlala zikubo.”

Ukungakhohwa kukaTomasi

²⁴Omunye wabayishumi nambili, uTomasi okuthiwa nguDidimu, wayengekho ngenkathi uJesu efika.

²⁵Abafundi akanye nabo bathi kuye: “Siyibonile iNkosi!” Wathi kubo: “Angikukholwa lokhu ngingawaboni amanxeba okubethelwa ezandleni zayo, ngifake umunwe emanxebeni ezipikili, ngibuye ngifake isandla enxebeni lohlangothi lwayo.”

²⁶Emuva kwezinsuku eziyisiphohlongo abafundi babebuthene endlini, uTomasi ekhona kanye nabo. Iminyango yayivaliwe, kodwa uJesu wafike wema phakathi kwabo wababingelela wathi: “Ukuthula!”

²⁷Wayesethi kuTomasi: “Sondeza umunwe wakho lapha, ubone nazi nezandla zami, bese uletha isandla sakho usifake ohlangothini lwami! Yeka ukungabaza; kholwa!”

²⁸UTomasi waphendula wathi kuye: “Nkosi yami, Nkulunkulu wami!”

²⁹UJesu wathi kuye: “Usuyakhohwa ngoba ungibonile na? Babusisiwe abakhohwa bengabonanga.”

Inhloso yalencwadi

³⁰Ziningi ezinye izimangaliso uJesu ayezenza phambi kwabafundi bakhe, kodwa azilotshiwe kulencwadi.

³¹Kepha lezi zilotshiwe ukuba nikhohwe ukuthi uJesu unguMesiya, iNdodana kaNkulunkulu, ngokukholwa kwenu nibe nokuphila ngenxa yegama lakhe.

UJohane 21

UJesu uzibonakalisa kubafundi abayisikhombisa

¹Kamuva uJesu wabuye wazibonakalisa kubafundi bakhe ngasechibini laseThibheriya. Ukuzibonakalisa kwakhe kwenzeka kanje.

²Kwakubuthene oSimoni Phetro noTomasi othiwa nguDidimu noNataniyeli waseKhana kwelaseGalile namadodana kaZebedi kanye nabanye abafundi bakaJesu ababili.

³USimoni Phetro wathi kubo: “Ngisayodoba.” Bathi kuye: “Sihamba nawe.” Baphuma bakhwela esikebheni, kodwa kababambanga ngishoni kulobubusuku.

⁴Kuthe ngokuphuma kwelanga uJesu wema ogwini, kepha abafundi babengazi ukuthi lona nguJesu.

⁵Wababuza wathi: “Bazalwane, anibambanga nhlanzi na?” Baphendula bathi: “Qha!”

⁶Wathi kubo: “Phonsani inetha kwesokunene sesikebhe, yikhona nizothola izinhlanzi.” Baphonsa inetha, behluleka ukulidonsa ngenxa yobuningi bezinhlanzi.

⁷Lomfundi uJesu ayemthanda kakhulu wathi kuPhetro: “YiNkosi! ” Kwathi ukuba uPhetro ezwe ukuthi yiNkosi, wathatha umdada wakhe weyembe, wazibopha okhalo (ngoba izingubo zakhe wayezikhumulile), wagxuma waphonseka emanzini.

⁸Nabanye abafundi ayekanye nabo baya ogwini ngesikebhe, badonsa inetha linezinhlazi. Babengekude kakhulu nogu, beqhelelene nalo ngamamitha angaba yikhulu.

⁹Kuthe ukuba banyathele ogwini, babona amalahle ekhikhile nenhlazi iphezu kwawo, babona nesinkwa.

¹⁰UJesu wathi kubo: “Ngiletheleni ezinye izinhlanzi kulezi enisand' ukuzibamba! ”

¹¹USimoni Phetro wakhwela esikebheni, wafike wadonsa inetha, walihudulela ogwini. Laligcwele swi izinhlanzi ezinkulu, ziyikhulu namashumi ayisihlanu nantathu. Yize zazizingi kangaka, inetha alidabukanga.

¹²UJesu wathi kubo: “Wozani nizokudla! ” Kepha amukho kubafundi owaba nesibindi sokumbuza ukuthi: “Ungubani wena? ” Babazi ukuthi yiyo kanye iNkosi.

¹³UJesu wasondela kubo, wathatha isinkwa wabanika sona, wenze njalo nangezinhlazi.

¹⁴Lokhu-ke kwase kungokwesithathu uJesu ezibonakalisa kubafundi bakhe emveni kokuba esevukile kwabafuleyo.

“Yondla izimvu zami!”

¹⁵Kwathi sebedlile, uJesu wathi kuSimoni Phetro: “Simoni kaJohane, uyangithanda yini kakhulu kunalaba na? ” Waphendula wathi: “Yebo Nkosi, uyazi ukuthi ngiyakuthanda.” Wathi kuye: “Yondla amawundlu ami! ”

¹⁶Wayesethi kuye ngokwesibili: “Simoni kaJohane, uyangithanda na? ” Waphendula wathi: “Yebo Nkosi, uyazi ukuthi ngiyakuthanda.” Wathi kuye: “Yalusa izimvu zami! ”

¹⁷UJesu wathi kuye ngokwesithathu: “Simoni kaJohane, uyangithanda na? ” UPhetro wadabuka ngoba uJesu wayesembuze kwaze kwakathathu ethi: “Uyangithanda na? ” Wathi kuye: “Nkosi, wena wazi konke, uyazi ukuthi ngiyakuthanda! ” UJesu wathi kuye: “Yondla izimvu zami!

¹⁸Impela usemusha wawuzibopha okhalo uye lapho uthanda khona, kodwa lapho usugugile uyokwelula izingalo zakho, omunye akubophe, akuyise lapho ungathandi khona.”

¹⁹Wakusho lokhu ekhombisa indlela ayezokufa ngayo uPhetro ukuba uNkulunkulu adunyiswe. Wabuye wathi kuye: “Woza ungilandele! ”

Umfundi owayethandwa kakhulu nguJesu

²⁰UPhetro washingila wabheka emuva wabona umfundi uJesu ayemthanda kakhulu elandela. Nguyena lona okwathi eyeme ngakuJesu ngenkathi kudliwa kusihlwa, wabuza wathi: “Nkosi, ngubani ozokuchilizela ezitheni na?”

²¹Kwathi ukuba uPhetro ambone, wathi kuJesu: “Nkosi, uthini ngalona pho?”

²²UJesu wamphendula wathi: “Ubuhlushwe yini wena uma kuthande mina ukuba abelokhu ekhona ngize ngibuye na? Wena ngilandele kube kuphela!”

²³Kwase kwanda amahemuhemu phakathi kwabazalwane ukuthi lomfundi akayikufa. Empeleni uJesu akashongo kuPhetro ukuthi lomfundi akayikufa, kodwa wathi: “Ubuhlushwe yini wena uma kuthande mina ukuba abelokhu ekhona ngize ngibuye na?”

²⁴Nguye lomfundi ofakaza ngalezizinto, nguye futhi ozilobe phansi. Siyazi ukuthi ubufakazi bakhe buqinisele.

Isiphetho

²⁵Ziningi ezinye izinto ezazenziwa nguJesu. Uma zingase zilotshwe zonke ngononina, ngibona sengathi kungantuleka indawo emhlabeni okungabekwa kuyo izincwadi ezingase zilotshwe.

ImiSebenzi

ImiSebenzi 1

UJesu wethembisa ukuthumela uMoya oyiNgcwele

¹E Tofilasi! Encwadini engaqala ngayo, ngaloba ngemisebenzi yonke kaJesu nakho konke ayefundisa ngakho

²kwaze kwaba mhla enyuselwa ezulwini. Engakenyuki wabeka ngoMoya oyiNgcwele umyalo kubaphostoli ayebakhethile.

³Emuva kokuhlushwa nokubulawa kwakhe wazibonakalisa kubo, ebakhombisa ngezindlela eziningi ezingangabazeki ukuthi uyaphila. Esithubeni sezinsuku ezingamashumi amane babede bembona futhifuthi, ekhuluma nabo ngezombuso kaNkulunkulu.

⁴Kuthe endawonye nabo kudliwa wabayala wathi: “Hlalani eJerusalema ningasuki, nilindele isipho enisethenjiswa nguBaba njengoba nganibikela ngaso.

⁵UJohane wayebhabhadisa ngamanzi, kodwa nina nizobhabhadiswa ngoMoya oyiNgcwele emuva kwezinsukwana nje.”

UJesu wenyukela ezulwini

⁶Langalimbe mhla bendawonye bambuza bathi: “Nkosi, sekuyiso yini isikhathi sokubuya kwalo elakwaIsrayeli, wenze ukuba kudliwe ngoludala na?”

⁷Wabaphendula wathi: “Akusikho okwenu ukwazi izikhathi nemizuzu emiswe nguBaba ngegunya lakhe.

⁸UMoya oyiNgcwele uyokwehlela kini nithole amandla, nibe ngofakazi bami eJerusalema nakulo lonke elaseJudiya nelaseSamariya kuze kufike emaphethelweni omhlaba.”

⁹Wakusho lokhu maqede wenyuselwa ezulwini bebhekile, wagubuzelwa yifu lamsitha, kababe besambona.

¹⁰Babesagqolozele ezulwini bebukela enyuka, khona lapho babona kumi eduze kwabo amadoda amabili embethe izingubo ezimhlophe.

¹¹Athi kubo: “Madoda aseGalile, nimeleni lapha nigqolozele ezulwini na? Phela uJesu lona othathiwe kini wenyuselwa ezulwini, uyobuya kanjalo njengoba nimbone enyuka.”

Owakhethwa esikhundleni sikaJudasi

¹²Babuyela eJerusalema, bashiya egqumeni elithiwa yiNtaba yemiHlwathi. Liseduze neJerusalema, ibanga elingangohambooluvunyelwe ngosuku lwesabatha.

¹³Bafika lapho baqonda kuleyondlu ephezulu lapho babengenise khona. KwakungoPhetro noJohane noJakobe noAndreyu, uFiliphu noTomasi, uBhatolomu noMatewu, uJakobe ka-Alfiyose noSimoni umshokobezi noJudasi kaJakobe.

¹⁴Bonke laba babelokhu bekhuleke njalo ngamoya munye kanye nabesifazane noMariya unina kaJesu nabafowabo bakaJesu.

¹⁵Kuthe kulezonsuku kubuthene abazalwane abalinganiselwa ekhulwini elinamashumi amabili, uPhetro wasukuma phakathi kwabo wathi:

¹⁶“Bazalwane! Bekumele kugcwaliseke amazwi ombhalo, uMoya oyiNgcwele owawakhuluma ngomlomo kaDavide, ubikezela ngoJudasi owaba yimpimpi yalabo ababopha uJesu.

¹⁷Wayebalwe kanye nathi, enikwe isabelo kulomsebenzi wethu.

¹⁸Phela uJudasindini lona wathenga insimu ngemali ayithola ngokonakala kwakhe, kepha wagxumekeka ngekhandu phansi, waqhuma isisu kwachitheka zonke izibilini zakhe.

¹⁹Lendaba yezwakala kubo bonke abakhileyo eJerusalema, baze bayiqamba lensimu ngolimi lwakubo bathi yiHakheldama okusho ukuthi yiNsimu yeGazi.

²⁰Kulotshiwe encwadini yamaHubo kwathiwa: “‘Umuzi wakhe awuqothulwe ube yihlane, ekhaya lakhe kusale kukhala ibhungane,’ ‘nokuthi: “‘Isikhundla sakhe asithathwe ngomunye!’

²¹“Ngakhoke kufanele kukhethwe enye yalawamadoda ayehambisana nathi ngaso sonke isikhathi iNkosi uJesu yehla yenyuka phakathi kwethu,

²²kusukela mhla ibhabhadiswa nguJohane kuze kube mhla ithathwa kithi yenyuselwa ezulwini. Lendoda izofakaza kanye nathi ngokuvuka kukaJesu ekufeni.”

²³Base bephakamisa ababili: uJosefa owayaziwa ngokuthi nguBhasabha (ebizwa nangelikaJustu) kanye noMathiyase.

²⁴Base bekhuleka bethi: “Nkosi, wena owazi izinhliziyi zabo bonke, khomba ukuthi yimuphi kulaba ababili omkhethileyo

²⁵ukuba athathe isikhundla salomsebenzi wobuphostoli esashiywa nguJudasi waya lapho kumfanele khona.”

²⁶Base benza inkatho, yadla uMathiyase. Naye-ke waba ngumphostoli wabalwa kanye nabayishumi nanye.

ImiSebenzi 2

Ukufika koMoya oyiNgcwele

¹Lwafika usuku lomkhosi wePhentekhoste bebuthene ndawonye bonke.

²Sekuthi bengazelele sekuzwakala umsindo uvela ezulwini, kusengathi yisivunguvungu esinamandla. Kwahlokoma indlu yonke ababehlezi kuyo.

³Base bebona okusengathi kungamalangabi emise okolimi ehlukana ehlela kubo, yilowo nalowo wathintwa yilangabi.

⁴UMoya oyiNgcwele wangena wagcwala kubo bonke, base bekhuluma ngezinye izilimi, yilowo nalowo njengalokhu uMoya umenza aphumisele.

⁵Kwakukhona amaJuda ayakhe eJerusalema, engamakholwa esaba uNkulunkulu evela emazweni onke angaphansi komthunzi welanga.

⁶Lapho kuzwakala lomsindo, kwabuthana uquqaba lwabantu. Basambatheka lapho bezwa abafundi beshumayela, ngoba yilowo nalowo wezwa kukhulunywa ulimi lwakubo.

⁷Bamangala babamba ongezansi, yilowo wathi: “Hawu! Kanti kabayibo abaseGalile bonke laba esibezwa bekhuluma na?”

⁸Kwenzeka kanjani pho ukuba umuntu ngomuntu ezwe ulimi lwakubo aluncelayo? Sibe kodwa sivela emazweni ngamazwe:

⁹ePhathiya naseMediya nakwaElamu, kwelaseMesophothamiya naseJudiya naseKhaphadosiya, kwelasePhontu naseAsiya,

¹⁰kwelaseFrigiya nasePhamfiliya, kwelaseGibhithe nasesifundeni saseLibhiya ngasemzini waseSayirene; kukhona nezivakashi ezivela eRoma,

¹¹amaJuda nabaphendukele enkolweni yawo, kukhona nabaseKhrethe naseArabhiya. Nokho thina sonke sibezwa bekhuluma izilimi zakithi beshumayela ngemisebenzi emangalisayo kaMvelinqangi.”

¹²Bonke bamangala basambatheka, babuzana bathi: “Mhlola muni lona na?”

¹³Kepha abanye babhinqa bathi: “Badakwe yifumuka lewayini laba!”

Intshumayelo kaPhetro ngomhla wePhentekhoste

¹⁴UPhetro wasukuma nabayishumi nanye, wakhuluma kubantu wathi: “Madoda akithi, maJuda nani nonke enakhe eJerusalema! Kuhle kwazeke lokhu kini, nibeke udlebe kulamazwi ami!”

¹⁵Laba kabadakiwe njengoba nicabanga, ingani kusesekuseni kuseyihora lethoba.

¹⁶Kodwa yikho lokhu ashumayela ngakho umphrofethi uJoweli wathi:

¹⁷“ UNkulunkulu uthi: “ ‘Kuyokwenzeka emihleni yokugcina ngithumele uMoya wami ungene kubantu bonke abasemhlabeni, amadodana namadodakazi enu abe ngabaphrofethi ashumayeke, izinsizwa zenu zibone imibono, amaxhegu enu aphuphe amaphupho.

¹⁸Ngaleyomihla ngiyothumela uMoya wami ungene ezincekwini nasezincekukazini zami, nazo zibe ngabaphrofethi zishumayeke.

- ¹⁹Ngoyoveza imigilingwane ezulwini phezulu nezibonakaliso emhlabeni phansi, igazi nomlilo nomusi wentuthu.
- ²⁰Ilanga liyofiphala kube mnyama, inyanga ibheje ibe njengegazi lungakafiki usuku lukaSimakade olugqame ngodumo olukhulu.
- ²¹Sekuyosindiswa wonke umuntu obiza igama likaSimakade.’
- ²²“MaIsrayeli, ngilaleleni kahle! UJesu waseNazaretha wayengumuntu owayethunyelwe nguMvelinqangi. Lokhu kwavela kwasobala ngemisebenzi yamandla nezimangaliso nezibonakaliso uMvelinqangi azenza ngaye. Nina uqobo lwenu nikwazi kahle lokho, njengoba kwenzeka lapha phambi kwenu.
- ²³UMvelinqangi owazi konke kungakenzeki, wayevele esenqumile ngentando yakhe ukuthi uJesu uzonikelwa kini. Nina-ke nabangela ukuba abulawe bambethele esiphambanweni laba abangawaziyo umthetho kaNkulunkulu.
- ²⁴Kodwa uNkulunkulu wayiqeda iminjunju yokufa, wamvusa ekufeni. Phela uJesu wayengeke anqotshwa ukufa.
- ²⁵Ngoba nenkosi uDavide yawasho lawamazwi akhe yathi: “ ‘Lokhu ngikuqwashile mihla yonke: ngibona uSimakade engakwesokunene sami ukuze ngingazanyazanyiswa lutho.
- ²⁶Ngakhoke inhliziyo yami iyathokoza nolimi lwami luqhumuka ngokwethaba, ngisho nomzimba wami imbala uyophumula unethemba lokuthi
- ²⁷awuyukungiyekelela ngibhubhe ngehlele phansi kwelabafileyo, awunakuvuma oNgcwele wakho afe bese ebola adliwe yimpethu.
- ²⁸Ungazisile izindlela zokuphila, uyongenza ngiphuphume injabulo lapho sengiphambi kobuso bakho.’
- ²⁹“Bazalwane! Angikhulume ngokusobala ngenkosi uDavide ukhokho! Yakhothama yafihlwa, ithuna layo sisengalikhomba khona lapha nanamuhla.
- ³⁰Yayingumphrofethi yazi ukuthi uMvelinqangi uyifungele wayithembisa ukuthi uyoyibekela owozalo lwayo esihlalweni sayo sobukhosi, abuse njengayo.
- ³¹Yakubona kusekude ukuvuka kukaMesiya ekufeni, yakhuluma ngakho yathi akanakuyekelelwa ezweni labafileyo, umzimba wakhe ubole udliwe yimpethu.
- ³²“Nguye-ke loJesu owavuswa nguMvelinqangi ekufeni; thina sonke singofakazi balokho.
- ³³Usekhushulelwe ngakwesokunene sikaMvelinqangi, uYise wamemukelisa uMoya oyiNgcwele owawethenjisiwe, wehlisela kithi lesisipho sakhe, kwenzeka lokhu enikubonayo nenikuzwayo lapha.
- ³⁴Ngoba akuyena uDavide owenyukela ezulwini, kodwa wathi: “ ‘USimakade wathi eNkosini yami: Hlala ngakwesokunene sami

³⁵ngize ngingqobe izitha zakho zithele kuwe! ’

³⁶“Ngakhoke impela akwazeke kini nonke nina bendlu yakwaIsrayeli ukuthi uMvelinqangi wamenza waba yiNkosi noMesiya loJesu enambethela esiphambanweni.”

³⁷Kuthe bangakuzwa lokhu lahlaba lephukela ezinhliziyweni zabo, babuza kuPhetro nakubaphostoli abanye bathi: “Bazalwane sizokwenze njani na?”

³⁸UPhetro wabaphendula wathi: “Phendukani, kube yilowo abhabhadiswe ngegama likaJesu Kristu, yikhona niyothethelelwa izono zenu, namukeliswe isipho esinguMoya oyiNgcwele.

³⁹Isethembiso sikaNkulunkulu singesenu kanye nabantabenu, singesabantu abasekudeni futhi, bonke labo ebamemayo iNkosi uNkulunkulu wethu.”

⁴⁰UPhetro wakhuluma kubo kabanzi ebayala ethi: “Phendukani nisindiswe kulesisizukulwane esonakeleyo!”

⁴¹Labo abawemukelayo amazwi akhe babhabhadiswa; ngalolosuku kwanda isibalo sabakholwayo ngabantu ababalelwa ezinkulungwaneni ezintathu.

⁴²Bakhuthalela isifundiso sabaphostoli, nobudlelwane ebandleni, nokwabelana ukudla enkonzweni, nemikhuleko.

Ukuhlalisana kwabakholwa kuJesu

⁴³Kwenzeka izimangaliso nezibonakaliso eziningi ngesandla sabaphostoli, wonke umuntu wehlelwa ngukwesaba.

⁴⁴Abakholwayo babehlalisana bonke ngokuzwana, babelana konke ababenakho.

⁴⁵Bathengisa ngemihlaba nempahla yabo, lokho abakuzuzayo bakwaba ukuze bonke bathole, kwaya ngesidingo salowo nalowo.

⁴⁶Babedamane bebuthana mihla yonke ethempelini nganhliziyonye, behambelana emakhaya babelana isinkwa, bedla ndawonye benamile bekhululekile.

⁴⁷Babedumisa uMvelinqangi, bethandeka kubantu bonke. Bangingi ababesindiswa yiNkosi imihla ngemihla, landa ibandla.

ImiSebenzi 3

Ukuphiliswa kwesishosha ngasesangweni lethempeli

¹Langathize uPhetro noJohane sebeya ethempelini ngesikhathi sokukhuleka kuyihora lesithathu ntambama.

²Kwakukhona lapho indoda eyayiyisishosha kwazekuzalweni kwayo. Yayide ithwalwa zonke izinsuku, ibekwe ngasemnyango wethempeli owawuthiwa yiSango lakwaNokusho, ukuba inxibe kwababengena ethempelini.

³Yathi ingabona oPhetro noJohane beza sebezongena ethempelini, yanxiba kubo.

⁴Bayigqolozela, uPhetro wathi kuyo: “Sibheke!”

⁵Yabathi njo yethemba ukuthi kukhona ezokuthola.

⁶Kodwa uPhetro wathi: “Anginasiliva nagolide, kepha ngikunika lokho enginakho. Ngamandla egama likaJesu Kristu waseNazaretha ngithi kuwe: Sukuma uhambe!”

⁷Wayibamba ngesandla sokudla wayisukumisa. Kwaqina izinyawo namaqakala ayo khona lapho,

⁸yathi lacu yema yathatha unyawo. Yangena nabo ethempelini, ihamba igxuma idumisa uMvelinqangi.

⁹Isixuku sonke sayibona ihamba idumisa uNkulunkulu.

¹⁰Babona ukuthi yiyo lendoda ebihlala inxiba ngaseSangweni lakwaNokusho ethempelini. Bamangala kakhulu bathatheka ngalokho okwakwenzeke kuyo.

Intshumayelo kaPhetro ethempelini

¹¹Yanamathela kuPhetro noJohane, abantu bonke base begijimela kubo, babangunga emhubheni okuthiwa ngokaSolomoni, bemangele kakhulu.

¹²UPhetro wabona isixuku, wathi kuso: “MaIsrayeli, nenziwa yini ukuba kunimangalise lokhu? Futhi yini nisigqolozele sengathi yithina esenze lendoda yasukuma yahamba ngamandla ethu nangokukholwa kwethu na?”

¹³UNkulunkulu kaIsaka, uNkulunkulu kaJakobe, uNkulunkulu wawokhokho, uyiphakamisile inceku yakhe uJesu, wayinika udumo. Nayinikela ezandleni zababusi, nayiphika phambi kukaPilatu nalapho esenqume ukuyidedela.

¹⁴Nina namphika oNgcwele noLungileyo, nacela ukuba nikhululelwe umbulali.

¹⁵Nase nimbulala ongumthombo wokuphila. Kodwa uMvelinqangi wamvusa kwabafuleyo, esingakufakazela thina.

¹⁶Yileligama likaJesu nokukholwa kwethu kulo okumtholise amandla lomuntu enimbonayo nenimaziyo. Ukukholwa esikuthola kulo kumenze waphila saka njengoba nizibonela nonke.

¹⁷“Bazalwane! Ngiyazi ukuthi enakwenzayo nakwenza ngokungazi, nina nezikhulu zenu.

¹⁸Kepha yiyo lendlela uMvelinqangi afeze ngayo lokhu ayekubikezele ngomlomo wabaphrofethi bakhe bonke ukuthi umgcotshwa wakhe uyohlushwa.

¹⁹Phendukani nibuyele kuNkulunkulu, yikhona kuzosuswa izono zenu,

²⁰iNkosi uSomandla ibisifikisa izikhathi zokuphunyezwa, ithumele kini lowo eyayivele imkhethile yammisa ukuba abe nguMesiya wenu, lowo-ke nguJesu.

²¹Izulu limamukele, kufanele ahlale khona kuze kufike isikhathi lapho konke kuyovuselelwa kube kusha. UMvelinqangi wakumemezela lokhu ngokushumayela kwabaphrofethi bakhe abangcwele basendulo.

²²UMose wathi: ‘USimakade uNkulunkulu wenu uyonimisela umphrofethi onjengami oyovela kwabakini. Nize nimlalele kukho konke ayokukhuluma kini.

²³Bonke abangamlaleli lomphrofethi bayoqothwa baphele phakathi kwesizwe sikaNkulunkulu.’

²⁴Nabaphrofethi bonke abake baletha umlayezo kaNkulunkulu, oSamuweli nabalandelayo, bakumemezela lokhu osekwenzeka kulezizinsuku.

²⁵Nina niyinzalo yabaphrofethi, ningabesivumelwano uNkulunkulu asibopha nokhokho benu mhla ethi kuAbhrahama: ‘Kuyobusiswa yonke imindeni yomhlaba ngenzalo yakho.’

²⁶UMvelinqangi wavusa inceku yakhe, wayithumela kini kuqala ukuze inibusise inenze niphenduke, yilowo nalowo eubini bakhe.”

ImiSebenzi 4

UPhetro noJohane baphambi komkhandlu

¹Kuthe besashumayeza isixuku, bathelekelwa ngabaphristi nenduna yogqayinyanga bethempeli kanye nabasadusi.

²Kwakubacasula ukuthi abaphostoli bafundisa isixuku, bamemezela ukuthi kukhona ukuvuka kwabafuleyo, ngoba uJesu wavuka.

³Base bebadumela babavalela kwaze kwaba ngakusasa, nakhu phela kwase kuhlwile.

⁴Baningi abase beyizwile intshumayelo kaPhetro noJohane baphenduka bakholwa, amadoda ebalelwa ezinkulungwaneni eziyisihlanu.

⁵Ngakusasa kwabuthana eJerusalema izikhulu zamaJuda kanye nezigele nezazimibhalo.

⁶Kwakukhona uHanase umphristi omkhulu, noKhayifase noJohane noAleksanda, nabanye balo lonke uzalo lomphristi omkhulu.

⁷Bamisa uPhetro noJohane emkhandlwini babaphenya bathi: “Nikwenza lokhu ngamaphi amandla nangegama likabani na?”

⁸UPhetro wayegcwele uMoya oyiNgcwele wathi kubo: “Zikhulu zesizwe nani zigele!

⁹Namuhla sibekwa icala ngenxa yesenzo esihle esisenze kulomuntu oyisishosha. Sibuzwa ukuthi ngabe usinde kanjani.

¹⁰Ngakhoke akwazeke kini nonke lokhu nakuso sonke isizwe sakwaIsrayeli: Lomuntu umi lapha phambi kwenu ephilile ngamandla egama likaJesu Kristu waseNazaretha enambethela esiphambanweni, uNkulunkulu wamvusa kwabafileyo.

¹¹Nguye uJesu okulotshwe ngaye embhalweni ongcwele kwathiwa: “ ‘Itshe lokwakha elaliwa yinina bakhi nithi liyinto engenamkhuba, kwaba yilona sisekelo njengensika ephase indlu.’

¹²“Akukho kusindiswa ngomunye; alikho futhi elinye igama kunelakhe ezulwini nasemhlabeni esilinkike thina bantu, esiyosindiswa ngalo.”

¹³Amalungu omkhandlu amangala lapho ebona isibindi sikaPhetro noJohane, kanti ayebazi bengabantukazana abangafundile. Ayesehawula ukuthi babekade behamba noJesu.

¹⁴Kwathi lapho ebona indoda eyayiphilisiwe imi nabo, ehluleka ukubaphikisa.

¹⁵Ayethi abadede phambi komkhandlu baphumele phandle, ahlanganisa amakhanda abuzana

¹⁶athi: “Sizobenze njani lababantu na? Kukhanyela noma ubani owakhe eJerusalema ukuthi laba benze into yamehlo esingenakuyiphika.

¹⁷Kodwa ukuze lendaba ingandi isakazeke ebantwini masibethuse, bangaphinde baliphathe leligama lapho beshumayela!”

¹⁸Ababiza bangena, abadonsa ngendlebe ukuba bangalokothi baliphathe igama likaJesu lapho beshumayela kumbe befundisa.

¹⁹Kepha oPhetro noJohane bawaphendula bathi: “Nqumani nina nisho ukuthi kulungile yini phambi kukaNkulunkulu ukuba silalele nina kunaye na.

²⁰Thina ngokwethu asinakuyeka ukushumayela ngalokho esikubonileyo nesikuzwileyo.”

²¹Umkhandlu waphinde wabadonsa ngendlebe, wawusubadedela. Wehluleka ukubajezisa, ngoba wesaba isixuku, njengoba bonke babedumisa uNkulunkulu ngokwenzekileyo.

²²Lomuntu okwakwenzeke kuye isimangaliso sokuphiliswa esinje wayeneminyaka engamashumi amane evayo ubudala.

Ukukhuleka kwamakholwa ecela ukumiswa isibindi

²³Kuthe bangadedelwa base beya kubazalwane, bababikela konke izikhulu zabaphristi nezigele ezazikushilo kubo.

²⁴Kuthe bangakuzwa lokhu, bakhuleka kuNkulunkulu ngamoya munye bamemeza bathi: “Somandla, wena owadala izulu nomhlaba nolwandle nakho konke okukukho!

²⁵Wakhuluma ngomlomo kakhokho uDavide inceku yakho lapho eqhutshwa nguMoya oyiNgcwele, wathi: “ ‘Kungani ukuba izizwe zixokozele, zakhe uzungu, izinhlanga zisongoze okuyize na?’

²⁶Amakhosi omhlaba ayemi ngezinyawo ehlo mile, nababusi babumbana bahlanganyela uSimakade nomgcotshwa wakhe.’

²⁷“Impela bahlangene kulomuzi oHerodi noPhontu Pilatu kanye nabezizwe nemindeni yakwaIsrayeli, bahlanganyela inceku yakho engcwele uJesu owammisa waba ngumgcotshwa wakho.

²⁸Bakwenzile lokhu, kodwa basimze bafeza lokho owawuvele ukuhlelile wakunquma ngamandla akho ukuba kwenzeka.

²⁹Nkosi awubheke, bayasisongela! Izinceku zakho ake uzimise isibindi zishumayele izwi lakho zingesabi.

³⁰Yelula ingalo yakho uphilise iziguli, wenze izimangaliso nezibonakaliso ngegama likaJesu, inceku yakho engcwele!”

³¹Sebeqedile ukukhuleka kwamazama indawo lapho babebuthanele khona, noMoya oyiNgcwele wangena wagcwala kubo bonke, bashumayela izwi likaNkulunkulu ngesibindi.

Ukwabelana izimpahla

³²Isixuku sabakholwayo sasinhliziyonye simoya munye. Kwakungekho namunye phakathi kwabo owayegodla impahla yakhe, ethi ingeyakhe yedwa, kodwa konke ababenakho bakuhlanganyela bonke.

³³Abaphostoli babefakaza ngamandla amakhulu ngokuvuka kweNkosi uJesu ekufeni; uNkulunkulu wabenzela umusa wababusisa.

³⁴Amukho owayentula phakathi kwabo. Bonke ababenemihlaba nezindlu babethengisa ngakho, bese bethatha abakutholayo

³⁵bakwethule phambi kwabaphostoli, bese kwabelwa lowo nalowomuntu njengokuswela kwakhe.

³⁶Kwakukhona umLevi owayezalelwe esiqhingini saseSayiphro ogama lakhe nguJosefa; abaphostoli babembiza ngokuthi uBhanabhasi (okusho ukuthi nguMduduzi).

³⁷Naye wayenomhlaba awuthengisayo, wafike wethula imali kubaphostoli.

ImiSebenzi 5

OHananiya noSafira

¹Indoda ethile egama layo nguHananiya nomkayo uSafira yathengisa ngendawo.

²Yagodla inxenye yemali, enye yayethula kubaphostoli. Nomkayo wayeyazi lento.

³Kodwa uPhetro wathi kuyo: “Hananiya, uSathane ungene kanjani kuwe ukuba uze uqambe amanga uzame ukukhohlisa uMoya oyiNgcwele, ugodle inxenye yemali yendawo na?”

⁴Kanti bekuvele kungeyona yini eyakho lendawo ungakayithengisi na? Nalapho usuyithengisile, ubungezenzele okubonayo ngemali yakho na? Enhliziyweni yakho uthandeleni ukwenza into embi kangaka na? Awuqambanga amanga kubantu kodwa uwaqambe kuNkulunkulu.”

⁵UHananiya wamuzwa uPhetro esho lokhu, washayeka phansi wafa. Bonke abayizwayo lendaba bashaywa uvalo bathuthumela.

⁶Izinsizwa zasuka zathatha isidumbu sakhe zasisonga, zaphuma naso zafike zasingcwaba.

⁷Kwaphela okungathi amahora amathathu kwangena umkakhe, engazi lutho ngokwenzekileyo.

⁸UPhetro wathi kuye: “Ake ungitshela! Nithengise ngomhlaba nazuza lemali kuphela na?” Waphendula wathi: “Yebo, yilemali kuphela.”

⁹UPhetro wathi kuye: “Nikwenzeleni ukuba nivumelane ngokulinga uMoya weNkosi na? Uyazizwa izigi zalabo abakade bengcwaba umyeni wakho, sebesemnyango bazothwala nesakho isidumbu.”

¹⁰USafira washayeka phansi khona lapho wafa phambi kukaPhetro. Zathi zingena izinsizwa, zamfica uSafira esefile. Zathwala isidumbu sakhe zafike zasingcwaba eduze komyeni wakhe.

¹¹Lehlelwa uvalo olukhulu ibandla lonke kanye nabo bonke abayizwayo lento.

Abaphostoli benza izibonakaliso nezimangaliso

¹²Kwenziwa izibonakaliso nezimangaliso eziningi phakathi kwabantu ngesandla sabaphostoli. Amakholwa onke abuthanela emhubheni kaSolomoni emoya munye.

¹³Akukho muntu kubantu abangaphandle kwenkonzo owaba nesibindi sokunamathela kuwo, kodwa nokho atuswa ngabantu bonke.

¹⁴Kodwa okukhulu kakhulu ukuthi baya ngokwanda abangena ebandleni bekholwa eNkosini, izindimbane zabelilisa nabesifazane.

¹⁵Kwathwalwa neziguli zalaliswa ohlakeni nasemacansini zabekwa emigwaqweni, ukuze nje zisale sezelekwa yisithunzi sikaPhetro lapho edlula.

¹⁶Kwavela nasemizaneni ezungeze iJerusalema izindimbane zabantu, zilethe abagulayo nababekhathazwa yimimoya engcolileyo, bafike baphiliswe bonke.

Ukuhlushwa kwabaphostoli

¹⁷Umphristi omkhulu nabo bonke ayekanye nabo, bengabeqembu labasadusi, bayisukumela lendaba. Babafela umona abaphostoli,

¹⁸bababamba babagquma ejele.

¹⁹Kwafika ingilosi yeNkosi ebusuku, yavula iminyango yejele, yabakhipha yathi kubo:

²⁰“Hambani niye ethempelini, nishumayeze abantu amazwi alokhukuphila okusha!”

²¹Abaphostoli balalela, baya ethempelini entathakusa, bafike bafundisa abantu. Umphristi omkhulu nababenaye babiza zonke izigele zomkhandlu wamaIsrayeli. Base bethumela ejele ukuba kulandwe abaphostoli.

²²Ogqayinyanga baya ejele, kabaze babafica, base bebuyela emuva, bafika babika

²³bathi: “Sifice kuvaliwe ejele, nabalindi bemi beqaphe iminyango. Kodwa lapha sivula, kasificanga muntu phakathi.”

²⁴Kuthe induna yogqayinyanga basethempelini ingakuzwa lokhu, yadideka kanye nezikhulu zabaphristi, bengazi ukuthi kazi kwehlakeleni kubaphostoli.

²⁵Kwase kufika umuntu wathi kubo: “Lawamadoda ebeniwagqume ejele alaphaya ethempelini afundisa abantu.”

²⁶Induna yayisisuka isihamba nogqayinyanga, bafike bagquba abaphostoli babuya nabo. Kababakhahlamezanga, ngoba babesaba isixuku, hleze singase sibakhande ngamatshe.

²⁷Bagquba abaphostoli babamisa phambi komkhandlu wezigele. Umphristi omkhulu wayesebabuza

²⁸wathi: “Asinidonsanga yini ngendlebe ukuba ningaliphathi leligama lapho nifundisa na? Ake nibheke into eseniyenzile! Imfundiso yenu seniyisakaze kulo lonke iJerusalema, nisethwesa icala legazi lalomuntu.”

²⁹UPhetro kanye nabaphostoli baphendula bathi: “Kumele silalele uNkulunkulu kunabantu.

³⁰UNkulunkulu wawokhokho wavusa uJesu enambulala ngokumlengisa esigxotsheni.

³¹UNkulunkulu wamenyusela ngakwesokunene sakhe, wamenza waba ngumbusi nomsindisi, ukuba anike abakwaIsrayeli ithuba lokuphenduka, bathethelelwe izono zabo.

³²Thina-ke singofakazi balokhu, kanye noMoya oyiNgcwele oyisipho sikaNkulunkulu kwabamlalelayo.”

³³Kwathi ukuba amalungu omkhandlu akuzwe lokho, athukuthela agaya izibozi, abonisana ngokuthi ababulawe.

³⁴Kwakukhona ilungu lomkhandlu, umfarisi ogama lakhe linguGamaliyeli, ingcweti yomthetho eyayihlonishwa ngabantu bonke. Waphakama wathi abaphostoli abakhishelwe phandle okwesikhashana.

³⁵Wayesephefumula ethi emkhandlwini: “Nina bakwaIsrayeli! Ake nicabange kahle ngalokho enihlose ukukwenza kulababantu!

³⁶Phambilini kuke kwakhona uThewuda owayezenza into ethile. Wayenabalandeli, amadoda abalelwa emakhulwini amane. Wabulawa, kwahlakazeka abalandeli bakhe, yaphela indaba yabo.

³⁷Kwaphinde kwavela uJudasi waseGalile ngesikhathi sokubhalisa amagama; wathola izindimbane zalandeli. Naye wabhubha, base behlakazeka bonke abalandeli bakhe.

³⁸Ngakhoke ngiyaneluleka ngithi: Bayekeni lababantu bahambe! Uma ngabe lelisu nalomsebenzi kuyinto esungulwe ngabantu nje kuzoziphelela,

³⁹kodwa uma kusungulwe nguNkulunkulu ngeke nibachithe. Qaphelani hleze kube sengathi nilwa noNkulunkulu!” Basithobela iseluleko sakhe.

⁴⁰Babiza abaphostoli bangena, base bebadinda. Babayala ukuba bangashumayeli baphathe igama likaJesu, base bebadedela.

⁴¹Abaphostoli baphuma emkhandlwini bethokozela ukuthi uNkulunkulu ubabona befanele ukuthwala ihlazo ngenxa yegama likaJesu.

⁴²Baqhubeka bafundisa nsuku zonke ethempelini nasemakhaya beshumayela indaba emnandi elanda ngoJesu uMesiya.

ImiSebenzi 6

Ibandla likhetha amagosa ayisikhombisa

¹Isibalo sabakholwayo sasilokhu sanda. Ngaleyonkathi kwaba khona ukukhononda phakathi kwabo, amaJuda akhuluma isiGriki esola amaJuda omdabu, ethi kubandlululwa abafelokazi bawo ekwabeni kwemihla ngemihla.

²Abayishumi nambili base bebiza ibandla lonke labakholwayo bathi kulo: “Akufanele ukuba sidebesele umsebenzi wezwi, silibale yizithebe zokudla.

³Ngakhoke bazalwane, khethani phakathi kwenu amadoda ayisikhombisa anegama elihle akhaliphile agcwele uMoya oyiNgcwele, siwabeke abhekane nalomsebenzi.

⁴Thina sizogxila ekukhulekeni nasekushumayeleni izwi.”

⁵Ibandla lonke lasithakasela lesisiphakamiso, lase likhetha laba: uStefano, indoda eyayinokukholwa okunamandla, igcwele uMoya oyiNgcwele, noFiliphu noPhrokhoro noNikhano noThimoni noPhamena noNikhawo, owezizwe waseAntiyokhi owayephendukele enkolweni yamaJuda.

⁶Labethula kubaphostoli, base bekhuleka bebabeka izandla.

⁷Izwi likaNkulunkulu lachuma landa. Isibalo sabakholwayo eJerusalema sanda kakhulu, kwaze kwakholwa ngisho nabaphristi abaningi imbala.

Ukuboshwa kukaStefano

⁸UStefano wayegcwele umusa kaNkulunkulu, enamandla amakhulu okwenza izimangaliso nezibonakaliso ezinkulu phakathi kwabantu.

⁹Kwasuka amadoda athile esinagoge okuthiwa ngelabaZiphethi, lalinamaJuda avela eSayirene naseAleksandriya. Lawamadoda kanye namanye amaJuda avela kwelaseSilisiya nakwelaseAsiya asukela uStefano aqagulisana naye.

¹⁰Kodwa ehluleka ukumelana nenhlakanipho yakhe ngoba wayekhuluma eholwa nguMoya oyiNgcwele.

¹¹Ayesefum bathisa ngasese abantu abathile ukuba bathi: “Simzwile ekhuluma amazwi ajivaza uMose noNkulunkulu.”

¹²Bamsasazela ngesixuku nezigele nezazimibhalo. Bamthelekela uStefano bambamba bamhudulela phambi komkhandlu wezigele.

¹³Kwase kuvela ofakazi abaqamba amanga bethi: “Lomuntu yilokhu egxeka lelithempeli elingcwele nomthetho kaMose.

¹⁴Simzwile ethi uJesu waseNazaretha uyodiliza lelithempeli aguqule amasiko ethu avela kuMose.”

¹⁵Bonke ababesemkhandlwini bamgqolozela uStefano, babona ubuso bakhe bubukeka njengobengilosi.

ImiSebenzi 7

Ukuziphendulela kukaStefano

¹Umphristi omkhulu wabuza uStefano wathi: “Kuyiqiniso yini lokhu na?”

²Waphendula wathi: “Bakwethu, bafowethu nani bobaba, ake nilalele! UNkulunkulu odumisekayo wabonakala kukhokho uAbrahama ngenkathi esakhe eMesophothamiya engakathutheli emzini waseHarane.

³Wathi kuye: “Thutha ushiye elakini nezihlobo, uye ezweni engiyokukhombisa lona!’

⁴Nebala wasuka ezweni lamaKhaledi wathuthela eHarane. Kuthe ukuba uAbrahama ashonelwe nguyise, uNkulunkulu wammukisa lapho, wamletha kulelizwe esenakhe kulo manje.

⁵Akamnikanga sabelo sefa kulo, akamsikelanga ngisho nasiqintana sodwa lesi. Kodwa wamethembisa ukuthi uyomabela lona, libe ngelakhe nelenzalo yakhe. Lesisethembiso senziwa engakabi namntwana uAbrahama.

- ⁶Usethi-ke uNkulunkulu kuye: ‘Inzalo yakho iyoba ngabokuhamba kwelabezizwe, igqilazwe iphathwe ngonya iminyaka engamakhulu amane.’
- ⁷UNkulunkulu wayesethi: ‘Kepha mina ngiyosahlulela lesosizwe esibagqilazayo, okuyothi kamuva baphume kulelozwe bafike bangikhonze kulendawo.’
- ⁸Wayesenza isivumelwano noAbhrahama esiluphawo lwaso lungukusoka. UAbhrahama wazala ulsaka wamsoka ngosuku lwesiphohlango. NoIsaka wenze njalo kuJakobe indodana yakhe, naye wazala amadodana ayishumi nambili angokhokho kithi, wawasoka.
- ⁹“Okhokho laba bamfela umona uJosefa umfowabo, bamthengisa waba yisigqila eGibhithe. Kodwa uNkulunkulu waba naye wamsiza,
- ¹⁰wamhlenga ezinhlophekweni zakhe zonke. Wamupha ukuhlakanipha nesasasa phambi kukaFaro inkosi yaseGibhithe, waze wabekwa waba ngundunankulu waphatha elaseGibhithe nomuzi wonke kaFaro.
- ¹¹Kwaba khona umadlantule wendlala, kwahlushekwa kulo lonke elaseGibhithe nelakwaKhanana. Ikati lalala eziko kokhokho.
- ¹²Kuthe ukuba uJakobe ezwe ukuthi kuyatholakala ukudla eGibhithe, wabathumela khona okhokho ngokokuqala.
- ¹³Uma sebuyela khona ngokwesibili, uJosefa waziveza kubafowabo bambona ukuthi nguye; inkosi uFaro yayisibikelwa ngozalo lwakwabo kaJosefa.
- ¹⁴UJosefa wathumela kuJakobe uyise embiza ethi akeze nezihlobo zakhe zonke; babengamashumi ayisikhombisa nanhlanu sebebonke.
- ¹⁵UJakobe wasuka wehlela eGibhithe. Kulapho afela khona kanye nokhokho.
- ¹⁶Izidumbu zabo zathathwa zasiwa kwaShekhemu, zafike zangcwatshwa ethuneni lelo uAbhrahama ayelithenge kwabakwaHamori ngemali eyisiliva.
- ¹⁷“Ngenkathi sekusondele ithuba lokufezeka kwesethembiso uNkulunkulu ayesenze kuAbhrahama, abantu bakithi base bandile sebeyisizwe esikhulu eGibhithe.
- ¹⁸Kwavela enye inkosi eGibhithe eyayingazi lutho ngoJosefa.
- ¹⁹Yasihlakaniphela isizwe sakithi, yabaphatha kabi okhokho, yabaphoqelela ukuba bantshinge izingane zabo ezisand' ukuzalwa ukuze zife.
- ²⁰Uzalwe ngalesosikhathi uMose, ingane eyayiyinhle ithandeka kuNkulunkulu. UMose wondliwa izinyanga izintathu kwabo,
- ²¹wayesentshingwa. Indodakazi kaFaro yamthola yazikhulisela yena waba yindodana yayo.
- ²²Wagogoda uMose kuyo yonke inhlakanipho yamaGibhithe, amazwi akhe ayenesisindo, nemisebenzi yakhe incomeka.

²³“Lapho eseqede iminyaka engamashumi amane ubudala, kwafika enhliziyweni yakhe ukuba akayobona inhlalo yabakubo bakwaIsrayeli.

²⁴Welamela omunye wabo egcwelezwa, wayesemlamulela waphindisa ngokubulala umGibhithe.

²⁵Wayethemba ethi abantu bakubo bazobona ukuthi uNkulunkulu uhlose ukubahlenga ngaye, kodwa kabakuqondanga lokho.

²⁶Ngakusasa wafike welamela amaIsrayeli amabili elwa odwa, wazama ukuwalamula wathi: ‘Nina niyazalana, yini niphathane kabi na?’

²⁷Lona owayesukele omunye wachiliza uMose wathi: ‘Ngubani osekubeke umbusi nomahluleli phezu kwethu na?’

²⁸Usufuna ukungibulala nami njengoba ubulele umGibhithe izolo na?’

²⁹UMose wakuzwa lokho, wabaleka washaya wachitha. Waye watholwa kwaMidiyane wafike wahlala khona. Kulapho azala khona amadodana amabili.

³⁰“Kuthe sekudlule iminyaka engamashumi amane wabona umbono esehlane eduze nentaba iSinayi. Kwakusha ihlozi lameva okwabonakala kulo ingilosi iyilangabi lomlilo.

³¹Lombono wammangalisa uMose, wasondela eduzane ukuba abone kahle. Kwezwakala izwi leNkosi lithi:

³²‘Mina nginguNkulunkulu wokhokho bakho, uNkulunkulu ka-Abhrahama noIsaka noJakobe.’ UMose wethuka wathuthumela, akabe esabheka nakubheka ngakhona.

³³Kodwa iNkosi yathi kuye: ‘Khumula izimbadada, ngoba lendawo omi kuyo ingcwele.

³⁴Ngikubonile ukuhlushwa kwabantu bami kwelaseGibhithe, ngakuzwa nokububula kwabo, ngehlile ukuba ngibahlenge. Woza ngikuthume eGibhithe!’

³⁵“UMose lowo ababemphika bethi: ‘Ngubani osekubeke umbusi nomahluleli na?’ — nguye lona owathunyelwa nguNkulunkulu ukuba abe ngumbusi nomhlengi ngesandla sengilosi eyabonakala kuye isehlozini.

³⁶Nguye owabakhipha kwelaseGibhithe, wenza izimangaliso nezibonakaliso eGibhithe nasoLwandle oluBomvu kanye nasehlane iminyaka engamashumi amane.

³⁷Nguye futhi uMose owathi kwabakwaIsrayeli: ‘UMvelinqangi uyonithumela umphrofethi onjengami oyovela phakathi kwesizwe sakini.’

³⁸Nguye-ke lona owayekhona ebandleni lamaIsrayeli ehlane. Wayekanye nengilosi eyayikhuluma naye entabeni eSinayi ekanye nokhokho futhi. Wemukela amazwi aphilisayo ukuba awadlulisele kithi.

³⁹“Kepha okhokho benqaba ukumlalela, bamchilizela eceleni. Ezinhliziyweni zabo babuyela kwelaseGibhithe,

⁴⁰lapho bethi kuAroni: ‘Sibumbele onkulunkulu abazohamba phambi kwethu! Phela naloMose owasikhipha eGibhithe asazi ukuthi waphelaphi!’

⁴¹Kuleyomihla babumba isithombe sethole. Base bethula iminikelo kulomphuhle wesithixo, bagida bethokozela okungumsebenzi wezandla zabo.

⁴²UNkulunkulu wabafulathela, wabaduba ukuba bakhulekele amabandla ezinkanyezi zesibhakabhaka, njengoba kushiwo embhalweni ongcwele wabaphrofethi kuthiwa: “ ‘Nina bendlu kaIsrayeli, naniyethula kimi yini iminikelo nemihlatshelo nisehlane iminyaka engamashumi amane na?’

⁴³Phinde! Nanithwele idokodo likaMolokhi nenkanyezi yesithixo senu uRefani, imiphuhle enayibumba nce nikhuleke kuyo. Ngakhoke ngonidingisela ngale kwaseBhabhiloni.’

⁴⁴“Ngenkathi okhokho besehlane babenedokodo elingubufakazi bokuthi uNkulunkulu uphakathi kwabo. Lalinjengalokhu uNkulunkulu ayeyale uMose, linjengomfanekiso ayewubonile.

⁴⁵Kamuva, okhokho bemukela lelodokodo koyise, bangena nalo beliphethe kulelizwe beholwa nguJoshwa ngesikhathi benqoba izizwe ezachithwa nguNkulunkulu, bedla izwe lazo. Idokodo lahlala kulelizwe kwaze kwaba yisikhathi senkosi uDavide.

⁴⁶Wathakaselwa nguNkulunkulu wacela ukwakhela uNkulunkulu kaJakobe ikhaya.

⁴⁷Kepha owakha leyondlu kaNkulunkulu kwaba nguSolomoni.

⁴⁸“Kepha oPhezukonke akahlali ezindlini ezakhiwe ngezandla zabantu, njengoba esho umphrofethi ethi:

⁴⁹“ ‘USimakade uthi: Izulu liyisihlalo sami sobukhosi, nomhlaba uyisenabelo sezinyawo zami. Yindlu enjani eningangakhela yona na? Iphi indawo yami yokuphumula na?’

⁵⁰Akuzandla zami ezabumba konke lokhu na?’ ”

⁵¹UStefano waqhubeka wathi: “Ninamakhanda alukhuni nina! Ninezinhliziyi ezingathobiyo, ningondlebekazizwa abangamlaleli uNkulunkulu! Nilokhu nimelana noMoya oyiNgcwele njengokhokho benu enibafuze anabashiya.

⁵²Wake wakhona yini umphrofethi abangamhluphanga okhokho benu na? Bababulala labo ababebikezela ngokufika koLungileyo, esenimchilizele ezitheni nambulala,

⁵³nina enanikwa umthetho kaNkulunkulu ngesandla sezingilosi, nadlula nangawugcina.”

UStefano ukhandwa ngamatshe

⁵⁴Kwathi ukuba abomkhandlu bakuzwe lokhu, bagaya izibozi, bamthukuthelela baze badla imihlathi.

⁵⁵Kodwa uStefano wagqolozela phezulu ezulwini egcwele uMoya oyiNgcwele, wabona inkazimulo kaNkulunkulu, noJesu emi ngakwesokunene sikaNkulunkulu.

⁵⁶Wathi: “Ngibona izulu livuliwe neNdodana yesintu imi ngakwesokunene sikaNkulunkulu.”

⁵⁷Bakliwula ngelikhulu, bavimba izindlebe, basuka bamthelekela kanyekanye.

⁵⁸Bamthatha bamkhiphela ngaphandle komuzi, bafike bamkhanda ngamatshe. Ofakazi babeka izingubo zabo phambi kwensizwa okuthiwa nguSawuli ukuba ibagcinele zona.

⁵⁹Besamkhanda ngamatshe uStefano, wakhuleka wathi: “Nkosi Jesu, yamukela umoya wami!”

⁶⁰Waguqa ngamadolo, wamemeza wathi: “Nkosi, ungasibaleli kubo lesisono!” Wakusho lokhu qede walala okokugcina.

ImiSebenzi 8

¹NoSawuli wayevumelana nalesisenzo sabo sokumbulala.

USawuli uzingela ibandla leNkosi

Kusukela ngalolosuku ibandla laseJerusalema laphathwa ngonya. Bonke abakholwa kuJesu bahlakazekela kulo lonke elaseJudiya nelaseSamariya, kwasala abaphostoli kuphela.

²Amadoda athile ayesaba uNkulunkulu amngcwaba uStefano, kwaba nesililo esikhulu.

³Kepha uSawuli walenzakalisa ibandla ethi ulibhuqa nya. Wayebangenela izindlu ngezindlu ahudule abesilisa nabesifazane abagqume ejele.

Indaba emnandi ishunyayelwa eSamariya

⁴Labo abachitheka bebaleka babehamba belishumayela izwi likaNkulunkulu.

⁵UFiliphu owayeyigosa ebandleni wehlela emzini waseSamariya, wafike washumayeza abantu ngoMesiya.

⁶Izindimbane zabantu zakwemukela ngamoya munye akushoyo, lapho zimuzwa zibona nezimangaliso azenzayo.

⁷Kwakhishwa imimoya engcolileyo kwabaningi, iphuma iklabalasa; kwaphiliswa nabaningi abafe uhlangothi nabayizishosha.

⁸Abantu bomuzi waseSamariya bathokoza kakhulu.

- ⁹Kwakunendoda ethile kulowomuzi ithiwa nguSimoni. Kwase kunesithutshana yenza imigilingwane bathatheke abantu baseSamariya, iza makhulu.
- ¹⁰Yayinewozawoza kubantu bonke, abantukazana nezikhulu. Babethi: “Nguye lomuntu owaziwa ngokuthi ‘nguMandla amakhulu kaNkulunkulu’.”
- ¹¹Babenamathela kuye balalele akushoyo, ngoba kwase kunesikhathi eside bethathekile yimigilingwane yakhe.
- ¹²Kuthe ngokufika kukaFiliphu eshumayela indaba ethokozisayo elanda ngombuso kaNkulunkulu nangegama likaJesu Kristu, bakholwa babhabhadiswa, abesilisa nabesifazane.
- ¹³NoSimonindini wakholwa, okuthe esebhabhadisiwe wanamathela kuFiliphu, emangaliswa yizibonakaliso nezimanga ezinkulu ayezibona zenzeka.
- ¹⁴Abaphostoli baseJerusalema bezwa ukuthi amaSamariya alemukele izwi likaNkulunkulu, bathumela uPhetro noJohane kuwo.
- ¹⁵Bafike bakhuleka bewacelela uMoya oyiNgcwele.
- ¹⁶Phela wawungakehleli nakoyedwa kuwo kodwa ayebhabhadiswe ngegama leNkosi uJesu kuphela.
- ¹⁷Bawabeka izandla, ayesephiwa uMoya oyiNgcwele.
- ¹⁸USimoni waphawula ukuthi ngokubekwa izandla zabaphostoli amakholwa amukeliswa uMoya oyiNgcwele. Wayesebavezela imali
- ¹⁹wathi: “Nginikeni nami lawamandla okuba lowo engiyombeka izandla amukele uMoya oyiNgcwele!”
- ²⁰Kodwa uPhetro wamphendula wathi: “Hamba ufe nemali yakho uma ucabanga ukuthi isipho sikaNkulunkulu singathengwa ngemali.
- ²¹Awunasabelo nafa kulomsebenzi wethu, ngoba inhliziyo yakho imbi, ayilungile phambi kukaNkulunkulu.
- ²²Phenduka kulobububi ucele eNkosini, hleze kungenzeka ithethelele lomcabango wenhliziyo yakho.
- ²³Ngiyakubona uneso elibi lomona, uyisigqila sokonakala.”
- ²⁴USimoni wazikhalela wathi: “Nginxuseleni eNkosini ukuba ngingehlelwa lutho lwalezizinto esenizishilo.”
- ²⁵OPhetro noJohane bafakaza bashumayela izwi leNkosi qede, babuyela eJerusalema. Babehamba beshumayela indaba ethokozisayo emizaneni eminingi eSamariya.

UFiliphu nesiphakanyiswa saseThophiya

- ²⁶Ingilosi yeNkosi yasho kuFiliphu igosa ebandleni yathi: “Lunga uye ngaseningizimu, uhambe ngomgwaqo osuka eJerusalema wehlele emzini waseGaza, lomgwaqo odabula ehlane!”
- ²⁷UFiliphu walungela indlela wahamba. Wabona indoda yaseThophiya ihamba ngendlela. Yabe iyisiphakanyiswa esasinegama yengamele umnyango wezimali embusweni wendlovukazi uKhandase waseThophiya.
- ²⁸Lendoda yayisigoduka, kade ikhonza ethempelini eJerusalema. Yayigibele ekalishini layo, ihlezi ifunda umbhalo ongcwele kumphrofethi ulsaya.
- ²⁹UMoya oyiNgcwele wathi kuFiliphu: “Sondela ulinganisane nalelikalishi!”
- ³⁰UFiliphu wagijima waya kulo, wafike wayizwa ifunda encwadini yomphrofethi ulsaya. Wayeseyibuza ethi: “Uyakuzwa nje lokhu okufundayo na?”
- ³¹Yaphendula yathi: “Uthi ngingakuzwa kanjani uma kungekho ongichazelayo na?” Yayisicela uFiliphu ukuba ahlalisane nayo ekalishini.
- ³²Uhlamvu lombhalo ongcwele eyayilufunda lwaluthi: “Yasondezelwa ukuhlathwa njengemvu; kuhle kwewundlu lingakhali lapho ligundwa ayizange ithi vu nakanye.
- ³³Yacindezelwa, yahlulelwa ngokungemthetho. Ngubani ongasikhomba isizukulwane sayo? Yanqunywa yasuswa kwelabaphilayo.”
- ³⁴Isiphakanyiswa sase sithi kuFiliphu: “Ake ngibuze! Ngubani lona akhuluma ngaye umphrofethi? Uzisho yena uqobo lwakhe noma ukhuluma ngomunye na?”
- ³⁵UFiliphu wayeseqala ukuyichazela indoda. Wasusela kuloluhlamlamvu lombhalo, wayitshela indaba emnandi elanda ngoJesu.
- ³⁶Besahamba ngendlela bafika endaweni enamanzi. Isiphakanyiswa sase sithi: “Nanka amanzi! Kungavimbani ukuba ngibhabhadiswe na?” [³⁷UFiliphu waphendula wathi: “Uma ukholwa ngenhliziyo yakho yonke, ungabhabhadiswa.” Indoda yaphendula yathi: “Impela, ngiyakholwa ukuthi uJesu Kristu uyiNdodana kaMvelinqangi.”]
- ³⁸Yamisa ikalishi, behla noFiliphu, bangena emanzini, wayeseyibhabhadisa.
- ³⁹Bathi bephuma nje emanzini uMoya weNkosi wamhlwitha uFiliphu, wemuka naye isidumo. Isiphakanyiswa asiphindanga simbone, kepha saqhubeka nohambo lwaso sithokoza.
- ⁴⁰UFiliphu wethuka esesemzini waseAshdodi. Wayesehamba edabula izigodi ngezigodi eshumayela indaba emnandi waze wafika emzini waseKhesariya.

ImiSebenzi 9

Ukuphenduka kukaSawuli

(imiSeb 22:6-16; 26:12-18)

- ¹USawuli wayesaqhuba usongo lwakhe lokubulala abakholwa eNkosini uJesu. Waya kumphristi omkhulu,
- ²wacela kuye izincwadi azoziyisa emasinagogeni eDamaseku ukuba zingunyaze, kuthi uma ethola abakholwayo, abesilisa nabesifazane, ababophe abalethe eJerusalema.
- ³Wayesendleleni esesondela eDamaseku okuthe engazelele wahaqwa ngukukhanya kuvela ezulwini, kwakhanya nxazonke eduze kwakhe.
- ⁴Washayeka phansi, wezwa izwi lithi kuye: “Sawuli, Sawuli! Ungizingelelani na?”
- ⁵Wabuza wathi: “Ungubani wena Nkosi na?” Yaphendula yathi: “NginguJesu omzingelayo!”
- ⁶Sukuma uye emzini! Kulapho-ke wofike utshelwe khona ozokwenza.”
- ⁷Amadoda ayehamba noSawuli ayemi ekhungathekile engenamlomo. Ezwa izwi nje likhuluma, kepha engaboni muntu.
- ⁸USawuli wasukuma, wathi uyabheka wandwaza amehlo nje, engaboni lutho. Base bembamba ngengalo, bamhola bamusa eDamaseku.
- ⁹Waba yimpumputhe izinsuku ezintathu, engadli lutho engaphuzi lutho.
- ¹⁰EDamaseku kwakukhona ikholwa okuthiwa nguHananiya. INkosi yafika kulo ngombono yathi: “Hananiya!” Wasabela wathi: “Nkosi!”
- ¹¹Yayisithi kuye: “Lungela ukuhamba uye endlini kaJudasi emgwaqweni okuthiwa ngumGwaqo oQondileyo, ufike ufune indoda yaseThasu okuthiwa nguSawuli. Uzoyifika ikhuleka.
- ¹²Ibonile ngombono kungena umuntu okuthiwa nguHananiya ofike wayibeka izandla ukuba ibuye ibone.”
- ¹³UHananiya waphendula wathi: “Nkosi, baningi asebengitshelile ngalendoda nangakho konke okubi ekwenze kwabangcwele bakho eJerusalema.
- ¹⁴Isilapha ngegunya elithole ezikhulwini zabaphristi ukuba ibophe bonke ababiza igama lakho.”
- ¹⁵INkosi yathi kuye: “Hamba, ngoba ngimkethile lowo ukuba abe ngumlomo wami, igama lami laziwe ngabezizwe namakhosi ngisho nabakwaIsrayeli.
- ¹⁶Ngiyomkhombisa konke okufanele ahlushwe ngakho ngoba engowami.”
- ¹⁷Nebala uHananiya wanikela khona, wangena endlini wambeka izandla uSawuli, wathi: “Sawuli mfowethu! Ingithumile iNkosi, uJesu lowo owabonakala kuwe endleleni mhla uza lapha. Ingithumele ukuba ubuye ubone, ugcwale uMoya oyiNgcwele.”

¹⁸Masinyane kwawohloka okusankwethu emehlweni kaSawuli, wabuye wabona. Wabhabhadiswa khona lapho;

¹⁹kwathi ukuba adle kwabuya amandla.

USawuli ushumayela eDamaseku

USawuli wathi gozololo izinsukwana namakholwa eDamaseku.

²⁰Waqala khona lapho washumayela ngoJesu emasinagogeni ethi uyiNdodana kaNkulunkulu.

²¹Bamuzwa bamangala bonke bathi: “Akuyena lona obekade efuna ukwenzakalisa laba ababiza leligama eJerusalema na? Akalapha nje ngoba ehlose ukubabopha abaphindisele emuva ezikhulwini zabaphristi na?”

²²Kepha zaya ngokuqina izintshumayelo zikaSawuli, wawadida amaJuda eDamaseku, ekhombisa ngokusobala ukuthi uJesu unguMesiya.

USawuli uphunyula emaJudeni

²³Kuthe kungadlula izinsuku eziningi amaJuda enza ugobe lokumbulala,

²⁴kepha wabikelwa ngaloluzungu lwawo. Aqapha amasango omuzi imini nobusuku, esophe ukumbulala.

²⁵Kepha abalandeli bakhe bamthatha ebusuku, bamkhipha ngentunja ogangeni lomuzi, bamehlisela ngaphandle ngesilulu.

USawuli useJerusalema

²⁶Waya eJerusalema, wazama ukuzihlanganisa nabakholwayo. Kodwa bamesaba bonke, bengamkholwa ukuthi usengumlandeli kaJesu.

²⁷UBhanabhasi wamzwela nokho, wamusa kubaphostoli. Wabalandisa ngokuthi uSawuli ubone iNkosi uJesu ehamba ngendlela, yakhuluma naye. Wabuye wabalandisa nangesibindi sakhe lapho eshumayela eDamaseku egameni likaJesu.

²⁸USawuli wahlala eJerusalema ephuma engena imizi yabakholwayo, eshumayela ngesibindi egameni leNkosi uJesu.

²⁹Wayekhuluma eqagulisana namaJuda akhuluma isiGriki, aze alinga ukumbulala.

³⁰Kwathi ukuba abazalwane bakuzwe lokho, bamusa emzini waseKhesariya, base bemdlulisela kowaseThasu.

³¹Ibandla leNkosi lase lihlala ngokuthula kulo lonke elaseJudiya nelaseGalile nelaseSamariya. Lalikhonza iNkosi ngokuyesaba, laqhubeka lakheka. UMoya oyiNgcwele walikhusela lase lichuma landa.

Ukuphiliswa kukaEniyase

³²UPhetro waguduza izindawo ngezindawo waze wafika nakwabangcwele bomuzi waseLida.

³³Wafica lapho umuntu okuthiwa nguEniyase owayefe uhlangothi, eselale phansi iminyaka eyisiphohlongo.

³⁴UPhetro wathi kuye: “Eniyase! UJesu Kristu uyakuphilisa. Sukuma wendlule ucansi lwakho!” UEniyase wasukuma khona lapho.

³⁵Bonke abantu baseLida naseSharoni bambona, base bephenduka bekholwa eNkosini.

UDokhasi uvuswa ekufeni

³⁶Emzini waseJopha kwakukhona owesifazane okholwayo okuthiwa nguThabitha (ngesiGriki kuthiwa nguDokhasi okusho ukuthi yimbabala). Wayekhuthalele ukwenza okuhle nokusiza abampofu.

³⁷Kulezonsuku wagula, wagcina ngokufa. Isidumbu sakhe sagezwa, sabekwa endlini ephezulu.

³⁸Kuthe abakholwayo baseJopha bangezwa ukuthi uPhetro usemzini waseLida owakhelene nowaseJopha, bathumela amadoda amabili bamcela bathi: “Phuthuma uze lapha kithi!”

³⁹UPhetro walunga, wayesehamba nawo. Wafika base bemkhuphulela endlini ephezulu. Abafelokazi bonke bamngunga bekhala. Bamkhombisa izambatho nezingubo ezazithungwe nguDokhasi esaphila.

⁴⁰UPhetro wathi mabaphumele phandle bonke, waguqa ngamadolo wathandaza. Wabheka ngasesidunjini wathi: “Thabitha, vuka!” UDokhasi waqwebula amehlo, wabona uPhetro, wavuka wahlala.

⁴¹Umphostoli wambamba ngesandla wamsukumisa, wabiza abangcwele nabafelokazi, wammisa phambi kwabo esephila.

⁴²Lendaba yezwakala kuwo wonke umuzi waseJopha, abantu abaningi bakholwa eNkosini.

⁴³UPhetro wahlala izinsuku eziningi eJopha, ekwamshuki wezikhumba okuthiwa nguSimoni.

ImiSebenzi 10

UPhetro noKhoneliyase

¹Emzini waseKhesariya kwakwakhe indoda okuthiwa nguKhoneliyase. Wayeyinduna yebutho lempi yamaRoma elalibizwa ngokuthi yiButho lamaNtaliyane.

²Wayengumuntu okholwayo owesaba uNkulunkulu, umuzi wakhe wonke ukholwa. Wayesiza kakhulu izimpofana zamaJuda ephana, ekhuleka njalo kuNkulunkulu.

- ³Langathize ngezikhathi zehora lesithathu ntambama wafikelwa ngumbono, wamkhanyela wathi bha. Wabona ingilosi kaNkulunkulu imngenela endlini ithi: “Khoneliyase!”
- ⁴Wayigqolozela ethukile, wayibuza wathi: “Nkosi, kwenze njani na?” Ingilosi yathi kuye: “Imikhuleko yakho izwakele kuNkulunkulu, nokupha kwakho izimpofana kuyatuseka kuye.
- ⁵Ngakhoke thumela amadoda eJopha, ayobiza umuntu onguSimoni okuthiwa nguPhetro.
- ⁶Ungenise kwamshuki wezikhumba okuthiwa nguSimoni owakhe ngasolwandle.”
- ⁷Kuthe isihambile ingilosi ekade ikhuluma naye, wabiza izikhonzi zakhe ezimbili kanye nelinye lamabutho ayeyizinceku zakhe, indoda eyayikhuthalele inkolo.
- ⁸Wabalandisa konke okwenzekileyo, wabathumela eJopha.
- ⁹Kuthe ngakusasa besendleleni kodwa sebekudebuduze nomuzi, uPhetro wenyukela ophahleni lwendlu eyokhuleka, kusemini enkulu.
- ¹⁰Wezwa elambela ukudla. Kuthe besamlungisela wathathwa yisiyezi,
- ¹¹lapho abona khona izulu livuleka, kwehla indwangu enkulu ibanjwe ngamachopho omane yathi cababa emhlabeni.
- ¹²Kwakukhona kuyo zonke izinhlobo zezilwane ezimasondo mane, nezihuqazelayo nalezo ezindiza emkhathini.
- ¹³Kwezwakala izwi lithi kuye: “Phetro, hlaba udle!”
- ¹⁴Kepha uPhetro wathi: “Phinde Nkosi! Angikaze ngidle lutho okuthiwa lungamanyala nokungcolisayo.”
- ¹⁵Izwi labuye lwezwakala lithi: “Ungalokothi ukubize ngokuthi kungcolile lokho uNkulunkulu athi kuhlanzekile!”
- ¹⁶Kwenzeka lokhu kathathu, indwangu yayisikhushulelwa ezulwini.
- ¹⁷Amadoda ayethunyelwe nguKhoneliyase ayehamba ebuza indlela eya kwamshuki uSimoni. Kwathi uPhetro esakhungathekile ukuthi kazi lombono usho ukuthini, ayesekhuleka esangweni.
- ¹⁸Amemeza abuza ukuthi ukhona yini umuntu ongenisile lapho, uSimoni okuthiwa nguPhetro.
- ¹⁹UPhetro esazindla ngombono, wezwa uMoya oyiNgcwele uthi kuye: “Kukhona amadoda amathathu akufunayo.
- ²⁰Zilungisele, wehle uhambe nawo unganqikazi, ngoba athunywe yimi!”
- ²¹UPhetro wehlela emadodeni, wafike wathi: “Yimina uPhetro enimfunayo; ningibabele ngani?”

²²Amphendula athi: “Sithunywe yinduna yamabutho uKhoneliyase. Uyindoda eqotho emesabayo uNkulunkulu; utuswa yisizwe sonke samaJuda. Ingilosi engcwele yamtshela ukuba akumeme uze kwakhe ukuze azizwele amazwi omlomo wakho.”

²³Wayesewamema ukuba angenise ngalobobusuku. Kwasa qede walunga wahamba nawo, ephelezelwa ngabazalwane abathile baseJopha.

²⁴Bafika ngomhlomunye eKhesariya. UKhoneliyase wayebalindele, esememe nezihlobo nabangane bakhe abakhulu.

²⁵Kwathi lapho uPhetro esezongena endlini, uKhoneliyase wamhlangabeza wazijwiba phambi kwakhe wakhuleka.

²⁶Kepha uPhetro wamsukumisa wathi: “Phakama! Ngingumuntu njengawe.”

²⁷Bangena endlini bexoxa. UPhetro wafica abantu sebebuthene bebaningi.

²⁸Wathi kubo: “Niyazi ukuthi umthetho wakithi awumvumeli umJuda ukuba adlelane kumbe ahambelane nabezizwe. Kodwa uNkulunkulu usengikhombisile ukuthi akufanele ngithi umuntu ungcolile akahlanzekile.

²⁹Ngakhoke angenqabanga lapho ngibizwa. Ngiyabuza-ke ukuthi ningibiza nje kwenze njani? ”

³⁰UKhoneliyase wayesethi: “Kuthangi bengikhuleka lapha ngazo lezizikhathi ngehora lesithathu ntambama. Ngase ngibona indoda imi phambi kwami, yevathe ezikhazimulayo.

³¹Yathi: ‘Khoneliyase! UNkulunkulu usewuzwile umkhuleko wakho; akayikhohliwe neminikelo yakho kwabampofu.

³²Thumela eJopha ubize uSimoni okuthiwa nguPhetro! Ungenise kwaSimoni umshuki owakhe ngasolwandle.’

³³Ngithumele kuwe ngaso lesosikhathi ngathi awulandwe; wenze kahle weza. Sesilapha sonke phambi kobuso bukaNkulunkulu ukuba sizwe konke iNkosi ekuyale ngakho.”

UPhetro ushumayela kwaKhoneliyase

³⁴UPhetro wayesethi: “Impela sengiyabona ukuthi uNkulunkulu akabandlululi.

³⁵Nobani omesabayo enza okulungileyo uyemukeleka kuye, noma engowasizwe sini.

³⁶Niyalazi izwi alithumela kwabakwaIsrayeli, ememezela ngalo indaba ejabulisayo yokuthula okufika ngoJesu Kristu iNkosi yabo bonke.

³⁷Niyakwazi okwakwenzeka, kwaqala kwelaseGalile kwaqhubekela kulo elamaJuda, uJohane eseshumayeze abantu babhabhadiswa.

³⁸Niyazi ukuthi uNkulunkulu wamgcoba uJesu waseNazaretha, wamupha amandla oMoya oyiNgcwele, wamenza uMesiya. UNkulunkulu wayenaye, ngakhoke wayehamba enza okuhle yonke indawo, ephilisa bonke ababegqilazwa nguSathane.

³⁹Thina singofakazi bakho konke ayekwenza ezweni lamaJuda kanye naseJerusalema. Bambulala ngokumlengisa esigxotsheni.

⁴⁰Kodwa uMvelinqangi wamvusa ngosuku lwesithathu, wakuhlela ukuba azibonakalise ephila.

⁴¹Akusibo bonke abambonayo, kepha wabonakala kithi kuphela esasingofakazi ababevele bekhethwe nguMvelinqangi. Sadla saphuza naye emuva kokuvuka kwakhe kwabafileyo.

⁴²Wasithuma ukushumayeza abantu, simfakazele ukuthi nguye owabekwa nguMvelinqangi waba ngumahluleli wabaphilayo nabafileyo.

⁴³Bafakaza ngaye bonke abaphrofethi, bathi nobani okholwa kuye uyothethelelwa izono ngenxa yegama lakhe.”

Abezizwe baphiwa uMoya oyiNgcwele

⁴⁴Kwathi uPhetro esakhuluma, uMoya oyiNgcwele wabehlela bonke ababemlalele.

⁴⁵Amakholwa angamaJuda ayephelekezela uPhetro kwawamangalisa kabi ukuthi kanti nabezizwe baphiwa uMoya oyiNgcwele.

⁴⁶Abezwa bekhuluma ngezilimi, bebabaza uNkulunkulu. UPhetro wathi:

⁴⁷“Nalaba baphiwe uMoya oyiNgcwele njengathi. Pho ukhona yini ongenqaba ukuba babhabhadiswe ngamanzi na?”

⁴⁸Wayesethi ababhabhadiswe ngegama likaJesu Kristu. Bamcela ukuba athi gozololo nabo izinsukwana.

ImiSebenzi 11

UPhetro ubikela ibandla laseJerusalema

¹Abaphostoli nabazalwane kwelaseJudiya bezwa ukuthi sekukhona nabezizwe asebelemukele izwi likaNkulunkulu bakholwa.

²UPhetro wenyukela eJerusalema, wafike wasolwa ngabazalwane ababebelesela umkhuba wokusoka.

³Bathi kuye: “Uhambele amakhaya abangasokile, waze wadla nabo.”

⁴Ngakhoke uPhetro wabalandisa ukusuka nokuhlala wathi:

⁵“Ngangikhuleka ngisemzini waseJopha. Ngathathwa yisiyezi ngabona umbono, kwehla ezulwini into esandwangu enkulu ibanjwe ngamachopho omane iza kimi.

⁶Ngayibhekisisa kahle, ngabona izilwane ezifuywayo nezasendle nezihuquzelayo nezinyoni.

⁷Ngezwa futhi izwi lithi kimi: 'Nakho-ke Phetro, hlaba udle!'

⁸Kepha ngathi: 'Phinde Nkosi! Angikaze ngidle lutho olungamanyala nokungcolisayo.'

⁹Izwi lezwakala ngokwesibili, livela ezulwini lithi: 'Ungalokothi ukubize ngokuthi kungcolile lokho uNkulunkulu athi kuhlanzekile!'

¹⁰Kwenzeka lokhu kathathu, kwase kukhushulelwa ezulwini konke.

¹¹Khona manjalo ngabona sekutheleka amadoda amathathu ethunyelwe kimi evela eKhesariya, afike ema phambi kwendlu esasikuyo.

¹²UMoya oyiNgcwele wathi kimi mangihambe nawo nginganqikazi. Abazalwane laba abayisithupha bangiphelekezela, safike sangena emzini walomuntu obathumile.

¹³Wasilandisa ukuthi ubone ingilosi imi endlini yakhe ithi kuye: 'Thumela eJopha ubize uSimoni okuthiwa nguPhetro!'

¹⁴Kukhona ayokutshela khona usindiswe ngakho, wena nomuzi wakho!'

¹⁵Ngathi ngisaqala ukukhuluma, uMoya oyiNgcwele wehlela kubo njengalokhu kwenzeka nakithi ekuqaleni.

¹⁶Ngase ngikhumbula amagama eNkosi uJesu athi: 'UJohane wayebhabhadisa ngamanzi, kodwa nina niyobhabhadiswa ngoMoya oyiNgcwele.'

¹⁷Kusobala ukuthi uNkulunkulu ubaphile nabo lesisipho esasiphiwa mhla sikhulwa eNkosini uJesu Kristu. Pho uma kunjalo, bengiwubani-ke mina ukuba ngivimbele uNkulunkulu?"

¹⁸Kwathi bangakuzwa lokhu badela, badumisa uNkulunkulu bathi: "Kanti uNkulunkulu usenikeze nabezizwe ithuba lokuphendukela ekuphileni."

Ibandla laseAntiyokhi

¹⁹Manje labo abahlakazeka nezwe ngenxa yokuhlushwa emveni kokufa kukaStefano, bahamba njalo baze bayoshaya kwelaseFenisiya nasesiqhingini saseSayiphro nasemzini waseAntiyokhi. Babebandlulula, izwi belishumayeza amaJuda kuphela.

²⁰Kodwa kwasuka abathile babo ababevela eSayiphro naseSayirene, base beya eAntiyokhi, bafike bashumayeza nabezizwe, bebatshela indaba ethokozisayo elanda ngeNkosi uJesu.

²¹INkosi yabalekelela, izihlwele zaphendukela eNkosini uJesu.

²²Lendaba yezwakala ebandleni laseJerusalema, lase lithumela uBhanabhasi eAntiyokhi.

- ²³Wafike wabona ukusebenza komusa kaNkulunkulu, wabajabula wabakhuthaza bonke ukuba babambelele eNkosini, bazinikele ngenhliziyo yonke.
- ²⁴Wayeyindoda elungileyo nekhohlo wayo, egcwele uMoya oyiNgcwele, nabantu abaningi basiwa eNkosini bakholwa.
- ²⁵UBhanabhasi waya emzini waseThasu eyofuna uSawuli.
- ²⁶Kuthe angamthola wamusa eAntiyokhi. Bafike basebenza ndawonye ebandleni kwaze kwaphela unyaka, befundisa abantu abaningi. Kwaqala eAntiyokhi ukuba amakhohlo abizwe ngokuthi angamaKristu.
- ²⁷Akubanga nsuku ngaki kwasuka abaphrofethi eJerusalema behlela eAntiyokhi.
- ²⁸Omunye wabo okuthiwa nguAgabho waqhutshwa nguMoya oyiNgcwele wafike wabikezela ukuthi kuzoba khona indlala enkulu emhlabeni wonke. Nempela yafika kubusa ingonyama uKlawudiyu.
- ²⁹Abazalwane baseAntiyokhi base benquma ukuba yilowo nalowo akhiphe ngangokubusiseka kwakhe, kusizwe abazalwane baseJudiya.
- ³⁰Bakwenza lokhu, lesisipho basithumela kwabaphethe ebandleni, sathunyelwa ngesandla sikaBhanabhasi noSawuli.

ImiSebenzi 12

Ukubulawa kukaJakobe nokuboshwa kukaPhetro

- ¹Ngaleyonkathi inkosi uHerodi yaqala ukuhlupha abathile bebandla.
- ²Yabulala uJakobe umfowabo kaJohane ngenkemba.
- ³Lapho ibona ukuthi lokho kuwathokozisile amaJuda, yaqhubeka yabopha noPhetro. Kwakungomkhosi wokudla isinkwa esingenamvubelo.
- ⁴Yambopha yamvalela ejele, yamethula ezandleni zezigejane ezine zamabutho ukuba zimaluse, leso naleso sinamabutho amane. Yayiqonde ukummisa esigcawini ngemuva komkhosi wePhasika imethwese icala phambi kwabantu.
- ⁵UPhetro wagcinwa-ke ejele, kodwa ibandla lakhuleka ngesineke limcelela kuNkulunkulu.

UPhetro ukhululwa ejele

- ⁶Kuthe ngabo lobobusuku kuzosa uHerodi amlethe esigcawini, uPhetro walala wazumeka ephahlwe ngamabutho amabili, eboshwe ngamaketango amabili. Oqayinyanga babeqaphe emasangweni ejele.
- ⁷Kwaqhamuka ingilosi yeNkosi khona lapho, kwakhanya nge ejele. Yaqhukuluza uPhetro ohlangothini, yamvusa yathi: “Phakama! Sheshisa! ” Amaketango ayeseziwela ezandleni zakhe.

⁸Ingilosi yathi kuye: “Bhinca, ufake izimbadada! ” Walalela, yayisithi kuye: “Yembatha ingubo, ungilandele!”

⁹Waphuma wayilandela, kepha wayengazi ukuthi okwenziwa yingilosi kungokwempela; wayethi uyaphupha nje.

¹⁰Badlula kogqayinyanga abangasekuqaleni, babuye badlula kwabesibili, base befika esangweni lensimbi eliphumela emzini. Isango lazivulekela ngokwalo. Baphuma badlula umgwaqo waba munye, ingilosi yanyamalala khona lapho.

¹¹UPhetro wasanguluka wathi: “Yima kungikhanyela ngokusobala ukuthi iNkosi ithume ingilosi yayo, yangikhulula ngaphunyula kuHerodi nakukho konke obekufiswa yizihlewele zamaJuda.”

¹²Kuthe kungamkhanyela lokhu uPhetro, waya kwaMariya, unina kaJohane lowo okuthiwa nguMarko, lapho kwakubuthanele khona abantu abaningi bekhuleka.

¹³UPhetro wangqongqoza esicabheni sesango. Intombazane eyisisebenzi okuthiwa nguRoda yasuka yayosabela.

¹⁴Yanele yalizwa iphimbo likaPhetro yajabula yafa, ayabe isavula nasango lelo, kodwa yagijima yabika endlini ukuthi nangu uPhetro esangweni.

¹⁵Bathi kuyo: “Awu suka! Mus' ukuhlanya wena!” Kodwa yaphikelela yathi impela nguye. Base bethi: “Yingilosi yakhe!”

¹⁶Kepha uPhetro wayebelesele engqongqoza. Bamvulela bambona maqede bamangala.

¹⁷UPhetro wabahebeza ngesandla ukuba bathule, wayesebalandisa ukuthi iNkosi uSomandla umkhulule kanjani ejele, wathi: “Nize nibikele oJakobe nabazalwane!” Wasuka waya kwenye indawo.

¹⁸Kwasa qede amabutho ashayana ngamakhanda engaqondi ukuthi ngabe uPhetro wenze njani.

¹⁹UHerodi wacinga uPhetro, akaze amthola, wayesephenya ogqayinyanga ngaloludaba, isigcino wathi abathunyelwe kwankatha. Wayesemuka kwelaseJudiya, wehlela emzini waseKhesariya, wafike wahlala khona.

Ukufa kukaHerodi

²⁰UHerodi inkosi wayengxame kakhulu, ethukuthelele abantu baseThire naseSidoni. Ngakhoke baya kuye ngothi lwabo, bafike bangena ngakuBlasto insila yenkosi babulala amagade kuye base bezicelela uxolo enkosini, ngoba phela izwe labo lalondliwa ngezinqolobane zayo.

²¹Kuthe ngosuku olumisiweyo uHerodi wavunula waconsa waqhwakela esihlalweni sakhe sobukhosi, wakhuluma waqephuza kubantu.

²²Zase zimhasha izixuku zathi: “Akusakhulumi yena umuntu, usengukulunkulu.”

²³Ingilosi yeNkosi yamgadla khona lapho ngoba udumo akaludluliselanga kuMvelinqangi. Wadliwa yizilo ngaphakathi waze waphangalala.

UBhanabhasi noSawuli babuyela eAntiyokhi

²⁴Izwi likaNkulunkulu lachuma landa.

²⁵OBhanabhasi noSawuli baphetha umsebenzi wabo eJerusalema bagoduka, bathatha uJohane okuthiwa nguMarko, bahamba naye.

ImiSebenzi 13

UBhanabhasi noSawuli bayakhethwa bathunywe

¹Ebandleni eliseAntiyokhi kwakunabaphrofethi nabefundisi. BabengoBhanabhasi noSimiyoni (okuthiwa umfokaMnyama) noLusiyu waseSayirene noManayeni (owakhula kanye noHerodi umbusi) noSawuli.

²Kuthe besenkonzweni bezile ukudla, uMoya oyiNgcwele wathi kubo: “UBhanabhasi noSawuli mabahlukaniselwe umsebenzi engibabizele wona!”

³Ibandla lase lizila ukudla, bathandazelwa babekwa izandla, badedelwa bahamba.

UBhanabhasi noSawuli bashumayela eSayiphro

⁴Kwathi lapho uMoya oyiNgcwele usubathumile, behlela emzini waseSelusiya, base besuka ngomkhumbi bawelela esiqhingini saseSayiphro.

⁵Bafika emzini waseSalamisi, bashumayela izwi likaNkulunkulu emasinagogeni amaJuda. Bathatha noJohane okuthiwa nguMarko, bahamba naye ukuba abasize.

⁶Badabula kulo lonke elasesiqhingini saseSayiphro, bafika emzini wasePhafo, lapho bafika khona isanusi sendoda. SasinguBhajesu, umJuda owayezenza umphrofethi.

⁷Wayengumngane omkhulu kalusibalukhulu uSergiyu Pawula, indoda ekhaliphileyo. Ulusibalukhulu wathumela kuBhanabhasi noSawuli, efuna ukuzwa izwi likaNkulunkulu.

⁸Kepha uElimasi (leligama lisho ukuthi yisanusi) wamelana nabo, efuna ukuphambukisa ulusibalukhulu ukuba angakholwa.

⁹Kodwa uSawuli owabuye wabizwa ngelikaPawula, wavukwa nguMoya oyiNgcwele wayigqolozela lendodandini,

¹⁰wathi kuyo: “Mthakashana, ufuze uyihlo uSathane! Wonakele unenkohliso namaqhinga, uyisitha sakho konke okulungileyo. Koze kube nini uqhubeka nokugwegwisa izindlela eziqondile zeNkosi, uphendukezela iqiniso na?”

¹¹Uyabona-ke, uzoshaywa yisandla seNkosi manje nje, ube yimpumputhe, kube yisikhathi ungaboni langa.” Khona lapho kwavele kwaluvindi inkungu emehlweni ayo, kwahlwa emini, yaphuphutheka ifuna ozoyihola ngengalo.

¹²Kuthe ukuba ulusibalukhulu abone lesisehlo, wathatheka impela yilokho akufundiswa ngeNkosi uJesu, waphenduka wakholwa.

UPawula noBhanabhasi baseAntiyokhi lasePhisidiya

¹³UPawula kanye nababehamba naye basuka ngomkhumbi ePhafo, baya emzini wasePherge kwelasePhamfiliya. UJohane Marko wafike wabashiya khona, wabuyela eJerusalema.

¹⁴Badlula ePherge, baqhubekela emzini waseAntiyokhi kwelasePhisidiya. Ngosuku lwesabatha baya esinagogeni, bafike bahlala.

¹⁵Kwafundwa encwadini yomthetho kaMose nasemibhalweni yabaphrofethi, abaphathi besinagoge base bebhokisa isicelo ngakubo bathi: “Bafowethu! Uma kukhona enifuna ukweluleka ibandla ngakho, sicela ukuba nikusho.”

¹⁶UPawula wasukuma, wabahebeza ngesandla ukuba balalele, wathi: “Lalelani maIsrayeli, kanye nabezizwe abesaba uNkulunkulu!

¹⁷UNkulunkulu wesizwe lesi sakwaIsrayeli waqoka okhokho, wabenza isizwe esikhulu ngenkathi besakhonze kwelaseGibhithe. Waphakamisa ingalo yamandla wabakhipha lapho,

¹⁸wababekezelela ehlane isithuba okungathi singamashumi amane eminyaka.

¹⁹Wabhubhisa izizwe eziyisikhombisa ezweni lakwaKhanana, wababela izwe lazo laba yifa labo.

²⁰Konke lokhu kwathatha isithuba okungathi singamakhulu amane namashumi ayisihlanu eminyaka. “Wayesebanika abaholi besizwe ababebizwa ngabahluleli, kwaze kwaba yinkathi yomphrofethi uSamuweli.

²¹Base bezicelela inkosi, uNkulunkulu wabeka uSawuli umfokaKhishi womndeni wakwaBhenjamini, waba yinkosi yabo. Wababusa iminyaka engamashumi amane.

²²UNkulunkulu wamehlisa esihlalweni, waphakamisa uDavide waba yinkosi yabo. Wamfakazela wathi: ‘Ngizitholele isilomo sami uDavide umfokaJese. Nguye oyofeza yonke intando yami.’

²³Njengoba uNkulunkulu ayethembisile, wamisa omunye wozalo lukaDavide waba ngumsindisi wesizwe sakwaIsrayeli. Lowo-ke nguJesu.

²⁴Kuthe engakafiki, uJohane umbhabhadisi washumayeza sonke isizwe sakwaIsrayeli ukuba siphenduke sibhabhadiswe.

²⁵Kuthe uJohane eseya ngasemaphethelweni omsebenzi wakhe wathi: ‘Nithi ngingubani ngempela? Angisiye lona enimbhekileyo ukuthi uyeza. Kodwa kukhona ongilandelayo engingafanele ngisho nokumkhumula izicathulo.’

²⁶“Bafowethu, nina bozalo luka-Abrahama kanye nabezizwe abesaba uNkulunkulu! Yithina osekushunyayelwe kubo lensindiso.

- ²⁷Phela abaseJerusalema nezigele zabo kabamazanga ukuthi ungubani uJesu. Bamlahla ngecala, ngalokho bafeza okwashiwo abaphrofethi emibhalweni engcwele efundwa njalo ngesabatha.
- ²⁸Nanxa bengatholanga sizathu sokuba bamgwebe afe, nokho bacela kuPilatu ukuba abulawe.
- ²⁹Kuthe sebekufeze konke okushiwo ngaye emibhalweni engcwele, wethulwa esigxotsheni walondolozwa egodini.
- ³⁰Kodwa uMvelinqangi wamvusa kwabafileyo.
- ³¹Wabonakala izinsuku zaze zaba ningi kulabo ababehamba naye besuka eGalile beya eJerusalema. Laba-ke sebeyamfakazela esizweni sakwaIsrayeli.
- ³²Thina sesinishumayeza indaba ethokozisayo yokuthi lokho uNkulunkulu akwethembisa okhokho,
- ³³usekufezele thina esiluzalo lwabo, ngokuvusa uJesu ekufeni. Kulotshiwe ngalendaba kweyamaHubo kwelesibili kwathiwa: “ ‘Wena uyiNdodana yami ngikuzele, nginguYihlo kusukela namhlanje.’ ”
- ³⁴“UMvelinqangi wavusa uJesu kwabafileyo ukuze angabe esabhubha. Ngalendaba uNkulunkulu wathi: “ ‘Ngiyonifezela izethembiso ezingcwele engazibophayo zingasoze zachithwa, izethembiso engazenza kuDavide.’ ”
- ³⁵“Ngakhoke lendaba ifakazelwa nangomunye umbhalo othi: “ ‘Awunakuvuma oNgcwele wakho afe bese ebola adliwe yimpethu.’ ”
- ³⁶“Phela uDavide emihleni yakhe wayifeza intando kaNkulunkulu, wayesephagalala waya kwelabaphansi wadliwa yintuthwane.
- ³⁷Kodwa lowo owavuswa nguNkulunkulu ekufeni akabolanga wayesedliwa yimpethu.
- ³⁸Bafowethu! Kuhle nazi ukuthi ngenxa kaJesu senishunyayezwa intethelelo yezono. Ngoba umthetho kaMose wawungasoze wanithetha ngecala,
- ³⁹kodwa ngenxa kaJesu bonke abakholwayo bathethwa yicala.
- ⁴⁰Xwayani ningaze nehlelwe yilokhu okushiwo ngabaphrofethi bethi:
- ⁴¹“ ‘Lalelani nina zedeledi neqiwe uvalo ninyamalale! Ngalemihla yenu ngenza umsebenzi eningasoze neze nawukholwa yize umuntu ethi unitshela ngawo.’ ”
- ⁴²Ngenkathi kuphunywa esinagogeni, uPawula noBhanabhasi bacelwa ukuba baphinde babuye ngesabatha elilandelayo, bakhulume kubantu ngazo lezondaba.
- ⁴³Kuthe lapho selihlakazeka ibandla, abantu abaningi bahamba noPawula noBhanabhasi. KwakungamaJuda nabezizwe asebephendukele enkolweni yawo. Abaphostoli bakhuluma kubo, babakhuthaza ukuba bethembele njalo emseni kaNkulunkulu.

- ⁴⁴Ngesabatha elilandelayo kwabuthana cishe bonke abantu balowomuzi ukuba balalele izwi leNkosi.
- ⁴⁵Kuthe lapho amaJuda ebona umshungu wezixuku, ayesebafela umona, aqagulisana noPawula emjivaza.
- ⁴⁶UPawula noBhanabhasi base bebatshela ingcaca bethi: “Yinina obekufanele kuqalwe ngani nishunyayezwe izwi likaNkulunkulu. Kodwa ngoba niyalichiliza, nizibona ningakufanele ukuphila okuphakade, siyanishiya-ke sesiya kwabezizwe.
- ⁴⁷Ngoba iNkosi isithumile ukushumayela lokho okwashiwo kuMesiya kwathiwa: “Ngikubeke waba ubhaqa kwabezizwe, ukuba ube ngumsindisi wabantu ngisho nasemaphethelweni omhlaba.’”
- ⁴⁸Abezizwe bakuzwa lokhu qede bajabula bababaza lendaba emnandi elanda ngeNkosi uJesu, baphenduka bakholwa bonke ababemiselwe ukuphila okuphakade.
- ⁴⁹Izwi leNkosi lasakazeka nendawo yonke kulelozwe.
- ⁵⁰Kodwa amaJuda agqugquzela abantu, kwavuka isiphithiphithi phakathi kwabesifazane abaziwayo ababemesaba uNkulunkulu naphakathi kwezikhulu zalowomuzi, Abuye adala uchuku, azingela uPawula noBhanabhasi, abachitha kulesosigodi.
- ⁵¹Base bewashiya nesinyama bawathuntuthela uthuli lwezinyawo zabo, baya emzini waseIkhoniyo.
- ⁵²Amakholwa aseAntiyokhi ayejabule kakhulu egcwele uMoya oyiNgcwele.

ImiSebenzi 14

UPawula noBhanabhasi baseIkhoniyo

- ¹Benze njalo naseIkhoniyo. Bangena esinagogeni lamaJuda, bashumayela kwaze kwakholwa isixuku esikhulu samaJuda nabezizwe.
- ²Kodwa lawamaJuda ayengakholwa abhebhezela abezizwe, adalela abazalwane ubutha.
- ³Abaphostoli nokho, bahlala lapho isikhathi eside, beshumayela ngesibindi beyethemba iNkosi uJesu. Yalifakazela izwi layo lomusa, yabapha amandla okwenza izibonakaliso nezimangaliso.
- ⁴Abantu balomuzi bahlukana phakathi, abanye bevuna amaJuda, abanye bevuna abaphostoli.
- ⁵Abezizwe namaJuda nezigele zawo basusa uthuthuva, behlose ukudumela abaphostoli babakhande ngamatshe.
- ⁶Kwathi ukuba kufike ezindlebeni zabo lokhu, babalekela kwelaseLikhoniya, baya emizini yaseListra naseDerbhe nasezindaweni ezakhelene nayo.

⁷Babehamba beshumayela indaba emnandi.

UPawula noBhanabhasi baseListra

⁸Emzini waseListra kwakukhona indoda eyisigoga; yayingakaze ihambe, ilokhu yaba yisishosha kwasekuzalweni kwayo.

⁹Yayilalele ngenkathi uPawula eshumayela. Wayigqolozela, wabona ukuthi inokholo olungayenza iphile,

¹⁰washo kakhulu wathi kuyo: “Sukuma ume ngezinyawo!” Yathi lacu yazihambela.

¹¹Kwathi lapho izixuku zibona okwenziwe nguPawula, zamemeza ngolimi lwakubo isiLikhoniya zathi: “Kwehlele kithi onkulunkulu, banenswebu yabantu.”

¹²UBhanabhasi zametha ngelikaZewusi, uPawula zambiza ngelikaHerme, nakhu phela kwakuyaye kuqephuze yena.

¹³Umphristi wethempeli likaZewusi elalingaphandle nje komuzi, wathatha izinkunzi nemigexo yezimbali, wakusa ngasemasangweni, ehlose ukuba yena nezixuku bethule umhlatshelo kubaphostoli.

¹⁴Lapho sekubakhanyele oBhanabhasi noPawula okwase kuzokwenzeka, bethuka kabi, baklebhula izingubo zabo, bagijima baqonda phakathi komshungu, bamemeza

¹⁵bathi: “Kahleni madoda, senenzani manje? Nathi singabantu phaqa njengani nje, sinishumayeza indaba ethokozisayo yokuthi kufanele niphenduke nishiye lezizithixo eziyize, nize kuMvelinqangi ophilayo owadala izulu nomhlaba nolwandle nakho konke okukukho.

¹⁶Enkathini eseyadlula wavumela izizwe zonke ukuba zihambe umathanda.

¹⁷Nokho wazivezela ubufakazi bokuthi nguye onenzela izicolo. Unisa izulu nithole imvula yanele, umhlaba uveze nokudla ngesikhathi esifaneleyo, enelise izinhliziyu zenu aniphe ukudla anithokozise.”

¹⁸Kwala noma sebekhuluma kanje zacishe zabahlubuka izixuku, zifuna ukwethula umhlatshelo kubo.

¹⁹Kwase kufika amaJuda evela emzini waseAntiyokhi kwelasePhisidiya nasemzini waseIkhoniyo. Ayengela izixuku ngakuwo, amkhanda ngamatshe uPawula, amhudulela ngaphandle komuzi ethi ufile.

²⁰Abazalwane bamngunga, wayesevuka esebuyela emzini. Kwasa ngakusasa bahamba noBhanabhasi baya eDerbhe.

²¹Bayishumayela kulomuzi indaba ethokozisayo ngoJesu, bazuza abantu abaningi baphenduka bakholwa. Abaphostoli babuyela eListra, baya naseIkhoniyo, base bedlulela naseAntiyokhi kwelasePhisidiya.

²²Bafike bakhuthaza abazalwane ukuba baqine ekukholweni, babambebele kukho ngokwethembeka. Bathi kubo kumele sidlule ezinhluphekweni eziningi kandukuba singene embusweni kaNkulunkulu.

²³Ebandleni ngalinye babeyaye babeke abaholi abazoliphatha. Bakhuleka bazila ukudla. base bebethula lababaholi eNkosini ukuba ibagcine, leyoNkosi abase bekholwa kuyo.

Babuyela eAntiyokhi kwelaseSiriya

²⁴Badabula kwelasePhisidiya, bafika kwelasePhamfiliya,

²⁵bashumayela izwi leNkosi emzini wasePerge. Base behlela kowaseAthaliya

²⁶lapho basuka khona ngomkhumbi. Baphikelela emzini waseAntiyokhi kwelaseSiriya. Lomuzi kulapho babeqale khona uhambo lwabo, sebethulwe kuNkulunkulu ukuba abagcine, abenzele umusa kulomsebenzi abase bewufezile manje.

²⁷Kuthe sebefikile lapho, bamema ibandla. Balibikela ngakho konke uNkulunkulu akwenze ngesandla sabo, nokuthi uvulele abezizwe ithuba lokuphenduka bakholwe.

²⁸Bahlala lapho isikhathi eside nabazalwane.

ImiSebenzi 15

Umhlangano waseJerusalema

¹Kwafika amadoda eAntiyokhi evela eJudiya, afundisa abazalwane athi: “Uma ningasokile ngokomthetho kaMose anisoze nasindiswa.”

²Kwaba khona ukungezwani okukhulu; uPawula noBhanabhasi bewaphikisa kakhulu ngaloludaba. Kwase kunqunywa ukuba uPawula noBhanabhasi kanye nabanye bebandla baye eJerusalema, babonane nabaphostoli nabaphethe ebandleni, kubhungwe ngaloludaba.

³Ibandla labavalelisa badlulela phambili, badabula kwelaseFenisiya nelaseSamariya. Endleleni yabo babeyaye babikele abazalwane ngabezizwe asebephen dukile bakholwa, lokhu kubajabulise kakhulu abazalwane bonke.

⁴Bafika eJerusalema, ibandla nabaphostoli nabaphethe ebandleni babemukela ngesasasa. OPawula babalandisa konke uNkulunkulu akwenze ngesandla sabo.

⁵Kwasukuma abanye beqembu labafarisi asebephen duke bakholwa, bathi kufanele abezizwe abaphendukayo basoke, bayalwe ukuba bagcine umthetho kaMose.

⁶Abaphostoli kanye nabaphathi bebandla bahlangana ukuba baluphenye loludaba.

⁷Kwakukhulunyiswana kabanzi, kwasukuma uPhetro wathi: “Bafowethu! Nazi kahle ukuthi uNkulunkulu wangikhetha kudala phakathi kwenu ukuba ngishumayeze abezizwe indaba emnandi, bakholwe.

⁸UNkulunkulu owazi izinhliziyi zabantu waveza ubufakazi bokuthi wamukela nabezizwe, ngoba phela wabapha uMoya oyiNgcwele njengathi.

⁹Akabandlululanga phakathi kwethu nabo. Bakholwa, wabahlanza izinhliziyi.

¹⁰Pho senimqalelani uNkulunkulu ngokwethwesa abazalwane umthwalo owawehlula okhokho kanye nathi ukuwuthwala na?

¹¹Thina-ke siyakholwa ukuthi iNkosi uJesu isisindisa ngomusa njengabo abezizwe.”

¹²Bathula bonke balalela, uBhanabhansi noPawula base bebalandisa ngezibonakaliso nezimangaliso uNkulunkulu azenze ngesandla sabo kwabezizwe.

¹³Baqeda ukukhuluma, uJakobe wathatha wathi:

¹⁴“Bazalwane, ake nilalele! USimoni usanda kusichazela ukuthi kwasukelaphi ukuba uNkulunkulu aze azikhathaze aziqokele phakathi kwabezizwe isizwe esibizwa ngegama lakhe.

¹⁵Lokhu kuvumelana nokulotshwe ngabaphrofethi embhalweni ukuthi:

¹⁶“ ‘USimakade uthi: Ngiyobuya, ngivuse umuzi kaDavide osuwile, ngivuselele okubhidlike kuwo, ngiwumise ngiwakhe kabusha.

¹⁷Nabanye abantu bayongifuna, bonke abezizwe ababizwa ngegama lami. Kusho uSimakade owakubikezela lokhu,

¹⁸kwaziwa phakade kwaphakade.’ ”

¹⁹UJakobe waqhubeka wathi: “Mina ngokwami ngithi asingabakhathazi abezizwe abaphendukela kuNkulunkulu.

²⁰Kuphela nje kuhle babhalelwe incwadi, batshelwe ukuthi bangadli kudla okungahlanzekile okuhlathelwe izithixo, bayeke ubufebe, bangadli gazi lasilwane, bangadli nanyama yasilwane esiqumbeleneyo.

²¹Ngoba kusukela emandulo kufundiswa kuwo onke amadolobha ngemiyalo kaMose, ifundwa emasinagogeni njalo ngesabatha.”

Incwadi evela emhlanganweni eJerusalema

²²Abaphostoli nabaphethe ebandleni nebandla lonke base benquma ukuba kukhethwe amadoda athile phakathi kwabo, athunyelwe eAntiyokhi, ahambe noPawula noBhanabhasi. Bakhetha uJudasi okuthiwa nguBhasabha noSilasi ababehloniphekile kubazalwane.

²³Baphathiswa incwadi elotshwe kanje: “Yamukelani evela kubazalwane benu, thina esingabaphostoli nabaphethe ebandleni. Silobela nina bazalwane eningabezizwe eniseAntiyokhi nakwelaseSiriya nakwelaseSilisiya.

²⁴Sizwile ukuthi kusuke abanye bethu lapha bafike lapho banikhathaza emoyeni ngabakushoyo; kanti-ke besingabathumanga.

²⁵Sinqume ngazwi linye ukuba sikhethe amadoda siwathumele kini, ehamba nabazalwane abathandekayo uBhanabhasi noPawula

²⁶asebadela impilo yabo, besebenzela iNkosi yethu uJesu Kristu.

²⁷Ngakhoke sithumela uJudasi noSilasi abazonethulela esikulobile.

²⁸Siholwe nguMoya oyiNgcwele sanquma ukuba singanethwesi omunye umthwalo ngaphandle kwalokhu okumele nikugcine, sathi:

²⁹Ningadli kudla okuhlatshele izithixo, ningadli gazi nanyama yasilwane esiqumbeleneyo, niyeke ubufebe. Uma nixwaye lezizinto niyobe nenze kahle. Salani kahle!”

³⁰Labo-ke ababethunyiwe behlela eAntiyokhi, bafike babiza ibandla, balinika incwadi.

³¹Yafundwa, abantu bajabula ngamazwi ayo akhuthazayo.

³²UJudasi noSilasi ababengabaphrofethi nabo, bashumayela kabanzi bekhuthaza abazalwane, bebamisa isibindi.

³³Bahlala isikhathi lapho, base bevaleliswa ngabazalwane, bahamba ngokuthula babuyela kwababebathumile.

[³⁴Kepha uSilasi wakhetha ukusala eAntiyokhi.]

³⁵UPawula noBhanabhasi bahlala eAntiyokhi isikhathi, befundisa beshumayela izwi leNkosi, bekanye nabanye abaningi.

UPawula noBhanabhasi bayahlukana

³⁶Kwadlula izinsukwana, uPawula wayesethi kuBhanabhasi: “Asihambe sibuyele kuwo onke amadolobha lapho sasishumayela khona izwi leNkosi, sihambele abazalwane, sihlolile ukuthi banjani!”

³⁷UBhanabhasi wayefuna ukuba bathathe noJohane okuthiwa nguMarko, bahambe naye.

³⁸Kodwa uPawula wabona kungekühle ukuba bahambe nomuntu owabahlubuka besekwelasePhamfiliya, akabe esahamba nabo besaqhubeka nomsebenzi.

³⁹Baxabana kabi ngalendaba baze behlukana. UBhanabhasi wathatha uMarko, wahamba naye baya eSayiphro ngomkhumbi.

⁴⁰Kepha uPawula wazikhethela uSilasi ukuba ahambe naye. Abazalwane bamcelela isibusiso seNkosi ukuba ahambe nomusa, wasuka

⁴¹wadabula kwelaseSiriya nelaseSilisiya, ekhuthaza amabandla ewamisa isibindi.

ImiSebenzi 16

UThimothi uhamba noPawula noSilasi

¹Wahamba waze wafika emizini yaseDerbhe naseListra. Kwakunekholwa lapho elithiwa nguThimothi. Unina wayengumJuda okholwa kuJesu, uyise engowezizwe.

²Abazalwane baseListra naseIkhoniyo babemncoma impela uThimothi.

³UPawula wayefuna ukuhamba naye, wamthatha wamsoka, ngoba onke amaJuda ayakhe kulezozindawo ayazi ukuthi uyise ungowezizwe.

⁴Badabula imizi, behamba betshela abazalwane ngesinqumo esenziwe ngabaphostoli nabaphethe ibandla laseJerusalema, bethi kumele bakugcine.

⁵Ukukholwa kwabazalwane kwase kuqina, namabandla anda imihla ngemihla.

UPawula ubona umuntu waseMasedoniya ngombono

⁶UMoya oyiNgcwele wabenqabela ukuba bashumayele izwi likaNkulunkulu ezweni laseAsiya, ngakhoke baqhubeka badabula kwelaseFrigiya nasesifundeni saseGalathiya.

⁷Kuthe sebesondele kwelaseMisiya bazama ukuya kwelaseBhithiniya, kepha uMoya kaJesu kawubavumelanga.

⁸Baqhubeka badabula kwelaseMisiya, behlela emzini waseTrowa.

⁹UPawula wabona umbono ebusuku, indoda yaseMasedoniya imi imnxusa ithi: "Ake uze lapha eMasedoniya usisize!"

¹⁰Kuthe angafikelwa yilombono maqede salungela ukuya eMasedoniya, ngoba kwasikhanyela ukuthi nguNkulunkulu osibizela ukuba sibashumayeze indaba ethokozisayo lapho.

Kuphenduka uLidiya

¹¹Sasuka ngomkhumbi emzini waseTrowa, saqonda esiqhingini saseSamotrasi; ngakusasa safika emzini waseNeyapholi.

¹²Sehla emkhunjini, sahamba saya eFiliphi, umuzi wesifunda sokuqala kwelaseMasedoniya. Lomuzi uphansi kombuso waseRoma. Sahlala izinsukwana kuwo.

¹³Ngosuku lwesabatha saphuma ngesango lomuzi saya ngasemfuleni, lapho sasithi sizothola khona indawo yamaJuda yokukhuleka. Safike sahlala phansi, sakhuluma kwabesifazane ababebuthene lapho.

¹⁴Omunye wabo wayebizwa ngoLidiya. Wayengowesifazane womuzi waseThiyathira owayethengisa ngezingubo ezibukhwebezane. Wayemesaba uNkulunkulu. Walalela, iNkosi yamvula umqondo, wakwemukela okushiwo nguPawula.

¹⁵Wabhabhadiswa kanye nabomuzi wakhe, wayesesimema wathi: “Uma neneliswa ukuthi sengiyakholwa eNkosini, wozani ningenise kwami! ” Wasibelesela ukuba siye kwakhe.

Ukuboshwa koPawula eFiliphi

¹⁶Ngelinye ilanga sahamba saya endaweni yomkhuleko. Selanyelwa yintombazana eyisigqili eyayingenwe ngumoya wobungoma. Abaniniyo yayibangenisela imali eningi ngokubhula.

¹⁷Yasilandela sinoPawula imemeza ithi: “Lababantu bayizinceku zikaMvelinqangi uSimayedwa. Banishumayeza indlela yensindiso.”

¹⁸Yakwenza lokhu izinsuku eziningi zalandelana, uPawula waze wacasuka, waphendukela kuyo wakhuza umoya omubi wathi: “Ngamandla egama likaJesu Kristu ngiyakuyala ukuba uphume kuyo! ” Waphuma ngaso lesosikhathi.

¹⁹Kwathi ukuba abaniniyo babone ukuthi seliphele lonke ithemba lokuthola inzuzo ngayo, babamba uPawula noSilasi, babahudulela phambi kwezikhulu esigcawini samacala.

²⁰Babamisa phambi kweziphathimandla zamaRoma bathi: “Lababantu bangamaJuda; basusa isiyaluyalu endaweni yakithi.

²¹Bafundisa amasiko okungavunyiwe ukuba siwemukele thina esingamaRoma.”

²²Nesixuku sabathelekela oPawula noSilasi, neziphathimandla zathi mabahlutshulwe izingubo badindwe ngenduku.

²³Bashaywa imivimbo eminingi, bagqunywa ejele. Kwase kuthiwa umlindi wejele akabavalele angabadedeli.

²⁴Wathunywa lokho qede wabathatha, wabafaka engosini yeziboshwa ephakathi naphakathi. Imilenze yabo wayibophela ogodweni.

²⁵UPawula noSilasi babekhuleka ebusuku kwesikabhadakazi, becula bedumisa uMvelinqangi, ezinye iziboshwa zibalalele.

²⁶Kuthe bengazelele umhlaba wamazama kakhulu, kwaze kwanyakaza nezisekelo zejele. Kwavuleka khona lapho yonke iminyango, kwathukuluka namaketango okwakuboshwe ngawo iziboshwa.

²⁷Umlindi wejele waphaphama ebuthongweni, okwathi angabona iminyango yejele ivulekile, wacabanga ukuthi iziboshwa sezeqile, wayesehosha inkemba yakhe ethi uyazibulala.

²⁸Kodwa uPawula wamemeza waqonga wathi: “Ungazilimazi! Sikhona sonke! ”

- ²⁹Umlindi wejele wathi akokhelwe izibani, wagijima wangena wazijwiba phansi phambi kukaPawula noSilasi ethuthumela.
- ³⁰Wayesebakhhipha ejele, ebuza ethi: “Banumzane, kumele ngenzeni ukuba ngisindiswe na?”
- ³¹Bamphendula bathi: “Kholwa eNkosini uJesu khona uzosindiswa, wena nomuzi wakho!”
- ³²Base bemshumayeza ngeNkosi, ekanye nabomuzi wakhe.
- ³³Wabathatha khona ebusuku lobo, wabageza amanxeba, wabhabhadiswa nomuzi wakhe ngaso lesosikhathi.
- ³⁴Wabangenisa kwakhe, wabanika ukudla. Wajabula kakhulu, kanye nomuzi wakhe, ngoba base bekhola kuNkulunkulu.
- ³⁵Kwasa ngakusasa iziphathimandla zamaRoma zathumela amaphoyisa zathi: “Dedelani labobantu!”
- ³⁶Umlindi wejele usebikela uPawula uthi: “Abakhulu bathumele izwi bathi anidedelwe. Ngakhoke phumani nihambe ngokuthula!”
- ³⁷Kodwa uPawula wathi emaphoyiseni: “Kuthe singahlwanga cala basixebula basixebula kubukela wonke umuntu, base besigquma ejele, kanti siyizakhamuzi zombuso wamaRoma. Manje sebethi asidedelwe isinyenyela? Phinde! Akuze bona ngokwabo bazosikhipha!”
- ³⁸Amaphoyisa ahamba abikela iziphathimandla lawamazwi. Zethuka lapho zizwa ukuthi kanti bayizakhamuzi zombuso wamaRoma.
- ³⁹Zase ziya kubo, zafike zakhuluma kahle nabo, zabakhipha ejele zabacela ukuba bemuke kulowomuzi.
- ⁴⁰Baphuma ejele baya kwaLidiya. Bafike babona abazalwane, bakhuluma nabo babakhuthaza base behamba.

ImiSebenzi 17

Isiyaluyalu saseThesalonika

- ¹Bahamba badabula emizini yaseAmfipholi naseApholoniya, base befika emzini waseThesalonika. Kwakukhona lapho isinagoge lamaJuda.
- ²UPawula waya wasonta njengento ayeyejwayele. Kwaze kwalandelana amasabatha amathathu ebonisana namaJuda ngemibhalo engcwele,
- ³eyichaza ekhombisa ukuthi kwakumele uMesiya ahlushwe abulawe, avuke kwabafileyo. Wayesethatha ethi: “UJesu lo enginshumayeza ngaye unguMesiya.”

⁴Amanye amaJuda akholwa, abambelela kuPawula noSilasi. Senze njalo nesixuku eksikhulu sabantu bezizwe abamesabayo uNkulunkulu, kanye nabesifazane abaningi abagqamileyo.

⁵AmaJuda ayesebafela umona, aqoqa izichwensi ezithile emigwaqweni, abhebhezela izihlwele, asusa udweshu emzini, ayesethelekela umuzi kaJasoni, ethungatha uPawula noSilasi ukuba abasasazele ngesixuku.

⁶Kwathi lapho engabatholi athatha uJasoni nabanye abazalwane, abadonsela kubaphathi bomuzi amemeza athi: “Lababantu abaphekula izikhuni emhlabeni wonke sebeze bafika nalapha,

⁷uJasoni wabangenisa kwakhe. Bonke bephula umthetho wengonyama yaseRoma, bathi kukhona enye inkosi okuthiwa nguJesu.”

⁸Amemeza kwaphithizela izixuku nabaphathi bomuzi, kwasuka udwishi.

⁹UJasoni kanye nabanye bakhokha kwaboshwa imali yabo, bona badedelwa.

OPawula baseBhiriya

¹⁰Kuthe ngabo lobobusuku abazalwane badlulisela uPawula noSilasi emzini waseBhiriya. Kuthe bangafika lapho, baya esinagogeni lamaJuda.

¹¹Lawa ayenobuntu, enesimilo esingcono kunawaseThesalonika. Alamukela izwi, azinikela ngenhliziyo. Ayecwaninga imibhalo engcwele malangonke, efuna ukuthola ukuthi kuyikho yini okushiwo nguPawula.

¹²Akholwa aba maningi. Kwakholwa nabezizwe abaningi, abesifazane abayiziphakanyiswa ngisho nabesilisa.

¹³Kuthe ukuba amaJuda aseThesalonika ezwe ukuthi uPawula useshumayela izwi likaNkulunkulu naseBhiriya, aqonda khona afike adunga abantu baphithizela.

¹⁴Abazalwane base bemmukisa ngokushesha uPawula, bamusa ngasolwandle, kodwa uSilasi noThimothi basala eBhiriya.

¹⁵Laba ababephelekezela uPawula baze bambeka emzini waseAthene. Base bebuyela emuva, esebaphathise umyalezo wokuthi uSilasi noThimothi mabasheshe beze kuye.

UPawula useAthene

¹⁶Kuthe uPawula esabalindele eAthene, wezwa edungeka umoya lapho ebona umuzi ugcwele imiphuhle yezithixo.

¹⁷Ubeya esinagogeni afike abonisane namaJuda nalabo ababesaba uNkulunkulu. Afike akhulume imihla ngemihla nasembuthanweni kubantu ayethuka ehlangana nabo.

¹⁸Izihlakaniphi ezithile zophiko lwemfundiso kaEphikhuroneyamaStoyikhi nazo zatholana phezulu naye. Ezinye zathi: “Lona ngabe uphethe nhlamvu zini zolwazi

azicoshileyo na? Uqonde ukuthini? ” Abanye bathi: “Sengathi ushumayela onkulunkulu esingabaziyo.” Phela wayeshumayela indaba ejabulisayo ngoJesu nangokuvuka ekufeni.

¹⁹Base bemthatha bamusa enkundleni yomkhandlu eseAreyophago, bathi: “Ake usazise ngalemfundiso entsha oyishumayelayo.

²⁰Lokhu okushoyo siyakweshwama. Sithanda ukuzwa ukuthi uthini.”

²¹Ngoba zonke izakhamuzi zaseAthene nezihambi ezase zakhe khona zazikuthanda ukuchitha isikhathi ziphosoze zilalele amanqampunampumulo kuphela.

²²UPawula wasukuma phambi komkhandlu waseAreyophago wathi: “Madoda aseAthene! Konke engikubonayo kukhomba ukuthi niyikhuthalele impela inkolo.

²³Ngithe ngithubeleza lapha, ngibuka lapho nikhonza khona, ngazithela naselathini elinombhalo othi: ‘UNKulunkulu ongaziwayo’. Lowo-ke enimkhonza ningamazi, nguye kanye enginishumayeza ngaye.

²⁴UMvelinqangi owadala umhlaba nakho konke okukuwo, yena oyiNkosi yezulu nomhlaba, akahlali emathempelini akhiwe ngezandla.

²⁵Akakhonzwa ngamsebenzi wazandla zamuntu, ngoba kaswele lutho. Nguye opha bonke abantu ukuphila nomphefumulo nakho konke.

²⁶Wadabula isintu sonke kumuntu oyedwa ukuba sakhe emhlabeni wonke. Wanqumela isizwe ngesizwe ithuba laso, wasiklamela nemincele yaso.

²⁷Wadala abantu ukuba bamfune, hleze baze bamthole ngokumpumputha. Kanti-ke uMvelinqangi akakude namuntu kithi.

²⁸Ngoba siphila ngaye, sinyakaza ngaye, sikhona ngaye, njengoba nezinye izimbongi zakini zishilo zathi: “ ‘Ngisho nathi siyinzalo yakhe.’

²⁹“Njengoba siyinzalo kaMvelinqangi, akumele ukuba ubuNkulunkulu sibufanise nomfanekiso wegolide nesiliva netshe, obunjwe ngekhono nangobuciko bomuntu.

³⁰UMvelinqangi wabayekelela abantu ngenkathi bengakamazi. Kepha manje ubakhuza bonke ukuba baphenduke izindawo ngezindawo.

³¹Unqume usuku ayokwahlulela ngalo ngobuqotho bonke abasemhlabeni, ngesandla sendoda ayimisele lesosikhundla. Lokhu wakukhombisa ngokusobala kubantu bonke ngokuyivusa kwabafuleyo.”

³²Lapho bemuzwa uPawula ekhuluma ngokuvuka kwabafuleyo, abanye bambhinqa, abanye-ke bathi: “Uyobuye usixoxele ngolunye usuku.”

³³Wayesebashiya khona lapho.

³⁴Amadoda athile anamathela kuye akholwa. Phakathi kwawo kwakukhona uDiyonisiyo, ilungu lomkhandlu waseAreyophago. Kwakholwa nowesifazane okuthiwa nguDamari nabanye abathile.

ImiSebenzi 18

UPawula useKhorinte

¹UPawula wayesesuka eAthene, waya emzini waseKhorinte,

²wafike wathola umJuda othile okuthiwa nguAkwila engowokuzalwa kwelasePhontu. Wayesand' ukufika nomkakhe uPhrisila bevela kwelaseNtaliyane, ngoba phela uKlawudiyu, ingonyama yombuso waseRoma, wayekhiphe umyalo wokuthi onke amaJuda mawaphume aphele emzini waseRoma. UPawula waxhumana nabo.

³Njengoba wayephila ngokwakha amathende njengabo wahlala nabo, besebenza ndawonye.

⁴Bekuthi njalo nje ngesabatha aqagulisane namaJuda nabezizwe esinagogeni ezama ukuwabonisa.

⁵Kwafika uSilasi noThimothi bevela kwelaseMasedoniya, bamfica uPawula esengene wathi shi emsebenzini wokushumayela, efakaza emaJudeni ethi uJesu unguMesiya.

⁶Kodwa ayemphikisa emjivaza, ngakhoke wathintitha uthuli ezingutsheni zakhe wathi: “Anginacala egazini lenu, seliyokhalela nina, mina ngimsulwa. Sengiya kwabezizwe kusukela manje.”

⁷Wabashiya kanjalo, wahamba waya emzini kaThithiyu Justu, owezizwe owayesaba uNkulunkulu. Lomuzi wawuncikene nesinagoge.

⁸UKhrispu, umphathi wesinagoge, waphendukela eNkosini nomuzi wakhe bakholwa. Bangingi abantu baseKhorinte okwathi bangalizwa ivangeli bakholwa babhabhadiswa.

⁹Langathize iNkosi yafika kuPawula ngombono ebusuku yathi kuye: “Yima isibindi ungesabi! Qhubeka ushumayeke ungathuli,

¹⁰ngoba nginawe. Akukho muntu oyokugcweleza ulimale; bangingi abantu bami abakulomuzi.”

¹¹UPawula wahlala lapho unyaka nenxenye, efundisa izwi likaNkulunkulu phakathi kwabo.

¹²Ngenkathi uGaliyo ethatha isikhundla ebusa elaseAkhaya, amaJuda ahlanganyela uPawula, ambamba amusa esigcawini samacala.

¹³Ammangalela athi: “Lomfokazi uyenga abantu ukuba bakhonze uNkulunkulu ngendlela ephambene nomthetho wezwe.”

¹⁴Kuthe uPawula esathi uyakhuluma, kwasuka uGaliyo wathi emaJudeni: “Ukuba nina maJuda benilethe udaba lobugebengu kumbe icala elibi kakhulu, bengizonizwa ngiliquele.

¹⁵Kepha nilethe umbango nje ngemfundiso nangamagama abathile nangomthetho wakini, ngakhoke ngithi ziboneleni nina. Mina angifuni ukuqula amacala anje.”

¹⁶Wayesewakhipha esigcawini.

¹⁷Asuka onke adumela uSostene umphathi wesinagoge, amshaya khona lapho esigcawini. Kodwa lokhu akuzange kumhluphe nakumhlupha uGaliyo.

UPawula ubuyela eAntiyokhi

¹⁸UPawula wahlala izinsuku eziningi nabazalwane eKhorinte, wayesevalelisa, wasuka ngomkhumbi waya kwelaseSiriya. UPhrisila noAkhwila bahamba naye. Kodwa kuthe engakasuki ngomkhumbi wagunda esethekwini laseKhenkriya, ngoba wayephansi kwesifungo.

¹⁹Bafika emzini wasEfesu, lapho ashiya khona uPhrisila noAkhwila. Waya esinagogeni, wafike waphikisana namaJuda.

²⁰Wanxuswa ukuba ahlale isikhathi eside. Akavumanga,

²¹kodwa wavalelisa wathi: “Ngobuya ngibuye ngize kini uma iNkosi ivuma.” Wasuka Efesu wahamba ngomkhumbi.

²²Wafike wehla emzini waseKhesariya. Wayesekhuphukela eJerusalema wabonana nebandla. Emuva kwalokho wedlula wehlela emzini waseAntiyokhi.

²³Wahlala isikhashana lapho, wasuka wadabula esifundeni saseGalathiya naseFrigiya, ehamba ekhuthaza abazalwane.

UApholo ushumayela Efesu

²⁴Efesu kwafika umJuda okuthiwa nguApholo. Wayengowokuzalwa emzini waseAleksandriya. Wayeliciko lokukhuluma, enolwazi olubanzi lwemibhalo engcwele.

²⁵Wayefundiswe ngenkolo yobuKristu, ekhuthalele ukushumayela afundise ashaye khona ngezinto eziqondene noJesu, nanxa wayazi umbhabhadiso kaJohane kuphela.

²⁶Washumayela esinagogeni ngesibindi. Kuthe bangamuzwa oPhrisila noAkhwila, bamthatha bamqondisa kahle bemfundisa ngoNkulunkulu.

²⁷Wayefuna ukwedlulela kwelaseAkhaya, abazalwane bamkhuthaza, balobela amakholwa akhona ukuba amemukele. Wafike wabasiza kakhulu abakholwayo egcwele umusa kaNkulunkulu.

²⁸Lapho kuphikiswana eshashalazini, wayewehlula amaJuda ngokukhuluma amagama anesisindo, ekhombisa ngokusobala ngemibhalo engcwele ukuthi uJesu unguMesiya.

ImiSebenzi 19

UPawula usEfesu

¹Ngenkathi uApholo eseKhorinte, uPawula wadabula esifundeni esingaphakathi nezwe, wafika emzini wasEfesu, wafica amakholwa,

²wawabuza wathi: “Kambe nawemukela yini uMoya oyiNgcwele mhla niphenduka nikholwa na?” Amphendula athi: “Asikaze sizwe nakuzwa ukuthi kukhona uMoya oyiNgcwele.”

³UPawula waqhubeka wathi: “Kanti nabhabhadiswa ngambhabhadiso muni na?” Amphendula athi: “Ngombhabhadiso kaJohane.”

⁴UPawula wayesethi kuwo: “UJohane wayebhabhadisa abantu abaphendukayo, ethi abakholwe kulowo ozomlandela, lowo-ke nguJesu.”

⁵Athi angakuzwa lokhu abhabhadiswa ngegama leNkosi uJesu.

⁶UPawula wawabeka izandla, uMoya oyiNgcwele wehlela kuwo, akhuluma ngezilimi, aphrofetha.

⁷Sebebonke babelinganiselwa emadodeni ayishumi nambili.

⁸Kwaba yisikhathi esingangezinyanga ezintathu uPawula ede eya esinagogeni, afike akhulume ngesibindi ngombuso kaNkulunkulu, aphikisane nabo ezama ukubabonisa.

⁹Kepha abanye babo baqinisa amakhanda, kabaze bakholwa, kodwa bajivaza inkolo yobuKristu phambi kwabantu bonke. UPawula wabashiya khona lapho, wathatha abazalwane wahamba nabo. Wayehleze exoxisana nabantu mihla ehholo likaThirano lokufundisa.

¹⁰Wakwenza lokhu iminyaka emibili, base bethola ithuba lokuzwa izwi leNkosi bonke abakhe kwelaseAsiya, amaJuda kanye nabezizwe.

Amadodana kaSkeva

¹¹UNkulunkulu wenza izimangaliso ezingandile ngoPawula,

¹²abantu baze bathatha amaduku nezindwangu ezazike zamthinta uthi lomzimba, baziyisa kwabagulayo basinda ezifweni, nemimoya emibi yaphuma kubo.

¹³Kukhona nezanuse zamaJuda ezazehla zenyuka zilinge ukugagula igama leNkosi uJesu zikhuze abanemimoya emibi zithi: “Ngikufungela loJesu uPawula amshumayelayo.”

¹⁴Lomkhuba wenziwa ngamadodana ayisikhombisa omphristi omkhulu wamaJuda okuthiwa nguSkeva.

¹⁵Kepha umoya omubi wathi kubo: “UJesu ngiyamazi, ngiyazi nangoPawula. Pho nina ningobani?”

¹⁶Umuntu owayephethwe yidimoni wayesebadumela, walwa nabo waze wabehlula bonke, baphuma endlini babaleka benqunu belimele kabi.

¹⁷Yezwakala lendaba kubo bonke abakhe Efesu, amaJuda nabezizwe. Bashaywa uvalo bonke, igama leNkosi uJesu laba nodumo.

¹⁸Iningi labantu abase bekhulwa babefike bakuvume obala abakwenzileyo.

¹⁹Abantu ababekade benze imilingo baqoqela ndawonye izincwadi zabo zemilingo, bazithungela ngomlilo, zasha phambi kwabantu. Kuthe uma sekuhlanganiswa inani lazo, kwatholakala ukuthi lingangezinhlamvu zesiliva eziyizinkulungwane ezingamashumi ayisihlanu.

²⁰Ngalendlela izwi leNkosi laqhubeka landa kakhulu laba namandla.

Kusuka isiphithiphithi Efesu

²¹Kwedlule lokhu uPawula wayesehlosa ukudabula kwelaseMasedoniya nelaseAkhaya eya eJerusalema, wathi: “Uma sengifikile lapho, kumele ngiyobona naseRoma.”

²²Wathumela abasizi bakhe ababili, uThimothi noErasto, kwelaseMasedoniya yena wahlala inkathi kwelaseAsiya.

²³Ngalesosikhathi kwasuka esinamathambo Efesu sisuka ngenkolo yamaKristu.

²⁴Umkhandi wesiliva owayethiwa nguDemetriyo wayebumba izithombe zesiliva zethempeli lesithixokazi uAthemisi. Ngalomsebenzi wayedalela izingcweti inzuzo enkulu.

²⁵Wazibizela ndawonye kanye nabanye abangozakwabo kulomsebenzi, wathi kubo: “Madoda! Nazi kahle ukuthi umnotho wethu siwuthola ngalomsebenzi.

²⁶Nizibonele ngokwenu nezwa ukuthi loPawulandini wedukise abantu abaningi, kungesikho lapha Efesu kuphela, kepha cishe nakulo lonke laseAsiya. Uhamba ebathshela ukuthi akunkulunkulu labo abenziwa ngezandla zabantu.

²⁷Sisengozini yokuba lomsebenzi wethu udeleleke. Kanti futhi nethempeli likankulunkulu wethu uAthemisi lingahle libukelwe phansi, lwehle nodumo lwalenkosazana engunkulunkulu abayikhonza bonke kwelaseAsiya nasemhlabeni wonke.”

²⁸Kuthe lapho isixuku sizwa lawamazwi sathukuthela safa, samemeza sathi: “Mkhulu uAthemisi wasEfesu!”

²⁹Kwasuka isiphithiphithi phakathi komuzi wonke. Isixuku sasukela uGayiyu noAristakho, sabaxhakathisa, sakhukhula nabo ngothi lwaso saya enkundleni yemidlalo. Laba babengabaseMasedoniya behamba noPawula.

³⁰UPawula wayefuna ukuya esixukwini, afike akhulume phambi kwaso, kepha abazalwane bamenqabela.

³¹Ezinye iziphathimandla zesifunda saseAsiya ezazazana noPawula zathumela kuye, zimxwayisa ukuba angalubeki enkundleni leyo.

³²Kwase kunesihlonono esixukwini, abanye bememeza lokhu, abanye besho lokhuya, nakhu phela iningi labo lalingazi nokuthi kubuthenwe nje kwenze njani.

³³UAleksanda othile waqhutshelwa ngaphambili ngamaJuda, abanye esixukwini base bemtshela ukuthi kwenze njani. Wabahebeza ngesandla efuna ukuzishwelezela kubantu.

³⁴Kuthe lapho bemuzwa ukuthi kanti ungumJuda, bamemeza cishe amahora amabili besho isiqubulo bethi: “Mkhulu uAthemisi wasEfesu!”

³⁵Unobhala womuzi wabathulisa wathi: “Mabandla akithi Efesu! Ubani lapha ongaziyo ukuthi lomuzi wethu wasEfesu ungumzanyana wethempeli lika-Athemisi omkhulu nelomfanekiso wakhe ohlonishwayo owaqathaka ezulwini.

³⁶Lokhu kungephikwe muntu. Ngakhoke yehlisani umoya ningathathi ngamawala.

³⁷Phela nilethe lawamadoda lapha nanxa engesibo abaphangi bamathempeli, futhi engahlambalazanga unkulunkulu wethu.

³⁸Kanti uma uDemetriyo nezingcweti ezikanye naye befuna ukumangala, zikhona izinsuku ezinqunyelwe amacala, zikhona neziphathimandla eziwathethayo. Abamangalelane kuzo!

³⁹Kepha uma kukhona okunye enikufunayo, kumele udaba ludingidwe ngokomthetho ebandla.

⁴⁰Kukhona ingozi yokuba sethweswe icala lokususa isibhelu ngalokhu osekwenzeke namhlanje. Besingekho isidingo salomsindo, futhi singaziphendulela sithini ngawo?” Ngalawamazwi wawuhlakaza umbuthano.

ImiSebenzi 20

UPawula uya eMasedoniya naseAkhaya

¹Kwathi singalotha isiwiliwili sasEfesu, uPawula waqoqa abazalwane wabamisa isibindi, wavalelisa wadlulela kwelaseMasedoniya.

²Wadabula ezifundeni zakhona ehamba ekhuthaza amakholwa ngezintshumayelo eziningi. Wafika kwelamaGriki

³wahlala khona izinyanga ezintathu. Kuthe eselungela ukuya kwelaseSiriya ngomkhumbi, amaJuda akha icebo lokumbulala. Ngakhoke kwafika emqondweni wakhe ukuba abuyele emuva ngendlela edabula kwelaseMasedoniya.

⁴Wayehambisana nalaba: uSophatha waseBhiriya umfokaPhiro, uAristakhu noSikhundu baseThesalonika, uGayiyu waseDerbhe, uThimothi, uThikhikho noTrofimo bevela kwelaseAsiya.

⁵Basendulela bafike basilindela eTrowa.

⁶Sasuka eFiliphi emuva komkhosi wokudla isinkwa esingenamvubelo, sahamba ngomkhumbi saze sabafica eTrowa emuva kwezinsuku eziyisihlanu, sahlala izinsuku eziyisikhombisa.

UPawula uvalelisa eTrowa

⁷Ngosuku lokuqala lweviki sabuthanela ukuba sabelane isinkwa. UPawula washumayela kubo wayidonsa intshumayelo kwaze kwaba phakathi kwamabili, ngoba wayezohamba ngakusasa.

⁸Kwakukhanyiswe ngezibani eziningi endlini ephezulu esasibuthanele kuyo.

⁹Kwakuhlezi ibhungu elinguEwuthiko onqenqemeni lwefasitela. Wazunywa ubuthongo njengoba uPawula wayelokhu eyidonsile intshumayelo. Walala zwi wayesewa esitezi sesibili, wathanqazeka phansi, Bathi beqamba bemphakamisa wayesebanda.

¹⁰Kodwa uPawula wehla waya kuye, wafike wakhothama phezu kwakhe wamgona wathi: "Musani ukukhala, kafile!"

¹¹Wakhuphukela endlini ephezulu, wafike wabelana nabo isinkwa, washumayela isikhathi eside kwaze kwasa, wayesehamba.

¹²Balithatha ibhungu lelo seliphila, bahamba nalo beduduzeke kakhulu.

OPawula basuka eTrowa ngomkhumbi baya eMilethu

¹³Thina sasuka kuqala kunoPawula saya emkhunjini. Sahamba ngawo nce sidlule simthathe emzini waseAso lapho ayezokhwela khona. Phela wayehlele kanjalo esophe ukuya khona ngezinyawo.

¹⁴Kuthe angahlangana nathi eAso, wangena emkhunjini esasiwugibele, saya emzini waseMithilene.

¹⁵Sasuka lapho saye safika maqondana nomuzi waseKhiyo ngakusasa. Ngomhlomunye sadlula ngasesiqhingini saseSamo, okwathi ngosuku olulandelayo safika emzini waseMilethu.

¹⁶UPawula phela wayekade enqume ukungangeni Efesu ukuze angachithi sikhathi kwelaseAsiya. Nakhu phela wayephuthuma ukuba afinyelele eJerusalema ngosuku lwePhentekhoste uma kungenzeka.

UPawula uvalelisa ngentshumayelo kwabaphethe ebandleni Efesu

¹⁷Wathumela eseMilethu ukuba abaphathi bebandla lasEfesu beze kuye.

- ¹⁸Bafike-ke abesethi: “Bazalwane! Nizibonele ngokwenu ukuthi bengiziphethe kanjani phakathi kwenu, kusukela mhla ngiqala ukubeka unyawo lwami lapha kwelaseAsiya nangesikhathi sonke nginani.
- ¹⁹Niyazi ukuthi bengikhonza iNkosi ngingazigabisi, ngikhala izinyembezi ngihlupheka ngenxa yozungu lwamaJuda.
- ²⁰Niyazi nokuthi angigodlanga lutho obelunganisiza; nginishumayezile nganifundisa obala phambi kwabantu nasemakhaya ngamakhaya.
- ²¹Ngangiye ngifakaze ngigcizelele emaJudeni ngisho nakwabezizwe ukuba baphendukele kuNkulunkulu bakholwe eNkosini yethu uJesu.
- ²²Manje amabombo ngiwabhekise eJerusalema ngidonswa nguMoya oyiNgcwele. Angikwazi okuyongehlela lapho.
- ²³Engikwaziyo nje ukuthi uMoya oyiNgcwele uyangikhanyisela ngikulelo nalelodolobha, ufakaze ukuthi ngizofika phambili ngiboshwe ngihlupheke.
- ²⁴Kodwa ukuphila kwami akunto neningakhuluma ngayo, okukhulu kimi ukuba ngigijime ibanga lami, ngifeze umsebenzi iNkosi uJesu eyangabela wona, wokushumayela indaba emnandi efakaza ngomusa kaNkulunkulu.
- ²⁵“Ngiyazi manje ukuthi niyagcina ukungibona nina nonke ebengihamba phakathi kwenu nginishumayeza ngombuso kaNkulunkulu.
- ²⁶Ngakhoke ngiyaqinisa kini namhlanje ngithi ngimsulwa; anginacala egazini lamuntu kini.
- ²⁷Angizange ngidonde ukunivezela konke okuyintando kaNkulunkulu.
- ²⁸Xwayani, niqaphele nomhlambi lowo uMoya oyiNgcwele onibeke ukuba niweluse. Yalusani ibandla likaNkulunkulu azithengela lona ngegazi lakhe uqobo.
- ²⁹Ngiyazi phela ukuthi kuyothi ngingahamba lapha, bese nithelekelwa ngamankentshane angeke awushiya umhlambi.
- ³⁰Naphakathi kwenu imbala kuyovela abayokhuluma okuphambene neqiniso, bayenge amakholwa ukuba abalandele.
- ³¹Hlalani nilindile, nikhumbule ukuthi kuleminyaka emithathu nginani benginixwayisa ngamunye ubusuku nemini ngikhala izinyembezi!
- ³²“Manje senginethula kuNkulunkulu ukuba anilondoloze, nibambebele emfundisweni yomusa wakhe enamandla okunikhulisa ekukholweni, inabele ifa kanye nabo bonke asebengcwelisiwe.
- ³³Angizange ngifune siliva nagolide nangubo yamuntu.
- ³⁴Niyazazela kwanina ukuthi ngakusebenzela ngalezizandla zami esasikweswele, mina kanye nesasinabo.

³⁵Kukho konke engakwenzayo nganikhombisa ukuthi kufanele selekelele labo abangenamandla okuzisiza, sikhumbule amazwi eNkosi uJesu uqobo lapho ethi: 'Kubusisekile ukupha kunokwamukela.' ”

³⁶UPawula wakusho lokhu maqede waguqa ngamadolo nabo bonke, wakhuleka.

³⁷Baqhumuka bakhala bonke, bamxhawula bamanga bamvalelisa.

³⁸Ikakhulu babedatshukiswe ngamazwi akhe okuthi sebeyagcina ukumbona. Base bemphelekezela baze bambeka emkhunjini.

ImiSebenzi 21

UPawula uya eJerusalema

¹Sabavalelisa sasuka ngomkhumbi, saqonda ngqo esiqhingini saseKhose; ngakusasa safika kwesaseRodo; sasuka lapho saya emzini wasePhathara.

²Safike sathola umkhumbi owawuzowelela kwelaseFenisiya, sangena kuwo sahamba.

³Sabona isiqhingi saseSayiphro, sasishiya ngakwesokunxele saya kwelaseSiriya, safike sehla emzini waseThire, lapho umkhumbi wawuzokwethula khona impahla.

⁴Safika sathola abazalwane lapho, sase sihlala nabo izinsuku eziyisikhombisa. UMoya oyiNgcwele wakhuluma kulababazalwane ukuba batshele uPawula angayi eJerusalema.

⁵Kwaphela lezonsuku sasuka sahamba. Basiphelekezela bonke kanye nomkabo nabantababo, baze basibeka ngaphandle komuzi. Saguqa ngamadolo ogwini sakhuleka

⁶savalelisana. Sangena emkhunjini, base begoduka.

⁷Sasuka eThire saye sehla emzini wasePhetholemayi. Sahamba sabonana nabazalwane, sahlala nabo usuku lwalunye.

⁸Kwasa saqhubeka, safinyelela emzini waseKhesariya; saya kwamvangeli uFiliphu owayengomunye wamagosa ayisikhombisa, sangenisa kwakhe.

⁹Wayenamadodakazi amane ayengaganile ayengabaphrofethi eshumayela.

¹⁰Kwathi sesihlale izinsuku, kwafika umphrofethi okuthiwa nguAgabho evela eJudiya.

¹¹Weza kithi, wafike wathatha ibhande likaPawula, wazibopha ngalo izandla nezinyawo, wathi: “UMoya oyiNgcwele uthi: ‘Umnikazi walelibhande ayombopha kanje amaJuda eJerusalema, amkhaphele ezandleni zabezizwe.’ ”

¹²Lapho sikuzwa lokhu sinabantu balapho, samncenga uPawula ukuba angabe esaya eJerusalema.

¹³Kepha waphendula wathi: “Nikhalelani ningibangela inhliziyo ebuhlungu na? Mina sengikulungele kwakhona ukuboshwa lokhu nokubulawa imbala eJerusalema, ngibulawelwe igama leNkosi uJesu.”

¹⁴Sehluleka sithi siyambonisa, sadela sase sithi: “Akusale sekwenzeka intando yeNkosi!”

¹⁵Sabopha imithwalo emuva kwezinsukwana, sakhuphukela eJerusalema.

¹⁶Abanye abazalwane baseKhesariya bahamba nathi, bafike basethula kwaMnasoni waseSayiphro esasizongenisa kwakhe. Wayesenesikhathi eside akholwa.

UPawula ubonana noJakobe

¹⁷Ekufikeni kwethu eJerusalema abazalwane basemukela kahle basijabulela.

¹⁸Ngakusasa uPawula wahamba nathi saya kuJakobe, nabaphethe ebandleni babuthana bonke.

¹⁹UPawula wababingelela, wabalandisa ukusuka nokuhlala kwakho konke uNkulunkulu akwenzile phakathi kwabezizwe esebenza ngaye kulenkonzolo.

²⁰Kwathi bangakuzwa lokho, badumisa uMvelinqangi. Base bethi kuPawula: “Uyabona-ke mzalwane, ukuthi sekuphenduke amaJuda ayizinkulungwane akholwa, kodwa onke asawushisekele umthetho.

²¹Asezwile ngawe ukuthi ufundisa onke amaJuda ahlala ezizweni, uthi awangabambeleli emthethweni kaMose, uhamba uthi awangabasoki abantwana bawo, angagcini namasiko obuJuda.

²²Sizokwenze njani-ke manje? Empeleni bazokuzwa ukuthi usufikile lapha.

²³Ngakhoke sithi yenza njengalokhu sikutshela! Kukhona nanka amadoda amane asezibophezele ngesethembiso.

²⁴Hamba nawo nenze isiko lokuhlanjululwa, uwakhokhele izindleko bese ephuca amakhanda awo. Sebeyobona ngakho bonke ukuthi lokho abakuzwe ngawe kuyinto engekho, kubakhanyekele nokuthi nawe uqobo uyawugcina umthetho kaMose.

²⁵Kodwa mayelana nabesizwe asebephenduke bakholwa, kunjengoba sababhalela incwadi sababikela ngesinqumo sethu sokuthi mabangadli kudla okuhlatshele izithixo, bangadli gazi nanyama yasilwane esiqumbeleneyo, bayeke ubufebe.”

²⁶UPawula wathatha amadoda lawo, okwathi ngakusasa wahamba nawo, bafike benza isiko lokuhlanjululwa. Wayeseya ethempelini, wafike wamemezela isikhathi okuyophela ngaso izinsuku zokuhlanjululwa, bese leyo naleyondoda inikelelwa ngomhlatshelelo.

Ukuboshwa kukaPawula esethempelini

²⁷Kwathi sekuzophela lezonsuku eziyisikhombisa, amaJuda ayevela kwelaseAsiya ambona uPawula esethempelini. Ayesemsasazela ngesixuku sonke, ambhozomela.

²⁸Amemeza athi: “Phuthumani maIsrayeli niselekelele! Nangu lomuntu ohamba lonke izwe, efundisa okuphambene nesizwe sakithi nomthetho kaMose nalelithempeli. Manje usengenise nabezizwe lapha ethempelini, wayingcolisa lendawo engcwele.”

²⁹Bakusho lokhu ngoba babebone uTrofimo wasEfesu ekanye naye eJerusalema, base bethatha ngokuthi uPawula umngenise ethempelini.

³⁰Kwasuka isiphithiphithi kuwo wonke umuzi, abantu bakhandana ndawonye. Bamdumela uPawula, bamhudulela ngaphandle kwethempeli maqede kwavalwa amasango.

³¹Kuthe lapho isixuku sesifuna ukumbulala kwabikelwa umphathi wamabutho amaRoma ukuthi lonke iJerusalema liyaphithizela.

³²Akabe esaqula umphathi wathatha amabutho nezinduna, waphuthuma waqonda esixukwini. Kwathi lapho amaJuda ebona umphathi namabutho, ayeka ukundinda uPawula.

³³Umphathi wasondela wambopha wathi akagigwe ngamaketango amabili. Wabuza ukuthi lomuntu ungubani, wenzeni na.

³⁴Abanye esixukwini bamemeza basho lokhu, nabanye basho lokhuya. Esiwiliwilini esasukayo umphathi akabange esazi ukuthi isisusa yini. Watshela amabutho ukuba athathe uPawula amuse ngaphakathi enqabeni.

³⁵Afika naye ezitebhisini, kwase kudingeka ukuba amthwale ngenxa yobudlova bezihlwele.

³⁶Isixuku sabantu sasilokhu silandela simemeza sithi: “Mbulaleni!”

UPawula uyaziphendulela

³⁷Kwathi amabutho esezongena nje noPawula enqabeni, wabuza kumphathi wathi: “Ngingakhuluma kuwe na?” Waphendula wathi: “Kanti isiGriki uyasazi!”

³⁸Awusiye yini lomGibhithe owasusa isibhelu phambilini, wahola izinswelaboya eziyizinkulungwane ezine waya nazo ehlane na?”

³⁹UPawula waphendula wathi: “Mina ngingumJuda waseThasu ngokuzalwa. Ngiyisakhamuzi sendawo eyaziwayo kwelaseSilisiya. Ngiyacela, ake ungivumele ngikhulume kubantu!”

⁴⁰Umphathi wavuma. UPawula wema ezitebhisini wabahebeza ngesandla ukuba balalele. Kwathula kwathi cwaka, wakhuluma kubo ngesiHebheru wathi:

ImiSebenzi 22

¹“Bantu bakithi nani bobaba! Ake ningilalele njengoba ngiziphendulela phambi kwenu.”

²Bathi bangamuzwa ekhuluma ngolimi lwesiHebheru, base bethula du, wathi:

³“NgingumJuda ngidabuka emzini waseThasu kwelaseSilisiya ngokuzalwa. Kepha ngakhulela lapha eJerusalema, ngafundiswa nguGamaliyeli. Ngakhuliswa ngomthetho wawokhokho ngokucophelela, ngishisekela uNkulunkulu njengoba nani nonke nenza namuhla.

⁴Ngabazingela baze babulawa labo ababehamba ngendlela yalenkolo. Ngabopha abesilisa nabesifazane ngabavalela ejele.

⁵O fakazi bami ngumphristi omkhulu nomkhandlu wonke, okuyibona abanginika izincwadi zegunya ezazilotshelwe abakithi besinagoge laseDamaseku. Nganikela khona ukuba ngihambe ngibophe amaKristu nalapho, ngiwaqhube ngiwalethe eJerusalema ukuba ajeziswe.

UPawula ulanda ngokuphenduka kwakhe

(ImiSeb 9:1-19; 26:12-18)

⁶“Ngangisendleleni sengisondela eDamaseku. Kuthe emini enkulu ngingazelele ngaqabuka sengihaqwe ngukukhanya okukhulu kuvela ezulwini, kwakhanya nxazonke eduze kwami.

⁷Ngashayeka phansi, ngezwa izwi lithi kimi: ‘Sawuli, Sawuli! Ungizingelelani na?’

⁸Ngabuza ngathi: ‘Ungubani wena Nkosi na?’ Yaphendula yathi: ‘NginguJesu waseNazaretha omzingelayo.’

⁹Laba engangihamba nabo bakubona ukukhanya, kepha kabamzwanga ukuthi uthini lowo owayekhuluma nami.

¹⁰Ngabuza ngathi: ‘Nkosi, ngenze njani na?’ INkosi yathi kimi: ‘Sukuma uye eDamaseku! Kulapho uyotshelwa khona konke omiselwe ukukwenza.’

¹¹Ngangingasaboni ngixhoshwa wukukhanya, ngakhoke laba engangihamba nabo bangibamba ngengalo, bangihola bangisa eDamaseku.

¹²“Kwakukhona indoda okuthiwa nguHananiya, ikholwa eligcina umthetho wakithi, lihlonishwa yiwo wonke amaJuda aseDamaseku.

¹³Yeza yafike yema ngakimi yathi: ‘Sawuli mfowethu! Vuleka amehlo ubone.’ Ngase ngibona ngaso lesosikhathi, ngayibheka.

¹⁴Yayisithi kimi: ‘UNkulunkulu wokhokho wakukhetha ukuba wazi intando yakhe, ubone oLungileyo wakhe umuzwe ezikhulumela kuwe ngephimbo lakhe.

¹⁵Wena uzoba ngufakazi wakhe, ubikele bonke abantu ngalokhu okubonileyo nokuzwileyo.

¹⁶Pho yini osayilindele? Sukuma ubhabhadiswe uhlanjululwe ezonweni zakho, ubize igama lakhe! ’

UPawula ulanda ngokuthunyelwa kwakhe kwabezizwe

¹⁷“Kuthe sengibuyele eJerusalema ngikhuleka ethempelini ngathathwa yisiyezi,

¹⁸ngabona iNkosi uJesu ngayizwa ithi kimi: ‘Phangisa usuke eJerusalema ngoba abantu balapha ngeke bakuzwe lapho ufakaza ngami!’

¹⁹Ngase ngithi: ‘Nkosi, ingani bangazi kahle ukuthi yimi engangena emasinagogeni, ngafike ngabopha ngabhaxabula abakholwa kuwe.

²⁰Kuthe mhla bechitha igazi likaStefano ufakazi wakho, ngema lapho mathupha ngibukela, ngihambisana nabakwenzayo, ngabagcinela izingubo laba abambulalayo.’

²¹Yayisithi kimi: ‘Hamba, ngoba mina ngikuthumela kwabezizwe emajukujukwini!’

UPawula nomphathi wamabutho amaRoma

²²Abantu babelokhu bembalele ekhuluma kodwa wanele washo lawamazwi bahlokoma bathi: “Msuseni! Akabulawe! Akafanele ukuphila lona!”

²³Baqonga ngomsindo, bakhumula izingubo bathunquza uthuli lwabheka phezulu.

²⁴Umphathi wathi amabutho awamthathe uPawula amngenise enqabeni. Wayesethi akabhaxabulwe aphenyisiswe kuze kuzwakale ukuthi yini ebangela abantu bamhlokome kangaka.

²⁵Kepha kuthe sebembophile esezoshaywa, uPawula wathi enduneni eyayimi lapho: “Umthetho uyavuma yini ukuba nibhaxabule umuntu ongumRoma engakalahlwa yicala na?”

²⁶Induna yezwa lokhu, yaqonda kumphathi wamabutho yafike yathi: “Kuyini lokhu okwenzayo? Lomuntu ungumRoma!”

²⁷Kwase kusuka umphathi waqonda kuPawula, wafike wathi kuye: “Ake ungitshela, ungumRoma yini wena?” UPawula waphendula wathi: “Yebo nginguye.”

²⁸Umphathi wathi: “Mina ngalithenga ngemali enkulu ilungelo lokuba ngumRoma.” UPawula wathi: “Kodwa mina ngingumRoma wokuzalwa.”

²⁹Amabutho ayesezophenya uPawula aqhela kuye khona lapho. Umpathi washaywa uvalo lapho sekuvela ukuthi ubophe umRoma.

UPawula uphambi komkhandlu

³⁰Umpathi wamabutho wayefuna ukwazi iqiniso lokuthi ngempela yini amaJuda ayemmangalela ngayo uPawula. Ngakhoke ngakusasa wathi akakhululwe. Wabiza

izikhulu zabaphristi nomkhandlu wonke ukuba kuhlanguwe. Wathatha uPawula wahamba naye, wafike wammisa phambi kwabo.

ImiSebenzi 23

¹UPawula wayesewugqolozela umkhandlu wathi: “Bazalwane! Unembeza wami uyangifakazela ukuthi bengiphila impilo emsulwa phambi kukaNkulunkulu kuze kube namuhla.”

²Umphristi omkhulu uHananiya wayesetshela ababemi eduze noPawula ukuba bambhibize.

³UPawula wathi kuye: “We mzenzisindini! UNkulunkulu uzokushaya wena loludonga olucakiweyo lolu! Ulapha wena esigcawini ukuba uqule icala lami ngokomthetho, kepha usuweqa umthetho ngokuthi abangimukule.”

⁴Labo ababemi eduze kukaPawula bathi kuye: “Ngabe ngumphristi omkhulu kaNkulunkulu omjivaza kanje?”

⁵Waphendula wathi: “Impela bazalwane, bengingazi ukuthi unumphristi omkhulu. Ingani kulotshiwe embhalweni ongwele ukuthi: ‘Ungamthuki umbusi wesizwe sakini!’”

⁶Kwathi ukuba uPawula aphawule ukuthi umkhandlu wehlukene amaqembu amabili, elabasadusi nelabafarisi, wamemeza emkhandlwini wathi: “Bazalwane! Mina ngingumfarisi, ngingowozalo lwabafarisi. Ngilapha nje ngethweswe icala, ngoba nginethemba lokuthi kukhona ukuvuka kwabafileyo.”

⁷Wanele wakusho lokho, base betholana phezulu abafarisi nabasadusi, umkhandlu wehlukana phakathi.

⁸Phela iqembu labasadusi lithi akukho kuvuka kwabafileyo, akukho ngilosi nasithunzi, kodwa elabafarisi lithi kokuthathu kukhona.

⁹Kwasuka isimokololo somsindo. Ezinye izazimibhalo zeqembu labafarisi zaqonga zathi: “Asitholi cala kulomuntu. Hleze ngempela kwafika umoya kumbe ingilosi yakhuluma kuye!”

¹⁰Bahilana kangagoba umphathi wamabutho waze waba novalo lokuthi bangase bamdwengule uPawula. Wathuma amabutho ukuba ehlele emkhandlwini, afike anyomule uPawula phakathi kwabo amngenise phakathi enqabeni.

¹¹Ngobusuku obulandelayo iNkosi uJesu yafika kuPawula, yathi: “Yima isibindi ungesabi! Njengalokhu ungifakazele lapha eJerusalema, kufanele ufakaze naseRoma imbala.”

AmaJuda akha uzungu lokubulala uPawula

¹²Kwasa ngakusasa amaJuda ahlangukana akha icebo. Afunga agomela azibophezela ukuba angadli lutho angaphuzi lutho engakambulali uPawula.

¹³Kwakungabantu abevile emashumini amane laba abazibophezela ngalesisifungo.

¹⁴Baya ezikhulwini zabaphristi nezigele, bafike bathi: “Sesifunge sathi lingaduma lisithathe, asifaki lutho emlonyeni singakambulali uPawula.

¹⁵Ngakhoke nina kanye nomkhandlu, thumelani nicele umphathi wamabutho ukuba ehlise uPawula amlethe lapha! Kuhle nishaye sengathi kukhona enifuna ukukuphenya kabanzi ngaye. Thina-ke sigaqele ukumsusa, afe engakafiki nalapha.”

¹⁶Kepha umntakadadewabo kaPawula waluzwa loluzungu, wayeseya enqabeni wangena wahlebelala uninalume.

¹⁷UPawula wabiza enye yezinduna wathi kuyo: “Thatha lelibhungu uhambe nalo, niye kumphathi wamabutho, ngoba kukhona elifuna ukumtshela khona.”

¹⁸Induna yalithatha yalisa kumphathi, yafike yaletshela yathi: “Isiboshwa uPawula singibizile sangicela ukuba ngilethe lelibhungu lapha, ngoba kukhona elifuna ukukusho kuwe.”

¹⁹Umpathi wathatha ibhungu, walihola ngengalo waqhela nalo, wayeselibuza ngasese wathi: “Ngabe yini ofuna ukuyisho kimi na?”

²⁰Lathi: “AmaJuda asevumelene ngokuthi azokucela ukuba wehlise uPawula kusasa lokhu okusayo, umuse emkhandlwini, ngezaba zokuthi bafuna ukuphenya kabanzi ngaye.

²¹Kodwa ungakwenzi abakushoyo, ngoba kukhona amaJuda evile emashumini amane asemqamekele endleleni. Asezibophezele ngesifungo sokuthi awadli lutho awaphuzi lutho engakambulali. Acuthele ukukwenza lokhu, kuphela nje alindele wena ukuba uvume.”

²²Umpathi wayesethi ibhungu alingatsheli muntu ukuthi limbikele lokhu, wayeselidedela.

UPawula uthunyelwa kulusibalukhulu uFeliksi

²³Wabiza izinduna zakhe ezimbili wathi kuzo: “Hlanganisani amabutho angamakhulu amabili. Kusukela ngehora lesishiyagalolunye kusihlwa, awahlale elungele ukuya emzini waseKhesariya, kanye nezinkweli zamahhashi ezingamashumi ayisikhombisa, nabangamakhulu amabili abahlome imikhonto.

²⁴Bese nilungisela uPawula amahhashi azowagibela, nimphelekezele nize nimbeke engenamcothu kulusibalukhulu uFeliksi.”

²⁵Umpathi wayeseloba incwadi kanje:

²⁶“Lencwadi ivela kimi uKlawudiyu Lisiya, ngiyilobela ulusibalukhulu uFeliksi. Mhlonishwa,

²⁷lendoda ibanjwe ngamaJuda efuna ukuyibulala. Ngase ngitheleka namabutho ngayihlenga, njengoba bese ngizwile ukuthi ingumRoma.

²⁸Bengifuna ukuthola ukuthi cala lini ayethwesa lona, ngakhoke ngayithatha ngayizisa emkhandlwini wawo.

²⁹Ngathola ukuthi ayenzanga lutho olungadala ukuba ibulawe noma ifakwe ejele. Icala ebiyethweswe lona liphathelene nezindaba zomthetho wamaJuda okuphikiswana ngazo.

³⁰Lapho ngibikelwa ukuthi amaJuda akha uzungu lokuyibulala, ngase ngithi angiyithumele kuwe. Sengibatshelile nalabo abayithwesa icala ngathi abahambe bayimangalele kuwe.”

³¹Amabutho athatha uPawula njengoba ayetsheliwe, ahamba naye ngabo lobobusuku aze afika emzini waseAntiphatri.

³²Ngakusasa abuyela enqabeni, eseshiye izinkweli zamahhashi ukuba ziqhubeke naye.

³³Zahamba naye zaze zafika emzini waseKhesariya. Zanika ulusibalukhulu incwadi zethula noPawula.

³⁴Ulusibalukhulu wayifunda incwadi wayesebuza kuPawula ukuthi ungowasiphi isifunda. Kuthe angezwa ukuthi ungowaseSilisiya

³⁵wathi: “Icala lakho ngiyoliqula uma sebefikile abakumangalelayo.” Wayesethumela ukuba agcinwe esigodlweni sikaHerodi.

ImiSebenzi 24

UPawula umangalelwa ngamaJuda

¹Umphristi omkhulu uHananiya wehlela eKhesariya ngemuva kwezinsuku eziyisihlanu, ehamba nezigele ezithize nommeli okuthiwa nguThethulu. Baya kulusibalukhulu uFeliksi esigcawini, sebeyokwethwesa uPawula icala.

²UPawula wabizelwa lapho, kwase kusukuma uThethulu eselwendlala udaba, emethwesa icala kanje: “Mhlonishwa Feliksi! Izwe lakithi uliphathe kahle, laba nokuthula nenhlalakahle isikhathi eside, ngobuciko bakho kwavela uguquko olwaba usizo esizweni sakithi.

³Singeke sakuphika lokhu, kwazeka yonke indawo, ngakhoke sithi halala!

⁴Kepha angithandi ukuchitha isikhathi sakho, ngakhoke ngizoshaya ngezimfushane ngodaba lwethu. Ngiyakunxusa ukuba usibekezelele ulalele.

⁵Lendoda siyitholile ukuthi iyingozi kabi. Isusa isibhelu phakathi kwawo onke amaJuda emhlabeni. Ingumholi wabeqembu lamaNazaretha.

⁶Isike yazama nokunukubeza ithempeli elingcwele, sase siyibopha. [Sasizimisele ukuyahlulela ngokomthetho wakithi,

⁷kodwa uLisiya umphathi wamabutho wafika kithi, wayithatha ngodlame,

⁸wayesethi labo abayethwesa icala abayimangalele lapha kuwe.]
Usungayiphenyisisa ngokwakho, uzizwele konke esiyimangalela ngakho.”

⁹NamaJuda ayiseka lendaba, athi injalo.

UPawula uziphendulela phambi kukaFeliksi

¹⁰Ulusibalukhulu wanqekuza ikhanda ekhombisa uPawula ukuthi usengaziphendulela. Wathatha wathi: “Ngiziphendulela ngeqholo phambi kwakho njengoba ngiyazi ukuthi usuneminyaka eminingi wahlulela lesisizwe.

¹¹Ungazanelisa ngokwakho ukuthi kusaphele isithuba sezinsuku eziyishumi nambili nje ngiyile ukuyokhuleka eJerusalema.

¹²Akukho namunye owangifica ngiphikisana namuntu, kumbe ngisusa isiphithiphithi ebantwini, ethempelini ngisho nasemasinagogeni naphakathi komuzi.

¹³Akukho nabufakazi abangabuveza kuwe obusekela lokho asebengethwese icala ngakho.

¹⁴Kepha nakhu engikuvuma phambi kwakho: Ngikhonza uNkulunkulu wokhokho ngaleyondlela yenkolo abayibiza laba ngeqembu loqhekeko. Ngikukholwa konke okulotshwe emthetweni kaMose nasemibhalweni yabaphrofethi.

¹⁵Nami nginethemba kuNkulunkulu ngibheke khona lokho okubhekwe nayibo imbala, ukuthi abalungileyo ngisho nabangalungile bayovuka ekufeni.

¹⁶Ngakhoke ngizama ngamandla ami onke ukuziphatha kahle, unembeza wami uhlale umsulwa phambi kukaNkulunkulu nabantu.

¹⁷“Ngabuyela kwabakithi emuva kweminyaka eminingi ukuba ngibahambisele isipho semali, ngethule neminikelo.

¹⁸Kuthe ngisakwenza lokho, bangifica ethempelini sengilifezile isiko lokuhlanjululwa. Kwakungekho sixuku sabantu nasidumo,

¹⁹kodwa kwakukhona amaJuda athile ayevela kwelaseAsiya; yiwo obekufanele eze lapha angimangalele uma kukhona okuthile angisola ngakho.

²⁰Noma-ke kungakuhle ukuba bona laba basho ukuthi nganginacala lini abalithola kimi mhla ngiphambi komkhandlu,

²¹ngaphandle kwento eyodwa engayisho ngimi phakathi kwabo ngimemeza ngithi: ‘Ngilapha nje phambi kwenu namuhla ngithweswe icala, ngoba ngithi kukhona ukuvuka kwabafuleyo.’”

UPawula ugcinwa esigodlweni

²²Nakuba uFeliksi wayenolwazi olubanzi mayelana nendlela yenkolo, walihlehlisa icala wathi: “Lelicala lenu ngiyolinquma mhla sekufike uLisiya.”

²³Wayesethuma induna ukuba ilonde kahle uPawula kodwa akhululeke, kuvunyelwe nezihlobo zakhe zimsize kulokho akudingayo.

²⁴Ngemuva kwezinsukwana uFeliksi kanye nomkakhe uDrusila owayengumJuda, wafike wabiza uPawula efuna ukuchazelwa ngalenkolo ethi uJesu unguMesiya.

²⁵Kepha kwathi uPawula esaqhubeka nokulanda ngokulunga nangokuzithiba nangokwahlulelwa okuzayo, uFeliksi washaywa uvalo, wathi: “Kwanele okwamanje, ungahamba! Ngiyobuye ngikubize uma ngithola ithuba.”

²⁶Kunjalo nje ebheke ukuthi uPawula uzogwaza kuye, ngakhoke wayedamane embiza akhulume naye.

²⁷Isikhundla sikaFeliksi sathathwa nguPhokhiyu Festu emuva kweminyaka emibili. UFeliksi wayefuna ukuzenza muhle emaJudeni, wamshiya kanjalo uPawula eboshiwe.

ImiSebenzi 25

UPawula ulidlulisela kuKhesari eRoma

¹Kuthe sekuphele izinsuku ezintathu uFestu efikile esifundeni sakhe, wasuka eKhesariya wenyukela eJerusalema.

²Izikhulu zabaphristi nabaphathi bamaJuda baya bafike bammangalela uPawula. Bamncenga uFestu

³ukuba abazwele kulandwe uPawula alethwe eJerusalema. Phela base bakhe uzungu lokumbulalela endleleni.

⁴UFestu waphendula wathi: “UPawula usejele eKhesariya, kepha ngizosheshe ngibuyele khona.

⁵Ngakhoke abayizikhulu phakathi kwenu bangahamba nami sehlele eKhesariya, bafike bammangalele uma kukhona akwenzileyo.”

⁶Kuthe uFestu esehlale nabo izinsuku ezingeqile kweziyisiphohlono noma eziyishumi, wasuka wehlela eKhesariya. Ngakusasa waya esigcawini samacala, wafike wathi akulethwe uPawula.

⁷Wafika kwase kusuka amaJuda ayevela Jerusalema, ambunganyela ambeka amacala amaningi anzima, kodwa engenabufakazi bawo.

⁸Waziphendulela wathi: “Anginacala, angenzanga lutho oluphambene nomthetho wamaJuda nethempeli ngisho nengonyama yombuso waseRoma.”

⁹UFestu wayekuthanda ukuzenza muhle emaJudeni; ngakhoke wathi kuPawula; “Uyathanda yini ukuya eJerusalema, ngiwaqule khona lawamacala akho na?”

¹⁰UPawula waphendula wathi: “Ngimi lapha esigcawini sengonyama, lapho kumele kuqulwe khona icala lami. Akukho lutho engiwone ngalo amaJuda, njengoba nawe uqobo wazi kahle.

¹¹Uma ngitholakala nginecala okufanele ngiligwetshelwe ukufa, angikubalekeli ukubulawa. Kodwa uma kungekho engilahlwa ngakho kulawamacala abangimangalela ngawo, akakho onganginikela kubo. Icala lami ngilidlulisela engonyameni yaseRoma.”

¹²Kuthe uFestu esebonisene nesigungu sakhe wathi: “Uthe ulidlulisela engonyameni; kulungile-ke dlulela engonyameni!”

UPawula uphambi kukaAgripa noBhenise

¹³Emuva kwezinsukwana inkosi uAgripa noBhenise bafika eKhesariya bevakashele uFestu.

¹⁴Bahlala lapho izinsukwana, uFestu walandisa inkosi ngodaba lukaPawula wathi: “Nginendoda lapha eyashiywa nguFeliksi iboshiwe.

¹⁵Kuthe sengifikile eJerusalema izikhulu zabaphristi nezigele zamaJuda zafike zayimangalela, zacela ukuba ngiyigwebe.

¹⁶Kepha ngabaphendula ngathi akusilo isiko lethu thina maRoma ukuba sinikele ngomuntu kulabo abamethwesa icala, engakabhekani nabo esigcawini, athole ithuba lokuziphendulela kulelocala.

¹⁷Kuthe ukuba bafike lapha angachitha sikhathi, ngakusasa ngaya esigcawini samacala, ngafike ngathi ayilethwe lendoda.

¹⁸Abamangali basukumile, kepha kabavezanga lutho olubi lwalokho ebengikulindele.

¹⁹Kuphela nje baveza okuyizindaba abaphikisana nayo ngazo, izindaba eziphathelene nendlela yabo yokukhonza uNkulunkulu neziphathelene nothile osewafa okuthiwa nguJesus, kodwa uPawula aqinisa ngokuthi uyaphila.

²⁰Kwathi ngisadidekile ukuthi kazi ngizoliqula kanjani lelicala, ngase ngimbuza uPawula ukuthi angathanda yini ukuya eJerusalema abhekane nalamacala khona.

²¹Kepha waqoka ukulidlulisa, agcinwe alindele ukuba icala lakhe linqunywe yingonyama uKhesari, ngase ngithumela ukuba agcinwe ngize ngimdlulisele kuyo.”

²²UAgripa wathi kuFestu: “Nami ngingathanda ukumuzwa lomuntu.” UFestu wamphendula wathi: “Uyomuzwa kusasa.”

²³Ngakusasa uAgripa noBhenise bafika bevunule beconsa, kwanodumo olukhulu, bangena endlini yemibuthano kanye nabaphathi bamabutho neziphakanyiswa zomuzi. UFestu wathumela ukuba isiboshwa uPawula singeniswe,

²⁴wathatha wathi: “Nkosi, nani nonke madoda enikhona lapha! Ake nimbheke lo! Wonke umphakathi wamaJuda, awaseJerusalema nawalapha, afikile ethula izikhalo kimi ngalomuntu, ememeza ethi makafe.

²⁵Ngokubona kwami, lomuntu akenzanga lutho olufanele ukuba agwetshwe afe. Njengoba naye usezicelele ukuba icala lakhe lidluliselwe engonyameni yaseRoma, senginqume ukumthumela kuyo.

²⁶Akukho lutho olutheni engingalusho ngaye uma sengilobela ingonyama. Ngakhoke sengimlethe lapha kini — ikakhulu kuwe wena wakomkhulu! — ukuba ngithole engingakuloba ngaye uma seliquliwe icala lakhe.

²⁷Phela ngibona kuwubuthutha ukuthumela isiboshwa ngaphandle kokukhomba icala esilethwesiweyo.”

ImiSebenzi 26

UPawula uziphendulela phambi kwenkosi uAgripha

¹Inkosi uAgripha yathi kuPawula: “Usungakhuluma wendlale udaba lwakho.” UPawula wayikhulekela waphakamisa isandla, waziphendulela wathi:

²“Ngizibongela lenhlahla enkulu kangaka yokuba ngime phambi kwakho, wena wakomkhulu, ngiziphendulele namuhla kukho konke amaJuda angimangalela ngakho,

³ikakhulu njengoba uyingcweti ewaziyo onke amasiko amaJuda nezindaba aphikisana ngazo. Ngakhoke ngizocela ukuba ungibekezelele, ungizwe.

⁴“Onke amaJuda ayazi ukuthi ngikhule kanjani kusukela phansi ebuncaneni bami. Ngikhulele phakathi kwesizwe sakithi naseJerusalema.

⁵Akwazi kudala — uma engase angifakazele — ukuthi kwasekusukeni ngangingoweqembu lenkolo yethu elazisa umthetho kakhulu kunabanye, ngingumfarisi.

⁶Ngimi lapha ngithweswe icala, ngoba nginethemba lalokho uNkulunkulu ayekwethembise kokhokho.

⁷Yiso lesosethembiso esibhekwe yizizwe eziyishumi nambili zabantu bakithi ezethemba ukuba sigcwaliseke, njengoba zilokhu zimkhonza uNkulunkulu imini nobusuku. Ngenxa yalolithemba angimangalele amaJuda, wena wakomkhulu!

⁸Kwenziwa yini ukuba kube lukhuni kinina maJuda ukukholwa ukuthi uNkulunkulu uyabavusa abafileyo na?

⁹“Mina lo, ngangikubona kufanele ukuba ngiphikisane negama likaJesu waseNazaretha ngamandla ami onke.

¹⁰Ngakwenza lokhu eJerusalema. Izikhulu zabaphristi zangigunyaza ngavalela ejele abakholwayo abaningi. Nalapho begwetshwa ukuba bafe, nami ngavumelana nalokho.

¹¹Ngabajezisa kaningi emasinagogeni ngamasinagoge, ngibaphoqa ukuba bahlambalaze uNkulunkulu. Ngabathukuthelela ngaze nganikela emizini esekudeni ngibazingela.

UPawula ulanda ngokuphenduka kwakhe

(ImiSeb 9:1-19; 22:6-16)

¹²“Ngaya ngiyihlosile lento emzini waseDamaseku, izikhulu zabaphristi zingigunyazile ukuba ngiwuqhube lomsebenzi.

¹³Kuthe eminibebade ngisendleleni, wena wakomkhulu, ngabona ukukhanya okwedlula ukukhanya kwelanga. Kwavela ezulwini, kwangizuma nxazonke mina kanye nalabo engangihamba nabo.

¹⁴Safumbeka phansi sonke, ngase ngizwa izwi likhuluma kimi ngesiHebheru lithi: ‘Sawuli, Sawuli! Ungizingelelani na? Uyozisola ngenkani yakho, uzolimala njengenkabi ikhahlela ubhoko.’

¹⁵Ngabuza ngathi: ‘Ungubani wena Nkosi na? ’ Yangiphendula iNkosi yathi: ‘NginguJesu omzingelayo.

¹⁶Sukuma! Ngizibonakalisile kuwe ngakuqoka ukuba ube yinceku yami, ufakaze ngalokho okubonile ngami nangalokho engisazozibonakalisa ngakho kuwe.

¹⁷Ngiyokuhlenga singakuthinti isizwe sakwaIsrayeli nabezizwe engiyokuthumela kubo

¹⁸ukuze ubavule amehlo baqonde, basuke ebumnyameni baphendukele ekukhanyeni, baphephe emandleni kaSathane baye kuNkulunkulu, bakholwe kimi bathethelelwe izono, badle ifa kanye nabangcwele bakaNkulunkulu.’

UPawula ulanda ngokushumayela kwakhe emaJudeni nakwabezizwe

¹⁹“Ngakhoke, wena wakomkhulu, ngalalela, ngenza lokho engakutshelwa nxa ngibona umbono ovela ezulwini.

²⁰Ngashumayeza abaseDamaseku kuqala, ngadlulela eJerusalema nakulo lonke elaseJudiya nakwabezizwe, ngithi abaguquke baphendukele kuNkulunkulu, benze imisebenzi efanele abaphendukileyo.

²¹Yilesisizathu esenza ukuba amaJuda angibambe ethempelini, ezama ukungibulala.

²²Njengoba ubengisiza uNkulunkulu kuze kube namuhla, ngimi lapha ngifakaza kubantukazana nezikhulu. Angisho lutho ngaphandle kwalokho okwashiwo ngabaphrofethi noMose ukuthi kuyokwenzeka,

²³kokuthi uMesiya uyohlushwa, nokuthi uyoba yingqalabutho evuka kwabafuleyo, ashumayeze amaJuda nabezizwe ngokukhanya okuyinsindiso kaNkulunkulu.”

UPawula ukhuthaza Agripha ukuba akholwe

- ²⁴Kuthe uPawula esaziphendulela ngalamazwi, uFestu wamemeza wathi: “Suka Pawula, uyahlanya! Imfundo yakho iyakuhlanyisa.”
- ²⁵Kepha uPawula waphendula wathi: “Qha mhlonishwa, angihlanyi. Lokhu engikushoyo kuyiqiniso elimsulwa, futhi kunomqondo ohluzekile.
- ²⁶Ingonyama iyakwazi konke lokhu, ngakhoke ngikhuluma ingcaca phambi kwayo. Angisho ukuthi kukhona nokuncane kwalezizinto engahlala ingakwazi, ngoba akwenzekanga esitha.
- ²⁷Wena wakomkhulu! Uyakukholwa lokhu okushiwo ngabaphrofethi na? Ngiyazi ukuthi uyakholwa.”
- ²⁸Inkosi uAgripha yathi kuPawula: “Usho ukuthi ngalesisikhashana nje usungase ungiphendule ngibe ngumKristu!”
- ²⁹UPawula wathi: “Nakuba sisifushane nakuba siside, bengingaxusa kuNkulunkulu ukuba nani nibe yilokhu engiyikho, kungabi nguwe wedwa kuphela kepha nabo bonke abangizwayo namuhla; nokho kodwa ningabi yiziboshwa njengami.”
- ³⁰Yayisisukuma inkosi kanye nolusibalukhulu noBhenise nabo bonke ababelapho.
- ³¹Kwathi sebephumele phandle, bafakana imilomo bathi: “Lomuntu kanacala; akenzanga lutho ukuba usengaze agwetshwe afe kumbe afakwe ejele.”
- ³²UAgripha wayesethi kuFestu: “Lomuntu ubungamdedela ukuba icala lakhe akalidluliselanga engonyameni eRoma.”

ImiSebenzi 27

UPawula uhamba ngomkhumbi uya eRoma

- ¹Kuthe sekunqunyiwe ukuthi sohamba ngomkhumbi siye kwelaseNtaliyane, uPawula nezinye iziboshwa banikezwa uJuliyu owayeyinduna kulelobutho lempi yamaRoma okwakuthiwa yiButho leNgonyama.
- ²Sakhwela emkhunjini waseAdramithiyo owawulibangise emathekwini kwelaseAsiya. Sasihamba noAristakho owayevela emzini waseThesalonika eMasedoniya.
- ³Ngakusasa safika sethula emzini waseSidoni. Induna uJuliyu yayimphethe kahle uPawula, yamvumela ukuba abonane nabangane bakhe, bamnakekele.
- ⁴Sasuka lapho ngomkhumbi. Sasibhekene nomoya, ngakhoke sase sigudla isiqhingi saseSayiphro ohlangothini lapho kwakusithe ngakhona.
- ⁵Sadabula olwandle sadlula ngaphandle kwelaseSilisiya nelasePhamfiliya, safike sethula emzini waseMira kwelaseLisiya.
- ⁶Induna yathola lapho umkhumbi waseAleksandriya owawulibangise kwelaseNtaliyane, yasikhweza kuwo.

⁷Ngenxa yesiphepho santweza ngokunensa izinsuku eziningana, sacacamezela sadlula umuzi waseKhinido. Savimbeleka ukuba siqhubekele phambili, ngakhoke sajika saqonda esiqhingini saseKhrethe, sadlula ngasenhlonhlweni yaso okuthiwa yiSalimone, sagudla sisithwe yisiqingi.

⁸Sanamathela ogwini, sase sifika endaweni okuthiwa kuseMathekumahle kudebuduze nomuzi waseLaseya.

⁹Kwalibaleka impela lapho kwabonakala kunengozi enkulu ukuphikelela uhambo, ngoba kwase kuze kwadlula ngisho nosuku lokuzila ukudla ekwindla. Ngakhoke uPawula wabeluleka

¹⁰wathi: “Madoda, ngiyabona ukuthi loluhambo luzoba nengozi nomonakalo omkhulu. Kuyolimala impahla nomkhumbi, naphezu kwalokho kungase kufe nabantu imbala.”

¹¹Induna yamabutho ayaze yamnaka kepha yalalela okushiwo ngumphathi womkhumbi nomnikazi wawo kunamazwi kaPawula.

¹²Itheku lelo lalilungele ukuba kungeniswe kulo ebusika. Ngakhoke iningi lamadoda lanquma ukuba kuphunywe ethekweni, kuhanjwe ngomkhumbi, bazame ukufinyelela emzini waseFeniksi, bahlale lapho kuze kudlule ubusika. Lomuzi uyitheku laseKhrethe elibheke eningizimu-ntshonalanga nasenyakatho-ntshonalanga.

Isivunguvungu olwandle

¹³Kwahleleza umnyeleta weningizimu. Ngakhoke babethemba ukuthi izophumelela lenhloso yabo, base bekhuphula ihange, bagudla ugu lwaseKhrethe.

¹⁴Lasheshe labuyisa isivunguvungu esinamandla esithiwa yinyakatho-mpumalanga, sakhwishiza siqhamuka esiqhingini.

¹⁵Sawuphephula umkhumbi semuka nawo. Ngakhoke thina esasikuwo sawudedela wazibonela wapheshulwa wumoya.

¹⁶Saphepha isikhashana sisasithwe yisiqingana okuthiwa yiKhawuda, sahlenga isikebhe somkhumbi ngomcacamezelo omkhulu.

¹⁷Amatilosu akhweza isikebhe phezu komkhumbi. Ayesephuthuma izindophi azithandela emkhunjini awugiga ngazo. Ayenqene ukuthi umkhumbi ungahle ukhahleleke ubhajwe ezindundumeni zesihlabathi zaseSirti ngasogwini lwaseLibhiya. Ngakhoke agebisa oseyili, awudedela umkhumbi wazintantela olwandle.

¹⁸Thina sabe silokhu sibhenguzwe yisiphepho, ngakusasa amatilosu ayesekipha impahla emkhunjini ayijikijela olwandle.

¹⁹Ngomhlomunye azibambela mathupha, alahla ngisho nempahla yokugwedla umkhumbi imbala.

- ²⁰Izulu lalilokhu liguqubele izinsuku eziningi, singasaboni langa nankanyezi, isivunguvungu silokhu siphikelele sibhoka. Ekugcineni kwaphela lonke ithemba lokuthi sisayosinda.
- ²¹Kwase kubaba imilomo emadodeni engasakwazi okuya ngasethunjini. UPawula wasukuma wema phambi kwawo wathi: “Madoda, ukuba ningilalele nangasuka eKhrethe, ibingeke isivelele lengozi nalomonakalo.
- ²²Kepha manje ngithi: Yimani isibindi! Akuzukubhubha muntu sizofelwa ngumkhumbi kuphela.
- ²³Kulobubusuku obudlule kufike kimi ingilosi kaNkulunkulu engingowakhe nengimkhonzayo,
- ²⁴yathi: ‘Yima isibindi Pawula, ungesabi! Nakanjani uyokuma phambi kwengonyama eRoma. Ngenxa yakho uNkulunkulu uzobahawukela nalaba ohamba nabo, basinde bonke.’
- ²⁵Ngakhoke madoda, yimani isibindi! Ngiyamethemba uNkulunkulu ukuthi kuzoba njengoba ngitsheliwe,
- ²⁶ulwandle lusichithe ogwini lwesiqhingi esithile.”
- ²⁷Kwaze kwaba ngobusuku beshumi nane sisantanta olwandle iMedithera, sipheshulwa yisivunguvungu. Kuthe sekuphakathi kwamabili, amatilosi afikelwa ngumqondo wokuthi sesisondelela ogwini oluthile.
- ²⁸Acwilisa ubhoko lokuzwa amanzi, athola ukuthi kujule ngamamitha okungathi angamashumi amane. Saqhubekela phambili kancane, abuye alucwilisa, athola sekujule ngamamitha okungathi angamashumi amathathu.
- ²⁹Angenwa uvalo lokuthi umkhumbi ungase ushayise emadwaleni amabi. Ehlisa amahange amane esinqeni somkhumbi, ethi kuyosa nini.
- ³⁰Amatilososi azama ukweqa emkhunjini, ngakhoke ehlisela isikebhe olwandle ngezaba zokuthi azocwilisa amahange nasekhaleni lomkhumbi.
- ³¹Kodwa uPawula wathi enduneni nasemabuthweni ayo: “Uma lamatilososi engahlali emkhunjini, ningeze nasinda.”
- ³²Amabutho ayesenqamula izindophi okuboshwe ngazo isikebhe, asidedela sawa.
- ³³Kwathi besabheke ukuthatha kokusa, uPawula wabakhuthaza bonke ukuba badle, wathi: “Sekuwusuku lweshumi nane nihlezi nilambile ningadle lutho.
- ³⁴Ngakhoke ngiyaninxusa ukuba nizame ukuthola okuya ngasethunjini, ngoba lokhu kudingekile ukuze nisinde. Akukho muntu kinina oyoba nomyocu.”
- ³⁵Esekushilo lokhu wathatha isinkwa, wabonga kuNkulunkulu phambi kwabo bonke, wasihlephula wadla.
- ³⁶Bonke bakhuthazeka, base bedla.

³⁷Sesisonke sasingabantu abangamakhulu amabili namashumi ayisikhombisa nesithupha emkhunjini.

³⁸Kuthe sesidle sasutha bakhipha ukolweni, bawuthululela olwandle ukuze umkhumbi ube lula.

Ukulimala komkhumbi

³⁹Kwathi sekusile, babona ugu lwendawo ethile ababeyiqabuka. Bathola ukuthi inetheku elinesihlabathi ogwini, base bethi ababhekise umkhumbi ngakhona, bazame ukuwumisa ogwini lolo.

⁴⁰Base benqamula amahange, asala olwandle, khona lapho baqaqa izintambo okuboshwe ngazo amaphini aqondisa umkhumbi. Baphakamisa useyili wangaphambili ukuze umoya uqhube umkhumbi, base besuka beqonda ogwini.

⁴¹Kodwa umkhumbi watheleka endundumeni yesihlabathi ezungezwe ngamanzi, wabhajwa ngqi kuyo; ikhala lawo lagxumekeka alathi nyaka, isinqe sawo sephulwa ngamadlambi saba yizicucu.

⁴²Amabutho ahlanganisa icebo lokubulala iziboshwa ukuba kungaphunyuli nesisodwa esizohlamba sibaleke.

⁴³Kepha induna yamabutho yayifuna ukumhlenga uPawula, ngakhoke yawanqanda kulelicebo lawo. Yatshela bonke labo ababekwazi ukuhlamba ukuba baziphose kuqala emanzini, bahlambe baye ogwini,

⁴⁴abanye bese belandela, bebambelela emapulangweni nasezinqanyini zamapulangwe omkhumbi. Ngalendlela sasinda sonke, safinyelela ogwini.

ImiSebenzi 28

UPawula usesiqhingini saseMalta

¹Kuthe lapho ingozi seyedlulile, sathola ukuthi sisesiqhingini saseMalta.

²Abomdabu balendawo basiphatha ngomusa ongavamile. Lalina isibhidli semvula, kumakhaza futhi, ngakhoke babasa umlilo, bathi asothe.

³UPawula watheza izinswani wakhwezela umlilo, kwase kuqhasha inyoka izwela umlilo, yamzawula yamnkonkoshela esandleni.

⁴Abantu bendawo babona lesisilokazane silenga esandleni sakhe, batshelana bodwa bathi: “Impela lomuntu ungumbulali! Nanxa esindile olwandle, kodwa unkulunkulu wethu uDikhe kamvumeli ukuba aphile.”

⁵Kepha uPawula wavuthuzela inyoka emlilweni akaba nalutho.

⁶Babelindele ukuba avuvukale kumbe ashayeke phansi afe. Kepha kwathi ukuba balindele isikhathi eside bengaboni lutho olwenzekayo kuye, baguqula umqondo bathi: “Lo ungunkulunkulu.”

⁷Ngakuleyondawo kwakukhona imihlaba yomuntu okuthiwa nguPhubliyu, isiphakanyiswa sesiqhingi. Wasamukela kahle sangenisa kwakhe izinsuku ezintathu.

⁸Uyise kaPhubliyu wayelele phansi, ephethwe ngumkhuhlane nesisu segazi. UPawula wangena waya kuye, wafike wamthandazela wambeka izandla wamphilisa.

⁹Kamuva kwasuka nabanye abantu balesosiqhingi, bonke ababephethwe yizifo, baya kuPawula wafike wabaphilisa.

¹⁰Babonga kithi ngokusipha inqwaba yezipho, okwathi emuva kwesikhathi lapho sesihamba ngomkhumbi basipha esikudingayo.

UPawula ufika eRoma

¹¹Kwadlula izinyanga ezintathu, sasuka ngomkhumbi waseAleksandriya owawukade uqhinqe esiqhingini ubusika bonke. Igama lawo lalikhonjiswe ngophawu lwezithixo ezingamawe.

¹²Safika emzini waseSirakhuse, sahlala khona izinsuku ezintathu.

¹³Sasuka lapho ngomkhumbi saze safika emzini waseRegiyu. Ngakusasa laphephetha iningizimu, ngomhlomunye safika emzini wasePhutheyoli oyitheku lemikhumbi.

¹⁴Safica abazalwane abasimema ukuba singenise kubo izinsuku eziyisikhombisa. Sahamba kanjalo saze sathleka eRoma.

¹⁵Abazalwane balapho base bezwile ngathi, basuka eRoma, baya emizaneni yaseAphi-Foru naseTresi-Thabene besihlangabezile. Kwathi ukuba uPawula ababone, wabonga kuMvelinqangi wema isibindi.

¹⁶Safika eRoma, uPawula wavunyelwa ukuzihlalela yedwa kanye nendoda yempi emelusayo.

UPawula ushumayela eRoma

¹⁷Kwadlula izinsuku ezintathu uPawula wabiza umhlangano wamaJuda aziwayo aseRoma. Kuthe esebuthene wathi kuwo: “Bazalwane, ngilapha nje ngaboshwa eJerusalema, nganikelwa esandleni samaRoma nanxa ngingenzanga lutho oluphambene nesizwe sakithi namasiko okhokho.

¹⁸AmaRoma angiphenya, efuna ukungidedela, njengoba kwakungekho mbandela onganga ngigwetshe ngife.

¹⁹Kepha amaJuda ala ukuba ngidedelwe, ngase ngiphoqeka ukuba ngidlulisele icala lami engonyameni, kepha ngalokho ngangingaqondile ukumangalela isizwe sakithi.

²⁰Yingakho nje ngithandile ukuba ngibonane nani sikhulume. Ngalamaketango ngiboshelwe yena lowo oyithemba lesizwe sakwaIsrayeli.”

- ²¹Amphendula athi: “Besingakatholi ncwadi evela kwelaseJudiya ikhuluma ngawe, futhi akukho muntu kwabakithi oseke wasibikela kumbe wasihlebelala utho ngawe.
- ²²Sibona kufanele sizwe ngawe ukuthi uthini; phela siyazi ukuthi lenkolo yakho iphikiswa yonke indawo.”
- ²³Ayesenquma usuku lokuba abonane naye. Ngalolosuku afika agcwala lapho uPawula ayehlala khona. Kwasukela kusa kwaze kwayohlwa ewachazela efakaza ngombuso kaNkulunkulu. Wawashumayeza ngoJesu, esusela emthethweni kaMose nasemibhalweni yabaphrofethi, ezama ukuwabonisa.
- ²⁴Amanye awo eneliswa ngamazwi akhe, kepha amanye enqaba ukukholwa.
- ²⁵Ngakhoke kuthe esechitheka aphikisana odwa, ngemuva kokuba uPawula esegcine ngokusho into eyodwa ethi: “Kanti wawuqinisile uMoya oyiNgcwele lapho ukhuluma uqondise kokhokho benu ngomlomo womprofethi uIsaya,
- ²⁶uthi: “ ‘Hamba uye kulesisizwe ufike uthi: Niyokuzwa uqobo lokuzwa kepha aniyikuqonda, nibone uqobo lokubona kepha kunganikhanyeli.
- ²⁷Ngoba sezaba lukhuni izinhliziyi zalesisizwe, badla umvimbandlebe, bavala amehlo, ukuze bangaboni ngamehlo abo bezwe ngezindlebe zabo, izinhliziyi zabo zihlakaniphe, baphenduke ngibaphilise.’
- ²⁸“Ngakhoke kuhle nazi ukuthi sekuyiwe kwabezizwe, kwashunyayelwa kubo indaba yokusindisa kukaNkulunkulu. Bayoyizwa-ke bona, bayamukele.”
- [²⁹Kuthe uPawula esekushilo lokhu, amaJuda aphuma ephikisana odwa kakhulu.]
- ³⁰UPawula wahlala lapho isithuba esiyiminyaka emibili endlini ayeziqashele yona, ebamukela bonke ababemvakashela.
- ³¹Wayeshumayela ngombuso kaNkulunkulu efundisa akhulume ngeNkosi uJesu Kristu ngesibindi engathikamezwa muntu.

ElaseRoma

ElaseRoma 1

Isibingelelo

¹Lencwadi ivela kimi uPawula inceku kaKristu Jesu owangiqoka ngaba umphostoli, wangihlukanisela ukushumayela indaba ethokozisayo evela kuNkulunkulu.

²Lendaba emnandi wayethembisa kudala ngomlomo wabaphrofethi bakhe abayiloba ezibhalweni ezingcwele.

³Iphathelene neNdodana yakhe eyazalelwa ebantwini, ulibo olwadabuka enkosini uDavide.

⁴Yavuswa kwabafileyo, okwayenza ukuba ibekwe ibe yiNdodana kaNkulunkulu inamandla amakhulu, ngenxa yobungcwele bomoya wayo. InguJesu Kristu iNkosi yethu.

⁵Ngenxa yayo uNkulunkulu wangenzela umusa ngaba ngumphostoli, ukuba ngize ngiholele kuyo zonke izizwe, ziyithobele zikholwe kuyo, kudunyiswe igama layo.

⁶Nani nibaliwe kwabezizwe, nina baseRoma eniqokwe uNkulunkulu ukuba nibe ngabakaJesu Kristu.

⁷Nginyanibingelela nina nonke bandla elingcwele laseRoma elithandekayo kuNkulunkulu, nina enaqokelwa ukuba ngabakhe. Nginifisela umusa nokuthula okuvela kuNkulunkulu uBaba naseNkosini uJesu Kristu.

UPawula ulangazelela ukuza ababone

⁸Okokuqala, nguJesu Kristu engibonga ngaye uNkulunkulu wami ngani nonke, ngoba ukukholwa kwenu kubatshazwa emhlabeni wonke.

⁹UNkulunkulu uyangifakazela ukuthi lokhu engikushoyo kuyiqiniso, yena engimkhonzayo ngenhliziyo yami yonke ngokushumayela indaba emnandi elanda ngeNdodana yakhe. Uyazi ukuthi angiphezi, ngihlala nginikhumbula

¹⁰njalo lapho ngikhuleka. Nginxusa ukuba ngigcine ngiphumelele ngithathe uhambo lokuza kini uma iNkosi ivuma.

¹¹Ngilangazelela ukubonana nani ukuba nginabele isipho sokomoya, khona nizoqina ekukholweni.

¹²Engikuqondileyo ukukusho ukuthi: siyokhuthazana ngalokhukwenza, ukukholwa kwenu kungikhuthaze, nani nibuye nikhuthazwe ngokwami futhi.

¹³Kuhle nikhumbule bazalwane ukuthi nginkankanye kaningi ukuba nginihambele ngathiywa ngokuthile kuze kube manje, ekubeni bengifuna ukukha izithelo zokomoya phakathi kwenu, njengoba ngenzile kwabanye abangabezizwe.

¹⁴Ngisahlalelwe yicala lokushumayela kwabezizwe bonke, kulabo asebhucukile nakulabo abasengamaqaba, kulabo abafundile nakwabangafundile.

¹⁵Kungakho ngisha amashushu kangaka ukuba nginishumayeze indaba ethokozisayo nani baseRoma.

Amandla evangeli

¹⁶Ngigabe ngevangeli ngoba lingamandla kaNkulunkulu okusindisa bonke abakholwayo, amaJuda kuqala bese kulandela abezizwe.

¹⁷Evangelini kwembulwa ngokusobala ukuthi ukulunga kuvela kuNkulunkulu, kuqalisa kubuye kuphethe ngokukholwa, njengoba kulotshwe embhalweni kwathiwa: “Lowo obalelwa ukulunga uyophila ngokukholwa kwakhe”.

Isintu sinecala kuNkulunkulu

¹⁸Kuvela ulaka lukaNkulunkulu ezulwini lwehlele abantu ngenxa yokona nobubi babo. Bonakele, bathiya iqiniso ukuba lingaziwa.

¹⁹Belu, lokhu obekufanele ukuba bakwazi ngoMvelinqangi kuthe bha, ngoba uMvelinqangi ukubeke kwaba sobala kubo.

²⁰Ngoba selokhu awudala umhlaba kulokhu kukhona isu nendlela, abantu abangabona ngayo amandla akhe angunaphakade nobuNkulunkulu bakhe. Lobubunjani bukaNkulunkulu bungebonwe ngamehlo, kodwa bangakuphawula kuzo zonke izinto azidalileyo bafunde kuzo. Ngakho kabasenazaba abangazilandulela ngazo,

²¹ngoba phezu kokuba babemazi uMvelinqangi abamdumisanga kumbe bambonge njengoba kumfanele uNkulunkulu, kepha imicabango yabo yaphenduka uwangala nezingqondo zabo zobuwula zafiphazeka.

²²Phezu kokuba babezisho ukuthi bahlakaniphile, kodwa baphenduka iziwula.

²³Badikila ukukhonza uMvelinqangi ongafiyo, baguqela izithixo ezibaziweyo ezifuze abantu ababuye bafe, nezinyoni nezilwane ezigaqa ngazo zozine nezilwane ezihuquzelayo.

²⁴Ngakho uNkulunkulu wabayekelela emanyaleni ezinkanuko zezinhliziyi zabo bangcola, bagilana imikhuba ngemizimba yabo.

²⁵Baguqula okuyiqiniso ngoMvelinqangi bakwenza amanga, baguqa ukuba bakhonze okudaliweyo esikhundleni sokuba bakhonze uMdali, obongekayo ungunaphakade. Amen.

²⁶UNkulunkulu wabayekelela ngaso lesisizathu, baye bangena nyi ekulabathekeni okuyichilo. Nabesifazane babo imbala baguqula ubulili babuphambanisa nemvelo balalana bodwa.

²⁷Kanjalo nabesilisa bayeka umkhuba owejwayelekileyo owenziwa kowesifazane babhoka ngokukhanukelana bodwa, amadoda alalana namadoda, base bezibangela emizimbeni yabo isijeziso esilingana nokonakala kwabo.

²⁸Njengoba babengazange bazihluphe ngokumazi uNkulunkulu, wabayekelela uNkulunkulu engqondweni yobulwane eyenza izinto eziphambeneyo zodwa.

²⁹Bagcwele konke ukungalungi nokonakala nomhobholo nobubi, bavame umona nokubulala nokuphikisana nenkohliso nenhliziyo embi. Bayahleba,

³⁰bayagxekana, bazonda uNkulunkulu, bayedelela, bakhukhumele, bayagabaza, basungula amaqhinga amabi, ababalaleli abazali.

³¹Kabanangqondo, izethembiso zabo kabazigcini, kabanamusa nasihe.

³²Yize besazi isimiso sikaNkulunkulu esithi abenza izinto ezinje balingenwe ukufa, kabagcini ngokuzenza kuphela kepha babuye bavumelane nabazenzayo.

ElaseRoma 2

Ukwahlulela okulungileyo kukaNkulunkulu

¹Kawunazaba zokuzilandulela wena muntu noma ngabe ungubani lapho wahlulela. Uzilahla wena lapho wahlulela omunye ngoba uthi wehlulela ube ukwenza lokho nawe akwenzayo.

²Siyazi ukuthi ukwahlulela kukaNkulunkulu kufanele lapho ehlulela abantu abenza izinto ezinje.

³Uzitshelelani we muntundini ukuthi uyophepha ekwahluleleni kukaNkulunkulu, kodwa ube uzenza lezizinto owehlulela abanye ngazo na?

⁴Kumbe wedelela uNkulunkulu owedlulele kangaka ngobumnene nokubekezela nesineke sakhe na? Awazi yini ukuthi inhloso yobubele bukaNkulunkulu ukuba uphenduke na?

⁵Kodwa ngenxa yobulukhuni benhliziyo yakho engaphendukiyo uziqongelela ulaka mhla wentukuthelo lapho kuyokwambulwa khona ukwahlulela okulungileyo kukaMvelinqangi.

⁶Uyakubavuzisa ngamunye njengokwemisebenzi yabo.

⁷Labo abakhuthazela ukwenza okuhle bafune kuNkulunkulu inkazimulo nodumo nokuphila okuphakade bayophiwa lokhukuphila kwafuthi.

⁸Kodwa labo abagombela kwesabo, bengalithobeli iqiniso kepha bevumela ububi, bayokwehlelwa ulaka nentukuthelo.

⁹Lababantu abenza okubi bayofikelwa usizi nobuhlungu, kuqale ngomJuda bese kuba ngowezizwe.

¹⁰Kodwa bayothola inkazimulo nodumo nokuthula bonke abenza okuhle, kuqalise ngomJuda bese kulandela owezizwe.

¹¹UNkulunkulu akabandlululi.

¹²Bonke abenze isono bengenawo umthetho bayodlula babhubhe ngaphandle komthetho, kepha abenze isono umthetho bewuphethe bayokwahlulelwa ngomthetho.

¹³Akusibo abezwa umthetho okuyibona belungile phambi kukaNkulunkulu, kodwa ababalelwa ukulunga, yilabo abakwenzayo okushiwo umthetho.

¹⁴Abezizwe basuke bengawazi umthetho kaMose, kepha inzwa yemvelo yabo iyaye ibatshela ukuba benze okulungileyo. Ngalokho bayakhombisa ukuthi umthetho usegazini kubo, noma bengawazi umthetho kaMose.

¹⁵Ukwenza kwabo kukhombisa ngokusobala ukuthi lokhu okufunwa ngumthetho kulotshiwe ezinhliziyweni zabo. Onembeza babo bayakufakazela lokhu, lapho imicabango yabo ifika ngokudedelana ibamangalela kumbe ibavuna.

¹⁶Lento iyohlaluka mhla wokuphela lapho uMvelinqangi eyokwahlulela ngoJesu Kristu kudalulwe izimfihlo zabantu, njengoba kulandwa kulendaba ethokozisayo engiyishumayelayo.

AmaJuda nomthetho

¹⁷Wena-ke ozigqaja ngokuthi ungumJuda, wencike emthethweni, uyabadlelesela abanye ngobudlelwane bakho noNkulunkulu.

¹⁸Phela wena uyayazi intando yakhe, ukwazi nokwehlukana ukhethe okulungileyo njengoba ufundiswe ngumthetho.

¹⁹Wena uzethembile phela uholabazimpumpethe, ukhanyisela abasemnyameni,

²⁰uvula ingqondo yabayiziwula, ufundisa abangazi lutho, ngoba wena uneqoqo lolwazi neqiniso emthethweni.

²¹Wena-ke ofundisa abanye, uke uzifundise nje wena na? Wena othi akungebiwa, awebi na?

²²Wena othi kubantu mabangaphingi, awuphingi na? Wena owenyanya izithixo, awukuphingi okwathempelini na?

²³Wena ozigabisa ngomthetho, awumdumazi uNkulunkulu ngokwephula umthetho na?

²⁴Kulotshiwe embhalweni ukuthi: “Nibanga ukuba igama likaNkulunkulu lihlambalazeke phakathi kwabezizwe nina maJuda.”

²⁵Ukusoka kunenzuzo uma uwulandela umthetho, kepha uma weqa umthetho unjengomuntu ongazange asoke.

²⁶Uma umuntu ongasokile egcina izimiso zomthetho, akayukubalwa njengosokileyo na?

²⁷Ongazange asoke emzimbeni kodwa ewugcina umthetho, uyokulahla ngecala wena mJuda ophethe umthetho olotshwe phansi, uhlonipha nosiko lokusoka, kepha ube uyisaphulamthetho.

²⁸UmJuda woqobo akusiyena ongumJuda ngezinqotho, nokusoka kwangempela akusikhona lokhu okubonakala ngenxeba emzimbeni.

²⁹Umuntu ungumJuda wempela uma enguye ngengaphakathi lakhe, okusoka kwakhe kungokwenhliziyo, eshaywe uphawu nguMoya oyiNgcwele, kepha kungayi ngomthetho olotshwe emibhalweni engcwele. Ukutuswa atuswa ngakho lomuntu akuveli kubantu kepha kuvela kuNkulunkulu.

ElaseRoma 3

¹Kanti kuyini angcono ngakho umJuda? Kunanzuzoni ukusoka na?

²Kunayo kakhulu ngazo zonke izindlela. Okokuqala ukuthi uNkulunkulu uphathise amaJuda amazwi akhe.

³Kunani pho, uma amanye kuwo ayengakholwa? Ukungakholwa kwawo kwakungase kukuguqule yini ukwethembeka kukaNkulunkulu na?

⁴Qha nakanye! Kuhle kwazeke ukuthi uNkulunkulu uqinisile kepha wonke umuntu ungumuntu wamanga, njengoba kulotshiwe embhalweni ongcwele kwathiwa: “Nkulunkulu, makuvele obala ukuthi ulungile emazwini owashoyo, unqobe nalapho wahlulelwayo.”

⁵Siyothini uma ngabe ukungalungi kwethu kuqhakambisa ukulunga kukaNkulunkulu na? Siyothi uNkulunkulu wenza okungeyikho uma ehlisela ulaka lwakhe phezu kwethu na? (Ngibuzisa okomuntu walapha emhlabeni.)

⁶Akunjalo neze! Ukuba bekunjalo uNkulunkulu ubeyowahlulela kanjani umhlaba na?

⁷Kepha uma amacebo ami elenzile ukuba livame iqiniso likaNkulunkulu, kwanda nodumo lwakhe, pho sizathu sini esenza ukuba ngibe ngisehlulelwa njengesoni na?

⁸Akushiwo ngani kuthiwe: “Asenze ububi nce kuvele okuhle!” njengoba besho njalo abathile abasinukubezayo na? Bayokwahlulelwa ngakhona kubafanele.

Akakho noyedwa olungileyo

⁹Singabuye sithini? Singcono ngani kunabanye thina maJuda na? Cha, ngalutho! Sengike ngalikhapha elimangalela bonke abantu, umJuda kanye nowezizwe, ngathi baphansi kwamandla esono.

¹⁰Kulotshiwe embhalweni kwathiwa: “Akukho muntu olungileyo, qha, ngisho noyedwa vo.

¹¹Akakho noyedwa oqondayo, nozihlupha ngokufuna uNkulunkulu.

¹²Bonke baphambukile bonakele, akakho noyedwa owenza okuhle, phinde, akakho namunye.

¹³Umphimbo wabo uyiliba elivuliweyo, bakhohlisa ngezilimi zabo, bathukusa isihlungu semfezi ezindebeni zomlomo wabo.

¹⁴Umlomo wabo ugcwele ukuqalekisa nabo bonke ubumuncu.

¹⁵Basukela phezulu ukuyochitha igazi,

¹⁶emikhondweni abahamba kuyo badala incithakalo nosizi.

¹⁷Inhlalo yoxolo kabayazi.

¹⁸UNkulunkulu abamesabi abamshayi mkhuba.”

¹⁹Siyazi ukuthi lokho okushiwo ngumthetho usuke ukubhekise kulabo abangaphansi komthetho, ukuba inkukhu inqunywe umlomo, umhlaba wonke uhlale ulahlwe yicala phambi kukaNkulunkulu.

²⁰Akukho ngisho namunye oyothethwa yicala ngoba egcine umthetho ngokupheleleyo, ngoba okudalwa umthetho kumuntu yisazela sokona.

Ukulunga okungokukholwa

²¹Kepha manje ukulunga kukaNkulunkulu kubonakalisiwe ngokwakho kodwa, kwehluswa emthethweni, nokho umthetho nabaphrofethi bakufakazela.

²²Lokhukulunga okuvela kuNkulunkulu kuya ngokukholwa kuJesu Kristu; kungokwabo bonke abakholwayo. Ngoba lapha akukho mahluko.

²³Bonke abantu bonile, bemukwe inkazimulo ababeyamukele kuMvelinqangi,

²⁴liyabathetha icala labo, ngenxa yomusa wakhe oyisipho nangenxa yokuhlengwa uKristu Jesu abahlenga ngakho.

²⁵UNkulunkulu wamethula waba ngumhlatshelo, igazi lakhe laba yinhlawulo yezono zabantu ukuba bathethelelwe lapho bekhola kuye. UNkulunkulu wakwenza lokhu ukuba akhombise ukulunga kwakhe ngoba ezikhathini ezedlulileyo wakuyekelela ukona kwabantu akaze abajezisa.

²⁶UNkulunkulu wabekezela efuna ukubonisa kulesisikhathi samanje ukuthi yena ulungile nokuthi uyamthetha ngecala lowo okholwa kuJesu.

²⁷Kuphelelaphi ukuzincoma kwethu? Kuphela nya. Ngani? Ngabe kuthintene yini nokuwugcina noma ukungawugcini kwethu umthetho na? Qha, kungoba sithethwa yicala ngokukholwa kodwa.

²⁸Silimisa ngesihloko elokuthi umuntu uyaye athethwe yicala ngokukholwa, ngaphandle kokufeza imisebenzi yomthetho.

²⁹Ngabe uNkulunkulu ungowamaJuda odwa na? Akayena nowabezizwe na? Yebo, ungowabo nabo abezizwe,

³⁰njengoba uMvelinqangi emunye; nguyeyoyobathetha ngecala abasokileyo uma bekholwa, abuye futhi abathethe ngecala abangasokile uma bekholwa.

³¹Asiwuphuzisi yini umthetho kaMose ngalokhukholwa na? Cha, nakanye! Empeleni siyawuqinisa umthetho.

ElaseRoma 4

UAbrahama uyisibonelo sokukholwa

¹Siyothi kwaba njani kukhokho uAbrahama kuloludaba na?

²Uma uAbrahama wathethwa ngenxa yemisebenzi yakhe unazo izaba angazincoma ngazo, kodwa angekwenze lokho phambi kukaNkulunkulu.

³Umbhalo ongcwele uthini na? Uthi: “UAbrahama wakholwa kuNkulunkulu, kwase kubalelwa kuye ukulunga.”

⁴Kulowo osuke eqashiwe esebenza, iholo lakhe usuke engaliphiwa kepha lisuke liyimfanelo yakhe.

⁵Kodwa lowo okungekho misebenzi angayiveza phambi kukaNkulunkulu, kepha ekholwa kulowo obathetha ngecala abangalungile, kubalelwa kuye ukulunga ngokukholwa kwakhe.

⁶UDavide usho kanjalo lapho ekhuluma ngokubusiseka komuntu uNkulunkulu abalela kuye ukulunga ngaphandle kwemisebenzi angayiveza.

⁷Uthi: “Babusisiwe labo abathethelelwa izono zabo zokweqa umthetho, kwagqitshwa ukona kwabo.

⁸Ubusisiwe lowomuntu uSimakade ongaseyukumbalela isono.”

⁹Lesisibusiso ngabe sehlela abasokileyo kuphela, noma ngabe sehlela nabangasokile na? Ingani sithe ukukholwa kuka-Abrahama kwabalelwa kuye kwaba ukulunga.

¹⁰Wakubalelwa enjani? Wayesesokile noma wayengakasoki na? Akakubalelwanga esesokile, kepha lokhu kwenzeka engakasoki.

¹¹Wasokwa-ke, lokhukusoka kwakhe kwase kumshaya uphawu lwalokhokulunga ayesekuthole ngokukholwa engakasoki. Kungakho nje enguyise wabo bonke abakholwayo bengakasoki, kubalelwe nakubo ukulunga.

¹²Unguyise futhi wabasokileyo, okungekhona ukuthi basokile nje kuphela kodwa balandela emikhondweni yalokhokukholwa ayenakho ubaba uAbhrahama engakasoki.

Okuthenjiswa nguNkulunkulu kwamukelwa ngokukholwa

¹³UNkulunkulu wethembisa uAbhrahama nabozalo lwakhe ukudla ifa lomhlaba. Lesisethembiso asenziwanga ngoba uAbhrahama elandela umthetho, kepha saba khona ngoba wakholwa kuNkulunkulu kwase kubalelwa kuye ukulunga.

¹⁴Uma kanti izindlalifa kuzoba ngabalandela umthetho, kusho ukuthi ukukholwa akunamsebenzi walutho, nesithembiso asiphethe lutho.

¹⁵Umthetho ubanga ulaka lukaNkulunkulu, kepha lapho kungekho mthetho khona, umthetho aweqiwa.

¹⁶Ngakhoke isethembiso sifika ngokukholwa, ukuba ukufika kwaso kwenzeke ngomusa kaNkulunkulu, lesisethembiso sime siqinile kuyo yonke inzalo ka-Abhrahama. Akugcini kuphela ngalabo abalandela umthetho, kodwa sidlulela nakulabo abangabokukholwa kuka-Abhrahama. Ungubaba kithi sonke,

¹⁷njengoba kulotshiwe embhalweni kwathiwa: “Wena sengikwenze uyise wezizwe eziningi.” Ungubaba ngokubona kukaNkulunkulu akholwa kuye, uNkulunkulu ophilisa abafuleyo, ngephimbo lakhe enze izinto ezingakabi khona zibe khona.

¹⁸Kwakuthiwa ithemba alisekho, kodwa uAbhrahama wakholwa enethemba, wayeseba nguyise wezizwe eziningi njengoba kwakukade kushiwo kuye kwathiwa: “Inzalo yakho iyoba ningi kangaka.”

¹⁹Ukukholwa kwakhe akuzange kudambe lapho ecabanga ngomzimba wakhe owawusuluphele usufile ngoba wayesenekhulu leminyaka, ecabanga nangobunyumba bukaSara.

²⁰Akazange abe namanqikanqika okungakhohwa mayelana nesithembiso sikaNkulunkulu, kodwa waqina ekukholweni wadumisa uNkulunkulu,

²¹emi ethembeni lokuthi uNkulunkulu unamandla okufeza lokho akwethembisayo.

²²Ngalesisizathu kwabalelwa kuye ukulunga.

²³Amazwi athi “kwabalelwa kuye ukulunga” awalotshelwanga yena yedwa,

²⁴kepha alotshelwa nathi futhi. Nathi kuyobalelwa kithi ukulunga thina esikhohwa kulowo owavusa iNkosi yethu uJesu kwabafuleyo.

²⁵Yabulawa ngenxa yezono zethu seqa umthetho, yayisivuswa kwabafuleyo ngoba sithethwe yicala.

ElaseRoma 5

Umpfumela wokuthethwa yicala

- ¹Njengoba sesithethwe yicala ngokukholwa kwethu, kuba khona ukuthula phakathi kwethu noNkulunkulu ngenxa yeNkosi yethu uJesu Kristu.
- ²Sesingenile ngaye safinyelela ngokukholwa endaweni yomusa esimi kuyo. Siyaziqhayisa ngethemba esinalo lokuthi nathi siyohlanganyela noNkulunkulu enkazimulweni yobukhosi bakhe.
- ³Nangaphezu kwalokho siyaziqhayisa ngezinhlopheko zethu, ngoba siyazi ukuthi ukuhlupheka kuveza ukukhuthazela,
- ⁴ukukhuthazela kwakha isimilo, isimilo sivusa ithemba,
- ⁵lelithemba elingasijabhisayo, ngoba uthando lukaNkulunkulu lugobhozele ezinhliziyweni zethu ngoMoya oyiNgcwele esiwuphiweyo.
- ⁶Kuthe lapho sisebuthakathaka silahlekile, uKristu wafela abonakeleyo ngenkathi efaneleyo enqunywe nguNkulunkulu.
- ⁷Akwandile ukuba umuntu afele olungileyo. Hleze kwenzekwe umuntu akhethe ukufela oqotho,
- ⁸kodwa uNkulunkulu uyakukhombisa ukusithanda kwakhe okukhulu ngoba kuthe lapho siseyizoni uKristu wasifela.
- ⁹Njengoba sesithethiwe yicala ngegazi lakhe, kuqinisekile kakhulu ngokwedlulele ukuthi uyosisindisa olakeni oluzayo.
- ¹⁰Kuthe siseyizitha sabuyisana noNkulunkulu ngokufa kweNdodana yakhe. Njengoba sesibuyisene naye, impela ukuphila kwayo kuyosisindisa.
- ¹¹Akugcini lapho kuphela, kodwa sibuye sigabe ngoNkulunkulu ngenxa yeNkosi yethu uJesu Kristu, okunguyena esabuyisana noNkulunkulu ngaye.

UAdamu noKristu

- ¹²Isono saba khona emhlabeni ngenxa yokona komuntu oyedwa, isono sase sibanga ukufa, ukufa kwase kubangena bonke abantu ngoba bonile bonke.
- ¹³Kwakukhona isono emhlabeni kungakashaywa mthetho, kepha ayiphathwa nakuphathwa eyesono uma kungekho mthetho.
- ¹⁴Ukufa kwakuzenzela kubantu kusukela kuAdamu kuya kuMose, kubusa ngisho naphezu kwalabo abangazange bone balingise ukona kukaAdamu. UAdamu uyizinqotho zalowo osazokuza.
- ¹⁵Kungeqhathaniswe isigigaba sokona kuka-Adamu nomusa kaNkulunkulu. Bafa bonke ngesono somuntu oyedwa, kodwa kwase kuvama kakhulu kubo bonke umusa kaNkulunkulu nesipho esafika ngomusa womuntu oyedwa uJesu Kristu.
- ¹⁶Kukhona umahluko phakathi kwalesisipho sesihle nomphumela wesono somuntu oyedwa. Lomuntu oyedwa wawela esonweni, base belethwa

ekwahlulelweni bonke, balahlwa yicala. Kodwa izeqo zabaningi zalandelwa yisipho somusa, ukuba bagcine bethethwe yicala bonke.

¹⁷Uma impela ukufa kwangena ngokuwa komuntu oyedwa kwabusa isintu ngalomuntu oyedwa, bayobusa kwedlule kakhulu kangakanani labo abemukela kuvame umusa kanye nesipho esingukulunga esitholakala ngaye lowo oyedwa uJesu Kristu.

¹⁸Isono somuntu oyedwa owephula umyalo saletha abantu abaningi ekulahlweni, kanjalo-ke isenzo esisodwa sokulunga sibakhipha phambili ecaleni sibaphilise bonke abantu.

¹⁹Ngokungalaleli komuntu oyedwa baningi ababa yizoni, kepha ngokulalela komuntu oyedwa baningi abayokwabelwa ukulunga.

²⁰Kwangena umthetho owenza ukuba isono sibhoke ngamandla, kodwa kuthe lapho sandayo isono kwayilapho umusa uvama ngokwevileyo.

²¹Njengoba isono sabusa ngokufa, umusa ubusa ngokulunga ukuba sizuze ukuphila kwaphakade ngoJesu Kristu iNkosi yethu.

ElaseRoma 6

Ukufa esonweni nokuphila kanye noKristu

¹Pho lokhu kusho ukuthini na? Siqhubeke nokuhlala ekoneni ukuze kwande umusa na?

²Phinde! Thina esesafa esonweni sahlukana naso, singabuye siqhubeke kanjani siphile impilo yesono na?

³Anazi yini ukuthi thina sonke esabhabhadiswa ukuba sibe ngabakaKristu Jesu sabhabhadiselwa ukuba sihlanganyele ekufeni kwakhe na?

⁴Ngombhabhadiso wethu sahlanganyela ekufeni kwakhe, sangcwatshwa kanye naye ukuze nathi siphile impilo entsha njengalokhu uKristu wavuswa kwabafuleyo ngamandla obukhosi bukaYise.

⁵Uma impela sasihlanganyele naye ekufeni okufuze okwakhe, nakanjani siyohlanganyela sibe munye naye ekuvukeni okufuze okwakhe.

⁶Sazi kahle ukuthi imvelo yethu yokonakala yabethelwa esiphambanweni kanye noKristu, ukuba lokhu okungaphakathi kithina okukhanukela isono kuqedwe amandla, singabe sisagqilazwa yisono.

⁷Lowo ofuleyo lisuke selimthethile elesono.

⁸Kepha uma safa noKristu siyakholwa ukuthi siyobuye siphile kanye naye futhi.

⁹Siyazi ukuthi uKristu uvuswe kwabafuleyo engaseyuphinde afe futhi; ukufa akusayikuba namandla phezu kwakhe.

¹⁰Ukufa kwakhe, wakufa kwaba kanye esonweni, nokuphila kwakhe usekuphilela uNkulunkulu.

¹¹Kuhle nihlale nizazi nani ukuthi nifile esonweni kepha niphilela uNkulunkulu njengoba ningabakaKristu Jesu.

¹²Makungabusi isono emizimbeni yenu efayo, ukuba nivumele izinkanuko zayo.

¹³Ninganikeli ngezitho zemizimba yenu esonweni, zibe yizikhali zokwenza okubi, kodwa zinikeleni kuNkulunkulu njengabantu ababuya kwabafuleyo asebephila manje, izitho zenu ninikele ngazo kuNkulunkulu zibe yizikhali zokulunga.

¹⁴Isono asinganibusi, ngoba aniphili impilo ebuswa umthetho kodwa nenganywe umusa.

Izigqila zokulunga

¹⁵Senithini manje? Singaqhubeka yini sone ngoba nakhu singekho phansi komthetho kepha senganywe umusa na? Lutho-ke!

¹⁶Beningazi yini ukuthi uma nithambela umuntu enisuke nizenza izigqila zakhe, niba yizigqila zalowo enimthobelayo, kumbe zesono esiholela ekufeni, kumbe zokulalela, umphumela wakho ongukulunga?

¹⁷Kodwa makabongwe uMvelinqangi ngoba nina enaniyizigqila zesono senibuye naluthobela ngenhliziyo yonke loluhlobo lwemfundiso yobuKristu enayamukelayo.

¹⁸Nakhululwa esonweni nase niba yizigqila zokulunga.

¹⁹Ngikhulumisa okomuntu kanjena nje ngesizathu sobufushane bezingqondo zenu. Njengoba nanihleze ninikela izitho zemizimba yenu kukho konke ukungcola nokonakala okwedlula ukwenza, salani senenza izitho zemizimba yenu zibe yizigqila zokulunga ningcweliselwe impilo yobuKristu.

²⁰Lapho niseyizigqila zesono nanikhululekile ningekho phansi komthetho wokulunga.

²¹Nathola izithelo zini kulezozinto eseninamahloni ngazo namhlanje na? Isiphetho salezozinto singukufa.

²²Kepha manje senikhululiwe ebugqilini besono naba yizigqila zikaNkulunkulu, senithola izithelo manje ezingukungcweliswa kwenu nibe ngabahlukaniselwe uNkulunkulu; isiphetho salokho singukuphila okuphakade.

²³Inkokhelo yokwenza isono ingukufa kepha isipho aphana ngaso uNkulunkulu ukuphila okuphakade okutholakala ngoKristu Jesu iNkosi yethu.

ElaseRoma 7

Umthetho mayelana nomshado

- ¹Ngibhekise kini bazalwane eniwaziyo umthetho. Ngibuza ngithi anazi yini ukuthi umthetho ubusa phezu komuntu kuphela lapho esaphila na?
- ²Umuntu wesifazane oshadileyo uboshelwe ngomthetho endodeni yakhe lapho isaphila, kodwa uma ifa uyakhululwa emthethweni ombophezela endodeni.
- ³Ngakhoke uyobizwa ngesiphingikazi uma ehlala nenye indoda umyeni wakhe esaphila; kepha uma umyeni wakhe efa ukhululiwe kulowomthetho, kuthi uma egana enye indoda angabe esabizwa ngesiphingikazi.
- ⁴Ngokunjalo nani bazalwane nifile emthethweni nakhululwa kuwo njengoba niyingxenywe yomzimba kaKristu. Seningabakhe, yena owavuswa kwabafuleyo, ukuze sithole izithelo zokomoya zethulwe kuNkulunkulu.
- ⁵Lapho sisabuswa yimvelo yethu yokonakala umthetho waqubula izinkanuko zokona emagazini ethu ezasebenzela ukuba sithole izithelo zokufa.
- ⁶Kepha manje asisaboshezwe umthetho, sesafa asisagqilazwa yizinkanuko, asisakhonzi ngendlela endala sibuswa ngumthetho olotshwe phansi, kepha manje sesikhonza ngendlela entsha sibuswa nguMoya oyiNgcwele.

Umthetho kaNkulunkulu nesono

- ⁷Lokhu kusho ukuthini na? Ngabe kusho ukuthi umthetho uyisono na? Akunjalo! Kepha ngangingasoze ngasazi isono ukuthi siyini, ukuba umthetho awungivulanga amehlo. Ngangingakwazi ukuthi ukufisa kuyini ukuba umthetho awuthanga kimi: "Ungafisi!"
- ⁸Isono sangena ngenxeba lomthetho, saveza kimi yonke inhlobo yokukhanuka, ngokuba lapho kungekho mthetho khona, isono sifile.
- ⁹Ngaphila ngingakathintani nomthetho, kodwa kwathi lapho ufika umyalelo isono sadloba sema ngezinyawo,
- ¹⁰mina ngase ngifa. Wona lomyalelo okwakungathi uzongiphilisa wangiphendukela waba ngukufa kimina.
- ¹¹Isono sasizakala ngomyalo, sangiqilizela sangibulala ngawo.
- ¹²Ngakhoke umthetho ungcwele, nomyalo ongcwele ulungile uyinto enhle.
- ¹³Lokho okwakulungile, yikhona yini okwangibangela ukuba ngife na? Phinde! Yisano lesi esaguqula okwakulungile ukuba kungibangele ukufa, isono sidalulwe ukuthi siyisano. Umyalo yiwona-ke okwavezwa ngawo obala ububi obesabekayo besono.

Umbango osenhliziyweni yomuntu

- ¹⁴Siyawazi umthetho ukuthi ungowoMoya kaNkulunkulu, kepha imvelo yami yonakele, igqilazwa yisano.

- ¹⁵Angikuzondi neze engikwenzayo, ngoba angikwenzi lokho engifuna ukukwenza, kepha ngenza khona kanye lokhu engikuzondayo.
- ¹⁶Uma ngenza lokhu engivele ngingafuni ukukwenza, ngivuma ukuthi umthetho ulungile.
- ¹⁷Uma kunje, empeleni akuseyimi okwenzayo lokhu, kepha isono esikimi yisona esingenzisa khona.
- ¹⁸Ngiyazi ukuthi akukho lutho oluhle olukhona kimi, olutholakala kulemvelo yami yokonakala. Ngingakusopha ukwenza okulungileyo kepha ngehluleke nokho ukukwenza.
- ¹⁹Ubuhle engifuna ukubenza angibenzi, kepha ububi engibenyanyayo yibona kanye engibenzayo.
- ²⁰Uma ngenza lokhu ngingafuni ukukwenza, akusemina owenze njalo, kepha sekuyisono esisegazini kimi.
- ²¹Ngithola ukuthi kunomthetho okuthi nxa ngifuna ukwenza okuhle, ngixinwe ububi bunganginiki thuba.
- ²²Ngithokoza ngomthetho kaNkulunkulu phakathi ezibilinini zami,
- ²³kodwa ngiphawula omunye umthetho obusa izitho zomzimba wami, uyalwa ushayisana nomthetho ongibusa engqondweni, ungithumba bese ngithobela umthetho wesono osezithweni zomzimba wami.
- ²⁴Ngaze ngavelelwa mina kababa! Kodwa ngubani oyongilamulela kulemvelo engibulalayo na?
- ²⁵Makabongwe uNkulunkulu ongikhululayo ngoJesu Kristu iNkosi yethu! Ngakhoke ngokomqondo wami ngiyisigqila esibuswa umthetho kaNkulunkulu, kodwa ngokwemvelo esegazini lami ngigqilazwa umthetho wesono.

ElaseRoma 8

Ukuphila okubuswa nguMoya oyiNgcwele

- ¹Ngakhoke abasayukulahlwa abasebunyeni noKristu Jesu.
- ²Umthetho woMoya oyiNgcwele wokuphila usikhululile ngoKristu Jesu emthethweni wesono nowokufa.
- ³Lokho umthetho owehlulekayo ukukwenza njengoba wakhutshazwa imvelo yokonakala, uNkulunkulu wakwenza. Wathuma iNdodana yakhe inofuzo lwemvelo yokonakala ukuba ibe umhlatshelelo wokuhlawula isono. Wasigweba isono semvelo wasilahla ngecala,
- ⁴ukuze izimfanelo zonke umthetho ozifunayo zifezeke kithi, thina esingasabuswa yimvelo yethu kepha sibuswa nguMoya oyiNgcwele.

- ⁵Ngoba labo ababuswa yimvelo yabo, izinhliziyi zabo zinaka okwemvelo, kodwa labo ababuswa nguMoya banaka izinto zoMoya oyiNgcwele.
- ⁶Ukunamathelisa inhliziyi ezintweni zemvelo yokonakala kubanga ukufa, kodwa lowo ongqondo yakhe ibuswa nguMoya uthola ukuphila nokuthula.
- ⁷Imvelo ebusa umuntu iyamelana noNkulunkulu, ayiwuthobeli umthetho kaNkulunkulu, futhi ingewuthobe.
- ⁸Labo abasabuswa yimvelo yabo bangemthokozise uNkulunkulu.
- ⁹Kodwa nina anikho phansi komthetho walemvelo, kepha uMoya kaNkulunkulu uhlala ngempela kinina uyanibusa. Ongenawo uMoya kaKristu akasiye okaKristu.
- ¹⁰Uma uKristu ehlala kini, yize noma imizimba yenu ingefayo ngenxa yesono, kodwa uMoya oyiNgcwele uninika ukuphila ngoba linithethile icala.
- ¹¹Uma uMoya walowo owavusa uJesu kwabafileyo uhlala kini, yena lowo owamvusayo uKristu kwabafileyo uyophilisa imizimba yenu efayo ngaloMoya wakhe ohlala kini.
- ¹²Ngakhoke bazalwane asinacala elisiphoqayo ukuba sibuye sibuswe yimvelo yethu.
- ¹³Uma niphila ngokwemvelo yenu niyokufa, kepha uma nichitha imisebenzi emibi yemvelo yenu ngamandla oMoya oyiNgcwele, niyophila.
- ¹⁴Bonke abaholwa uMoya kaNkulunkulu bangamadodana kaNkulunkulu.
- ¹⁵Anemukeliswa umoya wobugqila ukuba nibuye nesabe, kepha nemukeliswa uMoya onenza amadodana kaNkulunkulu, esiyaye simemeze ngawo sithi: “Abba, Baba!”
- ¹⁶Kuyiwo uMoya uqobo lwawo oyaye ufakaze uvumelane nemimoya yethu ukuthi singabantwana bakaNkulunkulu.
- ¹⁷Uma singabantwana siba yizindlalifa, izindlafa zikaNkulunkulu ezidla ifa kanye noKristu, uma kodwa sihlupheka kanye naye ukuba sihlanganyele naye enkazimulweni yobukhosi bakhe.

Inkazimulo yobukhosi obuzayo

- ¹⁸Ngineqiniso lokuthi izinhlopheko zalesisikhathi zingelinganiswe nenkazimulo yobukhosi esiyoyambulelwa.
- ¹⁹Indalo yonke imagange ibheke ukuba uNkulunkulu abethule ngokusobala babonakale labo abangamadodana akhe.
- ²⁰Indalo yonke inqunyelwe ukuba ihlale njalo ifekela, kungengantando yayo kepha kwaya ngentando kaNkulunkulu owakuhlelayo ukuba kube njalo. Nokho kukhona ithemba lokuthi

- ²¹Indalo iyoze ikhululwe langa limbe ingabe isagqilazwa ukubhubha, kodwa ize yemukele ubukhosi benkululeko yabantwana bakaNkulunkulu.
- ²²Siyazi ukuthi yonke indalo yilokhu yabubula kuze kube manje ngezinseka ezifuze ezowesifazane ebeletha.
- ²³Akuyona yodwa indalo exinekile. Nathi uqobo esiphethe ingqalabutho yezithelo enguMoya oyiNgcwele siyabubula ngaphakathi, njengoba silindele ngamehlo abomvu ukuba uNkulunkulu asithole asenze amadodana akhe, imizimba yethu isinde ekubhujisweni.
- ²⁴Sisindisiwe sikulelithemba, kodwa ithemba elibonwayo aliselona ithemba, ngoba umuntu angakulindela kanjani ngethemba lokho akubonayo na?
- ²⁵Uma sethemba esingakuboniyo ngamehlo siyaye sikulindele ngesineke.
- ²⁶Ngokunjalo uMoya oyiNgcwele uyaselekelela ebuthakathakeni bethu, ngoba asazi ukuthi singakhuleka sithini, kepha uMoya uqobo lwawo uyasinxusela ngokububula okungakhulumeki.
- ²⁷NoNkulunkulu ohlola izinhliziyi zabantu uyayazi inhloso yoMoya, ngoba uMoya uyabaxusela abangcwele ngokwentando yakhe.
- ²⁸Siyazi ukuthi konke lokho uNkulunkulu akwenzayo kuyabalungela labo abamthandayo ababizwe ngokwenhloso yakhe.
- ²⁹Labo ayesevele ebaqokile uNkulunkulu wayebanqumele phambilini ukuthi bayofuza iNdodana yakhe, ukuba ibe yizibulo kubafowabo abaningi.
- ³⁰Labo ayesevele ebanqumele phambilini wabamema, okuthe esebamemile wabathetha ngecala, okuthe lingabathetha wabenza bahlanganyela naye enkazimulweni yobukhosi bakhe.

Uthando lukaNkulunkulu

- ³¹Lokhu kusho ukuthini na? Uma uNkulunkulu emi ngakithi pho ngubani ongamelana nathi na?
- ³²Yena lowo ongazange ayigodle iNdodana yakhe kepha ayinikelela thina, akayikusipha konke yini kanye nayo na?
- ³³Ngubani ozomangalela abayikhethelo likaNkulunkulu na? Ubathetha ngecala uNkulunkulu uqobo lwakhe.
- ³⁴Ngubani ozobalahla ngecala na? Wabafela uKristu Jesu, wabuye wavuswa kwabafileyo. Uhlezi ngakwesokunene sikaNkulunkulu uyasinxusela.
- ³⁵Ngubani oyakusahlukanisa nothando lukaKristu na? Ngabe usizi noma ukukhathazeka, ukuhlushwa noma indlala, ukuhlubula noma ingozi noma ukubulawa ngenkamba na?

³⁶Kunjengoba kwalotshwa embhalweni kwathiwa: “Ngenxa yakho sibulawa usuku lonke, bashaya sengathi siyizimvu zokuhlatshwa.”

³⁷Kodwa nokho phezu kwakho konke lokhu sinqoba nokunqoba ngoKristu owasithandayo.

³⁸Impela ngiyalisho elokuthi, akukho lutho olungasehlukana nothando uNkulunkulu asithanda ngalo ngoKristu Jesu iNkosi yethu, ngisho nakufa imbala, nakuphila, nazingilosi, nazikhulu, nalokhu okukhona, nalokho okuzayo, naziphathimandla,

³⁹nokuphezulu emkhathini nokuphansi ekujuleni, nakuphi okukhona okudaliweyo.

ElaseRoma 9

UNkulunkulu wakhetha isizwe sakwalsrayeli

¹Ngikhuluma iqiniso ngikuKristu, angiqambi manga. Unembeza wami uyangifakazela ukuMoya oyiNgcwele

²ukuthi lukhulu usizi olungiphetheyo, kanye nobuhlungu obunganqamukiyo engibuzwa enhliziyweni yami.

³Bengifisa sengathi ngabe kuqalekiswa mina, nginqunywe kuKristu kusizakale abafowethu, abayigazi lami ngokuzalana.

⁴Bangabakwalsrayeli, amadodana okutholwa kaNkulunkulu ahlanganyela naye enkazimulweni yobukhosi bakhe. Wabopha nabo izivumelwano, wawethula kubo umthetho, wabangenisa enkonzweni yethempeli, wabagidlabeza ngezethembiso.

⁵Okhokho babo babeyindlunkulu okwadabuka kuyo uKristu ngokuzalana, yena onguNkulunkulu uSimayedwa, obongekayo ungunaphakade. Amen.

⁶Kodwa akungoba izwi lesithembiso sikaNkulunkulu lehluleka. Akubo bonke abadabuke kuIsrayeli abanguIsrayeli woqobo.

⁷Akubo bonke abangabantwana baka-Abrahama ngoba beyinzalo yakhe, kodwa ezibhalweni ezingcwele kuthiwa: “Yinzalo kaIsaka kuphela eyobizwa ngawe.”

⁸Lokhu kuchaza ukuthi abantwana bakhe laba abazele ngokwegazi akusho khona ukuthi uNkulunkulu umuphe bona, kodwa abantwana besithembiso yibona abangabantabakhe bempela.

⁹Ngoba liyisithembiso lelizwi elathi: “Ngiyobuya ngaso lesisikhathi nyakenye, uSara abeseba nendodana.”

¹⁰Akulokho kuphela, kodwa kwaba njalo nalapho uRibheka ezala ezimbili izingane endodeni eyodwa, ukhokho uIsaka.

- 11**Kodwa kuthe lapho lezizingane zingakazalwa, zingakenzi nalutho oluhle noma olubi, uRibheka watshelwa ngalokho okuzozehlela. Inhloso kaNkulunkulu uma ekhetha,
- 12**ayiyi ngemisebenzi yomuntu kepha ngokwenza kukaNkulunkulu oqokayo. Ukuze kufezeke lenhloso yakhe kwase kuthiwa kuRibheka: “Omdala uyokhonza abe phansi komncane.”
- 13**Kunjengoba kulotshiwe embhalweni ongcwele kwathiwa: “UJakobe ngimthandile, kodwa uEsawu ngamzonda.”
- 14**Kusho ukuthini lokhu na? Ukwahlulela kukaMvelinqangi akuqotho na? Qha, kuqotho impela!
- 15**Phela uthi kuMose: “Ngiyomhawukela lowo engithanda ukumhawukela, ngibe nesihe kulowo engithanda ukumzwela.”
- 16**Akuyi ngentando yomuntu nangokuzishika kwakhe, kodwa kuya ngesihawu sikaNkulunkulu.
- 17**Embhalweni ongcwele uNkulunkulu uthi enkosini uFaro: “Ngakumisela sona lesisizathu sokuba ngibonakalise amandla ami ngawe, igama lami lidume emhlabeni wonke.”
- 18**Ngakhoke uNkulunkulu uhawukela lowo athanda ukumhawukela, ayenze lukhuni inhliziyo yomuntu ngokwentando yakhe.
- 19**Usuzothi kimi: “Pho kungani ukuba uNkulunkulu abe esangibeka icala na? Ngubani ongamelana nentando yakhe na?”
- 20**Lapho ungubani wena muntundini ukuba ungasagulisana noNkulunkulu na? Okubunjiweyo kungasuka yini bese kuthi kumbumbi: “Ungibumbeleni kanje?”
- 21**Kanti umbumbi akanawo yini amandla okubumba ngasigaxa sinye sobumba isitsha sihlonipheke, esinye sedeleleke na?
- 22**Kwakungenqabaphi pho uma uNkulunkulu enza akuthandayo na? Wayefuna ukuveza ulaka lwakhe abonakalise namandla akhe. Nokho wabekezelela ngesineke esikhulu lezozitsha ezazifanele ukwehlelwa ulaka lwakhe, abantu labo abalungele ukubhujiswa.
- 23**Bekuyini pho uma uNkulunkulu eqonde ukuveza ubukhosi benkazimulo yakhe enkulu kangaka na? Wakwenzela lezozitsha ayefuna ukuzihawukela, labo ayevele ebahlelele phambilini ukuba bahlanganyele naye ebukhosini benkazimulo yakhe.
- 24**Nathi imbala siyilezozitsha, thina esabizwa nguNkulunkulu, kungewona amaJuda odwa kuphela, kodwa nabezizwe.
- 25**Uyakhuluma ngomlomo womphrofethi uHoseya uthi: “Ngiyobabiza ngabantu bami labo abangesona isizwe sami; ngiyombiza ngesithandwa sami obekade eyisaliwakazi.

²⁶Kuyokwenzeka ukuthi lapho kwakuthiwa khona kubo: ‘Aniyisona isizwe sami’, bayawubizwa bathiwe amadodana kaNkulunkulu ophilayo.”

²⁷Ulsaya umemeza ngesizwe sakwaIsrayeli uthi: “Yize uIsrayeli emningi engangezimpethu zendlovu ngesibalo, nokho kuyosinda imithonsela kuphela.

²⁸Ngokuba uSimakade uyokhipha isigwebo emhlabeni ahlulele ngokushesha nangojuqu.”

²⁹Kunjengoba asho uIsaya ebikezela ethi: “Ukuba uSimakade iNkosi yamaviyo ubengasishiyelanga insali yokuphamba uhlobo, besiyakuba yincithakalo yaseSodoma, besiyawukuba njengabaseGomora.”

AbakwaIsrayeli nokulunga

³⁰Lokhu kusho ukuthini na? Kusho ukuthi abezizwe kade bengakubabele kangako ukulunga kodwa sebenakho, okungukulunga okutholakala ngokukholwa.

³¹Kodwa abakwaIsrayeli ababesha amashushu kangaka befuna umthetho abangathola ngawo ukulunga, kabawutholanga lomthetho.

³²Ngani na? Ngoba abawulandelanga ngokholo, kepha konke bakwenza kwaya ngemisebenzi. Base bekhubeka etsheni eliqhuzulayo

³³okulotshwe ngalo embhalweni kwathiwa: “Bukani, ngibeka eZiyoni itshe eliqhuzulayo, idwala eliyisikhubekiso. Lowo owethembela kuye akasoze adumala.”

ElaseRoma 10

¹Bazalwane, ukulangaza kwenhliziyo yami nomkhuleko engibakhulekela wona kuNkulunkulu abakwaIsrayeli, ukuba basindiswe.

²Ngiyabafakazela impela ukuthi bayamshisekela uNkulunkulu kodwa baphuphuthekile.

³Kabazi lutho ngalokhukulunga okuvela kuNkulunkulu, kepha bahlose ukuzakhela ukulunga ngezabo izimiso. Ngakhoke abaze balithobela isu likaNkulunkulu lokuthola ukulunga.

⁴Umthetho waphela nya ngoKristu. Bonke abakholwa kuye selibathethile icala.

⁵UMose uloba kanje ngokulunga okuvela ngokugcina umthetho: “Umuntu ogcina lokho okubizwa ngumthetho uyophila ngakho.”

⁶Kepha ukulunga okuvela ngokukholwa kuthi: “Ungabokusho enhliziyweni yakho uthi: ‘Ngubani oyakwenyukela ezulwini (ukuze alande uKristu eze lapha) na?’

⁷kumbe uthi: ‘Ngubani oyakwehla aye kwalasha (ukuze alande uKristu abuye ezweni labafileyo) na?’

⁸Kunalokho, ukulunga kuthi kumuntu: ‘Izwi lilapha kuwe, lisemlonyeni wakho nasenhliziyweni yakho’, izwi leli esilimemezelayo elikhuluma ngokukholwa.

⁹Ngoba uma uvuma ngomlomo wakho ukuthi uJesu uyinkosi, ukholwa nasenhliziyweni yakho ukuthi uMvelinqangi wamvusa kwabafuleyo, uyosindiswa.”

¹⁰Kuyinhliziywo yakho okholwa ngayo ubalelwe ukulunga, kungumlomo wakho ovuma ngawo usindiswe.

¹¹Kulotshiwe kwathiwa: “Lowo okholwa kuye akasoze adumala.”

¹²Ngoba akukho mehluko phakathi komJuda nowezizwe, yona leyoNkosi iyinkosi yabo bonke, ibabusisa kweve bonke ababiza igama layo.

¹³Ngoba umbhalo ongcwele uthi: “Kuyosindiswa wonke umuntu obiza igama likaSimakade.”

Akubo bonke abalithobelayo ivangeli

¹⁴Kodwa bangalibiza kanjani igama lalowo abangazange bakholwe kuye na? Bayokholwa kanjani kuye uma bengazange bayizwe indaba emnandi elanda ngaye na? Bayoyizwa kanjani indaba emnandi uma bengashunyayezwanga muntu na?

¹⁵Umuntu angashumayela kanjani uma engathunywanga na? Kunjengoba usho umbhalo ongcwele uthi: “Zaze zezwakala kamtoti izigi zezinyawo zalaba abasibikela izindaba ezimnandi!”

¹⁶Akubo bonke nokho abakwaIsrayeli abalithobelayo ivangeli. UIsaya uthi: “Nkosi, ngubani oke wakukholwa esakushumayelayo na?”

¹⁷Ngakhoke ukukholwa kudaleka ngokuba umuntu ezwe, nokuzwa kuvela ngezwi elishunyayelwayo elilanda ngoKristu.

¹⁸Ake ngibuze: Kunga yiqiniso ukuthi abayizwanga intshumayelo na? Bayizwa kahle kakhulu njengoba imibhalo engcwele ithi: “Intshumayelo izwakele emhlabeni wonke, amazwi ayo ajubalele afinyelela emajukujukwini ezinqeni zezwe.”

¹⁹Ngiyabuza futhi ngithi: Kanti abakwaIsrayeli babengakuqondi yini lokhu na? Kuphendule uMose kuqala ngalawamazwi kaSimakade: “Ngiyonikhwelezisa ngabantu abangesona isizwe, nginicasule ngesizwe esingenamqondo.”

²⁰UIsaya ukhulume walimisa ngesihloko wathi: “USimakade uthi: ‘Ngatholwa yilabo ababengazange bahambe bengicinga; ngaziveza kulabo ababengazange bangifune.’”

²¹Kodwa mayelana noIsrayeli uthi: “Ngelula izandla usuku lonke ukuba ngibuyise isizwe esingalaleliyo nesiphikayo.”

ElaseRoma 11

Insali kwaisrayeli

- ¹Ngiyabuza ukuthi kambe uNkulunkulu ubadubile yini abantu bakhe na? Akunjalo neze! Mina uqobo lwami ngingumIsrayeli, ngingowolibo luka-Abhrahama, ngingowomndeni wakwaBhenjamini.
- ²UNkulunkulu akasilahlile isizwe ayevele esiqoke kwakudala. Anazi yini ukuthi umbhalo uthini ngoElija lapho enxusa kuNkulunkulu eceba uIsrayeli na?
- ³Uthi: “Nkosi, bababulele abaphrofethi bakho, amalathi akho bawadilizile, mina ngasinda. Sengisele ngedwa, nami futhi bafuna ukungibulala.”
- ⁴Ithini impendulo kaNkulunkulu kulokho na? Ithi: “Ngizilondolozele amadoda ayizinkulungwane eziyisikhombisa angazange awe ngedolo akhothamele isithixo uBhali.”
- ⁵Kusenjalo namanje. Kukhona insali yalabo uNkulunkulu abakhethileyo ngomusa wakhe.
- ⁶Kwenziwe ngomusa wakhe kuphela, akuyanga ngemisebenzi abayenzileyo. Ukuba bekunjalo, umusa wakhe ubungebe usaba umusa.
- ⁷Manje pho? AbakwaIsrayeli abakutholanga ababekufuna, kepha kwatholwa ngabaqokiweyo kuphela; abasalayo benziwa izinhliziyi zabo zaba lukhuni.
- ⁸Kunjengoba kulotshiwe kwathiwa: “UNkulunkulu ubehlisele umoya owozelisayo, amehlo abo aqundeke akabona, nezindlebe zabo zavaleka kazezwa kuze kube namhla.”
- ⁹UDavide uthi: “Amadili abazitika kuwo mawaphenduke ugibe nonoxhaka kubo, ukuze bawe bathole isijeziso.
- ¹⁰Ameblo abo mawaqundeke bangaboni, ubaqhothise njalo ngezinsizi.”

Ukusindiswa kwabezizwe

- ¹¹Ngiyabuza-ke ngithi: Bakhubeka ukuze bawe unomphela yini na? Qhabo! Ngokona kwamaJuda ukusindiswa sekuze kwafika nakwabezizwe ngenxa yokuba uNkulunkulu efuna ukuvusa isikhwele kwabakwaJuda.
- ¹²Ukona kwawo kwaleta izibusiso ezinkulu emhlabeni, nokwehluleka kwawo kwahlumisa abezizwe ukuba babusiswe. Uma kunjalo-ke ziyoba zinkulu kangakanani izibusiso lapho sonke isizwe samaJuda sesiphendukile!
- ¹³Ngikhuluma kini nina bezizwe. Njengoba ngingumphostoli othunyelwe kwabezizwe, ngisazisa kakhulu lesisikhundla sami.
- ¹⁴Hleze kungase kwenzeke ukuba ngivuse isikhwele esizweni sakithi silangazelele ukusindiswa, ngenxa yami kusindiswe abanye baso.
- ¹⁵Ukudutshwa kwamaJuda kwaleta insindiso, umhlaba wabuyisana noNkulunkulu. Pho, ukwamukelwa kwawo kuyoletani? Kuyoletani ukuphila, ukuze abafuleyo babuye baphile.

¹⁶Uma leyongxenye yenhlama ewulibo yehlukaniselwe uNkulunkulu, inhlama yonke ibusisekile ingcwele. Uma impande yomuthi ingcwele, namagatsha awo angcwele ngokufanayo.

¹⁷Kuyaye kunqunywe amanye amagatsha omhlwathi wasekhaya alahlwe, kuhlunyelelwe esikhundleni sawo ngamagatsha omhlwathi wasendle. Nina bezizwe nifana nalawomagatsha anqunywe esihlahleni somhlwathi esimila endle, okwahlunyelelwa ngawo emhlwathini wasekhaya, ngakhoke seniphila ngenkovu evela empandeni yomhlwathi wasekhaya.

¹⁸Ngakhoke nize ningazigqaji phezu kwalawomagatsha anqunywa alahlwa. Uma nithuke nakwenza lokho, anokhumbula ukuthi akunina enondla impande kodwa yimpande enondlayo.

¹⁹Nizothi-ke: “Amagatsha ephulwa ukuze thina sihlunyelelwe esiqwini.”

²⁰Yebo-ke, balahlwa ngenxa yokungakhohwa kwabo, kepha nina nimi nigxilile ngoba nikhohwa. Musani-ke ukuzithwala; thuthumelani!

²¹Uma uNkulunkulu engawayekanga amaJuda angamagatsha okuzimilela, nani akasoze aniyeka.

²²Ake nibheke nibone isihe sikaNkulunkulu, nokho isandla sakhe sibe silukhuni. Isandla sakhe silukhuni kwabawayo, kodwa unesihe kini, uma nisawethemba umusa wakhe. Ngaphandle kwalokho niyonqunywa kwanina.

²³Uma amaJuda ephenduka ayeke ukungakhohwa, ayohlunyelelwa nawo, ngoba uNkulunkulu unamandla okuwahlumelela.

²⁴Nina bezizwe empeleni benivele nigawulwe emhlwathini wasendle, kwase kuphanjaniswa imvelo, senihlunyelelwa emhlwathini otshalwe ekhaya. Ayodlulela kangakanani lawamagatsha uma esehlunyelelwa emhlwathini wawo wokudabuka na?

Ukuphenduka kwamaJuda

²⁵Kunemfihlakalo engifuna niyazi bazalwane, hleze niqhoshe nithi nihlakaniphile. Ingxenye yabakwaIsrayeli yenziwe izinhliziyi zalukhuni kuze kwenele isibalo sabezizwe abayongena embusweni kaNkulunkulu.

²⁶Kanjalo-ke siyosindiswa sonke isizwe sakwaIsrayeli njengoba kulotshiwe kwathiwa: “Umkhululi uyovela eZiyoni, uyochitha ububi buphume buphele kwaJakobe.

²⁷Isivumelwano sami nabo silapho sengiyosusa izono zabo.”

²⁸AmaJuda aphenduke izitha zikaNkulunkulu ngalelivangeli alenqabayo, kwase kusizakala nina bezizwe ngalokho. Kodwa ngoba wayebaqokile okhokho bawo, aselokhu engabangane bakaNkulunkulu.

²⁹UNkulunkulu angeguquke azisole ngokubusisa nangokubiza kwakhe.

³⁰Nina bezizwe enanikade ningamlaleli uNkulunkulu esikhathini esiphambili, senihawukelwe ngoba amaJuda ayengalaleli.

³¹Nawo-ke asephenduke abangalaleliyo khona ezobuye ahawukelwe ngenxa yesihe uNkulunkulu abenaso kinina bezizwe.

³²UNkulunkulu ubabophezele bonke ebugqilini bokungalaleli kwabo, khona ezobuye abahawukele bonke abantu.

³³Yeka ukujula kwamafa obuhlakani nolwazi lukaMvelinqangi! Izahlulelo zakhe aziqondakali nezindlela zakhe zehlula umqondo.

³⁴“Ngubani owake wawazi umqondo kaSimakade? Ngubani oke waba ngumeluleki wakhe na?”

³⁵Ngubani oke wamupha isipho ukuba abuye abuyiselwe na?”

³⁶Izinto zonke zivela kuye, zaba khona ngaye, ziya kuye. Makadunyiswe yena ungunaphakade! Ameni.

ElaseRoma 12

Ukuzinikela kuNkulunkulu ngokupheleleyo

¹Nginyanincenga-ke bazalwane ngenxa yobubele bukaNkulunkulu ukuba nethule imizimba yenu ibe ngumnikelo ophilayo ongcwele othandekayo kuNkulunkulu, okuyiyona nkonzo yenu yokomoya.

²Ningahambisani nemikhuba emibi yalomhlaba, kodwa guqukani ngengaphakathi nivuselelwe imiqondo yenu. Kanjalo niyokwazi ukuvivinya nibone ukuthi uNkulunkulu uthandani, okulungileyo nokwamukelekayo kuye nokupheleleyo.

³Njengoba uNkulunkulu ngomusa wakhe engiphe isiphiwo esingandile, ngithi kini nonke: Umuntu makangaziboni engcono kakhulu kunokufanele azicabange, kodwa azicabange yena ngomqondo osileyo, njengalokhu uNkulunkulu emabela lowo nalowo ukukholwa okumlingeneyo.

⁴Umzimba womuntu unezitho eziningi, kodwa izitho azisebenzi into efanayo.

⁵Kanjalo nathi yize sibaningi singumzimba owodwa sikuKristu; yilowo nalowo kithi uyisitho esixhumene nezinye izitho emzimbeni owodwa.

⁶Sineziphiwo ezahlukeneyo njengalokhu uNkulunkulu esiphile ngomusa wakhe. Uma isiphiwo sethu singesokuphrofetha, masikwenze ngangokukholwa lokho esinakho.

⁷Uma kumayelana nenkonzo yokusiza abanye, masisize, uma kumayelana nenkonzo yokufundisa, masifundise.

⁸Uma kufanele ukuba sikhuthaze abanye, masenze njalo. Lowo opha abanye, makaphane ahlaphaze. Nalowo ophethe isikhundla sokuhola makasebenze athi

nqi. Lowo okhombisa ububele kwabanye makakwenze lokho ngomoya othakasileyo.

Impilo yobuKristu

⁹Uthando malube qotho. Zondani okubi, nibambelele kokuhle.

¹⁰Thandanani njengezelamani ngothando oluvuthayo, niphangelane ngokuhloniphana.

¹¹Khuthalani ningenqeni, nivuthe emoyeni nikhonze iNkosi.

¹²Thokozani ngenxa yethemba eninalo; lapho nihlupheka bekezelani, nikhuleke ningaphezi.

¹³Nabelane impahla nabazalwane abaswelayo, nishisekele ukungenisa izihambi.

¹⁴Baceleleni isibusiso abanihluphayo, nibafisele izilokotho ezinhle ningabaqalekisi.

¹⁵Jabulani kanye nabajabulayo, nilile nabalilayo.

¹⁶Nize nibonelelane; ningazithwali kodwa zehliseni nidlelane nabantukazana. Ningazenzi abahlakaniphileyo.

¹⁷Uma kukhona ononileyo, musani ukuphindisa ngokubi kuye. Khuthalelani ukwenza okulungileyo phambi kwabantu bonke.

¹⁸Uma kungenzeka, indlela ninayo, hlalisanani nabantu bonke ngokuthula.

¹⁹Ningaphindisi bangane bami, kodwa dedelani ulaka lukaMvelinqangi luzenzele okwalo. Kulotshiwe embhalweni ongcwele kwathiwa: “USimakade uthi: ‘Ukuphindisa kungokwami, kuyophindisa mina.’”

²⁰Omunye umbhalo uthi: “Uma isitha sakho silambile, siphe sidle. Uma somile, siphuzise. Uma usenze nje siyodliwa unembeza siphenduke.”

²¹Ungavumi ukwahlulwa ngububi, kepha yahlula okubi ngokuhle!

ElaseRoma 13

Ukuthobela ababusi

¹Umuntu wonke makathobele iziphathimandla zombuso. Ngokuba awukho umbuso ozikhonela ngokwawo ungamiswanga nguMvelinqangi. Leyomibuso ekhona imiswe nguMvelinqangi.

²Ngakhoke lowo omelana nombuso umelana nalokho okumiswe nguMvelinqangi. Labo abenze njalo bazibangela icala lokwahlulelwa.

³Ababusi ababafaki ingebhe labo abenza okulungileyo, kepha besabisa kuphela abenza okubi. Uyathanda ukungasesabi isiphathimandla na? Yenza okulungileyo, yikhona siyokuncoma-ke.

⁴Ngoba siyinceku kaNkulunkulu esebenzela wena okuhle. Kodwa uma wona, selungakushaya uvalo ngoba inkemba akayiphatheli ize umbusi. Uyinceku kaNkulunkulu ayithuma ukuba iphindise ngolaka lwakhe kulowo owenza ububi.

⁵Ngenxa yalokho kudingekile ukuba uwuthobele umthetho, kungengenxa yokwesaba ulaka kuphela kodwa nangenxa yokukhuluma kukanembeza wakho.

⁶Yiso lesisizathu esenza ukuba nikhokhe intela. Ababusi bayizinceku zikaNkulunkulu eziqondene nalomsebenzi eziwukhuthaleleyo.

⁷Bakhokheleni konke okufanele. Khokhani intela uma ifuneka, uma sebefuna umthelo thelani. Ofanele ukuhlonishwa mhlonipheni; ofanele ukuphakanyiswa mphakamiseni.

Ukuthanda abanye

⁸Ningabi nacala ngezinto zabantu, ngaphandle kwalelo lokuba nithandane kuphela, ngoba osuke ethanda omunye, ufeza umthetho.

⁹Imiyalelo ethi: “Ungaphingi, ungabulali, ungebi, ungafisi,” nayo yonke eminye ekhona, ibhangqwe yonke kulomyalo owodwa othi: “Wothanda omunye umuntu ngalolothando ozithanda ngalo wena.”

¹⁰Uma umthanda umuntu ngeke uze umone, ngakhoke ukuthanda kungukufeza umthetho.

Usuku lokubuya kukaKristu luseduze

¹¹Kwenzeni lokhu njengoba nizibona izikhathi. Selifikile ithuba lokuba niphaphame ebuthongweni. Insindiso yethu isondele kakhulu manje kunakuqala sisanda kukholwa.

¹²Ubusuku sebuyadlula, ingomuso selisondele. Ngakho kasintshinge imisebenzi yasemnyameni, bese sixhaka izikhali silwe ngazo kukhanya.

¹³Asiziphathe kahle, njengabantu abahlala ekukhanyeni kosuku, kungabi ngokuminza nokudakwa, ngamadili esinene nangamachilo, ngokuxabana nangeso elibi.

¹⁴Kodwa hlomani ngeNkosi uJesu Kristu abe yizikhali zenu. Ningayikhathaleli imizimba yenu ukuba nenelise izinkanuko zemvelo yenu.

ElaseRoma 14

Umgamehluleli umzalwane wakho

¹Umuntu onokholo olubuthakathaka mamukeleni, kodwa kungabikho ukushayisana kwemiqondo.

²Ukholo lomunye lumvumela adle konke angakhethi, kodwa onokholo olubuthakathaka udla imifino kuphela.

³Odlayo noma yikuphi ukudla makangamdeleli odla imifino kuphela; odla imifino makangamahluleli umuntu odlayo noma yikuphi ukudla, ngoba uNkulunkulu umamukele naye.

⁴Lapho ungubani wena ukuba ungehlulela inceku yomunye na? Kuya ngenkosi yayo ukuthi leyonceku iyaphumelela noma iyehluleka. Iyophumelela ngoba iNkosi iyakwazi ukuyiphumelelisa.

⁵Omunye umuntu uqoka usuku oluthile athi lungcono kunezinye, kepha omunye uthi izinsuku zifana zonke. Wonke umuntu makabe neqiniso ngalokho enhliziyweni yakhe.

⁶Umuntu owazisa usuku, wenzela ukuba kuhlonishwe iNkosi uJesu. Odlayo engakhethi udlela ukuba kuhlonishwe iNkosi, ngoba uyaye abonge kuNkulunkulu. Nalowo okhethayo engakudli ukudla okuthile, usuke ekwenza lokhu ukuba iNkosi uJesu idunyiswe; naye-ke ubonga kuNkulunkulu.

⁷Akukho muntu oziphilelayo. Amukho futhi ozifelayo.

⁸Uma siphila siphilela iNkosi, uma sifa sifela iNkosi. Ngakhoke ukuthi siyaphila noma siyafa, singabeNkosi uJesu.

⁹UKristu wafa wabuye wavuka ukuba abe yiNkosi yabafileyo nabaphilayo.

¹⁰Wenzelani ukuba wahlulele umzalwane wakho na? Yini wedelele umzalwane wakho na? Ngokuba siyokuma sonke esigcawini sikaMvelinqangi sahlulelwe.

¹¹Kulotshiwe embhalweni kwathiwa: “ ‘Ngikufunge ukuphila kwami, ayongiguqela wonke amadolo, nezilimi zonke ziyakumdumisa uMvelinqangi,’ kusho uSimakade.”

¹²Sekuyoba yilowo azilande phambi kukaMvelinqangi.

Ungamkhubekisi umzalwane wakho

¹³Manje asingabe sisahlulelana, kodwa kunalokho nqumani ukuba ningamthiyi umzalwane, kumbe akhubeke.

¹⁴Njengomuntu okholwa eNkosini uJesu ngineqiniso ngalokhu ukuthi akukho okungcolileyo ngokwakho, kodwa uma umuntu ethi okuthile kungcolile, kuyobe sekuyangcola kulowomuntu.

¹⁵Uma ukhuba umzalwane ngalokho okudlayo, kawusahambisi ngothando. Ukudla kwakho makungambhubhisi umzalwane, ngoba uKristu wamfela.

¹⁶Lokho okuhle eninakho makungagxijwa!

¹⁷Ngoba empeleni umbuso kaNkulunkulu uqobo lwawo awumile ngakudla nasiphuzo, kodwa kuya ngokulunga nokuthula nokujabula esikuphiwa nguMoya oyiNgcwele.

¹⁸Okhonza uKristu kanje uyathandeka kuNkulunkulu ancomeke nakubantu.

¹⁹Masikhuthalele konke okuletha uxolo, sakhane ngokomoya.

²⁰Makungachithwa umsebenzi kaNkulunkulu ngenxa yokudla! Zonke izinto zihlanzekile, kodwa akukuhle ukuba umuntu adle bese ekhubekisa omunye ngalokho akudlayo.

²¹Kungcono ungayidli inyama noma uphuze iwayini kumbe wenze okunye umanxa kumkhubekisa umzalwane wakho.

²²Lokho-ke okukholwayo kuloludaba, makube phakathi kwakho noNkulunkulu. Ubusisiwe umuntu ongazinyezi ngalokho azwana nakho!

²³Kepha lowo othi edla ebelokhu engabaza uselahliwe ngoba akadli ngegunya lokukholwa, kanti konke okungaveli ekukholweni kuyisono.

ElaseRoma 15

Yenza okuthokozisa umzalwane wakho!

¹Thina esilukholo lwethu luqinile kusifanele ukuba sibabekezelele laba abalukholo lwabo lubuthakathaka, singalibali ukuzithokozisa thina nje.

²Yilowo nalowo kithi makajabulise umzalwane wakhe ukuba kube lusizo kuye, akheke ekukholweni.

³UKristu imbala kazange azenamise. Kulotshiwe ngaye kwathiwa: “Izinhlamba zalabo abakuthukayo zabhekiswa kimi zanginukubeza.”

⁴Konke okwalotshwa emibhalweni engcwele endulo kwalotshelwa thina ukuba sifunde kukho, sibekezele sikhuthazwe yimibhalo, ithemba lethu libuye.

⁵Engathi uNkulunkulu owenza inhliziyo ibekezelele ikhuthazeke anganipha umoya wokuhlalisana ngokuzwana, njengoba nilingisa uKristu Jesu,

⁶ukuba nidumise lowo onguNkulunkulu noYise weNkosi yethu uJesu Kristu nganhliziyonye nangazwi linye.

Indaba emnandi ishunyayelwa kwabezizwe

⁷Kuhle namukelane kudunyiswe uNkulunkulu, njengalokhu noKristu enamukele nani.

⁸Nginyanitshela ukuthi uKristu waphenduka waba yinceku ukuze kusizakale amaJuda. Wakhombisa ukwethembeka kukaNkulunkulu, wafeza izethembiso ezenziwa kokhokho bawo.

⁹Abezizwe sebengamdumisa uNkulunkulu ngenxa yesihe sakhe njengoba kulotshiwe kwathiwa: “Ngakhoke ngiyakukudumisa phakathi kwabezizwe, igama lakho ngilihayele amahubo.”

¹⁰Omunye umbhalo uthi: “Thokozani kanye nabantu bakhe nina bezizwe.”

¹¹Kwaphindwa futhi kwathiwa: “Dumisani uSimakade nina zizwe zonke, nimhayele izibongo nina zinhlanga zonke!”

¹²Umprofethi uIsaya ubuye wathi: “Kuyokwenzeka ukuba lowo ongumlibo kaJese asukume abuse izizwe, abezizwe babeke kuye ithemba.”

¹³UNkulunkulu osinika ithemba akenze izinhliziyu zenu ziphuphume ukujabula nokuthula ngokukholwa kwenu, bese kwanda ithemba lenu ngokusizwa ngamandla oMoya oyiNgcwele.

Umsebenzi kaPawula wokuqhuba ivangeli

¹⁴Ngizidelisile bazalwane ngazibonela ngokwami ukuthi ngokwenu ninakho ukulunga konke, nagcwaliswa ngalo lonke ulwazi, nakwazi ngisho ukwelulekana.

¹⁵Ngike ngalimisa ngesihloko emaphuzwini athile enginilobele ngawo nginikhumbuza, ngenxa yesiphiwo esingandile uNkulunkulu angiphe sona ngomusa wakhe.

¹⁶Ungenze inceku kaKristu Jesu ethunyelwe kwabezizwe. Ngenza umsebenzi wobuphristi ngishumayela indaba ejabulisayo evela kuNkulunkulu, ukuba abezizwe babe umnikelo owamukelekayo kuNkulunkulu, behlukaniselwe yena ngoMoya oyiNgcwele.

¹⁷NgoKristu Jesu ngiyaziqhayisa ngomsebenzi wami engimenzela wona uNkulunkulu.

¹⁸Ngeke ngilokothe ngikhulume ngokunye ngaphandle kwalokho uKristu akufeze ngami ukuze abezizwe bagobeke bathobele uNkulunkulu. Wasebenzisa mina kwafezwa lokhu ngamazwi nangezenzo,

¹⁹ngezibonakaliso ezimangalisayo nangamandla oMoya kaNkulunkulu. Ngalishumayela laphela ivangeli elilanda ngoKristu, ngaqalisa eJerusalema namaphethelo angakhona, ngadweba njalo ngaze ngashaya kwelaselliriya.

²⁰Bengihlala njalo ngizigabisa ngokushumayela lendaba emnandi kulezondawo kuphela lapho igama likaJesu lingakaze liphathwe khona. Bengingathandi ukwakhela phezu kwesisekelo somunye umuntu.

²¹Kodwa ngalandela okulotshwe embhalweni ongcwele ukuthi: “Labo ababengazange batshelwa lutho ngaye bayobona, nalabo ababengazange bezwa lutho bayoqonda.”

UPawula usophe ukuhambela eRoma

²²Yingakho ngithiyeke kaningi ukuba ngize kini.

²³Angisenasikhala lapho ngingasebenza khona kulesisifunda, kanti futhi sekuphele iminyaka eminingi ngalangazelela ukuthi ngiyonihambela

- ²⁴mhla ngaya eSpeyini. Ngethemba siyobonana mhla ngidlula kini, ukuze nani ningikhaphe kuloluhambo lwami sengiza lapho. Ngiyobe sengike ngathi ukuhlala nani okwesikhashana.
- ²⁵Kumanje nje ngiya eJerusalema, abangcwele ngibaphathele usizo.
- ²⁶Bazimisele abazalwane baseMasedoniya nabaseAkhaya ukuba banikelele abampofu kwabakholwayo eJerusalema.
- ²⁷Bazethwesa bona ukuba benze njalo, bevele befanele ukukwenza, ngoba uma abezizwe bekwazi ukuhlanganyela namaJuda ezibusisweni zokomoya, kubafanele ukuba bafake izandla bawasize ezidingweni zomzimba.
- ²⁸Kuyothi lapho sengikufezile lokhu, sengikwethulile kubo lokho okuqoqiweyo, bese ngedlula ngakini ngilibhekise eSpeyini.
- ²⁹Ngiyazi ukuthi lapho ngifika kini ngiyofika ngisisitheka yisibusiso sikaKristu.
- ³⁰Ngiyaninxusa-ke bazalwane ngenxa yeNkosi yethu uJesu Kristu nangenxa yothando esiluphiwa nguMoya oyiNgcwele ukuba ningilwise ngemikhuleko ninginxusele kuNkulunkulu.
- ³¹Khulekani ukuba ngophulwe kwabangakholwayo baseJudiya nokuba izibondlo engiyokhonza ngazo zemukeleke kwabakholwayo eJerusalema,
- ³²uma iNkosi ivuma ngifike kini ngithokoza, ngiphumule kanye nani.
- ³³UNkulunkulu oletha ukuthula akabe nani nonke! Ameni.

ElaseRoma 16

UPawula ukhonza kubazalwane

- ¹Nango udade uFibhi engimethula kini, ngiyamncoma. Ungumkhokheli webandla laseKhenkriya.
- ²Mamukeleni ngegama leNkosi njengoba kufanele ukwenziwa kwabakholwayo, nimsizwe kukho konke angase akudingi kini, ngoba baningi akade ebasiza, nami engisiza futhi.
- ³Nize ningibonele kuPhrisila noAkhwila, izisebenzi esibambisene nazo emsebenzini kaKristu Jesu!
- ⁴Bazidela amathambo ngenxa yami. Akugcini ngami ukubonga, kodwa ngisho namabandla onke abezizwe ayabathokozela.
- ⁵Ngiboneleni nasebandleni elihlanganela emzini wabo! Ngikhonzeleni kumngane wami omkhulu uEphenetho, owaba yingqalabutho yabaphendukela kuKristu kwelaseAsiya.
- ⁶Khonzani nakuMariya owanisebenzela kanzima!

- ⁷Khonzani kuAndronikho noJunyasi, abomdabu wakithi engangiboshwe kanye nabo ejele. Bayizilomo kubaphostoli behlangene, benjalo nje baphendukela kuKristu kuqala kunami.
- ⁸Khonzani kuAmpliyathu engimthanda kakhulu nesihlanganyela naye eNkosini uJesu.
- ⁹Khonzani ku-Ubhanu, inceku esisebenza nayo kuKristu, nakuStakhisi umngane wami engimkhonze kakhulu.
- ¹⁰Ngikhonzeleni kuAphele; ukwethembeka kwakhe kuKristu kwavivinywa kwemukeleka. Khonzani kulabo abasebenza kwa-Aristobhulo
- ¹¹nakuHerodiyoni owomdabu wakithi. Khonzani kulabo abasebenza kwaNasiso abangabeNkosi.
- ¹²Khonzani kuTrayifina noTrifosa, abesifazane abasebenzela iNkosi kakhulu. Ngikhonzeleni futhi kumngane wami omkhulu uPhersisi, omunye wesifazane oyijulukele kakhulu iNkosi uJesu.
- ¹³Khonzani kuRufasi umzalwane oqhamileyo ebandleni leNkosi, nakunina okade engumame nakimi imbala.
- ¹⁴Khonzani kuAsinkritho nakuFlegoni, noHerme noPhatroba noHermasi, nakubazalwane abakanye nabo.
- ¹⁵Khonzani nakuFilologo nakuJuliya, nakuNerusi benodadewabo, nakuOlimpa, nakubazalwane bonke abakanye nabo.
- ¹⁶Nize ningikhonzele nibingelelane ngokwanga kwabakholwayo! Athuma umkhonzo omuhle kini onke amabandla kaKristu.
- ¹⁷Nginyanincenga bazalwane ukuba nibaqaphele laba abadala uqhekeko banihlubukise ekukholweni, bephambene nalokho enakufundiswayo. Dedani kubo!
- ¹⁸Abantu abanjalo kabasebenzeli yona iNkosi yethu uKristu kepha babuswa yizinkanuko zabo. Banolimi olushelelayo. Bambambatha ngalo bawake lababantu abayizimpatha.
- ¹⁹Wonke umuntu uzwile ngokulithobela kwenu ivangeli, okuyikhona okungijabulisa kakhulu ngani. Kodwa ngifuna ukuba nikuhlakaniphele lokho okulungileyo, nibe msulwa ngomqondo entweni ewububi.
- ²⁰UNkulunkulu oletha ukuthula uzonce amchoboze masinyane uSathane phansi kwezinyawo zenu. Salani nomusa weNkosi uJesu!
- ²¹Uyakhonza uThimothi inceku esikanye nayo emsebenzini, bayakhonza noLusiyu noJasoni noSosiphatha abombadu wakithi.

²²Ngegama leNkosi uJesu ngiyakhonza mina Thethiyu okuyimina engaloba lencwadi ngesandla sami.

²³UGayiyu uyakhonza. Usiphethe ngezandla ezifudumeleyo kwakhe, mina kanye nebandla. UErasto, umphathisikhwama walomuzi waseKhorinte, uyakhonza kanye nomzalwane wethu uKhwathu.

²⁴Salani nonke nomusa weNkosi yethu uJesu Kristu! Ameni.

UPawula uphetha ngokudumisa uNkulunkulu

²⁵Akadunyiswe uMvelinqangi! Uyakwazi ukunimisa nigxile ekukholweni, njengalokhu isho indaba emnandi elanda ngoJesu Kristu engiyimemezelayo. Lelivangeli limbulule imfihlo eyayikade ifihlakele kwasekudaleni.

²⁶Kepha manje ngomyalo kaNkulunkulu waphakade yembuliwe ngencazelo yezibhalo zabaphrofethi basendulo. Yaziswa kuzo zonke izizwe ukuba bonke bathobebe ivangeli bakholwe.

²⁷UMvelinqangi uSimayedwa, okunguyena yedwa onobuhlakani, akadunyiswe ngoJesu Kristu phakade naphakade! Ameni.

1 kwelaseKhorinte

1 kwelaseKhorinte 1

Isibingelelo

¹Lencwadi ivela kimi uPawula engaqokwa ngokwentando kaNkulunkulu ngaba ngumphostoli kaKristu Jesu; ivela nakumzalwane uSostene.

²Ilotshelwe ibandla likaNkulunkulu laseKhorinte nabo bonke ababizwe nguNkulunkulu ukuba babe ngabantu bakhe abangcwele, behlukaniselwe yena ngoKristu Jesu. Ilotshelwe nabo bonke abasezindaweni ngezindawo ababiza igama leNkosi yethu uJesu Kristu, oyiNkosi yabo neNkosi yethu sonke.

³Sinifisela umusa nokuthula okuvela kuNkulunkulu uBaba naseNkosini uJesu Kristu.

UPawula ubonga iziphiwo zokomoya

⁴Ngimbonga njalo uNkulunkulu wami ngenxa yenu. Ngibonga isisa anenzele sona ngoKristu Jesu,

⁵ngoba ngokuxhumana kwenu noKristu nibusiseke kakhulu ezintweni zonke, ngesiphiwo sobuciko bokukhuluma nangolwazi lonke,

⁶njengoba ubufakazi obukhuluma ngoKristu baqiniswa kini.

⁷Yilokhu okwenza ukuba ningaphuthelwa lutho lweziphiwo enizamukeliswa ngomusa, njengoba nisalindele ngabomvu ukuba iNkosi yethu uJesu Kristu ibonakaliswe.

⁸Iyoniqinisa kuze kube sekugcineni, ningabi nacala mhla wosuku lweNkosi yethu uJesu Kristu.

⁹Wethembekile uNkulunkulu owanimema ukuba nidlelane neNdodana yakhe uJesu Kristu iNkosi yethu.

Uqhekeko ebandleni

¹⁰Nginyanincenga bazalwane ngenxa yeNkosi yethu uJesu Kristu ongigunyazayo, ngithi ake nivumelane ngenkulumo, ningabi maqembuqembu phakathi kwenu. Bumbanani nibe munye, nibe nomqondo owodwa nombono owodwa.

¹¹Sebengitshelile abathile bendlu yakwaKlowe ukuthi kukhona ukungezwani phakathi kwenu.

¹²Ake ngikubeke kanje: Omunye uthi: "Mina ngilandela uPawula," omunye athi: "Ngilandela uApholo," omunye athi: "Ngilandela uKhefase," omunye athi: "Ngilandela uKristu."

¹³UKristu senimahlukanise namenza amaqembu na? NguPawula owabethelwa esiphambanweni wanifela na? Nabhabhadiswa naba ngabafundi bakaPawula na?

¹⁴Ngiyambonga uNkulunkulu ngoba angizange ngibhabhadise muntu ebandleni lenu ngaphandle kukaKhrispu noGayiyu.

¹⁵Akukho muntu ongase athi nina nabhabhadiswa naba ngabafundi bami.

¹⁶Yebo, ngambhabhadisa noStefana nabendlu yakhe, kepha angikhumbuli ngibhabhadisa abanye futhi.

¹⁷UKristu akangithumanga ukuba ngibhabhadise. Wangithuma ukuba ngishumayele indaba ethokozisayo, kodwa ngingasebenzisi amazwi obuhlakani babantu, ukuze ukufa kukaKristu esiphambanweni kungephucwa amandla akho okusindisa.

UKristu ongamandla nokuhlakanipha kukaNkulunkulu

¹⁸Indaba yokubulawa kukaKristu esiphambanweni ingubuwula kwababhubhayo, kepha kithina esisindiswayo ingamandla kaNkulunkulu.

¹⁹Kulotshiwe embhalweni ongcwele kwathiwa: “Ngiyokuchitha ukuhlakanipha kwezazi, ngidide ukuqonda kwabakhaliphileyo.”

²⁰Baphelelaphi-ke abahlakaniphileyo na? Nabazi izibhalo bagcinaphi na? Nalabo abahlakaniphele amazwi okuqophisana nabanye kulomhlaba bayoba yini na? UNkulunkulu akakhombisanga yini ukuthi ukuhlakanipha kwalomhlaba kungubuwula na?

²¹UNkulunkulu wakwenza ngobuhlakani bakhe ukuba abantu bangabi nandlela abayomazi ngayo bafinyelele kuye ngokwethembela ekuhlakanipheni kwabo. Esikhundleni salokho wanquma ukuba abakholwayo basindiswe ngalobubuwula esibushumayelayo.

²²AmaJuda afuna ubufakazi bezimangaliso, amaGriki afuna kuvezwe ubufakazi bokuhlakanipha.

²³Kepha thina sishumayela uKristu obethelwe esiphambanweni, okuyisicasulo emaJudeni nobuwula kwabezizwe.

²⁴Kepha labo uNkulunkulu ababizileyo, abangamaJuda nabangamaGriki, bashunyayezwa uKristu, yena ongamandla kaNkulunkulu nokuhlakanipha kukaNkulunkulu.

²⁵Lokho okubukeka kungubuwula bukaNkulunkulu kungukuhlakanipha okwedlula ubuhlakani babantu, nalokho okungubuthakathaka bukaNkulunkulu kunamandla kwedlula amandla abantu.

²⁶Kuhle nikhumbule ukuthi naninjani bazalwane lapho uNkulunkulu enibiza. Ngokubuka kwabantu nanimbalwa nje enanibonakala ningabahlakaniphileyo, ninamandla, niyizikhulu ezaziwayo.

²⁷UNkulunkulu waqoka lokho abantu balomhlaba abakubuka kungubuwula, ukuba ajabhise ngakho abahlakaniphileyo, wakhetha lokho abomhlaba abakubuka kungubuthakathaka, ukuba ajabhise abanamandla.

²⁸Wakhetha lokho okubukelwa phansi, okudelelwayo kulomhlaba, lezozinto ezingelutho, ukuba achithe izinto eziwutho zingabi khona,

²⁹kungabikho muntu ongase abe neqholo phambi kukaNkulunkulu.

³⁰Nguyena onenze nahlanganyela kuKristu Jesu, uNkulunkulu owamenza waba ukuhlakanipha kwethu, wasithetha ngecala wasingcwelisa wasihlenga.

³¹Akube njengoba kulotshiwe embhalweni ongcwele ukuthi: “Lowo ozigabisayo makazigabise ngeNkosi!”

1 kwelaseKhorinte 2

Ukushumayela uKristu obethelweyo

¹Kuthe lapho ngifika kini bazalwane ngishumayela imfihlakalo kaNkulunkulu, ngangasebenzisa magama obuciko nabungcweti bokufunda.

²Kulenkathi ngisahlezi nani nganquma ukuba ngikukhohlwe konke, nginake kuphela uJesu Kristu ebethelwe esiphambanweni.

³Ekufikeni kwami kinina ngangingumuntu nje obuthakathaka ngithuthumela nginovalolo.

⁴Angikhulumanga angishumayelanga ngabugagu nakuhlakanipha kwabantu, kodwa kwenziwa konke ngamandla oMoya kaNkulunkulu kwadela noma ubani,

⁵ukuba ukukholwa kwenu kungabi ngokuncike ekuhlakanipheni kwabantu kodwa kwakhelwe emandleni kaNkulunkulu.

UMoya usambulela izimfihlo

⁶Kepha kukhona izwi lokuhlakanipha engilishumayelayo kulaba abavuthiweyo ngokomoya. Kodwa kungukuhlakanipha okungekhona okwalomhlaba, kumbe kweziphathimandla ezibusa kulomhlaba ezimandla azo ayaphela.

⁷Ukuhlakanipha engikushumayelayo kuyimfihlakalo kaNkulunkulu. Kufihliwe kwabomhlaba, kanti wayesevele wakumisela udumo lwethu kudala umhlaba ungakadalwa.

⁸Amukho kubabusi balomhlaba owakuqondayo ukuthi kuyini lokhukuhlakanipha. Ukuba babekwazile ukuthi kuyini, babengeke bayibulale iNkosi yodumo bayibethele esiphambanweni.

⁹Kodwa lokhukuhlakanipha engikushumayelayo kuhambisana nokusho kombhalo ongqwele othi: “Okungazange kubonwe ngamehlo, okungazange kuzwiwe ngendlebe, okungazange kucatshangwe muntu, yikhona kanye lokhu uNkulunkulu ahlinzeke ngakho abamthandayo.”

¹⁰UNkulunkulu wayambulela thina imfihlo yakhe, ekwenza lokho ngoMoya wakhe. UMoya oyiNgcwele uphenyisisa zonke izinto, uze uhlolise nezinto ezijulileyo zikaNkulunkulu imbala.

¹¹Ukujula kwemicabango yomuntu kwaziwa kuphela ngumoya wakhe lomuntu uqobo; kanjalo noMoya kaNkulunkulu yiwona kuphela oqonda okukaNkulunkulu.

¹²Asemukeliswa umoya walomhlaba, kodwa semukeliswa uMoya ovela kuNkulunkulu, ukuba sikwazi konke uNkulunkulu asiphe khona.

¹³Ngakhoke esikushoyo asikukhulumi ngamazwi esiwafunde ngobuhlakani babantu, kodwa sisebenzisa amazwi esiwafundiswe nguMoya, esichaza ngawo amaqiniso okomoya kulabo abaholwa nguMoya oyiNgcwele.

¹⁴Ongenawo uMoya oyiNgcwele, ngeke akwemukele okoMoya kaNkulunkulu. Lomuntu onjalo angekuqonde lokhu, kuwubuwula kuyena ngoba ukuze ziqondakale lezizinto, nguMoya oyiNgcwele kuphela osiza umuntu.

¹⁵Umuntu onoMoya oyiNgcwele uyakwazi ukwahlulela kukho konke, kodwa yena ebe engehlulelwa muntu.

¹⁶Umbhalo ongcwele uthi: “Ngubani owaziyo umqondo weNkosi, ngubani ongalokotha ayeluleke na?” Nokho thina sinawo lomqondo kaKristu.

1 kwelaseKhorinte 3

Izisebenzi ezibambisene noNkulunkulu

¹Empeleni bengingenakukhuluma nani njengoba ngiyaye ngenze kubantu abanoMoya. Kwangifanela ukuba ngikhulume kini njengakubantu abangakaphenduki, abaseyizingane ezisakhasayo enkolweni yobuKristu.

²Nganiphuzisa ubisi, anginifunzanga ukudla okuqinileyo ngoba naningakakulungeli; anikakakulungeli namanje.

³Niseyibo ababuswa yimvelo yokonakala. Nxa kusekhona isikhwele phakathi kwenu, nisaxabana nodwa, aniyibo yini ababuswa yimvelo yabo nabaziphethe ngokwenqubo yalomhlaba na?

⁴Lapho omunye ethi: “Ngilandela uPawula,” nomunye athi: “Ngilandela uApholo” — ningaphika yini ukuthi nenza njengabomhlaba na?

⁵Lapho ebeyini nje uApholo? Ebeyini nje uPawula? Siyizinceku zikaNkulunkulu ezingatheni, okuyizona ezanenza nakholwa. Siyasebenza sobabili, yilowo nalowo ngokwabelwa kwakhe yiNkosi uJesu.

⁶Ngahlwanyela imbewu, uApholo wanisela, kodwa nguNkulunkulu owahlumisa isithombo.

⁷Ohlwanyelayo kanye nalowo oniselayo, bobabili kabalutho. NguNkulunkulu okunguyenayena, ngokuba uhlumisa isithombo.

⁸Akukho mehluko phakathi komuntu ohlwanyelayo nomuntu oniselayo, uNkulunkulu uyabavuzisa ngamunye ngangokusebenza kwabo.

⁹Ngoba siyizisebenzi sibambisene noNkulunkulu, nina niyinsimu kaNkulunkulu. Niyisakhiwo sikaNkulunkulu.

¹⁰Ngasebenzisa isiphiwo engasinikwa uNkulunkulu ngomusa, ngabeka isisekelo ngasisungula njengengcweti yomakhi, kodwa kukhona omunye owakhelayo phezu kwaso. Nokho wonke umuntu makaqikelele ukuthi wakhela kanjani kuso.

¹¹Asikho esinye isisekelo umuntu angasibeka ngaphandle kwaleso esibekwe nguNkulunkulu esinguJesu Kristu.

¹²Abanye basebenzisa igolide nesiliva namatshegugu lapho bakhela phezu kwalesisisekelo, abanye basebenzisa ukhuni notshani nesiqunga.

¹³Kuyovezwa umsebenzi womuntu ngamunye ukuthi unjani, ngoba mhla wosuku lokwahlulelwa iyodalulwa, umlilo wangalelolanga uyoyiveza imisebenzi, uyihlunge ngamunye yaziwe ukuthi iluhlobo luni.

¹⁴Uma umsebenzi womuntu wakhelwe esisekelweni wadluliswa emlilweni ungashanga, lowomuntu uyothola umvuzo.

¹⁵Kodwa uma umsebenzi womuntu ubhubhile emlilweni, uyobe ulahlekelwe, abe esindile kodwa yena, kube sengathi usinde esha emlilweni.

¹⁶Anazi yini ukuthi niyithempeli likaNkulunkulu nokuthi uMoya kaNkulunkulu uhlala kini na?

¹⁷Ochitha ithempeli likaNkulunkulu uyochithwa nguNkulunkulu futhi naye. Ithempeli likaNkulunkulu lingcwele, nina niyilelothempeli.

¹⁸Akangazikhohlisi noyedwa umuntu! Uma ekhona phakathi kwenu ozibona ehlakaniphile kulomhlaba, akaphenduke isithutha ukuze ahlakani phe.

¹⁹Ukuhlakanipha kwalomhlaba kungubuphukuphuku kuNkulunkulu. Ngoba kulotshwe embhalweni ongcwele kwathiwa: “UNkulunkulu ubamba abahlakaniphileyo ebuqilini babo.”

²⁰Umbhalo ubuye uthi: “USimakade uyabazi ubuze bemicabango yabahlakaniphileyo.”

²¹Akungabikho muntu ogabe ngomuntu! Empeleni konke kungokwenu.

²²UPawula noApholo noKhefase bangabenu. Umhlaba wonke, ukufa nokuphila, inkathi yamanje kanye neyangomuso, konke lokhu kungokwenu,

²³kanti nina ningabakaKristu, noKristu ungokaNkulunkulu.

1 kwelaseKhorinte 4

Ubunceku babaphostoli

- ¹Kufanele thina saziwe ukuthi siyizinceku zikaKristu eziphathiswe izimfihlakalo zikaNkulunkulu.
- ²Kumuntu ophathisiweyo kubizwa ukuba ethembeke.
- ³Kimi kuyinto engelutho ukwahlulelwa yinina kumbe abanye abantu, noma kusiphi isigcawu sasemhlabeni. Kwamina uqobo angizehluleli.
- ⁴Akukho lutho olungikhuba emoyeni, kodwa lokho akusho ukuthi anginaphutha. INkosi iyona engahlulelayo.
- ⁵Ngakhoke ningehluleli muntu isikhathi esifaneleyo singakafiki, iNkosi uJesu ingakabuyi. Yiyona eyoveza obala izimfihlo ezisekusithekeni, idalule izizindlo zezinhliziyi zabantu. Yilowo nalowo uyonconywa nguNkulunkulu ngokufaneleyo.
- ⁶Lokhu ngikushilo ngakuqondanisa nami noApholo, ngenzela nina bazalwane, ukuba nifunde kithi ukulandela isimiso esithi: “Ningaphambuki kulokho okulotshiweyo embhalweni ongcwele,” kungakhukhumali muntu athande omunye umholi enyanye omunye.
- ⁷Ngubani owathi wena ungcono kunabanye na? Awukunikwanga nguNkulunkulu yini konke onakho na? Pho ukhukhumalelani kube sengathi lokho onakho kwakungeyiso isipho na?
- ⁸Konje niyasutha senibhensile, nigwilikile anisantuli lutho! Seningamakhosi thina singakabi yiwo! Sengathi ningabusa, nathi sibuse kanye nani!
- ⁹Kubonakala sengathi uNkulunkulu wasibeka thina baphostoli endaweni ephansi edelelekileyo saba njengabantu abanqunyelwe ukufa, saba yisiga ezweni, kwabukela izingilosi nabantu.
- ¹⁰Thina siyiziphukuphuku ngenxa kaKristu, kepha nina ningosiyazi kwezikaKristu. Thina sibuthakathaka kepha nina ninamandla niqinile. Nina niyahlonishwa kepha sibukelwa phansi thina.
- ¹¹Kuze kube yilomzuzu siyalamba siyoma, sihlubule siyangqutshuzwa singondingasithebeni.
- ¹²Sizondla ngokuzikhandla. Siyaqalekiswa kodwa sibusise, siyahlushwa kodwa siqinisele.
- ¹³Siyanukubezwa kodwa siphendule kahle sithambise umoya. Kuze kube manje asehlukene thina novobo walomhlaba, siyizibi kuwo wonke umuntu.
- ¹⁴Angikulobi lokhu ukuba nginihlazise kepha ngenzela ukunisola njengabantabami engibathandayo.
- ¹⁵Yize noma omeseki benu beyizinkulungwane benengamele enkolweni yenu yobuKristu, uyihlo munye. Ngaba uyihlo nganizala ngokunishumayeza indaba ejabulisayo, nahlanganyela kuKristu Jesu.

¹⁶Ngakhoke ngiyaninxusa ukuba ningilingise.

¹⁷Yiso lesisizathu esibanga ukuba ngithumele kini uThimothi umntanami othandekayo nowethembekileyo esibambisene naye ekukholweni kuJesu iNkosi. Uyonikhumbuza zonke izimiso zenkolo yobuKristu engizilandelayo nengizifundisa amabandla ezindaweni ngezindawo.

¹⁸Kukhona asebekhukhumele lapho, sengathi angisezi kini.

¹⁹Kanti-ke sengifikile khona manje uma iNkosi ivuma, ekufikeni kwami ngingazihluphi ngezinkulumo zabo, kepha kengibabone kahle ukuthi amandla abo ahamba agcinephi.

²⁰Ngokuba umbuso kaNkulunkulu awuyi ngokukhuluma, kodwa ungowamandla.

²¹Nikhethani? Ngifike kini ngiphethe uswazi noma ngize ngomoya wothando nobunene na?

1 kwelaseKhorinte 5

UPawula wahlulela amanyala obufebe

¹Kubikwa ukuthi kudlange amanyala obufebe phakathi kwenu, lobu ongebuthole ngisho nakwabangakholwayo, kuthiwa kunomuntu okipite nomkayise.

²Nisalokotha nikhukhumale uma kunje na? Nifanele ukufikelwa ngamahloni, anqunywe ebandleni lowo ogile lomkhuba.

³Angikho ngomzimba kepha ngikhona ngomoya, sengimehlulele kudala egameni leNkosi uJesu lomuntu owenze lawamanyala, kube sengathi ngikhona lapho.

⁴Ekubuthaneni kwenu, nami ngikhona lapho ngomoya, ngamandla esinawo eNkosi yethu uJesu,

⁵lomuntu onjalo makamiswe ebandleni anikelwe kuSathane ukuba kubhujiswe imvelo yakhe yokonakala, kusindiswe umoya wakhe mhla wosuku lweNkosi uJesu.

⁶Ukuzisho kwenu akulungile. Beningazi yini ukuthi imvubelo encane iyibilisa yonke inhlama na?

⁷Yichitheni imvubelo endala yesono nibe yinhlama entsha njengoba ningenamvubelo. Ngoba uKristu uyiwundlu lethu lePhasika elahlatshwa lenziwa umnikelo.

⁸Asiwugubheni lomkhosi, kodwa kungabi ngesinkwa esifakwe imvubelo endala yesono nokonakala, kodwa akube ngesinkwa esingenamvubelo, isinkwa sobumsulwa neqiniso.

⁹Encwadini enganilobela yona nganixwayisa ukuba ningajwayelani nabantu bemikhuba yobufebe.

¹⁰Kodwa ngangingasho bona abangakholwayo, bona bengabemikhuba yobufebe, behaha, bengamasela, bekhonza izithixo. Uma nizama ukubagwema, kungadinga ukuba niwushiye lomhlaba ningahlali kuwo.

¹¹Kanti bengiqonde ukuthi, xwayani ningajwayelani nomuntu ozibiza athi ungumzalwane, kepha abe efeba, ahahe, ekhonza nezithixo, inhlebi nesidakwa nesela. Nize ningadli ngisho okhambeni olulodwa nalowo!

¹²Kodwa ngabe ngihlushwe yini nje nempela ukuba ngingaze ngahlulele abantu abangakholwayo na? Kufanele nahlulele abasebandleni.

¹³NguNkulunkulu oyokwahlulela abangaphandle kwebandla. Umbhalo ongcwele uthi: “Mchitheni phakathi kwenu lomuntu owonakeleyo!”

1 kwelaseKhorinte 6

Ukumangalelana kwabazalwane phambi kwabangakholwayo

¹Uma omunye phakathi kwenu ebanga nomunye umzalwane, uya kanjani ayommangalela kwabangakholwayo esikhundleni sokuba udaba alwethule kubazalwane balucubungule bona na?

²Anazi yini ukuthi abantu bakaNkulunkulu yibona abayokwahlulela umhlaba? Uma nikwazi ukwahlulela umhlaba ningehlulele ngani ezintweni ezincane?

³Anazi yini ukuthi siyokwahlulela izingilosi? Akuyukwedlulela kakhulu yini kunokwahlulela kwethu ezintweni zalokhukuphila na?

⁴Uma kuqubuka amacala aloluhlobo, niyowamangala kubantu ababukelwa phansi ebandleni na?

⁵Yihlazo leli. Bekungasekho muntu yini ohlakaniphile phakathi kwenu ongahle ahlanganise abazalwane na?

⁶AmaKristu angamangalelana wodwa na, abangakholwayo behlulele ecaleni labo?

⁷Kusobala ukuthi niyizehluleki zempela ngoba senize namangalelana emthethweni. Kwalani ukuba nani kenoniwe? Akungcono khona yini ukuba niphangwe?

⁸Esikhundleni salokho niyonana nina nodwa, niyaphangana, nikwenza nakubazalwane imbala.

⁹Kodwa kanazi yini ukuthi ababi abayikulidla ifa lombuso kaNkulunkulu na? Ningazikhohlisi. Abenza amanyala obufebe, nabakhonza izithixo, neziphingi, nongqingili,

¹⁰namasela, nabahahayo, nezidakwa, nabathukayo, nabaphangi, kabayukulidla ifa lombuso kaNkulunkulu.

¹¹Kade babenje abanye phakathi kwenu, kepha nina senahlanzwa nangcweliswa, kwabalelwa kini ukulunga ngegama leNkosi uJesu Kristu nangoMoya kaNkulunkulu wethu.

UNkulunkulu masimdumise ngemizimba yethu

¹²Omunye angase athi: “Nginelungelo lokwenza noma yini.” Yebo kunjalo, kodwa akukhona konke okusizayo. Ngingasho nami ngithi ngivunyelwe ukwenza noma yini, kodwa akukho engizokuvumela ukuba kungigqilaze.

¹³Omunye uzothi: “Ukudla kungokwesisu, nesisu singesokudla,” kodwa uNkulunkulu uyokubhubhisa kokubili. Umzimba awusiwona owemikhuba yobufebe, kepha owokuba kukhonzwe iNkosi ngawo, ngoba yiNkosi eyondla umzimba.

¹⁴UMvelinqangi wayivusa iNkosi uJesu ekufeni, uyosivusa nathi ngamandla akhe.

¹⁵Kanazi yini ukuthi imizimba yenu iyizitho zomzimba kaKristu na? Ngingakwenza yini ukuba ngithathe isitho somzimba kaKristu ngisenze ilungu lomzimba wesifebe na? Ngeke!

¹⁶Anazi yini ukuthi umuntu olala nesifebe uba gazi linye naso na? Ezingcwele zilotshwe zasho ngokusobala ukuthi: “Laba bobabili bayokuba mzimba munye.”

¹⁷Kodwa lowo ozihlanganisa neNkosi uba munye nayo ngokomoya.

¹⁸Gwemani imikhuba yobufebe. Yonke inhlobo yesono eyenziwa umuntu ayiwuthinti umzimba wakhe, kepha lowo onecala lomkhuba wobufebe wona umzimba wakhe uqobo.

¹⁹Anazi yini ukuthi imizimba yenu iyithempeli loMoya oyiNgcwele ohlala kinina enawuphiwa nguNkulunkulu na? Anisibona abenu kodwa ningabakaNkulunkulu.

²⁰Wanithenga ngentengo, ngakhoke imizimba yenu yisebenziseleni udumo lukaNkulunkulu.

1 kwelaseKhorinte 7

Izinkinga zasemshadweni

¹Manje-ke ake singene odabeni enangilobela ngalo! Umuntu wenza kahle uma engashadi.

²Kodwa ngenxa yobufebe osebande kangaka kuhle ukuba ileyo naleyondoda ibe nomkayo, nokuba wonke umuntu wesifazane abe nomyeni wakhe.

³Indoda mayiwugcine umsebenzi wayo wobulili kumkayo, nowesifazane makawugcine umsebenzi wakhe njengenkosikazi.

⁴Owesifazane akanakuzinqumela ngomzimba wakhe, yindoda enqumayo. Ngokufanayo indoda ayinakunquma ngomzimba wayo, yinkosikazi enqumayo.

⁵Ningancishani nichilizane! Kungaba kuphela uma nivumelene nobabili ukuba kenizithibe okwesikhashana lapho nisazinikele ekukhulekeni, kodwa bese nibuye nihlangana futhi. Ngalendlela niyomahlula uSathane ningamniki izaba zokunilinga ngoba nehluleka ukuzithiba.

⁶Akusho ukuthi ngokunitshela lokhu sengishaya umthetho, kodwa ngiyaneluleka nje.

⁷Ngokwami bengifisa sengathi ningaba njengami, kodwa phela yilowo nalowo unesiphiwo sakhe esivela kuNkulunkulu, omunye unikwe lesi, omunye uphiwe lesiya.

⁸Kwabangashadile nabafelokazi ngithi bekungakuhle uma bebezihlalela bangashadi, bafane nami.

⁹Kodwa uma behlulwa yimizwa yenhliziyo kungcono bavele bashade kunokushiswa yinkanuko.

¹⁰Kwabashadileyo nginomyalo ongewona owami kodwa ovela eNkosini othi inkosikazi ayingayishiyi indoda yayo.

¹¹Kodwa uma kwenzeka iyishiya, ayihlale ingenamuntu noma ibuyisane nendoda yayo; indoda ayingehlukanisi nomkayo.

¹²Sekuzisholo mina kulaba abanye, kungasasho yona iNkosi, ngithi uma umzalwane enenkosikazi engakholiwe izithandela ukuhlala naye, akangayichithi ngesehlukaniso.

¹³Uma umzalwane wesifazane egane indoda engakholiwe ivuma ukuhlala naye, akangayifaki isehlukaniso.

¹⁴Indoda engakholiwe iyemukeleka kuNkulunkulu ngokuhlanganiswa nomkayo, nenkosikazi engakholiwe iyemukeleka kuNkulunkulu ngokuhlanganiswa nendoda yayo ekholwayo. Ukuba akunjalo ngabe izingane zabo ziyizingane ezingahlanzekile. Kodwa njengoba kunje bayemukeleka kuNkulunkulu.

¹⁵Uma ongakholiwe efuna ukwahlukanisa nekhulwa aganene nalo, kulungile akenze njalo! Entweni enjalo, lowo ongumKristu engumyeni noma eyinkosikazi akaboshelwe, angamkhulula. UNkulunkulu wanibizela ukuhlala ngokuthula.

¹⁶Wazi ngani nkosikazi ekholwayo ukuthi kanti mhlawumbe indoda yakho ubuzoyisindisa na? Wazi ngani wena ndoda ekholwayo ukuthi kanti mhlawumbe umkakho ubuzomsindisa na?

Phila impilo oyabelwe yiNkosi

¹⁷Wonke umuntu akaphile leyompilo abe eyabelwe yiNkosi engakaphenduki, angayiguquli indlela abephila ngayo lapho uNkulunkulu embiza. Lomthetho ngiwubeka kuwo wonke amabandla.

- ¹⁸Umuntu obizwa nguNkulunkulu esesokile akangazisusi izimpawu zokusokwa kwakhe. Uma ebizwa engakasokwa, akangabe esasoka.
- ¹⁹Ukusoka nokungasoki akulutho, okuyikhona kufunekayo ukuba umuntu agcine umyalo kaNkulunkulu.
- ²⁰Wonke umuntu akahlale ebangeni lobuntu lelo aphenduka evele ekulona mhla ebizwa nguNkulunkulu.
- ²¹Wabe uysisigqila yini ngenkathi uNkulunkulu ekubiza? Akungakukhathazi lokho! Kodwa uma livela ithuba lokuba ukhululeke, lithathe!
- ²²Isigqila esabizelwa ukuba umKristu singokhululekileyo weNkosi, nakanjalo lowo owabizwa ekhululekile uysisigqila sikaKristu.
- ²³UNkulunkulu wanithenga ngentengo, ngakhoke aningabe nisaba yizigqila zamuntu.
- ²⁴Bazalwane, umuntu akakhonze uNkulunkulu aqhubeke nempilo ayeyiphila ngenkathi ebizwa.

Abafelokazi nabangashadile

- ²⁵Manje mayelana nabantu abangashadile, akukho myalo engiwuthunywa yiNkosi, kodwa ngibeka umbono wami. Ngenxa yobubele engibenzelwe yiNkosi kufanele ngethenjwe.
- ²⁶Lapho umuntu ebona yonke lenkathazo ekhona, ngibona kungcono ukuba indoda izihlalele injalo.
- ²⁷Uma unayo inkosikazi, musa ukulinga ukuyichitha. Uma ungashadile, yeka ungashadi.
- ²⁸Kodwa uma ngabe ushada, kawenzi sono ngalokho, nentombi kayenzi sono ngokushada. Abashadileyo bayohlangana nezinkathazo mihla kulokhukuphila; ngokwami bengingathanda ukuba niphephe kuzo.
- ²⁹Bazalwane ngiqonde ukuthi isikhathi sifushane. Kusukela manje amadoda ashadile mawaziphathe njengabantu abangashadile.
- ³⁰Kwabakhalayo akube sengathi kabadabukile, abahlekayo makube sengathi kabeneme, nabathengayo akube sengathi lokhu abakuthengile akukhona okwabo.
- ³¹Labo abaphathelene nezinto zalomhlaba akube sengathi kabathintene nazo. Ngoba isimo salomhlaba siyadlula.
- ³²Ngifuna ukuba ningakhathazeki ngalutho. Insizwa engashadile ikhathalela umsebenzi weNkosi ngoba ihlala ifuna ukujabulisa iNkosi.
- ³³Indoda eshadileyo inaka okomhlaba ifuna ukujabulisa umkayo,
- ³⁴bese idonseka nxazombili ngapha nangapha. Owesifazane ongaganile kumbe oseyintombi ukhathalela umsebenzi weNkosi, abe ngowehlukaniselwe yona

ngokomzimba nangokomoya, kodwa oganileyo ukhathalela okomhlaba, ukuthi angayijabulisa kanjani indoda yakhe.

³⁵Ngikusho lokhu kini ukuba nisizakale, angiqonde khona ukunicindezela. Ngifuna ukuba nenze okuyimfanelo, nizinikele emsebenzini weNkosi ningathiywa lutho.

³⁶Mhlawumbe kukhona othile ozinyezayo ngokuthi wenza okungeyikho ngokungayicabangeli intombi yakhe. Uma ehluleka ukuzibamba, ebona kufanele bashade, abasale sebashada ngokuthanda kwakhe. Asikho isono kulokho.

³⁷Kepha uma umuntu esenqumile engqondweni yakhe ukuthi akazukushada, engaphoqekile, eyehlula imizwa yakhe esenqumile waqeda, wenza kahle uma engayishadi intombazane.

³⁸Umuntu oshadayo wenza into enhle, kodwa lowo onquma ukungashadi nguyena oncomekayo

³⁹Inkosikazi eshadileyo ayikhululekile uma indoda yayo isaphila, kodwa uma ifa indoda, umkayo ukhululekile usengashada naleyondoda athanda ukushada nayo, kodwa akwenziwe ngobukholwa.

⁴⁰Ngokwami ukubuka sengathi ubeyothokoza kakhulu ukuba ubezihlalele eyedwa. Bengithi nami nginawo uMoya kaNkulunkulu.

1 kwelaseKhorinte 8

Imihlatshelo eyenzelwe izithixo

¹Mayelana nemihlatshelo eyenzelwa izithixo, siyazi ukuthi ulwazi sinalo sonke. Ulwazi luyakhukhumeza kodwa uthando luyakha.

²Uma kukhona umuntu ozibona ukuthi unolwazi akakabi nalo njengoba kufanele.

³Kepha umuntu othanda uNkulunkulu waziwa uNkulunkulu.

⁴Endabeni yokudla imihlatshelo yezithixo siyazi ukuthi isithixo empeleni siyinto engekho, nokuthi amukho omunye uNkulunkulu, munye kuphela okhona.

⁵Noma kungaze kuthiwe bakhona onkulunkulu ezulwini kumbe nasemhlabeni, bebaningi labonkulunkulu nalawomakhosi,

⁶kodwa thina sinoMvelinqangi uyedwa uBaba oyisisusa sakho konke, wasidala ukuba siphilele yena. SineNkosi eyodwa uJesu Kristu okwadalwa ngaye konke okukhona, yena esiphila ngaye thina.

⁷Akuyibo bonke abantu abalaziyo leliqiniso. Kukhona abathile abajwayela izithixo ngangokuthi kuze kube namhlanje badla lokhukudla bakholelwe ekutheni kusengokwezithixo. Unembeza wabo ubuthakathaka, babona sengathi lokhukudla kuyabangcolisa.

⁸Ukudla kungesakhele ugazi kuNkulunkulu. Asizukulahlekelwa lutho uma singadli, kanti asizukuthola lutho uma sidla.

⁹Qaphelani ukuba inkululeko yenu ingabi yisikhubekiso kwababuthakathaka enkolweni.

¹⁰Ake kwenzeke omunye kulaba abanonembeza obuthakathaka akwelamele udla ethempelini lezithixo, ekubeni wena kuthiwa unolwazi; akumkhuthazi yini athole izaba zokuba adle ukudla okwenzelwe izithixo na?

¹¹Bese ebhubha ngesizathu solwazi lwakho lomuntu ongumzalwane uKristu amfela.

¹²Niyoba necala kuKristu ngokona kanje kubazalwane nilimaze onembeza babo ababuthakathaka.

¹³Uma ukudla kumkhubekisa bese ona umzalwane, ngeke ngiphinde nanini ngiyidle inyama, ukuba ngingamwisi umzalwane one.

1 kwelaseKhorinte 9

Amalungelo omphostoli

¹Angisiyena yini kanti umuntu okhululekileyo na? Angiyena yini umphostoli na? Angiyibonanga yini kanti iNkosi yethu uJesu ngalawa omabili na? Aniyiwo yini nina uqobo lwenu umphumela womsebenzi engawenzela iNkosi uJesu na?

²Yize abanye bengathandi ukuvuma ukuthi ngingumphostoli, nina kodwa niyangemukela. Nina nodwa nje niwubufakazi obuqandulayo bokuthi yiNkosi uJesu engimisile ukuba ngibe umphostoli.

³Ngiyaziphendulela uma ngigxekwa abantu, ngithi:

⁴Kanginalo yini ilungelo lokondliwa ngokudla nesiphuzo na?

⁵Anginalo yini ilungelo lokwenza okwenziwa ngabanye abaphostoli, nabanawe beNkosi, noKhefase, ngiphelezelwe ngumzalwane wesifazane ongumkami na?

⁶Nisho ukuthi yithi sodwa sinoBhanabhasi esifanele ukuzondla na?

⁷Nake nakuzwaphi ukuthi ibutho libuye lizikhokhele lona izindleko zokulwa impi na? Nake nakuzwaphi ukuthi umlimi akanakuzidla izithelo zesivini asitshalileyo na? Nokuthi umalusi angeludle ubisi lomhlambi awalusayo na?

⁸Ngabe ngikusho lokhu ngoba ngikususela kubantu na? Ingani nawo umthetho kaNkulunkulu ukubeka kanjalo.

⁹Kulotshwe emthethweni kaMose kwathiwa: “Ungayifaki isifonyo inkabi ngenkathi ibhula isivuno!” Sizothi uNkulunkulu ukhathalela izinkabi na?

¹⁰Kanti wayengabhekisile kithi yini mhla ekhuluma lokhu na? Empeleni kulotshelwe thina, kwathiwa umuntu olimayo nomuntu obhula isivuno mabenze umsebenzi wabo benethemba lokwemukeliswa esivunweni.

11Siyitshalile imbewu yokomoya phakathi kwenu. Sisephutheni yini uma sicela isondlo kini na?

12Njengoba abanye bafika kini balithole lelungelo, thina-ke asinalo yini ilungelo eledlula elabo na? Kepha besingakaze silisebenzise lelungelo. Esikhundleni salokho sikubekezelele konke ukuba singalithiyi ivangeli elilanda ngoKristu.

13Niyazi ukuthi lababantu abasebenza ethempelini badla ukudla kwasethempelini, nokuthi laba abethula iminikelo elathini badla uphawini wemihlatshelo.

14Ngokunjalo iNkosi ikumisile ukuba laba abashumayela indaba emnandi bondliwe ngalomsebenzi wabo.

15Angikaze ngisebenzise nelilodwa lalawamalungelo, kanti futhi angilobi kanje ngoba ngizifunela wona. Ngingamane ngife nokufa! Amukho ongase angephuce lokho engineqholo ngakho.

16Ukushumayela kwami indaba ethokozisayo akunginiki izaba zokuqhosha, ekubeni ngivele ngicindezelekile ukuba ngiyishumayeke, ngithanda ngingathandi. Ngingehlelwa okwesabekayo uma ngike ngangayishumayela indaba emnandi.

17Ukuba ngiwenza lomsebenzi wami ngoba ngaziqokela, bengiyobheka iholo, kodwa ngisebenza ngoba ngithunyiwe, ngakhoke ngiwenza njengomsebenzi engijutshwe ukuba ngiwenze.

18Ngiholani ngalokho na? Yilokhu ukuthi indaba emnandi ngiyayishumayela yemukelwe ngesihle. Angizange ngizifunele lungelo ngenxa yomsebenzi wami wokuyimemezela.

19Ngikhululekile, angisigqila samuntu, kodwa ngiyazenza isigqila sawo wonke umuntu ukuze ngibathole kakhulu babe baningi abakholwayo.

20Uma ngisasebenza phakathi kwamaJuda, ngiphila njengomJuda ukuze ngiwathole. Yize ngingekho phansi komthetho kaMose, kodwa uma ngisebenza phakathi kwalabo abaphansi komthetho ngiziphatha njengabo ngibazuze.

21Lapho ngiphakathi kwabezizwe ngiphila njengabo, ngibe ngaphandle komthetho wamaJuda, ukuze ngibathole abezizwe. Akusho lokhu ukuthi angiwulaleli umthetho kaNkulunkulu, ngoba ngiphansi komthetho kaKristu.

22Kulabo ababuthakathaka ekukholweni ngiba buthaka njengomunye wabo ukuze ngibazuze. Ngiba yikho konke kubo bonke abantu ukuze ngithuke ngisindisa abathile kubo.

23Konke lokhu ngikwenzela ivangeli, ukuze nami ngibe nesabelo ezibusisweni zalo.

24Niyazi ukuthi lapho kungqayiselwana ngejubane, bayaye basubathe bonke, kepha umklomelo uzuzwa ngoyedwa qhwaba. Gijimani kanjalo khona nizozuza umklomelo!

²⁵Lowo ongqayiselana nabanye uzithiba kuzo zonke izinto. Bayakwenza lokho kodwa bebe bezokwamukeliswa umqhele wamaqabunga abunayo; kepha thina sikwenzela umqhele ohlala phakade.

²⁶Yikho ngigijima ngiqonde ngithi ngqo ngiphikelele ukufika ekugcineni kwebanga, kungakho nje ngilingisa umshayi wesibhakela ongageji ashaye umoya.

²⁷Ngiyawuqinisa umzimba wami ngiwudube ngiwunqobe, hleze kuthi lapho sengishumayeza abanye ngibaphonsa, inselelo, ngaliwe kuthiwe angifanele.

1 kwelaseKhorinte 10

Isixwayiso ngokukhonza izithixo

¹Ake nginikhumbuze bazalwane ngalokho okwehlela okhokho beholwa nguMose ehlane. Basithezwa bonke yifu, badabula bonke oLwandle oluBomvu bawelela ngaphesheya.

²Kulelifu nakulolulwandle babhabhadiswa bonke benziwa abalandeli bakaMose.

³Bahlangana bakudla bonke lokhokudla okungokomoya,

⁴bonke baphuza sona lesosiphuzo sokomoya. Baphuza amanzi avela edwaleni loMoya elalibaphekezela. Lelodwala lalinguKristu uqobo lwakhe.

⁵Phezu kwalokho uNkulunkulu akagculiswanga yiningi labo, izidumbu zabo zasakazeka zadindiliza ehlane.

⁶Lezozinto ezenzekayo ziyisixwayiso kithi ukuba singakhanukeli ububi njengoba babenza.

⁷Musani ukukhonza izithixo njengoba abanye babo babenza. Umbhalo ongcwele uthi: “Abantu bahlala phansi badla baphuza, base besukuma sebesina.”

⁸Asingawenzi amanyala obufebe njengoba abanye babo babenza, kwacekelwa phansi izinkulungwane ezingamashumi amabili nantathu ngosuku olulodwa.

⁹Asingayiqali iNkosi njengoba babenza abanye babo, base bezawulwa yizinyoka zababulala.

¹⁰Ningakhononi njengoba abanye babo babenza, base bebulawa yingilosi ebhubhisayo.

¹¹Zonke lezizinto zabehlela zaba yisixwayiso kwabanye, zalotshwa phansi ukuba nathi sifunde kuzo, ngoba izinsuku esiphila kuzo sekungezokugcina.

¹²Ngakhoke lowo othi usemi uqinile, akaqaphele ukuba angawi!

¹³Ukuvivinywa konke esenidlule kukho kuyikho lokho okufikela bonke abantu. UNkulunkulu uthembekile, ngeke avume ukuba nilingwe ngaphezu kwamandla enu okuqiniseka. Lapho nifikelwa yisiwombe sokuvivinywa, uyonipha amandla

okuqiniselela, anitshengise nendlela eniyophunyula ngayo, ukuze nikwazi ukukubekezelela.

¹⁴Ngakhoke, bazalwane bami abathandekayo, gwemelani inkonzo eyenzelwa izithixo.

¹⁵Ngikhuluma kinina enihluzeke imiqondo, yahlulelani nina kulokhu engikushoyo.

¹⁶Indebe esiyiphuzayo siyibongele esidlweni seNkosi, sidumisa uNkulunkulu ngayo, lapho siphuza kuyo sihlanganyela egazini likaKristu. Lapho sihlephula isinkwa sisidle, sihlanganyela emzimbeni kaKristu.

¹⁷Njengoba isinkwa sisodwa, nathi sonke simzimba munye yize sibaningi, ngoba sihlephulelana isinkwa esisodwa.

¹⁸Ake nicabange ngosiko okuqhutshwa ngalo esizweni sakwaIsrayeli: labo abadla okweminikelo bayahlanganyela enkonzweni yelathi.

¹⁹Ngiqondeni ngalokhokusho na? Ngabe ngiqonde ukuthi isithixo kumbe ukudla okuhlatshele sona kuwutho olutheni na?

²⁰Qha, kodwa ngiqonde ukuthi imihlatshelo yabangakholiwe yenzelwa amadimoni, kayenzelwa uNkulunkulu. Angifuni neze ukuba nidlelane namadimoni.

²¹Ngeke nasheba, niphuze indebe yeNkosi nibuye niphuze eyamadimoni. Ngeke nidle esithebeni seNkosi nibuye futhi nidle esithebeni samadimoni.

²²Ngabe siqonde ukuba iNkosi isikhwelezele na? Sinawo yini amandla edlula awayo na?

Konke akwenziwe ukuba kudunyiswe uNkulunkulu

²³Abanye bayaye bathi: “Konke kuvunyiwe.” Yebo kunjalo, kodwa akulungile konke ukuba kungasisiza. Bathi: “Zonke izinto zivumelekile.” Yebo, kodwa akuyizo zonke ezakhayo.

²⁴Akangabi bikho umuntu ogombela kwesakhe, kepha makafunele abanye okuhle.

²⁵Nikhululekile ukuba nidle noma kuyini okuyinyama ethengisayo, unembeza wenu angaphenyi ukuthi ivelaphi.

²⁶Ngoba umbhalo ongcwele uthi: “Ukugcwala komhlaba kungokukaSimakade, nakho konke okukuwona.”

²⁷Uma nimenywa umuntu ongakholwayo edilini lakwakhe nithanda ukuya khona, yidlani lokho abaniphakela khona, ngaphandle kokubuza izinto eziningi ngokudla lokho ngenxa kanembeza.

²⁸Kodwa uma nisukelwa umuntu athi kini: “Lokhu kuyinyama ehlatshelwe izithixo”, ningayidli leyonyama ngenxa yalowo osho njalo, nangenxa kanembeza —²⁹kungengenxa kanembeza wakho, kodwa kungenxa kanembeza walona

omunye. Umbuzo uzothi: “Ngihlushwe yini ukuba inkululeko yami iphazanyiswe unembeza womunye umuntu na?”

³⁰Uma ngikudla ukudla kwami ngikubongele kuNkulunkulu angangisolelani omunye umuntu, uma ngikudla ngenhliziyo ebongayo na?”

³¹Lokho enikwenzayo, ingabe niyadla noma niyaphuza, kwenzeni konke ukuba kudunyiswe uMvelinqangi.

³²Ziphatheni kahle ngendlela engezukubanga isikhubekiso emajudeni noma kwabezizwe, noma ebandleni likaNkulunkulu.

³³Yenzani njengoba kwenza mina. Ngiyaye ngizame ukubajabulisa bonke kulokho engikwenzayo, ngingazicabangeli mina ngedwa, kodwa ngibanakekela bonke, ukuze basindiswe.

1 kwelaseKhorinte 11

¹Ngilingiseni njengoba nami ngimlingisa uKristu.

Abesifazane mabathwale ekhanda

²Ngiyanincoma ngoba ningikhumbula kukho konke, nibambelela ezifundisweni njengoba ngazidlulisela kinina.

³Kodwa ngifuna ukuba nazi ukuthi uKristu uyinhloko yayo yonke indoda njengalokhu inhloko yowesifazane yindoda, kanti inhloko kaKristu nguNkulunkulu.

⁴Leyondoda ekhuleka noma iphrofethe ishuqule ikhanda, ihlazisa inhloko yayo enguKristu.

⁵Lowo wesifazane othandaza kumbe aphrofethe engashuqule uhlazisa umyeni wakhe oyinhloko yakhe. Akwehlukene nokuthi uphucile ekhanda.

⁶Uma owesifazane engathwele ekhanda akamane agunde izinwele zakhe. Njengoba kungamahloni ukuba owesifazane aphuce ikhanda, noma agunde izinwele zakhe, kufanele athwale ekhanda.

⁷Asikho isidingo sokuba indoda imboze ikhanda, lokhu itshengisa isimo sobukhosi bukaNkulunkulu. Owesifazane utshengisa ubukhosi bendoda.

⁸Indoda kayivelanga kowesifazane, kodwa ngowesifazane owavela endodeni.

⁹Ngoba indoda yayingadalelwanga owesifazane, kodwa ngowesifazane owadalelwa indoda.

¹⁰Ngenxa yezingilosi kufanele ukuba owesifazane athwale ekhanda, akhombise ukuthi uphansi komthetho wendoda yakhe.

¹¹Kulabo abangabeNkosi uJesu, owesifazane angezimele yedwa ngaphandle kwendoda, nendoda kayizimele yodwa ngaphandle kowesifazane.

¹²Njengalokhu owesifazane wavela endodeni, ngokunjalo indoda izalwa ngowesifazane; uMvelinqangi nguyena ongumsuka wakho konke.

¹³Yehlulelani nina ngokwenu ukuthi ngabe kumfanele yini owesifazane ukuba akhuleke kuNkulunkulu enkonzweni engathwele lutho ekhanda na?

¹⁴Ingani imvelo uqobo lwayo iyanifundisa ukuthi izinwele ezinde zingamahloni kumuntu wesilisa,

¹⁵kodwa kowesifazane ziwubukhosi bobuhle bakhe. Uphiwe amagoda ezinwele amade ukuze amboze ngawo ekhanda.

¹⁶Kepha uma kukhona ophika inkani ngalokhu, engikushoyo ukuthi thina kanye namabandla kaNkulunkulu asinalo olunye usiko esiqhuba ngalo enkonzweni.

Ukuhlanekezelwa kwesithebe seNkosi

¹⁷Kuleziziyalo esengizoninika zona anginincomi, ngoba nxa nihlangana enkonzweni niqoqana ukuba nenze umonakalo kunokuba nenze okuhle.

¹⁸Okokuqala, ngizwa ukuthi kunamaqembu ameleneyo phakathi kwenu; ngicishe ngikukholwe lokho.

¹⁹Kufanele abe khona amaqembu kinina ukuze baphumele obala abaqotho.

²⁰Lapho nibuthana ndawonye, nisuke ningahlanganeli ukuba nidle isidlo seNkosi.

²¹Lapho senidla yilowo uvele azidlele okwakhe ukudla, abanye babe belambile, abanye badakwe.

²²Kungoba ningenayo yini imizi yenu lapho ningadla niphuzele khona na? Mhlawumbe nedelela ibandla likaNkulunkulu, nenyelisa izimpofana na? Ngabe nibheke ukuba ngithini kini ngalokhu na? Nithi kanginincome na? Lutho-ke ngeke!

Ukumiswa kwesithebe seNkosi

(Mat 26:26-29; Mark 14:22-25; Luk 22:14-20)

²³Ngasemukela eNkosini isifundiso engasidlulisela kini sokuthi: Ngobusuku iNkosi uJesu akhashelwa ngabo, wathatha isinkwa

²⁴wabonga kuNkulunkulu, wasihlephula wathi: “Lokhu kungumzimba wami onikelwa ngenxa yenu; kwenzeni lokhu ukuba ningikhumbule.”

²⁵Kuthe sebedlile wabuye wathatha indebe wathi: “Lendebe iyisivumelwano esisha sikaNkulunkulu esiqiniswa yigazi lami. Anovama ukukwenza lokhu lapho niyiphuzayo, ukuba ningikhumbule.”

²⁶Njalo nxa nisidla lesisinkwa niphuze lendebe, nimemezela ukufa kweNkosi uJesu ize ibuye.

²⁷Ngakhoke lowo odla lesisinkwa seNkosi aphuze lendebe yayo ngokungafanele, unecala lokuhlambalaza umzimba negazi leNkosi.

²⁸Umuntu akazihlolisise kanduba adle isinkwa aphuze indebe.

- ²⁹Lowo odlayo aphuze engawazisi umzimba weNkosi, uzidlela aziphuzele icala.
- ³⁰Kungakho iningi lenu libuthakathaka ligula nje, abanye benu sebeze bafa.
- ³¹Ukuba besiyozihlolisisa kuqala singakasondeli esithebeni, besingayukwahlulelwa.
- ³²Kepha isisahlulele yasijezisa iNkosi ukuba singalahlwa kanye nabomhlaba.
- ³³Ngakho kuhle nilindane bazalwane lapho niqoqana ukuba nidle isidlo seNkosi.
- ³⁴Uma kukhona olambileyo akadle ekhaya, ukuze ningahlulelwa uNkulunkulu lapho nihlangene. Malungana nezinye izindaba sengiyozilungisa mhla ngifikayo.

1 kwelaseKhorinte 12

Iziphiwo zoMoya oyiNgcwele

- ¹Ngithanda ukuba nazi bazalwane mayelana neziphiwo zoMoya oyiNgcwele.
- ²Niyazi ukuthi kulenkathi nisengabangakholwayo, naniye nizwe nihuheka ukuba niyokhonza izithixo eziyiziduli.
- ³Kungakho ngithanda ukuba nazi ukuthi akukho muntu okungathi nxa eholwa nguMoya kaNkulunkulu athi: “UJesu uqalekisiwe.” Kanti amukho futhi ongahle athi: “UJesu uyiNkosi,” uma engaholwa nguMoya oyiNgcwele omvumisayo.
- ⁴Kukhona izinhlobo ezahlukeneyo zeziphiwo, zibe kodwa zingezamaMoya munye ozabayo.
- ⁵Kukhona izikhundla ezahlukeneyo zokusebenzela iNkosi, kepha kube kukhonzwa yona leyoNkosi eyodwa.
- ⁶Zehlukile iziphiwo okusetshenzwa ngazo, kodwa munye uNkulunkulu obapha bonke amandla okufeza yonke imisebenzi abayenzayo.
- ⁷Bonke baphiwa ngamunye iziphiwo ozibonakalisa ngazo uMoya, ukuze basizakale.
- ⁸UMoya unikeza othile ukuba ashumayeke ngokuhlakanipha, omunye uphiwa ulwazi oluvela kuwo lowoMoya,
- ⁹omunye uphiwa ukukholwa okuvela kuwo lowoMoya, omunye uphiwa yiwo lowoMoya iziphiwo zokuphilisa abagulayo.
- ¹⁰Omunye uphiwa nguMoya amandla okwenza izimangaliso, omunye umuphe isiphiwo sokushumayela aphrofethe, omunye umuphe amandla okukwazi ukwahlukanisa phakathi kweziphiwo ezivela kuwo uMoya oyiNgcwele nalezo ezingaveli kuwo. Omunye umnika amandla okukhuluma ngezilimi ezingaziwa, omunye umuphe amandla okuchaza okushiwoyo.
- ¹¹Kuseyiwona lowoMoya owenza konke lokhu, ubapha bonke ngamunye iziphiwo ezahlukeneyo ngokwentando yawo.

Umzimba owodwa wakhiwe ngezitho ezimbalwa

- ¹²Ibandla likaKristu linjengomzimba owodwa onezitho ezahlukeneyo. Kusengumzimba munye, yize ubunjwe ngezitho ezahlukeneyo.
- ¹³Kunjalo nakithina sonke, noma singamaJuda noma abezizwe, noma siyizigqila noma abakhululekileyo, sonke sibhabhadiselwe kulomzimba owodwa yiwo lowoMoya, sinikezwe ukuba siphuze kuwo lowoMoya.
- ¹⁴Umzimba awakhiwe ngesitho esisodwa vo, kodwa wakhiwe ngezimbalwa.
- ¹⁵Uma unyawo lungase luthi: “Mina angisona isandla, ngakhoke angisiyena owomzimba,” lokhokusho kwalo kungelwahlukanise ukuba lungabi ngolomzimba.
- ¹⁶Indlebe isenokuba ithi: “Ngoba angisilona iso, kusho ukuthi angiyena owomzimba,” kodwa lokho ngeke kuyehlukanise nomzimba.
- ¹⁷Ukuba umzimba wonke waguquka iso, wawuyozwa kanjani na? Ukuba wawuyindlebe yodwa kuphela, wawuyohogela ngani?
- ¹⁸Manje-ke uNkulunkulu wahlanganisa izitho ezehlukeneyo zaba umzimba owodwa, njengalokhu ayehlosile ukuba kube njalo.
- ¹⁹Kwakungeke kwaba umzimba ukuba konke kwakuyisitho esisodwa.
- ²⁰Njengoba kunje, izitho ziningi kodwa umzimba munye.
- ²¹Iso alinakusho esandleni lithi: “Wena angikudingi,” kumbe ikhanda lithi ezinyaweni: “Nina angisanidingi.”
- ²²Empeleni singeze salunga uma zingekho lezizitho ezibukeka zibuthakathaka.
- ²³Lezizitho esithi thina azilutho, yizona kanye esizinakekela kakhulu, nezitho zomzimba esinezinhloni ngazo, yizona esizihlonipha kakhulu.
- ²⁴Lokhu akudingekile kulezizitho ezibukekayo. UMvelinqangi wawubumba umzimba ngesu lokuba kuhlonishwe izitho ezikudingayo,
- ²⁵ukuba kungabi bikho ukwahlukana emzimbeni, kodwa zonke izitho ezehlukeneyo zilekelelane ngamoya munye.
- ²⁶Uma isitho esisodwa somzimba sihlupheka, ezinye zihlupheka zonke kanye naso, uma kunconywa esisodwa, nezinye zithokoza zonke kanye naso.
- ²⁷Nina ningumzimba kaKristu, yilowo nalowo wenu uyisitho sawo.
- ²⁸UNkulunkulu ukumise konke ngononina ebandleni: kuqala kube abaphostoli, kulandele abaphrofethi, abesithathu kube ngabafundisayo. Bese kulandela laba abenza izimangaliso, balandelwe yilaba abaphiwe amandla okuphilisa abagulayo, kulandele abaneziphiwo zokusiza abanye, nokuhola abanye, nokukhuluma ngezilimi ezingaziwayo.

²⁹Kabayibo bonke abaphostoli, nabaphrofethi, nabafundisayo, nabenza izimangaliso.

³⁰Akuyibo bonke abaneziphiwo zokuphilisa nezokukhuluma ngezilimi nezokuhumusha.

³¹Kepha shisekelani ukufuna lezoziphiwo ezibalulekile!

Uthando

Sengizonikhombisa indlela ezedlula zonke lezi.

1 kwelaseKhorinte 13

¹Noma ngikhuluma izilimi ngezilimi, ezabantu ngisho nezezingilosi, kodwa uma ngingenalo uthando ngifana nethusi elikhencezayo, ngizwakala njengensimbi ekhenqezayo.

²Noma nginesiphiwo esingandile sokuba ngumphrofethi ngishumayeke, ngiqonde izimfihlakalo zonkana noma ngingaba nolwazi lonke, ngibe nokholo olunamandla amakhulu olukwazi ukugudluzisa izintaba, kepha uma ngingenalo uthando kusho ukuthi angiyinto yalutho.

³Noma ngikwaba konke enginakho ukuba kondliwe izimpofana noma-ke ngizidela amathambo ngishiswe ngamalangabi omlilo, kodwa uma ngingenalo uthando ngeke kungisize ngalutho.

⁴Uthando luhlala lubekizela; lunomusa uthando, alunamhawu. Uthando aluzigabisi aluzikhukhumezi,

⁵aluziphathi ngendlela engafanele, alugodli luziphandele kwesalo, alucasuki lufutheke ngolaka, alubambi magqubu uma loniwe,

⁶aluthokozi ngalokho okungalungile kepha luyakujabulela okuyiqiniso.

⁷Lubekezelela izinto zonke, lukholwa izinto zonke, lwethemba izinto zonke, lunyamezelela izinto zonke.

⁸Uthando alupheli nanini. Kuyophela isiphiwo sokuphrofetha, kunqamuke esokukhuluma ngezilimi, kukhawuke esolwazi siphele.

⁹Ulwazi lwethu luyinto engaphelele, nokuphrofetha kwethu akuphelele,

¹⁰kepha uma sekufika okupheleleyo lezozinto ezingaphelele ziyokhawuka.

¹¹Ngiseyingane ngakhuluma njengengane, umqondo wami wawungumqondo wengane, ngangilokhu ngicabanga njengengane. Lapho sengikhulile sengiyindoda ngase ngiyeka ukwenzisa okwengane.

¹²Manje sisabona izinto njengasesibukweni zibonakala kalufifi ziyinkinga, ngale siyozibona njengoba zinjalo. Manje ulwazi lwami aluphelele, kwelizayo ngiyokwazi konke kahle njengalokhu ingazi kahle iNkosi.

¹³Manje-ke kumi lezizinto ezintathu: ukukholwa nethemba nothando, kodwa okukhulu kulokhu uthando.

1 kwelaseKhorinte 14

Ukukhuluma ngezilimi nokuphrofetha

¹Shisekelani uthando, nilangazelele nezinye iziphiwo zoMoya oyiNgcwele, ikakhulu isiphiwo sokushumayela niphrofethe.

²Lowo okhuluma ngezilimi ukhuluma ebhekise kuNkulunkulu engaqondise kubantu. Akukho muntu omzwayo ukuthi uthini, ngoba lokho akukhulumayo eqhutshwa uMoya oyiNgcwele ukukhipha kuyinjula engaqondwa muntu.

³Kepha lowo ophrofethayo ukhuluma kubantu ukuze bakheke, baqungeke isibindi baduduzeke.

⁴Lowo okhuluma ngezilimi uyakheka emoyeni wakhe, kanti lowo ophrofethayo wenza ukuba kwakheke ibandla.

⁵Ngithanda sengathi ningakhuluma nonke ngezilimi, kodwa-ke ikakhulu sengathi nonke ningaba nesiphiwo sokuphrofetha. Ophrofethayo uyamedlula okhuluma ngezilimi, uma kungekho ozihumushayo, ibandla lonke lakheke.

⁶Manje-ke bazalwane kuyonisiza ngani ukuba ngifike kini ngikhuluma ngezilimi na? Ngalutho, ngaphandle kokuba ngifike ngikhulume kini lokho engikwambulelwe nguNkulunkulu, kumbe nginethulele ulwazi noma isiphrofetho noma isifundiso esithile.

⁷Umtshingo nogubhu nezinye izimfijoli ezingenamphfumulo zikhipha imvunge. Kuyokwazeka kanjani ukuthi kudlalwa yiphi imvunge, uma zingalehlukanisi iphimbo lazo na?

⁸Uma umuntu ekhalisa icilongo lingasasho ngephimbo elaziwayo, ngubani oyohloma aphume impi na?

⁹Nani-ke futhi, uma ningachachisi izinhlamvu enizikhuluma ngomlomo wenu, nithi abantu bayonizwa kanjani ukuthi nithini? Kuyofana nokuthi niyahhuma nje.

¹⁰Ziningi izilimi ezehlukeneyo ezikhulunywa emhlabeni, kodwa akukho lulimi okungase kuthiwe alusho lutho.

¹¹Kepha uma ngingalwazi ulimi olukhulunywayo, lowo okhulumayo uba ngowezizwe emehlweni ami, kanti futhi nami ungibuka angifanise nowezizwe.

¹²Nakini kunjalo. Njengoba nishiseka ngokwamukela iziphiwo zoMoya oyiNgcwele, ikakhulu khuthalelani lezo ezakhayo ebandleni.

¹³Umntu okhuluma ngezilimi makakhulekele ukuba akwazi nokuhumusha ukuthi lokhokukwitiza kuthini.

¹⁴Uma ngikhuluma ngezilimi ngithandaza, umoya wami uyakhuleka, kodwa ingqondo yami ayihlanganyeli kulokho.

¹⁵Uma kunje, kufanele kwenzekeni? Ngizokhuleka ngomoya, ngikhuleke nangokuqonda futhi, ngihube ngomoya wami, ngibuye ngihube nangokuqonda kwami.

¹⁶Uma ubonga udumisa uNkulunkulu ngomoya wakho, angavuma kanjani lomuntu oseyimfunda osenkonzweni asho uAmeni kulowomkhuleko wakho wokubonga na? Akanandlela yokwazi ukuthi wena uthini.

¹⁷Yize noma umkhuleko wakho wokubonga ungamuhle kangakanani, omunye akakheki nakancane.

¹⁸Ngiyambonga uNkulunkulu ngoba ngikhuluma izilimi nginedlule nonke.

¹⁹Kodwa uma ngisenkonzweni ngikhetha ukukhuluma ngokuqonda kwami amazwi abe yisihlanu ukuze kufunde nabanye, kunokuba ngikhulume ngezilimi inkulungwane yamazwi.

²⁰Bazalwane kuyekeni ukucabangisa okwezingane; yibani yizo izingane ekuxwayeni ububi, kodwa nikhule nibe badala ngemiqondo.

²¹Kulotshiwe embhalweni ongcwele kwathiwa: “USimakade uthi: ‘Ngiyokhuluma kulesisizwe ngisebenzise abantu bezilimi ezikwitizayo nezindebe zemilomo yabezizwe. Kodwa noma kunjalo asiyikungilalela engikushoyo.’ ”

²²Ngakhoke ukukhuluma ngezilimi kuyisibonakaliso esifakaza kwabangakholwayo, qhabo kulaba abakholwayo, kanti isiphiwo sokuphrofetha siqondene nabakholwayo, asiqondene nabangakholwayo.

²³Uma ibandla kwenzeka lihlangana ndawonye, bese wonke umuntu ekwitiza ngezilimi, kungene abaseyizimfunda enkolweni noma abangakholwayo, abayukusho yini ukuthi niyahlanya na?

²⁴Kodwa uma bonke bephrofetha, bese kungena umuntu ongakholwayo noma oseyimfunda, uyahlabeka ngokona kwakhe lapho elalele. Wehlulelwa yikho konke akuzwa kukhulunywa.

²⁵Imfihlo yemicabango yakhe ivezwa obala, abesequqa phansi edumisa uNkulunkulu evuma ukuthi uNkulunkulu ukhona ngempela phakathi kwenu.

Konke makwenziwe ngendlela efaneleyo

²⁶Yini-ke enye elandelayo bazalwane? Akuthi njalo nxa nihlangene, omunye aphaathe ihubo, omunye afundise, omunye ethule lokho akwembulelwe nguNkulunkulu, omunye akhulume ngezilimi, omunye eze nencazelo. Makwenziwe konke ukuze kwakheke ibandla!

²⁷Uma kukhona okhuluma ngezilimi, abakhulume babe babili noma babe bathathu bededelana, bese kuumusha oyedwa.

²⁸Kepha uma kungekho muntu ohumushayo, abathule du enkonzweni, bakhulume ngaphakathi babhekise kuNkulunkulu.

²⁹Akuphrofethe babe babili noma babe bathathu, kodwa abanye mabathule bahlulele lokho okushiwoyo.

³⁰Uma kukhona ohleziyo enkonzweni bese emukela umlayezo ovela kuNkulunkulu, lowo obesevele ekhuluma akanqamule inkulumo ame.

³¹Ningaphrofetha nonke ngokudedelana ngamunye ukuze bonke bafunde bakhuthazeke.

³²Ngoba umoya walowo ongumphrofethi uyamthobela.

³³Phela uNkulunkulu akayena uNkulunkulu wesiphithiphithi kepha ungowokuthula. Njengakuwo onke amabandla,

³⁴abesifazane abazoth bathule emabandleni, ngoba abakuvunyelwe ukukhuluma, kodwa abazehlise bathobe njengoba umthetho usho.

³⁵Uma kukhona abafuna ukukwazi abakubuze kubayeni babo besekhaya. Kuyihlazo ukuba umuntu wesifazane akhulume enkonzweni.

³⁶Asenicabanga yini ukuthi izwi leNkosi lavela kini na? Kumbe nithi leza kinina nodwa kuphela na?

³⁷Uma kukhona osezishaya umphrofethi kumbe ethi unesiphiwo soMoya oyiNgcwele, akaqonde kahle ngokusobala ukuthi engikulobileyo kungumyalo weNkosi.

³⁸Kepha uma engakushayi mkhuba lokhu, akanakwa lowo.

³⁹Ngakhoke bazalwane shisekelani ukuphrofetha, kodwa ningakunqabeli ukukhuluma ngezilimi!

⁴⁰Izinto zonke azenziwe ngesizotha nangendlela efaneleyo!

1 kwelaseKhorinte 15

Ukuvuka kukaKristu ekufeni

¹Ngithanda ukunikhumbuza bazalwane ngendaba emnandi enganishumayeza yona nayemukela, okugxile kuyo ukukholwa kwenu.

²Yilelivangeli enisindiswa ngalo uma ninamathela kulo njengalokhu ngalishumayela kini. Uma kungenjalo anisizakalanga, nokukholwa kwenu kwaba yize.

³Ngakudlulisela kini lokho engakubalula ukuthi kumqoka, nami engakwemukelayo, ukuthi uKristu wafa ngenxa yezono zethu njengoba kulotshiwe emibhalweni engcwele,

⁴nokuthi wambelwa, wavuka ekufeni ngosuku lwesithathu njengoba kulotshiwe emibhalweni,

⁵wabonakala kuKhefase, nakubaphostoli abayishumi nambili.

⁶Wabonakala kubazalwane abangamakhulu ayisihlanu ngesikhathi esisodwa, iningi labo elisaphilayo, noma kambe abanye sebalala.

⁷Wayesebonakala kuJakobe nakubo bonke abaphostoli.

⁸Ekugcineni wabonakala nakimi engingelutho, mina engifana nalowo okwaphuphuma isisu wazalwa singakafiki isikhathi.

⁹Ngoba ngiwutondo kubaphostoli, angifanele nokubizwa ngelomphostoli ngoba ngangihlupha ibandla likaNkulunkulu.

¹⁰Kepha ngenxa yomusa kaNkulunkulu ngiyilokho engiyikho, nomusa wakhe angenzele wona awuzange ube ngoweze. Kanti-ke mina ngisebenze kakhulu ngabedlula bonke abaphostoli, noma kwakungemina, kodwa kwakungumusa kaNkulunkulu abelokhu engenzela wona.

¹¹Akukhathaleki ukuthi kwasebenza bona noma mina, inqobo ukuthi yilo lelivangeli esilishumayelayo enalikholwayo.

Ukuvuka kwabafileyo

¹²Uma kushunyayelwa uKristu owavuswa kwabafileyo, bakusho kanjani abanye benu ukuthi akukho ukuvuka kwabafileyo na?

¹³Uma kungekho kuvuka kwabafileyo, kusho ukuthi uKristu akakaze avuswe.

¹⁴Kodwa uma uKristu engakaze avuswe, ukushumayela kwethu kuphenduka imfeketho, nokukholwa kwenu kube yize.

¹⁵Bese sitholakala simqambela amanga uNkulunkulu uma sithi wavusa uKristu engazange amvuse — uma ngempela kuyiqiniso ukuthi abafileyo kabavuswa.

¹⁶Ngoba uma abafileyo bengenakuvuswa, kunjalo-ke noKristu akavuswanga.

¹⁷Kodwa uma uKristu engazange avuswe, ukukholwa kwenu kuyiwuwa, nisahlezi ezonweni zenu.

¹⁸Uma kunjalo kusho ukuthi babhubha laba asebalala ubuthongo bafela kuKristu.

¹⁹Uma ithemba lethu esibambelela ngalo kuKristu kuyileli eliphelayo ligcine kulokhukuphila, sifanele ukudatshukelwa kakhulu thina kunabo bonke abantu.

²⁰Kodwa manje uKristu uvusiwe kwabafileyo, uyingqalabutho yabaleleyo.

²¹Ukufa kweza ngomuntu, kunjalo nokuvuka kwabafileyo kweza ngaye umuntu.

²²Njengoba befa bonke ngoba bevela kuAdamu, kunjalo ngoKristu bayovuka bonke baphile.

²³Bayovuka yilowo nalowo ngesigaba sakhe: kwaqala ngoKristu oyingqalabutho, sekuyolandela abakaKristu ngenkathi yokubuya kwakhe.

²⁴Bese kufika umhla wokuphela, lapho uKristu eyokwethula khona umbuso kuNkulunkulu uYise eseyichithile yonke imimoya ebusayo nephethe ubukhosi namandla.

²⁵Usazobusa njalo aze azinyathele zonke izitha zakhe.

²⁶Isitha sokugcina esiyobhujiswa ngukufa.

²⁷Imibhalo engcwele ithi: “Wazihlela zonke izinto wazithobisa zaba phansi kwezinyawo zakhe.” Kusobala ukuthi lapho kuthiwa “zonke izinto” akabaliwe uNkulunkulu uqobo lwakhe, owabeka zonke izinto zaba phansi kukaKristu.

²⁸Lapho izinto zonke sezibekwe phansi kweNdodana, yona uqobo lwayo iyozihlela phansi kukaNkulunkulu, owabeka zonke izinto wazihlela phansi kwayo. UNkulunkulu abesebusa jikelele phezu kwakho konke.

²⁹Uma ngempela abafileyo bengavuki, pho bahlose ukufezani lababantu ababhabhadiselwa ababo abafileyo na? Basabhabhadiselwa abafileyo ngasizathu sini na?

³⁰Thina-ke, kungani ukuba silengele eweni yonke imizuzu na?

³¹Bazalwane, iqholo enginalo ngani ebunyeni bami noKristu Jesu iNkosi yethu liyangifakazela ukuthi ngikhuluma iqiniso uma ngithi ngibhekana nokufa imihla ngemihla.

³²Lapha Efesu ngalwa nabantu abanonya lobulwane . Bekuyongisiza ngani ukuba ngikwenze lokhu, kanti ngicabangisa okwabantu balomhlaba abathi abafileyo abayikuvuka na? Uma kunjalo, asilandele isaga esithi: “Asidle siphuze, ngoba ngomuso siyokufa!”

³³Ningalutheki! “Ukujwayelana nabantu bemikhuba emibi kungcolisa izimilo ezinhle.”

³⁴Ake niphaphame nibuyele emqondweni osileyo wokulunga ningabe nisona. Kukhona phakathi kwenu abantu abangamazi uMvelinqangi, ngalokho-ke ngithi aninamahloni ninehlazo.

Umzimba abavuka nawo abafileyo

³⁵Omunye angahle abuze athi: “Abafileyo bavuswa kanjani na? Umzimba abavuka nawo unjani na?”

³⁶Siphukuphukundini! Lokho okuhlwaneyelayo kungeqhume kuphile uma kungaqalanga kwafa.

³⁷Lokho okuhlwaneyelayo akusona isithombo esisazomila, kepha kuyinhlamvu engakaqhami, mhlawumbe kakolweni noma olunye uhlobo lwembewu.

- ³⁸UMvelinqangi nguyena oqhumisa imbewu ibe yisithombo ngokuqoka kwakhe, uhlamvu lwembewu lulunye uluhlumisa lube yilesosithombo asibona sifanele.
- ³⁹Imizimba yakho konke okuphilayo ayakhiwe ngesicubu esifanayo. Abantu banohlobo olulodwa lwesicubu, izilwane zinokunye ngokwazo, izinyoni zinohlobo lwazo, izinhlanzi zinohlobo lwazo zodwa.
- ⁴⁰Kukhona izikhanyiso zasemkhathini nezinto zasemhlabeni. Ubuhle bezikhanyiso ezisesibhakabhakeni behlukile ebuhleni balezozinto ezisemhlabeni.
- ⁴¹Inhlamvu yelanga ikhangisa ubuhle balo, inyanga yehlukile ngobayo ubuhle, izinkanyezi ziqhakaza ngobuhle obungandile, kanti zona zizodwa zilokoza zehlukane.
- ⁴²Kuyoba kanje nangamhla abafuleyo bevukayo bephila. Lowomzimba ombelwayo usuke ungofayo, kuthi lapho usuvuswa kwabafuleyo ube ongafiyo.
- ⁴³Uma usumbelwa uba mubi udeleleke, kodwa lapho usuvuswa uba muhle ukhange. Kumbelwa umzimba obuthakathaka, lapho usuvuswa uyoba umzimba oqatha.
- ⁴⁴Ugqitshwa ungumzimba wemvelo okade unomphefumulo, kodwa lapho usuvusiwe uba ngumzimba ongumoya. Njengalokhu kukhona umzimba wemvelo onomphefumulo, kukhona nomzimba ongumoya.
- ⁴⁵Uqonde lokhu umbhalo ongcwele lapho uthi: “Umuntu wokuqala, uAdamu, waphefunyulelwa waphila,” kepha uAdamu wokugcina waba nguMoya ophilisayo.
- ⁴⁶Akuqalisanga ngalokho okungumoya kepha kwaqalisa ngalokho okungokwemvelo okunomphefumulo, kanduba kulandele okungumoya.
- ⁴⁷UAdamuwokuqala owayebunjwe ngomhlabathi wavela emhlabeni. UAdamu wesibili wavela ezulwini.
- ⁴⁸Labo abangabomhlaba bafuze lowo owabunjwa ngomhlabathi, labo abangabezulu bafuze lowo owavela ezulwini.
- ⁴⁹Njengoba silugqokile ufuzo lwalomuntu owenziwa ngomhlabathi, kanjalo siyolwembatha ufuzo lwalomuntu ongowasezulwini.
- ⁵⁰Engiqonde ukunitshela khona bazalwane ukuthi okuyinyama negazi kungeke kwalidla ifa lombuso kaNkulunkulu, okubolayo kungeke kulidle ifa lokungaboli.
- ⁵¹Ake nginitshela nansi imfihlakalo! Asiyukulala sonke, kodwa thina sonke siyoguqulwa
- ⁵²ngomzuzwana owodwa, ngokuphazima kweso, lapho icilongo likhala ngomhla wokuphela. Liyokhala icilongo, abafuleyo bavuke bengenakuphinde bafe, nathi sonke siyoguqulwa.

⁵³Lokhu kwemvelo ebhubhayo kumele kuguqulwe kube okwemvelo engabhubhiyo; lemvelo efayo ibe ngengafiyo.

⁵⁴Uma lokhu kwemvelo ebhubhayo sekuguqulwe kwaba okwemvelo engabhubhiyo, nalemvelo efayo yaba ngengafiyo, kuyogcwaliseka umbhalo ongcwele othi: “Ukufa kuchithiwe kwanqotshwa.”

⁵⁵“We kufa, kuphi ukunqoba kwakho na? We kufa, luphi udosi lwakho na?”

⁵⁶Udosi lokufa yisono, isono sithola amandla emthethweni.

⁵⁷Akabongwe uNkulunkulu osinqobisa ngeNkosi yethu uJesu Kristu!

⁵⁸Ngakhoke bazalwane bami abathandekayo, yimani niqine ningavumi ukunyakaziswa, nikhuthale njalo emsebenzini weNkosi uJesu, nazi ukuthi isithukuthuku senu asichithekeli ubala lapho nisebenzela iNkosi.

1 kwelaseKhorinte 16

Umnikelo oqoqelwa abazalwane baseJerusalema

¹Mayelana nomnikelo oqoqelwa abazalwane baseJerusalema, kuhle niwuqoqe njengoba ngalayeza nasemabandleni aseGalathiya ukuba nawo enze njalo.

²Akube yilowo nalowo anikele ngangokubusiseka kwakhe ngosuku lwangeSonto, imali ikhwezwe, ukuze kunganikelwa ngoba sengize ngafika.

³Ekufikeni kwami ngiyobaphathisa izincwadi abayoziveza phambili labo eniyobaqokela uhambo, bese ngibathuma ukuba bahambise isipho senu eJerusalema.

⁴Uma kudingekile ukuba ngihambe mathupha, kulungile bangangiphekezela.

UPawula uhlela uhambo

⁵Ngiyotheleka lapho kini emva kokudabula kwelaseMasedoniya — ngoba ngihlose ukunqamula kwelaseMasedoniya.

⁶Mhlawumbe ngiyongenisa kini, noma ngihlale kini ubusika bonke, ukuze ningisize ukuba ngiqhubeke nohambo lwami lapho ngiyolibhekisa khona.

⁷Bengingathandi okwamanje ukuba nginithi nhla bese ngedlula; bengifisa sengathi ngingake ngithi ukuhlala nani uma iNkosi ivuma.

⁸Ngisazohlala kodwa lapha Efesu kuze kushaye umkhosi wePhentekhoste,

⁹ngoba ngivulekelwe yisikhala esibanzi sokuba ngingene ngisebenze kabanzi, yize noma izitha ziziningi kangaka.

¹⁰Uma uThimothi efika lapho anomenza ancibilike phakathi kwenu, ngoba usebenza umsebenzi weNkosi uJesu njengami.

¹¹Akangadelelwa muntu! Uma esehamba mvaleliseni kahle ngokuthula, ngoba ngimlindlele ukuba afike lapha kanye nabazalwane.

¹²Umzalwane wethu uApholo ngangimkhuthazile ukuba eze kanye nabazalwane bazonibona, kodwa bekungeyona neze inhloso yakhe ukuba eze manje. Uyofika uma ithuba livela.

Isicelo sokugcina nokuvalalisa

¹³Qaphani nime nigxile enkolweni, nime isibindi, nibe namandla!

¹⁴Kwenzeni konke ngothando!

¹⁵Bazalwane, niyabazi abomndeni wakoStefana ukuthi bayingqalabutho yamaKristu aphenduka kwelaseAkhaya. Bazinikele ukuba basize abazalwane. Ngiyaninxusa bakwethu

¹⁶ukuba nithobele ubuholi babantu abanjalo, nabo bonke abasebenzayo bethwalisene nabo.

¹⁷Ngename kakhulu ngokufika kukaStefana noFothunathu noAkhayikho. Basivalile isikhala sesizungu senu,

¹⁸bangizimazisa njengoba nani bebenethabisa. Nize nibahloniphe abantu abanje.

¹⁹Ayakhonza amabandla aseAsiya. Ngegama leNkosi uJesu bayakhonza oAkhwila noPhrisila kanye nebandla elibuthana kwabo.

²⁰Abazalwane bonke bayakhonza. Nize ningikhonzele nibingelelane ngokwanga kwabakholwayo!

²¹Mina Pawula ngiloba lomkhonzo ngesandla sami mathupha.

²²Uma kukhona umuntu ongayithandiyo iNkosi uJesu, akaqalekiswe!

Marana tha — woza, Nkosi yethu!

²³Salani nomusa weNkosi uJesu!

²⁴Uthando lwami luhlala nani nonke ngoKristu Jesu. Amen.

2 kwelaseKhorinte

2 kwelaseKhorinte 1

Isibingelelo

¹Lencwadi ilotshwe yimina Pawula engathunywa ngokwentando kaNkulunkulu ngaba umphostoli kaKristu Jesu; ivela nakumzalwane uThimothi. Ilotshelwe ibandla likaNkulunkulu laseKhorinte nabo bonke abangcwele abakhe kulo lonke elaseAkhaya.

²Sinifisela umusa nokuthula okuvela kuNkulunkulu uBaba naseNkosini uJesu Kristu.

Ukubonga kukaPawula esedlule ezinhluphekweni

³Akabongwe uNkulunkulu uYise weNkosi yethu uJesu Kristu, uBaba osenzela ububele, uNkulunkulu okuvela kuye yonke induzozo!

⁴Kuzo zonke izinkathazo zethu uyasikhuthaza asiduduze, ukuze nathi sikwazi ukusiza abanye ngayo lendlela esasizwa sakhuthazwa ngayo nguNkulunkulu.

⁵Njengoba sihlanganyela ezinhluphekweni eziningi zikaKristu, kanjalo sihlanganyela ngoKristu nasosizweni olukhulu uNkulunkulu asiduduzwa ngalo.

⁶Nxa sihlupheka, sihluphekela ukuba nikhuthazwe nisindiswe; uma siduduzwa, nani niyakhuthazwa nithole amandla okuba nibekezelele ngesineke zona lezonhlupheko esizithweleyo.

⁷Ithemba esigabe ngalo mayelana nani liqinile. Siyazi ukuthi njengoba nihlanganyela ezinhluphekweni zethu, niyohlanganyela nasosizweni esiduduzwa ngalo.

⁸Ake sinikhumbuze bazalwane ngenkathazo esanqwamana nayo kwelaseAsiya. Sasindwa ubunzima obase bungaphezu kwamandla ethu okubekezela, saze sadela ukuthi sisayobuye siphile.

⁹Ithunzi lokufa salizwa saba njengabanqunyelwe ukufa. Kepha kwenzeka lokhu ukuze singazethembi thina, kodwa sethembe uNkulunkulu ovusa abafileyo.

¹⁰Wasophula lapho ukufa sekuthi akusigwinye, futhi usayosisindisa. Sibeke ithemba kuye lokuthi usayosisindisa nangomuso,

¹¹njengoba nisisiza ngemikhuleko yenu. Imithandazo yabangingi abasithandazela yona isayophendulwa, uNkulunkulu bese esibusisa. Baningi abayosibongela kuye.

Ukulehla kohambo lukaPawula

¹²Siyazincoma ngonembeza wethu ofakazayo ukuthi ukuziphatha kwethu kulomhlaba, ikakhulu ubudlelwane obuphakathi kwethu nani, bebubuswa ubuqotho neqiniso lonke elivela kuNkulunkulu, kungengakuhlakanipha kwamuntu kepha ngomusa kaNkulunkulu.

¹³Sinilobela kuphela lokho enikwazi ukuzifundela khona nikuqonde. Ngiyethemba ukuthi kuyonifikela ukuba nikuqonde ngokupheleleyo lokhu

¹⁴enikuqonda ingxenye okwamanje: ukuthi niyozigabisa ngathi ngomhla wosuku lweNkosi yethu uJesu, njengoba nathi siyoba neqholo ngani.

¹⁵Ngangisethembeni lalokhu ngaze nganquma ukuba ngihambele nina kuqala, ukuba nibusiseke okwesibili.

¹⁶Nganginqume ukuba nginihambele ngedlule kini mhla ngibange kwelaseMasedoniya nalapho sengibuya, ukuba ningisize endleleni yami ebheke kwelaseJudiya.

¹⁷Nithi nganginqikaza yini lapho ngenza lesisinqumo na? Uma ngisuke ngenza izinqumo zami, nithi ngingugombela kwesakhe, ukuba sengingathi “yebo”, ngibuye ngithi “qha” khona lapho na?

¹⁸Ngifunga ngiyagomela phambi kukaNkulunkulu othembekileyo ngithi ngesikhathi sikhuluma kini asizange sibe ngombaxambili abathi “yebo” babuye bathi “qha”.

¹⁹UJesu Kristu, iNdodana kaNkulunkulu eyashunyayelwa kini nguSilasi noThimothi kanye nami, akayena othi “yebo” abuye athi “qha”, kepha kuyena kunguyebo kuphela.

²⁰NgoKristu kuthiwa “yebo”, kuqiniswe zonke izethembiso zikaNkulunkulu. Kungakho sisho uAmeni ngoJesu Kristu ukuba kudunyiswe uNkulunkulu.

²¹Owenza ukuba thina kanye nani sigxile kuKristu, nguyena uNkulunkulu. Usahlukanisele yena,

²²wasishaya uphawu lokuthi singabakhe, wasipha uMoya oyiNgcwele ezinhliziyweni zethu, oyisibambiso sakho konke akugcinele thina.

²³Ngibiza uNkulunkulu ukuba ngifakazise ngomphefumulo wami ukuthi ngangiphephisa nina njengoba ngingayanga eKhorinte.

²⁴Kasinifaki ngekhandla ekukholweni; esikhundleni salokho sisebenzelana nani ekuthokozeni kwenu ngoba nimi nigxilile ngokukholwa.

2 kwelaseKhorinte 2

¹Nganquma ukuba nginganikhathazi imimoya lapho sengiphinda nginivakashela.

²Uma nginidabukisa sengobuye ngijatshuliswe ngubani ngaphandle kwenu nina kanye enginibangela umunyu na?

³Ukuze ngibhale kanjeyana kwakungesizathu sokuthi ngangingathandi ukuthi nxa ngifika bangephule umoya labo ebebefanele ukungijabulisa. Bengihleli njalo nginethembile ukuthi nani nithokoza ngokuthokoza enginakho.

⁴Ngaloba ngenkathi ngikhathazeke kakhulu emoyeni, nginobuhlungu nemvula yezinyembezi, ngingahlosile ukunidabukisa kepha ukuba nikwazi ukujula kothando enginithanda ngalo.

Ukuthethelelwa komoni

⁵Kukhona omunye kini odabukise abanye. Akangikhathazanga mina kodwa unikhathazile nonke. Ukuze ngingakhulumi ngeqise, angithi ubadabukisile abanye benu ngandlela thile.

⁶Iningi lebandla limjezise kahle lomuntu sekwanele.

⁷Kodwa-ke salani senimthethelela nimduduze angaze eqiwe kakhulu usizi lwenhliziyo.

⁸Nginyanincenga-ke ukuba nikhombise ukuthi niyamzwela nimthande.

⁹Yingakho nginilobele nje nce nginihlole ukuthi umthetho wenu niyalalela yini kukho konke noma qha.

¹⁰Enimthethelelayo nami futhi ngiyamthethelela. Ngimthethelele uma bekukhona engingamthethelela kukho. Lokhu ngikwenzele nina phambi kukaKristu,

¹¹ukuze uSathane angasizakali ngathi, ngoba sihlezi nje asibulibele ubuqili aphezu kwabo.

UPawula ukhathazeka emzini waseTrowa

¹²Kuthe lapho ngifika eTrowa ukuba ngishumayeke khona indaba emnandi elanda ngoKristu, ngafica umnyango usuvulekile ukuba ngisebenzele iNkosi,

¹³kodwa umoya wami awukhululekanga ngoba ngingamtholanga umzalwane uThithusi lapho. Ngase ngivalelisa kwabalapho ngaya eMasedoniya.

Singabathunjwa bakaKristu onqobayo

¹⁴Akabongwe uNkulunkulu osinqobile wasithumba wemuka nathi! Njengoba sisebunyeneni noKristu usihola njalo asisebenzise ukuba yonke indawo kwande ulwazi ngoKristu lube ngamakha amnandi.

¹⁵Siyiphunga likaKristu elithaphuka kamnandi lethulwe kuNkulunkulu, linukele abasindiswayo nababhubhayo.

¹⁶Ababhubhayo libanukela kabi livimbanise libulale, kodwa kwabasindiswayo lithaphuka kamtoti baphile. Ngubani ofanele ukuthwala lomsebenzi na?

¹⁷Thina asifani nabaningi abadlala ngezwi likaNkulunkulu badle ngalo, kepha njengoba uNkulunkulu esithumile sikhuluma ngeqiniso lonke phambi kwakhe siyizinceku zikaKristu.

2 kwelaseKhorinte 3

Izinceku zesivumelwano esisha

- ¹Ngabe sesiyazincoma yini futhi ngokusho njalo? Kumbe njengabanye sidinga izincwadi ezisincomayo eziya kini noma ezivela kini na?
- ²Nina niyincwadi yethu elotshwe ezinhliziyweni zethu ukuba yaziwe ifundwe yibo bonke abantu.
- ³Kukhanya ngokusobala ukuthi niyincwadi kaKristu eyavela ngokusebenza kwethu. Ayilotshwanga ngosiba kepha yalotshwa ngoMoya kaNkulunkulu ophilayo. Ayiqoshwanga ezibhebheni zamatshe kepha yalotshwa ezibhebheni zezinhliziyi zabantu.
- ⁴Sinaleliqholo ngoba sethamba uNkulunkulu osipha amandla ngoKristu.
- ⁵Akukho lutho esingaziqhayisa ngalo sithi lungolwethu, kodwa amandla ethu okwenza utho avela kuNkulunkulu.
- ⁶Nguye owasipha amandla okuba sibe yizinceku kulesisivumelwano esisha esingesona esomthetho olotshwe phansi kodwa esoMoya, ngokuba umthetho olotshwe phansi uyabulala, kodwa uMoya uyaphilisa.
- ⁷Lomthetho obanga ukufa weza uqoshwe ezibhebheni zamatshe okwabonakala ngawo isimangaliso senkazimulo kaNkulunkulu. AbakwaIsrayeli baze bakhophoza behluleka ukugqolozela ubuso bukaMose ngenxa yenkazimulo eyabuye yafiphala.
- ⁸Buyoba bukhulu ngokwesabekayo kunalokhu ubukhazikhazi balenkonzolethwa uMoya oyiNgcwele!
- ⁹Inkonzo yomthetho olahla ngecala ikhexisa umlomo ngobuhle bayo, kodwa lenkonzo ethetha ngecala iyedlulela kakhulu ngokubabazeka kwayo.
- ¹⁰Inkazimulo leyo okwakuthiwa iyababazeka isifiphele, ngeke isaqhathaniswa ubuhle bayo nalenkazimulo eyedlulele kakhulu.
- ¹¹Lokho okufiphalayo kweza kunenkazimulo; lungakanani-ke udumo lwalokho okumiyo phakade!
- ¹²Njengoba simi kulelothemba sikhuluma ingcaca kube sobala.
- ¹³Asilingisi uMose owagubuzela ubuso bakhe ngesambozo ukuba abakwaIsrayeli bangayigqolozeli lapho isifiphala inkazimulo yobuso bakhe.
- ¹⁴Kepha baba namakhanda alukhuni, ababe besezwa. Kuze kube namhlanje bayawufunda umthetho wesivumelwano esidala kepha isambozo sisekhona, asikembulwa ebusweni babo, ngoba sisuswa kuphela kulabo abakuKristu.
- ¹⁵Kuze kube namhlanje kuthi lapho befundelwa umthetho kaMose isambozo sibe silokhu sithe mbo ezinhliziyweni zabo.
- ¹⁶Kodwa uma umuntu ephendukela eNkosini isambozo siyasuswa.

¹⁷Manje-ke iNkosi iyiwo uMoya, njalo-ke lapho kukhona khona uMoya weNkosi, kukhona inkululeko.

¹⁸Thina sonke esibuso bethu bungasitheziwe ngesambozo siyayikhangela inkazimulo yeNkosi njengasesibukweni, siyaguqulwa ukuba sifuze umfanekiso wakhe, ngenkazimulo eya ngokuya yedlulele kakhulu. Lokhu kwenziwa yiNkosi enguMoya oyiNgcwele.

2 kwelaseKhorinte 4

Ingcebo esingethwe ezitsheni zobumba

¹Ngakhoke njengoba sesinayo lenkonzo ngesihe sikaNkulunkulu, asidikibali.

²Siziyekile izindlela zamahlazo asesithe, asabe sisaziphatha ngobuqili kumbe sihlanekezele izwi likaNkulunkulu, kodwa silibeka obala iqiniso ukuze sincomeke kunembeza wawo wonke umuntu naphambi kukaNkulunkulu.

³Yize noma lendaba emnandi esiyishumayelayo igubuzelwe, kodwa isithakele kuphela kulabo ababhuhayo.

⁴USathaneobusa lomhlaba usuke waphuphuthekisa imiqondo yabangakholwayo, ebavimba ukuba bangakuboni ukukhanya okuvela evangelini elikhuluma ngenkazimulo kaKristu, okunguyena ofuze uNkulunkulu.

⁵Kasizishumayeli thina, kepha sishumayela uJesu Kristu ukuthi uyiNkosi, thina-ke siyizinceku zenu ngenxa kaJesu.

⁶UNkulunkulu owakhuluma wathi: “Akukhanye ukukhanya ebumnyameni,” nguye okhanyise ezinhliziyweni zethu kwaqhakaza ulwazi ngenkazimulo yobukhosi bukaNkulunkulu esebusweni bukaKristu.

⁷Thina esisingethe lengcebo siyizitsha zobumba, okutshengisa khona ukuthi lawamandla adlula ukwenza, angakaNkulunkulu awasiwo awethu.

⁸Simpintshekile nxazonke kodwa asipitshiki, sikhathazekile kodwa asidangele,

⁹siyahlushwa kodwa asishiyiwe, siqumbeke phansi kepha asibhuhile.

¹⁰Sihlezi sithwele emizimbeni yethu lokhokufa uJesu akufayo, ukuze ukuphila kukaJesu kubonakaliswe emizimbeni yethu.

¹¹Ngenkathi sisaphila silokhu sinikelwa njalo ekufeni ngenxa kaJesu, ukuze ukuphila kukaJesu kubonakaliswe kulobubuntu bethu obufayo.

¹²Kithina kusebenza kanjalo-ke ukufa emizimbeni yethu, kodwa kinina kusebenza ukuphila.

¹³Embhalweni kuthiwa: “Ngangikholwa kungakho ngakhuluma nje.” Nathi futhi njengoba sinawo lowomoya wokwethemba siyakholwa, kungakhoke sikhuluma nje.

¹⁴Siyazi nokuthi uNkulunkulu owavusa iNkosi uJesu ekufeni uyosivusa nathi kanye noJesu aze asethule phambi kobuso bakhe kanye nani.

¹⁵Konke lokhu kwenziwa ngenxa yenu yikhona lomusa kaNkulunkulu uzobelokhu uya ngokuya wanda kubantu, uchumise kubo umoya wokubonga, kudunyiswe uNkulunkulu.

Ukuphila ngokukholwa

¹⁶Ngakhoke asidikibele noma sibukeka singababhuhayo ngengaphandle lethu, kodwa nokho siyacandulwa ingaphakathi lethu imihla ngemihla.

¹⁷Lokhukuhluphekana okuncane esidlula kukho kungokomzuzwana nje, kulungisela thina leyonkazimulo yafuthi engelinganiswe nalutho, eyedlula bonke ubukhosi obukhona.

¹⁸Thina asibhekile kulezozinto ezibonwa ngamehlo, kepha sibheke lezo ezingebonwe, ngoba izinto ezibonwayo zingezomzuzwana nje, kepha ezingebonwe zingezafuthi.

2 kwelaseKhorinte 5

¹Siyazi ukuthi uma kudilika idlangala elingumzimba wethu esihlala kulo lapha emhlabeni, sinenye indlu evela kuNkulunkulu, isakhiwo esingazange sibunjwe ngezandla, singesaphakade kweliphezulu.

²Lapho sisahlezi kulelidlangala siyabubula silangazelela ukungena phansi kophahla lwendlu yethu yasezulwini,

³khona kuyothi nxa sesiyihlezi lendlu singatholakali sinqunu.

⁴Lapho sisahleli kulelidokodo emhlabeni sibubula ngobuhlungu, ngoba asifuni ukuhlubula singembathi, kodwa sifuna ukweleka ngesevatho sasezulwini ukuba okomhlaba okufayo kuguqulwe yilokho okuphilayo.

⁵NguNkulunkulu ohlele ukuba siguqulwe kanje, wasipha uMoya wakhe oyiNgcwele oyisibambiso salokho okuzayo.

⁶Simi isibindi njalo, siyazi ukuthi uma sisekulomzimba ofayo siqhelelene neNkosi.

⁷Siphila ngokukholwa asethembeli kokubonwayo.

⁸Sigcwele isibindi. Ngokwethu siqoma ukuwushiya lomzimba siye kwethu sifike sihlale neNkosi.

⁹Yingakho siphokophelele umgomo wokumjabulisa, noma sisahlezi kulomzimba wethu noma sesiwushiyele.

¹⁰Siyovela sonke esigcawini sikaKristu sahlulelwe, yilowo nalowo emukeliswe okumfaneleyo, kuye ngokuthi wenzeni lapho esaphila emhlabeni, okuhle noma okubi.

Inkonzo yokubuyisana

¹¹Ngakhoke njengoba sikwazi ukuthi kuyini ukuyesaba iNkosi siyabancenga abantu ukuba bakholwe. Lokhu esiyikhona kusobala phambi kukaNkulunkulu. Ngethemba ukuthi saziwa ngokusobala nakonembeza benu.

¹²Akusho ukuthi sizama ukuzenza bahle kinina, kodwa sininikeza ithuba lokuzigabisa ngathi ukuze nikwazi ukubaphendula labo abagabe ngezinto ezibonwa ngamehlo kunezinto ezisenhliziyweni.

¹³Uma kusengathi siyagcwaneka, akunani ngoba sigcwanekela uNkulunkulu, uma siphila nse engqondweni kusalungile siphilela nina.

¹⁴Uthando lukaKristu luyasikhapheza ngoba uyasikhanyela lombono wokuthi oyedwa nguyena owabafelayo bonke; ngakhoke bafa bonke.

¹⁵Wabafela bonke ukuze abaphilayo bangabe besaziphilela bona, kepha baphilele lowo owafa wavuswa ngenxa yabo.

¹⁶Kusukela manje akukho muntu esisazombuka ngokubuka kwabantu balomhlaba. Yize nathi sake sambuka uKristu ngamehlo abantu balomhlaba, asisakwenzi manje.

¹⁷Ngakhoke uma umuntu ekuKristu uphenduka isidalwa esisha, okwakuqala sekudlulile, awubheke nje: sekuguqulwe kwakusha.

¹⁸Konke lokhu kuvela kuNkulunkulu owathelelana nathi amanzi ngoKristu, wasinika inkonzo yokubuyisana.

¹⁹UNkulunkulu wakwenza ngoKristu ukuba abuyisane nabantu bomhlaba, angabe esababalela izono zabo. Wasilayeza ukuba silizwakalise izwi lokubuyisana.

²⁰Thina singamanxusa kaKristu; sikhulumela uNkulunkulu lapho sininxusa egameni likaKristu sithi: “Buyisanani noNkulunkulu!”

²¹UKristu ongazange azi sono, uNkulunkulu wamthwalisa lonke icala lethu wamenza waba yisono, ukuba ngaye sithethwe yicala, thina sibe ngukulunga kukaNkulunkulu.

2 kwelaseKhorinte 6

¹Siyanincenga thina zinceku zikaNkulunkulu esisebenzelana naye ukuba ningawemukeli umusa kaNkulunkulu nidlale ngawo.

²Uthi: “Ngakuzwela ngesikhathi esikahle, ngakusiza ngosuku lwensindiso.” Qaphelani, manje sekuyisikhathi esihle! Impela sekuwusuku lwensindiso.

³Akukho lutho esifuna ukukhubekisa ngalo abantu, hleze igxekwe inkonzo yethu.

⁴Siphumela obala siziveze ukuthi thina siyizinceku zikaNkulunkulu ngazo zonke izindlela, ngokubekezela okukhulu osizini nasebunzimeni nasezigamekweni ezisehlelayo.

⁵Siyadindwa, siboshwe ejele, siqubukelwe yizibhelu. Sikhandleka kanzima, kuze kuse siqwashile, siphathwa yiphango.

⁶Sihamba ngokuhlanzeka nangolwazi, sinyamezela, simnene njalo. Konke lokhu sikwenza ngamandla oMoya oyiNgcwele, sikhombise uthando olungazenzisiyo,

⁷silikhuluma njalo iqiniso, sibonakalisa amandla kaNkulunkulu. Ukulunga kuyisikhali sethu esisixhaka kwesokudla, nesihlangu sethu sokuvika kwesokunxele.

⁸Siyaye sihlonishwe kodwa sibuye sihlazeke, siyaye singcofwe, sibuye futhi sinconywe. Kuthiwa sihubhuza amanga kepha sibe sikhuluma iqiniso.

⁹Bashaya sengathi kabasazi kodwa bebe besazi kahle nje; kuba sengathi siyafa kodwa nakhu siphila saka. Sithwansulwa ngoswazi kodwa akusibulali,

¹⁰silusizi kodwa sihlala senamile, simpofu kepha sicebisa abaningi, sibuswezi kodwa sinakho konke.

¹¹Bakwethu baseKhorinte sikhulume ngokusobala kini sanivulela izinhliziyi zethu.

¹²Asinigodlelanga uthando lwethu, kodwa nisigodlele olwenu.

¹³Ukuze izandla zigezane, ngiyaneluleka nina njengabantabami ngithi vulani izinhliziyi zenu.

Niyithempeli likaNkulunkulu ophilayo

¹⁴Ningalingi nihambisane nabangakholwayo! Kuhlenganaphi ukulunga nokungalungi na? Buphi ubudlelwane phakathi kokukhanya nobumnyama na?

¹⁵Kukhona yini ukuzwana phakathi kukaKristu noBheliyali na? Utholanaphi umuntu okholwayo nongakholwayo na?

¹⁶Lihlenganaphi ithempeli likaNkulunkulu nonkulunkulumbumbulu na? Ngokuba thina siyithempeli likaNkulunkulu ophilayo, njengoba uNkulunkulu athi: “Ngiyohlala nabo ngihambe phakathi kwabo ngibe uNkulunkulu wabo, bona babe ngabantu bami.”

¹⁷Ibisithi iNkosi: “Ngakhoke phumani niphele phakathi kwabo, ningaphathi lutho olungcolileyo ngesandla

¹⁸khona ngiyonamukela ngibe nguyihlo kini, nina niyoba ngamadodana namadodakazi ami. Ukhulumile uSimakade uMninimandla.”

2 kwelaseKhorinte 7

¹Njengoba sesizamukele lezizithembiso bakwethu, ake sihlambulule konke okungcolisa umzimba nomphefumulo simesabe uNkulunkulu sibe ngcwele sahlukaniselwe yena ngokupheleleyo.

UPawula uthokozela ukuzisola kwabo

- ²Ake nisiphenyele indawo ezinhliziyweni zenu. Akukho muntu esimonile samkholisa, akekho futhi nesike samqinela.
- ³Angikusho lokhu ukuba nginilahle. Phela ngike ngasho phambilini ukuthi nibakhulu ezinhliziyweni zethu sifa nani siphile nani.
- ⁴Ngiqina idolo ngani, ngiqhoshile ngani, ngizwa ngiduduzeka ngani, kungakho ngiphuphuma injabulo yize siphethwe yizinhlopheko.
- ⁵Kwale noma sesifike kwelaseMasedoniya, imizimba yethu yangakuthola ukuphumula. Salokhu sikhathazeke nxazonke, silokhu siyibambile impi phandle, siphethwe yitwetwe ezinhliziyweni.
- ⁶Nokho uNkulunkulu oyaye aduduze abadangeleyo wasiduduzisa ngokufika kukaThithusi,
- ⁷kungeyikho ukuza kwakhe lapha kuphela kodwa nangokududuzeka akuthola lapho kini. Wayizeka kithi eyokulangazela kwenu nokulila kwenu, nokuthi nisha amashushu niyangisekela. Lokho kwangenza ngathokoza kwedlulela.
- ⁸Angizinyezi ngokuthi nganilimaza imimoya ngencwadi engayilobayo. Noma phela kwabuye kwasika kimi, sekuyangikhanyela ukuthi leyancwadi yami yanidabukisa, kodwa nokho kwasheshe kwadlulisa.
- ⁹Kumanje nje ngiyajabula, akungoba nganibangela umunyu, kodwa ngoba kwathi ukuba nidabuke nase niyaphenduka, ngoba lolusizi enaluzwayo kwakungolukaNkulunkulu, ngakho asizange sinenze okubi thina ngokwethu.
- ¹⁰Usizi oluvela kuNkulunkulu ludala ukuphenduka okuholela ekusindisweni, okungalandelwa nsolo, kodwa uma usizi lungolomhlaba, luyabulala.
- ¹¹Ake nibheke ukuthi lolusizi enaluzwiswa nguNkulunkulu selunenze nazimisela kangakanani ukuzikhipha ecaleni, nacasuka, nethuka, nalangazela, nashisekela, najezisa kulowo owonileyo. Kukho konke nivele obala ukuthi aninacala.
- ¹²Ngayiloba leyancwadi kodwa ngingakwenzi lokho ngoba kukhona ogile umkhuba kumbe ngesizathu salona omunye owoniweyo, kepha inhloso kwakuwukuba nizibone phambi kukaNkulunkulu ukuthi thina nisikhonze kangakanani.
- ¹³Hhayi-ke nokho sesiduduzekile. Okubuye kwanezelela enduduzweni yethu kungukuthokoza kukaThithusi ngendlela enimqinise ngayo idolo; sesase kakhulu kwaze kweqa lapho simbona eneme.
- ¹⁴Uma bengikade ngigabaza kuye ngiqhoshe ngani nonke, angijabhanga. Njengoba konke esake sakusho kini kuyiqiniso, ukugabaza kwethu phambi kukaThithusi kwavela obala ukuthi kuyiqiniso.
- ¹⁵Inhliziyo yakhe ithathekile kakhulu yinina, ikakhulu uma ekhumbula indlela enamthobela ngayo, namemukela ngokwesaba nangokuthuthumela.

¹⁶Kuyangithokozisa ukubona ukuthi nginganethemba kukho konke.

2 kwelaseKhorinte 8

Ukuphana kuze kweve

¹Bakithi, manje sesinazisa ngomusa kaNkulunkulu awenzele amabandla aseMasedoniya,

²Okuthe noma bevivinywa ngosizi olwesabekayo kepha ukuthokoza kwabo kwanda kakhulu, bavula izandla zabo bapha kwaze kweva, phezu kokuba bebuswezi bengenalutho.

³Ngingafakaza ukuthi banikela okungangamandla abo, impela bakhipha kwaze kweqa, kusuka ezinhliziyweni zabo.

⁴Basincenga kakhulu ukuba nabo bavunyelwe bafake isandla ekusizeni amakholwa kwelaseJudiya.

⁵Thina besingakulindele lokho. Baqale bazinikela eNkosini uJesu, kanduba bazinikele kithi ngokuvuma kweNkosi.

⁶Kungakho simnxusile uThithusi ukuba asale esewufeza lomsebenzi abesewuqalile phakathi kwenu wokuqoqa isipho esisuka othandweni.

⁷Nichume kukho konke eninakho: ukukholwa nobugagu bamazwi nolwazi nokushisekela okukhulu nokuthandana enakufunda kithi ngakhoke sengathi ningakhuthala nasekuqoqeni lesisipho.

⁸Akusho ukuthi nginishayela umthetho, kodwa nginikhombisa ukuthi abanye bakhuthele kangakanani, ngifuna ukuba nibonakale nani ukuthi olwenu uthando lujule kangakanani.

⁹Niyawazi umusa weNkosi yethu uJesu Kristu ukuthi phezu kokuba ayecebe kanjeya kodwa waphenduka impofana ngenxa yenu, ukuze nina ninethezeke ngobuphofu bakhe.

¹⁰Ngiyaluleka nje kuloludaba. Engikucelayo kini kuyosiza nina. Kwaqala nina nakusebenza nyakenye, kanti futhi yinina enaqala nakuhlosa ukuba nikwenze.

¹¹Ngakhoke lokhokuzimisela kwenu makulingane nokukhuthala kwenu ukuba umsebenzi uphethwe ngalokho eninakho.

¹²Uma ukuzimisela kukhona, isipho siyemukeleka ngalokho umuntu anakho, kungayi ngalokho umuntu angenakho.

¹³Angiqondile ukuba abanye baxegiselwe kodwa nina nisindwe. Kuyisu lokubonelelana

¹⁴ukuba nina nibenanele behluphekile, ngoba ninakho kuningi, ukuze nabo ngomuso ekuhluphekeni kwenu banenanele kulokho okuningi abayoba nakho, unyawo lwabasha luphindane.

¹⁵Umbhalo ongcwele uthi: “Lowo owabutha kwakuningi akuzange kweve, nowabutha kwakuncane akazange eswele.”

UThithusi nabamphelezelayo

¹⁶Makabongwe uNkulunkulu owakubekayo enhliziyweni kaThithusi ukuba anikhathalele njengami.

¹⁷Wezwa wayesesamukela isicelo sethu, kanti kwayena uvele ulubela ukunihambela.

¹⁸Simthumela lapho kanye nomzalwane lowo odume kakhulu emabandleni ngokuqhuba ivangeli.

¹⁹Akagcini lapho kuphela, ingani usekhonjwe ngamabandla ukuba sihambe naye kulomsebenzi. Siyokwethula lesisipho esisuka othandweni, kudunyiswe iNkosi uJesu kubonakaliswe nesisa sethu.

²⁰Sixwayile ukuba kungagxekwa indlela esiqhuba ngayo ekuphathweni kwalesisipho esikhulu.

²¹Sicothele ukwenza okuqotho phambi kweNkosi naphambi kwabantu imbala.

²²Simthumela kanye nabo umzalwane wethu. Sesamvivinya ngezinto eziningi, waziveza ukuthi ungumuntu okhuthuleyo. Usekhuthule kakhulu manje njengoba ethembele kini.

²³Mayelana noThithusi, unguzakwethu emsebenzini engiwenza naye phakathi kwenu. Lababazalwane bethu bayizithunywa zamabandla, balethela uKristu udumo.

²⁴Vezani ubufakazi bothando lwenu phambi kwamabandla, ukuze kubonakale ukuthi besiqinisile lapho siziqhenya ngani kulababantu.

2 kwelaseKhorinte 9

Umnikelo oqondene namakholwa

¹Akudingekile ngempela ukuthi sengingaze nginilobele ngalomnikelo oqondene namakholwa,

²ngoba ngiyazi ukuthi nikushisekele ukulekelela; nina ebengisaqhoshe ngani kwabaseMasedoniya ngibatshela ukuthi abaseAkhaya yilokhu bama ngomumo kusukela nyakenye ukuba basize. Ukushiseka kwenu kubanyakazisile abaningi.

³Kepha ngithumela abazalwane kini ukuze ukugabaza kwethu ngani kungabi yize kodwa nihlale nilungele njengoba ngangishilo.

⁴Uma kwenzeka ngifika nabathile baseMasedoniya nginifce ningalungisele, siyotheleka amahloni, ngingasayiphathi-ke eyenu, sinethembile kangaka.

⁵Kungakho ngikubone kufanele ngibancenge abazalwane ukuba bangendulele banivakashele. Ngithe abafike isikhathi sisekhona, balungise lesisipho esikhulu

enanisethembise phambilini. Asihlale sesilungisiwe, kube yisipho esibhekileyo esiletha isibusiso, ningancishani ngaso.

⁶Okufanele ningakulibali yilokhu: Lowo ohlwanyela kancane uyovuna kancane, nalowo ohlwanyela kakhulu uyovuna kakhulu.

⁷Umuntu ngamunye akanikele lokho asekunqume enhliziyweni yakhe, engadondi futhi engaphoqiwe, ngoba uNkulunkulu uyamthanda umuntu onikela ngokujabula.

⁸UNkulunkulu unamandla okunipha umusa wakhe kweve ukuze nenele ezintweni zonke ngezikhathi zonke nivame imisebenzi emihle.

⁹Umbhalo ongcwele uthi: “Uyihlahlapha ngokuphana, wacola izimpofana ngezipho; ukulunga kwakhe kumi phakade.”

¹⁰Manje uMvelinqangi okunguyena othatha imbewu ayinikeze otshalayo, aveze isinkwa esidliwayo, uyonipha anandisele inhlwanyelo yenu, kuvame izithelo zokulunga kwenu.

¹¹Niyonethezeka nxazonke ukuze nikwazi ukunikela kweve ngakho konke, ukuphana kwenu bese kwenza ukuba uNkulunkulu abongwe lapho sesethula izipho zenu.

¹²Lomsebenzi eniwezayo awugcini ngokwenelisa izidingo zamakholwa kuphela, kodwa wandisa inkonzo yokubonga uNkulunkulu.

¹³Uma nibonakalisa ukuthi nizimisele ukubasiza ngalomsebenzi bayomdumisa uNkulunkulu ngenxa yokuthi nilivumile ivangeli likaKristu nalithobela ngokunikela kakhulu lapho kusizwa bona kanye nabanye.

¹⁴Bayonikhulekela banilangazelele, ngenxa yomusa uNkulunkulu anenzele wona ngokwedlulele.

¹⁵Akabongwe uMvelinqangi ngesipho sakhe thina esehluleka ngisho nokusibonga!

2 kwelaseKhorinte 10

UPawula uvikela isikhundla sakhe

¹Manje ngiloba ngodaba oluthinta mina Pawula mathupha! Ngiyanincenga ngenxa yokuthobeka nobumnene bukaKristu, mina lona okuthiwa ngiyaye nginyonye uma ngibhekene nani emehlweni kodwa nginehle ngaphezulu uma ngikude nani.

²Ngininxusa ukuba kuthi nxa kwenzeka ngiba phakathi kwenu, kungadingeki ukuba ngize nginehle ngaphezulu ngephuzu legunya lami engihlose ukulisebenzisa, ngibhekane nabathile abathi thina siphethwe umoya wabantu balomhlaba.

³Noma siphila kuwo lomhlaba kodwa asiyilwi impi yakhona,

- ⁴ngoba izikhali zempi yethu akuzona ezomhlaba, kepha zingezikaNkulunkulu, zinamandla okudiliza izinqaba. Sikuqeda konke ukuqophisana ngamazwi,
- ⁵sigudluze zonke izithiyo ezimelana nokumazi uNkulunkulu, sithumbe yonke imicabango yabantu ukuba ithobe uKristu.
- ⁶Sizimisele ukujezisa zonke izenzo zabo zokungalaleli, uma sekubonakele ukuthi nina senithobe ngokupheleleyo.
- ⁷Bhekani lokhu okuphambi kwamehlo enu! Uma kukhona umuntu ozishoyo ukuthi ungokaKristu, akokhumbula ukuthi njengoba engokaKristu, nathi futhi singabakhe.
- ⁸Angizukuhlazeka noma ngingaze ngeqise kancane ngegunya lesikhundla sethu esaliphiwa yiNkosi lokuba nakhiwe, ningabhidlizwa.
- ⁹Akungabi sengathi ngiyanethusa ngezincwadi engizilobayo,
- ¹⁰njengoba sebethi: “Izincwadi zakhe zishubile zikhaliphile kodwa isiqu sakhe asinasithunzi, akasilona igagu ngomlomo.”
- ¹¹Kuhle bazi lababantu ukuthi lokhu esisuke sikusho ngencwadi uma singekho, siyokwenza lapho sifika.
- ¹²Asifuni ngisho nokulokotha sizifanise noma sizilinganise nalabo abazibongayo. Kodwa lapho sebezilinganisa ngoqobo lwabo, beziqhathanisa noqobo lwabo, kukhomba ukuthi kabanangqondo.
- ¹³Thina asizukuzibonga seqise, kodwa sizopheza ngomncele lowo uNkulunkulu asibekele wona, ukuba sifinyelele nakini.
- ¹⁴Aseqisi nalapho sizibonga. Bekuyoba njalo ukuba besingafinyelelanga kini. Kodwa safika nakini sinilethele indaba emnandi sanilandisa ngoKristu.
- ¹⁵Manje aseqisi sizibonge ngomsebenzi owenziwe ngabanye. Ithemba lethu ngelokuthi nxa kukhula ukukholwa kwenu, iyolokhu yanda nendima esiyisebenza phakathi kwenu.
- ¹⁶Yikhona siyokwazi ukuyishumayela lendaba emnandi nasemazweni asekudeni, ingaze umuntu azibonge ngomsebenzi osuwenziwe endimeni yomunye.
- ¹⁷Umbhalo ongcwele uthi: “Ozigabisayo makazigabise ngeNkosi!”
- ¹⁸Umuntu ozishoyo akemukeleki, kodwa kwemukeleka kuphela osuke enconywe yiNkosi.

2 kwelaseKhorinte 11

UPawula nabaphostolimbumbulu

- ¹Ngifisa sengathi beningangibekezelela kulobubuphukuphukwana bami.

²Nginikhwelezela ngesikhwele sikaNkulunkulu, ngoba nganendisa endodeni eyodwa ningumlobokazi omsulwa engamethula kuKristu.

³Ngisovalweni lokuthi njengoba inyoka yalutha uEva ngobuqili bayo, hleze imicabango yenu yeduswe isuke enkonzweni eqondileyo nemsulwa enimkhonza ngayo uKristu.

⁴Ngisho ngoba nishesha kabi ukuthatheka uma kufika othile eshumayela omunye uJesu ongaseyena lona esamshumayelayo, kumbe nemukele omunye uMoya owehlukile kulowo enaniwemukele, noma nemukele elinye ivangeli elehlukile kuleli enalemukelayo.

⁵Ngizibona ngingemncane neze kunalezizinkunzimalanga zabaphostoli.

⁶Yize noma ngingesilona iciko lokukhuluma, kodwa ngiyincweti ngolwazi enginalo. Sinikhombisile lokhu kukho konke kwasobala kini, lapho sikhuluma nani ngazo zonke izihloko.

⁷Ngabe ngangona yini ngokuzehlisa kwami ukuze nina niphakanyiswe, ngoba ngashumayela indaba ethokozisayo kaNkulunkulu anaze nina nangena ezindlekweni na?

⁸Ngaphanga amanye amabandla lapho ngemukela iminikelo yawo ukuze kusizakale nina.

⁹Lapho ngisahlezi nani ngangintula kodwa angaba yiwo umthwalo kwabanye, ngoba abazalwane baseMasedoniya babengipha konke engikudingayo. Bengikuxwayile, namanje futhi ngisazokuxwaya ukuba ngingabi umthwalo kini.

¹⁰Njengalokhu iqiniso likaKristu lingaphakathi kimi, ukuzincoma engizincoma ngakho akunakuthuliswa kuzo zonke izifunda zaseAkhaya.

¹¹Ngisho ngani na? Ngoba nginganithandi na? Ngisho noNkulunkulu uyazi ukuthi ngiyanithanda.

¹²Engikwenzayo ngiyiqhubeka ngikwenze, ukuze ngibanqume imilomo laba abafuna izaba zokuzilinganisa nathi emsebenzini abazincoma ngawo.

¹³Lababantu bangabaphostolimbumbulu, izisebenzi ezikhohlisayo, bahamba bezenza abaphostoli bakaKristu.

¹⁴Akumangalisi kodwa, ngoba noSathane imbala uke aqhamuke eseyingilosi yokukhanya.

¹⁵Akwethusi futhi uma izinceku zakhe zihambe zikhohlisa zizenza izinceku zokulunga. Ekugcineni kodwa bayovuzwa ngemisebenzi yabo emibi.

UPawula ukuhluphekele ukuba ngumphostoli

¹⁶Ngiyaphinda futhi ngiyasho ngithi akungasuki muntu angenze isilima. Kodwa uma nina nikwenza lokho kulungile-ke, angibe yisilima njalo emehlweni enu ukuba nami kengiqhoshe kancane.

- ¹⁷Engikushoyo angikusho ngoba ngithunywa yiNkosi, kepha kulokhukuqhosha kwami ngikhulumisa okwesilima.
- ¹⁸Njengoba bebaningi abazikhukhumezayo ngokwalomhlaba, nami-ke ngizozisho.
- ¹⁹Phela nina niyakwazi ukubekezelela iziwula, zihlakaniphindini!
- ²⁰Niyabekezela uma umuntu enigqilaza kumbe enisobozela noma eniqinela noma eniqhoshela, noma eniwahlela ngempama.
- ²¹Nginamahloni okuthi sasuke sazithambisa sangayenza nathi into efana nalena kini. Kodwa uma kukhona olokothayo azincome ngotho (hhabe, sengikhulumisa okwesiphukuphuku ngempela) kanjalo nami ngiyazincoma.
- ²²BangamaHebheru na? Nami nginguye. BangabakwaIsrayeli na? Nami nginguye. Badabuka kuAbrahama na? Nami ngivela kuye.
- ²³Bayizinceku zikaKristu na? Nami ngiyiyo, engcono kunabo — noma sengikhulumisa okohlanya. Kade ngikhandlwa umsebenzi kunabo, ngikuboshwa kuningi, ngidindwa kwasa, kukaningi ngibuya phezu kwengcwaba.
- ²⁴AmaJuda angibhaxabula kwakahlanu, ngasikhathi sinye ngathola imivimbo yesitshwebhu kusilele owodwa ukuba kuphele amashumi amane.
- ²⁵Ngadindwa kathathu ngemishiza, ngabuye ngakhandwa ngamatshe kwakanye, ngabuye ngafelwa kathathu yimikhumbi elwandle, ngabuye ngaqungquluza phezu kwamaza olwandle imini yonke nobusuku bayo.
- ²⁶Bengivame ukuba sendleleni, kaningi ngisezingozini: ngiwela imifula, ngisinda ngokulambisa ezinswelaboyeni, ngigaselwa ngabakithi bomdabu, ngiqamekelwa ngabezizwe, ngingumabonabulawe emizini, ngisengozini ehlane nasolwandle. Ngangilokhu ngiqaphe ingozi yabazalwanembumbulu.
- ²⁷Ngikhandlekile ngasebenza kanzima, ngaqwasha imihla namalanga, ngalamba ngomela amanzi, ngazila ukudla kaningi, ngaficwa ngamakhaza ngihlubule.
- ²⁸Ngaphandle kwakho konke lokhu, kunomcabango nsuku zasa ongihlezi kabi enhliziyweni, wokukhathalela amabandla onke.
- ²⁹Ngubani othi ubuthaka, mina ngibe ngingabuzwa ubuthaka na? Ngubani owela esonweni ngingahanguleki emoyeni wami na?
- ³⁰Uma nginokuzincoma ngiyozincoma ngalezozinto eziveza ubuthakathaka bami.
- ³¹Yena onguNkulunkulu noYise weNkosi uJesu, obongekayo naphakade, uyazi ukuthi angiqambi manga.
- ³²Emzini waseDamaseku umbusi ophansi kwenkosi uHaretha wathumela ukuba umuzi uhaqwe nce ngiboshwe.
- ³³Kodwa ngehliwa ngesilulu esakhishwa ngentunja yogange lomuzi, kwaba ukuphunyula kwami njalo ezandleni zakhe.

2 kwelaseKhorinte 12

Izibonakaliso nezambulo ezavezelwa uPawula

¹Ngisaqhubeka nokuzincoma. Angitholi lutho ngalokho kodwa ngizodlulela phambili ngikhulume ngezibonakaliso nezambulo ezavela eNkosini.

²Kunomuntu engimaziyo ongokaKristu owahlwithelwa ezulwini lesithathu kuleminyaka eyishumi nane eyedlule. Ukuthi kwenzeka lokho esemzimbeni wakhe ezwa, noma wayesephumile esidunjini sakhe angazi, kodwa uNkulunkulu uyazi.

³⁻⁴Ngiyazi ukuthi lomuntu wahlwithelwa ePharadisi, kodwa ukuthi wayekulomzimba wakhe noma wayesehlukene nesidumbu ngeke ngazi, kwazi uNkulunkulu. Lomuntu wezwa amagama ahlonishwayo okungavunyelwe muntu ukuwagagula.

⁵Ngalowo onjalo ngizincome kunye, ngingezukuzincoma mina uqobo lwami, kodwa ngizoincoma ngobuthakathaka bami kuphela.

⁶Noma ngabe bengizincome bengingeke ngibe silima, ngoba bengiyobe ngisho lona iqiniso. Kodwa ngiyayeka ukuze kungabi bikho muntu ongazela lukhulu olungalena kwalokho akubonayo kimi nakuzwa ngami.

⁷Ukuze ngingakhukhumali ngenxa yalezizambulo ezinkulu engazibonayo, ngahlatshwa yiva enyameni, saba nami shaqa isithunywa sikaSathane ukuba ngingakhukhumali.

⁸Ngayinxusa kwaze kwakathathu iNkosi ukuba lento isuke kimi,

⁹kodwa yathi kimi: “Umusa wami wenele kuwena, ngoba amandla ami apheleliswa ebuthakathakeni.” Ngakhoke ngixolela khona ukuzincoma ngalobubuthakathaka bami, khona amandla kaKristu ezohlala kimi.

¹⁰Ngenxa kaKristu nganelisiwe ubuthakathaka nokwedelwa nobunzima nokuzingelwa nokuxakwa yizigameko, ngoba lapho kuthiwa ngibuthakathaka, kulapho ngimandla.

UPawula usovalweni ngebandla laseKhorinte

¹¹Kade ngiyisilima, ngenziwa yinina njalo! Kanti yinina okwakufanele ukuba nikhulume kahle ngami. Yize noma ngingelutho kodwa angimncane ngisho nangengozi kunalezizinkunzi zabaphostoli.

¹²Ngibonakalisile ukuthi ngingumphostoli wangempela lapho ngisebenza phakathi kwenu ngesineke esikhulu, kwavela izibonakaliso nezimangaliso, kwenziwa nemisebenzi emangalisayo.

¹³Yikuphi eningase nithi nilulazwe ngakho kunamanye amabandla, ngaphandle kokuthi angizange ngibe umthwalo kini na? Ngithetheleleni kulokhukona kwami!

¹⁴Ake nibheke nje sengilungele ukunivakashela isithathu, kodwa ngeke ngibe umthwalo kini, ngoba angifuni lutho lwenu, ngifuna nina kuphela. Izingane akuzona eziyaye zibekele abazali ifa, kepha kungabazali ababekela izingane.

¹⁵Ngizonikela ngokujabula okukhulu, nginikelwe mina uqobo lwami ngenxa yemiphefumulo yenu. Uma nginithanda kakhulu ngabe kusho ukuthi angithandwe kancane na?

¹⁶Uma kungukuthi angibanga umthwalo kini, nikhala nokho ngokuthi nginihlakaniphele nganibamba ngengqondo.

¹⁷Ukhona yini enganiqilizela ngaye kulabo engangibathumela kini na?

¹⁸Nganxusa uThithusi ukuba ahambe, ngathuma umzalwane ukuba amphelezele. Wake waniqilizela-ke uThithusi na? Thina asenzanga yini ngomoya onjalo sahambisa ngendlela efanayo na?

¹⁹Nihlezi nje nilokhu nizindla nithi siyazivikela kini na? Qha! Phambi kukaNkulunkulu sikhulume kini njengabakaKristu, nakho konke esikwenzayo bangani bami, sikwenzela nina ukuba nakheke.

²⁰Ngisovalweni lokuthi uma kwenzeka ngifika lapho, ngiyonifica ningeyikho lokhu engikufisayo, nami ningithole ngingeyikho lokhu enikubhekileyo, nokuthi hleze kube nokuxabana okukhona, nesikhwele, nokuthukuthela, nemibango, nokuhlebana, nokucevuzela izindaba, nokuzithwala, neziphithiphithi.

²¹Ngisovalweni lokuthi kuyothi uma sengifika kini uNkulunkulu akwenze ukuba ngiphoxeke phakathi kwenu, ngizwe ubuhlungu bokulilela abaningi benu abonileyo phambilini, bengaphendukanga ekungcoleni nasemanyaleni obufebe nobunuku ababenzayo.

2 kwelaseKhorinte 13

Izixwayiso zokugcina nokuvalalisa

¹Kuzobe sekungokwesithathu ngifika kini. Umbhalo uthi: “Yilolo nalolodaba luyoqiniswa ngemilomo yofakazi ababili noma abathathu.”

²Namanje ngisasho kulaba ababekade bonile nakwabanye bonke, ngisaphinda ngiyabaxwayisa njengalokhu ngenza phambilini ekufikeni kwami kwesibili. Ngibadonsa ngendlebe ngithi kubo: Uma sengibuye ngifika futhi angisayukubaxolela

³njengoba nithi nifuna ubufakazi bokuthi engikukhulumayo kuvela kuKristu. Yena akabuthakathaka lapho esebhekene nani, kodwa unamandla impela phakathi kwenu.

⁴Wabulawa esiphambanweni ebuthakathaka, kodwa manje usephila ngamandla kaMvelinqangi. Sihleli sikuye sibuthakathaka, kodwa ngamandla kaMvelinqangi siyophila kanye nani. Niyobhema nikhholwe mhla lokho kwenzeka.

⁵Zihloleni nibone ingabe nisanamatele yini ekukholweni. Zivivinyeni! Akunikhanyeli yini ukuthi uKristu Jesu ukinina na? Uma kungenjalo kusho ukuthi niyehluleka lapho nivivinywa.

⁶Ngiyethemba nizokhanyelwa ukuthi asehlulekanga thina.

⁷Sithandaza uNkulunkulu ukuba ningenzi lutho oluphambeneyo. Akungoba sifuna ukuba abantu basibone ukuthi thina asizona izahluleki, kodwa okuyikhonakhona ukuba nenze okulungileyo, yize noma thina singabonakala sengathi siyizahluleki.

⁸Asinakufika ndawo uma simelana neqiniso, siyophumelela ngokulimela kuphela.

⁹Kuyasithokozisa uma thina sibuthakathaka kepha nina ninamandla. Umthandazo wethu owokuba niphelaliswe.

¹⁰Ngikuloba lokhu ngingekho kini ukuze kuthi lapho ngifika kini ngingabe ngisaniphatha kalukhuni ngenkathi sengisebenzisa igunya iNkosi enginike lona ukuba ngakhe ngingadilizi.

¹¹Ekugcineni bazalwane ngithi salani nomusa, nilungise ukuhamba kwenu, nilalele lapho nginiyala, nibe nomqondo owodwa, nihlale ngokuthula. UNkulunkulu wothando osilethela ukuthula aze abe nani.

¹²Nize ningikhonzele nibingelelane ngokwanga kwabakholwayo! Bayakhonza bonke abazalwane.

¹³Sengathi umusa weNkosi uJesu Kristu, kanye nothando lukaNkulunkulu, nokuhlanganyela noMoya oyiNgcwele kungavama kini nonke.

AseGalathiya

AseGalathiya 1

Isibingelelo

¹Lencwadi ivela kimi uPawula, engathunywa ngaba ngumphostoli. Ubizo lwami aluvelanga kubantu noma ngomuntu, kodwa lwavela kuJesu Kristu uqobo noNkulunkulu uYise owamvusa kwabafileyo.

²Sihlanganyela nabazalwane bonke enginabo lapha, sibingelela amabandla aseGalathiya.

³Sinifisela umusa nokuthula okuvela kuNkulunkulu uBaba naseNkosini uJesu Kristu.

⁴Yazidela ukuphila kwayo yafela izono zethu yasenza abayo ngokusophula kulenkathi yokonakala esiphila kuyo. Kanjalo yafeza intando kaNkulunkulu wethu onguBaba.

⁵Ufanele ukudunyiswa phakade naphakade. Ameni.

Alikho elinye ivangeli

⁶Niyangimangalisa ngokumhlubuka masinyane kangaka uKristu okunguye owanibizela kuye ngomusa wakhe, niyasuka nina senemukela elinye ivangeli elehlukile.

⁷Ekubeni lingekho elinye ivangeli, kodwa ngikuphawula lokhu ngoba kukhona abathile abanishushisayo asebefuna ukuhlanekhezela ivangeli likaKristu.

⁸Kepha-ke ngisho noma kungaba yithi noma yingilosi evela ezulwini inishumayeza indaba ephambene nalena esanishumayeza yona, akaqalekiswe lowo!

⁹Kade sasinitshela, namanje ngiyaphinda futhi ngithi, uma kukhona onishumayeza indaba emnandi ephambene nevangeli enalemukelayo, akaqalekiswe lowo!

¹⁰Ngabe mhlawumbe ngihlose ukuzakhela ugazi kubantu noma kuNkulunkulu na? Kumbe ngizama ukujabulisa abantu na? Ukuba bengizama ukujabulisa abantu, bengingeke ngisaba yisisebenzi sikaKristu.

UPawula uba ngumphostoli

¹¹Ake nginitshela lokhu bakwethu ukuthi lendaba ethokozisayo engiyishumayelayo ayivelanga kubantu.

¹²Angiyemukelanga kumuntu, angiyifundiswanga muntu. Ngayembulelwa nguJesu Kristu uqobo.

¹³Nizwile ukuthi ngangiphila impilo enjani ngenkathi ngisabambelele enkolweni yamaJuda, ukuthi ibandla likaNkulunkulu ngalihlupha ngonya olwedlula ukwenza, ngilinga ukulibhuqa nya.

- ¹⁴Ekushisekeleni inkolo yobuJuda ngabedlula abaningi abayintanga yami esizweni sakithi, ngiyishisekela kakhulu kunabo imfundiso esayithatha kokhokho.
- ¹⁵Kodwa uNkulunkulu owangiqoka kwasesiswini sikamame wangibiza ngomusa wakhe ukuba ngimsebenzele. Kuthe lapho esenqume
- ¹⁶ukungembulela ngibone iNdodana yakhe, ukuba ngimemezele kwabezizwe indaba emnandi elanda ngayo, kangaya kumuntu ukuba sicebisane naye.
- ¹⁷Angiyanga ngisho naseJerusalema ukuba ngibonane nalabo ababengabaphostoli ngaphambi kwami. Kodwa ngasuka nganikela eArabhiya, ngase ngibuyela eDamaseku.
- ¹⁸Kuthe emva kweminyaka emithathu ngenyukela eJerusalema ukuba sibonane noKhefase sazane. Ngahlala naye amasonto amabili.
- ¹⁹Angibonanga namunye kubaphostoli ngaphandle kukaJakobe umfowabo weNkosi uJesu.
- ²⁰Lokhu engikuloba lapha kuyiqiniso. UNkulunkulu uyazi ukuthi angiwaqambi amanga.
- ²¹Kamuva ngaya kwelaseSiriya nelaseSilisiya.
- ²²Ngalesosikhathi amabandla kaKristu aseJudiya ayengangazi, engakaze angibone.
- ²³Ayazi lokho nje akutshelwa ngami ukuthi: “Lowo owayekade esizingela usefakaza manje ngenkolo ayelwa nokuyibhuqa nya.”
- ²⁴Ayesemdumisa uNkulunkulu ngenxa yami.

AseGalathiya 2

Abaphostoli bamukela uPawula

- ¹Kuthe sekudlule iminyaka eyishumi nane ngabuye ngenyukela eJerusalema nginoBhanabhasi, ngathatha noThithusi sahamba naye.
- ²Ngaya njengalokhu ngangambulelwe nguNkulunkulu ukuba ngiye khona. Sabonana nabaholi ngasese ngabachazela ngendaba ejabulisayo engiyishumayela kwabezizwe. Ngangingafuni ukuba umsebenzi wami esengawenza nengiwenzayo uphelele obala.
- ³Kepha ngisho noThithusi esasihamba naye engowezizwe, akaphoqwanga ukuba asoke.
- ⁴Kukhona abazalwanembumbulu ababebelesela ukuba asoke. Babengene isinyenyela ebandla, kanti bayizinhlozi bazophenya lenkululeko yethu esinayo kuKristu Jesu, ukuba basigqilaze.

⁵Kodwa ukuze nilondelwe iqiniso levangeli, asizange sigudluke kulo ngisho nakanye ukuba sibathobe.

⁶Kepha laba okwakuthiwa bangabaholi — mina angikhathali ngabo ukuthi bangobani, ngithi nje uNkulunkulu akakhethi muntu — kabangiyalanga ngalutho olusha.

⁷Kunalokho kwabakhanyela ukuthi ngethweswe umsebenzi wokushumayela indaba ethokozisayo kwabezizwe, njengoba kwethweswa uPhetro umsebenzi wokushumayela emajudeni.

⁸Ngoba uNkulunkulu owasebenzisa uPhetro phakathi kwamaJuda engumphostoli kuwo, nami wangisebenzisa kwabezizwe.

⁹UJakobe noKhefase noJohane ababaziwa ngokuthi bayizibonda, kwabakhanyela ukuthi uNkulunkulu ngomusa wakhe ungethwese lomsebenzi, base besixhawula sinoBhanabhasi begcizelela ukuthi bakanye nathi. Savumelana ngokuthi thina sobabili noBhanabhasi sizosebenza kwabezizwe, kepha bona basebenze phakathi kwamaJuda.

¹⁰Base becela kuphela ukuba sikhumbule izimpofana phakathi kwabo; okuyiyonanto ebengikhuthalele ukuyenza.

UPawula usola uPhetro eAntiyokhi

¹¹Kodwa kuthe uKhefase esefikile eAntiyokhi ngase ngimphikisa obala, ngoba icala limlahla.

¹²Kukhona amadoda athile afika eAntiyokhi evela kuJakobe. UPhetro wayekade edla ndawonye nabazalwane abangabezizwe engakafiki lawomadoda. Kodwa kuthe ukuba afike wanyonya, akabe esadla ndawonye nabezizwe, ngoba wayenqena abeqembu elalithi abezizwe abaphendukayo mabasokwe.

¹³Nabanye-ke abazalwane bamaJuda balingisa uPhetro bambuluza, noBhanabhasi imbala waze wathatheka wambuluza naye.

¹⁴Kuthe lapho ngibona ukuthi kabahambi ngobuqotho ngendlela evumelana neqiniso levangeli, ngase ngithi kuKhefase phambi kwabo bonke: “Wena ungumJuda kodwa uziphatha njengowezizwe, hhayi njengomJuda. Pho ungabaphoqa kanjani abezizwe ukuba baziphathe njengamaJuda na?”

AmaJuda nabezizwe basindiswa ngokukholwa

¹⁵Thina-ke singamaJuda ngokuzalwa, asibizwa ngohlobo lwabantu abangabezizwe abayizoni.

¹⁶Nokho siyazi ukuthi umuntu uthethwa yicala ngokukholwa kuJesu Kristu, kungayi ngemisebenzi ebizwa ngumthetho. Ngakhoke nathi sakholwa kuKristu Jesu ukuba sithethwe yicala ngokukholwa kwethu kuKristu, qha ngokwenza okushiwo ngumthetho. Akukho muntu oyothethwa yicala ngokwenza okushiwo ngumthetho.

¹⁷Thina sifuna ukuthethwa yicala sikuKristu. Kodwa uma ngalokho nathi sitholakala ukuthi siyizoni nje njengabezizwe, ngabe kusho ukuthi uKristu ungumgqugquzeli wesono! Kanti ngabe uKristu ungumgqugquzeli wesono na? Phinde, akunjalo!

¹⁸Uma ngizobuye ngivuselele lokho ekade ngikubhidliza, ngalokho ngikhombisa ukuthi ngingumuntu oweqa umthetho.

¹⁹Mina ngabulawa umthetho ngafa ngakhululeka kuwo yikhona ngizophilela uNkulunkulu. Ngabethelwa kanye noKristu,

²⁰akuseyimi ophilayo, sekunguKristu ophila kimi. Lempilo engiyiphila manje ngiyiphila ngokukholwa eNdodaneni kaNkulunkulu eyangithanda yaze yanikela ngokuphila kwayo ngenxa yami.

²¹Angiwuchithi umusa kaNkulunkulu ngiwenze ize. Kodwa uma umuntu ethethwa yicala ngokwenza okushiwo ngumthetho, kusho ukuthi uKristu wafela ize.

AseGalathiya 3

Ukukholwa noma ukugcina umthetho?

¹Maye we ziwula zamaGalathiya! Niluthwe ngubani na? Nachazelwa ngoKristu kwagqama, kwaba sengathi nimbona ngamehlo enu ebethelwe esiphambanweni.

²Ake nginibuze lombuzo owodwa: Nawemukela uMoya kaNkulunkulu ngokwenza okubizwa ngumthetho yini, noma nawemukela ngokuzwa indaba ethokozisayo nangokuyikhola na?

³Yini nibe yizithutha kangaka na? Naqala ngoMoya oyiNgcwele kepha manje seniphetha ngemithetho yokusoka na?

⁴Konke enakubonayo nakuzwa ngabe kuyize yini na? Impela akulula ukuba ngikhola ukuthi kuyize.

⁵Ngabe uNkulunkulu uninika uMoya wakhe enze imisebenzi emangalisayo phakathi kwenu ngenxa yokugcina kwenu umthetho noma kungenxa yokuzwa kwenu indaba emnandi niyikhola na?

⁶Ake nimbheke uAbrahama! Umbhalo ongcwele uthi: “Wakholwa kuNkulunkulu, kwase kubalelwa kuye ukulunga.”

⁷Kuhle nazi ukuthi abaka-Abrahama ngempela yilabo abakholwayo.

⁸Umbhalo ongcwele wabona phambilini ukuthi uNkulunkulu uthetha abezizwe ngecala ngenxa yokukholwa kwabo. Ngakhoke indaba ejabulisayo yashunyayelwa endulo kuAbrahama lapho uNkulunkulu ethi kuye: “Zonke izizwe ziyobusiseka ngawe.”

⁹Ngakhoke abokukholwa bayabusiseka kanye noAbrahama owayekholwa.

¹⁰Bonke abethembela emisebenzini ebizwa ngumthetho baphansi kwesiqalekiso. Ngoba umbhalo ongcwele uthi: “Wonke umuntu ongakulaleli konke okulotshwe emqulwini womthetho ahambe ngakho, uqalekisiwe nguNkulunkulu.”

¹¹Kusobala ukuthi akukho muntu othethwa yicala phambi kukaNkulunkulu ngokugcina umthetho, ngoba umbhalo ongcwele uthi: “Lowo obalelwa ukulunga uyophila ngokukholwa kwakhe.”

¹²Kodwa emthethweni akushiwo lutho ngokukholwa, kepha kuthiwa nje: “Ogcina imiyalo uyophila ngokwenze njalo.”

¹³UKristu wasihlenga esiqalekiseni esibangwa umthetho, waphenduka isiqalekiso eqalekiselwa thina, njengoba umbhalo uthi: “Umuntu olengiswa esigxotsheni uqalekisiwe.”

¹⁴Kwenziwa lokhu ukuba isibusiso sikaNkulunkulu asethembisa uAbrahama sehlistelwe kwabezizwe ngoKristu Jesu, bese-ke ngokukholwa samukeliswa uMoya oyiNgcwele esawethenjiswa nguNkulunkulu.

Umthetho nesethembiso

¹⁵Bazalwane, ake nginifanekisele ngento ejwayelekile kubantu! Uma umuntu eseyibhalile incwadi yefa, yayisifakazelwa yinkantolo, akukho muntu ongachitha noma anezelele utho kuleyincwadi yefa.

¹⁶Izethembiso zikaNkulunkulu zabhekiswa kuAbrahama nenzalo yakhe. Uma umbhalo ongcwele usebenzisa igama elithi “inzalo” awuqondisi kwabaningi; munye kuphela okuqondiswe kuye, lowo nguKristu.

¹⁷Ngiqonde ukuthi izwi lokwaba ifa elaqiniswa uNkulunkulu endulo lingeguqulwe kuchithwe isethembiso ngomthetho owashaywa sekudlule iminyaka engamakhulu amane namashumi amathathu.

¹⁸Ngoba uma ngabe ifa labiwa ngomthetho kusho ukuthi kalitholakali ngesethembiso, kodwa uNkulunkulu waba nobubele kuAbrahama wamabela, ngokumethembisa lona.

¹⁹Kanti kwakuhlosweni ngomthetho na? Wenezelwa ukuba udalule ukuthi ukona kuyini, uqhubeke usebenze kuze kufike yena oyinzalo ka-Abrahama, okwakubhekiswe kuyena isethembiso. Umthetho wamiswa ngesandla sezingilosi, wadluliselwa kubantu ngumlamuli.

²⁰Umlamuli ulamulela abaningi, kodwa uNkulunkulu uzimele uyedwa.

Inhloso yomthetho

²¹Umthetho uphambene yini nezethembiso zikaNkulunkulu na? Phinde, akunjalo! Ngoba ukuba uNkulunkulu ubengasinika umthetho okwazi ukuletha ukuphila, sasiyothethwa yicala ngoba sigcina umthetho.

- ²²Kodwa umbhalo ongcwele uthi wonke umhlaba ugqilazwe amandla esono, ukuze abakholwayo badle ifa abalethenjisiwe, balidle ngokukholwa kwabo kuJesu Kristu.
- ²³Kodwa kungakafiki ukukholwa sasivalelwe phansi komthetho siyiziboshwa kwaze kwafika ukukholwa okwakuzokwembulwa.
- ²⁴Ngakhoke umthetho wawungumesekei wethu owayezosiholela kuKristu, ukuba sithethwe yicala ngokukholwa.
- ²⁵Ngakhoke asisaholwa ngumesekei lowo, njengoba ukukholwa sekufikile.
- ²⁶Nina nonke ningamadodana kaNkulunkulu ngokukholwa kuKristu Jesu.
- ²⁷Nabhabhadiswa naba munye noKristu, ngakhoke manje senembethe uKristu.
- ²⁸Ngakhoke awukho umehluko phakathi komJuda nowezizwe, phakathi kwesigqila nokhululekileyo; akakho owesilisa nowesifazane, ngoba nina nonke nimunye kuKristu Jesu.
- ²⁹Uma ningabakaKristu, seningabozalo luka-Abhrahama, niyizindlalifa ngokwesethembiso sikaNkulunkulu.

AseGalathiya 4

- ¹Ngithi-ke manje, indodana eyodla ifa likayise iphathiswa okwesigqila lapho iseyingane, phezu kokuba kungokwayo konke.
- ²Uma isencane iba phansi komesekei nabaphathi kuze kufike isikhathi esamiswa nguyise sokuba iziphathe.
- ³Kanjalo nathi ngenkathi siseyizingane enkolweni sasiyizigqila, sibuswa yizinto zalomhlaba ezingamalutha.
- ⁴Kodwa lapho isikhathi esimisiweyo sesifikile, uNkulunkulu wathumela iNdodana yakhe. Yazalwa ngowesifazane, yakhula ingaphansi komthetho,
- ⁵khona izohlenga ababephansi komthetho ukuba sithole ilungelo lokuba ngamadodana kaNkulunkulu.
- ⁶Njengoba ningamadodana akhe, uNkulunkulu uthumele ezinhliziyweni zethu uMoya weNdodana yakhe omemeza uthi: “*Abba, Baba!*”
- ⁷Ngakhoke awuseyiso isigqila kodwa usuyindodana. Njengoba uyindodana, usubekiwe nguNkulunkulu waba yindlalifa.

Ukukhathazeka kukaPawula ngamakholwa aseGalathiya

- ⁸Ngesikhathi esedlule naningamazi uMvelinqangi, ngakhoke naniyizigqila zonkulunkulumbumbu.
- ⁹Kepha manje seniyamazi uMvelinqangi kodwa okungcono kunalokhu ukuthi naye useyanazi. Pho kungenzeka kanjani-ke ukuba niphindele ezintweni

ezingamalutha abuthakathaka ayize na? Nithandelani ukuba nibuye nibe yizigqila zawo na?

¹⁰Niyaye nazise izinsuku nezinyanga nezinkathi ezithile neminyaka.

¹¹Ngikhathazekile ngani! Kungase kwenzeke ukuba kanti ngizikhandlele ize ngenxa yenu!

¹²Bazalwane ngiyanincenga, ngifuzeni! Phela nami sengaba yilokho eniyikho. Aningonanga ngalutho.

¹³Niyasazi isizathu esangenza nginishumayeze indaba emnandi khona kwasekuqaleni. Kwakungenxa yokuthi ngangibuthaka egazini.

¹⁴Noma impilo yomzimba wami yayingaba yisicanulo kini, kodwa anizange ningicanukele kumbe ningenyanye. Impela, nangemukela kwasengathi ngiyingilosi kaNkulunkulu, nangemukela kwasengathi nginguKristu Jesu.

¹⁵Sekuphelelephi ukuncoma kwenu nithi nibusisekile na? Ngियाqinisa ukuthi naningakopolota amehlo enu ninginike wona ukuba kwakunokwenzeka.

¹⁶Ngabe sengiphenduke isitha kinina ngokunitshela iqiniso na?

¹⁷Lababantu bakhombisa ukushisekela ngani, ngenhloso engenhle nokho. Bafuna nehluwane nami nce nihungeke nibalandele.

¹⁸Ukushisekela kuyinto enhle uma injongo iyinhle. Akuqhubeke njalo, kungabi ngoba nje ningibona!

¹⁹Bantabami abathandekayo! Njengowesifazane ehelelwa nxa ebeletha, kanjalo nami sengiyabuzwa lobubuhlungu ngani, kuze kubonakale ubukhona bukaKristu phakathi kwenu.

²⁰Ngifisa sengathi ngabe ngikini manje lapho nikhona, kengithi ukukhuluma nani ngephimbo elizonithinta enhliziyweni. Ngikhathazeke kabi ngani!

Indaba kaHagari noSara iqukethe umqondo ojulile

²¹Ake ningitshela nina enifuna ukubuswa ngumthetho: Anikuzwa yini okushiwo ngumthetho na?

²²Kulotshiwe ukuthi uAbhrahama wazala amadodana amabili, enye kowesifazane owayeyisigqila, enye kowesifazane owayekhululekile.

²³Indodana ayizala esigqilini yatholakala ngendlela ejwayelekile, kodwa lena ayizala kowayekhululekile, yatholakala ngokwesethembiso sikaNkulunkulu.

²⁴Lendaba iqukethe umqondo ojulile. Abesifazane laba ababili bangumfanekiso wezivumelwano ezimbili. Lowo obantwana bakhe bazalelwe ebugqilini nguHagari; nguyeye omele isivumelwano esavela entabeni yaseSinayi.

²⁵KwelaseArabhiya intaba yaseSinayi ibizwa ngokuthi yiHagari. Ingumfanekiso weJerusalema lalapha emhlabeni elisebugqilini nabo bonke abakulo.

²⁶Kodwa iJerusalema lasezulwini likhululekile, lingumame.

²⁷Ngoba umbhalo ongcwele uthi: “Jabula mfazi ongazalanga! Memeza uhayiye ngenjabulo wena ongakaze uhelelwe! Ngoba isaliwakazi somfazi siyoba nabantwana abaningi sedlule abomfazi onendoda.”

²⁸Kepha nina bakwethu ningabantwana besethembiso sikaNkulunkulu njengolsaka.

²⁹Ngalesosikhathi indodana eyayizelwe ngendlela yakobantu yayimhlupha owayezelwe ngoMoya kaNkulunkulu; kunjalo-ke namanje.

³⁰Kanti umbhalo ongcwele uthini na? Uthi: “Xosha lesisigqilakazi nendodana yaso, ngoba indodana yaso ayinakulidla ifa kanye nendodana yowesifazane okhululekile.”

³¹Ngakhoke bazalwane, asiyibo abantwana besigqilakazi, kodwa singabantwana bowesifazane okhululekile.

AseGalathiya 5

Hlalani nikhululekile

¹Lapho uKristu esikhulula wayefuna ukuba sikhululekile. Ngakhoke, yimani niqine, ningabe nisazifaka ejokeni lobugqila.

²Lalelani lapha, mina Pawula ngiyanitshela ngithi uKristu akayikunisiza ngalutho uma ningasoka.

³Ngiyaphinda ngiyanikhuza ngithi, wonke umuntu osokayo uphoqekile ukuba afeze konke okushiwo ngumthetho.

⁴Nizahlukanisile noKristu, nina enizama ukuthethwa yicala ngokugcina kwenu umthetho, nazibandlulula emuseni kaNkulunkulu.

⁵Thina-ke, sikubheke ngethemba ukuthi ngamandla oMoya oyiNgcwele siyothethwa yicala ngokukholwa kwethu.

⁶Uma sikuKristu Jesu, akusho lutho ukuthi siyasoka noma asisoki. Okumqoka kungukukholwa okuveza imisebenzi yothando.

⁷Beniqhuba kahle kakhulu! Ngubani oniphazamisile wanivimbela ukuba ningalilandeli iqiniso na?

⁸Lokhukuhehwa akuveli kuNkulunkulu onibizayo.

⁹Khumbulani ukuthi: “Imvubelo iyaye ibe ncane, kodwa ibilise yonke inhlama.”

¹⁰Mina ngokwami ngiyethemba ukuthi, njengoba sisebunyeni neNkosi uJesu anizukungenwa ngomunye umqondo. Lowo onididayo, noma ngabe engubani, uyojeziswa nguNkulunkulu.

¹¹Kodwa mina, bazalwane, uma ngisaqhubeka nokushumayela ukuthi ukusoka kudingekile, pho ngisazingelelwani na? Ukuba lokho bekuyiqiniso, ukushumayela kwami ngesiphambano sikaKristu bekungeke kusaba yisicasulo.

¹²Ngifisa sengathi lababantu abanidungayo bangaqhubeka njalo nokuzisoka baze bazithene!

¹³Nina-ke bakwethu nabizelwa inkululeko. Kuphela nje, musani ukusebenzisa lokhukukhululeka kwenu kube yizaba zokubuswa yimvelo yokonakala. Kodwa khonzanani nenzelane okuhle ngothando!

¹⁴Ngoba umthetho wonke uqoqwe umyalo owodwa othi: “Wothanda wonke umuntu ngothando ozithanda ngalo!”

¹⁵Kodwa uma nilwa nodwa nilumana ninephulana njengezilwane, qaphelani ngoba nizoqedana!

UMoya kaNkulunkulu nemvelo yomuntu

¹⁶Engikushoyo yilokhu: UMoya kaNkulunkulu awunihole empilweni yenu, yikhona ningezukufeza okufiswa yimvelo yenu yokonakala.

¹⁷Ngoba okufiswa yimvelo yomuntu kuphambene nokufiswa nguMoya oyiNgcwele, nalokho okuthandwa nguMoya kuphambene nalokhu okufiswa yimvelo yokonakala. Lokho okubili akuzwani, kulwa njalo, ngakhoke anikwazi ukwenza enithanda ukukwenza.

¹⁸Uma niholwa nguMoya kaNkulunkulu, aningaphansi komthetho.

¹⁹Imisebenzi ethandwa yimvelo yokonakala isobala. Nansi-ke: ubufebe nobunuku namanyala

²⁰nokukhonza izithixo nokuthakatha. Abantu baba yizitha bese bexabana, babe nomona, bathukuthele, babange. Bahlukana amaqembu ngamaqembu.

²¹Baba nomhawu, badakwe, baminze, benze nezinye izinto ezifana nalezi. Ngiyanixwayisa njengoba ngake nganitshela phambilini ukuthi abenza izinto ezinje ngeke balidle ifa lombuso kaNkulunkulu.

²²Izithelo zoMoya oyiNgcwele uthando nokujabula nokuthula, ukubekezela nobubele nesisa, ukwethembeka

²³nobumnene nokuzithiba. Awukho umthetho omelene nalezizinto.

²⁴AbakaKristu Jesu babethele esiphambanweni imvelo yabo yokonakala kanye nokuhheka nezinkanuko zayo.

²⁵UMoya kaNkulunkulu usiphe ukuphila, ngakhoke asiholwe nguMoya empilweni yethu.

²⁶Asingaziqhenyi ngokufuna udumo oluyize, singaqhudelani, singafelani umona!

AseGalathiya 6

Thwalisanani imithwalo

¹Bazalwane, uma umuntu ebhabheka ebubini, nina eniholwa nguMoya oyiNgcwele mvuseni, nikwenze lokhu ngomoya omuhle omnene. Nani qaphelani hleze nilingwe.

²Thwalisanani imithwalo! Ngalokho niyofeza umthetho kaKristu.

³Uma umuntu ezishaya utho, kanti empeleni engelutho, uyazikhohlisa.

⁴Umuntu ngamunye akahlole eyakhe imisebenzi! Uma imihle uyozincoma ngayo, ngaphandle kokuyiqhathanisa naleyo eyenziwa ngomunye.

⁵Ngoba wonke umuntu uyozithwalela owakhe umthwalo.

⁶Umuntu ofundiswa inkolo yobuKristu akaphane kulowo omfundisayo kokuhle konke anakho.

⁷Ningazikhohlisi; akuhlekiswa ngoNkulunkulu. Lokho umuntu akutshalayo uyokuvuna.

⁸Labo abakutshala ngoba befuna ukwanelisa izifiso zemvelo yabo, bayothola kulemvelo yokonakala isivuno esingukubhujiswa, kepha laba abakutshala ngoba bethanda ukwanelisa izilokotho zoMoya kaNkulunkulu, bayothola kuloMoya isivuno esingukuphila okuphakade.

⁹Kepha asingakhathali ukwenza okuhle, ngoba ngesikhathi esifaneleyo siyovuna uma singalilahli ithemba.

¹⁰Ngakhoke uma sisenethuba asenze okuhle kubo bonke, ikakhulu kulabo abangabendlu yakwethu yokukholwa!

Ukuxwayisa kokugcina nokuvalelisa

¹¹Ake nibheke nje ukuthi nginilobela ngesandla esikhulu kangakanani!

¹²Abafuna ukuniphoqa ukuba nisoke yilabo abathanda ukuzenza bahle kubantu. Bakwenzela ukuba babalekele ukuhlushwa ngamaJuda ngenxa yesiphambano sikaKristu.

¹³Ngisho nabasokayo kabawulandeli umthetho; bafuna ukuba nisoke bese bezincoma ngokuthi nalithobela lelisiko lokusoka.

¹⁴Kodwa mina ngingeze ngalinga nakulinga ngizincome ngokunye; ngiyozincoma kuphela ngesiphambano seNkosi yethu uJesu Kristu. Njengoba yabethelwa kuso, nami sengafa mayelana nalomhlaba, nezinto zawo azisangikhangisi.

¹⁵Akusho lutho ngempela ukuthi sisokile noma asisokile, kunye kuphela okumqoka: ukuba sibe yizidalwa ezintsha.

¹⁶Bonke abahamba ngalendlela yemfundiso, akube khona ukuthula kubo, benzelwe isihawu; yibo kanye abanguIsrayeli kaNkulunkulu.

¹⁷Kusukela manje angingabe ngisakhathazwa muntu, ngoba izibazi ezisemzimbeni wami ngazithola ngenxa kaJesu.

¹⁸Bazalwane salani nomusa weNkosi yethu uJesu Kristu, ibusise umoya wenu! Ameni.

ElasEfesu

ElasEfesu 1

Isibingelelo

¹Lencwadi ivela kimi uPawula, engabekwa ngentando kaNkulunkulu ngaba ngumphostoli kaKristu Jesu. Ngiyilobele nina bandla elingcwele lasEfesu enikholwa kuKristu Jesu.

²Nginifisela umusa nokuthula okuvela kuNkulunkulu uBaba naseNkosini uJesu Kristu.

Izibusiso zokomoya zabakaKristu

³Akabongwe uMvelinqangi, yena onguNkulunkulu noYise weNkosi yethu uJesu Kristu! Usibusisile kuKristu thina ngazo zonke izibusiso zokomoya ezisezulwini.

⁴Engakadali mhlaba wasiqoka ngoKristu saba ngabakhe, ukuba thina sibe ngcwele singenasici phambi kwakhe sisothandweni lwakhe.

⁵Wayevele esesinqumele ilungelo lokuba ngamadodana akhe asithola ngoJesu Kristu; wakhlosa lokhu ngentando yakhe.

⁶Kadunyiswe ngomusa wakhe obabazekayo asenzela wona ngeNdodana yakhe ayithandayo!

⁷Yabulawa sachithelwa igazi layo, ukuhlengwa kwethu sekukuyo, izeqo zethu zithethwa ngalo. Mkhulu yini pho umusa wakhe

⁸asicola ngawo kwaze kweva, wasipha inhlakanipho nolwazi lonke.

⁹Wasambulela isu lakhe eliyimfihlakalo ayesevele enqume ukulifeza ngoKristu.

¹⁰Lelisu ayezolifeza sekufika isikhathi, ngelokuba ahlanganise okudaliweyo konke okusezulwini nokusemhlabeni, kube mdibi munye kuKristu oyinhloko.

¹¹Wabuye wasabela ifa kuKristu, njengalokhu ayesevele enqumile kwasekuqaleni ngentando yakhe, yena ofeza konke akuhlosileyo.

¹²Kwakuyintando yakhe ukuba sibe yibo okudunyiswa ngabo ubukhosi bakhe, thina esingabokuqala kulabo ababeka ithemba labo kuKristu.

¹³Nani-ke nakholwa kuKristu mhla nizwa izwi eliyiqiniso, eliyindaba emnandi yensindiso yenu. Njengoba ningabakaKristu uNkulunkulu wanishaya uphawu loMoya oyiNgcwele enawemukelayo njengoba ayethembisile uNkulunkulu.

¹⁴LoMoya uyisibambiso sefa lethu, uqinisa ukuthi isizwe azizuzele sona uNkulunkulu siyohlengwa, kudunyiswe ubukhosi bakhe.

UPawula ubacelela inhlakanipho nolwazi

¹⁵Sengizwile ngokukholwa kwenu eNkosini uJesu nangothando lwenu enithanda ngalo bonke abakhulwayo.

¹⁶Ngakhoke angiphezi ukubonga uNkulunkulu ngenxa yenu nxashana nginikhumbula emikhulekweni yami.

¹⁷Ngiyamnxusa uBaba wodumo, uNkulunkulu weNkosi yethu uJesu Kristu, ukuba aniphe uMoya ozonihlakaniphisa nambulelwe uNkulunkulu nimazi kahle.

¹⁸Akanikhanyisele nivuleke amehlo nibone ukuthi linjani lelithemba anibizele kulo, nokuthi buhle kangakanani ubukhosi balelifa alinika abangcwele.

¹⁹Nibone nokuthi makhulu kangakanani lawamandla asebenza ngawo ngaphakathi kithina esikholwayo. Yiwo-ke lawamandla esabekayo

²⁰ayesebenza ngawo kuKristu mhla emvusa kwabafuleyo, wambeka kwesokunene sakhe ezulwini.

²¹UKristu uyabusa lapho ungaphezu kwazo zonke izikhulu, nabanegunya, neziphathimandla, nababusi, ungaphezu kwabaphethe izikhundla zonke ezaziwayo, kungesikho kulelizwe lamanje kuphela, ngisho nakwelizayo.

²²UNkulunkulu wakugoba konke kwawuthobela umbuso kaKristu, wambeka waba yinhloko yebandla lonke.

²³Lona lingumzimba wakhe, ligcwele ubukhona balowo ogcwalisa konke ngobukhona bakhe ezindaweni zonke.

ElasEfesu 2

Ababefile asebebuye baphila

¹Nina-ke naningabafuleyo niyizaphulamthetho ezafela ezonweni zazo.

²Nanihamba ngokona nilandela imikhuba yalomhlaba, niholwa ngumbusi wemimoya emibi yasemkhathini, lowomoya osebenzayo njengamanje kulabo abangamthobeli uNkulunkulu.

³Nathi sonke sake saphila kanjalo siphethwe yizinkanuko zemvelo yethu, sidelisa izifiso zemvelo nemicabango yethu. Ngokwemvelo yethu, thina kwakusifanele ukuba ulaka lukaNkulunkulu lusijezise njengabo bonke.

⁴Kodwa ububele bukaNkulunkulu bujulile. Ngenxa yothando olukhulu asithanda ngalo

⁵wasivusa sabuye saphila kanye noKristu nalapho siseyizaphulamthetho ezafela esonweni. Ukusindiswa kwenu kuya ngomusa wakhe.

⁶UNkulunkulu wasivusa kanye noKristu wasihlalisa kanye naye ezulwini sikuKristu Jesu.

⁷Wakwenza lokhu ukuba asitshengise ezikhathini ezazisazofika ukuthi umusa wakhe mkhulu ngokwedlulele, ngobubele asenzela bona ngoKristu Jesu.

⁸Ukusindiswa kwenu ngokukholwa kuya ngomusa wakhe. Beningazenzeli nina ngemizamo yenu, kepha kuyisipho sikaNkulunkulu.

⁹Akuyi ngemisebenzi yethu, ukuze kungabikho muntu ozibongayo.

¹⁰Thina singumsebenzi wezandla zikaNkulunkulu. Wasidala saba kuKristu Jesu, ukuba siveze imisebenzi emihle, uMvelinqangi ayihlelela phambilini ukuba siyenze.

Sibumbene saba munye kuKristu

¹¹Ngakhoke anokhumbula ukuthi kuqala naniphila kanjani nina enaningabezizwe ngokuzalwa. Babenazi ngokuthi anisokile, labo ababethi bangabokusoka — besho umkhuba nje owenziwa ngezandla.

¹²Khumbulani ukuthi ngalesosikhathi naningenabudlelwane noKristu. Nanihlululiwe emphakathini wakwaIsrayeli, ningenamalungelo kulezozivumelwano ezakhelwe phezu kwesethembiso sikaNkulunkulu. Naningenathemba ningenaNkulunkulu lapha emhlabeni.

¹³Kepha manje senikuKristu Jesu, nina enake naqhela nakude. Senibuye nasondezwa ngokuchithelwa igazi likaKristu.

¹⁴Yena ongukuthula kwethu wadala ukuxolelana, wahlanganisa amaJuda nabezizwe baba sizwe sinye. Wazinikela ekufeni wadiliza udonga lobutha olwalusahlukanisa.

¹⁵Waqeda umthetho kaMose nemiyalo nezinqumo zawo. Wawuqeda khona ezobumba lezizizwe zombili zibe munye, kudaleke isizwe esisodwa esikuye, kube khona ukuxolelana nokuthula.

¹⁶Waqeda ubutha ngokufa kwakhe esiphambanweni, wahlanganisa zombili izizwe zaba mzimba munye, wazenza zabuyisana noNkulunkulu.

¹⁷Weza-ke wafike washumayela indaba ethokozisayo yokuthi, kukhona ukuthula okuqondene nani enanikude, ukuthula abanakho nalabo abaseduze.

¹⁸NgoKristu thina sonke maJuda nabezizwe sesinelungelo lokusondela kuBaba ngaMoya munye.

¹⁹Ngakhoke aniseyibo abafokazi nabantu bokuhamba, kepha seniyizakhamuzi ngaphansi kombuso munye nabangcwele, ningabendlu kaNkulunkulu.

²⁰Nani imbala nakhelwe phezu kwesisekelo esingabaphostoli nabaphrofethi; itshe legumbi lalesisakhiwo linguKristu Jesu uqobo lwake.

²¹Nguye obumbanisa isakhiwo sonke, sihlangane sikhule sibe yithempeli elingcwele eNkosini.

²²Nisebunyeni nayo niyaxhiwa kanye nathi ngokoMoya sibe yindlu kaNkulunkulu.

ElasEfesu 3

Ukusebenza kukaPawula kwabezizwe

- ¹Mina Pawula ngiboshelwe uKristu Jesu ngihluphekela nina bezizwe,
- ²engikholwa ukuthi nizwile ngobunceku uNkulunkulu angethwese bona ngomusa wakhe, ukuba ngimemezele kinina lomusa.
- ³Ungambulele lemfihlakalo ukuba ngiyazi. Sengike ngaloba ngamafishane ngayo.
- ⁴Uma nifunda, niyokhanyelwa ngolwazi enginalo ngalemfihlakalo kaKristu.
- ⁵Ezizukulwaneni esezadlula babengazange bayikhonjiswe abantu bomhlaba, kepha manje uNkulunkulu useyambulele abaphostoli nabaphrofethi bakhe abangcwele ngoMoya wakhe.
- ⁶Imfihlakalo yileyo okulandwa ngayo evangelini yokuthi, kuKristu Jesu abezizwe sebeyizindlalifa kanye nathi. Bayizitho zamzimba munye kanye nathi. Bahlanganyela nathi esethembisweni sikaNkulunkulu.
- ⁷UNkulunkulu wangibeka ngaba yinceku yalelivangeli lapho esebenza ngamandla akhe engipha umusa wakhe.
- ⁸Ngingomncinyane ngisho kunalowo okuthiwa ungotondo kubo bonke abangcwele. Nokho uNkulunkulu wangipha lesisipho somusa wakhe sokuba ngishumayeze abezizwe indaba emnandi yamafa kaKristu angecwaningwe aqondakale.
- ⁹Wathi mangichachise isu elimayelana nemfihlakalo eyayikade iyisifuba sikaMvelinqangi kwaphakade, yena mdali wezinto zonke.
- ¹⁰Wayehlose ukuba, ngobukhona bebandla esikhathini samanje, kubonakale inhlakanipho kaNkulunkulu enhlobonangi, yazeke ezikhulwini neziphathimandla kweliphezulu.
- ¹¹Lokhu wakuhlosa kwaphakade wayesekufeza ngoKristu Jesu iNkosi yethu.
- ¹²Siyakholwa kuye, ngakhoke ubunye bethu naye businika ilungelo lokuba sisondele ngomqhanago nangesibindi kuNkulunkulu.
- ¹³Sengiyancenga-ke ukuba ningadikibali ngokunihluphekela kwami, kodwa zigabiseni ngakho.

Ukulwazi uthando lukaKristu

- ¹⁴Ngakhoke ngiguqa ngamadolo ngikhuleka kuBaba.
- ¹⁵Oyise bayo yonke imindeni esezulwini nasemhlabeni babizwa ngegama lakhe.
- ¹⁶Yena owande ngodumo nenkazimulo, ngiyamnxusa ukuba aniphe amandla, aqinise ingaphakathi lenu ngoMoya wakhe.
- ¹⁷Nginxusa ukuba nikhholwe kuKristu, ahlale enhliziyweni yenu. Ngincelela ukuba nigxile othandweni lwakhe, lube yisisekelo senu.

¹⁸Yikhona niyothola amandla okuqonda, nikanye nabo bonke abakholwayo, ukuthi ububanzi nobude nokuphakama nokujula kothando lwakhe kungakanani.

¹⁹Sengathi ningalwazi uthando lukaKristu olwedlula ukuqonda konke, nize nigcwaliswe swi ngokugcwala okupheleleyo kukaNkulunkulu!

²⁰Akabongwe uMvelinqangi osebenza kithi ngamandla akhe, yena okwazi ukusenzela kweve kakhulu ngaphezu kwalokho esingakucela nesiingakuqonda.

²¹Ufanele ukudunyiswa ebandleni ngoKristu Jesu ezizukulwaneni zonke phakade naphakade. Ameni.

ElasEfesu 4

Ukuba mzimba munye

¹Mina engiboshelwe iNkosi uJesu ngiyaniyala-ke ukuba niziphathe ngendlela efanele labo ababizelwe ukulandela uKristu.

²Zithobeni nibe mnene ninyamezele njalo, nibekezelelane ngothando!

³Khuthalelani ukuzibopha ngesibopho esingukuthula, ningabudungi ubunye obuvela ngoMoya kaNkulunkulu!

⁴Umzimba munye, noMoya munye, njengoba lilinye nethemba anibizele kulo uNkulunkulu.

⁵INkosi iyodwa, ukholo lunye, umbhabhadiso munye.

⁶UNkulunkulu uyedwa onguYise wabo bonke, obabusayo bonke, esebenza ngabo bonke, ekubo bonke.

⁷Sonke siphawe iziphiwo zomusa, yilowo nalowo ngesilinganiso asabelwe nguKristu.

⁸Umbhalo ongcwele uthi: “Wenyuka waya endaweni yakhe ephezulu, wemuka nabaningi abathunjiweyo, abantu wababela izipho,”

⁹Pho, ukuthi “wenyuka” kuqondeni na? Kukhomba ukuthi wake wehlela lapha emhlabeni.

¹⁰Lowo-ke owehla, nguye kanye owenyuka walengama lonke elaphezulu ukuba agcwalise konke ngobukhona bakhe.

¹¹Nguye owabela abantu iziphiwo: abanye bangabaphostoli, abanye bangabaphrofethi, abanye bangabashumayeli bendaba emnandi, abanye bangabelusi abafundisayo.

¹²Wahlomisa abakholwayo ukuba bafeze umsebenzi wobunceku, kwakheke ibandla elingumzimba kaKristu,

¹³size sifinyelele sonke ebunyeni sibumbane ngokukholwa nangokuyazi iNdodana kaNkulunkulu. Siyokhula ngobuntu bethu size sipheliselwe sifike ebangeni lobuntu obupheleleyo kuKristu.

¹⁴Asisayikuba njengabantwana siphoswe ngapha nangapha ngamagagasi, sipheshulwa yimimoya yonke ebhenguzayo emfundisweni, nxashana abantu befuna ukusihlakaniphela, basedukise ngokusiyenga ngobuqili.

¹⁵Kepha-ke siyokuma eqinisweni sinothando, sikhule kukho konke size sifane noKristu yena eyinhloko.

¹⁶Nguye ohlanganisa umzimba wonke, zonke izitho zawo zixhumane zelekelelane. Yilesa nalesositho senza umsebenzi waso ngokuyikho, umzimba wonke ubusukhula wakheke, ubuswa uthando.

Ukuphila kabusha kuKristu

¹⁷Nginyanitshela-ke ngifakaza egameni leNkosi uJesu ngithi: Ningabe nisaziphatha njengokomkhuba wabezizwe abangakhulwayo. Imiqondo yabo iyize leze,

¹⁸ingqondo yabo ifiphaziwe. Bahlululiwe ekuphileni okuvela kuNkulunkulu. Kabazi lutho kuthe khuhle, banhliziyo zilukhuni banenkani.

¹⁹Sebafelwa unembeza kabasenamahloni, sebazinikela emachilweni bahahela ukwenza konke ukungcola.

²⁰Kepha lokhu akuhambelani nenakufundayo mhla niba ngabafundi bakaKristu.

²¹Natshelwa ngaye nemukela imfundiso yakhe yeqiniso elikuJesu.

²²Nafundiswa ukuba ningabe nisaphila njengoba kade nenza, kodwa ukuba nikhumule imvelo yenu yokonakala eniyisa ekubhujisweni, nikhohliswa yizinkanuko zenu.

²³Nabuye nafundiswa ukuthi, kufanele kuguqulwe inhliziyo nomqondo wenu kube kusha,

²⁴nembathe imvelo yomuntu omusha edalwe yafuza uNkulunkulu, nihambe ngokulunga nobungcwele beqiniso.

²⁵Ngakho yekani amanga, nikhulume iqiniso umuntu kumuntu, lokhu siyizitho zamzimba munye.

²⁶Uma nithukuthela zibambeni ningoni, ilanga lingashoni nisadiniwe,

²⁷hleze uSathane nimnike ithuba lokunahlula.

²⁸Owebayo akayeke ukweba, asebenze aziphilise ngezikhwepha zakhe, akwazi nokupha abantulayo.

²⁹Emlonyeni wenu akungaphumi inkulumo ebhinayo, kepha khulumani okusizayo nokwakhayo lapho kudingeke khona, kulethe isibusiso kwabezwayo.

³⁰Ningawudabukisi uMoya oyiNgcwele kaNkulunkulu. Wona uluphawu enalushaywa nguNkulunkulu, kube neqiniso lokuthi usuku luyofika lapho niyohlengwa ngokupheleleyo.

³¹Awaphele nya phakathi kwenu amagqubu nolaka nentukuthelo nesiwiliwili nokujivazana, kanye nobubi bonke.

³²Yibani mnene omuye komunye, nihawukelane nithethelelane njengalokhu noNkulunkulu anithethelela ngoKristu.

ElasEfesu 5

Hambani njengabantu bokukhanya

¹Lingisani uNkulunkulu, njengoba ningabantwana bakhe abathandekayo.

²Ukuhamba kwenu akubuswe uthando olunjengalolo uKristu asithanda ngalo. Wadela ukuphila kwakhe ngenxa yethu, waba ngumnikelo nomhlathshelo oyiphunga elithaphuka kamnandi elethulwa kuNkulunkulu.

³Ubufebe nobunuku noma baluphi uhlobo ngisho nokubuhahela, akungaphathwa nakuphathwa nje phakathi kwenu, ngoba lokho akuwafanele amaKristu.

⁴Ningayikhulumi into eyichilo, ningampompi nincokole kabi; esikhundleni salokho bongani uNkulunkulu.

⁵Hlalani nazi ukuthi, nobani oyisifebe nonamanyala nohahayo (phela onjalo ukhonza izithixo) akanasabelo efeni elingumbuso kaKristu noNkulunkulu.

⁶Ningakhohliswa muntu ngamazwi ayize, ngoba yizo lezizinto ezibanga ulaka lukaMvelinqangi ukuba lwehlele kulabo abangamthobeli.

⁷Nina-ke musani ukudlelana nabo.

⁸Nanikade nibuswa ngubumnyama, kodwa manje ningukukhanya eNkosini. Ziphatheni-ke njengabantu bokukhanya!

⁹Ukukhanya kuveza izithelo ezingubuhle bezinhlobo zonke nokulunga neqiniso.

¹⁰Hlolisisani ukuthi yikuphi okuthandeka eNkosini!

¹¹Yahlukanani nemisebenzi yabantu ababuswa ngubumnyama ningayenzi ngoba ayisizi ngalutho, kodwa kunalokho yidaluleni.

¹²Kuyichilo ngisho nokuxoxa nje ngezinto abazenza esitha.

¹³Konke-ke okudalulwayo kuvezwa obala ngukukhanya,

¹⁴ngoba konke okuvezwa obala kuba ngukukhanya. Yingakho-ke kuthiwa: “Phaphama wena oleleyo uvuke kwabafuleyo, yikhona uyophunyelwa yilanga elinguKristu akukhanyisele.”

¹⁵Ngakhoke qaphelani ukuthi niziphethe kanjani, ningabi yiziwula, kodwa nihlakaniphe.

¹⁶Sebenzisani onke amathuba eninawo, ngoba lezizikhathi esiphila kuzo zimbi.

¹⁷Ngakhoke musani ukuba yizithutha; qondani ukuthi uNkulunkulu ufuna ukuba nenzeni.

¹⁸Alinganidaki iwayini hleze libulale impilo yenu nibe yimiphuphe, kodwa uMoya oyiNgcwele awugcwale ezinhliziyweni zenu.

¹⁹Hayani nivumelane ngamahubo namaculo nezingoma zokoMoya, nihlabelele nihube enhliziyweni yenu nibongele iNkosi.

²⁰Mbongeni njalo uNkulunkulu uBaba ngakho konke ngegama leNkosi yethu uJesu Kristu!

Ukuhlalisana kwabaganeneyo

²¹Thobelanani ngoba uKristu nimesaba!

²²Nina makhosikazi thobelani abayeni benu kube sengathi nithobela iNkosi!

²³Ngoba indoda iyinhloko yomkayo njengalokhu uKristu eyinhloko yebandla angumsindisi walo, libe lingumzimba wakhe.

²⁴Njengoba ibandla limthobela uKristu, kanjalo nabafazi abathobele abayeni babo ngakho konke.

²⁵Nina madoda thandani omkenu njengalokhu noKristu alithanda ibandla, wadela ukuphila kwakhe ngenxa yalo.

²⁶Wakwenza lokhu ukuba libe ngelahlukaniselwe uNkulunkulu, walingcwelisa walihlambulula ngamanzi nangezwi lakhe.

²⁷Ngoba wayethanda ukulisondeza kuye ibandla linenkazimulo, lingenachashazi nasihla nokunye okunjalo, kodwa libe ngcwele lingabi nasici.

²⁸Ngokunjalo namadoda kufanele athande omkawo njengalokhu ethanda eyawo imizimba. Othanda umkakhe uzithanda yena uqobo.

²⁹Akakho owake wazonda owakhe umzimba, kodwa wonke umuntu uyawondla awunakekele, njengalokhu noKristu elondla ibandla elinakekela.

³⁰Thina-ke siyizitho zomzimba wakhe.

³¹Umbhalo ongcwele uthi: “Ngakhoke indoda iyoshiya uyise nonina inamathele kumkayo, laba ababili babe muntu munye.”

³²Lemfihlakalo inkulu, mina-ke ngiyifanekisa noKristu nebandla.

³³Kepha nakini ngithi yileyo naleyondoda ayithande umkayo ngothando ezithanda ngalo. Kodwa owesifazane akahloniphe umyeni wakhe.

ElasEfesu 6

Ukuzithoba nokukhombisa uthando

- ¹Nina bantwana lalelani abazali benu ngenxa yeNkosi, ngoba kufanele ukuba nikwenze lokhu.
- ²Umyalo wokuqala onesethembiso yilowo othi: “Yazisa uyihlo nonyoko,
- ³ukuze konke kukuhambele kahle, imihla yakho yande emhlabeni.”
- ⁴Nani bazali musani ukubachukuluza abantwana benu; bakhuliseni ngomthetho wamaKristu, nibaphathe ngesandla esiqinile nibayale!
- ⁵Nina zisebenzi lalelani abaniphetheyo emsebenzini, nibakhonze ngenhliziyo eqotho, nibesabe nibazise kube sengathi nilalela uKristu.
- ⁶Ningakwenzi lokhu ngoba benibuka, kodwa thembekani noma bengekho, nibe yizisebenzi zikaKristu eziyenza ngenhliziyo intando kaNkulunkulu.
- ⁷Yenzani umsebenzi wenu niwujabulele, kungabi sengathi nenzela abantu kodwa nenzele iNkosi uJesu.
- ⁸Khumbulani ukuthi umuntu wonke, eyisigqila noma ekhululekile, uyovuzwa yiNkosi uma kukhona okuhle akwenzayo.
- ⁹Nani baphathi, ziphatheni kanjalo izisebenzi zenu ningazisongeli. Niyazi ukuthi nina nezisebenzi zenu niphethwe nonke yiNkosi esezulwini engenzeleli.

Ukuhloma izikhali zikaNkulunkulu

- ¹⁰Okokugcina, qinani eNkosini nasemandleni ayo amakhulu!
- ¹¹Hlomani zonke izikhali zikaNkulunkulu yikhona nizokwazi ukuzabalaza nxa uSathane enihlasela ngamaqhinga akhe.
- ¹²Asilwi nabantu nje, kepha sibhekene nezikhulu nababusi neziphathimandla okuyimimoya yalomhlaba osebumnyameni, imimoya emibi esemkhathini.
- ¹³Ngakhoke hlomani izikhali zonke zikaNkulunkulu, ukuze nikwazi ukumelana nezitha mhla kukubi, nilwe niqede, nigcine seninqobile.
- ¹⁴Yimani niqine, iqiniso libe ngumchilo enibhukule ngawo izinkalo zenu, ukulunga kube ushodo lwenu lokuvikela isifuba,
- ¹⁵izinyawo zenu ziqine nilungele ukuhambisa indaba emnandi yokuthula!
- ¹⁶Ngaphezu kwakho konke, phathani isihlangu esingukukholwa, ukuze nikwazi ukuzivikela nxa omubi enihlasela ngemicibisholo evutha umlilo, niwubhule.
- ¹⁷Yamukelani insindiso, ibe yisigqoko sokuvikela ikhanda, uMoya oyiNgcwele unihlomise ngenkemba eyizwi likaNkulunkulu.

¹⁸Kwenzeni lokhu ngokukhuleka njalo nokunxusa uNkulunkulu, nithandaze ngezikhathi zonke, uMoya wakhe unihole! Hlalani niqaphile niphikelele ekukhulekeni, ninxusele bonke abakholwayo!

¹⁹Ninginxusele nami, nicele ukuba uNkulunkulu anginike amazwi afaneleyo ngezikhathi sengizokhuluma, ngibe nesibindi sokushumayela imfihlakalo yendaba emnandi.

²⁰Ngiyinxusa lalelivangeli ngisho noma ngiboshiwe. Celani ukuba ngilishumayele ngesibindi njengoba kufanele.

Ukuvalelisa

²¹Ukuze nani nazi ukuthi ngihlezi nhlaloni nokuthi ngiqhuba kanjani, niyokuzwa konke ngoThikhikho, umzalwane othandekayo osebenzela iNkosi ngokwethembeka.

²²Ngalesosizathu-ke ngimthumela kini, ukuze anibikele ukuthi thina sihlezi kanjani, kududuzeke izinhliziyu zenu.

²³Bazalwane salani nokuthula nothando nokukholwa okuvela kuNkulunkulu uBaba naseNkosini uJesu Kristu.

²⁴Abasale nomusa bonke abathanda iNkosi yethu uJesu Kristu, baphile phakade!

ElaseFiliphi

ElaseFiliphi 1

Isibingelelo

¹Lencwadi ivela kimi uPawula nakuThimothi, esiyizinceku zikaKristu Jesu. Siyilobela nina nonke bandla elingcwele laseFiliphi eningabakaKristu Jesu, kanye nabaholi bebandla namagosa alo.

²Sinifisela umusa nokuthula okuvela kuNkulunkulu uBaba naseNkosini uJesu Kristu.

UPawula uyabakhulekela

³Kuthi njalo lapho nginikhumbula bese ngimbonga uNkulunkulu.

⁴Kuyaye kuthi njalo lapho nginikhulekela nonke, ngikhuleke ngentokozo,

⁵ngoba selokhu nangilekelela njalo emsebenzini wevangeli kusukela osukwini lokuqala kwaze kwaba manje.

⁶Ngineqiniso lokuthi uNkulunkulu owaqalisa umsebenzi omuhle kinina uyowufeza kuze kube mhla wosuku lokubuya kukaKristu Jesu.

⁷Kungifanele ukuba ngibuswe ngumcabango onjalo nxa nginikhumbula nonke, ngoba nihleli njalo nisenhliziyweni yami nina nonke enihlanganyela kulowomusa nami engiwenzelwe nguNkulunkulu ngisaboshiwe nalapho ngilivikela ivangeli esigcawini, ngilishumayela ukuba abantu balikholwe.

⁸UNkulunkulu ungufakazi wami wokuthi ngikhuluma iqiniso ekutheni umuzwa enginilangazelela ngawo uvela embilinini kaJesu uqobo.

⁹Emkhulekweni wami nginxusa ukuba uthando lwenu luvame kakhulu, kanye nolwazi nokuqonda okupheleleyo,

¹⁰ukuba nikwazi ukukhetha okufaneleyo. Bese kuthi mhla ebuyayo uKristu nibe msulwa ningenasici,

¹¹kuvame kini imisebenzi elungileyo evela ngoJesu Kristu, ukuze kudunyiswe uNkulunkulu abongwe.

“Kimi ukuphila kungukuphila kuKristu”

¹²Manje-ke bakwethu, ngithanda ukuba nazi ukuthi izinto ezangehlayo zabanga ukuba ivangeli liqhubeke,

¹³kwaze kwabakhanyela ngokusobala bonke ogqayinyanga besigodlo sengonyama kanye nabo bonke abalapha ukuthi kanti ngiboshelwe ukusebenzela uKristu.

- ¹⁴Njengoba ngisejele nje, iningi labazalwane lethembela kakhulu eNkosini uJesu, kwaba yima bequngeka kakhulu isibindi sokushumayela izwi likaNkulunkulu bengesabi.
- ¹⁵Abanye kambe bashumayela uKristu ngomona nangochuku, kepha kukhona nabanye abakwenza ngenhloso elungileyo.
- ¹⁶Laba bakwenza kusuka othandweni ngoba bayazi ukuthi uNkulunkulu ungikhethele ukuvikela ivangeli.
- ¹⁷Kepha abanye laba bashumayela uKristu wombango, bengahlosile okuhle kodwa behlose ukuba bafeze izinjongo zabo, becabanga ukuthi uma benze njalo ngizokhathazeka kakhulu ngisejele.
- ¹⁸Mina angigqizi qakala! Okuyikhonakhona ukuthi bayashumayela ngoKristu noma ngayiphi indlela, noma ngabe bahlose okubi noma okuhle. Ngakhoke ngiyathokoza, ngiyobe ngisalokhu ngithokoza.
- ¹⁹Ngiyazi phela ukuthi isiphetho salokhu ukuthi ngiyophepha ngiphume phambili, ngamandla emikhuleko yenu nangokusiza koMoya kaJesu Kristu.
- ²⁰Isifiso sami esikhulu nethemba lami ukuba ngingahlazeki ngalutho kodwa ngibe nomqhanago ngidumise uKristu, manje njengoba bengikwenza izikhathi zonke, udumo lwakhe lugqame ngakho konke engikwenzayo, noma ngiyafa noma ngiyaphila.
- ²¹Ngoba kimi ukuphila kungukuphila kuKristu, ukufa kuyinzuzo.
- ²²Kodwa, uma ngokuphila kwami kulomhlaba ngisazoqhubeka nomsebenzi oveza izithelo, ngiyadideka ukuthi ngizokhethani.
- ²³Ngisengxakini yezinto ezimbili. Bengingafisa kakhulu ukwemuka kulomhlaba ngiyozihlalela noKristu; lokhu kungaba ngcono kakhulu.
- ²⁴Kodwa-ke ngenxa yenu, kungcono khona ukuba ngisale sengihlala ukuze nisizakale.
- ²⁵Ngineqiniso ngalokhu, ngakhoke ngiyazi ukuthi ngisazohlala nani. Ngizolokhu ngihlezi nani nonke nginisiza ukuba nithuthuke ekukholweni, nijabule ngakho,
- ²⁶nibe nesizathu sempela sokumdumisa uKristu Jesu ngenxa yami uma sengiphinda ngifika kini.
- ²⁷Into nje, ziphatheni ngendlela evumelana nevangeli likaKristu, kuthi noma ngiphumelela ukuza lapho nginibone noma ngingasaphumeleli, kodwa ngizwe ukuthi nimi niqinile, nimoya munye, ninenhloso eyodwa, nibambisene nilwela lenkolo engumphumela wendaba emnandi.
- ²⁸Ningavumi nakancane ukwesatshiswa ngabamelene nani, kodwa yimani isibindi. Bayobona ngalokhu ukuthi bayochithwa, kodwa nina nisinde ngoNkulunkulu oninqobisayo.

²⁹Waninika ngesihle lelithuba lokuba nikholwe kuKristu, nangaphezu kwalokho nibuye nihlupheke ngenxa yakhe.

³⁰Nani nisalwa leyompi enangibona ngiyilwa nenizwa ngayo ukuthi ngisayilwa namanje.

EfaseFiliphi 2

Ukuzithoba kukaKristu nokuthobelana kwamaKristu

¹Kukhona phakathi kwenu ukukhuthazana njengoba ningabakaKristu, kukhona nokududuzana okuvela othandweni nobudlelwano obulethwa nguMoya kaNkulunkulu, kukhona isisa nokuzwelana phakathi kwenu.

²Ngakhoke ngiyanincenga ukuba ningijabulise ngokuphelele ngokuba nizwane, nithandane, nibe nhliziyonye nimoya munye.

³Ningenzi lutho ngokuzifunela okwenu, kumbe niziqhenye ngokufuna udumo oluyize, kodwa thobelanani, yilowo makathi bonke bangcono kunaye.

⁴Yilowo nalowo akanganaki okwakhe yedwa, kodwa akanake okuzophumelelisa abanye.

⁵Yibani nalowomqondo ayenawo uKristu Jesu!

⁶Wayevele enesimo sikaNkulunkulu, kodwa ukulingana kwakhe noNkulunkulu akakwenzanga into angase ayibange, abambelele kuyo njengempango.

⁷Kepha wadela konke ayikho, waqoka isimo sobunceku, wazalwa enesimo sobuntu. Waphila gendlela ephilwa ngabantu,

⁸wayesezithoba, walalela waze wadela ukuphila kwakhe, wafa ngokubethelwa esiphambanweni.

⁹Ngakhoke uNkulunkulu wamphakamisa wambeka esikhundleni esiphezulu, wamnika igama elikhulu elidlula amagama onke,

¹⁰ukuze ngegama likaJesu zonke izidalwa ezikweliphezulu nezisemhlabeni nezingaphansi komhlaba ziguqe ngamadolo zimkhulekele,

¹¹zivume zonke ngokusobala ukuthi uJesu Kristu uyiNkosi. kudunyiswe uNkulunkulu uYise.

Ukukhanya kwamaKristu emhlabeni

¹²Bahlobo bami abathandekayo, beningilalela njalo ngesikhathi ngisenani. Sekudingeke kakhulu manje ukuba ningilalele ngalesisikhathi ngingasekho kini. Qhubekani nisebenzele insindiso yenu ngokwesaba nangokuthuthumela.

¹³Ngoba uNkulunkulu uyasebenza ezinhliziyweni zenu yikhona nizojabula ukwenza intando yakhe, nibe namandla okuyenza.

¹⁴Kwenzeni konke ngaphandle kokukhonona nokuphikisana,

¹⁵nibe msulwa ningenacala ningabantwana bakaNkulunkulu abangenasici behlezi phakathi kwabantu balomhlaba abakhohlakeleyo abayizoni. Khanyani phakathi kwabo njengezinkanyezi zilokoza esibhakabhakeni,

¹⁶nina enibambelele ezwini eliletha ukuphila koqobo. Uma nenze njalo ngiyozigabisa ngani mhla uKristu esebuya, ngoba kuyobonakala ukuthi imizamo yami nomsebenzi wami awubanga yisithukuthuku senja esiphelela eboyeni.

¹⁷Ukukholwa kwenu ngikwethula kuNkulunkulu njengomhlatshelo. Noma kungase kwenzeka ukuba izingazi zami zichithwe khona lapho, nokho ngiyobabula ngithokoze kanye nani nonke.

¹⁸Kanjalo-ke nani kufanele nijabule nithokoze kanye nami.

UThimothi noEphafroditho

¹⁹Uma kuyintando yeNkosi uJesu, ngethemba ukuthi ngizomthumela kini masinyane uThimothi khona ngizokhuthazeka lapho sengizwa ngenhlalo yenu.

²⁰Amukho omunye umuntu lapha onomqondo onjengowakhe, onganibonelela ngempela.

²¹Bonke banaka okungokwabo, kabanandaba nokuqondene noJesu Kristu.

²²Niyazi ukuthi uThimothi usekubonakalisile ngempela ukwethembeka kwakhe, esebenza nami njengendodana isebenza noyise ukuba siyishumayele indaba emnandi.

²³Ngakhoke ngethemba ukuthi ngizomthumela kini masinyane uma sengizwile ngodaba lwami ukuthi luphetha kanjani.

²⁴Ngethemba iNkosi ukuthi nami ngizosheshe ngize kini mathupha.

²⁵Bengibone kunesidingo sokuba ngithumele kini umzalwane wethu uEphafroditho ebesiqhuba naye umsebenzi wokuvikela ivangeli. Nguye lowo oyinxusa lenu enamthumela kimi ukuba angisize kulokho engikudingayo.

²⁶Usha amashushu ufisa ukunibona nonke. Ukhathazeke kabi emoyeni njengoba nezwa ukuthi uyagula.

²⁷Ngempela wayegula kwembulwa kwembeswa. Kodwa uNkulunkulu wamenzela isisa, akahawukelanga yena yedwa kodwa nami futhi wangihawukela, ukuba ngingafikelwa usizi olungaphezu kwalolo enganginalo.

²⁸Kungakho-ke ngizimisele kangaka ukuba ngisheshe ngimthumele kini, bese nithokoza nxa senibuye nambona, nami ngingabe ngisakhathazeka.

²⁹Nize nimamukele ngokuthokoza ngoba ungumzalwane kanye nani eNkosini uJesu. Yazisani abantu abanjalo.

³⁰Ukuzinikela kwakhe emsebenzini kaKristu kwake kwamsondeza engozini yokufa lapho ezidela amathambo ukuba angisize kulokho eningaphumelelanga ukungisiza kukho.

ElaSeFiliphi 3

Ukulunga okuyikho

¹Bazalwane bami, okokugcina ngithi thokozani ngeNkosi enikuyo! Akungihluphi ukukuphinda lokho enginitshela khona, kanjalo nani niyohlala nilondekile.

²Baxwayeni abayizinja! Baxwayeni abayizisebenzi ezikhohlakeleyo! Baxwayeni laba abagcizelela ukuba kusokwe ngokusoka okuyisiko labantu nje.

³Ngoba labo abasokwe ngokuyikho yithina esikhonza uNkulunkulu siqhutshwa nguMoya wakhe, sigabe ngoKristu Jesu, singethembeli emikhubeni engamasiko akobantu.

⁴Mina uqobo ngingaba nesizathu ngempela sokuba ngethembele ezintweni ezinjalo. Impela uma kungase kube khona omunye ozibona ukuthi unesizathu sokwethembela kulokho ayikho nakwenzayo, mina-ke ngingaba nesizathu esikhulu kunaye.

⁵Ngasokwa ngosuku lwesiphohlango ngizelwe. NgingumIsrayeli womndeni wakwaBhenjamini. NgingumHebheru wokudabuka. Mayelana nokugcina umthetho ngangingumfarisi.

⁶Ngawushisekela ngangoba ngaze ngazingela ibandla likaKristu. Mayelana nokulunga okutholakala ngokugcina umthetho ngangingasoleki.

⁷Kepha ngenxa kaKristu, kuthe lezozinto ezabe ziyinzuzo kimi ngazibona sekuyizona ezingishonisayo.

⁸Naphezu kwalokho, ngisakubuka konke ngikubone kungishonisa uma ngikuqhathanisa, ngoba kungelinganiswe nobukhulu bokumazi uKristu Jesu iNkosi yami. Ngenxa yakhe sengakudela konke, ngakushaya uvobo, ukuba ngizuze uKristu,

⁹ngibe ngowakhe. Angisenakho ukulunga okungokwami, lokhukulunga okutholakala ngokugcina umthetho; kodwa manje ukulunga enginakho ngikuthola ngokukholwa kuKristu, lokhukulunga okuvela kuNkulunkulu obathetha ngecala abakholwa kuJesu.

¹⁰Kunye kuphela engikufunayo: ukuba ngimazi uKristu, ngibe nalawomandla ayenawo esevukile kwabafuleyo, ngihlanganyele naye ekuhluphekeni kwakhe, ngimfuze ngife ngendlela afa ngayo.

¹¹Kanjalo ngiyethemba ukuthi nami ngiyovuswa kwabafuleyo ngiphile.

Ukuphokophelela phambili

¹²Angisho ukuthi sengifinyelele emgomeni kumbe sengiphelele, kodwa ngilokhu ngiphokophelele ukuzuza umklomelo. Ngoba uKristu Jesu wangizuza ngaba ngowakhe ukuba ngithole lomklomelo.

¹³Impela bakwethu, angisho ukuthi sengiwuzuzile, kodwa yinye into engiyenzayo: angizikhathazi ngezinto esengadlula kuzo, kodwa ngiphikelela ukuba ngizuze umklomelo.

¹⁴Ngiphokophelele emgomeni ukuba ngizuze umklomelo ongukuphila okuphakade engabizelwa kukho nguNkulunkulu ngoKristu Jesu.

¹⁵Ngakhoke thina sonke esifinyelele esigabeni sokuphelela asibe nalomqondo! Uma kukhona enye into eniyibona ngokunye, uNkulunkulu uyonambulela lokho ukuba kunichachele.

¹⁶Into nje asihambe ngayo leyondlela ebesihamba ngayo saze safinyelela lapho sesikhona.

¹⁷Bazalwane, ngilingiseni njalo nonke, nibanake labo abaziphethe njengathi thina esiyisibonelo esihle kini.

¹⁸Ngoba baningi abaphila ngendlela engalungile. Sekukaningi nginitshela ngalokhu ngesikhathi esedlule, ngiyaphinda namanje ngenhliziyo ebuhlungu ngikhala ezimathonsi. Bayizitha zikaKristu ezimpilo yazo iphikisana nokufa kwakhe esiphambanweni.

¹⁹Bayogcina ngokulahlwa babhubhe ngoba isithixo sabo abasikhonzayo yizifiso zabo ezimbi. Bayazigqaja ngalokho okufanele batheleke amahloni ngakho, bacabanga ngezinto zomhlaba kuphela.

²⁰Thina-ke siyizakhamuzi ngaphansi kombuso wasezulwini. Simlindele ngamehlo abomvu umsindisi wethu, iNkosi uJesu Kristu, ukuba abuye ezulwini.

²¹Uyoguqula imizimba yethu ebuthakathaka nefayo, ibe njengomzimba wakhe okhazimulayo. Uyokwenza lokhu esebenzisa amandla akhe akwazi ukuhlela ngawo konke kube ngaphansi kombuso wakhe.

ElaseFiliphi 4

¹Ngakhoke yimani niqine kulobubudlelwane benu neNkosi uJesu, bazalwane bami abathandekayo engifisa kakhulu ukuba ngibe nani. Niyangithokozisa bakwethu, ningumqhele wami engiziqhenya ngawo.

Izeluleko

²Ngiyala uEvodiya, ngiyala noSintikhe ukuba badle ngalukhezo lunye njengabazalwane abathobela iNkosi uJesu.

³Nawe mngane wami obulokhu usebenza nami ngokwethembeka, ngiyakucela ukuba usize laba besifazane ukuba bezwane. Sasebenza kanzima sibambisene

nabo ekuqhubeni indaba ethokozisayo. Lomsebenzi sasiwenza noKlementi nabanye abamagama abo abhalisiwe encwadini yokuphila.

⁴Thokozani njalo ngeNkosi. Ngiyaphinda ngithi: Thokozani!

⁵Bonke abantu ababone ukuthi nimnene. INkosi uJesu iyeza masinyane.

⁶Ningabi navuso ngalutho kodwa khulekani kuNkulunkulu nibike zonke izicelo zenu, nimbonge!

⁷Kothi-ke lokhokuthula esikulethelwa nguNkulunkulu okwedlula ukuqonda komuntu kulondolozwe izinhliziyi zenu nemicabango yenu nikuKristu Jesu.

⁸Elokugcina bazalwane bami, ngithi zindlani ngakho konke okukhomba ukulunga nokufanele ukudunyiswa; okuyiqiniso nokuhloniphekayo nokulungileyo nokuhlanzekileyo nokuthandekayo nokutusekayo.

⁹Yenzani konke lokhu enakufunda kimi nakwemukela, khona lokho engakhuluma nakubona ngikwenza. UNkulunkulu osilethela ukuthula akabe nani!

Ukubonga isipho

¹⁰Ngathokoza kakhulu ngayibonga iNkosi ngoba senize nabuye nathola ithuba lokungikhombisa ukunginakekela kwenu. Nanilokhu nifisa ukungisiza, kodwa nangalithola ithuba lokwenze njalo.

¹¹Angikusho lokhu ngoba ngiswele. Mina sengafunda ukuba nganeliswe yilokho enginakho.

¹²Ngiyakwazi ukuntula, ngiyakwazi ngisho nokuzitika ngombuso. Kukho konke sengafunda imfihlo yokuba nganeliswe, noma ngabe ngiyesutha noma ngabe ngiyalamba. Akulutho kimi ukuthi ngiyabusa noma ngiyeswela yini.

¹³Nginamandla okumelana noma yini ngoKristu ongiqiniso.

¹⁴Nayenza nokho into enhle kakhulu nangisiza ngisezingxakekweni.

¹⁵Futhi-ke niyazi nina bandla laseFiliphi ukuthi ngenkathi ngisuka kwelaseMasedoniya, lapho indaba ejabulisayo isaqala ukushunyayelwa, yinina kuphela ibandla elahlanganyela nami odabeni lokwaba nokwamukela izipho.

¹⁶Nalapho ngiseThesalonika ngidinga usizo nangelekelela, akwaba kanye kuphela kodwa nabuye naphinda futhi.

¹⁷Akukhona ukuthi ngifuna ukwamukela izipho nje, kodwa ngithanda ukubona izithelo zokomoya eziyosiza nina.

¹⁸Ngizamukele zonke izipho eningiphe zona; beziziningi zingaphezu kokwenza. Ngeneliswa impela lapho sengizitholile izipho zenu enazithumela ngoEphafroditho. Zinjengomhlatshele onephunga elimnandi owethulwa kuNkulunkulu, ziwumnikelo owemukelekayo kuye nomthokozisayo.

¹⁹UNkulunkulu wami uyonabela konke enikudingayo, ngokuvama kwamafa akhe akuKristu Jesu.

²⁰Akadunyiswe uBaba uNkulunkulu wethu phakade naphakade! Ameni.

Ukuvalelisa

²¹Ngiyakhonza kulowo nalowo okholwa kuKristu Jesu. Abazalwane enginabo lapha bayakhonza kini.

²²Bonke abakholwayo bayakhonza, ikakhulu labo abasebenza esigodlweni sengonyama uKhesari.

²³Salani nomusa weNkosi uJesu Kristu, ibusise umoya wenu!

ElaseKholose

ElaseKholose 1

Isibingelelo

¹Lencwadi ivela kimi uPawula, engathunywa ngokwentando kaNkulunkulu ngaba ngumphostoli kaKristu Jesu; ivela nakumzalwane uThimothi.

²Ngiyilobele nina bandla elingcwele laseKholose, abazalwane abathembekileyo abakholwa kuKristu. Nginifisela umusa nokuthula okuvela kuNkulunkulu uBaba.

UPawula uyabakhulekela

³Sihleze simbonga uNkulunkulu, uYise weNkosi yethu uJesu Kristu, lapho sinithandazela.

⁴Phela sesezwa ngokukholwa kwenu kuKristu Jesu nangothando enibathanda ngalo bonke abakholwayo.

⁵Lokhukukholwa naloluthando kungenxa yethemba lalokho enikulondolozelwe ezulwini. Nezwa ngakho phambilini lapho nishunyayezwa izwi leqiniso eliyindaba ethokozisayo

⁶eseyafika kini. Emhlabeni wonke lendaba emnandi ilokhu ithela izithelo zokomoya iqhubekela phambili, njengalokhu yenza nakini mhla niqala ukuzwa ngayo, nalapho niqala ukwazi ngomusa kaNkulunkulu njengoba unjalo.

⁷Nawufundiswa nguEphafrasi othandekayo, inceku esibambisene nayo. Uyisisebenzi sikaKristu esethembekile enisizakala ngomsebenzi waso.

⁸Nguye futhi owasitshela ngothando lwenu enaluphiwa nguMoya oyiNgcwele.

⁹Kungakhoke silokhu sanithandazela, kusukela mhla sizwayo ngani. Sinicelela kuNkulunkulu ukuba anzise kugqame lokho okuyintando yakhe nokuba uMoya wakhe uniphe ukuhlakanipha konke nokuqonda,

¹⁰ukuba nikwazi ukuphila ngendlela ethandwa yiNkosi, nenze konke okuyithokozisayo. Sikhulekela ukuba nithele izithelo kuwo wonke umsebenzi omuhle, nikhule ekumazini uNkulunkulu.

¹¹Sinicelela ukuba niqine emandleni onke anipha wona ngenkazimulo yobukhosi bakhe, nikwazi ukuqiniseka nibekezele kukho konke. Thokozani

¹²nibonge uYise owanenza nafanela isabelo sefa elilondolozelwe abangcwele embusweni wokukhanya.

¹³Wasophula emandleni obumnyama, wasingenisa embusweni weNdodana yakhe ethandekayo.

¹⁴Iyona esihlengwa ngayo sithethelelwe izono zethu.

Ubuyena bukaNkulunkulu buseNdodaneni ngokuphelele

¹⁵Inguye nezinqotho ngokufana noNkulunkulu ongabonwayo. IyiNdodana yakhe yamazibulo, yayikhona indalo yonke ingakaveli.

¹⁶Ngoba iyona okwadalwa ngayo konke okusezulwini nasemhlabeni, okubonwayo nokungazange kubonwe: lezozidalwa ezisezihlalweni zobukhosi nababusi nezikhulu neziphathimandla. Konke okukhona kwadalwa ngayo, kwadalwa ukuba kube ngokwayo.

¹⁷Iyona eyayivele isikhona ngaphambi kwakho konke, konke kulokhu kukhona ngayo.

¹⁸Iyinhloko yomzimba oyibandla layo, yiyo eyisisusa sempilo yalo, ingqalabutho eyavuswa kwabafuleyo ukuba ibe ngumakhonya kukho konke.

¹⁹Kwakuyintando nenhloso kaNkulunkulu ukuba kuzinze eNdodaneni yakhe ubuyena bakhe ngokupheleleyo,

²⁰abuyisane ngayo nakho konke okukhona emhlabeni nasezulwini, enze ukuba kube khona uxolo ngegazi leNdodana elachithwa msukwana ibulawa esiphambanweni.

²¹Luphathelene nani futhi loluxolo. Naniqhelelene kakhulu noNkulunkulu niyizitha kuye ngemicabango nangemisebenzi yenu emibi.

²²Kepha manje uNkulunkulu usebuyisene nani ngeNdodana yakhe eyazalwa yaba ngumuntu, yabulawa ngenxa yezono zenu. Wabuyisana nani ukuze anethule ningcwele nimsulwa ningenasici phambi kwakhe,

²³uma nje beningalokhu nikholwa, nigxilile esisekelweni esiqinileyo, ningavumi ukuphelelwa yithemba enalithola lapho nizwa indaba emnandi. Lendaba emnandi yashunyayelwa kubo bonke abaphansi komthunzi welanga. Nami mina Pawula ngaba yisisebenzi esiyifakazelayo.

Ubunceku bukaPawula ebandleni

²⁴Manje ngiyajabula uma nginihluphekela. Ngoba ngokuhlupheka kwami emzimbeni ngiqedela okusileleyo kulezozinhlopheko okumele zingehlele ngenxa kaKristu, ngihluphekela ibandla elingumzimba wakhe.

²⁵UNkulunkulu wangibeka ngaba yinceku ebandleni ukuba nisizakale, wanginqumela ukuba ngishumayele izwi lakhe ngihlube udlubu ekhasini.

²⁶Ezizukulwaneni ngezizukulwane, laliyimfihlakalo kusukela ezikhathini zasemandulo, kepha manje lemfihlakalo isiyambulelwe abangcwele bakhe.

²⁷Kwakuyicebo likaNkulunkulu ukuba bazi imfihlakalo yakhe, babone ukuthi buhle kangakanani ubukhosi bayo malungana nabezizwe. Imfihlakalo ukuthi uKristu usezinhliziyweni zenu, okusho ukuthi nihlala ninethemba lokuhlanganyela noNkulunkulu ebukhosini.

²⁸Ngakhoke thina sishumayela uKristu, seluleka wonke umuntu, sifundisa wonke umuntu, sikwenza ngenhlakanipho yonke esinayo, ukuba sibethule kuNkulunkulu, yilowo nalowo esebuntwini obupheleleyo ekuKristu.

²⁹Ukuze lokhu kwenzeke ngiyasebenza ngishikashikeke, ngoba amandla amakhulu kaKristu asebenza kimi.

ElaseKholose 2

¹Ngithanda ukuba nazi ukuthi nginisebenzela kanzima kangakanani nina nabaseLawodisiya nabo bonke abangakaze bangibone ngamehlo.

²Ngikwenza lokhu khona bezokhuthazeka, bahlangane nganhliziyonye othandweni baze babe nalowomcebo wonke ongukwethemba okupheleleyo okutholakala ngokuqonda okujulileyo. Ngalendlela bayoyazi imfihlakalo kaNkulunkulu enguKristu uqobo.

³Kuyena kuthukuswe umtapo wamagugu onke okuhlakanipha nolwazi.

⁴Ngikusho lokhu ukuba ningayengwa muntu anihunge ngenkulumo.

⁵Ngoba noma ngingekho lapho mina siqu sami, kodwa inhliziyo yami ikanye nani, ngiyathokoza nxashane nginibona niqinile nithe ngqi nibumbene ekukholweni kwenu kuKristu.

Impilo epheleleyo nxa sikuKristu

⁶Njengoba senimamukele uKristu Jesu eyiNkosi, hlalani kuye, nihambe naye.

⁷Izimpande zokukholwa kwenu azigxile kuye, nakhele impilo yenu kuye, niqine ekukholweni njengalokho nifundisiwe, nimbonge njalo kuvame.

⁸Qaphelani hleze kube khona onithumbayo ngokuniyenga, afike anikhohlise ngenhlakanipho yabantu eyize nangesifundiso abasishiyelwa ngokhokho babo. Lokho abakushoyo ngezinto zalomhlaba ezingamalutha kuphambene noKristu.

⁹Ngokuba emzimbeni kaKristu kuhlala uqobo lobuNkulunkulu buphelele.

¹⁰Uma nikuye niphila impilo epheleleyo. Nguye oyinhloko yayo yonke imimoya ebusayo nephethe amandla.

¹¹Ebunyeni benu noKristu nasokwa kungengokusoka okwenziwa ngabantu, kodwa ngokusoka okungokukaKristu. Kuyilokhukusoka okunikhululayo, ningabe nisabuswa yimvelo yenu yokonakala.

¹²Ngoba mhla nibhabhadiswa nambelwa kanye noKristu, embhabhadisweni navuswa kanye naye ngenxa yoba nawakholwa amandla uNkulunkulu awasebenzisa mhla emvusa ekufeni.

¹³Nanikade ningabafuleyo ngokomoya ngenxa yeziphambeko zenu, nisabuswa yimvelo yenu yokonakala ningasokiwe ngokusoka kukaKristu. Kodwa manje uNkulunkulu usenivusile kanye noKristu, wasithethelela zonke izono zethu.

¹⁴Wesula icala lethu elalikhonjwa yimiyalo yomthetho eyayimelene nathi isilahla, ilotshwe emqulwini. Wathatha lowomqulu wawususa ngokuwubethela esiphambanweni sikaKristu.

¹⁵NgoKristu wanqoba amandla ababusi abayimimoya neziphathimandla, wabathela ngehlazo obala ngokubathumba esebanqobe bathela.

¹⁶Ngakhoke akungabi bikho muntu onahlulela ngenikudlayo nenikuphuzayo noma ngezinsuku ezingcwele nemikhosi emikhulu namasabatha.

¹⁷Konke lokhu kunjengethunzi nje eliyihlola lalokho okuzayo; okuyikhonakhona nguKristu.

¹⁸Ningavumeli muntu ukuba anemuke umklomelo wenu, embuluza ezenza othobile ekhonza izingilosi, ezama ukuzenza mkhulu ngoba ethi uboniswa imibono. Lababantu abanje abanengqondo ebuswa yimvelo yabo yokonakala bazikhukhumeza ngeze nje.

¹⁹Kodwa kababambelele kuKristu oyinhloko yebandla elingumzimba wakhe. Lomzimba wonke usizwa nguKristu owondlayo, awuhlanganise ngamalungu nemisipha, ukhule njengoba uNkulunkulu ethanda.

Impilo entsha kuKristu

²⁰Senafa kanye noKristu nakhululwa ezintweni zomhlaba eziluthayo. Pho niphilelani sengathi ningabomhlaba, nithobele imithetho enjengale:

²¹“Ungakubambi lokhu! Mus' ukudla lokhu! Ungakuthinti lokhuya!”

²²Konke lokhu okushiwoyo kuyizinto eziphelayo uma sezisetshenzisiwe. Lemfundiso ingeyabantu nje nemithetho yabo.

²³Lemithetho enje ibukeka sengathi ingukuhlakanipha, lapha abantu beziqokela inkonzo yamalutha, bembuluza bezenza abathobileyo, bekhandla kabi imizimba yabo. Kodwa konke lokhu akusizi ngalutho, kusimze kwenelise imvelo yabo yokonakala.

ElaseKholose 3

¹Nivusiwe ekufeni kanye noKristu, ngakhoke bhekisani izinhliziyu zenu ezintweni zasezulwini lapho uKristu ekhona, ehlezi ngakwesokunene sikaNkulunkulu.

²Izinhliziyu zenu azinake izinto zasezulwini, zingazinaki izinto zalapha emhlabeni.

³Senafa, ukuphila kwenu kulumbaniswe noKristu, kwase kuthukuswa kuNkulunkulu.

⁴Mhla uKristu eseqhamuka, yena kuphila kwenu, niyobonakala naye, nihlanganye naye ebukhosini bakhe.

⁵Ngakhoke kuhle nibulale izinkanuko zomhlaba emalungwini enu, ningabe nisabuswa ubufebe nobunuku nokuhheka nokukhanuka nokuhaha okungahlukene nokukhonza izithixo.

⁶Ngoba lezizinto yizona ezibanga ukuba uMvelinqangi ehlisele ulaka lwakhe kulabo abangamlaleli.

⁷Nani nake nahamba kanjalo lapho impilo yenu isabuswa yizinkanuko.

⁸Kepha manje, ziqhuthululeni zonke lezizinto: ulaka nokuthukuthela nobubi nokuthuka nokukhuluma izinto eziyichilo.

⁹Ningaqambelani amanga, ngoba senilahle impilo yenu enanikade niyiphila kuqala nemikhuba yayo emibi,

¹⁰nembatha ubuntu obudalwe kabusha, ukuze nakhiwe kabusha njalo nifane noMvelinqangi umdali wenu, nibe nolwazi olupheleleyo ngaye.

¹¹Isiphetho salokhu ukuthi akusekho mehluko phakathi komGriki nomJuda, umuntu osokile nongasokile, owesizwe neqaba, isigqila nokhululekileyo, kodwa uKristu uyikho konke, ukubo bonke.

¹²UNkulunkulu uyanithanda, wanikhetha ukuba nibe ngabakhe. Ngakhoke njengoba ningabangcwele bakhe, yibani nobubele nesisa, nizithobe nibe mnene niqinisele!

¹³Bekezelelanani nithethelelane uma kukhona onesikhalo komunye. Thethelelani njengalokhu iNkosi uJesu yanithethelela!

¹⁴Ngaphezu kwakho konke lokhu yibani nothando, yilona olubopha konke ndawonye, kube yinto ehlangene ngokuphelele.

¹⁵Ukuthula uKristu anilethela khona akubuse ezinhliziyweni zenu! Ngoba yilokhukuthula enabizelwa ndawonye kukho, naba mzimba munye. Mbongeni uNkulunkulu ngalokho!

¹⁶Indaba emnandi kaKristu equkethe umcebo ongaka ayingene ihlale ezinhliziyweni zenu. Fundisanani niyalane nisebenzise konke ukuhlakanipha eninakho, nihaye amahubo namaculo nezihlabelelo zobuMoya, ezinhliziyweni zenu nihubele uNkulunkulu nimbonge!

¹⁷Konke enikwenzayo nenikushoyo akuvumelane negama leNkosi uJesu, nimbonge uNkulunkulu uBaba ngaye!

Ukuhlalisana kwabakholwa kuKristu

¹⁸Nina makhosikazi thobelani abayeni benu njengento efanele ukwenziwa yilabo abakholwa eNkosini uJesu.

¹⁹Nina madoda thandani omkenu ningabi nesidlakadla kubo!

²⁰Nina bantwana lalelani abazali benu kukho konke, ngoba lokho kuyathandeka eNkosini uJesu.

²¹Nani bazali musani ukuchukuluza abantabenu hleze badikibale.

²²Nina zisebenzi balaleleni kukho konke abaniphethayo emsebenzini! Ningakwenzi lokhu ngoba benibona, kodwa thembekani noma bengekho, nibakhonze ngenhliziyo eqotho, nibalalele ngoba niyesaba iNkosi uJesu.

²³Lokho enikwenzayo, kwenzeni ngenhliziyo yonke, kube sengathi nisebenzela iNkosi, ningasebenzeli umuntu nje.

²⁴Khumbulani ukuthi iNkosi uJesu iyonivuzwa ngefa elibekelwe abantu bayo. Ngoba iNkosi eniyisebenzelayo nguKristu.

²⁵Owenza okubi uyovuzwa ngemisebenzi yakhe emibi, ngoba uNkulunkulu akabandlululi.

EIaseKholose 4

¹Nina baphathi anobaphatha ngokufaneleyo nangobuqotho abanisebenzelayo! Kumbulani ukuthi nani ninoniphethayo, iNkosi esezulwini.

Izeluleko

²Phikelelani emkhulekweni, nihlale niqaphele lapho nikhuleka, nidumise uNkulunkulu.

³Nathi sithandazeleni ukuba uNkulunkulu asivulele umnyango nce sishumayele izwi lakhe, simemezele imfihlakalo kaKristu engiboshwe ngenxa yayo.

⁴Khulekani-ke ukuba ngikhulume okufaneleyo, ngikusho ngendlela echachileyo.

⁵Ziphatheni ngokuhlakanipha uma niphakathi kwabangakholwayo, nisebenzise onke amathuba eninawo.

⁶Ukukhuluma kwenu akube mnandi kuhlwabuse, kodwa kungabi duma, nikwazi ukuphendula ngokufaneleyo imibuzo yomuntu ngomuntu.

Ukuvalelisa

⁷UThikhikho, umzalwane othandekayo nesisebenzi esithembekileyo esibambe naso kulomsebenzi weNkosi, uzonitshela konke ngami ukuthi ngihlezi nhlaloni.

⁸Ngalesosizathu-ke ngimthumela kini, ukuba afike anibikele ukuthi thina sihlezi kanjani anikhuthaze.

⁹Uhambisana no-Onesimo, umzalwane othandekayo nothembekileyo ovela kwelakini. Bazonitshela konke okwenzekayo lapha.

¹⁰UAristakho esiboshwe kanye naye uyakhonza. Kanjalo noMarko umzala kaBhanabhasi, uyakhonza naye. Senitsheliwe ngaye; mamukeleni kahle uma efika kini!

- ¹¹UJoshwa okuthiwa nguJustu, naye uyakhonza. Phakathi kwamaJuda aphendukileyo yibo bodwa abasebenzela umbuso kaNkulunkulu kanye nami; bebekade bengisiza kakhulu.
- ¹²Uyakhonza uEphafrasi wakwelakini oyisisebenzi sikaKristu Jesu. Uyanikhulekela njalo ngesithukuthezi, enicelela kuNkulunkulu ukuba niqine nibe ngamakholwa apheleleyo azinikele ekwenzeni yonke intando kaNkulunkulu.
- ¹³Mina uqobo ngingamfakazela ukuthi uyanisebenzela kakhulu nina kanye nabaseLawodisiya nabaseHiyerapholi.
- ¹⁴Ukhonzile umzalwane othandekayo udokotela uLuka benoDemasi.
- ¹⁵Sikhonzeleni kubazalwane baseLawodisiya nakuNimfa nasebandleni elihlanganela kwakhe.
- ¹⁶Uma seniyifundile lencwadi, nize niyidlulisele nasebandleni laseLawodisiya ukuba ifundwe nakhona. Nani anobuye nifunde leyoncwadi engiyibhalele abaseLawodisiya abazoyithumela kini.
- ¹⁷Nize nithi kuAkipho: “Qaphela ukuba ufeze umsebenzi owawunikwa wokuba usebenzele iNkosi uJesu!”
- ¹⁸Ngesami isandla ngiloba ngithi: Mina Pawula ngiyakhonza. Nize ningakhohlwa ukuthi ngiseyisiboshwa! Nisale nomusa!

1 kwelaseThesalonika

1 kwelaseThesalonika 1

Isibingelelo

¹Lencwadi ivela kimi uPawula nakuSilasi noThimothi. Siyilobela nina bandla laseThesalonika, eningabakaNkulunkulu uBaba nabeNkosi uJesu Kristu. Sinifisela umusa nokuthula.

Ukuphila nokukholwa kwabaseThesalonika

²Siyaye simbonge uNkulunkulu ngenxa yenu nonke lapho sinibeka emikhulekweni yethu.

³Uma siguqile phambi kukaBaba uNkulunkulu wethu, siyaye sikhumbule imisebenzi yenu ebonisa ukukholwa kwenu eNkosini yethu uJesu Kristu, sikhumbule nokushikashikeka kwenu okukhombisa uthando eniyithanda ngalo, nokukhuthazela kwenu okukhomba ukuthi nibheke kuyo ngethemba.

⁴Siyazi bazalwane ukuthi uNkulunkulu onithandayo wanikhetha naba ngabakhe,

⁵ngoba ivangeli esalishumayela kini lalingesiwo amagama nje kuphela, kodwa lafika ngamandla oMoya oyiNgcwele nangokukholwa impela ukuthi liyiqiniso. Niyazi ukuthi saziphatha kanjani phakathi kwenu; lokhu kwasiza nina.

⁶Nasilingisa thina neNkosi uJesu. Noma senibhekene nobunzima obukhulu, nayamukela indaba emnandi ngokujabula okuvela kuMoya oyiNgcwele.

⁷Nase niba yisibonelo kubo bonke abakholwayo kwelaseMasedoniya naseAkhaya.

⁸Lendaba emnandi elanda ngeNkosi uJesu kayizwakalanga eMasedoniya naseAkhaya kuphela, kodwa kwezwakala yonke indawo ngokukholwa kwenu kuNkulunkulu. Ngakhoke akusadingekile ukuba sisho utho ngakho.

⁹Ngoba kabawuvali umlomo ngendlela enasamukela ngayo mhla sifike lapho kini. Nalahla inkonzo yonkulunkulumbumbulu, naphendukela kuNkulunkulu ukuba nimkhonze uNkulunkulu ophilayo onguyenayena,

¹⁰nilindele ukubuya kweNdodana yakhe ezulwini ayivusayo kwabafuleyo. InguJesu osihlengayo olakeni lukaNkulunkulu oluzayo ngomhla wokuphela.

1 kwelaseThesalonika 2

Ukusebenza kukaPawula phakathi kwabo

¹Bazalwane niyazi nani ukuthi ukunihambela kwethu ngezindaba zevangeli akubanga ngamandla esambane.

²Niyakhumbula ukuthi singakafiki lapho kini sahlushwa saphathwa kabi emzini waseFiliphi. Phezu kwakho lokhu uNkulunkulu wethu wasimisa isibindi, sayimemezela kini indaba ejabulisayo evela kuye, nakuba sabhekana nobunzima.

- ³Ukuniyala kwethu akukhona okwedusayo, akuyi ngenhloso embi, futhi asiniqilizeli ngamalutha.
- ⁴Kodwa siyaye sikhulume lokho uNkulunkulu afuna ukuba sikusho, ngoba sewasivivinya, wabona ukuthi sifanele ukwethweswa lomsebenzi wokushumayela indaba emnandi. Asiqondile ukujabulisa abantu, kodwa sifuna ukuthokozisa uNkulunkulu ohlola izinhliziyi zethu.
- ⁵Niyazi ukuthi asizange sisebenzise amazwi okunithopha. UNkulunkulu ungufakazi wethu ukuthi amazwi ethu ayengesizo izaba zokuhaha.
- ⁶Asikaze silufune udumo kumuntu ngisho nakini imbala,
- ⁷nanxa singaba nelungelo elipheleleyo lokuhlonishwa njengoba singabaphostoli bakaKristu. Kodwa saba nesisa kini njengonina ondla usana lwakhe.
- ⁸Sinithande ngangoba sikubone kufanele ukuba sinilethele indaba ethokozisayo evela kuNkulunkulu, singagcini lapho kuphela kodwa sibuye sidele ukuphila kwethu ngenxa yenu.
- ⁹Impela niyakhumbula bakwethu ukuthi sakhandleka sashikashikeka, sisebenza imini nobusuku ukuba singabi ngumthwalo kini ngesikhathi sinishumayeza indaba emnandi kaNkulunkulu.
- ¹⁰Nina kanye noNkulunkulu ningofakazi bethu bokuthi ukuziphatha kwethu phakathi kwenu nina makholwa kwakuhlanzekile, kuqotho, kungenaphunga elibi.
- ¹¹Niyazi nokuthi yilowo nalowo wenu samphatha njengoyise enakekela abantwana.
- ¹²Sasilokhu sinikhuthaza siniduduza sigcizelela ukuba niphile impilo ethandwa nguNkulunkulu onibizela embusweni wakhe ukuba nihlanganyele naye ebukhosini bakhe.
- ¹³Thina simbonga njalo uNkulunkulu ngoba kuthe lapho sinibikela indaba yakhe emnandi nayizwa nayemukela, yangaba yindaba nje evela kubantu, kodwa nayemukela yaba yizwi likaNkulunkulu, ekubeni iyilo ngempela, okuyilona elisebenzayo phakathi kwenu nina enikholwayo.
- ¹⁴Ngoba nehlelwa yilokho bakwethu okufana nokwehlela amabandla kaNkulunkulu aseJudiya asebunyeni noKristu Jesu, ngoba nahlushwa yisizwe sakini njengalokhu nawo ahlushwa ngamaJuda.
- ¹⁵Ayibulala iNkosi uJesu nabaphrofethi basendulo, nathi abuye asizingela. UNkulunkulu akawajabuleli; futhi ayizitha zabantu bonke.
- ¹⁶Azama nokusivimbela ukuba singabashumayezi abezizwe basindiswe. Ngokona kwawo sonke lesisikhathi anqwabela izono phezu kwezinye, andisa icala lawo. Ngakhoke manje ulaka lukaNkulunkulu selugcine lwawehlela.

UPawula ufuna ukubuye abahambele

¹⁷Thina-ke bazalwane sahlukani nani okwesikhashana nje. Nakuba sasingasaniboni nanilokhu nikhona ezinhliziyweni zethu. Njengoba sasinilangazelela kangaka, sazama kakhulu ukuba sibuye sibonane nani.

¹⁸Sasisophe ukuza lapho kini. Mina Pawula ngazama izikhathi ezimbili. Kodwa uSathane wasivimbela.

¹⁹Yinina impela eniyithemba lethu nokuthokoza kwethu neniyoba ngumqhele wethu esiyowuklonyelwa nesiyozigabisa ngawo phambi kweNkosi yethu uJesu mhla esebuya; abekho abanye abanedlulayo kulokhu.

²⁰Ngempela siyaziqhayisa sithokoze ngani.

1 kwelaseThesalonika 3

¹Kuthe lapho singasenakukubekezelela lokhu, sabona kungcono ukuba thina sisale sodwa eAthene,

²sase sithumela umzalwane wethu uThimothi, oyisisebenzi sikaNkulunkulu esishumayela kanye naso indaba emnandi elanda ngoKristu, ukuba eze animise isibindi anikhuthaze ekukholweni kwenu,

³ukuze kungabikho muntu oyothikanyezwa yilezizinhlobo. Nina nazi kahle ukuthi simelwe ukubhekana nazo.

⁴Empeleni lapho sisahlezi nani sasho kungakenzeki sathi kumele sihlushwe. Sekwenzeke njengoba sasishilo, nani niyazibonela ngokusobala.

⁵Kungalesisizathu-ke okwathi lapho ngingasenakunyamezela nakancane, ngase ngithumela kini ukuba ngizwe ngokukholwa kwenu, hleze sewafika umlingi uSathane wazonilinga, ukushikashikeka kwethu kwaba njengesithukuthuku senja esiphelela eboyeni.

⁶Hhayi nokho, uThimothi ufikile lapha kithi wasilethela izindaba ezithokozisayo lapho esibikela ngokukholwa kwenu nangothando lwenu. Usitshelile ukuthi nisikhumbula njalo nithokoze, nokuthi nisha amashushu okusibona njengoba nathi sifisa ukunibona.

⁷Ngakhoke bazalwane kulo lonke usizi nobunzima obusiphetheyo sakhuthazeka ngenxa yenu nxashana sizwa ngokukholwa kwenu.

⁸Sesizizwa siphilile njengoba nimi niqinile nihlala eNkosini uJesu.

⁹Asazi ukuthi singambonga sithini uNkulunkulu wethu, sikhombise konke ukujabula kwethu esithokoza ngakho phambi kwakhe ngenxa yenu.

¹⁰Imini nobusuku siyaye sikhuleke ngokushiseka sicela kuNkulunkulu ukuba sibuye sibonane nani, khona sizokwazi ukugcwalisa lokho okusasilele ekukholweni kwenu.

¹¹Sengathi uBaba uNkulunkulu wethu, neNkosi yethu uJesu, yena mathupha angasihlahlela indlela size sifike kahle kini!

¹²INkosi uJesu ayinimize ukuba nithandane, nithande nabantu bonke, uthando lwenu lukhule luchichime lube lukhulu ngangothando esinithanda ngalo.

¹³Sengathi inganenza niqine ukuze kungasoleki lutho kini, kodwa nitholakale ningcwele phambi kukaBaba uNkulunkulu wethu mhla iNkosi yethu uJesu iza nabo bonke abangcwele bayo ngomhla wokuphela.

1 kwelaseThesalonika 4

Impilo ethokozisa uNkulunkulu

¹Ekugcineni bakwethu ngithi: Sanifundisa indlela okufanele niphile ngayo ukuba nithokozise uNkulunkulu. Kakade yiyo kanye lendlela eniphila ngayo. Manje-ke siyaninxusa sinincenga ngegama leNkosi uJesu ukuba niqhubekele phambili nithuthuke kulendlela.

²Niyazazi iziyalo esanitshela zona sigunyazwe yiNkosi uJesu.

³Kuyintando kaNkulunkulu ukuba ningcwelise nahlukaniselwe yena, ningatholakali neze emanyaleni obufebe,

⁴kodwa yilowo nalowo wenu akashade, ahlalisane nomkakhe ngendlela ethakaswe nguNkulunkulu netuseka kubantu,

⁵kungabi ngoba ebuswa yizinkanuko njengabahedeni, bona abangakholwa kuNkulunkulu.

⁶Akungabikho muntu owona umfowabo amphambe kuloludaba. Sake sanitshela sanidonsa ngendlebe, sathi iNkosi uJesu iyobajezisa labo abenza izono zaloluhlobo.

⁷UNkulunkulu akasibizelanga ukuba siphile impilo yokonakala, kodwa wasibiza ukuba sibe ngabakhe sahlukaniselwe yena.

⁸Ngakhoke uma ningafuni ukulalela lemfundiso, akusiye umuntu enimphikayo kodwa niphika uNkulunkulu, yena oninika uMoya wakhe oyiNgcwele.

⁹Akudingekile ukuba sinilobele mayelana nokuthandana kwabazalwane, ngoba nina nafundiswa nguNkulunkulu ukuba nithandane.

¹⁰Nangempela niyabathanda bonke abazalwane kulo lonke elaseMasedoniya. Kodwa siyaniyala bakwethu ukuba nikwenze lokhu niqhubekele phambili.

¹¹Shisekelani ukuhlala ngokuthula nibhekane nezindaba eziqondene nani kuphela, niphile ngezikhwepha zenu, niqhubeke njengoba sake saniyala.

¹²Yikhona niyozakhela igama elihle nihlonipheke nakwabangakholwayo, nizimele ningantuli lutho.

Ukuza kweNkosi uJesu

¹³Bazalwane, sithanda ukuba nazi ngalabo abalele kwelabafileyo, ningadabuki njengabangakholwayo, bona abangenathemba.

¹⁴Siyakholwa ukuthi uJesu wafa wabuye wavuka ekufeni. Kanjalo-ke siyakholwa nokuthi labo asebafa bekhola kuJesu bayovuswa nguNkulunkulu, ababuthela kuye bekanye noJesu.

¹⁵Lokhu esikusho kini kuyimfundiso yeNkosi uJesu uqobo, ukuthi thina esiyobe siphila kulomhlaba mhla iNkosi ibuyayo asiyikwandulela labo asebevele belele befile.

¹⁶Ngoba iNkosi uJesu uqobo iyokwehla ezulwini ngenhlokomo enkulu. Kuyozwakala izwi lengilosi enkulu, kukhale icilongo likaNkulunkulu, labo abafa bekhola kuKristu bavuke kuqala.

¹⁷Thina esikulomhlaba siyohlwithwa kanye nabo siye emafwini, sihlangebeze iNkosi uJesu emkhathini wezulu, bese sihlala nayo ungunaphakade.

¹⁸Ngakhoke khuthazanani ngalawamazwi!

1 kwelaseThesalonika 5

Lindelani iNkosi iyeza!

¹Akudingekile bazalwane ukuba sinilobele sinitshele ngosuku nangesikhathi okuyokwenzeka ngaso lokhu.

²Ngoba nina nazi kahle ukuthi usuku lokubuya kweNkosi uJesu luyofika njengesela ebusuku.

³Ngesikhathi abantu bethi: “Sihlezi kahle ngokuthula,” ngaso lesosikhathi bese bebhujiwa bengazelele, njengowesifazane okhulelweyo ofikelwa yimihelo engazelele. Ngeke baphunyuke.

⁴Kodwa-ke nina bakwethu anikho ebumnyameni, ukuba lolosuku selungaze lunifikele njengesela ningazelele.

⁵Ngoba nina nonke ningabantu bokukhanya abathanda imini. Asibuthandi ubusuku, ngoba asiyibo abantu bobumnyama.

⁶Ngakhoke asingalali ubuthongo njengabangakholwayo, kodwa asihlale siqaphile sizithibe.

⁷Ngoba abalalayo balala ebusuku, kanti-ke futhi nabadakwayo badakwa ebusuku,

⁸kodwa thina esithanda imini asizithibe, ukukholwa nothando kube ushodo lwethu lokuvikela isifuba, ithuba lethu lensindiso libe yisigqoko sokuvikela ikhanda.

⁹Ngoba uNkulunkulu akasikhethelanga ukuba sehlelwe ulaka lwakhe, kodwa ukuba samukele ukusindiswa ngeNkosi yethu uJesu Kristu.

¹⁰Yafa ngenxa yethu ukuze kuthi noma ngabe siyaphila noma sifile mhla ibuya, siphile kanye nayo.

¹¹Ngakhoke khuthazanani nakhane njengoba nempela nenza.

Izeluleko zokugcina nokuvalelisa

¹²Siyanincenga bakwethu ukuba nibazise kakhulu labo abasebenza kanzima phakathi kwenu, benihola beneluleka.

¹³Bahlonipheni kakhulu nibathande ngenxa yomsebenzi abawenzayo. Hlalianani ngokuthula!

¹⁴Bazalwane siyaniyala ukuba nikhuze amavila, nikhuthaze abangenasibindi, nisize ababuthakathaka, nibe nesineke kubo bonke.

¹⁵Qaphelani ukuba kungabikho muntu ophindisayo athi iva likhishwa ngelinye, kepha phokophelelani njalo ukwenza okuhle omunye komunye nakubantu bonke!

¹⁶Thokozani njalo,

¹⁷nikhuleke ningaphezi,

¹⁸nibonge uNkulunkulu kukho konke, ngoba kuyintando yakhe ukuba nenze njalo njengoba ningabakaKristu Jesu.

¹⁹Ningawucimi umlilo onguMoya oyiNgcwele,

²⁰ningazeyisi izintshumayelo zabaphrofethi!

²¹Hlolisisani kahle konke bese nibambelela kokulungileyo,

²²nigweme lonke uhlobo lobubi!

²³Sengathi uNkulunkulu uqobo, uNkulunkulu wokuthula, anganingcwelisa ngokupheleleyo, alondoloze umoya wenu nomphefumulo wenu nomzimba wenu, ukuze nitholakale ningenasici mhla iNkosi yethu uJesu Kristu isibuya.

²⁴Uyokwenza lokhu, ngoba uthembekile, yena onibizayo.

²⁵Sithandazeleni nathi, bakwethu!

²⁶Nize ningikhonzele kubo bonke abazalwane ngokwanga kwabakholwayo!

²⁷Nginyaniyala ngegama leNkosi uJesu ukuba bonke abazalwane bafundelwe lencwadi.

²⁸Salani nomusa weNkosi yethu uJesu Kristu!

2 kwelaseThesalonika

2 kwelaseThesalonika 1

Isibingelelo

¹Lencwadi ivela kimi uPawula nakuSilasi noThimothi. Siyilobela nina bandla laseThesalonika eningabakaNkulunkulu uBaba nabeNkosi uJesu Kristu.

²Sinifisela umusa nokuthula okuvela kuNkulunkulu uBaba naseNkosini uJesu Kristu.

Ukwahlulela mhla uKristu esebuya

³Kumele simbonge njalo uNkulunkulu ngenxa yenu bazalwane. Kufanele ngempela, ngoba ukholo lwenu luyakhula kakhulu, kanti futhi luyanda nothando enithandana ngalo nonke.

⁴Ngakhoke njalo uma sihambela amabandla kaNkulunkulu siyaye sizigabise ngani ngenxa yokukholwa kwenu okuqiniseka phezu kokuba nizingelwa, futhi nihlupheka.

⁵Konke lokhu kukhomba khona ukuthi uNkulunkulu wehlulela ngobuqotho. Ngakhoke uyothi kufanele ukuba nibe ngaphansi kombuso wakhe eniwuhluphekelayo.

⁶UNkulunkulu uqotho, ngakhoke uyophindisa kulabo abanihluphayo,

⁷kodwa nina enihluphekayo anophule kanye nathi ekuhluphekeni. Lokhu kuyokwenzeka mhla iNkosi uJesu isibuya. Iyobonakala esibhakabhakeni, iza nezingilosi zayo ezinamandla esabekayo,

⁸ikhanye njengekloba elikhulu lomlilo. Ibisijezisa abangakhohwa kuNkulunkulu, bengalithobeli ivangeli laleNkosi yethu uJesu.

⁹Bayojeziswa ngokubhujiswa okungunaphakade bagudluzwe phambi kobuso beNkosi uJesu nenkazimulo yobukhosi bayo.

¹⁰Ngalolosuku iyobuya izodunyiswa ituswe yibo bonke abayo, abakhohwa kuyo. Nani-ke niyoba kanye nabo, ngoba nakukholwa esanishumayeza khona.

¹¹Yingakho njena sinikhulekela njalo ukuba uNkulunkulu wethu anenze nifanele impilo anibizela kuyo, afeze ngamandla akhe konke okuhle enikuhlosayo nomsebenzi eniwezayo niqhutshwa ukholo.

¹²Kanjalo-ke igama leNkosi yethu uJesu Kristu liyodunyiswa ngenxa yenu, nina-ke niyothola udumo ngoba ningabayo. Lokhu kuyokwenzeka ngenxa yomusa kaNkulunkulu wethu nowaNkosi uJesu Kristu.

2 kwelaseThesalonika 2

Umuntu ogqugquzela isono

- ¹Mayelana nokubuya kweNkosi yethu uJesu Kristu nokuqoqelwa kwethu kuyo
- ²ngiyanincenga bazalwane ukuba ningasheshi ukuxoveka engqondweni noma nethuke lapho kuthiwa lolosuku lokubuya kweNkosi uJesu selufikile. Nize ningakukholwa lokho nakuba bethi yithi esikushilo, noma bethi kungokuqhutshwa ngoMoya oyiNgcwele noma ngentshumayelo noma ngenchwadi esiyilobile.
- ³Ningakhohliswa muntu noma ngayiphi indlela, ngoba lolosuku aluyukuza kungakabheduki umoya wokuhlubuka okukhulu, avele lowomuntu ogqugquzela isono, yena lowo onqunyelwe ukubhujiswa.
- ⁴Uziphakamisa amelane nakho konke okubizwa ngobunkulunkulu nakho konke okukhonzwayo, aze aye nasethempelini likaNkulunkulu, aqhwakele khona azibize ngokuthi unguNkulunkulu uqobo.
- ⁵Anisakhumbuli yini ukuthi ngesikhathi ngisenani ngangilokhu nginitshela ngakho na?
- ⁶Kukhona nje okusavimbile okwamanje ukuba angabonakali isikhathi singakafiki, nani futhi niyakwazi.
- ⁷Nalobububi sebuqalile ukusebenza ngisho namanje ngendlela eyisithibezi, kodwa kumele asuswe kuqala lowo osabuvimbele okwamanje,
- ⁸bese kubonakaliswa lomuntu ogqugquzela isono. INkosi uJesu iyombulala ngezwi eyoliphfumula, imhuhhise mhla isiza ngenkazimulo yobukhosi bayo.
- ⁹Lowo ogqugquzela isono wofika enamandla awanikwe nguSathane okuba enze izinhlobo ngezinhlobo zemisebenzi yamandla eyizibonakaliso nezimangaliso ezingamanga.
- ¹⁰Uyosebenzisa onke amaqhinga enkohlakalo ukuba akhohlise labo abayobhubha. Bayobhujiswa ngoba bengalamukelanga balithanda iqiniso ukuba basindiswe.
- ¹¹Ngalesisizathu-ke uNkulunkulu ubehlisela ukulutheka okunamandla ngangoba baze bakholwe amanga.
- ¹²Bayolahlwa yicala bonke abangalikhohlwanga leliqiniso kodwa bezithokozisa ngobubi besono.

Nakhethelwa ukusindiswa

- ¹³Kepha thina sifanele ukubonga njalo uNkulunkulu ngenxa yenu bazalwane abathandeka eNkosini uJesu. UNkulunkulu wanikhetha naba ngabokuqala abasindiswayo ngokungcweliswa nguMoya wakhe nangokulikhoholwa iqiniso.
- ¹⁴Wanibizela kulokhu ngendaba emnandi esayishumayela kini, ukuba nihlanganyele neNkosi yethu uJesu Kristu enkazimulweni yobukhosi bayo.
- ¹⁵Ngakhoke bazalwane yimani niqine nibambebele kulawomaqiniso esanifundisa wona sanishumayeza sanilobela incwadi.

¹⁶INkosi yethu uJesu Kristu uqobo noNkulunkulu uBaba wasikhombisa uthando wasenzela umusa wokuba sihlale njalo sikhuthazekile sinethemba elinesisekelo esiqinile.

¹⁷Sengathi angakhuthaza izinhliziyi zenu, aninike amandla kukho konke enikushoyo nenikwenzayo okuhle.

2 kwelaseThesalonika 3

Sithandazeleni

¹Ekugcineni-ke bazalwane ngicela ukuba nisithandazele ukuba indaba emnandi elanda ngeNkosi uJesu yande ngokushesha ithole udumo njengoba kwenzekile nakini.

²Nisikhulekele futhi ukuba uNkulunkulu asophule kubantu ababi abonakeleyo, ngoba akusibo bonke abalikhulwayo ivangeli.

³Kodwa iNkosi uJesu yethembekile, iyoninika amandla inivikele kuSathane.

⁴Kanti-ke futhi isenza sinethembe ukuthi niyakwenza esiniyala ngakho nokuthi niyoqhubeka nokukwenza.

⁵Sengathi iNkosi uJesu inganihola ibhekise izinhliziyi zenu othandweni lukaNkulunkulu nasekubekizeleni kukaKristu.

Isixwayiso mayelana nobuvila

⁶Ngegama leNkosi uJesu Kristu siyaniyala bakwethu ukuba nigweme bonke abazalwane abangamavila abangafuni ukusebenza, bengalandeli imfundiso enayamukela kithi.

⁷Ngoba nina ngokwenu niyazi ukuthi kufanele nilandele isibonelo sethu. Asivilaphanga sisekanye nani.

⁸Asizange samukele kudla kwamuntu sangakukhokhela, kodwa sasebenza kanzima, sizikhandla imini nobusuku ukuze singabi umthwalo kumuntu.

⁹Sakwenza lokhu, kungengoba singenalo ilungelo lokuba nisondele, kodwa ukuba sibe yisibonelo esihle kini nani nisilingise.

¹⁰Lapho sisenani saniyala sathi: “Sebenzani, ngoba akukho nkwali yaphandela enye!”

¹¹Phela siyezwa ukuthi kukhona abathile phakathi kwenu abangafuni ukusebenza. Behla benyuka behamba bezigaxa ezindabeni zabanye.

¹²Abantu abanjalo siyabayala sibancengisisa ngegama leNkosi uJesu Kristu ukuba baziqoqe bazothe, basebenze badle isithukuthuku sabo.

¹³Kepha nina bazalwane, nize ningadinwa ukwenza okuhle!

14Uma kukhona ongafuni ukuthobela esikushoyo kulencwadi nize nimqaphelisisse lowo. Ningadlelani naye, khona ezozinyeza atheleke amahloni.

15Nokho ningamphathisi okwesitha, kodwa mxwayiseni njengomzalwane!

Ukuvalelisa

16Sengathi iNkosi uJesu uqobo ongumthombo wokuthula anganilethela ukuthula ngezikhathi zonke nakukho konke!

17Mina Pawula ngiyakhonza, ngilobe ngesandla sami. Zonke izincwadi ezivela kimi ziphethwa kanje, yisandla sami lesi.

18Nisale nonke nomusa weNkosi yethu uJesu Kristu!

1 kuThimothi

1 kuThimothi 1

Isibingelelo

¹Lencwadi ivela kimi uPawula, engathunywa ngaba ngumphostoli kaKristu Jesu ngomyalo kaNkulunkulu umsindisi wethu nokaKristu Jesu ithemba lethu.

²Ngiyilobele wena Thimothi okunguwena mntanami engimzele ngokwasekukholweni. Ngikufisela umusa nobubele nokuthula okuvela kuNkulunkulu uBaba naseNkosini yethu uJesu Kristu.

Isixwayiso ngezifundiso eziphambene nokukholwa

³Ngifuna ukuba uhlale emzini wasEfesu njengoba ngakunxusa mhla ngiya eMasedoniya, ukhuze abantu balapho abathile ukuba bangafundisi izifundiso ezehlukileyo.

⁴Batshela bangalokhu belibele izinsumansumane nohide lwezindaba zokuzalana kwemindeni. Izinto ezinjalo zibanga ukuphikisana, kaziqhubeli phambili lokho uNkulunkulu asifundisa khona esikuthola ngokukholwa.

⁵Umgomo-ke walomyalo ungukuvuselela uthando oluvela enhliziyweni emhlophe nakunembeza omsulwa nasekukholweni okungazenzisiyo.

⁶Abanye abantu bedukile kulokho, bachezukele ekukhulumeni okuyize.

⁷Bathanda ukufundisa umthetho kaNkulunkulu, yize noma bengakuqondi abakukhulumayo nalokho abakukhulumela ezinkanini.

⁸Siyazi ukuthi umthetho ulungile uma umuntu ewusebenzisa ngendlela efaneleyo.

⁹Siyazi futhi ukuthi umthetho awuzange ushayelwe umuntu olungileyo, kodwa ubekelwe izeqamthetho namahlongandlebe nabangamesabi uNkulunkulu, nezonakali. Umiselwe labo abahlambalaza izinto ezingcwele nabagxibha inkolo, nababulala abazali babo nezinswelaboya.

¹⁰Umiselwe izifebe nongqingili nabathumba abantu babathengise, nohubhukabhejane nabafunga amanga. Umiselwe abenza ezinye izinto eziphambene nemfundiso eqotho.

¹¹Lemfundiso itholakala evangelini engalethweswa ukuba ngilimemezele, indaba emnandi elanda ngoNkulunkulu odumisekayo nobongekayo.

UPawula ubonga umusa kaNkulunkulu

¹²Ngiyambonga uKristu Jesu iNkosi yethu owangipha amandla wangibona ngethembekile wangibeka esikhundleni sobunceku,

¹³mina engangikade ngimhlambalaza ngimzingela ngimhlupha. Kodwa uNkulunkulu wangenzela ububele, ngoba ngangingayazi into engiyenzayo, ngingakholwa.

¹⁴INkosi yethu yangenzela umusa omkhulu kabi, yanginika ukukholwa nothando esinalo kuKristu Jesu.

¹⁵Lethembekile kufanele lemukelwe ngokupheleleyo izwi elithi: UKristu Jesu weza kulomhlaba ukuba asindise izoni. Mina-ke ngiyisoni esikhulu kuzo,

¹⁶kodwa uNkulunkulu wangihawukela mina engiyisoni esikhulu kunezinye, ukuba uKristu Jesu akhombise ngami ukuthi ukubekezela kwakhe kukhulu kangakanani. Wakwenza lokhu ukuba ngibe yisibonelo kwababesazokholwa, bathole ukuphila okuphakade.

¹⁷INkosi ebusa ungunaphakade nemiyo njalo nengabonwayo okuyiyona inguMvelinqangi uSimayedwa, udumo nobukhosi bungobayo phakade naphakade. Ameni.

¹⁸Thimothi mntanami, ngiyakwethwesa lomsebenzi ngephuzu lamazwi esiphrofetho esabikezelwa ngawe. Awakuqinise lamazwi uze ulwe ngokomoya impi elungileyo,

¹⁹ulokhu ubambelele ekukholweni ngonembeza omsulwa. Abanye-ke kabakulalelanga lokho okushiwo ngunembeza wabo, base behlubuka ekukholweni, baba njengabantu abafelwe ngumkhumbi.

²⁰Abanye balabo ngoHimenusi noAleksanda engibanqume ebandleni ukuze balayeke bakugcine ngci ukuhlambalaza.

1 kuThimothi 2

Iziyalo mayelana nokukhuleka

¹Ikakhulu ngiyaniyala ukuba nibacelele bonke abantu kuNkulunkulu, nibakhulekele nibanxusele nimbonge ngenxa yabo,

²ngisho nalabo abangamakhosi nazo zonke iziphathimandla, ukuba siphile impilo efaneleyo, kube khona ukuthula noxolo, sihambe ngokumesaba uNkulunkulu nangobuqotho.

³Lokhu-ke kuhle, kuyamthokozisa, uNkulunkulu umsindisi wethu,

⁴othanda ukuba bonke abantu basindiswe balazi iqiniso.

⁵Ngoba uNkulunkulu uyedwa, munye futhi umlamuli phakathi kukaNkulunkulu nabantu, lowomuntu onguKristu Jesu.

⁶Wadela ukuphila kwakhe ukuze ahlenge bonke abantu. Lokhu-ke kwaba ngubufakazi bentando kaNkulunkulu esikhathini esifaneleyo.

⁷Ngathunyelwa ngaba ngumphostoli nomfundisi wabezizwe, ukuba ngimemezele lobubufakazi, bakholve balazi iqiniso. Angiqambi manga uma ngisho kanjena, ngikhuluma iqiniso.

⁸Ngifuna ukuba ezindaweni ngezindawo ezinkonzweni kube ngabesilisa bebandla abaphatha imithandazo, nxa bekhuleka benyusele ezulwini izandla ezingenacala, bangabi nalulaka baphikisane.

⁹Kanjalo futhi, ngiyathanda ukuba nabesifazane bagqoke izingubo ezihloniphekile ezizobenza bazothe. Abazihlobise ngendlela efaneleyo nehloniphekileyo, bangakhangisi ngamagoda elukiweyo bahlobe ngegolide nobuhlalu nangezingubo zakwanokusho ezibiza imali enkulu,

¹⁰kodwa bahlobe ngokwenza imisebenzi elungileyo efanele abesifazane abamesabayo uNkulunkulu njengoba bezisho bona.

¹¹Owesifazane akafunde ngesizotha nangokuzithoba.

¹²Angikuvumeli ukuba abesifazane babe ngabafundisi ebandleni kumbe babuse amadoda, kodwa abazithobe.

¹³Njengoba uAdamu wadalwa kuqala, kwase kulandela uEva.

¹⁴Kanti-ke futhi akubanga nguAdamu owakhohliswa nguSathane, kodwa kwaba ngowesifazane owakhohliswa wayeseqa umthetho kaNkulunkulu.

¹⁵Kodwa-ke abesifazane njengoba bethola abantwana bayosindiswa uma behlala njalo bekhola benothando bephila impilo engcwele bezithoba.

1 kuThimothi 3

Okufuneka kubaholi ebandleni

¹Liqinisile lelizwi elithi: Uma umuntu efisa ukuba ngumholi ebandleni, usuke ethanda umsebenzi omuhle.

²Ngakhoke kufanele ukuba umuntu ohola ibandla abe ngongasolekiyo. Akabe nenkosikazi eyodwa, azithibe azibambe, abe nesizotha. Akaphathe kahle izihambi, abe nekhono lokufundisa.

³Akangabi yisidakwa noma isidlova kepha abe mnene angabi naluchuku, angabi ngumuntu okhonze imali.

⁴Akabe ngumuntu okwazi ukuphatha kahle umuzi wakhe, akwenze ngesizotha ukuba abantwana bakhe bamthobe.

⁵Uma umuntu engakwazi ukuphatha kahle umuzi wakhe, angaliphatha kanjani ibandla likaNkulunkulu na?

⁶Umholi webandla akungabi ngumuntu osand' ukuphenduka hleze azikhukhumeze abesehlulelwa alahlwe njengoSathane.

⁷Kufanele abe ngumuntu onegama elihle nakubantu abangesibo bebandla, ukuze angahlazeki abesebanjwa esihibeni sikaSathane.

Okufuneka kulabo abangamagosa

⁸Ngokunjalo amagosa kufanele abe nesizotha, angabi mbaxambili, angabi yizidakwa kumbe ahahele nje ukuthola inzuzo.

⁹Mawabambebele kuleloqiniso lokholo lwethu eselambuliwe, enonembeza omsulwa.

¹⁰Kufanele avivinywe kuqala, bese kuthi uma engasoleki avunyelwe ukuba ngamagosa ebandleni.

¹¹Kanjalo futhi abakhokheli kufanele babe nesizotha, bangabi yizinhlebi. Ababe ngabantu abakwazi ukuzithiba, bathembeke kukho konke.

¹²Igosa alibe nenkosikazi eyodwa, likwazi ukuphatha kahle abantwana balo nomuzi walo.

¹³Lawomagosa ayaye enze umsebenzi wawo kahle aba negama elihle, akhulume ngomqhanago omkhulu ngenxa yokukholwa kwawo kuKristu Jesu.

Imfihlo yokholo lwethu

¹⁴Njengoba ngikulobela lencwadi, ngiyethemba ukuthi ngizosheshe ngikubone masinyane.

¹⁵Kodwa uma kwenzeka ngilibala, lencwadi yiyona esiyokhomba ukuthi kufanele umuntu aziphathe kanjani uma ehlalisene nabendlu kaNkulunkulu eyibandla likaNkulunkulu ophilayo eliyinsika nesisekelo seqiniso.

¹⁶Ngempela akunakuphikwa ukuthi imfihlo yokholo lwethu inkulu njengoba sithi: “Weza kulomhlaba engumuntu uqobo, ngokomoya kwabonakala ukuthi ungoLungileyo, wabonwa yizingilosi, washunyayelwa ezizweni, abantu basemhlabeni bakholwa kuye, wenyuselwa ezulwini wanikwa ubukhosi.”

1 kuThimothi 4

Ukuhlubuka okubikezelwe ngakho

¹UMoya oyiNgcwele ukusho ngokusobala ukuthi ngezinsuku zokugcina abanye bayohlubuka ekukholweni babambebele kokufundiswa imimoya emibi edukisayo nasezifundisweni zamadimoni.

²Izifundiso ezinjalo ziyaye zichelwe ngabafundisi bamanga abazenzisayo, abanembeza wabo sewafa sengathi wabashulwa ngomlilo.

³Lababantu benqabela ukuganana, babuye bathi abazile ukudla okuthile, yize noma uMvelinqangi ekudalile ukuba bakudle abakholwayo abalaziyo iqiniso, bakudle bebongile kuNkulunkulu.

⁴Ngoba konke okudalwe nguMvelinqangi kulungile, akukho okufanele ukulahlwa uma sikwemukela ngomkhuleko wokubonga,

⁵ngoba kusuke sekungcweliswe ngezwi likaNkulunkulu nangomkhuleko wokubonga.

Isisebenzi esiqotho sikaKristu Jesu

⁶Uma uyala abazalwane ngalezizinto uyoba yisisebenzi esiqotho sikaKristu Jesu, njengoba uzondla ngokomoya ngalokho okutholakala okholweni lwethu nasemfundisweni eqotho osubambebelele kuyo.

⁷Ungazinaki izinsumansumane eziphambene nokukholwa ezifana nezinganekwane ezixoxwa yizalukazi, kodwa yakha isimilo sakho wesabe uNkulunkulu.

⁸Ngoba ukuqinisa izikhwepha zomzimba kusiza kancane, kodwa ukwesaba uNkulunkulu kusiza kukho konke, kunesethembiso mayelana nalokhukuphila kwamanje nalokho okuzayo.

⁹Lelizwi liqinisile ngempela, kufanele lamukelwe ngokupheleleyo.

¹⁰Yiwo lomgomo esiwujulukelayo siwukhandlekele, ngoba ithemba lethu likuNkulunkulu ophilayo umsindisi wabantu bonke, ikakhulu walabo abakholwayo.

¹¹Uze ubayale ubafundise ngalezizinto.

¹²Akungasuki muntu akwedelele ubusha bakho ethi usemncane, kodwa yiba yisibonelo kwabakholwayo ngokukhuluma nangokuziphatha kwakho nangothando nokukholwa nempilo emsulwa.

¹³Uze unakekele ukufunda imibhalo engcwele embuthanweni ushumayele ufundise, ngize ngifike lapho.

¹⁴Ungasidebeseli isiphiwo sokomoya onaso, owasemukeliswa ngamazwi ayebikezela ngawe mhla abaholi bebandla bekubeka izandla.

¹⁵Lezizinto kufanele ukuba uzinakekele, uzinikele kuzo njalo, ukuze bonke abantu babone ukuqhubekela kwakho phambili.

¹⁶Hlala uyiqaphele impilo oyiphilayo nemfundiso yakho, uphikelele kukho; ngalokho uyosinda wena uqobo, kusinde nalabo obafundisayo.

1 kuThimothi 5

Okufanele kwenziwe kubazalwane

¹Ungamjakadi umuntu omdala, kodwa khuluma kahle naye, kube sengathi unguyihlo. Abesilisa abasha wobaphatha njengabafowenu,

²abadala besifazane ubaphathe njengonyoko; kanjalo futhi abesifazane abasha wobaphatha njengodadewenu, ube msulwa.

³Hlonipha abafelokazi abangenabani!

⁴Uma umfelokazi enabantwana kumbe abantanomntanakhe kufanele ukuba bafunde kuqala ukuwuhlonipha nokuwunakekela umndeni wakwabo. Ngokwenze

njalo bacola abazali babo, bakhombise ukubabonga; lokho kuyamthokozisa uNkulunkulu.

⁵Umfelokazi ongenabani uyaye abeke ithemba lakhe kuNkulunkulu, ahlale ekhuleka kuye imini nobusuku emnxusa.

⁶Kepha umfelokazi ozitika ngezinjabulo zalomhlaba uyithuna esaphila.

⁷Bayale-ke abafelokazi ngalezizinto, ukuze bangasoleki.

⁸Kodwa uma umuntu engabanakekeli abakubo, ikakhulu abomndeni wakhe, usekuphikile ukukholwa kwakhe, mubi kakhulu wedlula ongakholwayo.

⁹Ohleni lwamagama abafelokazi bebandla makubhalwe amagama alabo kuphela abaminyaka yabo ingaphezu kwamashumi ayisithupha, labo ababeziphethe kahle emendweni yabo ,

¹⁰abaziwayo ngemisebenzi yabo emihle enjengokuthi, babekhulisa kahle abantwana, bephatha kahle izihambi, bezithoba, benzela abazalwane imisebenzi ebukelwa phansi, besiza abahluphekile, bezinikela kuyo yonke imisebenzi encomekayo.

¹¹Kodwa ohleni lwamagama abafelokazi ungababhalisi abasebasha, ngoba uma sebeqala ukushiswa yizinkanuko kungabenza bamdele uKristu, bafune ukugana.

¹²Uma benze njalo bazibangela ukulahlwa, ngoba besaphulile isethembiso sabo sakuqala.

¹³Futhi-ke bafunda umkhuba omubi wokuvilapha, bathande ukuzula yonke indawo bephuma bengena imizi ngemizi. Kabavilaphi nje kuphela, kodwa bayizinhlebi nogaxekile ezindabeni zabanye, bakhulume okungafanele.

¹⁴Ngakhoke ngithi kuhle ukuba abafelokazi abasebasha babuye bagane bazale, baphathe kahle imizi yabo, ukuba izitha zethu zingatholi ithuba lokusinukubeza.

¹⁵Ngikhuluma nje abanye babo sebevele bahlubuka balandela uSathane.

¹⁶Uma owesifazane okholwayo ehlala nabafelokazi emzini wakhe, akabasize ukuba ibandla lingasindwa, yikhona lizokwazi ukusiza abafelokazi abangenabani.

¹⁷Abaphethe ebandleni abaqhuba kahle ekuliphatheni, kufanele babongwe ngokuphindiwe, ikakhulu laba abasebenza kanzima beshumayela befundisa.

¹⁸Ngoba embhalweni ongcwele kuthiwa: “Ungayifaki inkabi isifonyo uma isebenza! ” Kubuye kuthiwe: “Kufanele ukuba isisebenzi sivuzwe ngomsebenzi waso.”

¹⁹Icala elethweswe umphathi webandla ungalemukeli uma bengekho ofakazi ababili kumbe abathathu abalifakazelayo.

²⁰Abayaye benze isono bakhuze obala ukuze nabanye besabe.

²¹Ngiyakuyala impela phambi kukaNkulunkulu noKristu Jesu nezingilosi ezikhethiweyo ngithi uze ukwenze konke lokhu, ungabandlululi kumbe ukhethe umuntu.

²²Ungasheshi ukumbeka izandla umuntu ozophatha umsebenzi ebandleni, ungahlanganyeli ezonweni zabanye, kodwa hlala umsulwa.

²³Njengoba uhlala ungaphilile ngenxa yesisu esikuphetha, ungabe usaphuza amanzi odwa, usungaliqhabula iwayini ukuba likusize ekuguleni kwakho.

²⁴Izono zabanye abantu zisobala zithe bha, ziyabandulela esigcawini sokuthetha amacala. Kanti-ke ezabanye zibalandela ngemuva.

²⁵Ngokunjalo nemisebenzi elungileyo isobala ithe bha, ngisho naleyo engabonakali kahle ingesithakale.

1 kuThimothi 6

¹Bonke abayizigqila abahlale bazi ukuthi abanini babo bafanele ukuhlonishwa kukho konke, ukuze kungahlanjalazwa igama likaNkulunkulu nemfundiso yokholo lwethu.

²Izigqila ezisebenzela abakholwayo kufanele zingabadeleli ngezaba zokuthi bangabazalwane. Kunalokho azikhuthale kakhulu, ngoba bangamakholwa nabazalwane abathandekayo abashisekela ukuphatha kahle izigqila zabo.

Asikhonze uNkulunkulu saneliswe yilokho esinakho!

Kufanele ukuba ubafundise ubalayeze ngalezizinto.

³Lowo ofundisa okwehlukileyo, engabambeleli emazwini aqotho eNkosi yethu uJesu Kristu nasemfundisweni yokholo lwethu,

⁴ukhukhumele kanti-ke futhi akazi lutho. Umuntu onjalo uyaye aphantswe yilukuluku lokuphikisana nabanye adaze inkani, okubanga ukuba abantu bafelane umona baxabane bazindlekelane ngendlela embi,

⁵badamane beqhubukushana. Lababantu banemiqondo eyonakele, kabasenalo iqiniso. Bayaye bathi ukwesaba uNkulunkulu yiyona ndlela abayoceba ngayo.

⁶Empeleni, okuyiyona nzuzo enkulu ukuba simesabe uNkulunkulu, saneliswe ngesinakho.

⁷Seza lapha emhlabeni singenalutho; asikwazi ukumuka siphethe utho.

⁸Uma sinakho ukudla nezambatho, asaneliswe yilokho.

⁹Kepha lababantu abathanda ukuceba bayaye behlelwe ngukulingwa, babhabheke esifeni sikaSathane, bawulazwe yizinkanuko ezilimazayo ezidonsela abantu ekufeni nasekubhujisweni.

¹⁰Ngoba ukukhonza imali kuyisisusa sakho konke okubi. Abanye abantu bayilabalabela ngangokuthi baze bahlubuke ekukholweni, bazibangele iminjunju ebagwaza ezinhliziyweni zabo.

Ukulwa emshikashikeni wokukholwa

¹¹Kodwa kugweme lokhu wena muntu kaNkulunkulu, ushisekele ukulunga nokwesaba uNkulunkulu nokholo nothando nokubekezela nobumnene!

¹²Yilwa impi elungileyo yokukholwa uphikelele njalo uze uthole ukuphila okuphakade. Ngoba yikho owabizelwa kukho njengalokhu walikhipha mhla uvuma phambi kofakazi abaningi isivumo esinqabileyo sokholo.

¹³Ngiyakuyala phambi kukaMvelinqangi owenza ukuba konke okukhona kuphile naphambi kukaKristu Jesu owafakaza phambi kukaPontu Pilatu wavuma isivumo esinqabileyo sokholo.

¹⁴Ngiyakuyala ukuba ugcine imfundiso yobuKristu ibe msulwa ingasoleki, kuze kube mhla kuqhamuka iNkosi yethu uJesu Kristu.

¹⁵Ngesikhathi esifanele iyobonakaliswa nguNkulunkulu obongekayo onguye yedwa uMninimandla, iNkosi yamakhosi ongumbusi wababusi.

¹⁶Nguye kuphela omiyo njalo nohlala ekukhanyeni okungenakusondelwa kukho, ongazange abonwe muntu nongebonwe. Udumo namandla kungokwakhe ungunaphakade. Amen.

¹⁷Batshela laba abayizicebi kulomhlaba ukuba bangazikhukhumezi bangethembeli kulengcebo ephelayo. Ithemba labo abalibeke kuNkulunkulu osandla sakhe sisipha konke kweve, ukuba sizitike ngakho.

¹⁸Batshela futhi ukuba kuvame kubo imisebenzi elungileyo, baphane, babele abanye.

¹⁹Ngalokho bayobe bazihlinzeka ngengcebo enhle egcinelwe isikhathi esizayo, bathole umvuzo ongukuphila okuyikhonakhona.

²⁰Thimothi uze ukulonde kahle konke okwethweswe khona ukugcine. Kuxwaye ukukhuluma ize eliphambene nokukholwa, uxwaye nokuphikisana okuvela kulokho okuthiwa kungulwazi, kuyilapho kungeyilo.

²¹Ngoba abanye bashaya sengathi banolwazi; ngalesosenzo bese behlubuka ekukholweni. Salani nomusa!

2 kuThimothi

2 kuThimothi 1

Isibingelelo

¹Lencwadi ivela kimi uPawula umphostoli kaKristu Jesu ngokwentando kaNkulunkulu, ngithunyelwe ukushumayela ukuphila esikwethenjisiweyo okukuKristu Jesu.

²Ngiyilobele wena Thimothi, ndodana yami engiyithandayo. Ngikufisela umusa nobubele nokuthula okuvela kuNkulunkulu uBaba nakuKristu Jesu iNkosi yethu.

Yima isibindi ungabi namahloni!

³Ngiyambonga uNkulunkulu engimkhonza ngonembeza omsulwa njengalokhu okhokho bami babenza. Ngiyaye ngimbonge nxashana ngikukhumbula njalo emikhulekweni yami imini nobusuku.

⁴Ngiyaye ngikhumbule lapho usubihlika izinyembezi, bese ngilangazelela ukukubona ukuze inhliziyo yami ijabule ngempela.

⁵Bese ngikhumbula ukugxila kwakho ekukholweni. Ukholo lwakho lufuze olukanyokokhulu uLuwisi nolukanyoko uYunisi. Ngineqiniso lokuthi ugxilile kulolukholo njengabo.

⁶Ngakhoke ngiyakukhumbuza ukuba ukhwezele njalo umlilo walesosiphiwo sakho uNkulunkulu akunika sona ngomusa wakhe mhla ngikubeka izandla.

⁷Ngoba uMoya esiwunikwe nguNkulunkulu kawusenzi amagwala. Kunalokho uMoya wakhe usipha amandla, sigcwale uthando, sikwazi nokuzithiba.

⁸Ngakhoke ungabi nazinhloni lapho ufakaza ngeNkosi yethu uJesu, ungatheleki izinhloni nangami engiyiboshelwe. Kunalokho, hlanganyela nami ekuhlushweni ngenxa yevangeli, uNkulunkulu akuqinise amandla.

⁹Wasisindisa wasibiza sase sahlukaniselwa yena. Akubanga ngenxa yemisebenzi yethu elungileyo, kepha lokhu wakwenzela ukuba afeze inhloso yakhe, asenzele umusa. Ngenxa kaKristu Jesu uNkulunkulu wasenzela lomusa wakhe kwaphakade,

¹⁰kodwa manje usuwambuliwe ngokufika komsindisi wethu uKristu Jesu. Nguye owachitha amandla okufa, wakuveza ngokusobala ngevangeli ukuphila okungenakubhubha.

¹¹UNkulunkulu ungibekile ngaba ngumphostoli nomfundisi oshumayela lelivangeli;

¹²yingakho-ke ngikulokhukhulupheka okunje. Nokho ngimi isibindi anginamahloni, ngoba ngiyazi ukuthi ungubani lona engikholwa kuye, ngineqiniso ukuthi lokho engikwethwesiwe ukuba ngikugcine uyokulonda kuze kube mhla wosuku ayobuya ngalo.

¹³Bambelela kulokho owakufunda kimina okuyimfundiso yamagama aqotho, ubukele kukho, ugxile ekukholweni nasothandweni esiluhlanganyela kuKristu Jesu.

¹⁴Lilonde kahle leligugu owaletsweswayo, ngokusizwa nguMoya oyiNgcwele lowo ohlala ngaphakathi kithina.

¹⁵Uyazi ukuthi sebangihlamuka bonke abahlala kwelaseAsiya, abanye babo nguFigelo noHermogene.

¹⁶INkosi uSomandla ayibenzele ububele abendlu kaOnesiforo, ngoba wayelokhu engivakashela izikhathi eziningi, afike angimise isibindi engenazinhloni ngami ngenkathi ngiboshiwe.

¹⁷Kuthe nalapho esefikile eRoma wangithungatha ehla enyuka waze wangithola.

¹⁸INkosi uJesu ayimenzele ububele mhla ibuya! Uyazi kahle kakhulu ukuthi kuningi kangakanani angisiza ngakho ngisEfesu.

2 kuThimothi 2

Ibutho eliqotho likaKristu Jesu

¹Qina amandla-ke manje ndodana yami ngenxa yomusa esiwenzelwa nguKristu Jesu thina esingabakhe.

²Lokho owangizwa ngikufundisa phambi kofakazi abaningi, kudlulisele kubantu abathembekile ukuba bakugcine, ukuze nabo babuye bafundise abanye.

³Bekezela lapho uhlupheka kanye nabanye, njengebutho eliqotho likaKristu Jesu.

⁴Ibutho-ke elisuke liphuma impi alize lingazilibazisa ngeminako yasemakhaya, kodwa liyaye lilalele lowo osuke elibuthile.

⁵Kanjalo futhi, nomuntu ongenela ukungqayiselana kaklonyelwa ngomqhele uma engayigcinanga imithetho yomdlalo.

⁶Umlimi ozikhandla ngokulima kufanele kube nguyena odla imilibo.

⁷Kuzwe kahle ukwetshise lokhu engikushoyo, ngoba iNkosi uJesu iyokusiza ukuba ukuqonde konke.

⁸Khumbula njalo ukuthi uJesu Kristu wolibo lukaDavide wavuswa kwabafuleyo. Phela yilokhu okuyindikimba yendaba ethokozisayo engiyimemezelayo.

⁹Ngenxa yalendaba emnandi sengihlupheke kakhulu ngaze ngaboshwa ngamaketango sengathi ngiyiselelesi. Kodwa izwi likaNkulunkulu kaliboshiwe.

¹⁰Ngakhoke ngiyakubekezelela konke ngenxa yalabo abayikhethelo likaNkulunkulu, ukuze nabo basindiswe ngoKristu Jesu, bafinyelele ebukhosini obungunaphakade.

¹¹Siyiqiniso isisho esithi: “Uma safa kanye noKristu siyobuye siphile naye.

¹²Uma sibekezelela izinhlupheko, siyobuye sibuse naye. Kodwa uma simphika, naye uyosiphika.

¹³Uma ngabe singathembekile yena uhlala ethembekile njalo, ngoba akanakuguquka kulokho akushiloyo.”

Isisebenzi esethembekile sikaNkulunkulu

¹⁴Bakhumbuze ngalezizinto, ubaxwayise phambi kukaNkulunkulu ukuba bangajikijelani ngamazwi, ngoba akusizi ngalutho kepha kukhubekisa abasuke belalele.

¹⁵Khuthazela uziveze phambi kukaNkulunkulu uyisisebenzi esethembekileyo esamukeleka kuye, isisebenzi esingenazinhloni ngomsebenzi waso, esilifundisa ngobuqotho izwi likaNkulunkulu eliyiqiniso.

¹⁶Uze uxwaye ukugevuza okuyize okuphambene nokukholwa, ngoba lokhu kubenza bonakale kakhulu abantu, bagamanxe enkokhulakweni.

¹⁷Ukukhuluma okunje kunjengesilonda esibhibhayo emzimbeni womuntu. Abanye balaba abakhuluma kabi nguHimenusi noFiletho.

¹⁸Baphaphalazile eqinisweni ngoba bathi ukuvuka kwabafuleyo sekwadlula. Uma besho njalo bayaye baphekule ukholo kwabanye.

¹⁹Kodwa-ke isisekelo esabekwa nguNkulunkulu simi sizindile; kulotshwe kuso amazwi athi: “USimakade ubazi bonke abangabakhe,” nalawa athi: “Yilowo nalowo othi ungokaSimakade akayeke ukwenza okungalungile.”

²⁰Endlini enkulu kuyaye kube khona izinhlobonhlobo zezitsha. Ezinye zenziwe ngesiliva, ezinye ngegolide, ezinye-ke zibazwe ngokhuni, ezinye zibunjwe ngebumba. Ezinye zazo ziyizitsha ezihloniphekile, ezinye-ke ziyizitsha ezingasho lutho.

²¹Uma umuntu ededa eubini ezihlambulula, unjengesitsha esihloniphekile, ngoba lomuntu ungcwelisiwe nonosizo kumnindlu. Uba yisitsha esilungiselwe wonke umsebenzi omuhle.

²²Gwema izinkanuko zobusha, ushisekele njalo ukulunga nokukholwa nothando nokuthula, uhlanganyele nalabo abakhuleka ngegama leNkosi uJesu ngenhliziyo emsulwa.

²³Xwaya izindaba zobuwula ezingenangqondo okuyaye kuphikiswane ngazo ngoba uyazi ukuthi lokho kudala ukuxabana.

²⁴Isisebenzi seNkosi uJesu akufanele ukuba sixabane nabantu, kunalokho asibe nesisa kubo bonke, sikhali phele ukufundisa, sibekezele.

²⁵Laba abamelene naso, kufanele siqondisane nabo ngobumnene. Sikwenze lokhu hleze kwenzeke ukuba uNkulunkulu abanike ithuba lokuphenduka, balazi iqiniso,

²⁶bese besanguluka ezingqondweni, baphephe eshibeni uSathane ababambe ngaso ukuba benze intando yakhe.

2 kuThimothi 3

Ukonakala kwabantu ngezinsuku zokugcina

¹Kuhle wazi ukuthi ngezinsuku zokugcina kuyofika izikhathi ezilukhuni.

²Abantu bayoba ngogombela kwesabo, bakhonze imali, bazikhukhumeze, baziqhenye, bahlambalaze, badelele abazali babo. Kuyoba khona abantu abangabongiyo nabangenandaba nalokho okungcwele.

³Kube khona abantu abangenaluthando nabangavumi ukubuyisana, abanyembenyayo nabahluleka ukuzikhuza nabagcwelezayo nabangakuthandi okuhle.

⁴Kuyoba khona abantu abayokhaphela abanye neziphoxo nabazidlayo nabathanda izinjabulo kunoba bathande uNkulunkulu.

⁵Bayobukeka sengathi bayamesaba uNkulunkulu, kodwa ngokwenza kwabo babe bephika amandla atholakala ngokukholwa. Uze ubagweme abanjalo!

⁶Abanye babo yibo laba abathubeleza baze bangene ezindlini, bafike bathumbe abesifazane abangenasimilo. Laba besifazane banyinyitheka nomthwalo osindayo wezono, beqhutshwa yizinkanuko ezinhlobonhlobo.

⁷Njalo nje bayaye bafundiswe, kodwa kabafinyeleli ekulazini iqiniso.

⁸Njengoba oJanesi noJambresi babemelene noMose, kanjalo-ke lamadoda amelene neqiniso. Angabantu abazingqondo zabo zonakele nabalukholo lwabo lwehlulekile.

⁹Kodwa ngeke baze baqhubekele phambili, ngoba ubuwula babo sebuzevela obala, bese bebonwa yizwe njengalokhu kwenzeka koJanesi noJambresi.

UPawula uyala uThimothi okokugcina

¹⁰Wena-ke wayilandela imfundiso yami, wangilingisa ngempilo oyiphilayo nomgomo owuhlosile empilweni yakho nangokukholwa nokuqiniseka nothando nokubekezela,

¹¹nokuhlushwa njengoba ngehlelwa yizinhlopheko emizini yaseAntiyokhi naseIkhoniyo naseListra. Izinhlopheko ezinje ngiyozizekela amagwababa echobana. Kodwa iNkosi uSomandla yangihlenga kukho konke ukuhlupheka kwami.

¹²Yebo, yilowo nalowo ofuna ukuphila impilo eqotho kuKristu Jesu, lowomuntu uyohlushwa.

¹³Kepha abantu abenza ububi nabawakayo bayodlebeleka nobubi ababenzayo bedukisa abantu, nabo bedukiswa.

¹⁴Kodwa-ke wena, bambelela kulokho okufundile wakukholwa ngempela. Uyazi-ke ukuthi ukufunde kobani.

¹⁵Kwasebuntwaneni uyayazi imibhalo engcwele enamandla okukunika ukuhlakanipha ukuba usindiswe ngenxa yokukholwa kwakho kuKristu Jesu.

¹⁶Konke okusemibhalweni engcwele kwaba khona ngesu loMoya kaNkulunkulu, ngakhoke ilungele ukufundisa nokukhuza nokuqondisa amaphutha nokuyala mayelana nokulunga,

¹⁷yikhona umuntu kaNkulunkulu ezophelela, alungele ukuyenza yonke imisebenzi emihle.

2 kuThimothi 4

¹Ngiyakuyala impela phambi kukaNkulunkulu noKristu Jesu oyobahlulela abaphilayo nabafuleyo, njengoba eyobuya esezobusa eyiNkosi, ngithi:

²Shumayela izwi likaNkulunkulu, ulungele ukulizwakalisa noma kuyisikhathi esifaneleyo noma kungeyiso. Uze ubakhuze, ubasole, ubakhuthaze; ukwenze lokhu ngokubafundisa ngesineke esikhulu.

³Ngoba kuyofika isikhathi lapho abantu bengayikukubekezelela ukuzwa imfundiso eqotho. Kunalokho bayofuna okuzwana nezinkanuko zabo, baziqoqele abaningi balabo abafundisayo, ukuba bafike babashumayeze okuzobaphatha kahle uma bekuzwa.

⁴Bayoligwema iqiniso bangafuni ukulizwa, kodwa banake izinsumansumane.

⁵Wena-ke kufanele uzithibe kukho konke, ubekezelele ukuhlushwa, uqhube umsebenzi wokushumayela indaba emnandi, ukufeze konke okwenzayo njengesisebenzi sikaNkulunkulu.

⁶Mina-ke, sengizobulawa kuchithwe igazi lami njengomhlatshelo, ngoba sesifikile isikhathi sokuba ngemuke kulomhlaba.

⁷Ngiyilwile impi elungileyo, ngagijima ngalifeza ibanga lami emncintiswaneni, ngabambelela okholweni.

⁸Manje-ke sengilindele ukuklonyelwa ngomqhele wokulunga. Ngiyowunikwa yiNkosi uJesu, umahluleli olungileyo, mhla ebuya. Akuyimi ngedwa engiyowunikwa, kodwa kuyonikwa bonke abalangazelela ukuqhamuka kwakhe.

Amazwi kaPawula aqondene ngqo noThimothi

⁹Zama ukufika lapha ngokushesha.

¹⁰Phela uDemasi wangishiya ngoba esekhonze izinto zalomhlaba. Wahamba-ke waya emzini waseThesalonika. UKresensi waya kwelaseGalathiya, uThithusi waya kwelaseDalmathiya.

¹¹NguLuka kuphela engihlezi naye lapha. Uze uthathe uMarko uze naye lapha, ngoba angaba usizo olukhulu kimi emsebenzini wami.

¹²UThikhikho ngimthume Efesu.

¹³Uma uza lapha wongiphathela isivatho sami leso engasishiya kuKhapho eTrowa. Ungiphathele nemiqulu yami yezincwadi, ikakhulu leyo eyenziwe ngesikhumba.

¹⁴Phela uAleksanda umkhandi wethusi wangihlinzela ezibini; iNkosi iyongiphendulela kuyena.

¹⁵Uze umxwaye, ngoba wamelana kakhulu nalokho esikushumayelayo.

¹⁶Akukho noyedwa owangisekela mhla ngiziphendulela ngokokuqala esigcawini, kodwa bangihlamuka bonke. Sengathi uNkulunkulu angesibalele kubo lesisono.

¹⁷Kodwa iNkosi uSomandla yangizimazisa yangiqinisa, ukuze ngikwazi ukuyimemezela indaba emnandi ngingashiyi lutho, abezizwe bayizwe bonke. Ngasinda, ngaphepha emloyeni wengonyama.

¹⁸INkosi iyongihlenga ingivikele kukho konke okubi, ingiyise embusweni wayo ezulwini. Udumo nobukhosi kungokwayo phakade naphakade. Ameni.

Ukuvalelisa

¹⁹Uze ungikhonzele kuPhrisila noAkhwila nakwabomndeni kaOnesiforo!

²⁰Phela uErasto wasala emzini waseKhorinte, uTrofimo yena ngamshiya egula emzini waseMilethu.

²¹Phuthuma uze lapha bungakangeni ubusika! Bayakhonza oEwubhulo noPhudensi noLinosi noKlawudiya, nabo bonke abazalwane.

²²INkosi ayibe nawe ibusise umoya wakho! Salani nomusa!

UThithusi

UThithusi 1

Isibingelelo

¹Lencwadi ivela kimi uPawula inceku kaNkulunkulu nomphostoli kaJesu Kristu. Ngithunyelwe ukuba abekhethelo likaNkulunkulu ngibaholele ekukholweni nasekulazini iqiniso. Leliqiniso lisifundisa ukwesaba uNkulunkulu,

²lisinike ithemba lokuphila okuphakade. UNkulunkulu ongaqambi manga wasethembisa lokhokuphila ndulondulo.

³Kuthe lapho isikhathi esimisiweyo sesifikile, walembula izwi lakhe lashunyayelwa laba sobala. Kungomyalo kaNkulunkulu umsindisi wethu owangenza ngathweswa lomthwalo wokuba ngilimemezele.

⁴Lencwadi ngiyilobele wena Thithusi ndodana yami isibili ehlanganyele nami okholweni lunye. Ngikufisela umusa nokuthula okuvela kuNkulunkulu uBaba naseNkosini yethu uJesu Kristu umsindisi wethu.

Umsebenzi kaThithusi eKhrethe

⁵Ngakushiya esiqhingini saseKhrethe ngenhloso yokuba usale uhlela okwakusasilele, ubeke abazophatha ibandla ezigodini ngezigodi njengoba ngakuthuma.

⁶Kufanele ukuba umholi webandla angasoleki, abe nenkosikazi eyodwa. Abantwana bakhe ababe ngamakholwa, bangabi ngabantu abadume ngemikhuba emibi nokwedelela.

⁷Njengoba umholi webandla eyinceku ebheka umsebenzi kaNkulunkulu, ngakhoke kufanele ukuba angasoleki ngalutho. Akangabi ngumuntu ozidlayo kumbe ohluthukayo, angabi yisidakwa noma isidlova, angahaheli nje ukuthola inzuzo.

⁸Kunalokho kufanele abe ngumuntu ophatha kahle izihambi nothanda okulungileyo. Kufanele ukuba akwazi ukuzibamba, abe ngumuntu oqotho nongcwele nozithibayo.

⁹Akabambelele athi ngqi emfundisweni eyiqiniso njengoba eyifundisiwe, ukuze akwazi ukukhuthaza nabanye ngalemfundiso eqotho, akwazi nokubaphikisa abamelene nayo.

¹⁰Ngoba baningi abantu abenqaba ukuthobela abaphetheyo, bakhulume okuyize bakhohlise abanye. Kwenziwa ikakhulu ngamaJuda asephendukele enkolweni yethu.

¹¹Kufanele bavalwe isimuku, ngoba bayaye badunge umndeni wonke ekhaya ngokufundisa okungafanele. Bayaye bakwenze lokhu ngoba behahele ukuthola inzuzo.

¹²Omunye umphrofethi wesizwe sakubo wathi: “Abantu baseKhrethe bangohubhukabhejane njalo, bayizigcanakazana, bayiziminzi, akumavila yizinyoka.”

¹³Lokho okwakufakazwa ngabo kuyiqiniso. Ngakhoke bakhuze ucijise amazwi, ukuze ukukholwa kwabo kugxile emfundisweni eqotho,

¹⁴bangabe besazinaka izinsumansumane zamaJuda kumbe imiyalo yabantu abamelene neqiniso.

¹⁵Konke kuhlanzekile kwabahlanzekileyo, kepha akukho lutho oluhlanzekile kwabangcolileyo nabangakholwayo. Ngoba zingcolile izingqondo zabo nonembeza babo.

¹⁶Bathi bayamazi uNkulunkulu uma besho, kodwa izenzo zabo ziyabaphikisa. Bayisinengiso, bangabantu abadelelayo, akukho nokukodwa okuhle abangakwenza.

UThithusi 2

Imfundiso eqotho

¹Kepha wena kufanele ukuba ushumayele okuvumelana nemfundiso eqotho.

²Uze ubatshale abesilisa abadala ukuba bazithibe bazothe bazibambe babe qotho ekukholweni nasothandweni nasekubekazeleni.

³Kanjalo futhi nabesifazane abadala batshale ukuba baziphathe ngendlela efanele abakholwayo, bangabi ngabacevuza izindaba, bangabi yizigqila zesiphuzo, kodwa bafundise okulungileyo.

⁴Abakwenze lokhu ukuze babe nesiyalo esihle komakoti ukuba bathande abayeni babo nabantwana babo,

⁵bazibambe babe msulwa, baphathe kahle imizi yabo, bathobele abayeni babo, khona abantu bengezukuba nazaba zokuhlambalaza izwi likaNkulunkulu.

⁶Ngokunjalo uze ukhuthaze izinsizwa ukuba zizithibe.

⁷Wena-ke yiba yisibonelo ngemisebenzi emihle kukho konke. Ekufundiseni kwakho khombisa ubuqotho, nesizotha futhi.

⁸Okushoyo akube ngamazwi aqotho angasoleki, ukuze laba abamelana nawe bafojiswe, bengenazaba zokukhuluma okubi ngathi.

⁹Uze uyale izisebenzi ukuba zithobele ezibasebenzelayo, zibathokozise. Azingaqagulisani nabo,

¹⁰zingashayi induku, kodwa zikhombise ukuthi zethembeke ngempela, ukuze isifundiso sethu ngoNkulunkulu umsindisi wethu sivunuliswe sithandekke kukho konke ngenxa yazo.

¹¹Ngoba usuvezwe wasobala umusa kaNkulunkulu oletha insindiso kubo bonke abantu.

¹²Lomusa-ke usifundisa ukudela impilo yokungakholwa, ukuba singabuswa yizinkanuko zalomhlaba, kodwa sihambe ngokuzithiba nangobuqotho nangokumesaba uNkulunkulu sisekulomhlaba,

¹³njengoba sisalindele lolosuku olubusisekileyo esilubheka ngethemba, lapho kuyobonakala khona inkazimulo yobukhosi bukaNkulunkulu wethu ophakemeyo umsindisi wethu uJesu Kristu.

¹⁴Wazinikela ngenxa yethu, ukuba asihlengi kukho konke ukungalungi, asihlambulule sibe yisizwe esikhethiweyo esishisekela imisebenzi encomekayo.

¹⁵Bafundise-ke abantu ngalezozinto, ubakhuthaze ubakhuze ngegunya lakho lonke. Akungabi bikho muntu okubukela phansi!

UThithusi 3

Ukuzalwa kabusha nokuphila impilo entsha

¹Bakhumbuze ukuba bathobele ababusi neziphathimandla, babalalele balungele ukwenza yonke imisebenzi emihle.

²Uze ubatshale banganukubezi muntu, bangabi ngophumasilwe, kodwa babe nenhliziyo enhle, babe mnene bathobele bonke abantu.

³Ngoba kwathina sasikade siyiziwula nezedeleli. Sake seduka nathi, sabuswa yizinkanuko sithanda ukuzitika ngezinjabulo ezehlukeneyo. Sasenza ububi njalo, sigcwele umona sizondwa, nathi sizondana nabanye.

⁴Kodwa kuthe lapho sekubonakele kwasobala ukuthi uNkulunkulu unobubele nokuthi uyabathanda abantu,

⁵wasisindisa kodwa kwangaya ngemisebenzi yethu elungileyo kodwa ngenxa yobubele bakhe. Wasisindisa ngokusigeza sazalwa kabusha nguMoya oyiNgcwele, saphila impilo entsha.

⁶UNkulunkulu wasigidlabeza, wehlisela kithi uMoya oyiNgcwele ngenxa kaJesu Kristu umsindisi wethu,

⁷ukuba ngomusa wakhe sithethwe yicala sibe yizindlalifa zokuphila okuphakade esikubheke ngethemba.

⁸Lethembekile impela lelizwi. Ngifuna ukuba uzigcizelele lezizinto ukuba abakholwa kuNkulunkulu bakhuthalele ukwenza imisebenzi emihle. Phela kuhle lokhu, kuyabasiza abantu.

⁹Kodwa gwema izindaba zobuwula okuyaye kuphikiswane ngazo, nalezo zokuzalana kwemindeni, uxwaye imibango nokuphikisana ngomthetho, ngoba konke lokhu kuyize, akunamkhuba.

¹⁰Umuntu odala uqhekeko mdonse ngendlebe kanye noma kabili, emuva kwalokho-ke umeke uma engalaleli.

¹¹Usuyazi-ke ukuthi umuntu onjalo uphambukile ukhohlakele, usezhlulele yena uqobo.

Amazwi kaPawula aqondene ngqo noThithusi

¹²Uma sengimthumela kuwe uAthemasi kumbe uThikhikho, wozama impela ukuza kimi emzini waseNikhopholi, ngoba senginqume ukuvakashela lapho ubusika bonke.

¹³Zama-ke futhi ukusiza ummeli uZena noApholo, ubagayele umphako ohambweni lwabo, ubenzele amalungiselelo bangantuli lutho.

¹⁴Kufanele ukuba abazalwane bethu bafunde ukuzinikela ekwenzeni imisebenzi emihle, basize lapho kudingeke khona, bangaphili impilo engavezi izithelo ezinhle.

¹⁵Bakhonza bonke engihlala nabo lapha. Uze usibonele kubazalwane abasithandayo esikholwa kanye nabo. Nisale nomusa nonke!

UFilimoni

UFilimoni 1

Isibingelelo

¹Lencwadi ivela kimi uPawula engiboshelwe uKristu Jesu, ivela nakumzalwane uThimothi. Ngiyilobele wena Filimoni, umzalwane wethu othandekayo esibambe naye kulomsebenzi.

²Ngiyiqondise nakudadewethu uApfiya nakuAkipho esilibutho linye naye kuKristu, nasebandleni elibuthanela emzini wakho.

³Nginifisela umusa nokuthula okuvela kuNkulunkulu uBaba naseNkosini uJesu Kristu.

Uthando nokukholwa kukaFilimoni

⁴Ngiyaye ngimbonge njalo uNkulunkulu wami lapho ngikubeka emikhulekweni yami,

⁵ngoba ngiyezwa kukhulunywa ngokuthanda kwakho bonke abazalwane nangokukholwa kwakho eNkosini uJesu.

⁶Ngiyaye ngikukhulekele ukuba lokhukukholwa ohlanganyela nathi kukho kukuvuselele ukuze kujule ulwazi lwakho ngazo zonke izibusiso esizitholayo empilweni esiyiphila kuKristu.

⁷Uthando lwakho lungithokozise kakhulu, lwangikhuthaza ngaba nomdlandla, ngoba wavuselela izinhliziyi zabakholwayo mfowethu.

UPawula unxusela uOnesimo

⁸Ngakhoke, njengoba nawe ungumKristu, beningakujuba ngesibindi esikhulu, ngikuthume ngithi kuwe: “Yenza lokho ofanele ukukwenza!”

⁹Kodwa yize kunjalo ngiyakuncenga ngenxa yothando engikuthanda ngalo, mina Pawula umuntu osemdala, kanti-ke futhi ngiboshelwe uKristu Jesu.

¹⁰Ngiyakuncenga ngicelela uOnesimo. Uyindodana yami isibili engamzala ngokomoya ngenkathi ngisaboshiwe lapha.

¹¹Wayekade engenalusizo lwalutho kuwe, kodwa manje usewusizo kithi sobabili.

¹²Kuxephuka isicubu kimi njengoba sengimphindisela kuwe emuva.

¹³Bengithanda ukuba ngimgcine lapha ahlale nami ukuze angisize esikhundleni sakho ngesikhathi ngisaboshiwe ngenxa yevangeli.

¹⁴Kodwa-ke angithandanga ukwenza utho ngaphandle kwemvume yakho, ukuba kuthi lokho ongenzela khona ukwenze ngesihle ungaphoqelelwanga muntu.

¹⁵Mhlawumbe nehlukaniswa no-Onesimo okwesikhashana yikhona kuzothi uma esebuyela kuwe abuyele unomphela.

¹⁶Kodwa manje akaseyiso isigqila nje, kepha wedlula isigqila ngoba usengumzalwane othandekayo. Sengimkhonze kabi, kodwa wena uyomthanda kwedlulele, umthandele ukuthi uyisisebenzi sakho nokuthi futhi usengumzalwane wakho eNkosini.

¹⁷Ngakhoke uma uthi sisabambisene nawe, mamukele njengoba ubuyokwamukela mina!

¹⁸Uma kukhona akone ngakho kumbe kukhona afanele ukukukhokhela khona, akube yicala lami.

¹⁹Manje-ke sekuloba mina Pawula ngesami isandla ngithi: Ngiyokubuyisela. Phela akudingekile ukuba ngikukhumbuze ngalelocala obekufanele ulikhokhe kimi, elokubonga ngoba lokho oyikho kwaba ngenxa yami.

²⁰Ngakhoke mfowethu, sengathi ngingasizakala kuwe ngenxa yeNkosi uJesu, uvuselele umoya wami njengoba singabazalwane kuKristu.

²¹Ngineqiniso lokuthi uzongilalela; njengoba ngiloba lencwadi ngiyethemba ukuthi uyongenzela lokhu engikucelayo kweve.

²²Futhi-ke anongilungisela indawo lapho ngiyongenisa khona, ngoba nginethemba lokuthi ngemikhuleko yenu ngizobuyela kini.

Ukuvalelisa

²³Uyakhonza kuwe uEphrafrasi engiboshwe kanye naye ngenxa kaKristu Jesu.

²⁴Bayakhonza oMarko noAristakho noDemasi noLuka. Bonke labo simdibi munye nabo emsebenzini.

²⁵Salani nomusa weNkosi yethu uJesu Kristu, ibusise umoya wenu!

AmaHebheru

AmaHebheru 1

UNkulunkulu ukhulume kithi ngeNdodana yakhe

¹Endulo uNkulunkulu wakhuluma ngomlomo wabaphrofethi kaningi nangezindlela ezahlukeneyo,

²kepha kulezizinsuku zokugcina usekhulume kithi ngomlomo weNdodana yakhe. Yiyona ayibekile yaba yindlalifa yakho konke; wadala ngayo umhlaba nakho konke okukhona.

³Yiyo ebonakalisa inkazimulo yobukhosi bakhe, ifuze yena uqobo; izwi layo lamandla liphase konke okukhona. Kuthe isiwufezile umsebenzi wokuhlambulula isintu ezonweni, yaya yahlala kwesokunene sikaNkulunkulu wakoMkhulu kweliphezulu.

INdodana iphakanyisiwe kunezingilosi

⁴Yaphakanyiswa yaba nkulu kunezingilosi kangangoba igama eliyifa layo liphakeme kunelazo.

⁵UNkulunkulu akazange asho nakweyodwa yezingilosi ukuthi: “Wena uyiNdodana yami ngikuzele, mina nginguYihlo kusukela namhlanje.” Kumbi abuye athi: “Mina ngiyoba nguYise, yena abe yiNdodana yami.”

⁶Nalapho esezoyithumela emhlabeni iNdodana yakhe eyizibulo uthi: “Akukhothame zonke izingilosi zikaNkulunkulu ziyikhulekele.”

⁷Uma ekhuluma ngezingilosi uthi: “Wenza izithunywa zakhe zibe yimimoya, izikhonzi zakhe zibe ngamalangabi omlilo.”

⁸Kodwa mayelana neNdodana uthi: “E Nkulunkulu! Isihlalo sakho sobukhosi ngesaphakade, intonga yobukhosi uyiphethe ngobuqotho.

⁹Ukulunga uyakuthanda, uzonda ukonakala, ngakhoke uMvelinqangi uNkulunkulu wakho wakugcoba ngomgcobo othokozisayo, wena wase ujabula lokhu okwedlula okontanga yenu.”

¹⁰Ubuye athi: “Simakade, emandulo wabeka isisekelo somhlaba, izulu lingumsebenzi wezandla zakho.

¹¹Kodlula izulu nomhlaba, wena ume njalo, koguga konke kuphele njengengubo.

¹²Uyokusonga ukugoqe njengesevatho esesigugile bese uvunula kabusha. Kepha-ke wena uyohlala unguwe njalo, iminyaka yakho ayiyikuphela naphakade.”

¹³UNkulunkulu akazange asho nakweyodwa yezingilosi ukuthi: “Hlala ngakwesokunene sami ngize ngingqobe izitha zakho zithele kuwe.”

¹⁴Kanti izingilosi ziyini na? Ziyizidalwa, imimoya ekhonza uNkulunkulu. Ziyaye zithunywe nguye ukuba zisize labo abayodla ifa lensindiso.

AmaHebheru 2

Insindiso enkulu kakhulu

¹Ngakhoke kuhle sikunakisise lokhu esakufundiswayo, singaze sithatheke.

²Izwi lelo elakhulunywa ngomlomo wezingilosi kokhokho lalimi liqinile; yilowo nalowo owaphambukayo kulo engalilaleli wathola isijeziso esimfaneleyo.

³Siyophepha kanjani-ke uma sidebesela lensindiso enkulu kangaka na? Yaqale yashunyayelwa yiNkosi uJesu, labo abamuzwayo base beyifakazela ukuthi lensindiso iyiqiniso.

⁴Naye uNkulunkulu wabafakazela, wenza izibonakaliso nezimangaliso nemisebenzi yamandla eyahlukeneyo, wabela iziphiwo zoMoya oyiNgcwele ngokwentando yakhe.

Lowo okwavela ngaye insindiso

⁵UNkulunkulu akazange abeke izingilosi ukuba zibuse izwe ezweni elizayo, lelo esikhuluma ngalo.

⁶Kodwa kwenye indawo embhalweni ongcwele kuthiwa kuNkulunkulu: “Ubeyini umuntu ungaze umkhumbule ubeyini nje owasemhlabeni ungaze umnake na?”

⁷Nokho, okwesikhashana nje uthe ukumehlisa wangaphansana kunezingilosi; wamethwesa umqhele ongubukhosi nodumo,

⁸wakuhlela konke kwangaphansi kombuso wakhe.” Kuthiwa uNkulunkulu wabeka umuntu ukuba abuse konke. Kusobala-ke ukuthi uNkulunkulu kashiyanga lutho olungabekwanga phansi komuntu ukuba alubuse. Nokho okwamanje asikaboni ukuthi umuntu ubusa konke okukhona.

⁹Kodwa siyambona uJesu owehliswa waba ngaphansana kwezingilosi okwesikhashana, ukuze ngesu lomusa kaNkulunkulu afe, kusizakale bonke abantu ngokufa kwakhe. Simbona manje esethweswe ubukhosi nodumo okungumqhele ekhanda lakhe ngenxa yokufa akufayo.

¹⁰Konke okukhona kwaba khona ngenxa kaMvelinqangi, kwadalwa nguye. Ngakhoke lapho esefuna ukungenisa abantwana bakhe abaningi enkazimulweni yobukhosi bakhe, kwakufanele ukuba aphelelise uJesu oyisisusa sensindiso yabo, ukuze ukuhlushwa kwakhe kumenze abe ngumsindisi ngokupheleleyo.

¹¹Ngoba uJesu uhlambulula abantu ezonweni zabo; yena-ke kanye nalabo abahlanjululwayo bavela koyedwa. Ngakhoke akanamahloni okubabiza ngokuthi bangabafowabo.

¹²Uthi-ke ngabo: “Ngiyomemezela igama lakho kubafowethu, ngikudumise embuthanweni webandla.”

¹³Abuye athi: “Ngiyokwethembela njalo, kuNkulunkulu.” Aqhubeke futhi athi: “Nakhu lapha ngikhona nabantwana engibaphiwe nguNkulunkulu!”

¹⁴Njengoba lababantwana beyinyama negazi, naye uqobo wazalwa waba ngumuntu oyinyama negazi ukuze afe, amnqobe ngokufa kwakhe lona onamandla abanga ukufa, uSathane,

¹⁵abakhulule bonke labo ababelokhu beyizigqila empilweni yabo yonke ngenxa yokwesaba ukufa.

¹⁶Ngoba kusobala ukuthi akakhathaleli ukusiza izingilosi, kodwa ukhathalela ukusiza abozalo luka-Abrahama.

¹⁷Ngakhoke kwakufanele ukuba abe njengabafowabo kukho konke, ukuze abe ngumphristi omkhulu onesihe nothembekileyo phambi kukaNkulunkulu, ahlawulele izono zabantu.

¹⁸Naye uqobo wahlupheka walingwa, ngakhoke unawo amandla okusiza abalingwayo.

AmaHebheru 3

UJesu uphakanyisiwe kunoMose

¹Bazalwane bami abangcwele, niluhlanganyele nathi ubizo lwasezulwini. Mbhekeni lowomphostoli nomphristi esivuma ukuthi ungowethu, yena lona onguJesu!

²Wayethembekile kuNkulunkulu okunguyena owambeka kulesosikhundla, njengalokhu noMose wayethembekile endlini yonke kaNkulunkulu .

³UJesu wathola udumo olukhulu kunoMose njengalokhu udumo lomakhi wendlu luba lukhulu kunendlu ayakhileyo.

⁴Yileyo naleyondlu yakhiwa ngumakhi wayo, kodwa-ke uNkulunkulu ungumakhi wakho konke okukhona.

⁵UMose wayeyisisebenzi wathembeka endlini yonke kaNkulunkulu ukuba afakazele okwakuzoshunyayelwa esikhathini esizayo.

⁶Kodwa uKristu wethembekile, uyiNdodana ebusa indlu kaNkulunkulu. Thina-ke siyindlu yakhe uma sihlala njalo sineqholo sigabe ngalokho esikubheke ngethemba.

Ukuphumula kwesizwe sikaNkulunkulu

⁷Ngakhoke uMoya oyiNgcwele uthi: “Uma nilizwa namuhla iphimbo lakhe

⁸ningabozenza lukhuni izinhliziyu zenu njengoba kwakwenza okhokho benu lapho behlubuka uNkulunkulu mhla bemqala besehlane.”

⁹UNkulunkulu uthi: “Bangiqala bangivivinya lapho, nanxa sebeyibonile imisebenzi yami

¹⁰eminyakeni engamashumi amane. Ngakhoke ngasithukuthelela lesosizukulwane ngaze ngathi: ‘Balokhu bengihlubuka kabahambisani nezindlela zami.’

¹¹Ngafunga ngagomela ngithukuthele ngathi: ‘Kabasoze bangena kulelozwe, izwe ebebeyophumula kulo.’ ”

¹²Bakwethu, nize niqaphele ukuba kungabikho muntu kinina onehliziyo embi engakholwayo embangela ukuba ahlubuke kuNkulunkulu ophilayo.

¹³Kunalokho khuthazanani imihla ngemihla uma kusathiwa “namuhla”, kungabi bikho muntu kinina okhohliswa yisono, inhliziyo yakhe ibe lukhuni.

¹⁴Ngoba thina sidlelana noKristu sihlanganyela naye, uma sibambelele sithe ngqi kuze kube sekugcineni kulokho esasikwethemba kwasekuqaleni.

¹⁵Umbhalo ongcwele uthi: “Uma nilizwa namuhla iphimbo lakhe ningabozenza lukhuni izinhliziyi zenu njengoba kwenza okhokho benu lapho behlubuka uNkulunkulu.”

¹⁶Ngobani labo abezwa iphimbo likaNkulunkulu base bemhlubuka na? Kwakuyilabo uMose abahola wabakhipha kwelaseGibhithe.

¹⁷Ngobani labo uNkulunkulu abathukuthelela iminyaka engamashumi amane na? Kwakuyilabo abonayo base beshayeka phansi bafa ehlane.

¹⁸UNkulunkulu wayeqondise kobani mhla efunga egomela ethi: “Kabasoze bangena kulelozwe, izwe ebebeyophumula kulo”? Wayeqondise kulabo abangamlalelanga.

¹⁹Sesiyabona-ke ukuthi ngenxa yokungakholwa kwabo babengenakungena kulelozwe ababelithenjisiwe.

AmaHebheru 4

¹Manje thina uNkulunkulu usethembise ukuthi siyofinyelela ekuphumuleni kwakhe. Lesisethembiso sisemi, ngakhoke kuhle sihlale njalo sesaba ukuthi omunye wenu angase atholakale ehlulekile ukufinyelela kukho.

²Ngoba indaba ejabulisayo evela kuNkulunkulu yashunyayelwa kithi njengakokhokho besehlane, kodwa izwi lesethembiso abalizwayo alibasizanga ngalutho, ngoba kabalamukelanga ngokukholwa lapho belizwa.

³Thina-ke esikholwayo sesifinyelele kulokhokuphumula uNkulunkulu akhuluma ngakho lapho ethi: “Ngathukuthela ngabafungela ngathi: ‘Kabasoze bangena kulelozwe, izwe ebebeyophumula kulo.’ ” Wakusho lokhu phezu kokuba eseyifezile imisebenzi yakhe kusukela ekudalweni komhlaba.

⁴Ngoba kwenye indawo kuwo umbhalo ongcwele kuphathwa usuku lwesikhombisa kuthiwe: “UMvelinqangi waphumula ngosuku lwesikhombisa kuwo wonke umsebenzi wakhe.”

⁵Kubuye kuthiwe lapha: “Kabasoze bangena kulelozwe, izwe ebebeyophumula kulo.”

⁶Kuyiqiniso-ke ukuthi kukhona abantu abayofinyelela ekuphumuleni, kodwa labo abayizwa kuqala indaba emnandi kaNkulunkulu kabangenanga kukho, ngoba benqaba ukukholwa.

⁷Ngakhoke uNkulunkulu wabuye wanquma olunye usuku oluthile wathi “namuhla”. Phela emuva kwesikhathi eside ukhuluma ngomlomo kaDavide mhla esho lokho esisand' ukukusho ethi: “Uma nilizwa namuhla iphimbo lake ningabozenza lukhuni izinhliziyu zenu.”

⁸Ukuba uJoshwa wanika abantu lokhokuphumula ababekwethenjisiwe, ngabe uNkulunkulu akakhulumanga kamuva ngolunye usuku olwaluzofika.

⁹Ngakhoke kusekhona isabatha, okuyophumula ngalo isizwe sikaNkulunkulu.

¹⁰Labo abasuke sebefinyelele ekuphumuleni kwakhe bayophumula emsebenzini wabo, njengalokhu uMvelinqangi waphumula kowakhe.

¹¹Ngakhoke asikhuthazele ukufinyelela kulokhokuphumula, ukuze kungabi bikho muntu kithina oyobhubha njengalabo ababa yisibonelo esibi ngokungakhohwa kwabo.

¹²Izwi likaNkulunkulu liphilile linamandla libukhali kunayo yonke inkemba esika nhlangothi zombili. Lihlaba lingene lifike lahlukhanise umphefumulo nomoya, amalunga nomnkantsha, lahlulele izinjongo nezizindlo zenhliziyu.

¹³Alukho utho oludaliweyo olusithakele kuNkulunkulu. Konke okukhona kuthe bha phambi kobuso bakhe. Nguye esiyomlandisa ngayo yonke imisebenzi esiyenzileyo.

UJesu ungumphristi omkhulu

¹⁴Sinomphristi omkhulu ophakanyiswe waba mkhulu kakhulu, wadabula amazulu kweliphezulu, uJesu iNdodana kaNkulunkulu. Ngakhoke asibambelele sithi ngqi kulokho esikuvumayo ngesivumo sethu sokholo.

¹⁵Sinomphristi wethu omkhulu ongehluleke ukusizwela ebuthakathakeni bethu. Kanti-ke futhi walingwa kukho konke njengathi, kodwa akonanga ngalutho yena.

¹⁶Ngakhoke asisondele ngomqhanago esihlalweni sobukhosi esingesomusa, nce sihawukelwe senzelwe umusa, uNkulunkulu asisize lapho sidinga usizo.

AmaHebheru 5

¹Yilowo nalowomphristi omkhulu okhethwa phakathi kwabantu ubekelwe ukuba abamele kuNkulunkulu, ahlawulele izono zabo ngokunikela ngeziphonangemihlatshelo.

²Uyakwazi ukubekezelela abangenalwazi nabedukayo, ngoba naye uqobo lwakhe unobuthakathaka bezono.

³Ngenxa yalobubuthakathaka bakhe kufanele anikele ahlawulele ngisho nezono zakhe imbala njengoba ehlawulela ezabantu.

⁴Akukho muntu ozikhethela lesisikhundla esihloniphekile, uyaye abizwe nguNkulunkulu abesebekwa kuso njengoAroni.

⁵Kanjalo futhi noKristu akazinikanga loludumo lokuba ngumphristi omkhulu, kodwa uNkulunkulu wamphakamisa wathi kuye: “Wena uyindodana yami ngikuzele, mina nginguYihlo kusukela namhlanje.”

⁶Abuye athi kwenye indawo embhalweni ongcwele: “Wena unumphristi kwaphakade, ngokokuma kukaMelkhizedeki.”

⁷Ngenkathi uJesu esemhlabeni wayeyaye akhuleke ajule anxuse ebubula ngezwi elikhulu akhale ezimathonsi ebhekise kuNkulunkulu onamandla okumsindisa ekufeni. UNkulunkulu wamuzwa, ngoba uJesu wamthobela.

⁸Ukuhlupheka kwakhe uJesu kwamfundisa ukulalela, nakuba wayeyiNdodana kaNkulunkulu.

⁹Nalapho esenziwe umsindisi ngokupheleleyo, waba yisisusa sensindiso yaphakade kubo bonke abamlalelayo.

¹⁰Wabekwa-ke nguNkulunkulu waba ngumphristi omkhulu ngokokuma kukaMelkhizedeki.

Xwayani ningahlubuki ekukholweni!

¹¹Kusekuningi esingakusho mayelana nalendaba, kodwa kulukhuni ukunichazela khona, ngoba nithatha kade ukuzwa.

¹²Noma bekufanele ukuba ngalesisikhathi ngabe seniyafundisa, kodwa empeleni nisadinga omunye ozobuye aniqalise phansi anicathulise ezifundisweni zezwi likaNkulunkulu. Nisadinga ukunceliswa ubisi kunokuba nidle okuqinileyo.

¹³Osancelayo engakabi nalo ulwazi olwaneleyo ngokulunga uma efundiswa ngakho, useyingane ngokomoya.

¹⁴Kodwa ukudla okuqinileyo kungokwalabo asebekhule baqina okuthe ngokuvama kwabo ukusebenzisa izingqondo zabo bakhali phela ukwazi umahluko phakathi kokulungileyo nokubi.

AmaHebheru 6

- ¹Ngakhoke asisiyeke manje isifundiso sokuqala esacathuliswa ngaso sifundiswa ngoKristu, sedlulele kokuthe xaxa. Asingabe sisabeka isisekelo kabusha, sibe sisalokhu sikhuluma ngokuphenduka, ukuba umuntu angeyami emisebenzini eyimihlabathi efileyo, nangokukholwa kuNkulunkulu
- ²nangemfundiso emayelana nokubhabhadiswa nokubekwa kwezandla nokuvuka kwabafuleyo nokwahlulelwa kwaphakade.
- ³Siyiqhubekela phambili sifundise uma iNkosi ivuma.
- ⁴Ayikho indlela abantu asebehlubukile abangabuye baguqulwe ngayo baphenduke, sebeke bakhanyiselwa nguNkulunkulu. Base bezwa ubumnandi besiphiwo esivela ezulwini, bamukela uMoya oyiNgcwele.
- ⁵Balinambitha balizwa limnandi izwi likaNkulunkulu, bawabona namandla ezwe elisha elizayo.
- ⁶Bangebuye baphenduke, ngoba ngokuhlubuka kwabo bayaye bayibethele futhi esiphambanweni iNdodana kaNkulunkulu bayithele ngehlazo emphakathini.
- ⁷UMvelinqangi uyawubusisa umhlabathi uma usuke umatiswa yimvula, ingene kuwo kumile izitshalo eziphilisa abalimi bawo.
- ⁸Kodwa uma kulomhlabathi kumila imbuyabathwa nokhula olunameva, awunamsebenzi walutho. Ungahle uqalekiswe nguMvelinqangi bese uphetha ngokubhujiswa ngomlilo.

Isethembiso sikaNkulunkulu simi njalo

- ⁹Noma sikhuluma kanje bathandekayo, sineqiniso ukuthi niyofikelwa yizinto ezingcono eziphathelene nokusindiswa kwenu.
- ¹⁰UMvelinqangi kasiye owahlulela ngokungeyikho ukuba akhohlwe umsebenzi enawenzayo nothando enalukhombisa ngenxa yakhe lapho nisiza abakhohlwayo.
- ¹¹Nakhu esikunxanele, ukuba yilowo nalowo kinina akubonakalise ngempela lokhokukhuthazela kuze kube sekupheleni, nize nikubone kufezeka lokhu enikubheke ngethemba.
- ¹²Kasithandi ukuba nivilaphe, kodwa lingisani labo abamukela ifa ababelethenjiswe nguNkulunkulu, belithola ngokukholwa nangokubekezela.
- ¹³Mhla uNkulunkulu ethembisa uAbrahama wazifunga yena uqobo, njengoba kwakungekho lutho olukhulu kunaye angalufunga.
- ¹⁴Wathi: “Impela ngiyokubusisa uqobo lokukubusisa, ngichumise inzalo yakho ibe ngangotshani bezwe.”
- ¹⁵UAbrahama walinda ngesineke wayesekwemukela ayekwethenjise nguNkulunkulu.

¹⁶Abantu bayaye bafunge omkhulu kunabo, isifungo bese siqeda konke ukuphikisana okukhona.

¹⁷Kwathanda yena uNkulunkulu kakhulu ukuba atshengise izindlalifa zesethembiso, kubakhanyekele ukuthi inhloso yakhe ingeguquke. Ngakhoke wasicilela isethembiso sakhe ngesifungo.

¹⁸Nazi izinto ezimbili ezingasoze zaguquka, uNkulunkulu angeqambe amanga ngazo: isethembiso nesifungo. Ngalezizinto thina esiphephele kuye siyakhuthazwa kakhulu ukuba sibambelele kulelothemba esikubheke ngalo lokho esikwethenjisiweyo.

¹⁹Lelithemba linjengensika ephase umphefumulo wethu. Liqinile, kanti-ke futhi ligxilile; lidabula isihenqo sethempeli lasezulwini lize lifike phakathi eNdaweni eNgcwelengcwele.

²⁰UJesu wasandulela, waba yisigijimi sokuqala esangena lapho, esingenela thina. Nguye osengumphristi omkhulu ungunaphakade ngokokuma kukaMelkhizedeki.

AmaHebheru 7

Isikhundla sikaMelkhizedeki sobuphristi

¹UMelkhizedeki lo wayeyinkosi yaseSalema, umphristi kaMvelinqangi uSimayedwa. Mhla uAbrahama ebuyela ekhaya eqeda kunqoba amakhosi amane, wanqwamana nenkosi uMelkhizedeki yambusisa.

²Wayeseyethulela okweshumi kukho konke ayekuphange empini. Okokuqala, igama elithi uMelkhizedeki lihunyushwa lithiwe inkosi yokulunga. Njengoba yayibusa eSalema, igama layo libuye lithi inkosi yokuthula.

³Awuqondakali umlando kayise nonina nendabuko yayo, akwaziwa ngisho nomlando wokuzalwa nokufa kwayo. InjengeNdodana kaNkulunkulu, iyohlala ingumphristi ungunaphakade.

⁴Ake nibone manje ukuthi yayinkulu kangakanani! UAbrahama ukhokho wayethulela okweshumi kwamagugu ayewaphange empini.

⁵Abozalo lukaLevi ababekwa babe ngabaphristi, kuthiwa emthethweni abaqoqe okweshumi kwabakwaIsrayeli, okusho ukuthi abakuthathe kubafowabo, noma nabo bengabozalo luka-Abrahama.

⁶Inkosi uMelkhizedeki yayingeyona eyozalo lukaLevi, kodwa yathatha okweshumi kuAbrahama. Yayisimbusisa lowo owayethenjisiwe nguNkulunkulu.

⁷Akunakuphikwa ukuthi lowo obusisayo mkhulu kunalowo obusiswayo.

⁸Lababaphristi abaqoqa okweshumi lapha, ngabantu okuhamba kuhambe bafe, kodwa lowaya uphila njalo, njengoba efakazelwa ngumbhalo ongcwele.

- ⁹Kanti-ke futhi naye uLevi okunguye oqoqa okweshumi, kungathiwa kwathathwa okweshumi kuye mhla uAbhrahama ekukhokhayo.
- ¹⁰Ngoba uLevi wayevele ekhona embewini kakhokho wakhe mzuwana ehlangatshezwa uMelkhizedeki.
- ¹¹Isizwe sakwaIsrayeli sanikwa umthetho kaNkulunkulu. Isisekelo okwakuzinde kuso lomthetho, kwakuyisikhundla sobuphristi esasiphethwe ngabaLevi. Ukuba lesisikhundla sobuphristi besiyisikhundla esiphelele ncmishi, kwakudingeke ngani ukuba kuvele omunye umphristi ngokokuma kukaMelkhizedeki, kungeyikho okuka-Aroni na?
- ¹²Ngoba uma ubuphristi buguqulwa, kuyadingeka ukuba nomthetho uguqulwe.
- ¹³Lowo okukhulunywa ngaye lapha ungowomunye umndeni ongakaze ube namuntu kuwo okhonza elathini.
- ¹⁴Ngoba kuyazeka ukuthi iNkosi yethu ivela emndenini wakwaJuda, nalapho uMose ekhuluma ngabaphristi akazange asho lutho ngawo.
- ¹⁵Ngakhoke lendaba ichacha ngokusobala lapho sekuvele omunye umphristi owehlukile onjengoMelkhizedeki.
- ¹⁶Wabekwa-ke waba ngumphristi, kungengesimiso somthetho othi makabe ngowozalo oluthize lapha emhlabeni, kodwa wabekwa kulesisikhundla ngenxa yamandla okuphila kwakhe okungabhubhiyo.
- ¹⁷Ngoba umbhalo ongcwele ufakaza ngaye uthi: “Wena ungumphristi kwaphakade ngokokuma kukaMelkhizedeki.”
- ¹⁸Isimiso sakuqala sase siyachithwa-ke ngesizathu sokuthi siyaxegaxega, asisenamkhuba walutho.
- ¹⁹Phela umthetho kaMose kawuphelelisanga lutho. Kepha manje, sinikwa ithemba elingcono esikwazi ukusondela kuNkulunkulu ngalo.
- ²⁰Kanti-ke futhi, nokubekwa kwakhe kwaqiniswa nguNkulunkulu ngesifungo. Abanye babekwa baba ngabaphristi kungafungwanga.
- ²¹Kodwa uJesu wabekwa kulesisikhundla ngesifungo salowo owathi kuye: “USimakade wafunga wagomela, akasoze asihoxisa isethembiso sakhe, wathi: ‘Wena ungumphristi kwaphakade.’ ”
- ²²Sibona ngakho lokho ukuthi singcono kakhulu isivumelwano lesi esimi ngoJesu.
- ²³Okunye-ke futhi ukuthi lababaphristi babenqwabelana baze babe baningi bebekwa, kodwa bengenakuhlala esikhundleni ngoba babecekwa ukufa.
- ²⁴Kodwa lomphristi onguJesu uphila ungunaphakade; isikhundla sakhe ngeke sadluliselwa komunye.

²⁵Ngakhoke uyakwazi ukubasindisa ngokupheleleyo labo abeza kuNkulunkulu bengena ngaye, ngoba uhlala njalo ebanxusela kuNkulunkulu.

²⁶Nguye kanye umphristi omkhulu onjengalona owayesifanele thina. Yena-ke ungcwele, akanasici sasono, wehlukanisiwe ezonini, waphakanyiswa walengama lonke elaphezulu.

²⁷Akafani nabanye abaphristi abakhulu; akudingekile ukuba mihla namalanga alokhu eqalisa ngokwethula umhlatshelo wezono zakhe, kandukuba akwenzele abantu. Wethula umhlatshelo kwaba kanye, mhla ezidela ukuphila kwakhe.

²⁸Umthetho kaMose ubeka abantu ababuthakathaka babe ngabaphristi abakhulu; kodwa uNkulunkulu wabeka iNdodana yaba ngumphristi opheleleyo ungunaphakade, wakwenza ngesethembiso esaqiniswa ngesifungo esenziwa umthetho usukhona.

AmaHebheru 8

Umphristi omkhulu wesivumelwano esisha

¹Ingqikithi yalokho esikushoyo, ukuthi sinumphristi omkhulu ohlala ngakwesokunene sesihlalo sobukhosi bukaNkulunkulu wakoMkhulu kweliphezulu.

²Lomphristi omkhulu wenza umsebenzi wakhe kuleyondlu engcwele eyidokodo langempela lesivumelwano sikaNkulunkulu, elingamiswanga muntu kodwa lamiswa yiNkosi uSomandla.

³Yilowo nalowomphristi omkhulu ubekelwe ukuba ethule kuNkulunkulu iminikelo nemihlatshelo. Ngakhoke kwakudingeka ukuba naye lomphristi wethu omkhulu abe notho azolwethula.

⁴Ukuba wayesemhlabeni, wayengeke neze abe ngumphristi, ngoba bakhona abaphristi abethula iminikelo ngokomthetho kaMose.

⁵Lababaphristi bakhonza endlini engcwele engumfanekiso nje olufifi wendlu engcwele yasezulwini. Ngenkathi uMose esezokwakha idokodo lesivumelwano, uNkulunkulu wamlayeza wathi: “Qikelela ukuba konke ukufuzise umfanekiso engakutshengisa wona entabeni!”

⁶Kodwa manje uJesu ubekiwe waba ngumphristi onesikhundla esiphakemeyo esedlula esabo, njengoba engummeli wesivumelwano esingcono; lesivumelwano sakhelwe phezu kwezethembiso eziyisisekelo esingcono.

⁷Ukuba kwakungekho okusolekayo esivumelwaneni sokuqala, ngempela sasingayikudingeka esesibili.

⁸Kodwa uNkulunkulu uyasisola isizwe sakhe usho ngomlomo womphrofethi uthi: “USimakade uthi: ‘Niyabona, ziyeza izinsuku lapho ngiyomisa isivumelwano esisha nendlu kaIsrayeli nendlu kaJuda,

⁹ singabi njengalesosivumelwano engasenza nokhokho babo mhla ngibabamba ngibahola ngengalo ngibakhipha ezweni laseGibhithe. Kabasigcinanga isivumelwano sami, ngakhoke ngabafulathela.

¹⁰ Yilesi isivumelwano engiyosenza nendlu kaIsrayeli ezinsukwini ezizayo: Izingqondo zabo ziyobuswa yimithetho yami, ngiyilobe ezinhliziyweni zabo, ngibe nguNkulunkulu wabo, bona babe ngabantu bami.

¹¹ Ngeke sisaba khona isidingo sokuba izakhamuzi zifundisane, kumbe umuntu athi kumfowabo: Kuhle ukuba umazi uSimakade! Ngoba bonke bayongazi kusukela kubantukazana babo kuze kufike ezikhulwini.

¹² Ngoba ngiyobenzela umusa, ngibathethelele izono zabo, icala labo abalenzileyo ngeke ngibuye ngilikhumbule.’ ”

¹³ Njengoba uNkulunkulu ekhuluma ngesivumelwano esisha, kukhomba ukuthi esokuqala sesidala asisenamkhuba; phela into endala iguga iphelele ibisishabalala.

AmaHebheru 9

Ithempeli lasemhlabeni nelasezulwini

¹ Ngisho nesivumelwano sokuqala imbala sasinemitheshwana okwakuqhutshwa ngayo enkonzweni yasethempelini, kukhona futhi nendlu engcwele eyayakhiwe ngabantu lapha emhlabeni.

² Kwakumiswe idokodo lesivumelwano. Engxenyeni yalo yokuqala uma ungena kwakukhona uthi lwezibani netafula elinezinkwa ezazethulwe kuNkulunkulu; lendawo yayaziwa ngokuthi yiNdawo eNgcwele.

³ Emsamo ngale kwendwangu eyisihlenqo sesibili kwakuyindawo eyayaziwa ngokuthi iNgcwelengcwele.

⁴ Kulendawo kwakukhona ilathi legolide okwakushiselwa kulo impepho, kwakukhona futhi nomphongolo wesivumelwano owawugudulwe ngegolide nxazonke. Phakathi kuwo kwakukhwezwe ukhamba olubunjwe ngegolide olwaluqukethe imana. Kwakugcinwa kuwo nenduku ka-Aroni eyake yahluma amaqabunga, nezibhebhe ezimbili zamatshe okulotshwe kuzo imiyalo yesivumelwano.

⁵ Ngaphezu komphongolo wesivumelwano kwakumi amasherabhu abunjwe ngegolide abonisa ubukhona bobukhosi bukaNkulunkulu; amaphiko awo ayeyengamele lendawo yokuhlawulela izono. Kodwa-ke manje akulona ithuba lokuba sikuchaze konke ngononina.

⁶ Zazihleleke kanjalo-ke zonke lezizinto. Abaphristi bajinge bengena njalo engxenyeni yokuqala yedokodo bagcine umsebenzi wabo wokukhonza.

⁷ Kodwa kuleyongxenye yesibili esemsamo kuyaye kungene umphristi omkhulu kuphela, kanye nje ngonyaka. Uyaye angene ephethe igazi lesilwane, afike alethule

kuNkulunkulu, anikele ezakhe izono nezabantu abazenza bengaqondi ukuthi bayona.

⁸Ngalokhu-ke uMoya oyiNgcwele usifundisa ngokusobala ukuthi indlela eya eNdaweni eNgcwelengcwele ayikavuleki uma kusekhona lengxenye yokuqala yedokodo.

⁹Ingumfanekiso okhomba isikhathi samanje, lapho iminikelo nemihlatshelo eyethulwayo ingekhulule ngokupheleleyo unembeza walowo onikelayo.

¹⁰Zonke-ke lezizinto ziphathelene nokudla nokuphuza nezinhlabo ezehlukeneyo zokuhlambulula. Konke lokhu kuyizimiso eziphathelene nokomzimba, zibekelwe abantu kuze kufike isikhathi sohlelo olusha olungcono.

¹¹Kepha uKristu usefikile ungumphristi omkulu osilethele izibusiso osekungezethu manje. Indlu engcwele akhonzela kuyo ingcono yedlulele ngokuma kwayo kunedokodo lesivumelwano, iphelele ncimishi, kayakhiwanga ngezandla zabantu, okusho ukuthi kakuyona eyalomhlaba odaliweyo. Wadabula kuyo,

¹²wangena kwaba kanye kuphela eNdaweni eNgcwelengcwele. Wangena engaphethe gazi lambuzi nathole ukuba alethule libe ngumhlatshelo, kodwa wanikela ngegazi lakhe uqobo, wasizuzela ukuhlengwa kwaphakade.

¹³Igazi lezimbuzi nezinkunzi kanye nomlotha wesithole esishisiweyo kuyaye kufafazwe kubantu abangahlanzekile, bese kubahlambulula bahlanzeke ngokomzimba.

¹⁴Njengoba lokhu kuyiqiniso, igazi likaKristu liyosihlanza kakhulu kangakanani kunalokho! NgoMoya oyiNgcwele ongunaphakade wazethula yena uqobo kuNkulunkulu, waba ngumhlatshelo ongenasici. Igazi lakhe liyowuhlanza unembeza wethu ukuba singeyami emisebenzini eyimihlatho efileyo, kodwa sikhonze uNkulunkulu ophilayo.

¹⁵Ngakhoke sisha lesisivumelwano uKristu angumlamuli kuso. Ngokufa kwakhe wahlawulela izono ekade zenziwa ngenkathi kusemi isivumelwano esidala, ukuze abantu ababizile uNkulunkulu badle ifa laphakade abethembise lona.

¹⁶Uma umuntu eseyibhalile incwadi yefa, kudingekile ukuba kube khona ubufakazi bokuthi sewafa owayilobayo.

¹⁷Okulotshwe kuyo kusebenza kuphela uma esefile owayilobayo; ayisho lutho leyoncwadi uma esadla amabele.

¹⁸Ngalokho-ke ngisho nesivumelwano esidala asimiswanga kungachithwanga gazi.

¹⁹UMose waqala ngokumemezela kuso sonke isizwe, esitshela ngayo yonke imiyalo njengoba ilotshiwe emthethweni. Wayesethatha igazi lamathole nelezimbuzi, walixuba namanzi, wathatha uboya bemvu obububende negatsha

lehisophe, wakugcobhoza egazini, wachela ngalo umqulu womthetho nabantu bonke.

²⁰Wathi: “Lokhu kuyigazi eliqinisa isivumelwano uNkulunkulu animisele sona.”

²¹Kanjalo futhi walifafaza ngegazi idokodo lesivumelwano kanye nakho konke okusetshenziswa enkonzweni.

²²Empeleni, umthetho ufuna ukuba cishe zonke izinto zihlanzwe ngegazi, yebo, ngaphandle kokuba kuchithwe igazi akukho kuthethelelwa.

Ukuzinikela kukaKristu kususa izono

²³Ngakhoke, kwakudingekile ukuba zonke izinto eziyimifanekiso yalokho okusezulwini zihlanzwe ngalendlela. Kodwa-ke izinto zangempela ezikweliphezulu zidinga imihlatshelo engcono kunaleyo.

²⁴Ngoba uKristu akangenanga endlini engcwele eyakhiwe ngezandla zabantu engumfanekiso nje waleyo okuyiyona yempela. Kepha wangena ezulwini uqobo lwalo, ukuba amele thina manje phambi kukaNkulunkulu.

²⁵Kuyaye kuthi minyaka yonke umphristi omkhulu angene eNdaweni eNgcwelengcwele, ephethe igazi lesilwane, okusho ukuthi yigazi elingesilo elakhe. Kodwa-ke uKristu akazenzanga umhlatshelo kaningi,

²⁶ngoba ukuba kwakunjalo, kwakumele ahlupheke kaningi yilokhu kwadalwa umhlaba. Kunalokho, manje njengoba izinsuku zomhlaba seziya ekupheleni, ubonakalisiwe kanye nje kuphela, ukuba ngokuzinikela kwakhe asuse izono zethu.

²⁷Umuntu ufa kube kanye nje, abesehlulelwa nguNkulunkulu.

²⁸Ngakhoke uKristu wanikelwa kanye kuphela, ukuba asuse izono zabantu abaningi. Uyobuye abonakale ngokwesibili, engasezile ngokuzothwala izono zabantu kodwa esezosindisa labo abamlindele ngabomvu.

AmaHebheru 10

¹Umthetho uyizalinga nje zezibusiso ezizayo, kawusiwo umfanekiso esingaphawula kuwo izinto njengoba zinjalo ngempela. Iminyaka ngeminyaka kulokhu kwethulwa imihlatshelo, kodwa umthetho awunamandla okubaphelelisa ngayo lababantu abayethulayo.

²Ukuba kwakunjalo, ngabe kabayekanga yini ukuyethula na? Phela abakhonzayo babengeke babe nonembeza wecala uma sebehlanjululwe kwakanye ezonweni.

³Kanti lemihlatshelo ilokhu ikhumbuza abantu iminyaka ngeminyaka ngezono zabo.

⁴Ngoba igazi lezinkunzi nezimbuzi lingezisuse neze izono zomuntu.

⁵Ngakhoke, mhla uKristu eza emhlabeni uthi: “Awufunanga mihlatshelo naminikelo; ungilungisele umzimba wami ukuba nginikele ngawo;

- ⁶awuthokozelanga mihlatshelo eshiswayo naminikelo ehlawulela izono.
- ⁷Bese ngiphendula ngithi: ‘Nakhu ngilapha, Nkulunkulu, ngize ukuba ngenze intando yakho, njengalokhu kulotshwe ngami emqulwini wencwadi yomthetho.’ ”
- ⁸Okokuqala uthi: “Awufunanga mihlatshelo naminikelo, ngisho neshiswayo nehlawulela izono, kanti futhi awuthokozi ngayo.” Uyakusho lokho yize umthetho uthi makunikelwe ngayo.
- ⁹Abesethi: “Nakhu ngilapha, ngize ukuba ngenze intando yakho.” Ngakhoke ugudluza iminikelo yakuqala, esikhundleni sayo abeke omunye umnikelo.
- ¹⁰Ngoba uJesu Kristu wayenza intando kaNkulunkulu, wanikela ngomzimba wakhe uqobo kwakanye kuphela, ngakhoke sesingcwelisiwe sagezwa izono zethu.
- ¹¹Yilowo nalowomphristi uyaye aye elathini imihla ngemihla afike apha the inkonzo. Uyaye aphindaphinde leyominikelo efanayo engeke isuse izono.
- ¹²Kepha uKristu wawethula umhlatshelo owodwa ngenxa yezono, wayesehamba wahlala unomphela ngakwesokunene sikaNkulunkulu.
- ¹³Lapho-ke ulindele ukuba izitha zakhe zinqotshwe zithele kuye.
- ¹⁴Ngoba ngomhlatshelo owodwa zwi ubenze baba ngabapheleleyo phakade labo ayaye abangcwelise abahlambulule ezonweni.
- ¹⁵UMoya oyiNgcwele nawo uyakufakaza kithi lokhu. Uqale wathi:
- ¹⁶“USimakade uthi: ‘Yilesi isivumelwano engiyosenza nalababantu ezinsukwini ezizayo: Izingqondo zabo ziyobuswa yimithetho yami, ngiyilobe ezinhliziyweni zabo.’ ”
- ¹⁷Uqhubeka uthi: “Ngeke ngibuye ngilikhumbule icala labo abalenzileyo nemikhuba emibi abayigilayo.”
- ¹⁸Lapho sezithethelelwe izono, awusadingeki neze umhlatshelo wokuhlawulela izono.

Asisondele kuNkulunkulu

- ¹⁹Ngakhoke bazalwane sineqholo, ngoba siyazi ukuthi sinelungelo lokungena eNdaweni eNgcwelengcwele ngenxa yegazi likaJesu.
- ²⁰Ngokudabula isihenzo, kusho ukuthi ngokunikela ngomzimba wakhe, wasivulela indlela entsha nephilayo yokuba singene.
- ²¹Phela sinomphristi ophakanyisiwe waba mkhulu obheke indlu kaNkulunkulu.
- ²²Ngakhoke asisondele kuNkulunkulu ngenhliziyo eqotho, sikholwa ngempela singangabazi. Sisondele kuye, izinhliziyo zethu zifafaziwe sahlanjululwa ukuba singabe sisahlulwa ngunembeza wethu, nemizimba yethu yagezwa ngamanzi ahlanzekileyo.

- ²³Ngakhoke asibambebelele sithi ngqi kulelothemba esilivumayo ngesivumo sethu sokholo, ngoba uthembekile uNkulunkulu, uyoisifeza isethembiso sakhe.
- ²⁴Asinakekelane sikhuthazane ukuba sithande, senze imisebenzi emihle.
- ²⁵Kukhona abanye abajwayele ukuphutha ezinkonzweni zebandla, asingabalingisi labo; kunalokho asikhuthazane ukuba siye ezinkonzweni, ikakhulu njengoba nibona ukuthi usuku lokubuya kweNkosi uJesu luya ngokusondela.
- ²⁶Ngoba akusekho mhlathshelo ongahlawulela izono zethu uma siqhubeka nokona ngamabomu emuva kokuba sesilazi iqiniso.
- ²⁷Kunalokho, sekusele nje ukuba silindele ngovalo ukwahlulelwa ngomhla wokuphela, nomlilo omkhulu oyobhubhisa bonke abamelene noMvelinqangi.
- ²⁸Uma umuntu edelela umthetho kaMose, kuthiwa akangahawukelwa, kodwa abulawe uma elahlwa yicala linobufakazi babantu ababili noma abathathu.
- ²⁹Ufanele ukujeziswa kanzima kakhulu kunalokho umuntu obukela phansi iNdodana kaNkulunkulu, athi lingcolile igazi lesivumelwano, lelogazi ahlanjululwa ngalo, ahlambalaze uMoya oyiNgcwele omenzele umusa.
- ³⁰Ngoba siyamazi lowo owathi: “Yimi enginelungelo lokujezisa; kuyophindisa mina.” Wabuye wathi: “USimakade uyobahlulela abantu bakhe.”
- ³¹Kuyinto esabekayo ukunikelwa esandleni esijejisayo sikaNkulunkulu ophilayo.
- ³²Khumbulani izinsuku esezadlula! Kwathi lapho senikwemukele ukukhanya kukaNkulunkulu, naqinisela emzukuluzukwini wezinhlupheko ezinkulu.
- ³³Kwesinye isikhathi babeyaye babukise ngani phambi kwabantu banithuke banihluphe; kwesinye isikhathi nizibandakanye nababehlushwa kanje.
- ³⁴Nakanjalo futhi nanibezwela umunyu ababeboshiwe; nalapho naphucwa impahla yenu ngendluzula nikubekezelela lokho ngenhliziyo emhlophe ngoba nanazi ukuthi vele nilondelwe impahla engcono kunaleyo, impahla eyohlala ungunaphakade.
- ³⁵Ngakhoke nize ningalilahli ithemba, kodwa yibani nesibindi, yikhona niyothola umvuzo omkhulu.
- ³⁶Kudingeka ukuba nibekezele yikhona nizokwenza intando kaNkulunkulu, namukele anethembise khona.
- ³⁷Ngoba umbhalo ongcwele uthi: “Kusazoba yisikhashana nje, abesefika lowo ozayo angalibali.
- ³⁸Ngokuba olungileyo wami uyophila ngokukholwa kwakhe, kodwa uma ehlehla ekukholweni angisayikumthakasela.”
- ³⁹Kepha thina asiyibo abahlehla ekukholweni babhubhe, kodwa siyilabo abakholwayo basindiswe.

AmaHebheru 11

Ukukholwa

- ¹Ukukholwa kungukuba neqiniso ngalokho okubhekwe ngethemba, kuqinisa ngalezozinto ezingebonwe ngamehlo.
- ²Kwakungukukholwa kwabo okwenza ukuba uNkulunkulu abancome okhokho basendulo.
- ³Ngokukholwa sambulelwa ukuthi umhlaba nakho konke okukhona kwadalwa ngezwi elaphuma kuMvelinqangi, nokuthi lokhu okubonwayo akudalwanga ngezinto ezibonwa ngamehlo.
- ⁴Ngokukholwa uAbela wanikela kuNkulunkulu ngomhlatshelo owedlula okaKhayini. Ngenxa yokukholwa kwakhe ufakazelwa kuthiwe ungumuntu olungileyo. UNkulunkulu uqobo wazithakasela izipho azethulayo. Noma uAbela esafa kodwa ukukholwa kwakhe kusakhuluma.
- ⁵Ngenxa yokukholwa uEnokhi wasuswa kulomhlaba nguNkulunkulu, ukuze angadluli ekufeni. Kabange esabonwa muntu ngoba uNkulunkulu wayesemthathile. Umbhalo ongcwele usamfakazela ukuthi engakathathwa wayengumuntu othakaselwa nguNkulunkulu.
- ⁶Kodwa umuntu ongakholwayo angemjabulise uNkulunkulu, ngoba osondela kuNkulunkulu, kumele akholwe ukuthi ukhona nokuthi uyabavuzela labo abamfunayo.
- ⁷Ngokukholwa uNowa walalela lapho uNkulunkulu emvusa ngalezozigigaba ezazizokwenzeka esikhathini esizayo. Njengoba wayengumuntu owesaba uNkulunkulu, wakha umkhumbi ukuze aphephe nomuzi wakhe. Ukukholwa kwakhe yikhona okwalahla umhlaba, wayesabelwa ifa elingukulunga okutholakala ngokukholwa.
- ⁸Ngokukholwa uAbrahama walalela mhla uNkulunkulu embiza ukuba athuthele ezweni ayomabela lona libe yifa lakhe. Walishiya izwe lakubo, wahamba engazi ukuthi ulibhekisaphi.
- ⁹Ngokukholwa wahlala kulelozwe elithenjisiweyo elokhu eyisihambi kulo. Wahlala emadlangaleni. Benze njalo noIsaka noJakobe ababeyizindlalifa kanye naye zalokho uNkulunkulu ayekwethembisile.
- ¹⁰Ngoba uAbrahama wayelokhu elindele lowomuzi owaklanywa wakhiwa nguNkulunkulu uqobo okuyiwona oyinxulumana lasezulwini elinezisekelo eziyisimbelambela.
- ¹¹Ngokukholwa uAbrahama wakwazi ukuba azale, noma wayesegugile impela, kanti noSara umkakhe wayeyinyumba. Phela uAbrahama wabambelela ekutheni uNkulunkulu uthembekile uyokufeza ayekwethembisile.

- ¹²Noma wayesenjengomuntu osewafa, kodwa ngaye yedwa nje zwi kwavela izizukulwane eziningi eziwulibo lwakhe, abantu abangangezinkanyezi esibhakabhakeni, bengangezihlabathi zolwandle ezingenakubalwa.
- ¹³Bonke-ke laba bafa bebambelele ekukholweni. Kabakwemukeliswanga ababekwethenjisiwe, kepha bakubona bathokoza ngakho kusekude nabo. Bakuveza ngokusobala ukuthi bangabafokazi nezihambi kulomhlaba.
- ¹⁴Abantu abakhuluma ngalendlela bayakhombisa ukuthi bahamba befuna izwe okungelabo.
- ¹⁵Ukuba babelokhu becabanga ngalelozwe abase bephume kulo, babeyoba nethuba lokuphindela kulo.
- ¹⁶Kunalokho, babelangazelele izwe elingcono elingelasezulwini. Ngakhoke uNkulunkulu akanamahloni okubizwa ngoNkulunkulu wabo, ngoba ubalungisele inxuluma.
- ¹⁷Ngokukholwa uAbrahama wanikela ngendodana yakhe uIsaka yaba ngumhlathelo mhla evivinywa nguNkulunkulu. Wancama khona ukunikela ngendodana yakhe okwakungukuphela kwayo, yena loAbrahama okwakukade kwenziwe kuye izethembiso
- ¹⁸nokwathiwa kuye: “Inzalo yakho iyovela ngoIsaka.”
- ¹⁹Wabambelela ekutheni uNkulunkulu unamandla okuvusa ekufeni, empeleni singalinganisa sithi wabuye wayithola futhi indodana yakhe isibuya ekufeni,
- ²⁰Ngokukholwa uIsaka wabusisa uJakobe noEsawu ekhuluma ngezinto ezazizobehlela.
- ²¹Ngokukholwa uJakobe engakafi wabusisa amadodana kaJosefa ngayinye. Wazimelela ngodondolo lwakhe ayeluphetha, wakhuleka kuNkulunkulu.
- ²²Ngokukholwa uJosefa esezokufa wakhuluma ngokufuduka kwesizwe sakwaIsrayeli ezweni laseGibhithe, walayeza ngamathambo akhe.
- ²³Ngokukholwa abazali bengane uMose bayithukusa izinyanga ezintathu, ngoba babona ukuthi ilusana olubukekayo, kabawesabanga umyalo wenkosi yaseGibhithe.
- ²⁴Ngokukholwa uMose esekhulile wenqaba ukubizwa ngelendodana yendodakazi kaFaro.
- ²⁵Wancama khona ukuba ahlupheke kanye nabantu bakaNkulunkulu kunokuba azitike ngesono isikhashana.
- ²⁶Wayethi ukuthukwa ngenxa kaMesiya kuyingcebo enkulu kunamagugu aseGibhithe. Phela wayemagange ebheke umvuzo ayezowuthola.

²⁷Ngokukholwa walishiya elaseGibhithe engalwesabi ulaka lwenkosi uFaro. Wayebekezela kube sengathi uyambona ongabonwayo.

²⁸Ngokukholwa walayeza mayelana nomkhosi wePhasika nokubhecwa kweminyango ngegazi ukuba ingilosi eyayizobhubhisa amazibulo ingawathinti neze awamaIsrayeli.

²⁹Ngokukholwa abakwaIsrayeli bawela uLwandle oluBomvu, kwaba sengathi banyathela emhlabathini owomileyo. Kuthe lapho amaGibhithe ethi nawo enza lesa, aminza.

³⁰Ngenxa yokukholwa kwadilika izingange zaseJerikho emuva kokuba sezizungezwe ngamaIsrayeli isithuba sezinsuku eziyisikhombisa.

³¹Ngenxa yokukholwa uRahabhu unondindwa kabhubhanga kanye nabangamlaleli uNkulunkulu, ngoba wazemukela kahle izinhlozi zamaIsrayeli.

³²Ngingaqhubeka ngithini? Ngeke singanele isikhathi uma ngizolanda ngoGidiyoni noBharakhi noSamsoni noJafta noDavide noSamuweli kanye nabaphrofethi.

³³Ngokukholwa balwa baguqisa imibuso yamazwe ngamazwe, baphatha ngobuqotho, bakwemukela ababekwethenjisiwe nguNkulunkulu. Bavala imilomo yezingonyama,

³⁴bacima imililo eyesabekayo, basinda ebukhalini benkamba. Ebuthakathakeni bathola amandla, baba yiziqhwaga empini, banqoba izimpi zabafo ababelwa nabo.

³⁵Ngokukholwa abesifazane babuye babuyiselwa izihlobo zabo sezivusiwe ekufeni. Abanye bezwiswa ubuhlungu baze bafa bengancenge kukhululwa, ukuze mhla wokuvuka bavukele ekuphileni okungcono.

³⁶Abanye badlula ekujivazweni babhaxabulwa, abanye baboshwa ngamaketango bagqunywa ejele.

³⁷Abanye bakhandwa ngamatshe, abanye-ke bajuqulwa izinqamu ngesaha, abanye babulawa ngenkamba. Babehamba bembethe izikhumba zezimvu nezezimbuzi bebuswezi behlushwa bephathwa kabi.

³⁸Lomhlaba wawungabafanele lababantu. Babeyaye bazulazule ehlane nasezintabeni, belokhu bephuma bengena imihume nemigodi ephansi emhlabathini.

³⁹Bonke laba bakhulunyelwa kahle ngokukholwa kwabo. Ababe kodwa besakwemukela ababekwethenjisiwe,

⁴⁰ngoba uNkulunkulu wayevele thina esesicabangele isu elingcono. Lelisu lakhe ngelokuthi, kabaphelele singekho thina.

AmaHebheru 12

Ukujezisa kukaSimakade

¹Thina-ke sinaloluquqaba lofakazi abasihaqileyo. Ngakhoke asikushiye phansi konke okusithiyayo, sahlukane nesono futhi esithiyeka kalula kuso, siphikelele ngesineke kulomncintiswano wejubane esiwungeneleyo.

²Amehlo ethu awanamathele kuJesu umqalisi nomphelelisi wokukholwa kwethu. Nguye okuthe ngenxa yalokhokuthokoza okwakumlindle wabekezelela ukubethelwa esiphambanweni, akakushaya mkhuba ukuhlazeka ngokufa okunjalo. Manje-ke usehlezi ngakwesokunene sesihlalo sobukhosi bukaNkulunkulu.

³Zindlani ngalowo owabekezela izoni zimphikisa kangaka, ukuze izinhliziyu zenu zingadangali ziphelelwe yithemba.

⁴Ngoba ekulweni kwenu nesono anikamelani naso kuze kuchithwe igazi lenu nife.

⁵Seniwalibele amazwi anikhuthazayo ashiwo nguNkulunkulu kini njengoba ningamadodana kuthiwa: “Ndodana yami, ungakwedeleli ukujezisa kukaSimakade, ungapheli amandla nxa ekukhuza,

⁶ngoba uSimakade ushaya lowo amthandayo, ajezise leyo naleyondodana ayithandayo.”

⁷Ubunzima enibubekezelelayo buyiyona ndlela enilungiswa ngayo nguYihlo; uNkulunkulu uniphathisa okwamadodana. Yake yakhona yini indodana engazange ijeziswe nguyise na?

⁸Uma uNkulunkulu enganijezisi njengalokhu ebajezisa bonke, kusho ukuthi aniyiwo amadodana akhe, ningamavezandlebe.

⁹Futhi-ke obaba abasizalayo bayaye basikhuze bese sibahlonipha. Akusifanele yini kakhulu kunalokho ukuba sithobele uBaba wokomoya ukuze siphile na?

¹⁰Obaba abasizalayo kambe babesijejisa okwesikhashana njengoba bebona kubafanele, kodwa uNkulunkulu usijejisa ukuze sisizakale, sihlanganye naye ebungcweleni bakhe.

¹¹Uma sijejiswa kuyaye kubukeke ngalesosikhathi sengathi ukujejiswa kwethu kuyinto engathokozisi kodwa eletha usizi. Kodwa-ke emuva kwalokho, labo abalungiswe kanjalo bayovuna umvuzo ongukuthula nokulunga.

Akangabikho olahlekelwa ngumusa kaNkulunkulu

¹²Aziqine izingalo zenu eziyekethileyo namadolo enu axegezelayo!

¹³Hlelembelani izinyawo zenu imikhondo eqondileyo, ukuze abaqhugayo bangabhinyiki kodwa balulame.

¹⁴Zamani ukuhlalisana ngokuthula nabantu bonke ningcweliswe, ngoba yilowo nalowo ongangcweliswa akanakuyibona iNkosi uJesu.

- ¹⁵Qaphelani kungabikho muntu osilelayo aze alahlekelwe ngumusa kaNkulunkulu, hleze kumile isithombo esinobuthi obubulalayo, sonakalise umoya wabantu abaningi.
- ¹⁶Qikelelani kungabi bikho muntu ophingayo kumbe abe ngumuntu oweyisa uNkulunkulu njengoEsawu okwathi angalamba wathengisa ngelungelo lobuzibulo bakhe ukuba athole ayezokudla ngaso lesosikhathi.
- ¹⁷Niyazi ukuthi kamuva wakhalela ifa lakhe lesibusiso, kodwa uyise wenqaba engasenakuguquka kulokho ayesekushilo yize noma uEsawu wayesemncenga ekhala ezimathonsi.
- ¹⁸Nina-ke aniyanga entabeni eningayiphatha ngesandla, intaba egqamuka amalangabi. Aniyanga nasebumnyameni nasesigayegayeni nasesivunguvungwini
- ¹⁹nalapho kukhala khona icilongo kukhuluma khona izwi. Kwathi lapho abantu bakwaIsrayeli belizwa lelizwi likhuluma, banxusa ukuba lingabe lisakhuluma kubo,
- ²⁰ngoba babengenakukumela elalikusho lithi: “Ngisho noma ngabe yisilwane esithinta lentaba, asikhandwe ngamatshe sibulawe.”
- ²¹Lowomhlola owabonakalayo wawesabeka kabi ngangoba uMose waze wathi: “Ngiphethwe yingebhe ngiyathuthumela.”
- ²²Kodwa nina niye entabeni iZiyoni naseJerusalema lasezulwini, inxuluma likaNkulunkulu ophilayo. Nize lapho kukhona khona izigidi zezingilosi nalapho kubuthene khona ngokujabula
- ²³ibandla lamazibulo abhalisiwe emqingweni wasezulwini. Yebo, nize kuNkulunkulu umahluleli wabantu bonke. Nize nakuyo imimoya yalababantu abalungileyo abapheleliswe ngempela.
- ²⁴Nize nakuJesu ongummeli wesivumelwano esisha, isivumelwano sokufafazwa ngegazi lakhe elenza umsebenzi omkhulu kunegazi lika-Abela.
- ²⁵Qaphelani-ke ukuba ningamqhubukushi oshumayelayo. Kabaphephanga lababantu abebeqhubukusha lowo owayebashumayeza intando kaNkulunkulu lapha emhlabeni. Pho, thina siyophepha kanjani uma sivala izindlebe singamlaleli lowo okhuluma kithi esezulwini na?
- ²⁶Ngalesosikhathi izwi lakhe lazamamisa umhlaba, kodwa manje usehambise wathi: “Ngiyobuye ngizamamisa kungabi ngumhlaba nje kuphela kodwa ngizamamisa nezulu imbala.”
- ²⁷Lelizwi lokuthi “ngiyobuye” likhomba ngokusobala ukuthi lokho okudaliweyo kuyozanyazanyiswa kugudluke ezindaweni zakho ukuze lokhu okungenakuzanyazanyiswa kusale kumi kuthe zime.

²⁸Ngakhoke, njengoba sinikwa umbuso ongenakuzanyazanyiswa, kuhle sibonge. Asimkhonze uNkulunkulu ngendlela ayithakaselayo, simhloniphe simesabe!

²⁹Ngoba uNkulunkulu wethu ungumlilo oshaya uqothule.

AmaHebheru 13

Ukumkhonza uNkulunkulu ngendlela emthokozisayo

¹Ukuthandana kwabazalwane akuvuthe njalo.

²Nize ningakulibali ukwemukela kahle izihambi emakhaya enu, ngoba sebake bakwenza abanye, bangenisa izingilosi bengazelele.

³Khumbulani ababoshiweyo, kube sengathi nani niboshiwe kanye nabo. Nize nibazwele abaphethwe kabi, kube sengathi kuhlushwa nina uqobo.

⁴Isimiso sokuganana asihlonishwe kukho konke nocansi lwabaganeneyo luze lungangcoliswa ngamanyala, ngoba uMvelinqangi uyokwahlulela abenza amanyala obufebe nabaphingayo.

⁵Ningaziphathi okwabantu abakhonze imali, kodwa yeneliswani ngeninakho, ngoba uNkulunkulu wathi: “Angisoze ngakushiya wedwa; angisoze ngakulahla.”

⁶Ngakhoke lokhu sikusho ngonqhakala sithi: “USimakade ungumsizi wami angesabi, owasemhlabeni angangenzani na?”

⁷Khumbulani labo ababengabaholi benu, ababenishumayeza izwi likaNkulunkulu. Nikhumbule ukuthi babephila kanjani nokuthi isiphetho sempilo yabo saba njani, bese nibalingisa ukukholwa kwabo.

⁸UJesu Kristu unguye namuhla lowo abenguye izolo nayoba nguye naphakade.

⁹Nize ningadukiswa yizifundiso ezingaziwayo ezinhlobonhlobo, ngoba kuhle ukuba izinhliziyu zenu ziqiniswe ngomusa eniwenzelwa nguNkulunkulu, kungabi ngokulandela imihlabathi ephathelene nokudla. Kayibasizanga ngalutho bonke abayilandelayo.

¹⁰Thina sinelathi lomhlatshelo abangenalungelo lokudlela kulo abenkonzo yesivumelwano esidala.

¹¹Umphristi omkhulu uyaye athathe igazi lezilwane aliyise eNdaweni eNgcwelencwele, afike alethule, libe ngumhlatshelo wokuhlawulela izono, kodwa izidumbu zalezozilwane zishiselwa ngaphandle kwendawo lapho begobe khona amadlangala.

¹²Kanjalo futhi noJesu wahlushwa, wafela ngaphandle komuzi iJerusalema ukuze angcwelise abantu ngelakhe igazi.

¹³Ngakhoke asiye kuye ngaphandle komuzi, sifike sithwalisane naye ihlazo alithwalayo!

- ¹⁴Ngoba kulomhlaba kasinawo umuzi omi phakade; silindele umuzi ozayo.
- ¹⁵Ngakhoke asibongele njalo kuNkulunkulu, kube yizithelo esinikela ngazo ngoJesu, silidumise igama lakhe ngezindebe zemilomo yethu.
- ¹⁶Nize ningakhohlwa ukwenza okuhle kwabanye nisizane, ngoba iminikelo enjalo uyayithakasela uNkulunkulu.
- ¹⁷Lalelani abaholi benu nibathobele, ngoba bahlala njalo benalusile ngokomoya njengoba phela kumele bamlandise uNkulunkulu ngomsebenzi wabo. Uma nibalalela nibathobela, bayowenza ngenjabulo umsebenzi wabo, uma kungenjalo bayodumala, lokhu-ke akunakunisiza ngalutho.
- ¹⁸Sikhulekeleni! Siyazi impela ukuthi onembeza bethu bahlala bemsulwa, ngoba sithanda ukuphila impilo eqotho kukho konke esikwenzayo.
- ¹⁹Ikakhulu ngicela imikhuleko yenu ukuba ngisheshe ngibuyele kini.

Isibusiso nokuvalelisa

- ²⁰UNkulunkulu oletha ukuthula, owavusa iNkosi yethu uJesu Kristu wayikhuphula kwabafuleyo, yona engumalusi omkhulu wezimvu ngenxa yegazi lesivumelwano esimi phakade,
- ²¹akaniphelelise kukho konke okuhle, ukuba nigcine intando yakhe. Akasebenze ezinhliziyweni zethu ukuba senze lokho akuthakaselayo ngenxa kaJesu Kristu. Akadunyiswe phakade naphakade! Ameni.
- ²²Bazalwane, ngiyanincenga ukuba niwamukele ngomoya omuhle lawamagama omlayezo wami, ngoba nginilobele lencwadi ngamafushane.
- ²³Ngithanda ukuba nazi ukuthi umzalwane wethu uThimothi usededelwe ejele. Uma esheshe wafika sengiyokuza naye sizonibona.
- ²⁴Nize nisibonele kubo bonke abaniphethayo nakulo lonke ibandla elingcwele! Bayakhonza abazalwane baseNtaliyana.
- ²⁵Salani nomusa nonke! Ameni.

EkaJakobe

EkaJakobe 1

Isibingelelo

¹Lencwadi ivela kimi uJakobe inceku kaNkulunkulu neyeNkosi uJesu Kristu. Ngibingelela nina nonke bantu bakaNkulunkulu abahlakazekele ezizweni.

Ukukholwa nokungabaza

²Kuhle nithokoze bazalwane bami uma nehlelwa yizilingo ngezilingo,

³ngoba niyazi ukuthi ukuvivinywa kokukholwa kwenu kunifundisa ukuqiniseka.

⁴Ukuqiniseka kwenu akuqhubeke njalo kugcine kube nemiphumela, nilunge ngempela kukho konke, ningantuli lutho ngokomoya.

⁵Uma kukhona omunye wenu oswela inhlakanipho, akayicele kuNkulunkulu. UNkulunkulu uyomupha yona, ngoba ubapha bonke abantu ngesandla esevayo engabalisi.

⁶Kodwa akacele ekholwa angangabazi, ngoba umuntu ongabazayo ufana namadlambi olwandle esisithaka evuna isiphepho.

⁷Umuntu onjalo akangacabangi ukuthi lukhona utho iNkosi eyomemukelisa lona,

⁸ngoba umanqikanqika ulala ephenduka kukho konke akwenzayo.

Ubuphofu nobucebi

⁹Umzalwane oyimpofana akabe neqholo njengoba ephakanyiswe nguNkulunkulu,

¹⁰kodwa uma esuke eyisicebi akabe neqholo njengoba efojiswe nguNkulunkulu, ngoba uyovuthuka ashabalale njengembali yasendle.

¹¹Ilanga liyaye liphume ngesivuvu salo kubune isithombo, imbali yaso ivuthuke, ubuhle bayo buphele nya. Kanjalo nomuntu oyisicebi uyoshabalala lapho esematasatasa emsebenzini wakhe.

Ukulingwa nokuvivinywa

¹²Ubusisiwe umuntu oqiniselayo uma evivinywa ngezilingo, ngoba nxa esephumelele ekuvivinyweni uyoklonyelwa ngomqhele ongukuphila okuphakade uNkulunkulu awethembise labo abamthandayo.

¹³Uma umuntu elingwa akangasho ukuthi ulingwa nguNkulunkulu, ngoba uNkulunkulu akanakulingwa ngobubi, naye uqobo akalingi muntu.

¹⁴Kodwa yilowo nalowomuntu uyalingeka nxashane eyengwa yizinkanuko ezisenhliziyweni yakhe.

¹⁵Kunjengokuthi, uma owesifazane ekhulelwe, ugcina ebelethile; ngokunjalo nezinkanuko ezibusa umuntu ziyakhula enhliziyweni yakhe, zigcine ngokuveza

isono. Uma naso sesikhule ngokuphelele, umphumela waso ukuba umuntu afe ngokomoya.

¹⁶Nize ningedukiswa muntu bazalwane bami abathandekayo!

¹⁷Zonke izipho ezinhle neziphiwo ezilungileyo zivela kweliphezulu. Zehliselwa kithi nguBaba owadala izikhanyiso ezisesibhakabhakeni. Ukukhanya kwakhe akuguquki kufiphazwe ngamathunzi adlulayo.

¹⁸Ngokwentando yakhe wasizala kabusha ngezwi lakhe eliyiqiniso ukuba sibe ngabakhe, siyingqalabutho yezidalwa zakhe.

Ukulizwa izwi nokwenza elikushoyo

¹⁹Bazalwane bami abathandekayo, nakhu okufanele nikwazi! Yilowo nalowo akasheshe alalele uma kukhulunywa, kodwa angasheshi akhulume; aphuze ukuthukuthela

²⁰ngoba umuntu othukuthelayo angekwenze okulungileyo okufunwa nguNkulunkulu.

²¹Ngakhoke qhuthululani konke okuyichilo nabo bonke ububi obukhona, nikwamukele ngomoya othobekileyo lokho okushiwo yizwi elitshalwe nguNkulunkulu ezinhliziyweni zenu, ngoba lelizwi linamandla okunisindisa.

²²Ningagcini ngokulilalela nje kuphela izwi nilibale ukuzikhohlisa, kepha yenzani elikushoyo.

²³Ngoba umuntu ozwa izwi likaNkulunkulu kodwa angakwenzi elikushoyo, ufana nendoda ezibuka esibukweni,

²⁴ithi ingasuka kuso maqede ikhohlwe ukuthi ibibukeka kanjani.

²⁵Kodwa umuntu owuhlolisayo umthetho ophelileyo, okuyiwo onika inkululeko, abambelele kuwo angabe esakukhohlwa lokho akuzwileyo kodwa akwenze, lowomuntu uyobusiswa yiNkosi kulokho akwenzayo.

²⁶Uma umuntu ethi uyikholwa kepha ebe ehluleka ukubamba ulimi lwakhe, uyazikhohlisa, ukukholwa kwakhe akumsizi ngalutho.

²⁷Ukukholwa okumsulwa okungenasici kuNkulunkulu uBaba yilokhu: ukuba umuntu asize izintandane nabafelokazi ekuhluphekeni kwabo, azilonde angangcoliswa ngokubi kwalomhlaba.

EkaJakobe 2

Ukukhetha abantu nokubandlulula

¹Bazalwane bami, njengoba nikholwa eNkosini yethu edumisekayo uJesu Kristu, akufanele ukuba nihlulule abanye.

²Ake kwenzeke kungene emhlanganweni wenu indoda efake indandatho yegolide nezingubo zakwanokusho, kubuye kungene nempofana nezingubo ezixathukayo,

³niphuthuma lomuntu ogqoke ezakwanokusho nithi kuye: “Woza uhlale kulesisihlalo esikahle!” Bese nithi empofaneni: “Yima lapho wena!” noma nithi: “Zinza lapha phansi eduze kwami!”

⁴Uma nenze njalo kusho ukuthi phakathi kwenu kukhona ubandlululo, nahlulela ngendlela engalungile.

⁵Lalelani lapha bazalwane bami abathandekayo! UNkulunkulu akabakhethanga yini abampofu emehlweni abantu balomhlaba, ukuba bacebe ngokomoya ngokukholwa kwabo kuKristu, babe yizindlalifa zombuso awethembisa abamthandayo na?

⁶Kepha nina nibabukela phansi abampofu. Akuyizo yini izicebi ezinicinezelayo zinidonsele esigcawini samacala na?

⁷Akuyizo yini ezinukubeza leligama elibatshazwayo likaKristu enibizwa ngalo na?

⁸Impela nenza okufaneleyo uma nigcina umthetho wombuso kaNkulunkulu njengoba ulotshiwe embhalweni ongcwele ukuthi: “Wothanda omunye ngothando ozithanda ngalo!”

⁹Kodwa uma nisabandlulula abanye, niyobe niyona, nomthetho unilahle ngecala ngoba ningawugcinanga.

¹⁰Uma umuntu egcina wonke umthetho abesephula umyalo ube munye, unecala lokweqa wonke umthetho.

¹¹Ngoba uNkulunkulu owathi: “Ungaphingi!” wabuye wathi futhi: “Ungabulali!” Uma ungaphingi kepha ubulala, usuyiseqamthetho.

¹²Enikukhulumayo nenikwenzayo akube yilokho okufanele abantu abayokwehlulelwa ngomthetho lowo oletha inkululeko.

¹³Ngoba mhla uMvelinqangi esehlulela, ngeke abenzele isihe abantu ababengenasihe; kodwa abanesihe bangabheka ukwenzelwa isihe mhla sebehlulelwa.

Ukholo olungenamisebenzi emihle kalunamkhuba

¹⁴Kusizani bazalwane bami ukuba umuntu athi uyakholwa kodwa abe engayenzi imisebenzi emihle na? Kungamsindisa yini lokhukukholwa kwakhe na?

¹⁵Ake ngithi kukhona umzalwane noma udade ohamba ehlonga okokwembatha eswele nokudla okweneleyo,

¹⁶omunye wenu abesethi kuye: “Hamba kahle ungagodoli ulambe, kodwa dlana usuthe!” Lokhu kusizani uma ningamniki akuswelayo na?

¹⁷Kanjalo nokholo uma lungavezi misebenzi emihle kalunamkhuba, lunjengento efileyo.

¹⁸Kodwa kungahle kuthiwe omunye umuntu unokholo, omunye unemisebenzi emihle ayenzayo. Ngithi-ke kulokho: Ngitshengise ukukholwa kwakho ngaphandle kwemisebenzi, nami ngizokukhombisa ukuthi nginokholo, ngikutshengise imisebenzi engiyenzayo.

¹⁹Uyakholwa ukuthi uMvelinqangi uyedwa, kuhle kakhulu uma ukukholwa lokho. Kodwa namadimoni imbala ayakukholwa lokho, athuthumele ngenxa yokwesaba.

²⁰Siwulandini! Awazi yini ukuthi ukukholwa okungenamisebenzi emihle kuyize na?

²¹UAbhrahama ukhokho akakubalelwanga yini ukulunga ngenxa yesenzo sakhe mhlazana enikela ngoIsaka indodana yakhe elathini na?

²²Usuyabona-ke manje ukuthi ukholo lwakhe lwaluhambisana nemisebenzi yakhe nokuthi lwapheleliswa ngayo.

²³Kwase kugcwaliseka umbhalo ongcwele othi: “UAbhrahama wakholwa kuNkulunkulu, ngakho ke kwabalelwa kuye ukulunga, kwathiwa ungumhlobo kaNkulunkulu.”

²⁴Niyabona-ke ukuthi umuntu uthethwa yicala ngemisebenzi yakhe emihle, alimthethi ngenxa yokukholwa kwakhe kuphela.

²⁵Kanjalo noRahabhu isindindwa kathethwanga yini yicala ngemisebenzi yakhe emihle mhla emukela izinhlozi ezishushumbisa ngenye indlela na?

²⁶Umzimba womuntu osuphume umphefumulo uyisidumbu; kanjalo-ke nokukholwa okungenamisebenzi emihle akusizi ngalutho, kuyinto efileyo.

EkaJakobe 3

Ulimi

¹Labo benu abazoba ngabafundisi abangabi baningi bazalwane bami, ngoba niyazi ukuthi thina esifundisayo siyokwehlulelwa kanzima kunabanye.

²Sonke siyaye senze amaphutha amaningi. Uma umuntu engoni kwakushoyo, lowomuntu ulunge ngempela. Uyakwazi nokuzibamba, athibe izitho zonke zomzimba wakhe.

³Amahhashi siyaye siwafake amatomu neqhosha emlonyeni ukuze asilalele, bese sikwazi ukuwaqondisa aye lapho sithanda khona.

⁴Imikhumbi noma ingaze ibe mikhulu kangaka nje idudulwe yimimoya enamandla, nokho iqondiswa ngephinyana elingemuva, ukuba iye lapho umshayeli ethanda khona.

⁵Kanjalo nolimi noma luyisitho esincane kangaka, kodwa lungaziqhenya ngezinto ezinkulu. Inhlansana nje ingathungela umlilo ushise udukathole wehlathi.

⁶Ngakhoke ulimi lufana nomlilo. Luyisona sitho somzimba esifumbethe bonke ububi; ububi balo buyamemetheka bonakalise umzimba wonke. Ulimi lungumlilo othungelwe yisihogo uqobo, ubusuthungela yonke impilo yethu.

⁷Umuntu uyakwazi ukuthambisa izilwane, ngoba sewazithambisa zonke izinhlobo zazo, ezasendle nezinyoni nezihuquzelayo nezasolwandle.

⁸Kepha akukho muntu ongagoba ulimi. Luyinto embi exhuxhumayo; lunesihlungu esibulalayo.

⁹Ngolimi lwethu sidumisa iNkosi uBaba osezulwini nangalo sibuye futhi siqalekise abantu abadalwa bafana noMvelinqangi.

¹⁰Kuwo lomlomo owodwa kuphuma amazwi okubonga namazwi okuqalekisa. Lokho akufanele ukuba kwenzeke kini bazalwane bami.

¹¹Kungaphuma yini esiphethwini esisodwa amanzi amtoti nababayo na?

¹²Kungenzeka yini bazalwane bami ukuba umkhiwane uthele izithelo zomhlwathi kumbe umvini uthele amakhiwane na? Kanjalo nomthombo obabayo ungekhiphe amanzi amtoti.

Inhlakanipho evela ezulwini

¹³Kukhona yini phakathi kwenu onehlakanipho nokuqonda na? Uma kunjalo-ke akakubonakalise ngokuziphatha kahle nangemisebenzi emihle ayenza ngalokhokuzithoba okubangwa yinhlanipho.

¹⁴Kodwa uma izinhliziyu zenu zifukamela umona onyantisayo nombango, musani ukuziqhenya ngenhlakanipho yenu, nize niqambe amanga nimelane neqiniso.

¹⁵Lenhlakanipho yenu kayiveli ezulwini kodwa ngeyalomhlaba nemvelo yethu yokonakala namadimoni.

¹⁶Lapho kukhona khona umona nombango, kukhona futhi inxushunxushu nazo zonke izinhlobo zobubi.

¹⁷Kepha inhlakanipho evela ezulwini, okokuqala nje ihlanzekile, kanduba ibe nokuthula ibe mnene ithobeke ukwelulekwa; iyaye ibe nesihe, iveze izithelo eziyimisebenzi elungileyo. Ayibandlululi, kanti-ke futhi ayizenzisi.

¹⁸Abalamulayo batshala ngokuthula bavune ukulunga.

EkaJakobe 4

Ubudlelwane nabomhlaba

¹Kuvelaphi konke lokhukulwa nokuxabana okukhona phakathi kwenu na? Akuveli yini ezinkanukweni ezidlanga ngaphakathi kini emvelweni yenu yokonakala na?

²Niyaye nifise into ethile kodwa ningayitholi; niyazondana nifelana umona, kodwa anitholi lutho. Niyaye nixabane nilwe nodwa. Anikutholi enikufisayo, ngoba anikuceli kuNkulunkulu.

³Uma nicela kanikwemukeliswa enikucelayo, ngoba nikucela ninenhloso embi ngakho. Niyaye nicele izinto khona nizozihlaphaza nizisebenzise enkanukweni.

⁴Bantu abangethembekile abahlubuka uNkulunkulu, anazi yini ukuthi bayizitha zikaNkulunkulu laba abadlelana nabomhlaba na? Umuntu othanda ukudlelana nabomhlaba uphenduka isitha sikaNkulunkulu.

⁵Ngabe nisho ukuthi umbhalo ongcwele ukhuluma okuyize yini uma uthi: “UNkulunkulu unesikhwele lapho elangazelela umphefumulo asinika wona ukuba uhlale kithi”?

⁶Kodwa umusa uNkulunkulu asenzela wona wanda ngokwedlulele. Kungalesisizathu umbhalo ongcwele uthi: “UNkulunkulu uyamelana nabazidlayo kodwa ubenzela umusa abathobekileyo.”

⁷Ngakhoke thobelani uNkulunkulu, nimelane noSathane, yikhona eyoqhela kini.

⁸Sondelani eduze kukaNkulunkulu, yikhona eyosondela kini. Hlanzani izandla nina zoni, nihlambuluke ezinhliziyweni zenu nina enimanqikanqika.

⁹Yibani lusizi nidabuke nikhale, ukuhleka kwenu kuguquke kube ngukudabuka, ukujabula kwenu kube ngukujabha.

¹⁰Zithobeni phambi kweNkosi uSomandla, yikhona iyoniphakamisa.

Ukwehlulela umzalwane

¹¹Ningangcofani bakwethu! Umuntu ongcofa umzalwane wakhe kumbe amehlulele, ungcofa umthetho kaNkulunkulu awehlulele. Kodwa uma wehlulela umthetho kawuseyena ogcina umthetho kepha ungumahluleli wawo.

¹²NguNkulunkulu kuphela oshaya umthetho nongumahluleli. Nguye kuphela onamandla okusisindisa kumbe asibhubhise. Lapho ungubani wena ongehlulela omunye na?

Ningazigabisi

¹³Lalelani lapha nina enithi: “Namuhla noma kusasa siyohambela kulowayamuzi, sifike sihlale khona siqede unyaka, sihwebe sithole inzuzo.”

¹⁴Kanilazi ikusasa ukuthi liniphatheleni noma liyonifica nisaphila yini. Ninjengomlalamvubu obonakala isikhashana bese udamuka.

¹⁵Nina ngabe nithi: “Uma iNkosi ivumile siyophila senze lokhu nalokhuya.”

¹⁶Kodwa manje niyazigabisa niyaziqhenya, kanti-ke konke ukuzigabisa kwalolohlobo kubi.

¹⁷Lowo okwaziyo okulungileyo okufanele ukuba akwenze-ke kodwa angakwenzi, uyona.

EkaJakobe 5

Ukuxwayiswa kwezicebi

- ¹Lalelani lapha nina zigwili! Khalani nililele usizi oluyonehlela!
- ²Ingcebo yenu ingumbolela, nezingubo zenu zidliwe yinundu.
- ³Igolide nesiliva lenu linjengento egqwalile. Ukugqwala kwalo kuyoba ngubufakazi obunilahlayo, kube njengomlilo oshisa imizimba yenu ingqongqe. Seniqongelele ingcebo ngalezizinsuku zokuphela.
- ⁴Ake nibheke! Nigodle imali anaze nabaholela abavuni abasebenza emasimini enu. Leyomali iyanimangalela ezulwini. Isikhalo sabavuni sesizwakele kuSimakade iNkosi yamaviyo.
- ⁵Nizitikile ngezinto zalomhlaba nitamasa, imizimba yenu nayinonisela usuku lokuhlaba.
- ⁶Niyaye nimlahle ngecala olungileyo nimbulale; akanakumelana nani.

Ukubekwezela nokukhuleka

- ⁷Bekezelani bakwethu kuze kufike usuku lokubuya kweNkosi uJesu! Ake nibheke nje ukuthi umlimi ulindela kangakanani ukuba amasimu akhe athele ukudla akukhonze kangaka! Ulindela ngokubekwezela ukufika kwezimvula zasentwasahlobo nasekwindla.
- ⁸Nani-ke bekezelani niqunge isibindi, ngoba usuku lokubuya kweNkosi uJesu selusondele.
- ⁹Aningabe nisasolana bakwethu hleze nehlulelwe. Nanguya umahluleli esemi ngasesigcawini.
- ¹⁰Bazalwane, khumbulani abaphrofethi basendulo ababeshumayela bethunywe nguSimakade; mababe yisibonelo kini sokubekwezela ezinhlophekweni.
- ¹¹Niyazi-ke ukuthi labo ababekwezelayo kuthiwa babusisiwe. Nezwa ngokubekwezela kukaJobe nokuthi uSimakade wagcina esemenzeleni, ngoba uSimakade unobubele nesihawu.
- ¹²Okukhulu kunakho konke ukuba ningafungi bazalwane bami, noma kungaba yizulu noma umhlaba noma intoni. Anothi “yebo” kumbe nithi “qha”, kuphele lapho, hleze uNkulunkulu anilahle ngecala.
- ¹³Kukhona yini phakathi kwenu ohlophekayo na? Uma kunjalo akakhuleke kuNkulunkulu! Kukhona yini othokozayo na? Akahubele uNkulunkulu!
- ¹⁴Kukhona yini ogulayo na? Uma kunjalo akabize abaphethe ebandleni bamthandazele, bamgcobe ngamafutha bamhlikihle bekhuleka ngegama leNkosi uJesu.
- ¹⁵Uma bekhuleka benokholo kuyomsindisa lokho ogulayo, iNkosi uJesu imsimamise, kuthi uma ngabe onile, izono zakhe zithethelelwe.

¹⁶Ngakhoke hlambulukani ezonweni zenu, yilowo nalowo avume komunye izono zakhe, nikhulekelane khona nizosinda. Umkhuleko womuntu olungileyo unamandla okwenza lukhulu.

¹⁷UElija wayengumuntu njengathi. Wakhuleka kuNkulunkulu wajula, ecela ukuba lingani. Nebala alaze lana, lomisa iminyaka emithathu enezinyanga eziyisithupha.

¹⁸Wabuye wakhuleka, izulu lase lina, umhlaba waba nokudla.

¹⁹Bazalwane, uma omunye wenu ephambuka eqinisweni abeseqelwa ngomunye,

²⁰yazini ukuthi lowo oweqela isoni siphenduke ekwedukeni kwaso, uyoindisa umphefumulo waso ekubhujisweni, kugqitshwe izono eziningi.

1 kaPhetro

1 kaPhetro 1

Isibingelelo

¹Lencwadi ivela kimi uPhetro umphostoli kaJesu Kristu. Ngiyilobela nina besizwe esiyikhethelo likaNkulunkulu eniyizihambi ezihlakazekele emazweni ngamazwe, kwelasePhontu naseGalathiya naseKhaphadosiya naseAsiya naseBhithiniya.

²UNkulunkulu uYise owakumisa konke kungakenzeki waniqoka, wanahlukanisela ngoMoya wakhe ukuba ngabangcwele bakhe, nimlalele nichelwe ngegazi likaJesu Kristu elinhlanzayo. Akuvame kini umusa kaNkulunkulu nokuthula!

Ithemba lempela

³Akabongwe yena onguNkulunkulu noYise weNkosi yethu uJesu Kristu! Ngobubele bakhe obukhulu wasizala kabusha saba nethemba eliqinileyongokuvuka kukaJesu Kristu kwabafileyo.

⁴Sizokudla ifa elingapheliyo nelingenasici nelingakhuthiyo, ifa enilibekelwe ezulwini.

⁵Ngokukholwa kwenu nilondolozwa ngamandla kaNkulunkulu ukuze niphiwe leyonsindiso esilungele ukuba yambulwe ngesikhathi sokugcina.

⁶Engabe nina nijabula kakhulu ngalokhu, yize kudingekile ukuba niphathwe yizinsizi okwalesisikhashana kulezizilingo ngezilingo ezinehlelayo.

⁷Ngisho negolide imbala eliyinto ephelayo liyaye lihlolwe ngelangabi esithandweni somlilo. Ukholo lwenu oluyigugu kunegolide luyavivinywa-ke ngalezizilingo enidlula kuzo, nce kuhlaluke ukuthi luqotho na. Uma kunjalo luyobongwa luthole udumo lutuseke mhla uJesu Kristu esebonakala.

⁸Noma ningazange nimbone, kodwa niyamthanda; noma ningamboni manje, kodwa niyakholwa kuye. Ngakhoke seniyajabula ngaye niphuphume intokozo engechazwe engeyona eyalomhlaba,

⁹njengoba vele niyayemukela kumanje insindiso yenu eyiwona mgomo wokukholwa kwenu.

¹⁰Mayelana nalensindiso abaphrofethi basendulo bacwaningisisa bahlolisisa, base bebikezela ngalomusa eseniwenzelwe nguNkulunkulu.

¹¹UMoya kaKristu owawukubo wabikezela ngezinhlopheko eziyomehlela uMesiya nangobukhosi benkazimulo yakhe eyayizolandela. Baphenyisisa befuna ukwazi ukuthi lesosikhathi esakhonjwa nguMoya siyofika nini nokuthi siyoba njani.

¹²UNkulunkulu wabavezela labaphrofethi ukuthi lokhu ababekushumayela kwakungezokusiza bona kodwa kwakuzosiza nina. Bakhuluma ngazo lezizinto esenizizwile zibikwa yizithunywa esezishumayela indaba emnandi ziqhutshwa

nguMoya oyiNgcwele ovela ezulwini. Ngisho nezingilosi imbala kaziphezi ukulangazelela ukwazi ubunzulu balezizinto.

Yibani ngcwele

¹³Ngakhoke hluzani ingqondo nibhukule! Zithibeni, nethembele ngokupheleleyo kulowomusa eniyowenzelwa mhla uJesu Kristu eqhamuka ngenkazimulo yobukhosi bakhe.

¹⁴Njengoba ningabantwana bakaNkulunkulu abamlalelayo, ningayivumeli inkambo yenu ibuswe yizinkanuko ezazikade zinibusa ngenkathi ningakamazi uMvelinqangi ngokuyikho.

¹⁵Kunalokho, yibani ngcwele kukho konke enikwenzayo, njengoba uNkulunkulu owanibizayo engcwele.

¹⁶Umbhalo uthi: “Yibani ngcwele ngoba mina ngingcwele.”

¹⁷Niyaye nithi “Baba” uma nikhuleka kuMvelinqangi owehlulela bonke abantu ngamunye ngokwemisebenzi yabo, angakhethi. Ngakhoke mesabeni ngenkathi nisahamba lapha emhlabeni!

¹⁸Ngoba niyazi ukuthi nahlelwa nophulwa empilweni yobuze enayiphila ngosiko lwawokhokho. Anihlelwanga ngezinto eziphelayo, anikhokhelwanga ngagolide nasiliva,

¹⁹kodwa nahlelwa ngegazi elinqabileyo likaKristu, iwundlu lemvu elingakhubazekile elingenasici.

²⁰Wakhethwa nguMvelinqangi umhlaba ungakadalwa, kodwa wavezwa ngezinsuku zokugcina ngenxa yenu ukuba nisizakale.

²¹NgoKristu senikholwa kuNkulunkulu owamvusa kwabafuleyo wamnika udumo, ukuze ngokholo lwenu nibeke ithemba lenu kuNkulunkulu.

²²Nilithobele iqiniso nase nihlanjululwa nce nikwazi ukuthanda abazalwane benu ngothando oluphilayo. Ngakhoke thandanani ngenhliziyo yonke, uthando lwenu luvuthe lunganqamuki.

²³Nizelwe kabusha kungengambewu ebhubhayo kodwa ngembewu engabhubhiyo, ngezwi likaNkulunkulu eliphilayo nelimiyo ungunaphakade.

²⁴Embhalweni ongcwele kuthiwa: “Isintu sonke sinjengotshani, bonke ubuhle baso bunjengembali yeqele; utshani buyabuna, imbali iyavuthuluka,

²⁵kepha izwi likaSimakade limi phakade.” Lelizwi liyilo-ke enalishunyayezwayo, liyindaba ejabulisayo.

1 kaPhetro 2

Itshe eliphilayo nesizwe esingcwele

- ¹Ngakhoke buyekeni bonke ububi nobuqili, ningazenzisi nifelane umona, ninganukubezi muntu.
- ²Njengalokhu abantwana abasand' ukuzalwa bekhalela ubisi, kanjalo nani langazelelani ngokomoya ubisi lwempela oluyizwi likaNkulunkulu, ukuze nikhule ngalo nisindiswe.
- ³Phela senike “nazibonela namuzwa ukuthi unomusa uSimakade”, njengokusho kombhalo ongcwele.
- ⁴Sondelani kuye oyitshe eliphilayo elaliwa ngabantu bethi liyinto engenamkhuba, kepha uNkulunkulu walikhethela indawo eyaziswayo.
- ⁵Nani-ke, ngokomoya yibani ngamatshe aphilayo, kwakhiwe ngani ithempeli lokomoya, nibe ngabaphristi abangcwele abethula imihlatshelo yokomoya eyamukelekayo kuNkulunkulu ngenxa kaJesu Kristu.
- ⁶Ngoba embhalweni ongcwele uNkulunkulu uthi: “Ngibeka eZiyoni itshe legumbi engilikhethela lendawo eyaziswayo; bonke abakholwa kulelotshe legumbi ngeke badumazeke bajabhe.”
- ⁷Ngakhoke kini enikholwa kuKristu uyigugu, itshe elikhethelwe indawo eyaziswayo. Kodwa kulabo abangakholwayo kwaba njengoba kulotshiwe embhalweni ongcwele ukuthi: “Itshe lokwakha elaliwa ngabakhi bethi liyinto engenamkhuba kwaba yilona sisekelo njengensika ephase indlu.”
- ⁸Nomunye umbhalo uthi: “Lelitshe liyobanga ukuba abantu bakhubeke, liyidwala eliyobakhubekisa bawe.” Bayakhubeka ngoba bengalikhholwa izwi likaNkulunkulu; wanquma uNkulunkulu ukuba kube njalo.
- ⁹Kepha nina niwuhlanga olukhethiweyo, abaphristi bozalo lwasebukhosini, isizwe esingcwele esahlukaniselwe uNkulunkulu, abantu bakhe bekhethelo, ukuba niphakamise udumo lwalowo owanibiza ukuba niphume ebumnyameni nivele ekukhanyeni kwakhe okumangalisayo.
- ¹⁰Nanikade ningeyiso isizwe, kepha manje seniyisizwe esibizwa ngoNkulunkulu. Nina nake nangahawukelwa, kepha manje senenzelwe isihawu.

Yibani yizinceku zikaNkulunkulu

- ¹¹Bakwethu, njengoba ningabafokazi nezimpabanga kuleli, ngiyanincenga ukuba ningazivumeli izinkanuko zemvelo yokonakala ezimelana njalo nomphefumulo.
- ¹²Ziphatheni ngokuzihlonipha phakathi kwabezizwe abangakholiwe, ukuze kuthi uma beningcofa bethi niyizigilamkhuba, babone imisebenzi yenu elungileyo qede badumise uNkulunkulu mhla ebahambela ezobasindisa.
- ¹³Thobelani yonke imithetho emiswe ngabantu abaniphethayo, nikwenze lokho ngenxa yeNkosi uJesu. Nithobele ingonyama, isesikhundleni sayo esiphakemeyo.

¹⁴Nithobeke neziphathimandla eyazigunyaza ukuba zijezise abenza okubi, zibatuse labo abenza okulungileyo.

¹⁵Ngoba kuyintando kaNkulunkulu ukuba ngemisebenzi elungileyo nivale imilomo yeziwula ezingazi lutho,

¹⁶Khululekani, kodwa ukukhululeka kwenu akungabi yizaba zokufulela ububi, kepha nikhumbule ukuthi niyizisebenzi zikaNkulunkulu.

¹⁷Hloniphani wonke umuntu, nithande abazalwane, nesabe uNkulunkulu, nengonyama niyazise.

Ukuhlushwa kukaKristu kuyisibonelo

¹⁸Nina zisebenzi thobelani abaniphethayo emsebenzini, nibahloniphe kakhulu, kungabi yilaba abanomusa abanizwelayo kuphela kodwa nalaba abanganiphethe kahle.

¹⁹Ngoba kuyathandeka kuNkulunkulu uma umuntu enesazela ngalokho okuyintando yakhe, abekezelele ubuhlungu lapho ehlushwa kungafanele.

²⁰Ningatuseka kanjani uma nibekezelela ukushaywa nonile na? Kodwa uma nibekezela lapho nihlushelwa imisebenzi emihle, lokhu kuyathandeka kuNkulunkulu.

²¹UNkulunkulu wanibizela khona lokho, njengoba noKristu wahlushelwa nina, waba yisibonelo kini sokuba nilandele emikhondweni yakhe.

²²“Akazange enze sono, nezindebe zakhe kazikhulumanga nkohliso.”

²³Noma ethukwa kathukanga yena, nalapho ehlushwa kasongelanga muntu. Kunalokho wazinikela ngethemba kuNkulunkulu umahluleli oqotho.

²⁴Wetshatha umthwalo wezono zethu emzimbeni wakhe lowo owalengiswa esigxotsheni nce thina sife esonweni sehlukane naso, siphile impilo elungileyo. “Ngamanxeba akhe niphilisiwe nasinda.”

²⁵Nina naninjengezimvu ezedukileyo, kodwa senibuyile namlandela umalusi nombheki wemiphefumulo yenu.

1 kaPhetro 3

Ukuhlalisana kowesifazane nomyeni wakhe

¹Ngokunjalo nani makhosikazi thobelani amadoda enu. Amanye awo awalithobeli izwi likaNkulunkulu. Kungenzeka aphenduke noma engazange ashunyayezwe, ngokubona inkambo yenu,

²lapho enibona nimesaba uNkulunkulu, niphila impilo emsulwa.

³Ubuhle benu akungabi ukuhlobisa ingaphandle lenu, nixhangise ngamagoda elukiweyo nihlobe ngegolide nezingubo ezixhangayo.

⁴Kunalokho, akube ngubuhle obungapheliyo benhliziyo obubonakala ngomoya wenu omnene nihlezi ngokuthula; lokhu kuyigugu emehlweni kaNkulunkulu.

⁵Phela babehloba kanjalo abesifazane abakholwayo basendulo ababebheke kuNkulunkulu ngethemba. Babebathobela abayeni babo,

⁶njengoSara owayeyihlonipha indoda yakhe uAbrahama, eyibiza ngokuthi iyinkosi yakhe. Nina-ke ningabantwana bakhe uSara uma nenza okulungileyo ningesabi lutho.

⁷Kanjalo nani madoda hlalisanani nomkenu ngendlela yobuKristu enayifundiswayo, nazi ukuthi babuthakathaka kunani. Njengoba beyizindlalifa kanye nani zomusa onitholisa ukuphila okuphakade, ngakhoke bahlonipheni nibazise omkenu ukuze imithandazo yenu ingathikanyezwa lutho.

Ukuhlushwa ngenxa yokulunga

⁸Okokugcina, hlalisanani kahle nonke nganhliziyonye, nizwelane nithandane ngothando lwabazalwane, nibe nobubele nithobe.

⁹Ningaphindisi kumuntu ububi ngobubi kumbe inhlamba ngenhlamba; kunalokho busisani, ngoba nani nabizelwa isibusiso ukuba sibe yifa lenu.

¹⁰Umbhalo ongcwele uthi: “Lowo othanda ukuphila kwangempela aze adle izinyoni zabantabakhe, akadede ekukhulumeni ububi, izindebe zakhe zingaphathi nkohliso,

¹¹aqhele ebubini enze okuhle, afune ukuthula akuthungathe.

¹²Ngoba iso likaSimakade kalisuki kwabalungileyo; ubeka indlebe yakhe ezwe ukunxusa kwabo, kepha umelana nezigilamkhuba.”

¹³Ngubani-ke onganilimaza uma nishisekela ukwenza okulungileyo na?

¹⁴Noma ngabe nihlushwa ngenxa yemisebenzi elungileyo nibusisiwe. Musani ukungenwa ngamanzi emadolweni nikhathazeke uma abantu benesabisa.

¹⁵Kodwa hloniphani iNkosi uKristu ezinhliziyweni zenu ngoba ingcwele, nihlale nilungele ukuphendula bonke abathanda ukwazi ngethemba eninalo.

¹⁶Kepha kwenzeni lokho ngokuzithoba nangokuhlonipha. Unembeza wenu awuhlale umsulwa ukuze bajabhiswe abaningcofayo benukubeza ukuziphatha kahle kwenu nina bakaKristu.

¹⁷Uma kuyintando kaNkulunkulu ukuba nihlushelwe ukwenza okulungileyo, kungcono lokho kunokuba nihlushelwe ukwenza okubi.

¹⁸Ngoba naye uKristu wafa kwaba kanye ngenxa yezono. Yena owayelungile wahlushelwa nina eningalungile ukuba aniyise kuNkulunkulu. Umzimba wakhe wabulawa, kodwa uMoya oyiNgcwele wabuye wamphilisa.

¹⁹Yiwo loMoya owamqhuba waya washumayeza imimoya eboshiweyo

²⁰eyayingakholwanga endulo emihleni kaNowa ngenkathi uMvelinqangi ebekezelela abantu kusakhiwa umkhumbi. Abantu labo abambalwa ababekulomkhumbi basindiswa ngamanzi, beyisishiyagalombili isibalo sabo.

²¹Lawamanzi angumfanekiso wombhabhadiso osusindisa manje. Kawusikho ukukhuculula insila yomzimba, kodwa ungukucela uNkulunkulu ukuba asihlanze unembeza ube msulwa. Umbhabhadiso-ke uyasindisa ngamandla okuvuka kukaJesu Kristu ekufeni.

²²Useye ezulwini wafike wahlala ngakwesokunene sikaNkulunkulu. Ubusa izingilosi nabasezulwini abanegunya nabanamandla.

1 kaPhetro 4

Izinceku zikaNkulunkulu ezineziphiwo ezahlukeneyo

¹Njengoba uKristu wahlupheka emzimbeni, ngakhoke nani buswani yilomcabango: Umuntu osehahlushwa ngokomzimba wehlukene nokona.

²Ngakhoke manje ngenkathi nisaphila kulomhlaba aningabe nisabuswa yizinkanuko zemvelo yenu kodwa yenzani kuphela lokho okuthandwa nguNkulunkulu.

³Siningi lesisikhathi nilokhu nazenzela umathanda njengabezizwe abangakholwayo. Nanishone nathi shi emachilweni nasezinkanukweni, nidakwa nizitika ngamadili nemibuthano yotshwala, nikhonza izithixo ngendlela ehlasimulisayo.

⁴Nxashana sebenibona ningasemdibi munye nabo beya lapho kudlange khona ukonakala, lokhu kuyabamangalisa bese benithuka.

⁵Kodwa bayoziphendulela kuMvelinqangi ohlala elungele ukwahlulela abaphilayo nabafileyo.

⁶Indaba emnandi yashunyayelwa nakulabo asebafa, khona kuyothi noma ngabe behlulelwe ukuba imizimba yabo ife njengeyabantu bonke, kodwa baphile ngokomoya njengalokhu uNkulunkulu ephila.

⁷Isiphetho sakho konke sesisondele. Ngakhoke imiqondo yenu ayihluzeke nizithibe, nikwazi ukukhuleka.

⁸Okukhulu kunakho konke ukuba nithandane ngenhliziyo yonke, ngoba uthando lusibekela izono eziningi.

⁹Uma nihambelana emakhaya enu nize nemukelane kahle ningakhononi!

¹⁰Yibani yizinceku zikaNkulunkulu onika abantu iziphiwo ezehlukene ngomusa wakhe. Yilowo nalowo akasebenzise isiphiwo sakhe ekusizeni abanye.

¹¹Uma umuntu ekhuluma, akakhulume okungokwezwi likaNkulunkulu; uma umuntu esiza ebandleni akasize ngalawomandla awanikwe nguNkulunkulu,

uMvelinqangi adunyiswe ngenxa kaJesu Kristu kukho konke esikwenzayo. Udumo lungolwakhe namandla nobukhosi phakade naphakade. Ameni.

Ukuhlushwa ngoba bengamaKristu

¹²Bathandekayo, bunganimangalisi ubuhlungu enibuzwayo nxashane nivivinywa, kube sengathi nehlelwa yinto engaziwayo.

¹³Esikhundleni salokho jabulani ngoba nihlanganyela noKristu ezinhluphekweni zakhe, ukuze niphuphume injabulo mhla kubonakaliswa inkazimulo yobukhosi bakhe.

¹⁴Nibusisiwe lapho benithukela ukuba ngabakaKristu, ngoba uMoya wenkazimulo onguMoya oyiNgcwele kaNkulunkulu uhlezi kini.

¹⁵Uma omunye wenu ehlushwa, akungabi ngesizathu sokuba engumbulali noma eyisela noma eyisigilamkhuba kumbe abe ngugaxekile ezindabeni zabanye,

¹⁶kodwa uma nihlushwa ngoba ningamaKristu, nize ningatheleki izinhloni kodwa dumisani uNkulunkulu ngoba nibizwa ngalelogama!

¹⁷Sesifikile isikhathi sokwahlulelwa, kuqalwe ngabakaMvelinqangi. Uma kuqalwa ngathi, siyoba njani isigcino salabo abangayikhohlwanga indaba emnandi kaNkulunkulu na?

¹⁸Umbhalo ongcwele uthi: “Kunzima ukuba olungileyo asindiswe; kangakananike lowo oyisoni nomuntu ongamesabiyo uMvelinqangi!”

¹⁹Ngakhoke laba abahlushwa ngoba kuyintando kaNkulunkulu, abenze okulungileyo, bazinikele kuMvelinqangi umdali wabo othembekileyo abanakekele.

1 kaPhetro 5

Ukwalusa umhlambi kaNkulunkulu

¹Ngiyabancenga laba abaphethe ebandleni phakathi kwenu. Nami ngiphethe ebandleni njengani, ngingufakazi wokuhlushwa kukaKristu, ngiyohlanganyela naye enkazimulweni yobukhosi obuyobonakaliswa. Ngiyaninxusa ngithi:

²Yalusani umhlambi kaNkulunkulu enibekwe ukuba niwunakekele. Nibe ngababheki bawo, kungabi ngoba nipoqelekile, kodwa nisukeleke nina nenze njengalokhu uNkulunkulu ethanda. Ningayihaheli inzuzo ngalomsebenzi, kodwa wenzeni ngokushiseka.

³Ningachachazi phezu kwalabo eningababheki babo, kodwa yibani yisibonelo emhlambini eniwelusayo.

⁴Mhla ebuyayo uJesu ongumalusi omkhulu, niyoklonyelwa ngomqhele wakwanokusho ongasoze wabuna nanini.

⁵Ngokunjalo nani enisebasha thobelani abadala! Bhincani nonke okhalo ukuzithoba, kube yisevatho senu, nikhonzane, ngoba umbhalo ongcwele uthi: “UNkulunkulu umelene nabaziqhayisayo, kodwa abazithobayo ubenzela umusa.”

⁶Ngakhoke zithobeni ngaphansi kwesandla sikaMvelinqangi esinamandla, yikhona ezoniphakamisa lapho sekufika isikhathi.

⁷Izinkathazo zenu zonke zethuleni kuye nizishiye lapho, ngoba uyaninakekela.

⁸Zithibeni nilinde, ngoba uSathane isitha senu uzulazula yonke indawo, ufana nebhubhesi elibhodlayo elihamba lifuna lowo elingamshwabadela.

⁹Gxilani ekukholweni nimelane naye, ngoba niyazi ukuthi abazalwane benu emhlabeni wonke behlelwa yizinhlopheko ezifuze lezi.

¹⁰UNkulunkulu ongumninimusa unibizele ukuba nihlanganyele ebukhosini bakhe baphakade kanye noKristu. Kothi emveni kokuba senihluphekile okwesikhashana, awufeze umsebenzi wakhe kini nize niqine nibe namandla nigxile.

¹¹Nguye uSomandla phakade naphakade. Ameni.

Ukuvalelisa

¹²Nginilobele lencwadi ngamafushane ngisizwa nguSilasi umzalwane engimethemba kakhulu. Ngihlose ukunikhuthaza, ngifakaze ukuthi yiwo ngempela lomusa kaNkulunkulu enginitshela ngawo. Bambelelani kuwo, nime nithi ngqi!

¹³Liyakhonza-ke lelibandla laseBhabhiloni elikhethwe nguNkulunkulu kanye nani; kukhonza noMarko indodana yami.

¹⁴Nize ningikhonzele nibingelelane ngokwanga kwabakholwayo! Akube khona ukuthula kinina nonke eningabakaKristu.

2 kaPhetro

2 kaPhetro 1

Isibingelelo

¹Lencwadi ivela kimi uSimoni Phetro inceku nomphostoli kaJesu Kristu. Ngiyilobela nina enabelwe ukukholwa okuyigugu ngangokwethu, enakuthola kwaba ngokwenu ngenxa yokulunga enikunikwa nguJesu Kristu uNkulunkulu nomsindisi wethu.

²Umusa kaNkulunkulu nokuthula akuvame kini njengoba kuchuma kwanda ulwazi ngaye nangoJesu iNkosi yethu.

Ukubizwa nokukhethwa kwethu nguNkulunkulu

³UNkulunkulu wasibizela kuye ngezwi lakhe lobukhosi namandla. Njengoba sesimazi usiphile ngamandla akhe obuNkulunkulu konke lokho okusiholela ekuphileni nasekumesabeni.

⁴Ngalelizwi lakhe wasinika njengokwethembisa kwakhe izipho eziyigugu eledlula konke, ukuba ngazo lezizipho niphephe ekonakaleni kwalomhlaba okubangwa yizinkanuko, nihlanganyele neNkosi ebuNkulunkulwini bayo.

⁵Ngalesisizathu-ke khuthazelani ukuba ukukholwa kwenu kuveze imisebenzi elungileyo, emisebenzini yenu elungileyo kuvele ulwazi,

⁶ulwazi lwenu luveze ukuzithiba, ukuzithiba kwenu kuveze ukubekezela, ukubekezela kwenu kuveze ukumesaba uNkulunkulu,

⁷ukumesaba kwenu uNkulunkulu kuveze uthando lobuzalwane, uthando lwenu lobuzalwane luveze uthando lobuKristu, nithande bonke abantu.

⁸Uma ninazo leziziphiwo zilokhu zanda-ke ziyoninika umdlandla, niveze izithelo zokomoya, nibe nolwazi oluphelele ngeNkosi yethu uJesu Kristu.

⁹Uma umuntu engenazo-ke lezoziphiwo unjengempumputhe ebona kalufifi, usekhohliwe ukuthi wahlanjululwa ezonweni ayekade ezenza.

¹⁰Ngakhoke bakwethu, khuthazelani niqinise ubizo nokukhethwa kwenu nguNkulunkulu, yikhona ningasoze nakhubeka nihlubuke enkolweni yenu.

¹¹Kanjalo niyonikwa ilungelo elipheleleyo lokungena embusweni waphakade weNkosi nomsindisi wethu uJesu Kristu.

¹²Ngakhoke ngihlose ukuhlala njalo nginikhumbuza ngalezizinto, yize nizazi nigxilile kuleloqiniso enalemukelayo.

¹³Ngithi-ke kuhle impela ukuba ngidamane nginivuselela nginikhumbuze lapho ngisaphila kulomhlaba.

¹⁴Ngizazi ukuthi akusensuku zatshwala ngiwushiye lomhlaba, njengalokhu iNkosi yethu uJesu Kristu ingazisile ngalokhu ngokusobala.

¹⁵Ngakhoke ngizokhuthazela ngidale isu lokuba kuthi nce sengifile nihlale nizikhumbula njalo lezizinto.

Inkazimulo yobukhosi bukaKristu

¹⁶Ngoba thina asizange sihungwe yizinsumansumane zabantu abaziqambe ngobuqili babo, lapho sinishumayeza ngokubuya kweNkosi uJesu Kristu iza ngamandla amakhulu. Sayibona mathupha ngalawa omabili isenkazimulweni yobukhosi bayo.

¹⁷Yathola kuNkulunkulu uYise udumo nobukhosi mhla kuzwakala izwi livela ezulwini, lapho oPhakemeyo wakoMkhulu ethi kuyo: “Lo uyiNdodana yami engiyithandayo engithokoza ngayo.”

¹⁸Sazizwela ngalezi livela ezulwini mhla sinaye entabeni engcwele.

¹⁹Lokhu-ke kugcizelela kithi ukuthi umlayezo wabaphrofethi basendulo wawuqinisile. Nani-ke niyobe nenza kahle uma niwuphaphamela, ukhanye njengesibani esigayegayeni sobumnyama kuze kuphume ikhwezi entathakusa, likhanyisele izinhliziyu zenu.

²⁰Ikakhulu kuhle nazi ukuthi akukho muntu ongazichazela yena ngokwakhe isiphrofetho esisembhalweni ongcwele.

²¹Ngoba akukho siphrofetho esake savela ngentando yomuntu, kodwa nguMoya oyiNgcwele owasusa abantu usinga bakhuluma besusela kuNkulunkulu.

2 kaPhetro 2

Abaphrofethimbumbulu nabafundisi bamanga

(Jud 4-13)

¹Endulo kwavela nabaphrofethimbumbulu phakathi kwesizwe sakwaIsrayeli, njengoba naphakathi kwenu kuyoba khona abafundisa amanga. Bayofaka izifundiso ezedukisayo isinyenyela, zinibhubhise. Bayoze baphike ngisho naleNkosi eyabahlengayo, bazibangele ukuba basheshe babhubhe.

²Abantu abaningi bayogila imikhuba njengabo, bese kuhlanjalazwa iqiniso ngenxa yabo.

³Bayoba nomhobholo baniphange lababafundisi bamanga, bazuze ngani, beniwaka ngamalutha. Sisabahlalele kusukela endulo isigwebo sabo sokuba babhujiswe, kasisoze salibala nanini.

⁴Ngoba uNkulunkulu akaziyekanga lezozingilosi ezazona, kodwa waziphonsa esihogweni, zigcinwe lapho emigodini emnyama, zilindele usuku lokwahlulelwa.

- ⁵Nomhlaba wasemandulo akawuyekanga, kodwa wehlisa uzamcolo emhlabeni wezonakali, wasindisa uNowa kanye nabanye abayisikhombisa kuphela, uNowa owayeshumayela ememezela ukulunga.
- ⁶UNkulunkulu wajezisa imizi yaseSodoma naseGomora, waqotha imbokodwe nesisekelo wayishisa yaba ngumlotha. Lemizi yaba yisibonelo salokho okuyokwehlela izonakali.
- ⁷Wahlenga uLothi, umuntu olungileyo owayesezukeke kakhulu emoyeni ngamanyala ezonakali.
- ⁸Lomuntu olungileyo wahlala phakathi kwazo, inhliziyo yakhe elungileyo yakhathazeka kabi lapho ebona futhi etshelwa nangezenzo zazo zokonakala imihla ngemihla.
- ⁹Kanjalo-ke iNkosi uSomandla iyakwazi ukubahlenga ezilingweni abayesabayo, kodwa ijezise abangalungile, bagcinwe kuze kufike usuku lokwahlulelwa.
- ¹⁰Ikakhulu iyojezisa labo abenza amanyala bebuswa yizinkanuko zemvelo, bebukela phansi ubukhosi bayo. Lababafundisi bamanga bangabaxhomondeli abaziqhayisayo, kabesabi ukuhlambalaza izingilosi ezinobukhosi kweliphezulu.
- ¹¹Kanti-ke kunezingilosi ezibedlulayo ngobuqhawe nangamandla, nokho kazibacebi zibagemence uma zibamangalela eNkosini uSomandla.
- ¹²Lababantu abahlambalaza abangakwaziyo banjengezilo zasendle ezintula ingqondo ezidalelwe ukubanjwa zibulawe; bayobhubha nokubhubha njengazo.
- ¹³Bayobuyiselwa ububi ngomonakalo abawudalileyo. Bajabulela izinkamba bazitike emadilini imini yonke. Kuthi lapho behlezi kanye nani emadilini, babe lihlazo nechilo, bazijabulise ngalokho abakukhanukelayo.
- ¹⁴Amehlo abo kawasuki esifazaneni besikhanukela. Balokhu befuna amathuba okwenza isono. Bayengela ekoneni labo abazimilo zabo zibuthakathaka. Sebazijwayeza ukuba nomhobholo; bangabantu abaqalekiswe nguNkulunkulu.
- ¹⁵Baphambukile endleleni eqondileyo beduka, balandela indlela kaBhalamu umfokaBheynori owayekhonzwe ukuvuzwa ngemali etholakala ngokukhohlakala.
- ¹⁶Wasithethiselwa lesisono sakhe; imbongolo yakhe, isilwane esingakhulumi, yakhulumisa okomuntu yamkhalima umphrofethi ukuba angaqhubeki nalobubuwula bakhe.
- ¹⁷Lababantu bafana neziphethu ezishileyo namafu apheshulwa yisivunguvungu. Balindelwe wubumnyama obuthe khace.
- ¹⁸Bagagamela inkulumo eyize. Ziyababusa izinkanuko zemvelo yabo yokonakala, babuye bayenge ngamanyala abo labo abasand' ukuphenduka basinda emphakathini wabadukayo.

¹⁹Bayaye babethembise inkululeko, kepha bona uqobo lwabo babe beyizigqila zenkohlakalo. Umuntu uyisigqila salokho okumbusayo.

²⁰Labo abaphunyuke ekonakaleni kwalomhlaba ngenxa yokuba beyazi iNkosi nomsindisi wethu uJesu Kristu, uma bephinda-ke bebhajwa kukho, konakele! Bayodlebeleka babe babi kunakuqala.

²¹Bekuyoba ngcono ukuba babengayazanga indlela elungileyo kunokuba kuthi sebeyazile babuye bawuphikise lomnyalo ongcwele ababewunikeziwe.

²²Okwenzeka kubo kuyasifakazela isaga esithi: “Inja ibuyela ebuhlanzweni bayo,” nesithi: “Ingulube igeza ibuye ihuquze odakeni.”

2 kaPhetro 3

Isethembiso ngokubuya kweNkosi

¹Bathandekayo, sekuyincwadi yesibili lena enginilobela yona. Ngalezizincwadi zami ezimbili ngifuna ukuvuselela imicabango yenu emsulwa ngokunikhumbuza

²amazwi akhulunywa endulo ngabaphrofethi abangcwele, nginikhumbuze futhi nangomyalo weNkosi uMsindisi enawushunyayezwa ngabaphostoli benu.

³Ikakhulu kuhle nazi ukuthi ngezinsuku zokugcina kuyovela abantu abayoniklolodela, bebuswa yizinkanuko zabo. Bayonihleka usulu

⁴banibuze bathi: “Njengoba uJesu wanethembisa wathi uyabuya, uphi nje? Selokhu obaba balala zonke izinto zilokhu zinjalo kusukela ekudalweni komhlaba.”

⁵Bayakulibala ukuthi emandulo izulu lalivele likhona kanye nomhlaba. Ngomyalo wakhe uMvelinqangi wawudala umhlaba phakathi kwamanzi, ewudala ngamanzi.

⁶Lowomhlaba owawukhona wawusubhubha ngamanzi ubhujiswa ngozamcolo.

⁷Kodwa izulu nomhlaba okukhona manje kusakhweziwe kugcinwe yiwo lowomyalo kaMvelinqangi ukuze langalimbe kubhujiswe ngomlilo. Kogcinwa kuze kufike usuku lokuphela mhla izonakali ziyokwahlulelwa zibhujiswe.

⁸Bathandekayo, nize ningayikhohlwa lento, iyodwa zwi, yokuthi emehlweni eNkosi uSomandla usuku olulodwa lungangeminyaka eyinkulungwane, kanjalo futhi iminyaka eyinkulungwane ingangosuku olulodwa.

⁹INkosi kayilibali ukuba ifeze lokho ekwethembisile, njengoba abanye bayaye bathi iyalibala; kunalokho iyabekezela ngenxa yenu, ngoba kayithandi ukuba kubhubhe ngisho noyedwa, kodwa ithanda ukuba bonke baphenduke bakholwe.

¹⁰Kodwa usuku lokubuya kweNkosi uJesu luyofika njengesela. Ngalolosuku kuyoba khona ukukleklebula nendumo enkulu eyobhubhisa lonke elaphezulu, kuthi nalezozinto ezingumsuka wakho konke okukhona zishe zincibilike ziphele. Umhlaba nakho konke okukuwo kuyobhubha kushabalale.

- ¹¹Njengoba zonke lezizinto ziyobhubha ngalendlela kufanele niphile impilo engcwele, nesabe uNkulunkulu
- ¹²ngenkathi nisalindele usuku lokubuya kweNkosi nisalukhuthazela ukuba lusheshe lufike. Ngalolosuku elaphezulu liyoshiswa lonke ngomlilo libhubhe liphele nya, nalezozinto ezingumsuka wakho konke okukhona ziyoncibilikiswayikhoza lomlilo.
- ¹³Kepha-ke sikulindele lokho asethembisa khona, izulu elisha nomhlaba omusha lapo kuyobusa khona ukulunga kodwa.
- ¹⁴Ngakhoke bathandekayo, njengoba nikulindele lokho, shisekelani ukuthula phakathi kwenu noNkulunkulu, nibe msulwa ningenasici phambi kwakhe!
- ¹⁵Khumbulani ukuthi ukubekezela kweNkosi uJesu yikhona eniyosindiswa ngakho. NoPawula umzalwane wethu othandekayo wanilobela ngalokhu, enza ngobuhlakani ayebuphiwe nguNkulunkulu.
- ¹⁶Yilokhu akushoyo ngalendikimba kuzo zonke izincwadi zakhe azilobayo. Kukhona ezinye izinto azilobile ezilukhuni. Lezozinto zibanga ukuba abangafundile nalababantu abantengayo ekukholweni bazihlanekezele, njengalokhu benza nakweminye imibhalo engcwele. Ngokwenze njalo bazigwaza ngowabo, bazibangela ukubhujiswa.
- ¹⁷Kepha nina bathandekayo bese nivele nikwazi lokhu. Ngakhoke qaphelani ningahunguki nedukiswe yimigulukudu, nidede kulokho enigxile kukho.
- ¹⁸Umusa kaNkulunkulu awande kini nithuthuke nasekuyazini iNkosi nomsindisi wethu uJesu Kristu! Udumo lungolwakhe manje, kuyoba njalo kuze kube phakade. Ameni.

1 kaJohane

1 kaJohane 1

IZwi elingukuphila

¹Kwasekuqaleni wayevele ekhona lowo oyiZwi elingukuphila. Samuzwa sambona ngamehlo, sambheka samthinta ngezandla.

²Lowo ongukuphila samvezelwa, sambona sesiyafakaza sinibikela ngaye ongukuphila okuphakade, yena owayevele ekhona kuYise, owafika wabonakala lapha kithi.

³Manje sesiyabika nakini ngalowo esambonayo samuzwa, nce nihlanganyele nathi sidlelane njengoba thina sinobudlelwane noYise neNdodana yakhe uJesu Kristu.

⁴Nansi incwadi esinilobela yona nce kuphelele ukuthokoza kwethu.

UNKulunkulu ungukukhanya

⁵Izwi esalizwa kuye nesesinibikela lona, ngelokuthi uNkulunkulu ungukukhanya, akukho bumnyama kuye.

⁶Uma sithi-ke sidlelana noNkulunkulu kepha sibe siphila impilo ebuswa ngubumnyama, kusho ukuthi siqamba amanga, esikwenzayo akuvumelani neqiniso.

⁷Kodwa uma siphila impilo yokukhanya njengalokhu yena engukukhanya, sinobudlelwane omunye nomunye, igazi uJesu iNdodana yakhe eyalichithela thina liyasihlambulula ezonweni zonke.

⁸Uma sithi asinasono siyazikhohlisa, asimi eqinisweni.

⁹Uma sizivuma izono zethu, uyasithethelela asihlambulule kukho konke ukungalungi, ngoba wethembekile yena ulungile.

¹⁰Uma sithi kasonanga, se za uNkulunkulu umqambi wamanga, uma sisho njalo-ke kasibuswa yizwi lakhe ezinhliziyweni zethu.

1 kaJohane 2

Ummeli wethu nguKristu

¹Bantwana bami, nginilobela lencwadi ukuba ningoni. Kodwa uma kukhona owonayo kuhle azi ukuthi sinaye osimelayo kuYise. Lowo-ke nguJesu Kristu oLungileyo.

²Nguyena umhlatshelo ohlawulela izono zethu, kungezona zethu kuphela kepha uhlawulela nezabantu bonke emhlabeni.

³Uma sigcina imiyalo yakhe, sineqiniso lokuthi siyamazi.

⁴Lowo othi uyamazi kepha engayigcini imiyalo yakhe unguhubhukabhejane; lowomuntu akemi eqinisweni.

⁵Kodwa uthando lukaNkulunkulu luphelelisiwe kulowo ogcina akushoyo uKristu. Yiyo-ke lendlela esazi ngayo ukuthi sisebunyeni kuye.

⁶Umuntu othi uhlala ekuye, kumele aphile impilo efuze eyakhe.

Umyalo omusha

⁷Bathandekayo, lokhu enginilobela khona akusiwo umyalo omusha kepha ngumyalo omdala enaninawo kwasekuqaleni. Phela lomyalo omdala uyilelovangeli enalizwa lishunyayelwa.

⁸Kanti-ke futhi musha lomyalo enginilobela ngawo. Iqiniso lalokhu lifakazelwa yimpilo uKristu ayeyiphila nempilo yenu eniyiphilayo, ngoba ubumnyama buyedlula, nokukhanya kwempela vele sekuyakhanya.

⁹Lowo othi uphila impilo yokukhanya kodwa azonde umzalwane wakhe, lowomuntu usesebumnyameni.

¹⁰Lowo othanda umzalwane wakhe uphila impilo yokukhanya, akenzi lutho oluhlubukisa abantu ekukholweni.

¹¹Kodwa lowo ozonda umzalwane wakhe usesebumnyameni, uphila impilo ebuswa ngubumnyama, akazi ukuthi uqondephi, ngoba ubumnyama bumphuphuthekisile.

¹²Ngiyani lobela bantwana bami ngoba izono zenu zithethelelwe ngegama likaJesu Kristu.

¹³Ngiyani lobela nina bobaba, ngoba niyamazi lowo owayevele ekhona kwasekuqaleni. Ngiyani lobela nani zinsizwa ngoba nimnqobile omubi onguSathane.

¹⁴Ngiyani lobela bantwana bami ngoba niyamazi yena onguYise. Ngiyani lobela nina bobaba ngoba niyamazi lowo owayelokhu ekhona kwasekuqaleni. Ngiyani lobela nani zinsizwa ngoba ninamandla nibambelele kulokho okushiwo nguNkulunkulu, namnqoba omubi onguSathane.

¹⁵Ningawuthandi lomhlaba owonakeleyo nezinto zawo imbala. Uma umuntu ethanda lomhlaba, akanalo uthando oluvela kuYise osezulwini.

¹⁶Ngoba izinto zalomhlaba, lokhu okufiswa yimvelo yethu yokonakala, nalokhu okusikhangayo kuqubule inkanuko kithina, nezinto zethu esizigabisa ngazo, konke lokhu akuveli kuYise kodwa kuvela kulomhlaba owonakeleyo.

¹⁷Izinto zalomhlaba nakho konke esikukhanukelayo kuwo kuyedlula; kepha lowo owenza intando kaNkulunkulu uyophila ungunaphakade.

Umuntu omelene noKristu

¹⁸Bantwana bami, sekuyizinsuku zokugcina. Nizwile ukuthi ukhona oyovela amelane noKristu; ngisho namanje sebevele bakhona baningi abamelene noKristu. Ngalokhu siyazi ukuthi sekuyizinsuku zokugcina.

¹⁹Lababantu sasinabo base besihlamuka; empeleni babengazange babe munye nathi. Ukuba babemunye nathi babeyohlala nathi. Ukusihlamuka kwabo kwaveza ngokusobala ukuthi akakho noyedwa wabo owayengowethu.

²⁰Nina-ke unigcobile uKristu namukela uMoya oyiNgcwele, nonke seniyalazi iqiniso.

²¹Nginyanlobela-ke, kungengasizathu sokuthi kanilazi iqiniso, kodwa ngoba nilazi, nazi nokuthi kulo awatholakali amanga.

²²Ngubani onguhukabhejane na? Akusiye yini lowo ophika uJesu athi akasiye uKristu na? Lona ungumuntu omelene noKristu, uphika uYise ngisho neNdodana.

²³Yilowo nalowo ophika iNdodana uphika noYise; ongayiphiki iNdodana kamphiki uYise.

²⁴Lokho enakuzwayo nina kwasekuqaleni akuhlale kunibusa. Uma nibuswa yilokhu enakuzwa kwasekuqaleni, nani-ke niyolokhu nahlala nikuyo iNdodana nakuYise.

²⁵Nakhu-ke esakwethenjiswa yiyo uqobo: ukuphila okuphakade.

²⁶Senginilobele ngalabo abafuna ukuneducisa.

²⁷Nina-ke nagcotshwa nguKristu namukela uMoya oyiNgcwele. usalokhu ukini; kanisadingi muntu ozobuye anifundise. Ngoba uMoya anipha wona unifundisa konke; lokho-ke onifundisa khona kuyiqiniso akusiwo amanga. Ngakhoke yenzani lokho onifundisa khona: hlalani nikuye!

Abantwana bakaNkulunkulu

²⁸Bantwana bami, ngithi hlalani nikuye ukuba sibe nesibindi lapho esebonakala, singabi nazinhloni simbalekele mhla ebuyayo.

²⁹Niyazi-ke ukuthi ulungile, ngakhoke kuhle nazi ukuthi umzele lowo nalowo owenza okulungileyo.

1 kaJohane 3

¹Lwaze lwalukhulu uthando uBaba osezulwini asikhombise lona lokuba kuthiwe singabantwana bakaNkulunkulu! Kakade siyibo. Abantu balomhlaba kabasazi, ngoba phela kabamazi yena.

²Bathandekayo, sesingabantwana bakaNkulunkulu, kodwa akukabonakali ukuthi iyoza nkomoni. Kanti-ke siyazi ukuthi mhla uKristu eseqhamuka siyofana naye ngoba siyombona enjengoba enjalo.

³Bonke abanalelithemba kuKristu bayazihlambulula njengalokhu ehlanzekile.

- ⁴Yilowo nalowo owonayo weqa umthetho kaNkulunkulu, ngoba isono singukweqa umthetho.
- ⁵Niyazi ukuthi uKristu wavela waba ngumuntu ukuba asuse izono zethu; akanasono yena.
- ⁶Ngakhoke uma umuntu ehlala ekuKristu akaqhubeki nokona. Lowo olokhu eqhubeka ona akazange ambone, akamazi.
- ⁷Bantwana bami, nize ningeduswa muntu. Osuke enza okulungileyo ulungile njengalokhu uKristu elungile.
- ⁸Lowo olokhu eqhubeka ona ungokaSathane, ngoba kusukela kwasekuqaleni uSathane ulokhu waqhubeka ona. INdodana kaNkulunkulu yaba ngumuntu ukuze ichithe imisebenzi kaSathane.
- ⁹Yilowo nalowo ozelwe nguNkulunkulu akaqhubeki nokona, ngoba ubambelele kokushiwo yizwi likaNkulunkulu . Ngeke one ngoba uzelwe uNkulunkulu.
- ¹⁰Nanku-ke umahluko phakathi kwabantwana bakaNkulunkulu nabantwana bakaSathane: yilowo nalowo ongakwenzi okulungileyo nongamthandi umzalwane wakhe akasiye okaNkulunkulu.

Thandanani

- ¹¹Umyalo enawuzwa kwasekuqaleni yilona wokuthi: asithandane.
- ¹²Asingabi njengoKhayini! WayengokaSathane, waze wabulala uAbela umfowabo. Embulalela sizathu sini na? Yingoba imisebenzi kaKhayini yayingeyokonakala, kodwa eyomfowabo ilungile.
- ¹³Ningamangali bakwethu uma abalomhlaba benizonda!
- ¹⁴Siyazi ukuthi siphumile phansi kwethunzi lokufa, sangena ekuphileni koqobo. Siyakwazi lokhu ngoba siyabathanda abazalwane. Ongenalo uthando uhleli phansi kwethunzi lokufa.
- ¹⁵Yilowo nalowo ozonda umzalwane wakhe ungumbulali. Niyazi-ke ukuthi akukho mbulali onokuphila okuphakade kuye.
- ¹⁶Uthando silwazi ngalokhu ukuthi wadela ukuphila kwakhe ngenxa yethu. Nathi-ke kufanele sidele ukuphila kwethu ngenxa yabazalwane.
- ¹⁷Ake ngithi kukhona umuntu osuke emi kahle lapha emhlabeni, bese ebona umzalwane wakhe oswelayo. Uma engamsizi ngalutho, kusobala ukuthi akanalo uthando oluvela kuNkulunkulu.
- ¹⁸Bantwana bami, uthando lwethu alungabi ngolomlomo kanye nokusho nje, kodwa asibe nothando loqobo olubonakala ngezenzo.

Ukuma ngesibindi phambi kukaNkulunkulu

¹⁹Siyokwazi ngakho lokhu ukuthi simi eqinisweni, izinhliziyi zethu bese ziba neqholo phambi kukaNkulunkulu.

²⁰Noma unembeza wethu esilahla ngecala, siyazi ukuthi uNkulunkulu unolwazi kakhulu kunezinhliziyi zethu, ngoba yena ukwazi konke.

²¹Bathandekayo, uma unembeza wethu-ke engasilahli siyokuma ngesibindi phambi kukaNkulunkulu.

²²Noma yikuphi esimcela khona uyasinika, ngoba siyayigcina imiyalo yakhe senze okuthandeka kuye.

²³Nanku umyalo wakhe: ukuba sikholwe kuJesu Kristu iNdodana yakhe, sithandane njengalokhu yasiyaleza.

²⁴Lowo ogcina imiyalo yakhe uhlala ekuye, naye uhlala ekulowo. Siyazi-ke ukuthi uhlala ekithi njengoba esiphile uMoya oyiNgcwele.

1 kaJohane 4

UMoya kaNkulunkulu nomoya walowo omelene noKristu

¹Bathandekayo, nize ningabakholwa bonke laba abathi banoMoya kaNkulunkulu, kodwa bahloleni nibone ukuthi lomoya okubo ungokaNkulunkulu na. Ingani phela abaphrofethimbumbulu sebephumele ezweni lonke.

²Niyokwazi ngalokhu ukuthi banoMoya kaNkulunkulu: yilowo nalowo ovuma ukuthi uJesu Kristu wafika waba ngumuntu, unoMoya kaNkulunkulu.

³Kodwa okuphikayo lokhu ngoJesu, akanawo uMoya kaNkulunkulu, kodwa umoya anawo ungowesitha esimelene noKristu, njengoba nezwa ukuthi lomoya uyofika, ngisho namanje vele usukhona emhlabeni.

⁴Kodwa nina bantwana bami ningabakaNkulunkulu nibanqobile abaphrofethimbumbulu, ngoba yena ohlala ekini unamandla amakhulu kunalowo ohlala ekubantu balomhlaba.

⁵Lababaphrofethimbumbulu bangabalomhlaba, ngakhoke bakhuluma ngezinto zalomhlaba; umhlaba uyabalalela-ke.

⁶Kodwa thina singabakaNkulunkulu. Lowo omaziyo uNkulunkulu uyasilalela, lowo ongesiye okaNkulunkulu akasilaleli. Yilokho-ke okungumehluko phakathi koMoya weqiniso nomoya wamanga owedusayo.

UNkulunkulu uluthando

⁷Bathandekayo, nathi asithandane ngoba uthando luvela kuNkulunkulu. Yilowo nalowo onothando uzelwe nguNkulunkulu, uyamazi uNkulunkulu.

⁸Ongenaluthando kamazi uNkulunkulu, ngoba uNkulunkulu uluthando.

⁹Ukusithanda kukaNkulunkulu kwabonakala ngokuba athumele emhlabeni iNdodana yakhe izelwe yayodwa, ukuze thina siphile ngayo.

- ¹⁰Uthando luyilokhu: akusikho ukuthi samthanda uNkulunkulu, kepha nguyena owasithandayo, wathumela iNdodana yakhe yaba yihlawulo lezono zethu.
- ¹¹Bathandekayo, njengoba uNkulunkulu asithanda kangaka, nathi-ke kufanele sithandane.
- ¹²Akakho oseke wabona uMvelinqangi. Uma sithandana, uNkulunkulu uhlala kithi singabakhe, uthando lwakhe luphelelisiwe kithi.
- ¹³Siyazi ukuthi sihlala sikuNkulunkulu nokuthi uNkulunkulu uhlala ekithi, ngoba usiphile uMoya wakhe.
- ¹⁴Thina-ke sibonile, sesiyafakaza ukuthi uYise uyithumele iNdodana yakhe yaba ngumsindisi womhlaba.
- ¹⁵Noma ubani ovumayo ukuthi uJesu uyiNdodana kaNkulunkulu, uNkulunkulu uhlala ekuye, nalowo uhlala ekuNkulunkulu.
- ¹⁶Thina-ke siyalwazi lolothando uNkulunkulu asithanda ngalo, siyalukholwa. UNkulunkulu uluthando. Lowo olokhu enothando uhlala ekuNkulunkulu, noNkulunkulu uhlala ekuye.
- ¹⁷Uthando luphelelisiwe kithi ngalokhu, sinesibindi asinaluvalo lomhla wokwahlulelwa, ngoba sifuze uJesu yize sisesemhlabeni lapha.
- ¹⁸Lapho kukhona khona uthando akukho luvalo. Uthando olupheleleyo luqeda uvalo, ngoba onovalo wesaba ukujeziswa. Umuntu owesabayo usuke engaphelelisiwe othandweni.
- ¹⁹Thina siyathanda ngoba uNkulunkulu waqala yena wasithanda.
- ²⁰Kepha uma umuntu ethi uyamthanda uNkulunkulu kodwa abe esazonda umzalwane wakhe, unguhubhukabhejane. Ngoba lowo ongamthandi umzalwane aseke wambona, angemthande uNkulunkulu angakaze ambone.
- ²¹Nanku umyalo asinika wona: lowo othanda uNkulunkulu akathande umzalwane wakhe.

1 kaJohane 5

Ukunqoba umhlaba ngokukholwa

- ¹Bonke abakholwa ukuthi uJesu unguKristu bazelwe nguNkulunkulu; bonke abathanda umzali bathanda nomntanakhe imbala.
- ²Uma sithanda uNkulunkulu sigcina imiyalo yakhe, ngalokhu siyazi ukuthi siyabathanda nabantwana bakhe.
- ³Ukuthanda uNkulunkulu kuyilokhu: ukugcina imiyalo yakhe. Imiyalo yakhe ayinzima,

⁴Ngoba bonke abazelwe nguNkulunkulu bayawunqoba umhlaba. Ukukholwa kwethu kwaba yikhona kunqoba okwahlula umhlaba.

⁵Ngubani ongase awunqobe umhlaba na? Yilowo kuphela okholwayo ukuthi uJesu uyiNdodana kaNkulunkulu.

Ubufakazi mayelana neNdodana kaNkulunkulu

⁶Nguye uJesu Kristu oweza emhlabeni, wabhabhadiswa ngamanzi, wabulawa kwachithwa igazi lakhe. Akezanga ngamanzi nje kuphela, kodwa kwaba ngamanzi nangezazi. UMoya oyiNgcwele uyafakaza ukuthi lokhu kuyiqiniso, ngoba unguMoya weqiniso.

⁷Kukhona ofakazi abathathu:

⁸uMoya namanzi negazi; ubufakazi babo buyavumelana.

⁹Okushiwo ngabantu befakaza siyaye sikwamukele; ubufakazi bukaNkulunkulu bunesisindo kangakanani-ke kunalokho! Phela nguNkulunkulu uqobo ofakaza ngeNdodana yakhe.

¹⁰Okholwa eNdodaneni kaNkulunkulu, inhliziyo yakhe inabo lobubufakazi. Ukungakholwa kuNkulunkulu kungukumenza umqambi wamanga, ngoba umuntu ongakholwayo akabamukeli lobubufakazi uNkulunkulu abuveze ngeNdodana yakhe.

¹¹Ubufakazi yilobu-ke: uNkulunkulu usinike ukuphila okuphakade, lokhukuphila kusuka eNdodaneni yakhe.

¹²Lowo oneNdodana kaNkulunkulu unakho ukuphila, kodwa lowo ongenayo iNdodana akanakho ukuphila.

Ukuphila okuphakade

¹³Nginilobela lencwadi ukuba nazi ukuthi ukuphila okuphakade ninakho, nina enikholwa eNdodaneni kaNkulunkulu.

¹⁴Sesingema phambi kukaNkulunkulu sinesibindi, ngoba uyazizwa izicelo zethu uma simcela utho oluvumelana nentando yakhe.

¹⁵Uma sazi ukuthi uyasizwa noma sikelani, siyazi nokuthi uyasipha lokho esimcele khona.

¹⁶Uma ubona umzalwane wakho ona ngendlela engamenzi afe ngokomoya, mthandazele kuNkulunkulu, yikhona eyomnika ukuphila. Sengikhuluma ngalabo abona ngendlela engabenzi bafe ngokomoya. Kukhona isono esenza abantu bafe ngokomoya, angiqonde khona ukuthi nimthandazele kuNkulunkulu umuntu owenza lesosono.

¹⁷Yonke inhlobo yenkohlakalo iyisono; kukhona isono esingabenzi abantu bafe ngokomoya.

¹⁸Siyazi ukuthi bonke abazelwe nguNkulunkulu abaqhubeki bone, ngoba iNdodana kaNkulunkulu iyabalondoloza, ukuze isonakali uSathane singalokothi sibathinte.

¹⁹Siyazi ukuthi singabakaNkulunkulu nokuthi bonke abomhlaba babuswa yilesisonakali.

²⁰Siyazi futhi ukuthi iNdodana kaMvelinqangi yeza emhlabeni yafike yasipha amandla okuqonda ukuze simazi lowo onguYenayena. Sisebunyeni kuye onguYenayena okusho ukuthi sikuyo iNdodana yakhe uJesu Kristu. InguMvelinqangi onguyenayena, ukuphila okuphakade sikuthola ngayo.

²¹Bantwana bami, xwayani ningakhonzi onkulunkulumbumbulu.

2 kaJohane

2 kaJohane 1

Isibingelelo

¹Lencwadi ivela kimi umholi omdala wamabandla. Ngiyiqondise kuwe bandla elingumame okhethwe nguNkulunkulu, nasemakholweni angabantwana bakho. Nginithanda ngothando lwempela. Akumina ngedwa enginithandayo, kodwa nithandwa yibo bonke abalaziyo iqiniso.

²Sinithanda ngenxa yeqiniso esimi kulo neliyohlala kithi ungunaphakade.

³UNkulunkulu uBaba noJesu Kristu iNdodana yakhe uyosenzela njalo umusa asihawukele asilethele ukuthula, sime eqinisweni nasothandweni.

Bambelelani emfundisweni kaKristu

⁴Kungithokozise kakhulu ukubona abanye babantwana bakho bebambebele eqinisweni bemi kulo, njengalokhu uBaba osezulwini asilayeza.

⁵Manje-ke bandla elithandekayo elingumame, lokhu enginilobela khona akusiwo umyalo omusha, kepha ngumyalo omdala esasinawo kwasekuqaleni. Asihlale njalo sithandana!

⁶Uthando yilolu: asihambe ngokwemiyalo kaNkulunkulu. Yiwo lomyalo enawuzwayo kwasekuqaleni wokuthi ukuhamba kwenu akubuswe uthando.

⁷Ngoba baningi abakhohlisi asebegcwele lonke izwe, bedukisa abantu. Kabavumi ukuthi uJesu unguKristu owaba ngumuntu. Lowo osho njalo ungumkhohlisi omelene noKristu.

⁸Qaphelani-ke ukuba ningalahlekelwa yilokho esesikusebenzele, kodwa nithole umvuzo wenu ngokupheleleyo kwelizayo.

⁹Lowo ongabambeleli emfundisweni kaKristu kepha echezuka kuyo akanaye uNkulunkulu. Kodwa obambebele kuyo unoYise kanye neNdodana.

¹⁰Uma umuntu eza kini afike nesifundiso esingafani nalesi, nize ningamamukeli emakhaya enu, ngisho nokumbingelela kodwa lokhu.

¹¹Ngoba lowo obingelela abantu abanjalo uhlanganyela nabo emisebenzini yabo emibi.

Ukuvalelisa

¹²Kuningi ebengizonitshela khona, kodwa angithandanga ukukuloba ngesandla, kunalokho ngifuna ukuzifikela mathupha ngikhulume nani umlomo nomlomo, ukuba kuphelele ukuthokoza kwethu.

¹³Ayakhonza amakholwa alelibandla engikulo elikhethwe nguNkulunkulu.

3 kaJohane

3 kaJohane 1

Isibingelelo

¹Lencwadi ivela kimi umholi omdala wamabandla. Ngiyilobela wena Gayiyu engikuthanda ngothando lwempela.

²Mzalwane, ngikufisela ukuba uchume kukho konke uphile kahle, njengoba ngazi ukuthi uphilile ngokomoya.

³Ngajabula kakhulu ngenkathi kufika abazalwane bengilandisa ngokubambelela kwakho eqinisweni ngokwethembeka, njengoba ulokhu umi kulo.

⁴Akukho lutho olungijabulisa njengokuzwa ukuthi abantwana bami bemi eqinisweni.

UGayiyu unconywa ngokuphatha kahle izihambi

⁵Mzalwane, wethembekile impela kukho konke okwenzela abazalwane nalapho beyizihambi.

⁶Lababantu bafike bakukhulumela kahle ebandleni ngothando obaphathe ngalo. Baphe umphako wendlela njengalokhu kubafanele abakaNkulunkulu.

⁷Baphumile-ke bahamba babika indaba emnandi elanda ngoJesu Kristu. Kabazange bavume ukusizwa ngabangakholwa bezizwe.

⁸Thina-ke esikholwayo kufanele sibasekele abanjalo sihlanganyele nabo ekushumayeleni iqiniso.

UDiyotrefe usolwa ngento ayenzayo

⁹Ngililobele ibandla ngezinto ezithile, kodwa uDiyotrefe ongunontandakubukwa wala ukhasha akafuni ukusilalela.

¹⁰Ngakhoke kuyothi ngingafika lapho, ngikhumbuze ibandla ngesenzo sakhe lapho esingcofa esiqambela amanga aluhlaza. Akagcini lapho, ubuye futhi enqabe ukungenisa abazalwane abayizihambi, abuye avimbele namakholwa lawo afuna ukubemukela, awakhiphe ebandleni.

Ubufakazi obuhle ngoDemetriyo

¹¹Mzalwane, ungasilandeli isibonelo esibi, kodwa landela esihle! Lowo owenza okulungileyo ungokaNkulunkulu. Owenza ububi kamazi ukuthi ungubani uNkulunkulu .

¹²UDemetriyo bamfakazela bonke ngisho neqiniso uqobo lwalo. Nathi-ke siyamncoma, nawe wazi kahle ukuthi ubufakazi bethu buyiqiniso.

Ukuvalelisa

¹³Kuningi ebengizokutshela khona, kodwa angithandanga ukukuloba ngesandla.

¹⁴Ngiyethemba ukuthi ngiyosheshe ngikubone sikhulume umlomo nomlomo.

¹⁵Sala nokuthula! Abazalwane bakhonza indaba. Uze ungibonele kubazalwane bonke ngamunye.

EkaJudasi

EkaJudasi 1

Isibingelelo

¹Lencwadi ivela kimi uJudasi inceku kaJesu Kristu engelamana noJakobe. Ngiyilobela nina eniqokwe nguNkulunkulu uYise onithandayo nonilondolozayo ngoJesu Kristu.

²UNkulunkulu akanenzele ububele, kuvame kini ukuthula nothando!

Abafundisi bamanga nokwahlulelwa kwabo

(2 Phetr 2:1-17)

³Bathandekayo bengisha amashushu ngifuna ukunilobela ngensindiso yethu sonke, kodwa manje sengithi anginilobele nginikhuthaze ukuba nikulwele lokho esikukholwayo okwethulwa ebandleni elingcwele likaKristu kwaba kanye.

⁴Kukhona abantu abathile abayizonakali asebengene isinyenyela phakathi kwenu, abantu okwashiwo ngabo kudala emibhalweni engcwele ukuthi bayobekwa icala balahlwe. Baphendukezela izwi elikhuluma ngomusa kaNkulunkulu balenze libe yizaba zokuphila ngendlela yokonakala. Bayaye baphike uJesu Kristu okunguye yedwa ongumbusi neNkosi yethu.

⁵Njengoba-ke nikwazi konke lokhu ngithanda ukunikhumbuza ukuthi iNkosi uSomandla yake yabophula abantu bayo kwelaseGibhithe, kodwa kuthe kamuva yababhubhisa labo abangakhawanga.

⁶Nezingilosi ezingaligcinanga ilungelo lobukhosi bazo kodwa zambuka zashiya ikomkhulu lazo ezulwini, seziboshwe ngezisinga ungunaphakade ebumnyameni obuthe khuhle, lapho uNkulunkulu ezigcine khona kuze kufike usuku olukhulu lokugcina, zahlulelwe.

⁷Khumbulani ukuthi imizi yaseSodoma naseGomora yabhujiswa kanye nemizi eyakhelene nayo. Abantu balapho balingisa lezingilosi, bazinikela ebufebeni bobungqingili. Seohlala njalo beyisibonakaliso sokujeziswa ngomlilo ovutha ungunaphakade.

⁸Kanjalo futhi lababantu bahuhwa yimibono yabo banukubeze imizimba yabo, badelele amandla obukhosi beNkosi, bahlambalaze izingilosi ezinodumo kweliphezulu.

⁹Ngisho noMikhayeli ingilosi engundunankulu kakwenzanga lokhu. Kwathi nalapho esexabene noSathane bebanga isidumbu sikaMose, kepha lengilosi kayilokothanga imthuke uSathane ngenhlamba lapho immangalela, kodwa yaphetha ngokuthi: "INkosi ayikujezise!"

¹⁰Lababantu-ke bahlambalaza abangakwaziyo, nabakuqondayo ngezinzwa zemvelo, bakusebenzise bese behubha ngenxa yakho njengoba kwenza izilwane ezintula ingqondo.

¹¹Maye kubo! Balandela emikhondweni kaKhayini; bathathekile beduka njengoBhalamu behahela ukuvuzwa ngemali. Bahlubuka njengoKhora, babhujiswa njengaye.

¹²Lapho nidla ndawonye enkonzweni, lababantu bayichilo, badla baphuze bazitike bangatheleki nakancane izinhloni. Banjengabelusi abagombela kwesabo bengaboneleli abanye. Banjengamafu angenamvula apheshulwa ngumoya. Bayimithi engatheliyo ngisho nasekwindla; yebo, banjengemithi esishulwe ngisho nezimpande zayo yafa ukufa.

¹³Bayaye babholokoqe amahlazo abo njengamaza adlangalalayo olwandle ekhihliza ingwebu. Bayantunta, banjengezinkanyezi eziguquguquka nomthala. Abantu abanje bagcinelwe isigayegaye esithe khace ungunaphakade.

¹⁴UEnokhi owayeyisizukulwane sesikhombisa kusukela kuAdamu, wabikezela ngabo emandulo wathi: “Niyabona, iNkosi iyeza nabangcwele bayo abayizigidi

¹⁵ukuzokwahlulela bonke abantu, ibajezise ngenxa yemisebenzi yabo yonke abayenzileyo bengamesabi uNkulunkulu nangenxa yamazwi abo onke anendluzula abawakhulume ngaye, lezizoni ezingamesabi uNkulunkulu.”

¹⁶Lababantu bayaye bakhonone babe nezinsolo, babuswe yizinkanuko zabo zemvelo. Bakhuluma uwangala, badude abanye ngokubatusa ukuba bagombe kwesabo bathole inzuzo.

Ukuxwayisa nokuyala

¹⁷Bathandekayo khumbulani enakushunyayezwa kudala ngabaphostoli beNkosi yethu uJesu Kristu!

¹⁸Bathi kini: “Ngezinsuku zokugcina kuyovela abantu abaklolodayo, bebuswa yizinkanuko zabo, bengamshayi mkhuba uNkulunkulu.”

¹⁹Yibo lababantu ababanga uqhekeko, babuswa yizinzwa zemvelo yabo, kababuswa nguMoya oyiNgcwele.

²⁰Kepha nina bathandekayo, zakheni nigxile ekukholweni kwenu okungcwelengcwele, nikhuleke, uMoya oyiNgcwele unisize.

²¹Bambelelani othandweni lukaNkulunkulu nisalindele ukuba iNkosi yethu uJesu Kristu inenzele ububele, nithole ukuphila okuphakade.

²²Yibani nesihe nihawukele abangabazayo,

²³nibophule basinde emlilweni. Abanye bahawukeleni, kodwa nibe novalo nixwaye imikhuba yabo emibi, nenyanye amanyala abawenzayo kulokhukubuswa kwabo yizinkanuko zemvelo .

Indumiso

²⁴Akadunyiswe onamandla okunilondoloza ningakhubeki, anilethe enkazimulweni yobukhosi bakhe ningenasici, niphuphuma injabulo.

²⁵UMvelinqangi okunguye yedwa osisindisayo ngoJesu Kristu iNkosi yethu, udumo lungolwakhe nobukhosi namandla negunya, kusukela kwaphakade, kunjalo namanje, koba njalo naphakade. Ameni.

IsAmbulo

IsAmbulo 1

Isambulo sikaJesusu Kristu

¹Kulombhalo kulotshwe ngezimfihlakalo ezijulileyo uNkulunkulu azembulela uJesusu Kristu ukuba akhombise izinceku zakhe lokho okuzokwehlakala masinyane. UJesusu wathumela ngengilosi yakhe kuJohane inceku yakhe, wamazisa ngalezizimfihlakalo.

²UJohane uyafakaza kulencwadi ngakho konke akwelamelayo, ubika ngalokho okushiwo nguNkulunkulu nokufakazwa nguJesusu Kristu.

³Ubusisiwe oyofundela ibandla amazwi alesisiphrofetho, bayadela nalabo abayowafundelwa, bakubeke enhliziyweni lokho okulotshiwe kuso, ngoba inkathi yokugcwaliseka kwalezizinto isisemnyango.

Kubingelelwa amabandla ayisikhombisa

⁴Ngujohane lona onilobelayo nina mabandla ayisikhombisa kwelaseAsiya. Uthuma umkhonzo uthi: Nginifisela umusa nokuthula okuvela kuMvelinqangi, yena okhona nowayevele ekhona nozayo, nakuyo imimoya eyisikhombisa ethe shaye phambi kwesihlalo sakhe sobukhosi,

⁵nakuJesusu Kristu, ufakazi owethembekileyo, ingqalabutho kulabo abavuswa ekufeni, okunguyena yedwa obusa phezu kwamakhosi omhlaba. Usithandle; sachithelwa igazi lakhe, sase sikhululwa ezonweni zethu.

⁶Wasimisela umbuso, saba ngabaphristi bokukhonza lowo onguNkulunkulu wakhe noYise omzalayo. Udumo lungolukaJesusu Kristu namandla ngawakhe phakade naphakade. Amen.

⁷Khangelani, nangu eza ngamafu! Amehlo onke ayakumbona, yebo nabamgwazayo imbala. Izizwe zonke zomhlaba ziyodazuluka zilile ngenxa yakhe. Yebo, kuyoba njalo!

⁸“Yimi owokuqala nowokugcina,” isho kanjena iNkosi uMvelinqangi, yena okhona nowayevele ekhona nozayo, uMninimandla onke.

Ukuvela kukaKristu ngesibonakaliso

⁹NginguJohane umzalwane wenu nomlandeli kaJesusu. Ngihlanganyela kanye nani ukuba sithwale ngesineke izinhlopheko ezehlela bonke abombuso wakhe. Ngaze ngaba kulesisiqhingi sasePhathmosi nje kungoba ngashumayela izwi likaNkulunkulu ngafakazela uJesusu.

¹⁰Ngehlelwa uMoya kaNkulunkulu mhla wosuku lweNkosi, ngase ngizwa izwi elikhulu lihlokoma njengecilongo ngemva kwami

¹¹lithi: “Kulobe emqulwini konke lokhu okubonayo, bese ukuthumela emabandleni ayisikhombisa: kwelasEfesu nelaseSmirna nelasePhergamo nelaseThiyathira nelaseSardisi nelaseFiladelfi nelaseLawodisiya.”

¹²Ngaphenduka ngabheka ngemuva kulowo owayekhuluma kimi. Kuthe ngiqeda ukuphenduka ngakhangwa yizibani eziyisikhombisa zichwanekwe ezintini ezikhandwe ngegolide.

¹³Phakathi kwazo kwakukhona owayemile efana neNdodana yesintu, evathe ezishaya ezinyaweni, ebophe ngomhizo wegolide ezibeleni.

¹⁴Izinwele zekhanda lakhe zazinjengoboya bemvu obumhlophe qwa, zinjengeqhwa, amehlo akhe ayebheje njengekloba lomlilo.

¹⁵Izinyawo zakhe zazicwazimula njengethushi elishiswe esithandweni somlilo ovutha ubuhanguhangu, nezwi lakhe lahlokoma ngesaho samanzi amaningi.

¹⁶Wayexhake izinkanyezi eziyisikhombisa ngesandla sokunene; emlonjeni wakhe kuvele inkemba ebukhali nxazombili, ukubukeka kwakhe wamengezela waxhophha njengelanga.

¹⁷Ngamuthi klabe qede ngafumbeka phambi kwakhe ngathi ja njengofileyo. Wayeselula isandla esengiphatha ngesokunene esethi: “Mus' ukwesaba! Mina ngingowokuqala nowokugcina

¹⁸nophilayo! Ingani ngangifile, kepha manje sengiphila ungunaphakade. Nginamandla okuvula ngivale ekufeni nasezweni labafileyo.

¹⁹Loba-ke wena ngalokho okubonileyo, okukhona nalokho okuyokwenzeka kamuva.

²⁰Nanso-ke incazelo ngemfihlakalo emayelana nalezizinkanyezi eziyisikhombisa ozibonile ngiziphethe ngesandla sokudla, kanye nezibani eziyisikhombisa zegolide, kumi kanje: Izinkanyezi eziyisikhombisa ziyizingilosi ezimele amabandla ayisikhombisa, nezibani eziyisikhombisa ziyilawamabandla ayisikhombisa.”

IsAmbulo 2

Kuthunyelwa umkhonzo Efesu

¹“Lobela ingilosi emela ibandla lasEfesu uthi kuyo: “ ‘Lawamazwi angumyalezo ovela kuye ophethe izinkanyezi eziyisikhombisa ngesandla sokunene, ohamba phakathi kwezibani zegolide eziyisikhombisa.

²Ngiyayazi imisebenzi yakho nokukhuthala kwakho nokubekezela kwakho. Ngiyazi ukuthi wena uyehluleka ukubabekezelela ababi. Wabavivinya labo abathi bona bangabaphostoli kepha bengesibo, wagcina ubabhadamile ukuthi kanti baqamba amanga.

³Unesineke wena, uhlushelwe ukuba ngowami wangadikibala.

⁴Nokho kukhona engingakwenameli kuwe: Wena awusangithandi njengasekuqaleni, usudambile.

⁵Cabanga-ke ngokuthi uze uwe nje udilikephi. Phenduka ezonweni zakho ubuye wenze owawukwenza ekuqaleni. Uma ungaphenduki, ngiyofika kuwe ngikwamuke isibani sakho ngisigudluze endaweni yaso.

⁶Kodwa kukhona into eyodwa engiyincoma kuwe yokuthi, uyayizonda imisebenzi yamaNikholawo, nami imbala engiyizondayo.

⁷“ ‘Onendlebe akezwe ukuthi uMoya oyiNgcwele ukhuluma uthini emabandleni! “ ‘Onqobayo ngiyomnika ilungelo lokudla izithelo zomuthi wokuphila otshalwe ePharadisi likaNkulunkulu.’

Kuthunyelwa umkhonzo eSmirna

⁸“Lobela ingilosi emele ibandla laseSmirna uthi kuyo: “ ‘Lokhu kungumyalezo ovela kuye ongowokuqala nowokugcina, owafayo waphinde waphila futhi.

⁹Ngiyazazi izinsizi zakho, nobuswezi bakho ngiyabazi — kodwa-ke eqinisweni lonke wena unothile. Ngiyazazi nezinto ezimbi abakunukubeza ngazo laba abazibiza ngokuthi bangamaJuda bengesiwo; empeleni bayiqembu lakwaSathane.

¹⁰Ningazesabi izinhlupheko enisazodlula kuzo. Niyabona, uSathane usazonivivinya ngokunifaka ejele, kodwa izinsuku zokuhlupheka kwenu ziyokuba yishumi kuphela. Yethembekani kimi ngisho sekuthiwa niyabulawa, kulapho-ke ngiyonivuza khona ngomqhele wokuphila.

¹¹“ ‘Onendlebe akezwe ukuthi uMoya ukhuluma uthini emabandleni! “ ‘Ukufa kwesibili akuyumenza lutho lowo onqobayo.’

Kuthunyelwa umkhonzo ePhergamo

¹²“Lobela ingilosi emele ibandla lasePhergamo uthi kuyo: “ ‘Ngumlayezo lona ovela kulowo ophethe inkemba ebukhali esika nxazombili.

¹³Ngiyakwazi lapho uhlala khona, lapho uSathane emise khona isihlalo sakhe sobukhosi. Wena wethembekile kimi, awuliphikanga igama lami nalapho sekubulawa uAntiphasi ufakazi wami othembekileyo, ebulawelwa lapho kuzinze khona uSathane.

¹⁴Kunezintwana ezithile ongikhononisa ngazo: Kukhona abathile lapho phakathi kwenu asebethatheke qede balandela izifundiso zikaBhalamu, yena lowo owafundisa uBhalakhi ukuba ayengele abakwaIsrayeli ekoneni, ebahunga ukuba bazikholise ngezidlo ezinikelwe ezithixweni, wabuye wabahuhela emanyaleni obufebe.

¹⁵Kanjalo-ke futhi kukhona nabanye phakathi kwenu abalandela izifundiso zamaNikholawo.

16Ngithi phenduka! Uma ungakwenzi lokho ngiyeza kuwe khona manje ngifike ngilwe nalabobantu ngibagwaze ngalenkemba esemlonyeni wami.

17“ ‘Onendlebe akezwe ukuthi ukhuluma uthini uMoya emabandleni! “ ‘Onqobayo ngiyomupha imana ethukusiweyo. Ngiyomnika itshe elimhlophe okulotshwe kulo ibizo elisha elingaziwa muntu, ngaphandle kwalowo olamukelayo yena yedwa.’

Kuthunyelwa umkhonzo eThiyathira

18“ ‘Loba lawamazwi uwabhekise engilosini emele ibandla laseThiyathira uthi kuyo: “ ‘Umlayezo lona uvela eNdodaneni kaNkulunkulu, emehlo ayo avutha ilangabi, enyawo zayo zicwazimula njengethusi lishukuliwe.

19Ngiyayazi imisebenzi yakho. Ngiyalwazi uthando lwakho nokukholwa kwakho nokukhonza kwakho nokubekezela kwakho, nokuthi ukhuthazela kakhulu manje kunakuqala.

20Nokho okungicunulayo kuwena yilokhu: Ubekezelela lomfazi okuthiwa nguJezebhele, ozibiza athi ungumbholofidi. Izifundiso zakhe zedusa izisebenzi zami ukuba zenze amanyala obufebe zidle izidlo eziphakelwe izithixo.

21Ngimnikezile ithuba lokuba aphenduke kulawamanyala akhe, kodwa akavumi.

22Ngizosuke ngimdaklaze phansi okhukhweni lokugula, ngibehlisele ukuhlupheka okukhulu nalabo abaphinga naye, uma bengaphenduki ezenzweni zabo benalomfazi.

23Ngiyolubhubhisa ngembo usapho lwakhe lufe; namabandla onke ase yokwazi ukuthi nginguye ohlola izizindlo nezilokotho zabo bonke abantu, sengiyonivuzwa yilowo nalowo njengokwemisebenzi yakhe.

24“ ‘Nakhu engikusho kini nina baseThiyathira, nina nonke eningasilandelanga lesisifundiso esibi, eningazifundisanga lokho abathi kuyimihlolo ejulileyo kaSathane. Ngithi-ke kini, angiyikunigidlabeza ngeminye imithwalo phezu kwaleyo ekhona.

25Bambelelani kulokho eninakho ningakudedeli ngize ngibuye.

26“ ‘Onqobayo enze intando yami kuze kube sekugcineni, ngiyomupha ilungelo lokubusa izizwe.

27“ ‘Uyakuzibusa ngesandla esiqine njengensimbi aziphahlaze zife okwembiza yebumba, “ ‘njengalokhu nami engiphile lawamandla uBaba.

28Ngiyakumnikeza ikhwezi lokusa.

29“ ‘Onendlebe akezwe ukuthi uMoya ukhuluma uthini emabandleni!’

IsAmbulo 3

Kuthunyelwa umkhonzo eSardisi

¹“Loba ubhekise engilosini emele ibandla laseSardisi uthi kuyo: “ ‘Lawa ngamazwi alowo ophethe imimoya eyisikhombisa kaNkulunkulu kanye nezinkanyezi eziyisikhombisa. Ngiyayazi imisebenzi yakho, ngiyazi ukuthi udume ngokuthi uyaphila kanti ufile.

²Phaphama, usimamise lokho okuseleyo obesekulayela sekuzokufa, ngoba ngiyithola imisebenzi yakho ingaphelele phambi kukaNkulunkulu wami.

³Ake ukhumbule lokho okwamukelisiwe wakuzwa, ukulalele uphenduke ekoneni kwakho. Uma wenqaba ukuphaphama ngizokunyonyobela njengesela, ngeke-ke wazi ukuthi ngiyofika ngasiphi isikhathi kuwe.

⁴Nokho kusekhona abantu abambalwa eSardisi ababengakazingcolisi izevatho zabo; labo-ke bayohamba nami bevathe ezimhlophe ngoba kubafanele.

⁵“ ‘Onqobayo uyovathiswa ngezimhlophe, negama lakhe angisoze ngalesula encwadini yokuphila; ngiyakumvuma phambi kukaBaba naphambi kwezingilosi zakhe.

⁶“ ‘Onendlebe akezwe ukuthi uMoya ukhuluma uthini emabandleni! ’ ”

Kuthunyelwa umkhonzo eFiladelfi

⁷“Nakuyo ingilosi emele ibandla eliseFiladelfi loba-ke uthi: “ ‘Lawa ngamazwi alowo oNgcwele onguYenayena, ophethe isihluthulelo sikaDavide. Lapho evula khona akuvali muntu, nalapho evala khona akuvuli muntu.

⁸“ ‘Ngiyayazi imisebenzi yakho, nokuthi amandla akho mancane, nokho kodwa ubambelele ezwini lami, wangaliphika igama lami uthi awulazi. Ngikuvulele umnyango ongenakuvalwa muntu.

⁹Ake ulalele! Abeqembu lakwaSathane, ohubhukabhejane abazibiza ngokuthi bangamaJuda bengesiwo, ngiyobathobisa beze begaqa bazilahle phambi kwakho. Bayonanela ukuthi ngikuthanda ngempela wena.

¹⁰Uwuhloniphile umyalo wami wabekezela ngesineke, nami-ke ngiyokuhlenga nxa sekufika isikhathi sokuhlupheka esizowehlela wonke umhlaba ukuba labo abawakheleyo bavivinywe.

¹¹Ngiyeza masinyane. Londoloza okuphetheyo, ungawemukwa muntu umqhele wakho.

¹²“ ‘Onqobayo ngiyomenza insika ethempelini likaNkulunkulu wami, angaphinde adede kulo. Ngiyoloba kuye ibizo likaNkulunkulu wami, negama obizwa ngalo umuzi kaNkulunkulu wami, iJerusalema elisha eliyokwehla livela kuNkulunkulu wami ezulwini. Ngiyobuye ngilobe kuye igama elisha engibizwa ngalo.

¹³“ ‘Onendlebe akezwe ukuthi uMoya ukhuluma uthini emabandleni! ’ ”

Kuthunyelwa umkhonzo eLawodisiya

¹⁴“Loba ubhekise engilosini emele ibandla laseLawodisiya uthi kuyo: “ ‘Yiwo lomlayezo ovela kulowo okuthiwa nguAmeni, ufakazi owethembekileyo noqinisileyo, oyisisusa sayo yonke indalo kaMvelinqangi.

¹⁵Ngiyayazi imisebenzi yakho, ngiyazi ukuthi wena kawushisi kawubandi. Ngithanda sengathi ungamane ubande noma ushise.

¹⁶Njengoba awushisi kanti futhi awubandi kodwa uyisivivi, ngizokuphimisa uphume emlonyeni wami.’

¹⁷Uyazinweba uthi: ‘Nginothile, ngizinqwabele umnotho angiswele lutho.’ Awuboni ukuthi nguwe kanye obuswezi odabukisayo. Umpofu uphuphuthekile, futhi uhlabule.

¹⁸Ngikweluleka-ke ukuba uthenge kimi igolide elicolwe ngomlilo, ukuze ucebe. Thenga nezingubo ezimhlophe wembathe ufihle ihlazo lobunqunu bakho. Thenga isimonyo ongasininda emehlweni akho ukuze ubone.

¹⁹Ngiyabalaya ngibajezise bonke engibathandayo. Ngakhoke khuthazela uphenduke!

²⁰Nakhu lapha ngimi ngasemnyango ngiyangqongqotha! Uma kukhona olizwayo izwi lami avule emnyango ngiyongena ngidle naye, naye adle nami.

²¹“ ‘Onqobayo ngiyomnika ilungelo lokuhlala kanye nami esihlalweni sami sobukhosi, njengalokhu nami nginqobile, sengihlezi noBaba esihlalweni sakhe sobukhosi.

²²“ ‘Onendlebe akezwe ukuthi uMoya ukhuluma uthini emabandleni!’ ”

IsAmbulo 4

Inkonzo yasezulwini

¹Kulapho-ke ngabheka khona ngabona umnyango ugengelezile ezulwini. Ngase ngizwa izwi limpompoloza njengecilongo, elalowo owayekade ekhuluma kimi, lathi: “Ake uze lapha nce ngikukhombise okuyokwenzeka kamuva!”

²Khona manjalo ngathwetshulwa nguMoya oyiNgcwele ngase ngibona isihlalo sobukhosi ezulwini, kukhona owayehlezi kuso.

³Lowo owayehlezi lapho wayemanyazela ukubukeka kwakhe enjengedayimane netshelegugu elibubende. Isihlalo sobukhosi sasihaqwe uthingo lwenkosazana olwaluluhlaza luthe cwe njengesmaragidu ukubukeka kwalo.

⁴Isihlalo sobukhosi sazungezwa ngezinye izihlalo zobukhosi ezingamashumi amabili nane okwakuhlezi kuzo izigele ezingamashumi amabili nane, zivathe izambatho ezimhlophe, zinqwaze imiqhele yegolide.

⁵Kwakubonakala imibani, kwezwakala nenhlokomo nesaho sobundindindi, kuvela esihlalweni sobukhosi. Kulokhu kuvutha izihlonti zomlilo eziyisikhombisa phambi kwesihlalo sobukhosi, eziyimimoya eyisikhombisa kaNkulunkulu.

⁶Kwase kubonakala ichibi elicwathe njengocwebe, lisalwandle. Isihlalo sobukhosi sasizungezwe nxazonke yizidalwa ezine eziphilayo ezazinamehlo ayemilile emizimbeni yazo ngaphambili nasohlangothini olungemuva.

⁷Isidalwa sokuqala sasifana nengonyama, esesibili sifana neduna, esesithathu sinobuso bomuntu, esesine sifana nokhozi olundizayo.

⁸Lezizidalwa ezine zazinamaphiko ayisithupha ngasinye, embethwe ngamehlo ngaphakathi nangaphandle. Aziphezi ukuhuba imini nobusuku zithi: “Ungcwele, ungcwele, ungcwele uSimakade uMvelinqangi uMninimandla onke, owayevele ekhona nokhona manje nozayo.”

⁹Kuthi njalo lapho lezizidalwa zimdumisa zimkhonza zimbongela lowo ohlezi esihlalweni, yena ophila phakade naphakade,

¹⁰izigele ezingamashumi amabili nane zithi vumbe phansi zingqulele lowo ohlezi esihlalweni, zimkhonza yena ophila phakade naphakade, ziphonsa imiqhele yazo phambi kwesihlalo sobukhosi zithi:

¹¹“Ufanele wena Nkosi yethu Mvelinqangi ukwamukela ubukhosi nodumo namandla, ngokuba nguwena owadala konke; ngentando yakho wakwenza ukuba kube khona kuphile.”

IsAmbulo 5

Umqulu neWundlu lemvu

¹Ngase ngibona umqulu esandleni sokunene salowo owayehlezi esihlalweni sobukhosi, ulotshwe ngapha nangapha kwawo, wawusunanyekwa ngezisicilelo eziyisikhombisa zengcino.

²Ngase ngibona ingilosi enamandla imemezela ngezwi elikhulu ithi: “Ngubani ofanele ukunamulula izisicilelo asombulule umqulu na?”

³Akubangakho muntu ezulwini nasemhlabeni nangaphansi komhlaba owaba namandla okusombulula umqulu kumbe alunguze kuwo.

⁴Ngadinda isililo lapho kungasaveli muntu owayengasombulula umqulu alunguze kuwo.

⁵Kwase kusuka esinye sezigele sesithi kimi: “Ungakhali! Bheka lapha! Lowo oyiNgonyama yomndeni wakwaJuda, ihlumela lempande kaDavide, nguyena onqobile, nguyeye okwazi ukunamulula izisicilelo, asombulule umqulu.”

⁶Ngase ngibona kumi entendeni yesihlalo sobukhosi iWundlu lemvu, lizungezwe yizidalwa ezine eziphilayo nezigele. Kwakusengathi lihlatshiwe. Lalinezimpondo

eziyisikhombisa namehlo ayisikhombisa, ayimimoya eyisikhombisa kaNkulunkulu ethunyelwa kuwo wonke umhlaba.

⁷Laya lawuthatha umqulu esandleni sokudla salowo owayehlezi esihlalweni sobukhosi.

⁸Kuthe lingawuthatha umqulu, izidalwa ezine eziphilayo nezigele ezingamashumi amabili nane zaguqa phambi kweWundlu, sisinye siphethe ugubhu nomcakulo okhandwe ngegolide ugcwele impepho, okuyimikhuleko yabangcwele.

⁹Zase zihlaba ihubo elisha zithi: “Ufanele ukuthatha umqulu unamulule nezisicilelo, ngokuba wena wahlatshwa, abantu wabahlengela uNkulunkulu ngokuchitheka kwegazi lakho, bevela kuyo yonke imindeni nezilimi nezinhlanga nezizwe,

¹⁰wabamisela umbuso wabenza abaphristi bokukhonza uNkulunkulu wethu, bayowubusa umhlaba.”

¹¹Ngabheka ngase ngizwa izwi lezingilosi, izinkulungwane zezigidi ngezigidi. Zazihaqe isihlalo sobukhosi nezidalwa ezine eziphilayo nezigele.

¹²Zahuba ngezwi elikhulu zithi: “IWundlu elahlatshwayo lifanele ukwamukela umbuso nomcebo, ukuhlakanipha namandla, ukuhlonishwa nodumo nokubongwa.”

¹³Ngakuzwa konke okudaliweyo okusezulwini nasemhlabeni nangaphansi komhlaba nasolwandle, konke okukhona, kuthi: “Lowo ohlezi esihlalweni sobukhosi akabongwe kanye neWundlu, ahlonishwe adunyiswe abuse phakade naphakade!”

¹⁴Izidalwa ezine eziphilayo zenanela zathi: “Ameni,” nezigele zaguqa phansi zakhuleka.

IsAmbulo 6

Izisisicilelo

¹Ngase ngilibona iWundlu linamulula isisicilelo sokuqala kweziyisikhombisa, kwase kukhuluma esinye sezidalwa ezine eziphilayo, sisho ngezwi elezwakala njengokuduma kwezulu, sithi: “Phuma!”

²Ngithe ngibona kwase kuba khona ihhashi elimhlophe. Ingibeli yalo yayiphethe umcibisholo, yayisinikezwa umqhele wokunqoba, yaphuma ingenqobayo ukuba inqobe.

³Kuthe lapho selinamulula isisicilelo sesibili, ngase ngizwa isidalwa sesibili esiphilayo sithi: “Phuma!”

⁴Kwase kuqhamuka elinye ihhashi elibomvu klebhu njengekloba lomlilo. Ingibeli yalo yanikezwa ilungelo lokwephuca umhlaba ukuthula kwawo ukuba abomhlaba babulalane, wayesenikezwa inkemba enkulu.

⁵Kuthe lapho linamulula isisicilelo sesithathu ngezwa isidalwa sesithathu esiphilayo sithi: “Phuma! ” Ngase ngibheka. Nakho-ke sekuqhamuka ihhashi elimnyama, ingibeli yalo iphetha ngesandla isilinganiso sesisindo.

⁶Ngase ngizwa okufana nezwi lomuntu phakathi esijwini sezidalwa ezine eziphilayo lithi: “Kothengiswa imbenge kakolweni ngohlamvu olulodwa lwemali ekhandwe ngesiliva, nezimbenge ezintathu zikabhali ngohlamvu olulodwa. Kodwa ungawoni amafutha newayini! ”

⁷IWundlu lase linamulula isisicilelo sesine, ngezwa isidalwa sesine sithi: “Phuma! ”

⁸Ngabheka ngase ngibona ihhashi elimbala walo limthuqu, igama lengibeli yalo kwathiwa nguKufa; walandelwa nguGoqanyawo. Banikezwa amandla phezu kwengxenye yesine yomhlaba, ukuba babulale abantu ngempi nangendlala nangembo nangezilwane zasendle.

⁹Lapho selinamulula isisicilelo sesihlanu ngabona phansi kwelathi imiphefumulo yalabo ababekade bebulawelwe izwi likaNkulunkulu belifakazela.

¹⁰Bamemeza ngezwi elikhulu bathi: “Wo Nkosi Somandla, wena ongcwele noqinisileyo, sekuyoze kube nini ubehlulele ukhokhise ngegazi lethu kwabomhlaba abasibulalayo na? ”

¹¹Base benikwa ingubo emhlophe emunye, kwathiwa ake baphumule kancane, kuze kuphelele isibalo sezinceku abakanye nazo nesabazalwane ababesazobulawa njengabo.

¹²Kuthe lapha selinamulula isisicilelo sesithupha ngabheka. Nakho-ke ukuzamazama komhlaba okwesabekayo, ilanga lafiphala laba mnyama njengesidwashu, inyanga yabheja yabomvu njengegazi.

¹³Izinkanyezi zaqathaka esibhakabhakeni zawela emhlabeni njengomkhiwane uvuthuka izithelo zawo eziseluhlaza uma sekubhenguza isiphepho.

¹⁴Isibhakabhaka sanyamalala sasongwa njengomqulu ugoqwa, nezintaba neziqhingi zagudluzwa ezindaweni zazo.

¹⁵Amakhosi omhlaba nababusi nezikhulu, izicebi neziphathimandla nabo bonke abantu, izigqili nabakhululekileyo, bonke bazifihla emihumeni nangaphansi kwamadwala eziweni.

¹⁶Bamemeza izintaba namadwala bathi kuwo: “Ake nidilikele phezu kwethu nisisithe emehlweni alowo ohlezi esihlalweni sobukhosi, nasolakeni lweWundlu.

¹⁷Usuku olwesabekayo lwentukuthelo yabo lufikile. Ngubani ongalumela na? ”

IsAmbulo 7

Izinkulungwane zakwalsrayeli zishaywa uphawu

¹Emva kwalokhu ngabona izingilosi ezine zimi emagumbini omane omhlaba, zibambe imimoya yomine yomhlaba, ukuba kungavunguzi moya ezweni kumbe elwandle, kumbe uphethethe kwasihlahla.

²Ngase ngibona enye ingilosi yenyuka ngasempumalanga, iphethethe isisicilelo sokushaya uphawu lukaNkulunkulu ophilayo. Yamemeza ngezwi elikhulu ikhuza izingilosi ezine ezazinikwe amandla okwenzakalisa umhlaba nolwandle,

³ithi kuzo: “Ningawulimazi umhlaba nolwandle nemithi singakalushayi uphawu ebunzini lezincedu zikaNkulunkulu wethu.”

⁴Ngase ngizwa ukuthi bangaki ababeshaywe uphawu; babeyizinkulungwane eziyikhulu elinamashumi amane anane, bevela emindenini yonke yamadodana kalsrayeli.

⁵Izinkulungwane eziyishumi nambili zavela emndenini wakwaJuda, izinkulungwane eziyishumi nambili zavela emndenini wakwaRubheni, izinkulungwane eziyishumi nambili zavela emndenini wakwaGadi.

⁶Izinkulungwane eziyishumi nambili zavela emndenini wakwa-Asheri, izinkulungwane eziyishumi nambili zavela emndenini wakwaNaftali, izinkulungwane eziyishumi nambili zavela emndenini wakwaManase.

⁷Izinkulungwane eziyishumi nambili zavela emndenini wakwaSimiyoni, izinkulungwane eziyishumi nambili zavela emndenini wakwaLevi, izinkulungwane eziyishumi nambili zavela emndenini wakwaIsakhari.

⁸Izinkulungwane eziyishumi nambili zavela emndenini wakwaZabuloni, izinkulungwane eziyishumi nambili zavela emndenini wakwaJosefa, izinkulungwane eziyishumi nambili zavela emndenini wakwaBhenjamini.

Izindimbane eziqhamuka ezizweni ngezizwe

⁹Emva kwalokhu ngabheka ngabona isinyokotho soquqaba olukhulu lwabantu ababengenakubalwa ubuningi babo, bevela kuzo zonke izizwe nemindeni nezinhlanga nezilimi, bemi phambi kwesihlalo sobukhosi naphambi kweWundlu, bembethe izevatho ezimhlophe bephethe amahlamvu esundu ngesandla

¹⁰bememeza ngezwi elikhulu bethi: “Insindiso ivela kuNkulunkulu wethu ohlezi esihlalweni sobukhosi nakulo iWundlu.”

¹¹Izingilosi zonke zema zahaqa isihlalo sobukhosi nezigele nezidalwa ezine eziphilayo. Base bewa bonke bethi mbo ngobuso phambi kwesihlalo sobukhosi badumisa uMvelinqangi,

¹²bethi: “Ameni. Ukubongwa nokudunyiswa nokuhlakanipha nokutiswa nokuhlonishwa nokubusa namandla ngokukaNkulunkulu wethu phakade naphakade. Ameni.”

¹³Esinye isigele sangibuza sathi: “Bangobani laba abevathe ezimhlophe, bavelaphi na?”

¹⁴Ngase ngithi: “Uyazi wena nkosi.” Sase sithi kimi: “Yibo laba abavela ekuhluphekeni okukhulu. Bazihlanzile izingubo zabo bazenza zaba mhlophe ngegazi leWundlu.

¹⁵Kungakho bemi phambi kwesihlalo sobukhosi bukaNkulunkulu bemkhonza imini nobusuku ethempelini lakhe. Lowo ohlezi esihlalweni sobukhosi uyobafukamela abavikele ngobukhona bakhe.

¹⁶Abasayikulamba, abasayikoma abasayikushiswa yilanga noma isivuthevuthe.

¹⁷Ngokuba iWundlu eliphakathi nendawo yesihlalo sobukhosi liyakubelusa libaholele emanzini okuphila okuphakade, uNkulunkulu abesule zonke izinyembezi emehlweni abo.”

IsAmbulo 8

Isisicilelo sesikhombisa nesigobongo segolide

¹Kuthe lapho iWundlu linamulula isisicilelo sesikhombisa kwathula kwathi cwaka ezulwini kwaze kwankathi .

²Ngase ngibona izingilosi eziyisikhombisa ezijinge zimi phambi kukaNkulunkulu, zase zinikezwa amacilongo ayisikhombisa.

³Kwasuka enye ingilosi eyayiphethe isigobongo sokushisa impepho esikhandwe ngegolide, yeza yema ngaselathini. Yanikezwa impepho eningi ukuba iyenezelele emikhulekweni yabangcwele bonke, iyethule elathini legolide elihlala njalo limise phambi kwesihlalo sobukhosi.

⁴Umusi wempepho owethulwa ingilosi wenyukela phambi kukaNkulunkulu uxubene nemikhuleko yabangcwele.

⁵Ingilosi yathatha isigobongo sempepho yasigcwalisa ngomlilo waselathini, yasijwiba emhlabeni. Kwezwakala ubundindindi nokukleklebula kokuduma, kwanyazima umbani kwamazama umhlaba.

Amacilongo

⁶Izingilosi eziyisikhombisa ezaziphethe amacilongo ayisikhombisa zalungela ukuwabetha.

⁷Ingilosi yokuqala yalibetha icilongo. Kwawa isichotho nomlilo uxubene negazi phezu komhlaba. Kwashiswa ingxenye yesithathu yomhlaba nengxenye yesithathu yezihlahla nakho konke okungutshani kwasha kwangqongqa.

⁸Yayisibetha ingilosi yesibili, kwabonakala isizemazema esifana nentaba, silephuka umlilo sathiwa gqumbu olwandle. Ingxenye yesithathu yolwandle yaphenduka igazi,

⁹nengxenyeye yesithathu yezinto eziphilayo olwandle yafa, nengxenyeye yesithathu yemikhumbi yaphihlizwa.

¹⁰Ingilosi yesithathu yabetha icilongo. Kwaqathaka inkanyezi enkulu ivela emkhathini, ivutha ilangabi njengesihlanti somlilo, yaze yayowela engxenyeni yesithathu yemifula neziphethu zamanzi.

¹¹Igama laleyonkanyezi lithiwa nguMhlonyane. Ingxenyeye yesithathu yamanzi yaphenduka yababa njengomhlonyane, kwase kufa abantu abaningi abawaphuzayo lawomanzi, ngoba ayesethakwe ngobuthi.

¹²Ingilosi yesine yayisilibetha icilongo layo, kwase kushaywa ingxenyeye yesithathu yelanga, kwashaywa nengxenyeye yesithathu yenyanga nengxenyeye yesithathu yezinkanyezi, konke lokhu kwafiphala ingxenyeye yesithathu yakho, akwaze kwakhanya ngokugqama, akubange kusaba khona ukukhanya engxenyeni yesithathu yosuku, nakanjalo nasengxenyeni yesithathu yobusuku.

¹³Ngase ngibheka ngezwa ukhozi lundizela phakathi nomkhathi luklabalasa luthi: “Maye! Maye! Maye! Bazokubona bakubelethe abantu bomhlaba lapho amacilongo asasilele ekhala, njengoba esazobethwa yizingilosi ezintathu nje!”

IsAmbulo 9

¹Yayisilibetha icilongo ingilosi yesihlanu, ngabona inkanyezi eyayiqathake emkhathini iwela emhlabeni; yanikezwa amandla okuvula ivale umgodini ongulasha.

²Inkanyezi yawuvula umgodini wakwalasha, kwase kwenyuka isikhatha sentuthu engangeyesithando somlilo omkhulu, yenyuka intuthu kwafiphala ilanga nomkhathi wasithakala.

³Kwase kuthushuka izinkumbi zivela entuthwini zathelekela umhlaba. Zaziphiwe amandla okuqosela njengofezela basendle.

⁴Zakhuzwa kwathiwa mazingoni lutho oluwutshani bomhlaba kumbe naluphi uhlaza olumilayo, kwasihlahla lesi, kodwa kwathiwa mazisukele kuphela abantu abangashaywanga uphawu lukaNkulunkulu emabunzini abo.

⁵Zavunyelwa kuphela ukubahanqaza abomhlaba izinyanga eziyisihlanu, kodwa zingababulali. Ubuhlungu bakhona babunjengokutinyela kukafezela, lapho eqosela umuntu.

⁶Ngalezozinsuku abantu bayofisa ukufa, kodwa ukufa kungenzeki kubo, bayothanda ukuba bafe, kepha ukufa kuyobabalekela.

⁷Ukubukeka kwazo izinkumbi kwakufana nokwehhashi lidlubhele impi. Emakhanda azo zazingqaze ngezinto ezithi azifuze umqhele wegolide, ubuso bazo babufana nobabantu.

⁸Izinwele zazo zazifuze amagoda esimame; amazinyo azo ayefana nawezingonyama.

⁹Zazinezingcwecwe ezazifana nokhethe olwaluvikele izifuba zazo. Amaphiko azo ayebanga umsindo owawungangoweziqola zamahhashi amaningi ehlangabezana nempi.

¹⁰Zazinemisila njengofezela, nezindosi; amandla azo okulimaza abantu izinyanga eziyisihlanu asemisileni yazo.

¹¹Inkosi ebusa phezu kwazo yingilosi eyona ibusa emgodini wakwalasha, egama layo kuthiwa nguAbhadoni ngesiHebheru, bese kuthiwa nguApholiyoni ngesiGriki.

¹²Usizi lokuqala selwedlulile, kepha-ke bheka kusazofika ezinye ezimbili.

¹³Yayisibetha icilongo layo ingilosi yesithupha, ngase ngizwa izwi liqhamuka ezimpondweni ezine zelathi legolide eliphambi kukaNkulunkulu.

¹⁴Lalithi kulengilosi yesithupha eyayiphethe icilongo: “Ake ukhulule izingilosi ezine ezilokhu zibanjiwe ngasemfuleni omkhulu iYufathe!”

¹⁵Zase zidedelwa-ke izingilosi ezine ezazikade zibanjiwe zilindele sona lesisikhathi nosuku lolo nenyanga yona leyo nonyaka wona lowo ukuba zibulale ingxenye yesithathu yohlanga lwesintu.

¹⁶Ngase ngaziswa ukuthi mangaki amabutho ayeyizinkweli zamahhashi: ayeyizigidi ezingamakhulu amabili.

¹⁷Ngawabona kanjalo-ke amahhashi embonweni wami nabagibeli bawo: babegqoke izinkethe ezinogqinsi ezifubeni zabo. Umbala wazo wawubomvu njengomlilo, uluhlaza njengesibhakabhaka sekuhlwile, uliphuzi njengesibabule. Amakhanda amahhashi ayefana nezinhloko zamabhusesi, kujinge kuphuma umlilo nentuthu nesibabule emilonyeni yawo.

¹⁸Kwabulawa ingxenye yesithathu yesintu ibhujiswa ngalezizinhlupho ezintathu: ngomlilo nangentuthu nangesibabule okwakuphuma emilonyeni yawo.

¹⁹Amandla alawamahhashi asemilonyeni nasemisileni yawo, imishoba yawo injengezinyoka, inamakhanda okuyiwona alimaza ngawo.

²⁰Abantu abayinsali abangafanga kulezizinhlupho abazange baphenduke bashiye imiphuhle yezithixo abazenzele yona, bayeke ukukhothamela imimoya emibi, bakhonze izithixo zegolide nezesiliva nezethusi nezamatshe nezokhuni ezingakwazi ukubona kumbe zizwe ngendlebe zihambe ngonyawo.

²¹Abaphendukanga ezonweni zabo zokubulala nokuthakatha nokwenza amanyala obufebe nokweba.

IsAmbulo 10

Ingilosi nomqulu omncane

- ¹Ngase ngibona enye ingilosi enamandla amakhulu yehla ezulwini, izigubuzele ngefu yasho ngothingo lwenkosazana phezu kwekhanda layo, ubuso bayo bunjengelanga, nemilenze yayo injengezinsika zomlilo.
- ²Ngesandla sayo yayiphethe umqulu omncane uvuliwe. Yayisigxamalaza unyawo lwayo lwesokudla yalubeka olwandle, olwesinxele yalubeka emhlabeni.
- ³Yamemeza ngezwi elikhulu elezwakala njengokubhodla kwezingonyama. Kuthe lapho ikhonya kwaye kwenanela ukuduma okukasikhombisa.
- ⁴Lapho ukuduma sekusho kasikhombisa, ngase ngicuthela ukuloba, kepha ngezwa izwi livela ezulwini lithi kimi: “Kuvalele esifubeni lokho okukhulunywe ukuduma okukasikhombisa, ungakulobi phansi!”
- ⁵Ingilosi engayibona igxamalaze phezu kolwandle nomhlaba yaphakamisa isandla sokunene yasikhomba ezulwini.
- ⁶Yafunga igama likaMvelinqangi ophilayo phakade naphakade, owadala izulu nakho konke okukulo, nomhlaba nakho konke okukuwo nolwandle nakho konke okukulo. Yayisithi ingilosi: “Akusezukulitshalwa!”
- ⁷Kuyothi lapho ingilosi yesikhombisa isibetha icilongo layo, bese uNkulunkulu elifeza lonke iqhinga lakhe eliyimfihlo alisophile alazisa izinceku zakhe abaphrofethi.”
- ⁸Lelozwi engangikade ngilizwa livela ezulwini laphinda futhi lathi kimi: “Hamba uthathe umqulu ovulekileyo osesandleni sengilosi egxamalaze phezu kolwandle nomhlaba.”
- ⁹Ngaya kuyo ingilosi ngafike ngayicela ukuba inginike umqulu. Isithi kimi: “Uthathe uwudle! Uzobaba esiswini sakho, kodwa ube mtoti njengoju emlonyeni wakho.”
- ¹⁰Ngawuthatha-ke umqulu omncane esandleni sengilosi ngawudla. Waba mnandi njengoju emlonyeni wami, kodwa kuthe lapho ngiqeda ukuwudla wangiphendukela wababa esiswini.
- ¹¹Kwase kuthiwa kimi: “Kumele uphinde umemezele isiphrofetho esiqondene nezizwe eziningi nezinhlanga nezilimi namakhosi.”

IsAmbulo 11

Ofakazi ababili

- ¹Nganikwa induku yokulinganisa efana nothi kwathiwa: “Ake ulinganise ithempeli nelathi likaNkulunkulu, ubale nalabo abasonta kulona,

- ²kodwa ungayilinganisi inkundla engaphandle kwethempeli. Yiyeke ngoba inikelwe abezizwe abangakhulwayo abayowunyathela lomuzi ongcwele izinyanga ezingamashumi amane nambili.
- ³Ngiyothumela ofakazi bami ababili bembethe amasaka, bafike baphrofethe izinsuku eziyinkulungwane enamakhulu amabili namashumi ayisithupha.”
- ⁴Ofakazi laba bayiyo leminqumo emibili nemiphini emibili yezibani emi phambi kukaSimakade iNkosi yomhlaba.
- ⁵Uma kukhona olinga ukubalimaza, kuvele kuqhamuke ilangabi liphume emilonyeni yabo libhubhise izitha zabo; yilowo nalowo ozama ukubenzakalisa uyobulawa kanjalo.
- ⁶Banamandla okuvala izulu lingavezi mvula ngesikhathi besaphrofetha. Baphiwe ilungelo lokubusa phezu kweziphethu zamanzi, ukuba bawaguqule abe yigazi; baphiwe namandla okushaya umhlaba noma ngayiphi inhlupho baphindelele ngokuthanda kwabo.
- ⁷Kuyothi lapho sebefakazile baqeda kwenyuke isilo siphume kwalasha sibahlasele. Siyobehlula bese sibabulala.
- ⁸Izidumbu zabo ziyondindiliza emgwaqweni walomuzi omkhulu lapho iNkosi yabo yabethelwa khona esiphambanweni. Ibizo lalomuzi ngokomoya kuthiwa uyiSodoma neGibithe.
- ⁹Abantu bazo zonke izinhlanga nemindeni nezilimi nezizwe bayogqolozela izidumbu zabo izinsuku ezintathu nengxenye. Bayokwala ukuba lezizidumbu zingcwatshwe.
- ¹⁰Abantu bomhlaba bayojabula bangcingcize ngokubulawa kwalaba ababili, ngenxa yokwenama kwabo baze bakhonzelane ngeziphu, ngoba lababaphrofethi babekade beyiva enyameni kwabomhlaba.
- ¹¹Kodwa emva kwezinsuku ezintathu nengxenye kwangena kubo umoya ophilisayo uvela kuNkulunkulu, base bevuka gubhu. Bonke labo abababonayo behlelwa ukwesaba okukhulu.
- ¹²Laba ababili bezwa izwi elikhulu livela ezulwini lithi: “Yenyukani nize lapha! ” Base benyukela ezulwini ngodumo lwefu, izitha zabo zibukela.
- ¹³Maduze nje kwase kudikizela umhlaba ngesankahlu esibi, kwadilika ingxenye yeshumi yomuzi, kwafa abantu abayizinkulungwane eziyisikhombisa kulokhokuzamazama. Insali yabantu yangenwa yingebhe yayisiphakamisa udumo lukaNkulunkulu wezulu.
- ¹⁴Isigemegeme sesibili sesidlulile, kodwa nakho-ke! Kusazovela enye inhlekelele yesithathu maduze nje.

Icilongo lesikhombisa

¹⁵Ingilosi yesikhombisa yayisibetha icilongo layo, kwase kuzwakala amazwi ahlokomayo ezulwini ethi: “Umbuso wasemhlabeni usuphenduke umbuso kaSimakade iNkosi yethu nomgcotshwa wakhe, useyobusa phakade naphakade.”

¹⁶Izigele ezingamashumi amabili nane eziqhwakela ezihlalweni zazo zobukhosi phambi kukaNkulunkulu zawa zathi mbo ngobuso zabongela uMvelinqangi

¹⁷zathi: “Siyakubonga Simakade Mvelinqangi Mninimandla, wena okhona nowawuvele ukhona, ngoba usuzithathele isikhundla samandla akho amakhulu usuqalile nokubusa.

¹⁸Abezizwe babethukuthela kabi, kanti lena yinkathi yokuba kufike ulaka lwakho nokuba abafuleyo behlulelwe, isithuba sokuba uvuze izinceku zakho abaphrofethi nabangcwele nabesaba igama lakho, abantukazana kanye nezikhulu, kubhujiswe ababhubhisa umhlaba.”

¹⁹Ithempeli likaNkulunkulu elisezulwini lavuleka lathi gengelezi, kwase kubonakala umphongolo wesivumelwano usethempelini. Kwase kuklwebha imibani, kwezwakala imisindo nokukleklebula kokuduma kwezulu, kwadikizela umhlaba, kwawa isichotho esesabekayo.

IsAmbulo 12

Owesifazane nenkanyamba

¹Kwabonakala isigameko esikhulu emkhathini: nango owesifazane, isembatho sakhe kuyinhlamvu yelanga, inyanga idilingene phansi kwezinyawo zakhe, enqwaze umqhele wezinkanyezi eziyishumi nambili.

²Kwase kusondele isikhathi sokuba abelethe, wakhala wadzuluka ngoba wayesefikelwe izinhlungu nemihelo.

³Kwavela esinye isibonakaliso emkhathini. Nanso-ke inkanyamba ibonakala, ufelebakazi wenyandezulu ebomvu, enamakhanda ayisikhombisa nezimpondo eziyishumi, enemiqhele eyisikhombisa emakhanda akhe.

⁴Ngomsila wakhe wawohloza ingxenye yesithathu yezinkanyezi zezulu, wazidilizela emhlabeni. Inkanyamba yayisijamela owesifazane owayesezobeletha, ukuba ishwabadele ingane yakhe lapho eseyizala.

⁵Wazala ingane yomfana, leyo eyobusa zonke izizwe ngesandla esiqine njengensimbi, kepha ingane yowesifazane lona yahlwithwa yasiwa kuNkulunkulu esesihlalweni sakhe sobukhosi.

⁶Owesifazane wabalekela ehlane, endaweni ayilungiselwa uNkulunkulu, lapho eyokondliwa khona inkulungwane yezinsuku nezinsuku ezingamakhulu amabili namashumi ayisithupha.

⁷Kwabheduka impi ezulwini, lapho uMikhayeli nezingilosi zakhe elwa nenkanyamba. Yalwa-ke inkanyamba inezingilosi zayo,

- ⁸kodwa yehlulwa, leliqembu lase liphelelwa yindawo yokuhlala ezulwini.
- ⁹Ufelebakazi wenkanyamba wehliselwa ezansi, uqobo lwenyoka endala ebizwa kuthiwe inguHodoba noSathane, umkhohlisi womhlaba wonke — wantshingwa emhlabeni, nezingilosi zakhe zachithwa kanye naye.
- ¹⁰Ngase ngizwa izwi elikhulu ezulwini lithi: “UNkulunkulu wethu usesisindisile, angawakhe amandla nombuso, nelungelo lokubusa ngelomgcotshwa wakhe. Ngoba ummangaleli wabazalwane bethu wehliselwe emhlabeni; kade ayebamangalela imini nobusuku phambi kukaNkulunkulu wethu.
- ¹¹Bamnqobile ngamandla egazi leWundlu nangezwi abaqinisa ngalo belifakazela. Bakudela ukuphila kwabo kwaze kwaba sekufeni.
- ¹²Makujatshulwe kuleli laphezulu, nithokoze nonke nina kulo! Kodwa nakho kuwe mhlaba nawe lulwandle! Nango uSathane ehlela kinina, uthukuthele uyabila ngoba uyazi ukuthi isikhathi asinikiweyo sifuphi kakhulu.”
- ¹³Kuthe ukuba inkanyamba ibone ukuthi iqunjwe phansi yawela emhlabeni yayisihubha owesifazane obesand' ukuzala ingane yomfana.
- ¹⁴Owesifazane khona manjalo wayesenikwa amaphiko amabili okhozi olukhulu ukuba andizele endaweni yakhe ehlane, lapho eyokondliwa khona iminyaka emithathu nengxenye, ephephile engasenukhlaselwa yinyoka.
- ¹⁵Inyoka yasuka lapho yabholokoqa amanzi ngomlomo agobhoza njengomfula ukuba asibekele owesifazane, ukuze izikhukhula zamanzi zemuke naye.
- ¹⁶Kepha umhlaba wamelekelela owesifazane ngokukhamisa umlomo wawo wagwinya amanzi ayeqhamuka emlonyeni wenkanyamba.
- ¹⁷Inkanyamba yamthukuthelela owesifazane yawotha ubomvu, yayisuka njalo isiyohlasela insali yomndeni wesifazane, bonke labo abalalela imiyalo kaNkulunkulu, babambebele kuleloqiniso elafakazelwa uJesu.
- ¹⁸Inkanyamba yayisiqhinqa ogwini lolwandle.

IsAmbulo 13

Izilo ezimbili

- ¹Ngase ngibona isilo senyuka siphuma olwandle. Sasinezimpondo eziyishumi namakhanda ayisikhombisa, uphondo ngalunye lunqwaze umqhele wamakhosi, kulotshwe amabizo enhlamba emakhanda aso.
- ²Isilo engasibonayo sasifana nengwe, izidladla zaso zifana nezebhele, umlomo waso ufana nowebhubesi. Inkanyamba yathwesa isilo amandla, yasiqhwakelisa esihlalweni sayo sobukhosi, yasinikeza ilungelo layo lokuphatha elalikhulu kakhulu.

- ³Enye yezinhloko zesilo yayinengozi eyayithi ayiyibulale, kodwa lelinxeba lase lipholile. Umhlaba wonke wamangala wawusuqala usulandela isilo.
- ⁴Abantu bakhulekela inkanyamba, ngoba ithwese isilo amandla. Basikhulekela naso isilo bethi: “Ngubani ongangesilo, ngubani ongase alwe naso na?”
- ⁵Isilo savunyelwa ukuba sibholokoqe amagama amakhulu amabi ahlambalaza uMvelinqangi, savunyelwa ukuba sibuse isikhathi esiyizinyanga ezingamashumi amane nambili.
- ⁶Sase siqala-ke sikhapha amazwi ahlambalaza igama likaMvelinqangi nendlu yakhe engcwele kanye nabo bonke abahlala ezulwini.
- ⁷Savunyelwa ukulwa nabangcwele sibehlule, saphiwa amandla phezu kwayo yonke imindeni nezizwe nezilimi nezinhlanga.
- ⁸Bonke abantu abakhe emhlabeni bayosikhothamela, yilowo nalowo ogama lakhe lingabhalisiwe encwadini yokuphila engeyeWundlu elahlatshwayo kusukela ekudalweni komhlaba.
- ⁹Onendlebe akezwe!
- ¹⁰Uma kukhona ozothunjwa, uya ekuthunjweni; uma kukhona ozobulawa ngenkamba ubulawa ngenkamba. Abangcwele mababekezele bakhombise ukukholwa kwabo!
- ¹¹Ngase ngibona esinye isilo senyuka sivela emhlabathini. Sasinezimpondo ezimbili njengewundlu, kodwa sikhulumisa okwenkanyamba.
- ¹²Sisebenzisa igunya lesilo sokuqala sibukela. Senza ukuba umhlaba nabo bonke abawakheleyo bakhothamele isilo sokuqala, lesi esinxeba laso lase lipholile.
- ¹³Isilo sesibili sigila imilingo eminingi, senza ngisho nomlilo ukuba wehle ezulwini uqathakele emhlabeni, abantu bonke bebukela.
- ¹⁴Silutha bonke abantu abahlala emhlabeni ngemigilingwane esinikezwe ukuba siyenze, isilo sokuqala sibukela. Sibatshele bonke abantu bomhlaba ukuba babumbe isithixo esingumfanekiso wesilo sokuqala esikade sigwazwe ngenkamba salimala, kodwa nokho saphila.
- ¹⁵Isilo sesibili savunyelwa ukuba siphefumulele isithixo esingumfanekiso wesilo sokuqala, ukuze lesisithixo esingumfanekiso wesilo sikhulume sibulale bonke labo abenqaba ukusikhonza.
- ¹⁶Isilo senza ukuba bonke abantu, abantukazana nezikhulu, abanothile nabampofu, abakhululekileyo nezigqila, bashaywe uphawu ezandleni zabo zokunene kanye nasemabunzini abo.
- ¹⁷Akukho muntu ovunyelwe ukuthenga kumbe athengise uma engenalolophawu. Luyigama lesilo, kumbe isibalo esimele lelogama.

¹⁸Kufuneka ubuhlakani kulokhu. Lowo onomqondo akazibonele ukuthi ithini incazelo ngesibalo sesilo, ngoba lesisibalo simele igama lomuntu. Isibalo singamakhulu ayisithupha namashumi ayisithupha nesithupha.

IsAmbulo 14

Ihubo labahlengiweyo

¹Ngase ngiphonsa amehlo entabeni iZiyoni, ngabona iWundlu limi khona nezindimbane zabantu abayizinkulungwane eziyikhulu namashumi amane anane ababebhaliswe igama lalo nelikaYise emabunzini abo.

²Ngezwa imvunge ivela ngasezulwini ihlokoma njengamanzi amaningi, izwakala njengokukleklebula kokuduma kwezulu okwesabekayo. Imvunge engayizwayo yayinesigubudu sezingubhu zibethwa ngabadlali.

³Babemi phambi kwesihlalo sobukhosi nezidalwa ezine eziphilayo nezigele, behaya ihubo elisha elalingeke lafundwa muntu ngaphandle kwalaba abayizinkulungwane eziyikhulu namashumi amane nane abahlengiweyo emhlabeni.

⁴Yibo laba abalokhu bemsulwa bengazange bazingcolise ngesifazane. Balandela iWundlu baye noma kuphi lapho liya khona, laba bahlengwe ebantwini, bayingqalabutho kaMvelinqangi neWundlu.

⁵Ilaka labo alikaze liqambe manga, kabanasici.

Izingilosi ezintathu nemilayezo yazo

⁶Ngase ngibona enye ingilosi indiza emkhathini wezulu, iphethe ivangeli laphakade eyayizolishumayela kubantu bomhlaba, kuzo zonke izizwe nemindeni nezilimi nezinhlanga.

⁷Yamemeza ngelikhulu yathi: “Mesabeni uNkulunkulu niphakamise udumo lwakhe! Isifikile manje inkathi yokuba ehlulele. Guqani phambi kwakhe nimkhonze, unguMvelinqangi owadala izulu nomhlaba nolwandle neziphethu zamanzi.”

⁸Kwase kulandela ingilosi yesibili eyandulelwa ngeyokuqala, yathi: “Liwile, liwile iBhabhiloni lodumo, lona elacakulela izizwe zonke zadakwa isiphuzo senkanuko yobufebe balo!”

⁹Kwase kulandela enye ingilosi yesithathu impongoloza ngezwi elikhulu ithi: “Oyolokotha nje aguqele isilo nesithixo esingumfanekiso waso, ashaywe uphawu lwaso ebunzini lakhe noma esandleni sakhe,

¹⁰uyominya isiphuzo esiyintukuthelo kaMvelinqangi asichatheka sinjalo singaxutshwe nalutho, wasetha eqhageni lolaka lwakhe. Lababantu bayotshwelezwa ngomlilo nangesibabule, kubukela izingilosi ezingcwele neWundlu.

¹¹Umusi womlilo wokuhlushwa kwabo wenyuka phakade. Kabanakhefu lokuphumula imini nobusuku, laba abaguqela isilo basikhonze sona kanye nesithixo esingumfanekiso waso, nabo bonke labo abashaywe uphawu oluyigama laso.”

¹²Abangcwele mababekezele, labo abagcina imiyalo kaNkulunkulu belokhu benamathele kuJesu ngokukholwa.

¹³Ngezwa izwi livela ezulwini lithi: “Loba uti: ‘Kusukela manje babusisiwe abafileyo abafa benamathele eNkosini.’ ” — “Yebo babusisekile,” sekusho uMoya oyiNgcwele, “sebeyophumula emshikashikeni wabo, ngoba imisebenzi yabo ibaphelekezela.”

Isivuno somhlaba

¹⁴Ngase ngibheka ngabona ifu elimhlophe, kuqhwakele kulo othile ofana neNdodana yesintu, enqwaze ngomqhele wegolide ekhanda lakhe, ngesandla ephethe isikela elibukhali.

¹⁵Sekuqhamuka enye ingilosi ivela ethempelini impongoloza ngezwi elikhulu ibhekise kulowo owayehlezi phezu kwefu ithi: “Bamba isikela lakho uvune, ngoba isikhathi sokuvuna sesifikile, nesivuno somhlaba sesihlezi silindele ukuqoqwa.”

¹⁶Lowo ohlezi phezu kwefu wayeselenca ngesikela emhlabeni, umhlaba wavunwa.

¹⁷Kwathushuka enye ingilosi ivela ethempelini lasezulwini, ngesandla iphethe isikela elibukhali.

¹⁸Kwase kuvela enye ingilosi ithushuka elathini, iyingilosi enamandla phezu komlilo, yamemeza ngezwi elikhulu ibhekise kuleyo eyayiphethe isikela elibukhali yathi: “Faka isikela lakho elibukhali, ufule amahlukuzo esivini somhlaba, ngoba izithelo zaso sezivuthiwe.”

¹⁹Ingilosi yayisilenca ngesikela layo emhlabeni, yaqoqa isivuno somhlaba, yasiphonsa esikhamweni esikhulu sewayini esiwulaka lukaMvelinqangi.

²⁰Isikhamo sanyathelwa ngaphandle komuzi, kwaphophoza igazi liphuma kuso laba ngumfula owenyuka waze wafinyelela emikhaleni yamahashi, waqeda ibanga lamakhilomitha angamakhulu amathathu.

IsAmbulo 15

Izingilosi eziphethe izinhlupho zokugcina

¹Ngase ngelamela esinye isimanga ezulwini, sisikhulu sikhaxisa umlomo; kwakuyizingilosi eziyisikhombisa lezo ezaziza nezinhlupho eziyisikhombisa ezingezokugcina njengoba ulaka lukaNkulunkulu seluyogcina ngazo.

²Ngase ngibona ichibi elicwathe njengocwebe lisalwandle lixubene nomlilo. Labo ababesinqobile isilo nesithixo esingumfanekiso waso nesibalo esimele igama laso,

ngababona bemi ngasocwebeni olusalwandle besingethe izingubhu abazinikwe uNkulunkulu.

³Base behlaba ihubo likaMose inceku kaNkulunkulu, kanye nehubo leWundlu, behaya bethi: “Mikhulu iyababazeka imisebenzi yakho, wena Simakade Mvelinqangi Mininimandla. Zilungile ziqotho izindlela zakho, wena Ngonyama yezizwe.

⁴Ngubani ongekwesabe Nkosi, adumise igama lakho na? Ngoba nguwe wedwa ongcwele. Izizwe zonke ziyofika zikudumise. Ngoba kuvele kwasobala ukuthi zilungile izahlulelo zakho.”

⁵Kamuva ngabuye ngabona ithempeli eliyidokodo elifakazela ubukhona bukaNkulunkulu livuleke lagengeleza ezulwini.

⁶Kwaphuma kulo izingilosi eziyisikhombisa ziphethe izinhlupho eziyisikhombisa, zevathe ezimhlophe qwa, zibophe ngemihizo yegolide ezibeleni zazo.

⁷Esinye sezidalwa eziphilayo sanikeza izingilosi eziyisikhombisa imicakulo eyisikhombisa ekhandwe ngegolide igcwele ulaka lukaMvelinqangi ophila phakade naphakade.

⁸Ithempeli lagcwala umusi wenkazimulo yobukhosi bukaMvelinqangi namandla akhe. Akubangakho muntu owayengangena ethempelini zingakaphezi izinhlupho eziyisikhombisa zezingilosi eziyisikhombisa.

IsAmbulo 16

Imicakulo yolaka lukaNkulunkulu

¹Ngezwa izwi elikhulu livela ethempelini likhuluma ezingilosini eziyisikhombisa lithi: “Phumani nifike nithulule emhlabeni imicakulo eyisikhombisa yolaka lukaNkulunkulu!”

²Yasuka ingilosi yokuqala, yafike yathulula umcakulo wayo emhlabeni. Khona manjalo kwabheduka izilonda ezimbi nezibuhlungu kabi kubantu abashaywe uphawu lwesilo bekhonza nesithixo esingumfanekiso waso.

³Ingilosi yesibili yathulula umcakulo wayo olwandle, lwaphenduka izingazi ezinjengezomuntu ofileyo, kwase kubhubha konke okuphila elwandle.

⁴Ingilosi yesithathu yathulula umcakulo wayo wachithekela emifuleni naseziphethwini, konke lokhu kwaphenduka igazi.

⁵Ngase ngizwa ingilosi eyengamela amanzi ithi: “Ulungile wena ngalezizahlulelo zakho, wena okhona nowawuvele ukhona wena oNgcwele!

⁶Abantu balichithile igazi labangcwele nabaphrofethi, kungakho-ke ubanika igazi ukuba baliphuze; baliphuza ngakhona, libafanele!”

- ⁷Ngase ngizwa ingilosi ephethe ilathi imemeza ithi: “Wo, Simakade Mvelinqangi Mninimandla, ziqotho zilungile izahlulelo zakho!”
- ⁸Ingilosi yesine yathulula umcakulo wayo enhlamvini yelanga, lase livunyelwa ukushisa abantu ngesivuthevuthe salo.
- ⁹Basha-ke abantu begazingwa ukushisa okukhulu, baze balithuka igama likaMvelinqangi oyena wayenamandla phezu kwalezizinhluho; kabazange baphenduke badumise uMvelinqangi.
- ¹⁰Ingilosi yesihlanu yayisithulula owayo umcakulo yawuthela esihlalweni sobukhosi besilo, umbuso wesilo wawusumbozwa yisigayegaye sobumnyama; kukuleyonkathi lapho abantu bazigeva khona ulimi ngenxa yeminjunju ababeyizwa.
- ¹¹Base bemthuka uNkulunkulu wezulu ngenxa yeminjunju nezilonda, kepha abazange baphenduke bazisole ngemisebenzi yabo emibi.
- ¹²Eyesithupha ingilosi yachitha owayo umcakulo emfuleni omkhulu iYufrathe, kwaye kwasha onke amanzi esithebeni somfula ukuze kuwele kahle amakhosi aqhamuka empumalanga.
- ¹³Ngase ngibona imimoya emithathu engcolileyo ifuze izingxangxa isimo sayo. Yayiphuma emlonyeni wenkanyamba nasemlonyeni wesilo nasemlonyeni wombholofidi wamanga.
- ¹⁴Lokhu kuyimimoya yamadimoni agila izimanga. Lemimoya yomithathu ibabela kuwo wonke amakhosi omhlaba ukuwabutha ukuba avivele impi eyolwa mhla wosuku olukhulu lukaMvelinqangi uMninimandla.
- ¹⁵“Qaphani-ke! Ngiza nginyonyoba njengesela! Ubusisiwe lowo ongalele buthongo, yena eqaphela izingubo zakhe ingaze ahambe ehlabule ahlebeke ubunqunu bakhe!”
- ¹⁶Imimoya yayisiyiphaka-ke impi yamakhosi yaqhinqa emfundeni ebizwa ngesiHebheru kuthiwe kuseMagidoni.
- ¹⁷Ingilosi yesikhombisa yachitha umcakulo wayo emkhathini. Kwase kuzwakala izwi elikhulu livela esihlalweni sobukhosi esisethempelini lithi: “Sekwenzakele!”
- ¹⁸Kwase kubaneka imibani, kwaba khona ubundindindi nezaho zokuduma, nokuzamazama okwesabekayo. Akukaze kube khona ukuzamazama kwaloluhlobo selokhu abantu baba khona, ngendlela okungandile ngayo lokhukuzamazama.
- ¹⁹Umuzi omkhulu wadilika iminxo emithathu, kwachitheka amanxuluma ezizwe ebhidlika. UNkulunkulu wayeselikhumbula iBhabhiloni lodumo, waliphuzisa iqhaga eligcwele isiphuzo sonya lolaka lwakhe.
- ²⁰Iziqhingi zonke zacela empunzini, izintaba zajubalala kazabonwa.

²¹Kwaqathaka izinguzunga zamatshe esichotho ayesinda ngangomthofu awela kubantu evela esibhakabhakeni, baze bamqalekisa uMvelinqangi ngenxa yobumuncu bohlu pho lwesichotho. Loluhlupho lwesabeka okokufa.

IsAmbulo 17

Ukujeziswa kwesifebe samanyala

¹Kweza kimi enye yezingilosi eziyisikhombisa ezaziphethe imicakulo eyisikhombisa ikhuluma kimi ithi: “Woza ngikukhombise ukuthi lesisifebekazi samanyala siyojeziswa kanjani, lesi esithe bhadla phezu kwamathantala amanzi amaningi.

²Amakhosi omhlaba ayegila naso imikhuba yesinene, kwaze kwadakwa abantu bomhlaba ngoba bephuza iwayini lobufebe baso.”

³UMoya oyiNgcwele wawusungithatha ngesihlwathi wemuka nami wangithi cababa ehlane lapho ngabona khona owesifazane eqhwakele phezu kwesilo esibomvu esasembethe amagama enhlamba elotshwe emzimbeni waso, sinezinhloko eziyisikhombisa nezimpondo eziyishumi.

⁴Owesifazane wayevathe ezibukhwebezane nezibomvu klele, ehlobe ngegolide nobuhlalu namatshe akwanokusho. Ngesandla wayephethe indebe yegolide okwakugcwele kuyo amanyala onke nokungcola kokuhlobonga kwakhe.

⁵Ebunzini lakhe kwakulotshwe ibizo elinemfihlakalo ejulileyo lithi: “IBhabhiloni lodumo, unina wabo bonke onondindwa namanyala onke omhlaba.”

⁶Ngase ngimbona owesifazane edakwe yigazi labangcwele negazi lalabo abafela ukholo ngenxa kaJesu. Kuthe lapho ngimbona ngakhexa umlomo.

⁷Kepha ingilosi isithi kimi: “Umangaliswa yini kangaka na? Ngizokutshela imfihlakalo yalona wesifazane, kanye neyesilo esimthweleyo esimakhanda ayisikhombisa nezimpondo eziyishumi.

⁸Isilo osibonileyo sasikhona siphila, kodwa asisaphili manje; sesizophinda sikhuphuke kwalasha, sithi singaphuma khona bese sibhujiswa sipele. Abantu abakhele umhlaba abamagama abo angabhaliswanga encwadini yokuphila kusukela ekudalweni komhlaba bayomangala babambe ongenzansi lapho bebuka isilo. Sake saba khona saphila, kepha manje siyalandulwa asisawadli anhlamvana, kepha siyobuye sivele sibe khona.

⁹“Lento ingaqondwa kuphela umuntu onobuchopho nobuhlakani. Izinhloko eziyisikhombisa zingamagquma ayisikhombisa, lawo aqhwakele kuwona owesifazane. Angamakhosi futhi ayisikhombisa.

¹⁰Ayisihlanu awo awasabusi, sekubusa enye, lena enye ayikafiki kepha sekuyothi lapho isifika ibuse isithutshana nje.

¹¹Isilo lesi esasiphila kodwa asabe sisaba khona saphila, uqobo lwaso siyinkosi yesishiyagalombili, singenye yalawa ayisikhombisa, kodwa siyadlula siyophetha ngencithakalo siqedwe.

¹²“Izimpondo eziyishumi ozibonile zingamakhosi ayishumi abengakemukeliswa ubukhosi ukuba abuse, kepha asazonikwa ilungelo lokuba abe ngamakhosi oselwa, abuse isikhathi esifishane kanye nesilo.

¹³Bonke laba banenhloso eyodwa, banikeza isilo amandla abo nelungelo labo lokubusa.

¹⁴Bazoyiphaka balwe neWundlu, kepha iWundlu liyoyilwa kanye nabakhethiweyo balo, abalandeli balo abethembekileyo, linqobe, ngoba liyiNkosi yamakhosi, iNgonyama ebusa phezu kwababusi.”

¹⁵Ingilosi isithi kimi: “Amathantala amanzi owabonayo okuthe bhadla kuwo isifebekazi samanyala, ayizizwe nezindimbane zabantu nezinhlanga nezilimi.

¹⁶Izimpondo eziyishumi ozibonileyo, zona zikanye nesilo ziyosizonda isifebe; ziyosenza sibe lusizi zisihlubule sibe nqunu, zisidle izicubu zomzimba zisiqothule ngomlilo.

¹⁷Ngoba uNkulunkulu ukubekile ezinhliziyweni zazo ukuba zifeze inhloso yakhe, lokho ezikwenzayo zikwenze ngamqondo munye, zinikeze isilo amandla azo okubusa, aze afezeke amazwi kaNkulunkulu.

¹⁸“Owesifazane ombonileyo uyilowomuzi wodumo oguqelwa ngamakhosi omhlaba uwabuse.”

IsAmbulo 18

Ukuwa kweBhabhiloni

¹Kuthe sekudlulile lokhu ngabona enye ingilosi yehla ivela ezulwini, Yayinamandla amakhulu, iphetha; ubucwebecwebe bayo bamanyazelisa wonke umhlaba wathi nge.

²Yaklabalasa ngelikhulu yathi: “Liwile! Liwile iBhabhiloni lodumo, seliphenduke laba ngumthunzi wokuphumula amadimoni, inqabakucasha yemimoya yonke engcolileyo. Seliyisidleke okukhosela kuso zonke izinyoni ezingcolileyo, umphandu wezilwane zonke ezingcolileyo nezenyanyekayo.

³Ngoba izizwe zonke zidakiwe isiphuzo senkanuko yobufebe balo. Amakhosi omhlaba aphinge nalo, nabahwebi bomhlaba bachumile banethezeka ngengebo yalo.”

⁴Ngezwa elinye izwi livela ezulwini lithi: “Phumani niphela bantu bami, phumani nilishiye. ningathinti lutho lwezono zalo, hleze nehlelwe nani yizinhlu pho elijeziswa ngazo.

- ⁵Izono zalo sezinqwabelane zakhuza phezulu ezulwini. UNkulunkulu wakukhumbula ukonakala kwalo.
- ⁶Zikhokhiseleni kulo njengoba lalenza kini, nilivuze ngokuphindwe kabili ngenxa yemisebenzi yalo emibi. Lichathekeleni ngokuphindwe kabili ukuba liliphuze liliminye leliqhaga elaliligayele nina!
- ⁷Lalihleze lizibusisa litamasa kakhulu, ngakhoke lihanqazeni ngangokuzitika kwalo ningaliyeki lize lilile! Ngoba lilokhu liqhalaza lithi: ‘Ngiyindlovukazi nginethezekile ngiyabusa, angiyena umfelokazi, angisoze ngalubona usizi.’
- ⁸Ngakhoke ziyolithelekela izinsizi zalo lube lunye, kungene imbo kukhuze isililo, kubhoke indlala, liyoze lishiswe nangomlilo, ngoba unamandla uSimakade uMvelinqangi olahlulelayo.
- ⁹“Amakhosi omhlaba, lawo akade ehlobonga nalo ezenamisa ngalo, ayolila alikhalele lapho ebona kwenyuka umusi womlilo olibhubhisayo.
- ¹⁰Ayoqhela ame buqamama ephethwe yitwetwe lokubukela lihlushwa. Ayothi: “ ‘Khalani niwulilele lomuzi wodumo! Wena muzi wamandla waseBhabhiloni, usuwehlulelwe kwaba kanye ngomzuzu owodwa.’
- ¹¹“Abahwebi bomhlaba bayakhala bayalililela ngoba akusekho muntu othenga impahla emikhunjini yabo:
- ¹²igolide nesiliva, amatshe engcebo nobuhlalu, izindwangu zakwanokusho ezibukhwebezane nosilika obomvu klebhu, izinhlobonhlobo zokhuni olunamakha, nezinhlobo zempahla eqoshwe ngophondo lwendlovu nangezigodo zemithi ebizayo nangethusi nensimbi netshensikazi elimhlophe,
- ¹³isinamoni nezinye izinongo zokudla, impepho nezimonyo zokuzekhatha nenhlaka, iwayini nephehlwa leminqumo, impuphu nokolweni, izinkomo nezimvu, amahhashi nezinqola, izigqila nemiphefumulo yabantu imbala.
- ¹⁴“Isithelo obusilangazelela sisukile kuwe, nazo zonke izicoficofi nobukhazikhazi kuphelile akunakubuye kutholakale kuwe.
- ¹⁵“Abahwebi abathengisa ngalezizimpahla ababezuya ngalomuzi bayomela buqamama bewesabela lomuzi ekuhlushweni kwawo, bekhala besho ngesililo esikhulu
- ¹⁶bethi: “ ‘Maye! Maye ngalelinxulumakazi lodumo elalevatha ezimhlophe zodwa nezibukhwebezana nezibomvu klebhu, lihlobe ngegolide nangamatshe engcebo nangobuhlalu.
- ¹⁷Ngomzuzwana nje wonke lomnotho usuvele washabalala waphela.’ “Bonke abaphathi bemikhumbi nalabo abantweza elwandle namatilosu nabo bonke abahweba baziphilise elwandle babemi kude,

¹⁸badazuluka bakhala lapho bebona umusi wokusha kwalo bathi: ‘Yimuphi umuzi owake wangangalelinxulumakazi na?’

¹⁹Base bezithela ngothuli emakhanda bakhala balila bathi: “ ‘Maye! Maye! Siyalikhalela lelinxuluma lodumo elanonthisa bonke ababeqhuba imikhumbi elwandle, ngokunethezeka kwalo. Selidiliziwe laba ngamanxiwa ngomzuzwana nje.’

²⁰“Ngingcizani ngokubhubha kwalo nina eniphezulu, nina bangcwele nabaphostoli nabaphrofethi, ngoba uNkulunkulu ulahlulele wanikhokhisela kulo.”

²¹Kwasuka ingilosi enamandla yaqukula itshe elingangenguzunga yetshe lokugaya, yaliphonsa olwandle ithi: “Liyojikijelwa ngesihluku esinjena iBhabhiloni umuzi wodumo, lingaphinde libonwe.

²²Akuseyuphinde kuzwakale kuwe umsindo wezingubhu nephimbo labahlabeleli nabadlali bemitshingo nababetha amacilongo. Ingcweti ehlananiphele noma yimuphi umsebenzi wezandla ngeke isaba khona kuwe. Umsindo obangwa yitshe lokugaya ngeke uphinde uzwakale ngaphakathi kwezingange zakho.

²³Ngeke kuphinde kukhanye ukukhanya kobhaqa kuwe. Umsindo wokusina kodwendwe awuseyukuzwakala kuwe. Abahwebi bakho babeyizikhulu zomhlaba, walutha zonke izizwe ngobuthakathi bakho.

²⁴Kulomuzi kwachithwa igazi labaphrofethi nelabangcwele nelabo bonke ababulawayo emhlabeni.”

IsAmbulo 19

¹Emva kwalokho ngezwa okwakuthi akufane nokuhlokoma kwephimbo lesixuku esikhulu ezulwini kuthi: “Haleluya, dumisani uSimakade! Insindiso nobukhosi namandla angakaNkulunkulu wethu.

²Izahlulelo zakhe ziqotho zilungile, ngoba usahlulele isifebe samanyala esawonakalisayo umhlaba ngamanyala obufebe baso, wazikhokhisela kuso ngenxa yegazi lezinceku zakhe.”

³Baphinda bamemeza bathi: “Haleluya! Umusi wokusha kwaso wenyuka phakade naphakade!”

⁴Izigele ezingamashumi amabili nane nezidalwa ezine eziphilayo zamguqela uMvelinqangi zamkhonza lowo ozinze esihlalweni sobukhosi zithi: “Ameni. Haleluya!”

Umshado weWundlu

⁵Kwezwakala izwi livela esihlalweni sobukhosi lithi: “Dumisani uNkulunkulu wethu nina zinceku zakhe, nina enimesabayo, bantukazana nezikhulu!”

⁶Ngase ngizwa izwi elalithi alibe ngelesixuku esikhulu, lifuze inhlokomu yamanzi amaningi nomsindo wokuduma okukhulu, limemeza lithi: “Haleluya! Uyabusa uSimakade, uNkulunkulu wethu uMninimandla.

⁷Asithokoze sijabule, siphakamise udumo lwakhe, ngoba umshado weWundlu usufikile, nomlobokazi walo usezilungiselele.

⁸Unikeziwe ukuba agqoke ezimhlophe ezikhazimulayo nezimsulwa.” Ezimhlophe ziyimisebenzi elungileyo yabangcwele.

⁹Ingilosi yathi kimi: “Loba uthi: ‘Babusisiwe labo abamenywe edilini lomshado weWundlu.’” Yayisithi ingilosi: “Lawamazwi kaNkulunkulu aqinisile.”

¹⁰Ngamguqela phansi ukuba ngimkhonze, kodwa wathi kimi: “Ungakwenzi! Ngiyinceku kanye nawe nabazalwane ababambelela kuleloqiniso elafakazelwa uJesu. Guqela uNkulunkulu umkhonze, ngoba iqiniso elafakazelwa uJesu yilona elingumoya oqhubezela abaphrofethi.”

Ingibeli yehashi elimhlophe

¹¹Ngabona izulu livulekile, kwase kuba khona ihhashi elimhlophe. Ingibeli yalo ibizwa ithiwe oThembekileyo noQinisileyo; wehlulela alwe izimpi zakhe ngokulunga.

¹²Amehlo akhe ayenjengamalangabi omlilo, ekhanda lakhe kunemiqhele eminingi eyaye inqwazwe amakhosi. Wayenegama elalilotshiwe kuye, kodwa lingenakwaziwa muntu ngaphandle kwakhe kuphela ukuthi lithiwani.

¹³Isiphuku ayesembethe sasikade sicwiliswe egazini. Igama abizwa ngalo lithiwa yiZwi likaNkulunkulu.

¹⁴Amaviyo asezulwini amlandela, egibele amahhashi amhlophe evathe ezimhlophe ezihlanzekileyo.

¹⁵Emlonyeni wakhe kwakuvele inkemba ebukhali ayonqoba ngayo izizwe. Uyozibusa ngesandla esiqine njengensimbi, anyathele isikhamo sewayini esiwulaka olwesabekayo lukaMvelinqangi uMninimandla.

¹⁶Esiphukwini sakhe maqondana nethanga lakhe kwakulotshwe igama elithi: “INGonyama ebusa phezu kwababusi, iNkosi yamakhosi.”

¹⁷Ngase ngibona ingilosi imi ehlamvini yelanga. Yamemeza ngezwi elikhulu yabhekisa ezinyonini zonke ezindiza emkhathini wezulu yathi: “Wozani niqoqane edilini elikhulu uMvelinqangi anihlabele lona.

¹⁸Nizozitika ngenyama yezidumbu zamakhosi nezinduna namaqhawe, inyama yezinjomane nezingibeli zazo, inyama yabo bonke abantu, abakhululekile nezigqila, abantukazana nezikhulu.”

¹⁹Ngasibona isilo namakhosi omhlaba namaviyo abo beviva ukuba balwe nalowo owayegibele ihhashi bahlasele impi yakhe.

²⁰Sase sibanjwa isilo saboshwa kanye nombholofidi wamanga owayekade egila phambi kwaso imimangaliso ayelutha ngayo labo ababeshaywe uphawu lwesilo baguqela nesithixo esingumfanekiso waso. Laba bobabili baphonswa bezwa echibini lomlilo ovutha isibabule.

²¹Abasala lapho bacekwa ngenkemba yalowo ogibele ihhashi, inkemba ivele emlonyeni wakhe. Izinyoni zayidla zaze zayibuka inyama yezidumbu zabo.

IsAmbulo 20

Iminyaka eyinkulungwane

¹Ngase ngibona ingilosi yehla ivela ezulwini, iphethe ngesandla isihluthulelo somgodi wakwalasha kanye neketango elikhulu.

²Yayibamba inkanyamba, inyoka endala, uHodoba onguSathane, yambopha ngaleloketango, yamvalela inkulungwane yeminyaka.

³Ingilosi yamphonsa emgodini ongulasha, yawuhluthulela yawusicilela ngengcina ukuze angabuye aluthe izizwe kuze kuphele inkulungwane yeminyaka. Emva kwalokho kumele adedelwe akhululeke okwesikhashana.

⁴Ngabona izihlalo zobukhosi. Labo ababehlezi kuzo banikezwa amandla okwahlulela. Ngabona nemiphefumulo yalabo abanqunywe amakhanda ngoba befakaze ngoJesu bebambebele ezwini likaNkulunkulu, ababengazange basiguqele isilo nesithixo esingumfanekiso waso, abangazange bashaywe nophawu lwaso emabunzini noma ezandleni zabo. Baphila base bebusa noKristu inkulungwane yeminyaka.

⁵Uquqaba lonke lwensali yabafileyo aluzange luphile kwaze kwaphela inkulungwane yeminyaka. Lokhu kungukuvuka kokuqala.

⁶Ubusisiwe ungcwele lowo oyophila ekuvukeni kokuqala! Ukufa kwesibili akunamandla phezu kwalaba, kepha bayoba ngabaphristi bakaNkulunkulu noKristu, bayobusa naye iminyaka eyinkulungwane.

Ukunqotshwa kukaSathane

⁷Kuyothi lapho sekuphele iminyaka eyinkulungwane, uSathane adedelwe ejele lakhe.

⁸Uyophuma akhohlise izizwe ezisemagumbini omane omhlaba ezingoGogi benoMagogi, abavivisele ukulwa impi; ubuningi babo bungangezihlabathi zolwandle.

⁹Yakhukhula impi yabo yadabula umhlaba yafike yahaqa isikhumulo sabangcwele nomuzi othandeka kuNkulunkulu. Kepha kwehla umlilo ezulwini wabaqeda bonke.

¹⁰UHodoba owayebakhohlisile waphonswa echibini lomlilo nesibabule lapho isilo kanye nombholofidi wamanga bekhona, bayohlushwa kwafuthi imini nobusuku.

Ukwahlulela kokugcina

¹¹Ngase ngibona isihlalo sobukhosi esasisikhulu simhlophe, kukhona owayehlezi kuso. Umhlaba nesibhakabhaka kwabaleka phambi kwakhe kwashabalala, akwabe kusabonakala lapho kungatholwa khona.

¹²Ngabona abafileyo, izikhulu nabantukazana, bemi phambi kwesihlalo sobukhosi. Kwavulwa imiqulu, kwaphenywa enye incwadi, eyincwadi yokuphila. Abafileyo behlulelwa njengokwemisebenzi abayenzileyo, njengoba kulotshwe ezincwadini.

¹³Ulwandle lwabenyula bonke ababefele kulo. Ukufa kanye nezwe labaphansi kwakhipha bonke abafileyo ababehleli khona, bonke base behlulelwa njengokwemisebenzi abayenzileyo.

¹⁴Ukufa kanye nezwe labaphansi kwaphonswa echibini lomlilo. Lokhu kungukufa kwesibili, ichibi lomlilo.

¹⁵Lowo ogama lakhe lingatholakalanga encwadini yokuphila waphonswa echibini lomlilo.

IsAmbulo 21

Izulu elisha nomhlaba omusha

¹Ngabona izulu elisha nomhlaba omusha. Izulu lakuqala nomhlaba wakuqala kwase kudlulile, nolwandle lwalungasekho.

²Ngabona umuzi ongcwele, iJerusalema elisha lehla livela kuNkulunkulu ezulwini, lilungiswe ngobunono njengomlobokazi ehlobele umyeni wakhe.

³Ngezwa izwi elikhulu livela esihlalweni sobukhosi lithi: “Indlu engcwele kaNkulunkulu isiphakathi kwabantu. Uyohlala nabo babe ngabantu bakhe; uMvelinqangi uqobo lwakhe uyohlala nabo abe nguNkulunkulu wabo.

⁴Uyobesula zonke izinyembezi emehlweni abo. Ukufa akusayikuba khona, nokulila nokukhala nobuhlungu ngeke kuphinde kube khona, ngoba izinto zakuqala zidlulile.”

⁵Lowo osesihlalweni sobukhosi wayesethi: “Ake nibheke! Ngizenza zonke izinto zibe zintsha.” Wayesethi futhi: “Kulobe lokhu ngoba lawamazwi athembekile ayiqiniso.”

⁶Wathi kimi: “Sekwenziwe! Yimi owokuqala nowokugcina, isiqalo nesiphetho. Owomileyo ngiyomnika ilungelo lokuphuza esiphethwini samanzi okuphila angakhokhi lutho.

⁷Onqobayo uyozuza lelif; mina ngiyoba uNkulunkulu wakhe, yena abe yindodana yami.

⁸Kepha amagwala namahlubuka nabayizonakali nababulali nezihlobongi nabakhunkuli nabakhonza izithixo nabo bonke abaqamba amanga, isabelo sabo sisechibini elivutha umlilo nesibabule, okungukufa kwesibili.”

IJerusalema elisha

⁹Kwase kuza enye yezingilosi eziyisikhombisa eziphethe imicakulo eyisikhombisa egcwele izinhlobo eziyisikhombisa zokugcina yakhuluma yathi kimi: “Woza ngikutshengise umlobokazi, umakoti weWundlu.”

¹⁰UMoya oyiNgcwele wawusungithatha ngesihlwathi, ingilosi yemuka nami yangiyisa entabeni enkulu ende yangikhombisa umuzi ongcwele iJerusalema lehla livela ezulwini kuNkulunkulu,

¹¹Igcwele inkazimulo kaNkulunkulu, ukucwebezela kwalo kunjengokwamatshegugu angandile, njengedayimane licwathe njengocwebe.

¹²Lalihaqwe ugange olukhulu luphakeme lunamasango ayishumi nambili elindwa yizingilosi eziyishumi nambili. Emasangweni kwakulotshwe amagama emindeni eyishumi nambili yamadodana kaIsrayeli.

¹³Kwakunamasango amathathu uhlangothi lulunye: emathathu kulelocala elibheke empumalanga, emathathu eningizimu, emathathu enyakatho, emathathu entshonalanga.

¹⁴Ugange lomuzi lwalwakhelwe phezu kwamatshe ayisisekelo ayishumi nambili okwakulotshwe kuwo amagama abaphostoli beWundlu abayishumi nambili.

¹⁵Ingilosi eyangikhulumisayo yayiphethe induku yegolide yokulinganisa, eyayizolinganisa ngayo umuzi namasango awo nogange.

¹⁶Umuzi wawunezinhlangothi ezine ezazilingana ubude nobubanzi bazo. Ingilosi yawulinganisa umuzi ngenduku yayo yokulinganisa: ubude bawo babungamakhilomitha ayizinkulungwane ezimbili namakhulu amane; ubude bawo bungangobubanzi nokuphakama kwawo.

¹⁷Ingilosi yalulinganisa ugange, lwalungamamitha angamashumi ayisithupha ukuphakama, njengesilinganiso sabantu ezilinganisa ngaso nezingilosi.

¹⁸Ugange lwalwaxhiwe ngedayimane, umuzi wawaxhiwe ngegolide loqobo, licwathe njengocwebe.

¹⁹Amatshe esisekelo sogange ayehlotshiswe ngazo zonke izinhlobo zamatshegugu. Itshe lokuqala laliyidayimane, elesibili liyisafire, elesithathu liyikhalsedoni, elesine liyismaragidu.

²⁰Elesihlanu laliyioniksi, elesithupha liyisardiyu, elesikhombisa liyikhrisolithi, elesishiyagalombili liyibherili, elesishiyagalolunye liyithophazi, eleshumi liyikhrisofrasi, eleshumi nanye liyijasinti, eleshumi nambili liyamethisi.

²¹Amasango ayishumi nambili akhiwe ngamatshe engcebo ayishumi nambili, yilelo nalelosango liyitshe lengcebo ngokwalo. Umgwaqo womuzi ugandaywe ngegolide loqobo, ucwathe njengocwebe.

²²Angizange ngilibone ithempeli phakathi komuzi, ngoba ithempeli lawo linguSimakade uMvelinqangi uMninimandla kanye neWundlu.

²³Lomuzi awudingi kukhanya kwelanga kumbe kwenyanga ukuba kuwukhanyisele, ngoba inkazimulo yobukhosi bukaNkulunkulu iyawukhanyisa, neWundlu liyisibani sawo.

²⁴Izizwe zomhlaba ziyokhanyiselwa yilokhokukhanya lapho zihambayo, amakhosi omhlaba ayoletsa ingcebo yawo ayethule kuwo.

²⁵Amasango omuzi ayohlala egengelezile usuku lonke, awasoze avalwa; ubusuku abusoze baba khona.

²⁶Izizwe ngezizwe ziyokwethula kuwo ingcebo nobukhazikhazi bazo.

²⁷Kodwa akukho okungcolileyo okuyongena, akukho namunye umuntu owenza amanyala noma oqamba amanga oyongena, kuyoba yilabo kuphela ababhaliswe encwadini yokuphila yeWundlu.

IsAmbulo 22

¹Ingilosi yayisingikhombisa umfula wamanzi okuphila ucwathe njengocwebe, uvela esihlalweni sobukhosi bukaNkulunkulu neWundlu.

²Ugobhoza phakathi komgwaqo odabula umuzi. Nxazombili zomfula kwamila isihlahla somuthi wokuphila othela izithelo kashumi nambili ngonyaka, kanye ngenyanga; amaqabunga awo angawokwelapha izizwe.

³Akusayikuba khona lutho oluqalekisiweyo oluyotholakala kulomuzi. Isihlalo sobukhosi bukaNkulunkulu neWundlu siyoba kuwo, nezinceku zakhe ziyomkhonza.

⁴Bayobubona ubuso bakhe, nebizo lakhe liyolotshwa emabunzini abo.

⁵Ubusuku abusayikuba khona; abasadingi kukhanya kwesibani kumbe kwelanga, ngoba iNkosi uNkulunkulu uyoba ukukhanya kwabo, sebeyobusa naye umbuso wafuthi.

UJesu uyeza masinyane

⁶Ingilosi yayisithi kimi: “Ethembekile lawamazwi, ayiqiniso. USimakade uMvelinqangi owabela abaphrofethi uMoya wakhe, wathumela ingilosi ukuba izokhombisa izinceku zakhe lokho okuzokwenzeka masinyane.”

⁷UJesu uthi: “Qaphelani! Ngiyeza masinyane. Ubusisiwe lowo olondoloza amazwi esiphrofetho esilotshwe kulencwadi.”

⁸Mina Johane nginguye owazizwayo wazibona zonke lezizinto. Kuthe lapho sengiqedile ukuzizwa ngazibona, ngayiguqela ukuba ngiyikhonze ingilosi eyayikade ingikhombisa zona,

⁹kepha yathi kimi: “Ungakwenzi lokho! Ngiyinceku kanye nawe nabazalwane bakho abaphrofethi nalabo abawalalelayo amazwi akulencwadi. Guqela uNkulunkulu umkhonze!”

¹⁰Yayisithi kimi: “Ungayisicileli ngencina lencwadi yesiphrofetho, ngoba isikhathi sesisondele.

¹¹Owenza okungalungile akaqhubeke nobubi bakhe, nonamanyala akaqhubeke emanyaleni akhe. Olungileyo akaqhubeke nokulunga kwakhe, nongcwele akabe ngcwele njalo.”

¹²UJesu uthi: “Qaphelani! Ngiyeza masinyane, ngiza ngiphethe umvuzo wami ukuba ngiklomele wonke umuntu njengokwemisebenzi yakhe.

¹³Yimi owokuqala nowokugcina , isiqalo nesiphetho.”

¹⁴Babusisiwe abageza izingubo zabo ukuba banikwe ilungelo lokukha badle izithelo zomuthi wokuphila, bangene kulomuzi ngamasango akhona.

¹⁵Kodwa ngaphandle komuzi kukhona abavalelweyo abayizinja nabathakathi nezihlobongi nababulali nabakhonza izithixo, nabo bonke abakhonze ukuqamba amanga.

¹⁶“Mina Jesu ngiyithumele ingilosi yami ukuba imemezele lezizinto emabandleni. Ngiyihlumela lempande kaDavide, ikhwezi eliqhakaza ngokusa.”

¹⁷UMoya oyiNgcwele nomlobokazi bathi: “Woza! ” Nalowo okuzwayo lokhu akasho athi: “Woza! ” Owomileyo akeze! Othandayo akazithathele amanzi okuphila angakhokhi lutho!

¹⁸Mina Johane ngiyafakaza kuwo wonke umuntu owezwayo lawamazwi esiphrofetho esishiwo kulencwadi, ngithi: Uma kukhona owenezelela utho kuwona, uMvelinqangi uyokwenezelela esijezisweni sakhe izinhlupho ezilotshwe kulencwadi.

¹⁹Uma kukhona onciphisa amazwi esiphrofetho esikulencwadi, uMvelinqangi uyomephuca isabelo sakhe sesithelo somuthi wokuphila, nesabelo sakhe emzini ongcwele okulotshwe ngakho kulencwadi.

²⁰Lowo ofakazayo ngakho konke lokhu uthi: “Yebo kunjalo! Ngiyeza masinyane.” Ameni, akube njalo! Woza Nkosi Jesu!

²¹Abantu bonke ngibafisela umusa ovela eNkosini uJesu.

IsAmbulo

AmaHubo 1

Isigaba sokuqala

Ukuphila komuntu oqotho, nokuphila kwesonakali

- ¹Ubusisiwe umuntu ongazilandeli izeluleko zezonakali, ongahambisani nemikhuba yezoni, engemdibi munye nabahlekisa ngoNkulunkulu,
- ²kepha ethokoza ngezwi likaSimakade, elokhu eletshisa imini nobusuku.
- ³Unjengesihlahla esimila osebeni lomfula esiveza izithelo ngesikhathi sokuthela, esimaqabunga aluhlaza kawabuni. Konke akwenzayo lomuntu kuyachuma.
- ⁴Kodwa-ke izonakali azinjalo; zinjengamakhoba ephephuka nomoya.
- ⁵Ngakhoke izonakali ngeke zema lapho kuqulwa icala esigcawini, zingeke zibe mdibi munye nebandla labantu abalungileyo.
- ⁶INkosi iyinakekele indlela yabaqotho, kepha abahamba ngokonakala bayobhubha.

AmaHubo 2

Ukubekwa kwenkosi engumgcotshwa kaSimakade

- ¹Kungani ukuba izizwe zixokozele, zakhe uzungu, izinhlanga zivungame zihlongoze okuyize na?
- ²Amakhosi omhlaba emi ngezinyawo ahlomile, nababusi babumbene bahlanganyela uSimakade nenkosi ayigcobileyo, bathi:
- ³“Asigqabule izibopho abasibophe ngazo, sidlubulundele ebugqilini abasiphethe ngabo!”
- ⁴Lowo ohlezi ezulwini ubahleka usulu, iNkosi yami ibenza ihlaya nenhlelekisa.
- ⁵Kulowomnyama ibisibavuthela ngolaka lwayo, ibesabise ngesankahlu sayo ithi:
- ⁶“Yimina engayibekayo lenkosi, ngayigcoba ukuba iye ifike ibuse entabeni yami engcwele iZiyoni.”
- ⁷Ngiyonilandisa ngesinqumo sikaSimakade njengoba ekhulume kimi wathi: “Wena uyindodana yami ngikuzele, nginguYihlo kusukela namhlanje.
- ⁸Cela kimi, ngokunika izizwe zibe yifa lakho, ibe ngeyakho imikhawulo yomhlaba,
- ⁹ubabuse ngesandla esiqine njengensimbi, ubaphihlize njengokhamba lombumbi.”
- ¹⁰Ngakhoke nina makhosi qaphelani, babusi bomhlaba lalelani nxa nelulekwa!
- ¹¹Khonzani uSimakade, nimesabe, nasekuthokozeni kwenu anothuthumela.

¹²Khothamani phambi kwendodana hleze ithukuthele nibhubhe ningazelele, ngoba iyoshesha ivuthe ngolaka! Bayadela bonke abakhosela kuSimakade.

AmaHubo 3

Umkhuleko wasekuseni walowo owethembela kuNkulunkulu

Ihubo likaDavide. Walihaya lapho ebalekela indodana yakhe uAbsalomu.

¹Simakade, bangakanani pho abamelene nami! Sebebaningi kakhulu abangivukelayo,

²baningi abafakana imilomo ngami bethi: “Ngeke uMvelinqangi amophule lowo!” *Kunekhefu.*

³Uyisihlangu sami wena Simakade, uyangivikela, ungenza ngibe nesithunzi, uyangisimamisa ngiqine idolo.

⁴Ngangikhala njalo kuSimakade ngimemeze, angiphendule esentabeni yakhe engcwele. *Kunekhefu.*

⁵Ngilala ngize ngizunywe ubuthongo, ngivuke ngisaphila uSimakade engilondile.

⁶Kangibesabi neze noma bengangezihlabathi abamelana nami bengihaqile nxazonke.

⁷Yima ngobumo Simakade, ungisize, ungisindise Nkulunkulu wami! Izitha zami wazihlakaza imihlathi, waze wawohloza amazinyo ezonakali.

⁸Usindiso luvela kuwe Nkosi yami, kubantu bakho wehlisela isibusiso sakho. *Kunekhefu.*

AmaHubo 4

Umkhuleko wakusihlwa walowo owethembela kuNkulunkulu

Elethulwe kumculisi ukuba lihlatshelelwe ngezingubhu; ihubo likaDavide.

¹Ngizwe uphendule lapho ngikhala kuwe wena Nkulunkulu wami ongiphendulelayo! Ubungikhulula njalo sengihluphekile, ngihawukele uzwe umkhuleko wami!

²Nina zikhulundini! Koze kube nini ningihlaza nehliisa isithunzi sami na? Koze kube nini nifunana nokuyize nilandela okungamanga na? *Kunekhefu.*

³Kuhle nazi ukuthi uSimakade uzikhethetele wazehlukanisela olungileyo; uSimakade uyongizwa lapho ngikhala kuye.

⁴Yesabani nithuthumele, niyeke ukona, nizindle buthule ngezinhliziyo zenu nilale nithi cwaka emacansini enu! *Kunekhefu.*

⁵Yethulani imihlatshelo efaneleyo, nihlale nethembela kuSimakade!

⁶Baninge abadamane bethi: “Ngubani ongasivezela okuhle na?” Nkosi sibuke ngobuso bakho obunomusa!

⁷Inhliziyo yami ubuyithokozisa njalo ngenjabulo eyedlula eyalabo abanensada yamabele nemithayi yewayini.

⁸Uhlangothi ngizolubeka phansi ngokuthula ngisheshe ngizunywe ubuthongo, ngoba nguwe wedwa kuphela Simakade ongigcina njalo ungilondolozile.

AmaHubo 5

Elokucela ukuvikelwa

Elethulwe kumculisi ukuba lihlatshelwe ngemitshingo; ihubo likaDavide.

¹Yizwa amazwi ami Simakade, ungizwele lapho ngibubula!

²Nkulunkulu wami, wena Ngonyama Nkosi yami, lalela izwi lami lapho nginxusa ngikhala, ngokuba mina ngikhuleka kuwe.

³Entathakusa uyalizwa izwi lami, ekuseni ngethula isicelo sami, ngihlale ngikulindele Simakade.

⁴UnguNkulunkulu ongathokozi ngokonakala, isoni asisoze sahlalisana nawe.

⁵Abaqholoshayo ngeke bame phambi kwakho, uzenyanya zonke izigilamkhuba.

⁶Nkosi, uyababhuhisa abaqamba amanga, uyamnengwa onequngo noyiqili.

⁷Kepha mina ngingangena endlini yakho ngothando lwakho olukhulu olungapheliyo, ngikuguqele ngesaba, ngikhothamele ngasethempelini lakho elingcwele.

⁸Ngihole Simakade ngokulunga kwakho, ngoba izitha zami zingiqamekele, uyiqondise indlela ongihola ngayo!

⁹Alikho iqiniso emilonyeni yezitha, ezibilinini zazo kukhona ukonakala, umphimbo wazo uyithuna elikhamisileyo, zikhuluma ngolimi olushelelayo.

¹⁰Behlulele Mvelinqangi, ubalahle ngecala, ubenze babhajwe ezihibeni zozungu lwabo! Baxoshe ngenxa yobuningi bezono zabo, ngoba bavukela wena Simakade.

¹¹Bonke abakhosela kuwe abathokoze, bahlokome ngenjabulo ungunaphakade, ubavikele, bahalalise bakudumise lababantu abalithandayo igama lakho!

¹²Nguwe Nkosi obusisa olungileyo, umusa wakho uyisihlangu esimvikelayo.

AmaHubo 6

Elokucela ukhawukelwa ngesikhathi sezinhlopheko

Elethulwe kumculisi ukuba lihlatshelwe ngezingubhu zedotshaba; ihubo likaDavide.

¹Wo Simakade, iNkosi ayidle izibekele, ingangijezisi isithukuthele ibila!

²Yiba nomusa Simakade ungihawukele, ngoba mina sengiphelelwe amandla. Ngiphilise Nkosi, ngishaywa uvalo, amathambo ami ankenketha kabuhlungu,

³umoya wami uyathuthumela kakhulu. Wothalalisa kuze kube nini Simakade?

⁴Bheka ngakimi Nkosi, uhlenge impilo yami; ngisindise ngenxa yesihe sothando lwakho!

⁵Ingani kawukhunjulwa muntu kwelabaphansi, kabakubongi ezweni labafuleyo.

⁶Ngitubekile ngenxa yokugquma kwami, ubusuku bonke ngikhala ezimathonsi, ngimatise ukhukho lwami ngezinyembezi.

⁷Izinhlupheko ziwaqundile amehlo ami, afiphele ayetha ngenxa yezitha zami.

⁸Zigilamkhuba dedani kimi nina nonke, ngoba uSimakade ukuzwile ukulila kwami!

⁹USimakade wangizwa lapho nginxusa, uSimakade wawemukela umkhuleko wami.

¹⁰Zonke izitha zami zojabha zesabe, zijokole isidumo zihlazekele.

AmaHubo 7

Umkhuleko walowo ocela ukuba kugezwe igama lakhe

Ihubo lokulila nentshisekelo elaculelwa uSimakade nguDavide ngenxa kaKhushi wakwaBhenjamini.

¹Wo Simakade! Nkulunkulu wami ngibalekele kuwe, ngophule kwabangizingelayo, ngisindise

²bangaze bangidwengule njengengonyama, ehlwitha kungekho muntu owophulayo.

³Simakade Nkulunkulu wami, uma ngakwenza lokhu: ngangcolisa izandla zami ngenza ububi,

⁴uma ngaphindisa ngokubi kumhlobo wami, ngaphanga isitha sami ngasiphundla —

⁵uma kunjalo ngithi: Angizingelwe yizitha zingibambe, ziyidovadove othulini impilo yami, udumo lwami ziluthele phansi othulini! *Kunekhefu.*

⁶Yima ngobumo Simakade ngolaka lwakho, uvuke ungimele esigcawini, uthiye unya lwabangihluphayo wena mngqamulajuqu owahlulela ngobuqotho!

⁷Uquqaba lwezizwe alukubunganyele, uphakame ubabuse usesihlalweni!

⁸Simakade wena ungumahluleli wezizwe, ake ungithethe ngecala Nkosi yami, ngoba ngimsulwa anginacala.

⁹Qeda ububi bezonakali, kodwa olungileyo ake umsimamise, ngoba wena unguNkulunkulu olungileyo, uvivinya inhliziyo nomphefumulo.

¹⁰UMvelinqangi uyisihlangu esingivikelayo, usindisa abanhliziyo zabo ziqotho.

¹¹UMvelinqangi ungumahluleli olungileyo, uSomandla othukuthelela ububi kwasa.

¹²Nxa abantu bengaphenduki umkhonto uyowulola ansale ugwibisholo lwakhe abanembe,

- ¹³ahlome izikhali ezesabekayo ansale imicibisholo yakhe evutha umlilo.
- ¹⁴Nasi isitha sigaya izibozi zokonakala, simithi inkohliso yodwa, sizala amanga ekugcineni.
- ¹⁵Isitha samba umgodi sawunweba, kepha kwakhalakathela sona kuwona.
- ¹⁶Induku zakhe ziphinda zimshaye, alinyazwe ngubulelesi abuqalile.
- ¹⁷Ngiyombonga uSimakade ngokulunga kwakhe, ngimhubele uSimakade oPhezukonke.

AmaHubo 8

Inkazimulo kaNkulunkulu nesithunzi somuntu

Elethulwe kumculisi ukuba lihlatshelelwe ngogubhu lwaseGathi; ihubo likaDavide.

- ¹E Simakade Nkosi yethu! Yek' igama lakho ukubabazeka kwalo umhlaba wonke! Inkazimulo yakho uyikhombise nasemkhathini.
- ²Ubongelwa yizingane neziyoyo, ngemilomo yazo uzakhele udumo; luyinqaba ethiya abamelene nawe nce kuthuliswe isitha nophindisayo.
- ³Lapho ngibuka isibhakabhaka phezulu, amala ezulu angumsebenzi wezandla zakho, inyanga nezinkanyezi okudale ngobuhlakani,
- ⁴kodwa ubeyini umuntu ungaze umkhumbule, ubeyini nje owasemhlabeni ungaze umnake na?
- ⁵Nokho, umenze wangaphansana nje kunawe Mvelinqangi, wamethwesa umqhele ongubukhosi nodumo,
- ⁶wammisa wabusa konke okudalileyo, wakuhlela konke kwangaphansi kombuso wakhe:
- ⁷impahla yonke, izimvu nezinkomo, ngisho nezilwane zasendle imbala,
- ⁸izinyoni zomkhathi nezinhlanzi zolwandle, konke okuhamba ngemizila yakho olwandle.
- ⁹E Simakade Nkosi yethu! Yek' igama lakho ukubabazeka kwalo wonke umhlaba!

AmaHubo 9

Makabongwe uSimakade ngokulunga kwakhe

Elethulwe kumculisi ukuba lihlatshelelwe ngendlela ethi "Mayife indodana"; ihubo likaDavide.

- ¹Ngiyokubonga Simakade ngenhliziyo yonke, ngilande ngemisebenzi yakho emangalisayo,
- ²ngihlokome ngentokozo ngikuhubele, ngidumise igama lakho wena oPhezukonke.
- ³Izitha zami zahlehliselwa emuva, zakhubeka, zaqothulwa phambi kwakho.

- ⁴Wahlulele kahle wangithetha ngecala usesihlalweni sakho, mahluleli olungileyo.
- ⁵Wajezisa izizwe, wabhuhisa izonakali, igama lazo lashabalala unaphakade.
- ⁶Izitha zaqothulwa kwayihlane lafuthi, wachitha imizi waqotha imbokodo nesisekelo, wayidiliza, kayisaphushwa nakuphushwa.
- ⁷USimakade uhlezi esihlalweni sobukhosi naphakade, wamisa isihlalo sakhe sokuthetha amacala.
- ⁸Uyokwahlulela umhlaba ngokulunga nobuqotho, aqule amacala ezizwe angenzeleli.
- ⁹USimakade uyinqabakucasha yocindezelweyo, inqaba ephakemeyo ngezikhathi zosizi.
- ¹⁰Simakade, abalaziyo igama lakho bethembela kuwe; awubafulatheli labo abakufunayo.
- ¹¹Mhubeleni uSimakade obusa eZiyoni, landani ngemisebenzi yakhe nitshele izizwe!
- ¹²Ungumphindisi ohlawulisa abecala legazi uyabakhumbula abahlushwayo besosizini, uNkulunkulu akakukhohlwa ukukhala kwabo.
- ¹³Ngihawukele Nkosi, ubone nxa bengihlupha abangizondayo, wena ongihlenga ngilengela esiweni samanqe,
- ¹⁴nce ngime enkundleni yomuzi iZiyoni ngikhashe ngezibongo zakho zonke, ngithokoze ngokungisindisa kwakho.
- ¹⁵Abezizwe bazigwaza ngowabo, bacupha ugibe kwase kubhabheka bona.
- ¹⁶USimakade uzikhombisile ukuthi ungubani, wakhipha isinqumo esiqotho esigcawini, wahila isonakali ngemisebenzi yezandla zaso. *Kuculwe ngemvunge. Kunekhefu.*
- ¹⁷Ziyobhubha izonakali ziye kwelabafuleyo, izizwe zonke ezifulathele uMvelinqangi.
- ¹⁸Ompofu kayikulibaleka njalonjalo, obuswezi kayuphelelwa yithemba unomphelo.
- ¹⁹Wo Simakade! yima ngobumo, ungaqonelwa muntu, wahlulele abezizwe esigcawini sakho!
- ²⁰Besabise Simakade, bakwesabe, izizwe ziqonde ukuthi zingabantu nje! *Kunekhefu.*

AmaHubo 10

Elokucela ukuba izikhohlakali zichithwe

- ¹Hhawu Simakade! Yini ukuba uqhelelane nami na? Uzifihlelani ngezikhathi zobunzima?
- ²Isonakali siyaziqhayisa siyazigqaja, sishisekela ukuzingela ohlushwayo; asibhajwe ogibeni esilucuphileyo!
- ³Isonakali sizigabisa ngezinkanuko zaso, nomphangi uyaqanganisa wedelela uSimakade.
- ⁴Isonakali sithwele ikhanda sithi: “Phinde akanakungenza lutho, uNkulunkulu kathintene nami.” Side sizindla kanjalo isonakali.
- ⁵Konke esikwenzayo kuyasilungela, kasihlushwa yizinqumo eziphakemeyo owahlulela ngazo wena Simakade, sibanxaphela bonke abamelene naso.
- ⁶Sihlala sizitshela sithi: “Angisoze ngaphazanyiswa lutho, ngeke ngishaywe mhlaba ngihlupheke.”
- ⁷Sibholokoqa inhlamba, kuziphumele nje ukuqanganisa nenkohliso nokukhahla, umlomo waso umumethe ububi nosizi.
- ⁸Siqamekela ezindaweni ezisithakele zomuzi, abamsulwa sibabulale ekusithekeni, sinyonkoloze lowo esizomlimaza.
- ⁹Sicathama ezindaweni ezisithakele sengathi yisilo siqube ehlozini, sicothele ukubamba ohluphekileyo simbambe, simhudulele ogibeni lwaso.
- ¹⁰Siyakhokhoba, sinyonyobele oyinyamazane yaso, simshaye phansi ngesidlakadla samazipho aso.
- ¹¹Enhliziyweni sithi: “USomandla kanakile, akabhekile kimi, akasoze angibona.”
- ¹²Yima ngobumo Simakade! Nkulunkulu Somandla, bonakalisa amandla esandla sakho, ungakhohlwa ngabahlushwayo abasosizini!
- ¹³Mvelinqangi, kungani ukuba isonakali sikwedelele sithi awunakusenza lutho na?
- ¹⁴Kanti wena uyabona, uqaphela izinhlupheko nosizi, ukuthwale ngesandla sakho esisizayo; okhathazwayo uyazinikela kuwe, nguwena umondli wezintandane.
- ¹⁵Nqamula imisipha yengalo yesonakali, ujezise ababi ngenkohlakalo yabo, iphele ingabe isaphushwa nakuphushwa!
- ¹⁶E Simakade, Bayede Nkosi! uyobusa phakade naphakade, abezizwe babhujiswe ezweni lakho.
- ¹⁷Nkosi, uyakuzwa ukukhala kwabahluphekileyo, wobaqinisa, ubamise isibindi, ubeke indlebe ulalele ukukhala kwabo,
- ¹⁸umele izintandane nabacindezelweyo, ubalwele bathole amalungelo abo, yikhona umuntu owadalwa ngomhlabathi engebuye esesabisa omunye.

AmaHubo 11

USokulunga uyisiphephelo sabaqotho

Elethulwe kumculisi; elikaDavide.

- ¹USimakade ngikhosele kuyena ngaphepha. Pho nibhedlani ningeluleke nithi: “Balekani njengezinyoni ezintuntayo niye ezintabeni zenu niyokhosela,
- ²ngoba izonakali zinsala ugwibisholo, sezicuphe zabeka umcibisholo emnsalweni ukuba zicibe abaqotho ebumnyameni.
- ³Olungileyo akukhonto angayenza nxa izisekelo zobuntu zibhidlikile.”
- ⁴USimakade usethempelini elingcwele kweliphezulu, uSimakade usesihlalweni sobukhosi ezulwini. Ihlo lakhe lihlozinga uhlanga lwabantu, lihlola isintu sonke sakwamhlaba.
- ⁵USimakade uhlolisisa abalungileyo nezonakali, uyabanengwa abathanda ubudlova.
- ⁶Uvuthulukisa amalahle avuthayo, ehlisele isibabule phezu kwezonakali; zicashunelwe isabelo esiyovulayo.
- ⁷USimakade unguSokulunga uthakasela ukulunga, abaqotho bohlala bephambi kobuso bakhe.

AmaHubo 12

Elokucela ukuvikelwa kubantu ababi

Elethulwe kumculisi ukuba lihlatshelelwe ngedotshaba; ihubo likaDavide.

- ¹Wo Simakade sisindise, akusekho bantu abaqotho abaseleyo, abathembekileyo kubantu abasekho.
- ²Bakhohlisana bonkana ngokuyize, bangogedleyihlekisa abathopha ngomlomo, bakhuluma ngenhliziyo embaxambili.
- ³Sengathi uSimakade angalunquma ulimi oluluma luphephethe, avale nemilomo yabazigabisayo!
- ⁴Bayazigabisa ngolimi lwabo bathi: “Sisho umathanda ngezilimi zethu pho iphi leyonkosi ethi ingasiphatha?”
- ⁵INkosi ithi: “Ngiyokuma ngobumo njengoba abahlushwayo baqhewagiwe nabampofu bayabubula bayagqiha, ngimhlenge ophokophelele insindiso.”
- ⁶Amazwi kaSimakade athembekile, afana nesiliva elihlanzekileyo, lahlanjululwa esithandweni kasikhombisa.
- ⁷Nkosi uyolondoloza abahlushwayo, ubavikele phakade kulesisizukulwane.
- ⁸Izonakali zehla zenyuka zibukisa, ububi budlangile phakathi kwabantu.

AmaHubo 13

Elokucela usizo ngesikhathi sezinsizi

Elethulwe kumculisi; ihubo likaDavide.

- ¹Koze kube nini Simakade ulokhu wangikhohlwa unomphela na? Koze kube nini usitheza ubuso bakho ungifulathela na?
- ²Koze kube nini ngicabanga ngizizamela amasu, usizi lungidabula usuku lonke na? Koze kube nini isitha silokhu sibukisa ngami na?
- ³Bheka neno Nkosi Nkulunkulu wami! Ngiphendule ungivuselele amandla bungangizumi ubuthongo bokufa,
- ⁴hleze isitha sithi: “Ashula, ngamehlula!” abayimpi kimi bajabule nginqotshwa.
- ⁵Kepha mina ngokwami ngethembele othandweni lwakho lwafuthi, inhliziyo yongcingciza ngensindiso yakho.
- ⁶Ngiyohlabelela ngikudumise Simakade njengoba ungenzele izinto ezinhle.

AmaHubo 14

Ubuwula nokonakala kohlanga lwabantu

(AmaHubo 53:1-6)

Elethulwe kumculisi; elikaDavide.

- ¹Isiwula sesonakali sizindla sithi: “Akukho Nkulunkulu lapha onake esikwenzayo.” Bonke bonakele benza amanyala, akakho noyedwa owenza okuhle.
- ²USimakade uyasinga esezulwini ubuka abantu emhlabeni phansi ukuthi ukhona yini oqondayo okhuthalele ukufuna uMvelinqangi.
- ³Phinde, baphambukile bonke bahlubukile, bonakele bonke ngothi lwabo, akakho noyedwa owenza okuhle, phinde, akakho noyedwa.
- ⁴Ziyoze zifunde nini izigilamkhuba, bonke laba abaqhobozela abantu bami bebadla sengathi basobozela isinkwa, bebe bengakhuleki kuSimakade na?
- ⁵Nampo kushayana amadolo kubo, ngoba uMvelinqangi umi nabalungileyo.
- ⁶USimakade uyisiphephelo sabahluphekayo noma kuhlekiswa ngezinhlalo zabo.
- ⁷Sengathi eZiyoni kungavela usindiso lwesizwe sakwaIsrayeli! Mhlazana uSimakade eqeda usizi edlisa abantu bakhe ngoludala, impela bayojabula abakwaJakobe, isizwe sakwaIsrayeli sithokoze.

AmaHubo 15

Onelungelo lokuhlala egqumeni elingcwele likaSimakade

Ihubo likaDavide.

- ¹Simakade ngubani onelungelo lokuba ahlale ethempelini lakho, akhe egqumeni lakho elingcwele na?
- ²Yilowomuntu ondlela zakhe zimsulwa, lowomuntu owenza okulungileyo. Umoya wakhe umi eqinisweni,

³ulimi lwakhe kaluhlebi, kalunukubezi. Akoni muntu, akaphathi kabi omunye, akamtheli ngehlazo umakhelwane wakhe.

⁴Akabhekani nakubhekana nezilahlwa, kepha wazisa labo abesaba uSimakade. Ufunga agomele abesegcina isifungo sakhe, abambelele kuso noma sekufiwa.

⁵Utshelekisa ngemali angafuni nzalo, angefunjathiswe nce alahle ongenacala. Impela lowomuntu owenza lezizinto akasoze azanyazanyiswa nanini.

AmaHubo 16

Isabelo sefa labakaNkulunkulu

Inkondlo kaDavide.

¹Ngilondoloze Mvelinqangi Somandla, ngoba ngikhosele kuwe ngaphepha.

²Ngithi: “Simakade, uyiNkosi yami wena, nguwe wedwa igugu lami lamagugu.”

³Abangcwele abaphila kulelizwe bayizilomo engithokoza ngazo.

⁴Labo ababuye bakhonze unkulunkulu mumbe bayongena ezinkathazweni eziningi. Ngeke ngihlanganyele nabo eminikelweni ngikhonze onkulunkulumbumbu babo.

⁵Nkosi uyisabelo sefa lami nendebe yami, ungigcinela isabelo sendawo yami,

⁶ingeyekhethelo phakathi kwezindawo, ngibusa ngefa owangabela lona.

⁷Ngiyomdumisa uSimakade ongelulekayo, nasebusuku inhliziyo yami iyangikhuthaza.

⁸Lokhu ngikuqwashile mihla yonke: ngibona uSimakade engakwesokunene sami, impela anginakuzanyazanyiswa lutho.

⁹Ngakhoke inhliziyo yami iyathokoza nomoya wami ubonga uyethaba, ngisho nomzimba wami uhlala ulondekile,

¹⁰ngoba awuyikungiyekelela ngibhubhe ngehlele phansi kwelabafuleyo, ongcwele wakho alahlwe elibeni.

¹¹Ungazisa indlela eya ekuphileni, ngithokoza ngidele ngiphambi kwakho, injabulo yaphakade ikwesokunene sakho.

AmaHubo 17

Elokucela ukuvikelwa ezonakalini

Umkhuleko kaDavide.

¹Wo Simakade! Ngizwele odabeni lwami lapho ngizihlanguza ngoba ngimsulwa, ulalele ukukliwula kwami ngikhala, ubeke indlebe uwuzwe umkhuleko wami ovela emlonyeni ongenankohliso.

²Uyongikhipha phambili esigcawini sakho, ngoba iso lakho liqaphela ubuqotho.

- ³Ungihlolile wavivinya inhliziyo yami, wangihambela ebusuku wangihlozinga, awathola cebo kimi eliyisici elingaphuma lingcolise umlomo wami.
- ⁴Malungana nemisebenzi yohlanga lwabantu ngidedile ezindleleni zezidlova ngokuthobela izwi lomlomo wakho.
- ⁵Ngiyilandele imikhondo yakho ngaqonda, izinyawo zami azizange zishelele.
- ⁶Ngikumemezile mina ngakukhalela, ngoba wena Somandla ungizwa njalo; lalela nce uzwe engikushoyo!
- ⁷Ngikhombise izimanga zothando lwakho, wena osindisa ngesokunene sakho ababhaca kuwe bebalekela izitha.
- ⁸Ngivikele njengenhlamvu yeso eyigugu, ngifihle ngaphansi kwamaphiko akho!
- ⁹Ngilamulele kulabo abangicindezelayo, ezitheni ezesabekayo ngonya ezingihaqile.
- ¹⁰Azinasihe, izinhliziyi zazo ziyitshe, umlomo wazo ukhuluma ukuziqhayisa.
- ¹¹Zisihaqa noma ngabe siyaphi, zicothele ukusiqumba phansi.
- ¹²Isitha sinjengembube ehahela ukubhozomela, empeleni sifana nebhongo lebhubele elicathama ezindaweni ezisithakele.
- ¹³Yima ngobumo Simakade, hlangabezana naso usiqumbe phansi, ngisindise esonakalini ngenkamba yakho!
- ¹⁴Nkosi ngophule ngesandla sakho kwabomhlaba, kuloluhlanga lwabantu olusabelo salo ngamagugu alomhlaba. Uyabasuthisa ubagidlabeze ngeziphu zakho, ubapha izingane, inzalo yabo ichume baze bashiyele izingane zabo ifa.
- ¹⁵Kepha mina ngiyobheka ubuso bakho ngilungile, ekuvukeni kwami nganeliswe ngizidelise ngobukhona bakho.

AmaHubo 18

UDavide uhuba ngokusindiswa nokunqoba kwakhe

(2 Sam 22:1-51)

Elethulwe kumculisi; elikaDavide inceku kaSimakade. Waliqamba leliculo ebhekise kuSimakade amagama alo mhla uSimakade esemkhulule esandleni sezitha zakhe zonke, ikakhulukazi enkosini uSawuli. UDavide wathi:

- ¹Ngikuthanda ngenhliziyo yonke Simakade wena ongamandla ami.
- ²USimakade uyisiwa esingoje engicasha kuso, inqabakubhaca nomhlengi wami, uNkulunkulu wami onguSomandla, idwala lami engibalekela kulo, isihlangu sami sokungivikela, uphondo lwami olungisindisayo, inqaba yami ephakemeyo.
- ³Ngakhala kuSimakade wodumo wangisindisa, ngophulwa ezitheni zami.
- ⁴Izinhlungu zokufa zazingibambile, ngagaselwa yizikhukhula ezibhubhisayo.

- ⁵Izihibe zethuna zangithekeleza ngazithela kunoxhaka wokufa.
- ⁶Ngaficwa zinsizi ngakhala kuSimakade, ngacela usizo kuNkulunkulu wami. Wezwa izwi lami esendlini engcwele; ukunxusa kwami ngicela usizo kwafinyelela ezindlebeni zakhe.
- ⁷Umhlaba wanyikizela wagomonqa, kwandindizela nezisekelo zezintaba; wathukuthela zadudumela zazamazama.
- ⁸Waphefumula wakhipha umusi ngamakhala, umlomo wavutha umlilo oqothulayo, kwaphuma kuye amalahle ayikloba.
- ⁹Watshekisa umkhathi wezulu wehla, isigayegaye saba phansi kwezinyawo zakhe.
- ¹⁰Wandiza egibele ingilosi, isherabhu, washweza wehla ngamaphiko omoya.
- ¹¹Wazigubuzela ngesigayegaye nxazonke, amafu amnyama ahlomile amsibekela.
- ¹²Kwaphambana umbani phambi kwakhe, kwavela amafu amnyama ehlomile, kwehla isichotho namalahle ayikloba.
- ¹³USimakade wabhavumula emkhathini phezulu, oPhezukonke wakhuluma ngendumakude, kwehla isichotho namalahle ayikloba.
- ¹⁴Waciba izitha ngemicibisholo yakhe, wabagadla ngezulu wabadungula, waphonsa unyazi lwaklwebha, babhangazela.
- ¹⁵Idwala lezinzulu zolwandle lambuleka, izisekelo zomhlaba zahlala obala, lapho uSimakade ethetha ngentukuthelo, ngesankahlu somusi wamakhala akhe.
- ¹⁶Waselula isandla sakhe ekweliphezulu, wangenyula ngisemsingeni wamanzi.
- ¹⁷Wangihlenga esitheni sami esibukhali, kwabangizondayo abangehlula ngadela.
- ¹⁸Bangivimbezela mhla ngehlelwa umhlola, kepha uSimakade waba ludondolo lwami.
- ¹⁹Wangikhipha wangibeka endaweni ebanzi, wangikhulula ngoba ethokoza ngami.
- ²⁰USimakade uyangivuza ngokulunga kwami, angibuyisele njengobumsulwa bezandla zami.
- ²¹Ngangihamba ngesu lomyalo kaSimakade, angimhlamukanga ngobubi uNkulunkulu wami.
- ²²Ngangigcina zonke izinqumo zakhe, izimiso zakhe angichezukanga kuzo.
- ²³Ngangimsulwa ngingenasici phambi kwakhe, ngangizithiba ngxixwaya izono zamabomu.
- ²⁴USimakade wangibuyisela ngokulunga kwami, lapho ebona ubumsulwa bezandla zami.

- ²⁵Simakade, kwabanomusa nawe unomusa kubo, kwabangenasici nawe awunasici kubo,
- ²⁶kwabamsulwa nawe umsulwa kubo, kepha amaqili uyaye uwahlakaniphele.
- ²⁷Nguwe osindisa isizwe esizithobayo, uvove abaziqhenyayo bethwele amehlo.
- ²⁸Wena ungikhanyisela isibani sami, wena Simakade Mvelinqangi lubhaqa olukhanyisa ebumnyameni engikubo.
- ²⁹Ngawe nginesibindi sokudungula impi, ngoNkulunkulu wami ngingalweqa ugange.
- ³⁰UNkulunkulu uSomandla, indlela yakhe iqondile ithe nto, izwi likaSimakade liqatha. Nguye isihlangu sokubavikela bonke ababalekela kuye beyokhosela.
- ³¹NguSimakade yedwa uNkulunkulu, nguye vo uNkulunkulu wethu oyidwala.
- ³²Somandla Nkulunkulu, nguwe ongibhincisa amandla akho, wenza nendlela yami ibe msulwa,
- ³³izinyawo zami zitshekula njengezembabala, ungenza ngithontele eziqongweni zami,
- ³⁴ufundisa izandla zami ukulwa, izingalo zami zicibe ngomcibisholo wethusi.
- ³⁵Usindiso lwakho lwaba yisihlangu kimi, esokunene sakho saba ludondolo lwami, wazithoba wawusungiphakamisa.
- ³⁶Wangigadulisa endaweni ebanzi amaqakala awaxeganga ngangakhubeka.
- ³⁷Ngahubha izitha ngazifica ngazifchezela, angikhukumanga ngingakabashayi ibhuqe.
- ³⁸Ngabacaba ababe besangivukela, ngagida phezu kwezitha ngezinyawo.
- ³⁹Wangibhincisa amandla akho empini, abangivukelayo wabagoba baze bathela, baba ngaphansi kwesandla sami.
- ⁴⁰Izitha zami wazingquzula zafulathela, abangizondayo ngabashaya ngabaqothula.
- ⁴¹Bazikhalela, akwabakho obasindisayo; bacela kuSimakade, akaze abaphendula.
- ⁴²Ngase ngishaya ngiqothula, ngabaqothisisa, bafana nothuli olupheshethwa ngumoya; ngabachitha, baba njengezibi ezaleni.
- ⁴³Wangisindisa embangweni wabantu bami, wangibeka ngabusa phezu kwezizwe, isizwe engangingasazi sangikhothamela.
- ⁴⁴Zeza ngami qede zathela kimi, abafo beza kimi begaqa ngamadolo.
- ⁴⁵Abafo baphela amandla bathothongana, baphuma ezinqabeni zabo kushayana amadololo.

⁴⁶USimakade uyaphila! Akadunyiswe yena dwala lami, aphakanyiswe uMvelinqangi ongisindisayo!

⁴⁷Somandla Nkulunkulu, wangisiza, waphindisa ezitheni zami, wagoba izinhlanga zangikhothamela.

⁴⁸Wangophula olakeni lwezitha zami, wangiphakamisa phezu kwabangivukelayo, wangihlenga kumuntu wobudlova.

⁴⁹Ngakhoke ngokubonga phakathi kwezizwe, ngidumise igama lakho Nkosi yami.

⁵⁰Inkosi yakho wayisindisa kokukhulu, yathi isadla ezinye yadla ezinye; alupheli uthando lwakho naphakade ngomgcotshwa wakho uDavide nozalo lwakhe.

AmaHubo 19

Imisebenzi kaMvelinqangi nemfundiso yakhe

Elethulwe kumculisi; ihubo likaDavide.

¹Isibhakabhaka phezulu sithetha izibongo ngenkazimulo kaMvelinqangi uSomandla, umkhathi wezulu umemezela ubungcweti bemisebenzi yezandla zakhe.

²Usuku lulandisa olunye ngalenzimulo, ubusuku ngobusuku buxoxelana ngayo.

³Akuzwakali nkulumo namazwi emkhathini, akukhulumi phimbo lizwiwe khona.

⁴Wonke umhlaba uyizwile lendaba, amazwi ayo ajubalele afinyelela emajukujukwini ezinqeni zezwe. Ilanga walakhela umpheme uMvelinqangi, walibeka phansi kwesibhakabhaka.

⁵Liphuma elawini njengomyeni, lijabulisa okweqhawe lingqabatheka, linjengensizwa isubatha ngejubane.

⁶Liphuma ezansi emaphethelweni ezulu, lizungezelele lize liye ngonina ngale emaphethelweni amala ezulu; akucashi lutho esifudumezini salo.

⁷Imfundiso kaSimakade iqotho iphelele, ivuselela umphefumulo uphile. Ubufakazi bukaSimakade bethembekile, nongebani bumnika ukuhlakanipha.

⁸Imithetho kaSimakade ilunge nse, yenza inhliziyo yethabe nokwethaba. Umyalo kaSimakade uqhamile, ukhanyisela ngokusobala amehlo engqondo.

⁹Ukumesaba uSimakade kuhlanzekile, kuhlala kwaphakade naphakade. Izinqumo zikaSimakade ziyiqiniso, zilunge nokulunga zonkana.

¹⁰Ziyathandeka ngaphezu kwegolide, ngisho negolide eliningi elicoliweyo, zimmnandi nangaphezu kwezinyosi, ngisho noju lwamakhekheba asindiweyo.

¹¹Ziyayifundisa inceku yakho ixwaye, unomvuzo omkhulu lowo ozigcinayo.

¹²Ngubani ongabona iziphosiso zakhe? Ngihlambulule ezonweni ezingicasheleyo!

¹³Ngingqande nasezonweni zamawala, ungazivumeli zingahlule zingibuse; yikhona ngiyohlala ngingenasici, ngingehlulwa yizono ezijulile.

¹⁴Amazwi aphuma emloyeni wami ngisho nezizindlo zenhliziyo yami akwamukeleke kuwe Simakade, wena dwala lami nomkhululi wami.

AmaHubo 20

Elokucelela inkosi ukuba inqobe isinde

Elethulwe kumculisi; ihubo likaDavide.

¹USimakade akakuphendule ngosuku losizi, uNkulunkulu kaJakobe akukhweze endaweni ephakemeyo eyisiphephelo,

²akuthumele usizo esendlini engcwele, akusekele esentabeni yakhe iZiyoni!

³Akhumbule iminikelo yakho yonke, amukele imihlatshelo yakho, eshiswayo! *Kunekhefu.*

⁴Akakunike okufiswa yinhliziyo yakho, afeze zonke izinhloso zezilokotho zakho!

⁵Asihlokome ngentokozo ngokunqoba kwakho, kukhale ihlombe sibonge uNkulunkulu wethu! USimakade akafeze konke okucelayo!

⁶Sengiqonda kahle ukuthi uSimakade uyinika ukunqoba lenkosi ayigcobileyo, ayiphendule esezulwini lakhe elingcwele, ayisindise ngamandla esokunene sakhe.

⁷Abanye bazigabisa ngezinqola zempi, abanye bethembele emahhashini abo, kepha thina sigabe ukugaba ngegama likaSimakade uNkulunkulu wethu.

⁸Bona bayabhabhalala bathobe bawe, kepha thina sivuka sime sithi qingqo.

⁹Simakade, sindisa inkosi uyingqobise, usiphendule ngenkathi sikhala kuwe!

AmaHubo 21

Elokubonga ukunqoba izitha

Elethulwe kumculisi; ihubo likaDavide.

¹Simakade, inkosi iyajabula ngoba amandla akho uwabonakalisile, yesese kakhulu ngoba uyingqobisile.

²Uyinikezile izifiso zenhliziyo yayo, awukugodlanga ekucelayo ngezindebe zomlomo. *Kunekhefu.*

³Uyihlangabezile ngezibusiso ezinhle, ekhanda wayinqwazisa ngophaphe lwendwa.

⁴Yacela kuwe impilo, yaphila phakade, isikhathi eside impela ukuba ime njalo.

⁵Inodumo olukhulu ngoba uyingqobisile, wayihlomisa ngenkazimulo nangobukhosi,

⁶wayenza yaba yisibusiso naphakade, ubukhona bakho buyithokozisa kweqe.

⁷Ingonyama yethembele kuwe Simakade; ubukhosi bayo buyokuma njalo nje ngesihe sothando lwakho wena oPhezukonke.

⁸Ngengalo yakho uyoqonela izitha zakho, ngesokunene sakho ushaye abakuzondayo.

⁹Uyobaqothula ngesikhathi sokufika kwakho kube sengathi basesithandweni somlilo. Uyobashwabadela Nkosi ngolaka lwakho, ilangabi lomlilo libashise baphele.

¹⁰Uyoyiqeda inzalo emhlabeni, uzalo lwabo uluqothule ebantwini.

¹¹Noma phela becabanga amaqhinga bekwenzela uzungu, kabayuphumelela.

¹²Uyocupha umcibisholo emnsalweni, uwunsale ubakhombe ngawo ebusweni, ubafulathelise bashaye bachithe.

¹³Awuphakanyiswe Simakade Somandla! Siyocula sidumise amandla akho.

AmaHubo 22

Isililo sohluphekileyo nendumiso kuNkulunkulu

Elethulwe kumculisi ukuba lihlatshelwe ngendlela ethi "Imbabala yentathakusa"; ihubo likaDavide.

¹Nkulunkulu wami, Nkulunkulu wami! Kodwa ungilahleleni na? Yini umele kude ungangisindisi nxa ngimbongoza ngikhala kuwe na?

²Wo Nkulunkulu wami! Emini ngiyakhala, awuphenduli, nasebusuku angitholi kuphumula.

³Nokho-ke nguwe iNgcwele, wena oqhwakela ezibongweni akuthopha ngazo uIsrayeli.

⁴Babethembela kuwe okhokho, bahlala bekwethemba wawusubahlenga.

⁵Babekhala kuwe wabaphulukisa, behlala bethemba wena awabadumaza.

⁶Kodwa mina angisemuntu, ngiyinhlwa. Bayangiklolodela, ngeyiwa yibo bonke.

⁷Bayangibhinqa bonke abangibonayo, banginkonkozele banqekuze amakhanda.

⁸Bathi nokusho: "Akethembele kuSimakade! Ingani phela uSimakade uthokoza ngaye, akamkhulule manje amophule!"

⁹Nguwe owangihlenga mhla ngifika emhlabeni, ukwethemba wena ngakuncela kumame.

¹⁰Ngathathwa ngethulwa kuwe mhla ngizalwayo, nguwe Somandla uNkulunkulu wami kusukela ngivundle kabili kumame.

¹¹Ungangilahli, ungabi kude nami; izinhlupheko sezifikile ziseduze, anginabani ozongisiza angihlenge.

- ¹²Izitha ziningi zingihaqile, zingibunganyele okwezinkunzi ezithibayo; imihuqa yaseBhashani ingizungezelezele.
- ¹³Ziyangisinekela zikhamisa imilomo, zibhonga njengezimbube ezidwengulayo.
- ¹⁴Ngichithwe njengamanzi ezaleni, amalungu onke amathambo ayaxega. Inhliziyo yami incibilika njengengcina, iyacobeka ngizwa ishona phansi.
- ¹⁵Sekuphele ngisho nasozwanini njengodengezi luhwamuka loma nkwe. Ulimi lwami loma lwanamathela olwangeni, ungishiya phansi othulini ngifile.
- ¹⁶Izinja zingiphahle nxazonke, iviyo lezigilamkhuba lingizungezelezele, bangibhoboza izandla ngisho nezinyawo.
- ¹⁷Ngingawabala onke amathambo ami, bazitika ngamehlo bengigqolozele.
- ¹⁸Izingubo zami behlukaniselana ngazo, nangesavatho sami benza inkatho.
- ¹⁹Simakade mus' ukuba kude nami, phuthuma ungisize wena lusizo lwami!
- ²⁰Ngophule ebukhalini benkemba, ukuphila kwami okungukuphela kwakho ukuhlenge emilonyeni yemigodoyi.
- ²¹Ngisindise emlonyeni wamabhubhesi. Impela, usungizwele wangiphendula, wangisindisa ezincijini zemilalandle.
- ²²Ngiyomemezela igama lakho kubafowethu, ngikudumise embuthanweni webandla ngithi:
- ²³Dumisani uSimakade nina enimesabayo, mtuseni nina nonke luzalo lukaJakobe, nithuthumele nina nonke luzalo lukaIsrayeli!
- ²⁴Ngoba akadelelanga, akazishaya mkhuba izinhlopheko zalowo owahlushwayo. Akamfulathelanga, akamyekelelanga, wamuzwa ekhala kuye ecela usizo.
- ²⁵Nguwe ongifundisa izibongo zakho, ngikudumise ebandleni lonkana. Izifungo zami ngozifeza zigcwaliseke phambi kwalabo abamesabayo uSimakade.
- ²⁶Abazithobayo bayokudla beneliswe, abafunisisa uSimakade bayomdumisa. "Unwele olude kini, nime njalo!"
- ²⁷Bayokhumbula babuyele kuSimakade abasemikhawulweni yonke yomhlaba, imindeni yezizwe zonke imkhothamele,
- ²⁸ngoba ubukhosi bungobukaSimakade, nguye ozibusayo izizwe.
- ²⁹Zonke izikhulu zomhlaba ezinamandla ziyokudla zikhothame phambi kwakhe, baguqe phambi kwakhe ngamadolo bonke labo abayobuyela othulini, lababantu okumele ukuba bafe.
- ³⁰Izizukulwane ezizayo ziyomkhonza, abazukulu bangomuso balandiswe ngeNkosi.

³¹Abasazozalwa bayolandiswa ngoSokulunga owufezile umsebenzi wakhe wokulunga.

AmaHubo 23

USimakade ungumalusi wami

Ihubo likaDavide.

- ¹USimakade ungumalusi wami, akukho lutho engiluswelayo.
- ²Uyangilalisa phansi ngiphumule edlelweni lamahlungu aluhlaza, uyangalusa angihole angiyise ngasemithonjeni yamanzi azolisayo.
- ³Uvuselela umoya wami uphile, angihole emikhondweni elungileyo ukuba kudunyiswe igama lakhe.
- ⁴Noma ngingahamba ngidabule umhosha omnyama okwethunzi lokufa, angiyikwesaba lutho oluyingozi ngoba wena Simakade ungakimi, uphethe induku nobhoko ngimi isibindi.
- ⁵Ungilungisela idili ngidle, ungirole izitha zami zibukela. Uyangamukela ngomusa ungihlalise, kunjengokwekhathwa ngamakha ekhanda; ungiakulela indebe yami ichichime.
- ⁶Impela, okuhle nothando kuyongithungatha izinsuku zonke zokuphila kwami, nendlu yakho Nkosi iyoba yikhaya engiyohlala kulo ungunaphakade.

AmaHubo 24

INkosi yodumo

ElikaDavide; ihubo.

- ¹Umhlaba nokukuwo ungokaSimakade, amazwe onke kanye nabahlezi kuwo.
- ²Ngoba nguye owabeka isisekelo sawo, umhlaba wazinza kuso waphakama kunezilwandle, wamiswa waqina waphakama kunemifula.
- ³Ngubani ongenyukela egqumeni likaSimakade, ame endlini yakhe engcwele na?
- ⁴Akuye lowo ozandla zakhe zimsulwa, onhliziyo yakhe iqotho ilungile, lowo ongajabuleli okuyize leze, ongafungi agomele okuyinkohliso na?
- ⁵USimakade uyomehlisela isibusiso, aphume phambili icala limthethe esizwa nguNkulunkulu umsindisi wakhe.
- ⁶Banjalo abantu abamfunayo; laba abafunisisa ubukhona bakhe yibo kanye abangoJakobe uqobo. *Kunekhefu.*
- ⁷Nina masango vulekani ngenjabulo nani minyango yamandulo nigengeleze, iNkosi yodumo ingene!
- ⁸Ingubani leNkosi yodumo? NguSimakade uSomandla iqhawe, uSimakade iqhawe lempi!

⁹Nina masango vulekani ngenjabulo nani minyango yamandulo nigengeleze, iNkosi yodumo ingene!

¹⁰Ingubani leNkosi yodumo? NguSimakade iNkosi yamaviyo, uyiNkosi yodumo. *Kunekhefu.*

AmaHubo 25

Elokucela ukwelulekwa nokuthethelelwa nokuvikelwa

ElikaDavide.

¹Simakade, inhliziyo yami ngiyibhekisa kuwe.

²Nkulunkulu wami ngethembela kuwe, angingahlazeki, izitha zami azingaqholoshi ngami.

³Impela, akukho namunye oyohlazeka phakathi kwalabo abethembela kuwe; abayohlazeka yilabo abangathembekile, abakhohlisa ngaphandle kwesizathu.

⁴Ngazise izindlela zakho ngizazi, ungifundise Nkosi imikhondo yakho!

⁵Ngifundise ngibambebele eqinisweni lakho, ukuze lona libe yindlela engihamba ngayo, ngoba nguwe uNkulunkulu ongisindisayo, nguwe engethembela kuye njalo nje.

⁶Simakade, khumbula isihe nothando lwakho lwafuthi, ngoba kusukela kwaphakade kwakukhona.

⁷Ungazikhumbuli izono zobusha nezeqo zami, kodwa ngikhumbule ngokwesihe sothando, ngikhumbule Nkosi ngenxa yomusa wakho!

⁸USimakade unomusa nobuqotho, ukhombisa izoni indlela eyonayona.

⁹Abazithobayo ubahola kokulungileyo, abazithobayo abafundise indlela yakhe.

¹⁰Isihe sothando nokwethembeka kuyizindlela zikaSimakade aholo ngazo laba abagcina isivumelwano neziyalo zakhe.

¹¹Ngone kakhulu; ngithethelele Nkosi nce igama lakho lidunyiswe!

¹²Iyiphi leyondoda eyesaba uSimakade? Uyoyitshela indlela ezoyikhetha.

¹³Yona uqobo iyohlala inethezeke, inzalo yayo ibe yizindlalifa zezwe.

¹⁴USimakade unobudlelwane nabamesabayo, ubafundisa basazi isivumelwano sakhe.

¹⁵Ngezikhathi zonke ngibheka kuSimakade, uyokhumula isihibe ezinyaweni zami.

¹⁶Ngibheke Nkosi yami ube nesihe kimi, ngoba mina ngiyinhlwa ngihluphekile.

¹⁷Zinzima izinsizi ezisenhliziyweni yami, ngikhulule nxa ngificezelwe yizingxakeko!

- ¹⁸Bheka ukhupheka nokukhandleka kwami, uthethelele izono zami zonke!
- ¹⁹Bheka ukuthi izitha zami zingakanani nokuthi zingizondela ukufa nokuphila.
- ²⁰Londoloza ukuphila kwami ungisindise, ngingahlazeki, ngoba ngikhosela kuwe!
- ²¹Sengathi ubumsulwa nobuqotho bungangigcina, ngokubanini ngihlala ngikulindela.
- ²²Wo Nkulunkulu! hlenga uIsrayeli, bahlenge ezinsizini zabo zonke!

AmaHubo 26

Umkhuleko womuntu omsulwa

ElikaDavide.

- ¹Simakade ngithethe ngecala, ngoba ngimsulwa ngihamba ngobuqotho, ngethembela kuwe Simakade anginqikazi.
- ²Ngihlolisise ungivivinye Nkosi yami, ngicwaninge ezibilinini mina wonke!
- ³Ngibona njalo isihe sothando lwakho, ngilokhu ngibambebele kuwe ngokwethembeka.
- ⁴Angimdibi munye nalabo abangathembekile, angidlelani nabantu abazenzisayo.
- ⁵Ngiyawuzonda umgwamanda wezigilamkhuba, angihlali nakuhlala nezikhohlakali.
- ⁶Simakade ngiyazi ukuthi ngimsulwa, ngakhoke ngihlamba izandla zami, sihaqelathi lakho sikukhonze,
- ⁷sihlabelele ihubo lethu lokubonga, silande ngezimangaliso zakho zonke.
- ⁸Nkosi ngithanda indlu ohlala kuyo, indawo lapho kukhona inkazimulo yakho.
- ⁹Ungangibhubhisi kanye nezoni, ngibhubhe kanye nezinswelaboya,
- ¹⁰labo abenza okubi ngezandla zabo, abasokunene sabo sihlase ukufumbathisa.
- ¹¹Kodwa mina ngihamba ngobuqotho; ngiphathe ngomusa ungihlenge ngesihe!
- ¹²Sengimi endaweni eyisicaba, ngibonga uSimakade phambi kwamabandla.

AmaHubo 27

USimakade ulubhaqa nomsindisi wami

ElikaDavide.

- ¹USimakade ulubhaqa nomsindisi wami, ngakhoke ngizokwesaba bani? USimakade uyinqaba engikhosela kuyo, ngubani oyongishayisa uvalo na?
- ²Izigilamkhuba zazilokhu zingihlasela, laba abamelene nami beyizitha zami, behlose ukungishwabadela bangibulale, kepha kwakhubeka bona bashayeka phansi.

³Nakuba imizila yempi ingihaqa, nokho kayisoze yangishayisa uvalo. Noma impi ingangivukela ingihlasele, kukho konke lokho mina ngisethemba.

⁴Iyodwa into engiyicele kuSimakade, kukodwa vo engikulangazelelayo: ukuba ngihlale endlini kaSimakade zonke izinsuku zokuphila kwami, ngibone ubuhle bomusa kaSimakade, ngizindle ngisethempelini lakhe.

⁵Uyongibhacisa phansi kophahla lwakhe mhla ngehlelwa ngumhlola ngimpintshekile, angifihle ngilondeke edlangaleni lakhe, angenze ngiphephele esiqongweni sentaba.

⁶Yikhona ngobamela ngenhla abangihaqileyo, nginikele ngemihlatshelo endlini yakhe, ngihube ngenjabulo ngidumise uSimakade.

⁷Nkosi yizwa ukukhala kwami lapho nginxusa, ngiphathe ngomusa nesihe ungiphendule!

⁸Kuyasho enhliziyweni yami ukuthi wena walikhipha ngomlomo wakho wathi: "Ake nibufunisise ubukhona bami!" Simakade sengiyabufuna ubukhona bakho.

⁹Ubuso bakho abungangishalazeli! INkosi ayidle izibekela, ungayixoshi ngentukuthelo inceku yakho! Nkulunkulu msindisi wami owangisizayo, ungangiyekela ungishiye ungilahle!

¹⁰Obaba nomama bangangihlamuka, uSimakade uyongamukela angibheke.

¹¹Ngikhombise indlela yakho Nkosi, ngihole endleleni enhle ebekileyo, ngoba izitha zami zingiqamekele.

¹²Unganginikeli ezitheni zami ezinonya, ngokubanini kusukuma ofakazi abangibeka icala bengiqambela amanga, nezidlova eziphefumula umusi.

¹³Ngiyakholwa ukuthi impela ngiyosibona isihle sikaSimakade lapho ngisaphila.

¹⁴Mangilindele wena Nkosi yami, bese ngiqina amandla, ngiqunge isibindi! Angilindele wena Nkosi yami!

AmaHubo 28

Elokucela usizo nokubonga umphumela

ElikaDavide.

¹Ngizikhalela kuwe Simakade, dwala lami ngizwe ungathuli, hleze ukuthalalisa kwakho kungenze ngibe njengalabo abaya kwelabaphansi.

²Yizwa izwi lokunxusa kwami lapho ngikhala kuwe ngicela usizo, lapho ngiphakamisela izandla zami endaweni yakho engcwele kangakaya esemsamo wethempeli elingcwele.

³Ungangithathi ungilahle ngecala kanye nezonakali nezigilamkhuba, amashayakhothe akhuluma ngesizotha kanti inhliziyi yawo igodle lukhulu.

⁴Ake ubavuze bonke laba ngenxa yemisebenzi yabo yokonakala, ubathezise ukhuni olunenkume ngenxa yezenzo ezimbi zezandla zabo!

⁵Kabayishayi mkhuba imisebenzi kaSimakade, kabazinaki izenzo zezandla zakhe, ngakhoke uyobabhidliza unomphela, angabuye aphinde abakhe futhi.

⁶Akashwe ngezibongo uSimakade olizwile izwi lokuncenga kwami!

⁷USimakade ungamandla ami nesihlangu sami esingivikelayo, inhliziyo yami yethembele kuye. Wangisiza, sengiyambonga ngokwethaba, ngihaya lelihubo lokumdumisa.

⁸USimakade ungamandla abantu bakhe, inqaba yosindiso nesiphephelo, inqabakuvika yenkosi ayigcobileyo.

⁹Nkosi sindisa abantu bakho, ubusise uhlanga oluyifa lakho, ulwaluse ulusingathe ungunaphakade!

AmaHubo 29

Ukuzwakala kwephimbo likaSimakade ekudumeni kwezulu

Ihubo likaDavide.

¹Phakamisani uSimakade esikhundleni sakhe, nina zidalwa zasezulwini! Phakamisani uSimakade esikhundleni sakhe senkazimulo yodumo nesamandla!

²Phakamisani uSimakade esikhundleni sakhe, nibabaze igama lakhe elinodumo, nikhothame nikhuleke kuSimakade, nivunule ngezambatho zobungcwele!

³Iphimbo likaSimakade liyewakala, lizwakala ekhuluma phezu kwamanzi. USomandla odumisekayo ulihlomisa lidume, uSimakade ophezu kwesithabathaba samanzi.

⁴Iphimbo likaSimakade lizwakala linamandla. Iphimbo likaSimakade lizwakala linobukhosi.

⁵Iphimbo likaSimakade lephula imikhoba, uSimakade wephula imikhoba yaseLebhanoni.

⁶Lisho qede kudlalisele izintaba njengenkonyane itshakadula, intaba yaseLebhanoni neyaseSiriya zigxumagxume njengevukana lenkunzi.

⁷Iphimbo likaSimakade lidlalisele ngombani, kugqamuke amalangabi omlilo.

⁸Iphimbo likaSimakade lithuthumelisa ugwadule, uSimakade uthuthumelisa ugwadule lwaseKhadshi.

⁹Iphimbo likaSimakade lithuthumelisa izimbabala, liziphunzise zikhiphe amazinyane, liphundle amahlathi ahlale eze. Endlini yakhe kweliphezulu uyadunyiswa, baqubule ngazwi linye bathi: "Udumo!"

¹⁰USimakade waqhwakela kuzamcolo wawubusa. USimakade usesihlalweni ubusa phakade.

¹¹USimakade uyobapha amandla abantu bakhe, uSimakade ababusise bahlale ngokuthula.

AmaHubo 30

Elokubonga ukuphepha ekufeni

Ihubo; iculo lokuhlatshelelwa mhla indlu yahlukaniselwa uNkulunkulu; elikaDavide.

¹Simakade, ngiyakutusa ngiyakuphakamisa ngoba ungenyulile ebunzimeni, awavuma ukuba izitha zinanazele.

²Simakade, Nkulunkulu wami ngazikhalela kuwe, ngakhala ngacela usizo wangiphilisa.

³Simakade, wangikhuphula ezweni labafileyo, walondoloza ukuphila kwami, wangikhipha emdibini walabo abaqonde egodini.

⁴Mhubeleni uSimakade nina bangcwele bakhe, nikhumbule akwenzileyo oyiNgcwele, nibonge igama lakhe elingcwele.

⁵Ulaka lwakhe lusivuthela isikhashana nje, kodwa asihawukele kuze kube sekufeni. Kuyakhalwa kulilwe ngokuhlwa kodwa kuse qede kujatshulwe.

⁶Mina-ke kwathi ngisahlezi kahle ngathi: “Angisoze ngathintwa lutho!”

⁷Wena wawukade ungenzele umusa, wangi qinisela inqaba yami Nkosi yami. Kuthe kusekühle wawusungifulathela wasitheza ubuso, ngashaywa uvalo kwaphela naso zwanini.

⁸Ngase ngizikhalela kuwe Simakade, ngakunxusa Nkosi yami ngathi:

⁹“Kuyotholakala nzuzoni ngokufa kwami, uma mina ngithunyelwa kwagoqanyawo? Bake bakubonge yini abafileyo, bamemezele ngokwethembeka kwakho na?”

¹⁰Ngizwe Nkosi yami ungihawukele! Wo, Simakade yiba ngumsizi wami!”

¹¹Wawusuguqula ukudabuka kwaba ngumgido, wangikhumula izingubo zokuzila, wangikhulula wangigqokisa ezokujabula.

¹²Ngakhoke ngiyohuba ngikudumise, ngingawuhlubi inhlali umlomo wami, ngikubonge Nkosi Nkulunkulu wami, ngikudumise phakade naphakade.

AmaHubo 31

Elokuzwakalisa ukwethembela kuSimakade

Elethulwe kumculisi; ihubo likaDavide.

¹Ngibalekela kuwe Simakade, uze ungangidumazi ngijabhe nanini kodwa ngisindise ngokulunga kwakho!

- ²Beka indlebe usheshe ungophule, ube yidwala eliyisiphephelo sami, inqabakubhaca engiyosinda kuyo!
- ³Uyisiwa esingoje nenqaba yami. Wongihola ukuze kudunyiswe igama lakho.
- ⁴Uyongikhipha eshibeni abangithukusele sona; nguwe inqabakucasha engikhosela kuyo.
- ⁵Nginikela umoya wami esandleni sakho, unghlengile wena Simakade, Nkulunkulu Somandla othembekileyo.
- ⁶Ngiyabazonda abakhonza onkulunkulumbumbulu, mina ngokwami ngethembela kuwe Nkosi.
- ⁷Ngiyothokoza ngijabule ngothando lwakho, ngoba wena ubonile lapho ngihlupheka, wazi nezinsizi eziphethe umoya wami.
- ⁸Awunginikelanga esandleni sesitha sami, wavula igumbi ngalondeka ngaphefumula.
- ⁹Ngihawukele Nkosi ngoba ngisosizini, amehlo ami aqundekile yizinhlupheko, kudangele inhliziyo nomzimba wami.
- ¹⁰Izinsuku zami ngizichithile ngiqatha umunyu, nokugquma kwasheshe kwaqeda iminyaka yami. Ngaphela amandla yizishayo zokona kwami, ngisho nomzimba usucobeke amathambo.
- ¹¹Bonke abamelene nami bayangiklibhizela, ikakhulukazi omakhelwane bami bayangenyanya, engazana nabo ngibahlasimulisa umzimba, engihlangana nabo endleleni bayashalaza.
- ¹²Angisakhunjulwa muntu sengathi sengafa, senginjengembiza eyafa yalahlwa ezaleni.
- ¹³Ngizwa abaningi beheheza bengihleba, sengihlala ngethuka izanya nxazonke. Bangakhela amaqhinga benza uzungu, baceba ukuba bangibulale ngife.
- ¹⁴Kodwa mina ngethembele kuwe Simakade ngide ngithi: “Nguwe uNkulunkulu wami.”
- ¹⁵Imihla yokuphila kwami isesandleni sakho, ngisindise ezandleni zezitha zami nasemandleni alabo abangizingelayo!
- ¹⁶Buka inceku yakho ngobuso obunomusa, ungisindise ngenxa yesihe sothando lwakho!
- ¹⁷Nkosi ungangenzi ngidumale ngijabhe, ngokubanini bengikhala nginxusa. Izonakali azijabhiswe zidumale zivalwe umlomo ziye kwagoqanyawo!
- ¹⁸Abanamanga mababe yizimungulu, abakhuluma inkukhumalo nendelelo, beziqhayisa, nolungileyo bemeya.

- ¹⁹Zinkulu yini pho izicolo zakho ozigcinele lababantu abakwesabayo, ubenzela okuhle kubonwe yizwe lapho uvikela abakhosela kuwe!
- ²⁰Ubasitheza emphemeni wobukhona bakho, ubavikele kulabo ababakhela uzungu, ubafihle edokodweni balondeke, ulimi olugencayo lungabalimazi.
- ²¹Akabongwe uSimakade ongenzele umusa, wakhombisa uthando olungolwafuthi lapho ngihlaselwa emzini ovinjezelweyo.
- ²²Ngashaywa uvalo ngesaba ukuthi ngabe ungixoshile yini endaweni yakho. Nokho-ke wezwa izwi lokunxusa kwami lapho ngikhala kuwe ngicela usizo.
- ²³Mthandeni uSimakade nina bangcwele bakhe! USimakade uyabagcina ababambelela kuye, kepha aphindise kanzima kwabazidlayo.
- ²⁴Qinani nithi ngqi nime isibindi nina nonke enethembela kuSimakade!

AmaHubo 32

Ubusisiwe othethelelwe nguSimakade

ElikaDavide; inkondlo enesifundo.

- ¹Uyadela lowomuntu ozeqo zakhe zithethelelwe, osono sakhe sigqitshiwe.
- ²Ubusisiwe ongabekwa cala nguSimakade, umuntu onhliziyo yakhe ingenankohliso.
- ³Lapho mina ngisathule nesazela kwavendlezeka amathambo ami ngokumbongoza kwami usuku lonke.
- ⁴Nkosi yami isandla sakho sibe nzima, sangicindezela imini nobusuku, kwamunceka amandla ami njengenkovu yomiswa yisivuvu sasehlobo. *Kunekhefu.*
- ⁵Ngase ngihlambuluka ngesono sami kuwe, angakufihlela lutho ngecala engalenza. Ngathi: “Ngovuma ukona kwami kuSimakade!” Wawusungithethelela icala nesono sami. *Kunekhefu.*
- ⁶Ngakhoke lowo nalowo kwabangcwele bakho uyokhuleka kuwe lapho usatholakala. Noma umfula usugcwala udla izindwani, ngempela izikhukhula aziyikufinyelela kuye.
- ⁷Wena uyisiphephelo engicasha kuso, uyongilondoloza ukuba ngingahlupheki, ungembathise ngenjabulo yensindiso, ngihlokome ngokuba wangikhulula. *Kunekhefu.*
- ⁸USimakade uthi: “Ngiyokufundisa ngikukhombise indlela ozoyihamba, ngikweluleke, iso lami lingasuki kuwe.
- ⁹Ningabi njengehashi nomnyuzi ongenangqondo othanjiswa ngetomu lengqosha emloyeni uzukwe yikhona uzothobela umthetho wenu.”

¹⁰Ziningi izinhlopheko zesonakali, kodwa lowo owethembela kuSimakade uhaqwe yisihe sothando lwakhe lwafuthi.

¹¹Thokozani nethabe nina balungileyo ngenxa yalokho akwenzileyo uSimakade, nihlokome ngenjabulo nina nonke enihliziyi zenu zimi ngobuqotho!

AmaHubo 33

Elokubonga umdali nomlondolazi wakho konke

¹Hlokomani ngenjabulo nina balungileyo ngenxa yalokho akwenzileyo uSimakade, abaqotho bafanele ukumdumisa.

²Bongani uSimakade nibethe umqangala, nimdumise ngogubhu oluntambo ziyishumi,

³nihlabelele nimculele igama elisha, nimdlalele kamnandi nihlokome!

⁴Ngoba izwi likaSimakade liqotho, uthembekile kukho konke akwenzayo.

⁵USimakade uthanda ukulunga nobuqotho, umhlaba ugcwele uthando lwakhe lwafuthi.

⁶Izulu ladalwa ngomyalo kaSimakade, wenza umkhathi nakho konke okukuwo ngezwi aliphefumula ngomoya wakhe.

⁷Ubuthela ndawonye amanzi asolwandle kubengathi uwavalela embizeni, akhweze izinzulu zolwandle zibe yisiziba.

⁸Umhlaba wonke awesabe uSimakade, abasemazweni ngamazwe bathuthumele!

⁹Nguye owakhuluma kwase kudaleka konke, wakhipha umyalo wakhe kwase kuba khona.

¹⁰USimakade uchitha icebo labezizwe, afojise izinhloso zezinhlanga.

¹¹Icebo likaSimakade limi phakade, kofa abantu kusale izinjongo zakhe.

¹²Sibusisiwe siyadela lesosizwe esiNkulunkulu waso nguSimakade, isizwe azikhethela sona ukuba asibuse.

¹³USimakade uyaqaphela esezulwini, ababone bonke abantu emhlabeni.

¹⁴Uyabuka esesihlalweni sakhe sobukhosi, aqaphelise bonke abahlezi emhlabeni.

¹⁵Wadala izinhliziyi zabo bonke, ubukisisa konke abasuke bekwenza.

¹⁶Akukho nkosi yanqoba ngempi enkulu, ngisho namandla eqhawe kawalisindisi.

¹⁷Amahhashi awaphephisi empini, ungethemi ukusindiswa ngamandla awo!

¹⁸Iso likaSimakade alisuki kwabamesabayo, abethembela othandweni lwakhe lwafuthi,

- ¹⁹ukuba abasindise ekufeni bangabhubhi, abondle ngesikhathi sendlala baphile.
- ²⁰Silindele uSimakade ngethemba, ungumsizi nesihlangu sokusivikela.
- ²¹Izinhliziyo zethu zizithokozisa ngaye; sethembela egameni lakhe elingcwele.
- ²²Nkosi isihe sothando lwakho asehlele kithi njengalokhu thina sethembela kuwe!

AmaHubo 34

Elokubonga ukukhululwa osizini

Elika Davide. Wazihlanyisa phambi kwenkosi uAbhimeleki yayisimxosha; lapho esesukile kuyo waqamba lelihubo.

- ¹Ngiyombonga uSimakade ngezikhathi zonke, ngimdumise mihla yonke ngingathuli.
- ²Umoya wami uyozigabisa ngoSimakade, abacindezelweyo mabezwe bajabule.
- ³Memezalani nami ngobukhulu bukaSimakade, siqubule sidumise igama lakhe!
- ⁴Ngakhuleka kuSimakade, wangiphendula, wangihlenga kukho konke ebengikwesaba.
- ⁵Ababhaka kuye bayaye bamomotheke, ubuso babo abuze bungajabha.
- ⁶Yimi lona engangikhala ngisosizini, nganxusa kuSimakade wangizwa, wangisindisa ezinhluphekweni zami zonke.
- ⁷Ingilosi kaSimakade yakha umkhumbi ibahaqe abamesabayo ibakhulule.
- ⁸Ziboneleni nina nimuzwe ukuthi unomusa uSimakade; iyadela leyondoda ekhosela kuye.
- ⁹Mesabeni uSimakade nina bangcwele bakhe; abamesabayo abasweli lutho.
- ¹⁰Amabhongo embube angahle alambe, ngoba eswele angase akudle, kepha ababambelela kuSimakade kabayikuswela lutho oluhle.
- ¹¹Bantabami wozani nilalele, ngonifundisa ukumesaba uSimakade!
- ¹²Ngubani othanda ukuphila kwangempela, aze adle izinyoni zabantabakhe na?
- ¹³Lowo akadede ekukhulumeni ububi, izindebe zakhe zingaphathi nkohliso!
- ¹⁴Qhela ebubini uhambe wenza okuhle, ufune ukuthula, ukuthungathe!
- ¹⁵Iso likaSimakade kalisuki kwabalungileyo; ubeka indlebe yakhe ezwe ukunxusa kwabo.
- ¹⁶Kepha umelana nalabo abenza ububi, ababhubhise bangabe besakhunjulwa.
- ¹⁷Abalungileyo bakhala kuSimakade abezwe, abahlenge ezinhluphekweni zabo zonke.
- ¹⁸USimakade useduze nabanhliziyi idabukile, usindisa abamoya wephukile.

- ¹⁹Ziningi izinhlopheko zolungileyo, kepha uSimakade umkhipha kuzo zonke.
- ²⁰Ulondoloza amathambo akhe onke, kungephuki ngisho nelilodwa.
- ²¹Isonakali siyobulawa ububi, abazonda olungileyo balahlwe yicala.
- ²²USimakade uhlelwa impilo yezinceku zakhe, bonke abakhosela kuye bathethwe yicala.

AmaHubo 35

Elokucela ukophulwa ezitheni

ElikaDavide.

- ¹Bethwese icala labo abangimangalelayo, ulwe Simakade nalabo abamelene nami!
- ²Thatha izihlangu zakho uhlome uphelele, ume ngobumo uphuthume uzongivikela!
- ³Gqashula umkhonto wakho uvimbe umzila, ubhekane nabazingeli abangihubhayo, uthi kimi: “Yimi umsindisi wakho,”
- ⁴Sengathi labo abazama ukungibulala bangehlulwa behlelwe amahloni bahlazeke! Mabafulathele babaleke badumazeke labo abakha amaqhinga okungilimaza!
- ⁵Ababe njengomungu opheshulwa umoya lapho ingilosi kaSimakade ibathathelela!
- ⁶Akuhlwe endleleni yabo bashelele lapho ingilosi kaSimakade ibazingela!
- ⁷Bangithukusela ugibe kungekho sizathu, bangimbela igebe ukuba ngikhalakathele.
- ⁸Isitha sozigwaza ngowaso singazelele, sizidlise ngobaso sibhajwe esihibeni saso, sikhalakathele egebene laso sibhujiswe.
- ⁹Umphefumulo wami uyokwethaba ngoSimakade, ngithokoze ngoba engisindisile,
- ¹⁰bese ngisho nokusho ngenhliziyo ngithi: “E Simakade! ngubani onjengawe? Wophula ocindezelweyo esiqhwageni, nocindezelweyo empofu komphangayo.”
- ¹¹Kusukuma ofakazi abanhliziyombi, bangethwese amacala ngezinto engingazazi.
- ¹²Baphindisa okuhle ngokubi, yek' okwami, ngikhathazekile emoyeni!
- ¹³Kodwa mina, mhla begula ngangembatha ezokuzila, ngazihlupha ngazithiba ngazila ukudla, ngakhuleka ngigobodisile ngibheke phansi,
- ¹⁴kungathi ngililela abangane nezihlobo zami; ngakhala ngikhokhobisa okofelwe ngunina.
- ¹⁵Kepha lapho ngiqhuzuka ngikhalakathela bayangcingciza bahlanganisa amakhanda. Abantu abangelutho nengingabaziyo bangihaqile bayanginephunephula.

- ¹⁶Bayancokola babhina okungcwele njengezinteli ezikhonzela ucezu lwesinkwa, bagedla amazinyo bengenizela usongo.
- ¹⁷Nkosi uyobukela kuze kube nini? Hlenga ukuphila kwami ebudloveni babo, ungophule ezingonyameni ezingamabhongo!
- ¹⁸Sengiyokubonga ebandleni elikhulu, ngikudumise phakathi komkhumbi wabantu.
- ¹⁹Ungavumi izitha ziklolode ngami, zona zimelene nami kungekho sizathu. Mabangacifelani bodwa bahlekise ngami abantu abangizonda kungekho sici!
- ²⁰Ngokuba bona abezi ngokuthula, basukela abahlezi ngoxolo ezweni, bababumbele amanga ngobuqili.
- ²¹Bakhamisile basho ngengila bathi: “Awu suka! Sikubambe oqotsheni.”
- ²²Simakade ukubonile kwenzeka, ngakhoke ake ukhulume ungathuli, Nkosi yami ungaqheli ube kude nami!
- ²³Phaphama Mvelinqangi, sukuma umele udaba lwami, ngiphendulele ecaleni Nkosi yami!
- ²⁴Simakade Nkulunkulu wami Sokulunga, ngikhiphe phambili, icala lingithethe, ungazivumeli izitha zingiklibhizele!
- ²⁵Ungavumi ukuba bakhulume bodwa bathi: “Ashila! Yilokhu-ke ebesikufuna!” Ungavumi ukuba bakhulume bathi: “Sesimahlulile samshwabadela samchitha.”
- ²⁶Abehlulwe behlelwe amahloni bakhophoze bonke labo abesasela isehlo sami! Abehlelwe ngamahloni bahlazeke labo abaziqhayisayo bengibukela phansi!
- ²⁷Abathakasela ukuthi icala lingithethile abahlokome ngenjabulo bathokoze, baphindelele imihla ngemihla bathi: “Babazani ubukhulu bukaSimakade othakasa ngenhlalakahle yenceku yakhe!”
- ²⁸Khona ngomemezela ngobuqotho bakho, ngihube indumiso yakho njalonjalo.

AmaHubo 36

Uthando lukaSimakade olungapheliyo

Elethulwe kumculisi; elikaDavide inceku kaSimakade.

- ¹Kuyasho enhliziyweni yami ukuthi: Isonakali siqhutshwa ilukuluku lobubi, asinandaba noMvelinqangi, asinaluvalo ngaye.
- ²Njengoba sizithwele siziqhenya kangaka sithi ngeke uMvelinqangi aze abone, uyasuka lapho ujezisa ububi baso.
- ³Inkulumo yaso igcwele inkohliso nobuqili, asisenawo unembeza wokwenza okuhle.

- ⁴Sakha amaqhinga silele ecansini, siphikelela ukuhamba endleleni embi; kasibenyanyi ububi sehlukane nabo.
- ⁵Simakade uthando lwakho olungapheliyo lufinyelela ezulwini kweliphezulu, ukwethembeka kwakho kuze kufike emafwini.
- ⁶Unokulunga okuphakeme ngangezintaba, nezinqumo zakho zinjengezinzulu zolwandle. Nkosi usindisa abantu nezilwane.
- ⁷Mvelinqangi, isihe sothando lwakho siyigugu elinqabileyo, asisihle khona! Abasemhlabeni bakhosela baphephele ngaphansi komthunzi wamaphiko akho.
- ⁸Badla insada yezicolo endlini yakho, bacakule iziphethu zakho ezidelisayo.
- ⁹Nguwe umthombo wokuphila koqobo. Ukukhanya sikubona kuwe Sonkanyiso.
- ¹⁰Qhubeka nothando lwakho kwabakwaziyo nokulunga kwakho kwabaqotho ngenhliziyo!
- ¹¹Ungavumi abazidlayo bangihlasele, ungavumi izonakali zingidingise!
- ¹²Izigilamkhuba ziwile zathi dakla, zidindilizile aziphinde zivuke.

AmaHubo 37

Izonakali nesigcino sazo

ElikaDavide.

- ¹Uze ungazikhathazi ngezozakali, ungabi namona nabenza ukonakala!
- ²Bashesha kabi babune njengotshani, bese beyetha njengohlaza lwasendle.
- ³Thembela kuSimakade wenze ukulunga, zinza ezweni lapho uhlezi khona, ukwethembeka kwakhe uzondle ngakho!
- ⁴Zithokozise ngoSimakade uzokunika, akuphe wena lokho okufisayo.
- ⁵Indlela yakho yethule kuSimakade, umethembe, nguyena oyogcina ekwenzele.
- ⁶Ubuqotho bakho uzobuveza obala, nelungelo lakho aligqamise njengemini.
- ⁷Zotha ulinde ngesineke phambi kukaSimakade, ungahlabeki ngokuchuma kwendlela yomubi, ngomuntu osebenzisa amaqhinga amabi!
- ⁸Pheza ukuthukuthela, uyeke ulaka, ungathathi ngamawala uzibangele isono!
- ⁹Ngokuba izonakali ziyolokhu zachithwa, abalindela uSimakade badle ifa.
- ¹⁰Kuyoba umzuzwana owodwa nje, izonakali bese zinyamalala obala, ufunisise lapho bekade zikhona, zingabe zisabonwa nangokhasha.
- ¹¹Abacindezelweyo bayodla ifa lomhlaba, bazenamise babuse ngenala enkulu.
- ¹²Isonakali sisongela olungileyo, simdlele imihlathi sisophe ukumlimaza.
- ¹³INKosi ivele imhleke usulu ngoba iyazi ukuthi olwakhe lunye.

- ¹⁴Abangalungile bagqabula inkemba, bese bethatha umnsalo wabo bawucibe, bagadle bawise ocindezelweyo nompofu, babulale labo abahamba ngobuqotho.
- ¹⁵Kodwa bayozigwaza ngowabo balayeke, imicibisholo yabo yephuke fahla.
- ¹⁶Okuncane anakho olungileyo kungcono kunomcebo wezonakali eziningi.
- ¹⁷Imikhono yabangalungile iyokwepfulwa, kepha iNkosi iyabaphasa abalungileyo.
- ¹⁸USimakade uyakwazi okwenzeka mihla kwabaqotho, ifa labo bayolibamba ungunaphakade.
- ¹⁹Abayukujabha ngesikhathi sokuhlupheka, kodwa bayosutha ngezinsuku zendlala.
- ²⁰Izigilamkhuba ziyobhubha ziphele, nezitha zikaSimakade ziyonyamalala njengezimbalazi eziqhakaza edlelweni, ziyonyamalala zisithele njengentuthu.
- ²¹Isonakali siyetshelaka kodwa singakhokhi, kepha olungileyo unesihawu uyaphana.
- ²²Abangababusiweyo bakaSimakade bayolidla izwe libe yifa labo, kepha laba asuke ebaqalekisa uyobanquma baphele ezweni.
- ²³USimakade nguyena oqinisa izinyathelo zendoda ezindlela zayo ziyamthokozisa.
- ²⁴Kuthi noma ikhubeka ingawi okwempela, uSimakade ayibambe isandla ayiphase.
- ²⁵Kade ngimusha manje sengimdala. Angikaze ngibone olungileyo eshiyiwe nenzalo yakhe iphanza ukudla.
- ²⁶Ulokhu ehawukela njalo abolekise, nenzalo yakhe iyoba yisibusiso.
- ²⁷Qhelelana nobubi wenze okuhle, uphile uze ukhokhobe ezweni!
- ²⁸USimakade uthanda ukwahlulela okuqotho, akasoze abantshinga abangcwele bakhe. Bayohlala belondekile unaphakade, kepha inzalo yababi iyochithwa.
- ²⁹Abalungileyo bazolidla ifa lezwe, bahlale balakhele njalonjalo.
- ³⁰Izindebe zolungileyo zikhuluma inhlakanipho, ulimi lwakhe lushumayela ukulunga.
- ³¹Imfundiso kaNkulunkulu wakhe imbusa ingqondo, unyawo lwakhe aluphambuki endleleni.
- ³²Isonakali siqamekela olungileyo, simjongile sifuna ukumbulala.
- ³³Kodwa uSimakade ngeke amyekelele ukuba awele esandleni somubi. Kuyothi nalapho eselethwa esigcawini amsize aphume phambili ecaleni.

- ³⁴Lindela uSimakade ngethemba, uhambe ngendlela yemiyalo yakhe! Uyokuphakamisa udle ifa lomhlaba, uyobukela mhla ababi bechithwa.
- ³⁵Ngambona umuntu omubi oyisidlova, ezenabise okwesihlahla sokuzimilela.
- ³⁶Kepha wabuye waphela indaba yakhe, akabe esabuye abonwe nangokhasha, ngamcinga nxazonke, wangatholakala.
- ³⁷Ubombheka umuntu oqotho, umqaphelisise umuntu onesimilo, ngoba ungumuntu wokuthula, ikusasa lalowo liqhakazile.
- ³⁸Kepha abaphambukayo bayobhubha bonke, ikusasa labo liyosheshe lifingqwe.
- ³⁹Insindiso yabalungileyo ivela kuSimakade, uyinqaba yabo esikhathini sobunzima.
- ⁴⁰USimakade. uyabasiza abaphunyulise, baphunyule esandleni sababi abasindise, ngoba bemethembile bakhosela kuye.

AmaHubo 38

Umkhuleko womuntu ososizini ezisola

Ihubo likaDavide eliyisikhumbuzo.

- ¹Wo Simakade, iNkosi ayidle izibekele, ingangijezisi isithukuthele ibila!
- ²Imicibisholo yakho ingihlabe yangena, isandla sakho sehla sangicindezela.
- ³Akukho sitho esingebuhlungu kimi ngenxa yakho ungithethisa ngolaka, kunkenketha onke amathambo ami ngenxa yesono engisenzileyo.
- ⁴Izono zami zingisibekele ikhanda, nginyinyitheka nomthwalo wazo osindayo.
- ⁵Izilonda zami zinuka iphunga elibi, zichicha ubovu ngenxa yobuwula bami.
- ⁶Sengikhokhobe ngaze ngaqhotha, ngihamba ngilila zonke izinsuku.
- ⁷Ukhalo lwami luvuvukele luyashisa, akukho sicubu esiphilayo emzimbeni wami.
- ⁸Ngindikindiki ngitubeke ngaphela ngiyabhonga, inhliziyo iyaxokozela.
- ⁹Nkosi uyakwazi ukulangazela kwami, ukububula kwami akusithakele kuwe.
- ¹⁰Inhliziyo yami ibhakuzela kabi, amandla ami aphelile onke, amehlo ami aluvindi angisaboni.
- ¹¹Abangane nabazalwane baqhelile kimi ngenxa yesishayo sami esibuhlungu, nabozalo imbala sebemela kude.
- ¹²Bangithukusele izingibe bengicupha lababantu abajonge ukungibulala, nalabo kanye abahlose ukungilimaza bakhuluma usongo lokungichitha, bangicabangela ububi lize lishone.

- ¹³Kodwa mina angisezwa ezindlebeni nginjengesithulu, nginjengesimungulu esingakwazi ukukhuluma.
- ¹⁴Nginjengendoda engasezwayo ezindlebeni, engenamlomo namazwi okuziphendulela.
- ¹⁵Yebo, Simakade ngilokhu ngilindile, uzongiphendulela Nkosi Nkulunkulu wami.
- ¹⁶Ngiyakucela: “Sengathi bangesizakale ngokudumala kwami, bangcingcize nxa ngishelela ngiwa!”
- ¹⁷Sekuya khona ukuba ngiwe, izinhlungu zilokhu zingibambe mihla.
- ¹⁸Ngokuba ngiyakuvuma ukona kwami, ngidabukile ngenxa yesono engisenzileyo.
- ¹⁹Izitha zami ziphilile zinamandla, baningi abangizonda ngingenacala.
- ²⁰Labo abaphindisa ubuhle ngobubi bamelene nami ngoba ngishisekela okuhle.
- ²¹Simakade ungangiyekeleli ungilahle, Nkulunkulu wami ungabi kude nami!
- ²²Phuthuma, woza uzongihlenga, Nkosi yami wena nsindiso yami!

AmaHubo 39

Ukuphila komuntu kuyedlula masinyane

Elethulwe kumculisi uJeduthuni; ihubo likaDavide.

- ¹Ngathi: “Ngiyoqaphela ukuhamba kwami, ngingaluvumeli ulimi luze lungonise, ngiyowuhlaba inhlali umlomo wami nxa isonakali siphambi kwami.”
- ²Ngathula du angaze ngakhuluma, angasho lutho ngisho nangokuhle, kwaqubuka izinhlungu zangibamba.
- ³Inhliziyo yami yashabasheka phakathi kwami, kwaphembeka umlilo ngisazindla, ngaze ngabhoboka ngakhuluma ngathi:
- ⁴“Wo Simakade! Seluyoze lufike nini olwami lokufa? Ngazise umumo wezinsuku zami, khona ngizokwazi kumanje ukuthi ngiyedlula masinyane!”
- ⁵Imihla yami ingangobubanzi besandla, isikhathi sami sifushane asilutho kuwe. Impela, abantu bonke noma begxile kangakanani banjengomoya oheleza udlule. *Kunekhefu.*
- ⁶Umuntu uphila njengesithunzi nje, ukuzikhandla kwakhe kunjengokwesambane, unqwabela ifa engabazi abayolidla.
- ⁷Manje Nkosi yami ngisalindeleni na? Ithemba lami lonke likuwe.
- ⁸Ngikhulule kuzo zonke izeqo zami, ungavumeli iziwula zingiklolodele!
- ⁹Mina ngizozithulela ngingasho lutho, ngoba ngize ngibe njena nje, nguwe.
- ¹⁰Susa kimi isishayo sakho esibuhlungu! Ungishayile ngesandla sakho kwezwela.

¹¹Uyamjezisa umuntu ngokumkhuza, umthethise ngenxa yobubi bakhe, uwaqede njengenundu amagugu akhe. Wonke umuntu ungumoya ohelezayo. *Kunekhefu*.

¹²Yizwa umkhuleko wami Simakade, ulalele lapho ngikhalela insindiso, ungangibukeli uzibe izinyembezi zami! Ngoba mina ngiyisihambi, ngiqubile nje, ngingenisile njengokhokho bonke.

¹³Nguyeke! Ungabe ulokhu ungigqolozele, nce ngithole ukhlaba ikhefu ngesase ngingakemuki ngibalwe nabangasekho.

AmaHubo 40

Elokubonga ukuhlengwa

(AmaHubo 70:1-5)

Elethulwe kumculisi, elikaDavide; ihubo.

¹Usizo lukaSimakade ngalulindela ngesineke, wangizwela walalela ukunxusa kwami.

²Wangikhipha emgodini wokubhujiswa, wangitatulula obhukwini olubishayo, izinyawo zami wazimisa phezu kwedwala, wangiphasa ngahamba ngaqina idolo.

³Wangifundisa ukuhaya igama elisha, iculo lokumdumisa uNkulunkulu wethu. Kuyothi abaningi abayobona lokhu bethembele kuSimakade bamesabe.

⁴Ubusisiwe lowo owethemba uSimakade, angaphendukeli kulabo abaziqhayisayo nakulabo abaphambukela ezithixweni.

⁵Simakade Nkulunkulu wami, ziningi izimangaliso osenzele zona, ziningi izinjongo zakho ozihlose ngathi, akukho noyedwa vo onjengawe. Bengiyoshumayela ngxoxe ngazo zonke, kepha ziningi kakhulu zingebalwe.

⁶Awuthokozeli imihlatshelo neminikelo; awufuni mihlatshelo eshiswa elathini ngisho neminikelo ehlawulela izono, kepha wangivula izindlebe ngezwa.

⁷Ngase ngiphendula ngathi: “Nakhu ngilapha! Iziyalo zakho owangibekela zona zilotshwe emqingweni wencwadi yomthetho.

⁸Nkulunkulu wami, ngithokozela ukwenza intando yakho. Imfundiso yakho ngiyigcina enhliziyweni.”

⁹Ngamemezela indaba emnandi yokulunga kwakho, ngayisho ngiphakathi kwebandla elikhulu. Angiwuhlabanga inhlali umlomo wami, nguwe okwaziyo lokho Nkosi yami.

¹⁰Angiyigodlanga indaba yokulunga kwakho, ngashumayela ukwethembeka nensindiso yakho. Ngamemezela ngangawuvala umlomo wami ngothando lwafuthi nokwethembeka kwakho, ngakuhasha ngiphakathi kwebandla elikhulu.

¹¹Wena Simakade uze ungangigodleli ububele bakho! Uthando lwakho nokwethembeka kwakho akuhlale kungivikela kungaphezi!

¹²Izinhlupheko ezingebalwe zingehlele, izono zami zingivimbezele, angisaboni nakubona ngivaleke amehlo. Izono zami zedlula izinwele ngobuningi, isibindi siphelile nya kimi.

¹³Simakade sale usungihlenga! Nkosi yami phuthuma ungisindise!

¹⁴Mabehlelwe ngamahloni badumazeke bonke abafuna ukungisusa bangibulale! Mabafulathele babaleke behlazekele labo abafisa ingozi ingivelele.

¹⁵Abehlelwe amahloni bashaywe uvalo labo abangiklibhizelayo bethi: “Ashila!”

¹⁶Abethabe bathokoze ngenxa yakho bonke labo abakufunayo wena! Abahlale bethi: “USimakade mkhulu!” bonke labo abathanda insindiso yakho!

¹⁷Yize ngiyimpofana ngingenalutho kepha iNkosi yami iyanginakekela; nguwe umhlengi nomkhululi wami, Nkulunkulu wami shesha ungalibali!

AmaHubo 41

Elokucela ukuphiliswa esifweni

Elethulwe kumculisi; ihubo likaDavide.

¹Uyadela lowo onakekela ababuthaka, uSimakade uyomhlenga ngosuku losizi.

²USimakade uyomlonda agcine impilo yakhe, ambusise ahlale etuswa ezweni, angavumi izitha zimenze umathanda.

³USimakade uyomlulamisa lapho egula, amphilise lapho ebambekile ocansini.

⁴Ngathi mina: “Ngonile kuwe Nkosi, yiba nesihe ungihawukele ungiphilise!”

⁵Izitha zami zikhuluma kabi ngami zithi: “Uyokufa nini anyamalale, igama lakhe lingabe lisakhunjulwa na?”

⁶Abazongibona bangibuka bangidabukele, kanti bayazenzisa bahogela okubi ngami, bese bephuma bekuhleba ndawo zonke.

⁷Bonke abangizondayo bahlebelana ngami, bakha uzungu bafuna ukungilimaza.

⁸Bathi: “Kukhona okwesabekayo okumngeneyo, ubangwa nezibi, akasadabulanga.”

⁹Nomngane wami ebengimethembe kakhulu ngidlelana naye sithebeni sinye usengiphendukele wangenzela ubunyoka.

¹⁰Yiba nomusa Simakade ungihawukele, ngivuse ngiphindise kubo.

¹¹Ngiyazi kahle ukuthi uyathokoza ngami, ngoba awusivumeli isitha sami ukuba singehlule siqholoshe ngami.

¹²Mina kanye uyangiphasa ebuqothweni bami, ungimisa phambi kwakho ungunaphakade.

¹³USimakade uNkulunkulu kaIsrayeli akabongwe kwaphakade naphakade! Elethu! Ameni.

AmaHubo 42

Isigaba sesibili Ukulangazelela uNkulunkulu

Elethulwe kumculisi; inkondlo enesifundo yabozalo lukaKhora.

- ¹Ngilangazelela wena Nkulunkulu njengendluzele yomela amanzi emifula.
- ²Umoya wami womele uNkulunkulu, uNkulunkulu ophilayo uSomandla. Ngiyofika nini ngivele phambi kukaNkulunkulu na?
- ³Izinyembezi zingukudla kwami, ngiyakhala imini nobusuku njengoba bede bengichukuluza bethi: “Useshonephi uNkulunkulu wakho na?”
- ⁴Ngozindla ngezakudala esezadlula, ngikhumbule mhla ngihola umshungu uphikelela endlini kaNkulunkulu uhlokoma ngenjabulo umdumisa, umshungu wenyuka uyogubha umkhosi.
- ⁵Nhliziyo yami udabukelani kangaka, uyaluzelani phakathi kimi na? Lindela uNkulunkulu ngethemba, ngoba ngisayophinde ngimbonge yena okuvela kuye insindiso yami.
- ⁶Nkulunkulu wami ngidangele ngaphakathi, ngakhoke ngokukhumbula ngisekudingisweni, ngikukhumbule ngisezweni laseJordan, ngisezintabeni zaseHermoni naseMizari.
- ⁷Utwalubizana notwaluzulwini, kuhlokome izimpophoma zikaMvelinqangi, kusengathi ngimbozwa ngamadlambi akhe nezikhukhula zomfula ogcweleyo.
- ⁸USimakade akakhombise uthando lwakhe emini, ngihlabelele udumo lwakhe ebusuku, ngikhuleke kuSomandla ongipha ukuphila.
- ⁹Ngibhekisa kuMvelinqangi uSomandla, yena dwala lami, ngithi: “Kungani ukuba ungikhohlwe na? Yini ngihambe ngembethe ezokuzila ngicindezelwa yizitha zami na?”
- ¹⁰Sengathi kufahlazeka amathambo ami nxashana abamelene nami bengiklolodela bede bengichukuluza usuku lonke bethi: “Useshonephi uNkulunkulu wakho na?”
- ¹¹Nhliziyo yami udabukelani kangaka, uyaluzelani phakathi kimi na? Lindela uNkulunkulu ngethemba, ngoba ngisayophinde ngimbonge, yena msindisi noNkulunkulu wami!

AmaHubo 43

Elokucela ukuthethwa yicala nokophulwa

- ¹Mvelinqangi, ngiphendulele nce lingithethe icala engilethweswe yisizwe esingenamusa, ngihlengi kumuntu onenkohliso nobubi!

²Ngoba nguwe Mvelinqangi inqaba yami, yini ngihambe ngembethe ezokuzila ngicindezelwa yizitha zami na?

³Letha ukukhanya kwakho neqiniso lakho, kungihole ngiye entabeni yakho engcwele nasethempelini eliyindlu ohlala kuyo,

⁴ngisondele elathini lakho Nkulunkulu, kuwe Somandla ongithokozisa kakhulu, ngishaye ugubhu ngihube ngikubonge wena Mvelinqangi Nkulunkulu wami.

⁵Nhliziyo yami udabukelani kangaka, uyaluzelani phakathi kimi na? Lindela uNkulunkulu ngethemba, ngoba ngisayophinde ngimbonge, yena msindisi noNkulunkulu wami!

AmaHubo 44

Ukuhlengwa kwabasendulo nokuhlupheka kwanamuhla

Elethulwe kumculisi; elabozalo lukaKhora; inkondlo enesifundo.

¹Nkulunkulu, sazizwela lendaba ngezethu izindlebe, okhokho bethu basilandisa ngayo, ngalokho owakwenza emihleni yabo, ukwenza ezikhathini zasemandulo.

²Wahlakaza izizwe ngengalo yakho, wabatshala ezweni lazo bagxila, wachitha izinhlanga, bakhula banda.

³Kabalidlanga izwe ngezikhali, kabalinqobanga ngamandla ezikhwepha zabo, kwaba ngesokunene sakho nengalo yakho ubabuka ngobuso obunomusa, ngokuba wawumi nabo ubathakasela.

⁴Nkulunkulu, nguwe iNgonyama iNkosi yami; lekelela abakwaJakobe banqobe!

⁵Ngawe sigwaza izitha zigingqike phansi, ngegama lakho sibadovadove abasivukelayo.

⁶Angethembeli ogwibisholweni lwami, nenkemba yami ngeke ingisindise.

⁷Nguwe osisindise kwabamelene nathi, abasizodayo wabahlula behlelwa amahloni.

⁸Sizigabisa ngawe Nkulunkulu njalo nje, siyobonga igama lakho naphakade.*Kunekhefu.*

⁹Nokho-ke ususiyekelele sahlulwa sahlazeka, awusaphumi namabutho empi yakithi.

¹⁰Usenza sikhumuke ezitheni zethu, abasizodayo basiphange impango.

¹¹Uyasiyekelela sihlatshwe njengezimvu, uyasichitha sisakazeke emazweni ezizwe.

¹²Uthengisa ngabantu bakho ngentengo enci, lentengo kawutholanga nzuzo kuyo.

¹³Usenza inhlekisa kwabakhelene nathi, basibhinqe basiklolodele ngapha nangapha.

- ¹⁴Singondabizekwayo phakathi kwabezizwe, izinhlanga ziyaseyisa zinikine amakhanda.
- ¹⁵Ngihlala ngilibona ihlazo lami, ngiyanyobozela sengehlelwe ngamahloni,
- ¹⁶nxá ngizwa bengiklibhizela bengihlambalaza, nxa ngibona isitha sami nomphindisi.
- ¹⁷Lezizehlakalo zonke zisehlakalele phezu kokuba singakukhohlwanga wena, isivumelwano sakho singasephulanga.
- ¹⁸Asihlubukanga kuwe ngezinhliziyó zethu, asiphambukanga endleleni yomyalo wakho.
- ¹⁹Nokho wasifohloza wasiyekelela siphakathi kwezimpungushe ehlane, wasimboza ngefu lethunzi lokufa.
- ²⁰Nkulunkulu wethu, ukuba sakhohlwa ukukhuleka ngegama lakho samukela unkulunkulu mumbe samkhonza,
- ²¹ubungeyukukwazi yini lokho Mvelinqangi, wena obona izizindlo zezinhliziyó?
- ²²Ngenxa yakho sibulawa lize liyoshona, kuthiwa siyizimvu zokuhlatsywa.
- ²³Phaphama Nkosi yami! Ulaleleni ubuthongo na? Vuka, ungasiyekeleli unomphela!
- ²⁴Usifulathelelani usitheze ubuso bakho, ukhohlwe usizi nokucindezelwa kwethu na?
- ²⁵Siphoxekile silele phansi othulini, sithe cubululu ngezisu emhlabathini.
- ²⁶Yima ngobumo usisize usihlenge ngenxa yesihe sothando lwakho lwafuthi.

AmaHubo 45

Inkondlo yomgcagco wengonyama

Elethulwe kumculisi ukuba lihlatshelelwe ngendlela ethi "Iminduze"; elabozalo lukaKhora. Lenkondlo enesifundo iyiculo eliphathelene nothando.

- ¹Inhliziyó yami iyakitazeka ngenkondlo, yeneme ngendaba emnandi; ngibongela ingonyama ebusayo, ulimi lwami luyayihubela lunjengosiba lukanobhala olusheshisayo.
- ²Bayede! Umuhle udelile kunabantwana babantu, izindebe zakho zikhangisa ngobuciko bokukhuluma, ngakho uMvelinqangi ukubusisile phakade.
- ³Wena qhawe lamaqhawe, bhinca inkemba yakho okhalo, uhlome ngenkazimulo nobukhosi bakho!
- ⁴Bayede ume njalo! Gibela uphume impi uphumelele umele iqiniso nokuzithoba nokulunga, usuyobona lapho esokunene sakho sigila izimangaliso ezesabekayo.

⁵Imicibisholo yakho ikhaliphile, ijuqa inhliziyo yezitha zenkosi, udle izizwe zidindilize phambi kwakho.

⁶E Nkulunkulu! Isihlalo sakho sobukhosi ngesaphakade, intonga yobukhosi uyiphethe ngobuqotho.

⁷Ukulunga uyakuthanda, uzonda ukonakala, ngakhoke uMvelinqangi uNkulunkulu wakho wakugcoba ngomgcobo othokozisayo, wena wase ujabula lokhu okwedlula okontanga yenu.

⁸Amakha enhlaka nawenhlaba nawempepho aqhole yonke invunulo yakho. Ezindlini ezihlobe ngophondo lwendlovu kubethwa izingubhu nemiqangala, kuzwakala kamnandi kukuthokozisa.

⁹Phakathi komndlunkulu wasesigodlweni sakho kukhona namadodakazi amakhosi; indlovukazi ingakwesokunene sakho, ivunule ngezegolide elishisiweyo.

¹⁰Kuwe ndodakazi yami ngithi: “Geqa indlebe ulalele engikushoyo! Khohlwa yisizwe sakini nabakwenu!

¹¹Inkosi izolangazelela ubuhle bakho, lena yinkosi yakho uzoyiguqela!

¹²AbaseThire bayokwethula kuwe izipho; izicebi zezizwe zizozincengela kuwe.”

¹³Kwakuhle kwethu! Nangu umlobokazi! Ndodakazi yenkosi! Usho ngobukhazikhazi bakhe esesigodlweni, unemvakazi ephethwe ngobuhlalu begolide.

¹⁴Uvathe ezifekethisiweyo usiwa enkosini, nezimpelesi zakhe ziyizintombi ezimsulwa, ziyayilandela, nazo zisiwa kuyo.

¹⁵Basiwa kuyo ngokujabula nokwesasa, baye bangene esigodlweni sengonyama.

¹⁶Bayede nkosi! Amadodana oyowathola ayobusa esikhundleni sawokhokho bakho, abekwe alibuse emhlabeni wonke.

¹⁷Ngalenkondlo igama lakho liyokhunjulwa, laziwe yizizukulwane ngezizukulwane, izizwe zikudumise ungunaphakade.

AmaHubo 46

UNkulunkulu uyisiphephelo sethu namandla ethu

Elethulwe kumculisi ukuba lihlatshelwe ngemitshingo; elabozalo lukaKhora; igama.

¹UMvelinqangi uyisiphephelo namandla ethu, ekuhluphekeni konke uhlala elusizo.

²Ngakhoke asisoze sashaywa luvalo noma umhlaba ungaguquka uzamazame nezintaba zidilikele ezinzulwini zolwandle,

³noma ulwandle lungahlokoma ludlangalale nezintaba zishukunyiswe yisidlakadla salo. *Kunekhefu.*

⁴Kukhona umfula omigobhozo yawo iletha ukuthokoza emzini kaMvelinqangi, enxulumeni elingcwele loPhezukonke.

⁵UMvelinqangi uhlala kulomuzi, ungezanyazanyiswe, uNkulunkulu uyofika awuhlenge entathakusa.

⁶Izizwe ziyaxokozela imibuso izanyazanyiswe, ukhuluma ngephimbo lakhe ubusuncibilika uphele umhlaba.

⁷USimakade iNkosi yamaviyo umi nathi, uNkulunkulu kaJakobe uyinqaba yethu. *Kunekhefu.*

⁸Wozani nibone imisebenzi kaSimakade, insambatheka ayenze emhlabeni!

⁹Ulamula izimpi nasemikhawulweni yomhlaba, afohloze imicibisholo, ephule imikhonto, izinqola zempi azithungele ngomlilo.

¹⁰Uthi: “Ayiphele! Khumbulani ukuthi mina nginguMvelinqangi, uNkosinkulu obusa izizwe, uNkosinkulu obusa umhlaba.”

¹¹USimakade iNkosi yamaviyo umi nathi, uNkulunkulu kaJakobe uyinqaba yethu. *Kunekhefu.*

AmaHubo 47

UNkulunkulu uyiNkosi ebusa umhlaba wonke

Elethulwe kumculisi; elabozalo lukaKhora; ihubo.

¹Shayani ihlombe zizwe zonke, halalisani nidumise uMvelinqangi, nihube nihlokome ngenjabulo!

²USimakade oPhezukonke uyesabeka, unguNkosinkulu obusa umhlaba wonke.

³Wagoba izizwe nezinhlanga zasikhothamela, sahamba phezu kwazo ngezinyawo.

⁴Wasikhethela lelizwe laba yisabelo agaba ngaso uJakobe amthandayo. *Kunekhefu.*

⁵UMvelinqangi ukhuphuke ngenhlokomo, wenyuka uSimakade kukhala uphondo.

⁶Hubelani uMvelinqangi, hubanini! Hubelani iNgonyama, hubanini!

⁷UMvelinqangi unguNkosinkulu womhlaba; hubani isihlabelelo nimhashe!

⁸UMvelinqangi uyiNkosi ubusa izizwe. UMvelinqangi usesihlalweni esingcwele sobukhosi.

⁹Izikhulu zezizwe zikhandene ndawonye kanye nesizwe sikaNkulunkulu ka-Abrahama, ababusi bomhlaba bangabakaNkulunkulu. Waphakanyiswa uyababazeka kakhulu.

AmaHubo 48

Ubuhle nodumo lweZiyoni

Iculo; ihubo labozalo lukaKhora.

- ¹Mkhulu uSimakade, uyabongeka ngempela, uyabongeka emzini kaNkulunkulu wethu, uyadunyiswa entabeni yakhe engcwele.
- ²Kuthatha amehlo ukuphakama kweZiyoni, intaba esemaphethelweni asenyakatho, iyigugu elithokozisa umhlaba wonke, inxuluma lomuzi kaNkosinkulu.
- ³Phakathi kwezindlu zawo zobukhosi uMvelinqangi uzikhombisile ukuthi uyingqaba.
- ⁴Amakhosi-ke abuthana ndawonye, eqa umncele onke asewugasela.
- ⁵Anele ukuwubona kwaphela nasozwanini, ashaywa uvalo, acela empunzini.
- ⁶Afikelwa usizi lapho, aqhaqhazela, azibhonqa njengowesifazane obelethayo.
- ⁷Uceka imikhumbikazi yaseThashishi, uyibhubhise ngesiphepho sasempumalanga.
- ⁸Kade sezwa ngemisebenzi kaNkulunkulu, sesize sazibonela thina ngawo omabili emzini kaSimakade iNkosi yamaviyo, emzini kaNkulunkulu wethu; uNkulunkulu uyowumisa uqine unaphakade. *Kunekhefu*.
- ⁹Phakathi kwethempeli lakho Nkulunkulu sizindla ngesihe sothando lwakho.
- ¹⁰E Mvelinqangi! Igama lakho elinodumo liyadunyiswa kuze kube semikhawulweni yomhlaba; esokunene sakho sigcwele ukulunga.
- ¹¹Mabajabule labo abakhele iZiyoni, bathokoze nabasemizini yaseJudiya ngenxa yobuqotho bezahlulelo zakho.
- ¹²Hambani nizungezelele iZiyoni, nilikakezelele nibale imibhoshongo yalo.
- ¹³Izindonga zalo zibukeni ngokucophelela, nichushe ezindlini zalo zobukhosi, nce nilandise izizukulwane eziyolandela,
- ¹⁴nizibikele ukuthi uMvelinqangi unjalo, unguNkulunkulu wethu phakade naphakade, nguye oyosihola ngisho nasekufeni.

AmaHubo 49

Ubuwula bokwethemba umcebo

Elethulwe kumculisi; elabozalo lukaKhora; ihubo.

- ¹Lalelani nizwe lokhu zizwe zonke, nibeke indlebe nina nonke basemhlabeni,
- ²nilalele bantukazana nezikhulu, nani zicebi nezimpofana ngothi lwenu!
- ³Izindebe zami ziyokhuluma ulwazi, nginkankanye imicabango yokuhlakanipha.
- ⁴Ngiyobeka indlebe ngilalele umzekeliso, kuqhibuke imfumbe yami ngokudlala ugubhu.

- ⁵Ngiyokwesabani ngezikhathi zobunzima lapho ngihaqwe ngububi balababantu abafuna ukungibhozomela basizakale ngami,
- ⁶labo abethembela emnothweni wabo bezigabisa ngobukhulu bengcebo yabo?
- ⁷Umuntu angemhenge neze umfowabo, angeyihlawulele impilo yakhe kuMvelinqangi,
- ⁸ngoba intengo yomuntu ibiza kabi. Akukho nani angase athengwe ngalo,
- ⁹ukuba aphile njalonjalo emhlabeni, ukuba angafi asiwe kwagoqanyawo.
- ¹⁰Ziyabonwa nezihlakaniphi zifa nokufa, zishiye ingcebo yazo idliwe ngabanye njengoba kubhubha iziwula nezithutha.
- ¹¹Enhliziyweni yazo ziziduda zithi amakhaya azo ayohlala njalo akhile, imizi yazo ime ezizukulwaneni, ziqamba amazwe ngamagama azo.
- ¹²Owasemhlabeni noma edume kangakanani akwenzeki ukuba ahlale angafi, unjengesilwane esifa kuphele kanjalo.
- ¹³Umthetho weziwula, ziphetha kanjalo, nabananzela inkulumo yazo bagcine kanje. *Kunekhefu.*
- ¹⁴Bamiselwe ukusiwa kwagoqanyawo njengezimvu ezimiselwe ukubulawa, bese beqelwa ngukufa umalusi wabo. Abaqotho babuse phezu kwabo ekuseni lapho izidumbu zabo zibola kwabafuleyo zingabe zisaba nandawo yazo yokuhlala.
- ¹⁵Kodwa uMvelinqangi uyohlenga ukuphila kwami emandleni okufa, abesengamukela. *Kunekhefu.*
- ¹⁶Ungesabi lapho umuntu eceba, lapho ingcebo yendlu yakhe yanda!
- ¹⁷Kanakuhamba nalutho mhla efayo, ingcebo yakhe ingemlandele elibeni.
- ¹⁸Noma angaze atamase esaphila, bamdumise ngoba evunywe yikho konke,
- ¹⁹nokho uyokuya kwelabafuleyo koyise, abahlala ebunyangeni obungunaphakade.
- ²⁰Owasemhlabeni noma edume kangakanani, uma ehlala eyisiwula esingenangqondo unjengesilwane esifa kuphele kanjalo.

AmaHubo 50

UMvelinqangi ungumahluleli

Ihubo lika-Asafu.

- ¹UMvelinqangi uSomandla uNkulunkulu uSimakade uyakhuluma abize imbizo yomhlaba wonke kusukela empumalanga kuye entshonalanga.
- ²EZiyoni, endaweni ebuhle bayo buphelele, kuqhamuka uMvelinqangi agqame ngenkazimulo.

- ³UNkulunkulu wethu uyeza, engezile ngakuthula. Phambi kwakhe kunomlilo oqothulayo, uhaqwe yisivunguvungu esinamandla.
- ⁴Ubiza izulu eliphezulu ngisho nomhlaba ukuba athethe icala nabantu bakhe,
- ⁵uthi: “Qoqani abangcwele bami beze kimi, abenza isivumelwano nami ngemihlatshelo!”
- ⁶Izulu lishumayela ngokulunga kwakhe ngoba uMvelinqangi uqobo ungumahluleli. *Kunekhefu.*
- ⁷“Ngiyakhuluma bantu bami, ngiyakhuluma, maIsrayeli ngiyaniyala ngiyanivusa! Yimi uMvelinqangi, uNkulunkulu wenu.
- ⁸Anginisoli ngenxa yemihlatshelo yenu; iminikelo yenu eshiswa elathini ihlala njalo iphambi kobuso bami.
- ⁹Into nje, angidingi nkunzi enizifuyileyo nazingama ezibayeni zenu zemihlambi,
- ¹⁰ngoba izilwane zonke zehlathi zingezami, nemilalandle emagqumeni ayinkulungwane.
- ¹¹Ngazi zonke izinyoni eziseziganeni, konke okuphilayo emathafeni kungokwami.
- ¹²Ukuba bengilambile bengingeke nginitshela ngoba umhlaba ungowami nokukuwo.
- ¹³Ngiyayidla yini inyama yezinkunzi kumbe ngiphuze igazi lezimpongo na?
- ¹⁴Yethulani kimi iminikelo engukubonga kwenu, nigcine izethembiso zenu koPhezukonke!
- ¹⁵Anongibiza ngosuku lokuhlupheka; ngonisindisa bese nina ningidumisa.”
- ¹⁶Kulowo-ke oyisonakali uMvelinqangi uthi: “Yini ukuba uqekethe izimiso zami, isivumelwano sami sibe solimini lwakho na?
- ¹⁷Ingani uyisalakutshelwa esingezwayo, ihlongandlebe elichitha engikushoyo.
- ¹⁸Ubona isela uhambisane nalo, umdibi munye kanye nabaphingayo.
- ¹⁹Awuzibambi ekukhulumeni ububi, izindebe zakho zicevuza inkohliso.
- ²⁰Unukubeza umfowenu ngamazwi, ulokhu uhleba umntakanyoko.
- ²¹Lokhu-ke ukwenzile ngazithulela, wacabanga ukuthi nginjengawe. Ngizokulaya ngikwenekhele ububi bakho.
- ²²Qaphelani lokhu nina eningidelelayo funa ngininephule kungabikho onihlengayo!
- ²³Ukungibonga kungumnikelo engidunyiswa ngawo, umuntu ohamba ngobuqotho ngiyombonisa ukuthi ngiyasindisa.”

AmaHubo 51

Elokucela ukuthethelelwa

Elethulwe kumculisi; ihubo likaDavide. Walihaya lapho umphrofethi uNatana ehambele kuye njengoba uDavide ayeselale noBhathshebha.

- 1**Ngihawukele Nkulunkulu ube nomusa ngenxa yothando lwakho olungapheliyo! Lesule liphele icala engilenzileyo ngenxa yobubele bakho obukhulu!
- 2**Ngigezisise ububi bami buphele, ungihlanze isono sami sisuke!
- 3**Ngiyalibona icala lami lisobala, nginevuso lesono sami njalonjalo.
- 4**Ngonile kuwe, ngona kuwe kuphela, ngakwenza lokho okubi phambi kwakho, ngakhoke kulungile ukuba ungahlulele, uqotho nalapho ungilahla ngecala.
- 5**Ngonakala kwasekuzalweni kwami, nganesono kusukela umame ebamba isisu.
- 6**Uthokoza ngobuqotho ezibilinini zami; ngifundise inhliziyo yami ihlakaniphe!
- 7**Ngichinse ngehisophe nce ngihlanzeke, ngigeze ngibe mhlophe kuneqhwa!
- 8**Ngizwise ukuthokoza nokwesasa, kwethabe namathambo owafohlozileyo!
- 9**Sitheza amehlo ungaziboni izono zami, usal' usuwesula amacala ami onke.
- 10**Nkulunkulu, hlanza inhliziyo yami uyidale kabusha, uvuselele kimi umoya oqinileyo!
- 11**Ungangixoshi phambi kobuso bakho ungephuze uMoya wakho oyiNgcwele!
- 12**Buya ungithokozise ngensindiso yakho, ungiphase ngibe nomoya ovumayo!
- 13**Yikhona ngofundisa izoni indlela yakho, izeqamthetho ziphenduke zibuyele kuwe.
- 14**Nkulunkulu, wena msindisi wami, ngikhulule ngingabi nacala legazi, yikhona ngiyohlokoma ngenjabulo, izindebe zami zidumise ukulunga kwakho.
- 15**Nkosi yami thukulula ulimi lwami, umlomo wami uhashe udumo lwakho!
- 16**Phela awuthakaseli mihlatshelo; ukuba ubuyifuna bengizoyethula kuwe; kayikujabulisi iminikelo eshiswayo.
- 17**Umhlatshelo owemukeleka kuNkulunkulu ngumoya odabukileyo nowephukileyo; Nkulunkulu, awuyikubukela phansi inhliziyo eyephukileyo nechobokileyo.
- 18**Lenzele okuhle iZiyoni ngomusa wakho, ubuye uvuse izingange zaseJerusalema!
- 19**Yikhona uyothokoza ngemihlatshelo efaneleyo, ngeminikelo eshiswayo kanye neshiswa yonke, bakuhlabise ngezinkunzi elathini lakho.

AmaHubo 52

Kuyize ukuzigabisa ngobubi

Elethulwe kumculisi; inkondlo enesifundo kaDavide. Wayihaya lapho uDowegi wakwaEdomu eye kokwazisa uSawuli ukuthi: "UDavide usefikile endlini ka-Ahimeleki."

¹Uziqhayiselani ngobubi we siqhwa, uzincomelani uzigabise ngobubi? Uthando lukaSomandla lungunaphakade.

²Ulimi lwakho luphotha ukonakala, lubukhali njengensingo qilindini.

³Uthanda ububi kakhulu kunokulunga, uthanda amanga kunokukhuluma iqiniso. *Kunekhefu.*

⁴Uthanda inkulumo ecekela phansi, wena onolimi olubi oluqilizayo.

⁵Ngakhoke uSomandla wokuchitha unomphela, akuhlwithe akunyomule emzini wakho, akusiphule ezweni labaphilayo. *Kunekhefu.*

⁶Abaqotho bayokubona lokhu bathuthumele, bakuhleke, bakwenze ihlaya bathi ngawe:

⁷"Yelele! Nansi indodandini engamenzanga uMvelinqangi inqaba yayo kepha yethembela ensadeni yengcebo yayo, yaphika ngamandla ezifiso zayo ezimbi."

⁸Kodwa mina ngiyoba njengesihlekehleke sesihlahla, umhlwathi oluhlaza endlini kaNkulunkulu, ngethemba phakade naphakade isihe sothando lukaNkulunkulu.

⁹E Mvelinqangi! Ngiyokubonga nanini ngokwenzileyo, ngimemezele ukuthi lihle igama lakho ngiphambi kwebandla labangcwele bakho.

AmaHubo 53

Ubuwula nokonakala kohlanga lwabantu

(AmaHubo 14:1-7)

Elethulwe kumculisi ukuba lihlatshelwe ngendlela ethi "Isifo"; inkondlo enesifundo kaDavide.

¹Isiwula sesonakali sizindla sithi: "Akukho Nkulunkulu lapha onake esikwenzayo." Bonke bonakele, banamanyala anengekayo, akakho noyedwa owenza okuhle.

²UMvelinqangi uyasinga esezulwini ubuka abantu emhlabeni phansi ukuthi ukhona yini oqondayo okhuthalele ukufuna uMvelinqangi.

³Phinde, baphambukile bonke bahlubukile, bonakele bonke ngothi lwabo, akakho noyedwa owenza okuhle, phinde, akakho noyedwa.

⁴Ziyoze zifunde nini izigilamkhuba, lababantu abaqhobozela abantu bami bebadla sengathi basobozela isinkwa, bebe bengakhuleki kuNkulunkulu na?

⁵Nampo kushayana amadolo kubo, nakuba kungekho lutho olushayisa uvalo, ngoba uMvelinqangi wabahlakaza amathambo laba abanihlasele banivimbezela. Nabahlula behlelwa ngamahloni ngoba uMvelinqangi wabadela wabalahlala.

⁶Sengathi eZiyoni kungavela usindiso lwesizwe sakwaIsrayeli! Mhlazana uMvelinqangi eqeda usizi edlisa isizwe sakhe ngoludala, impela bayojabula abakwaJakobe, isizwe sakwaIsrayeli sithokoze.

AmaHubo 54

Elokucela ukuvikelwa ezitheni

Elethulwe kumculisi ukuba lihlatshelelwe ngezingubhu; inkondlo enesifundo kaDavide. Wayihaya mhla abaseZifi beye kuSawuli bafike bathi: "Uyazi nje ukuthi uDavide ucashe lapha kithi?"

- ¹Nkulunkulu ngisindise ngenxa yegama lakho, ungithethe ecaleni ngamandla akho!
- ²Nkulunkulu yamukela umkhuleko wami, ubeke indlebe uzwe lokhu engikushoyo!
- ³Ngisukelwe abafo bangihlasela, izigcwelegcwele zide zingizingela, labo abangamshayi mkhuba uNkulunkulu. *Kunekhefu*
- ⁴Impela uNkulunkulu ungumhlengi wami, iNkosi yami ivikela ukuphila kwami.
- ⁵Mabazigwaze ngowabo abangiqamekelayo, ubachithe wena othembekileyo.
- ⁶Yikhona ngizonikela kuwe ngokujabula, ngibonge igama lakho ngilidumise, ngoba lihle igama lakho Simakade.
- ⁷Lingihlengile ezinhluphekweni zonke, ngazibuka izitha zami ngajabula.

AmaHubo 55

Elokucela ukuba amaxoki abhujiswe

Elethulwe kumculisi ukuba lihlatshelelwe ngezingubhu; inkondlo enesifundo kaDavide.

- ¹Wo Mvelinqangi, beka indlebe ulalele umkhuleko wami, ungafulatheli lapho ngicela umusa kuwe!
- ²Ngizwele unginake ungiphendule, nginesibibithwane ngiyakhala ngiyabubula
- ³njengoba ngizwa izitha zingisongela, izonakali zingcindezela kabi, zingethwese usizi phezu kolunye zinolaka zingibambela amagqubu.
- ⁴Inhliziyo iyatshutshumba ngaphakathi kimi, ukufa kungixhaphazelise amathumbu.
- ⁵Ngiphethwe yingebhe ngiyesaba, ngishaywa uvalo olungiqeda amandla.
- ⁶Ngase ngithi: "Ukuba benginamaphiko njengejuba! Bengiyondizela kude ngiphumule,
- ⁷ngishweze ngiye kwamamangalahlwa, ngithi gozololo ehlane lakwangcedomhlophe." *Kunekhefu.*
- ⁸Bengiyoshesha ngiyocasha engosini, ngibalekele isivunguvungu nesiphapho.

- ⁹Wo Nkosi yami bachithe, inkulumo yabo ingahlangani; emzini ngibona umbango nobudlova.
- ¹⁰Imini nobusuku bazungelezela umuzi, bangqengqa phezu kwezingange zawo; phakathi kuwo kubusa ububi nosizi.
- ¹¹Kukhona umonakalo phakathi kuwo, enkundleni abupheli ubudlova nenkohliso.
- ¹²Akuyiso isitha sami esingiklolodelayo, ukuba bekunjalo bengiyothula ngibekezele; ozigabisa ngami akuyena ongibangisayo, ukuba bekunjalo bengiyocasha singabonani.
- ¹³Kanti nguwe ebesilibutho linye nawe singamathe nolimi, wena mngane wami.
- ¹⁴Sasivulelana izifuba sizwana, sasisemshungwini oya endlini kaNkulunkulu.
- ¹⁵Azizunywe ukufa izitha zami, zithunyelwe kwelabaphansi zisaphila, ububi busemakhaya nasenhliziyweni yazo.
- ¹⁶Mina ngokwami ngikhala kuNkulunkulu, uyongisiza angisindise uSimakade.
- ¹⁷Kusihlwa nangokusa naseminibebade ngizwakalisa ukukhala nokububula, yikhona eyolizwa izwi lami.
- ¹⁸Uyongihlenga kube khona inhlalakahle, angivikele ngingahlaselwa muntu, ngokubanini baningi abamelene nami.
- ¹⁹USomandla uyongizwa angiphendulele kubo, yena isimakade esisesihlalweni sobukhosi. *Kunekhefu*. Kabaphenduki, kabamesabi uMvelinqangi.
- ²⁰Lowomnganendini ugadla alimaze labo ayehlezi kahle nabo ngokuthula, ephule isivumelwano sabangane.
- ²¹Amazwi akhe ashelelisa okwephehlwa, kodwa uhlongoza impi ngenhliziyo; unamazwi athambileyo kunamafutha, kepha ebe eyinkemba ebukhali.
- ²²Asethule imithwalo yethu siyishiye kuSimakade okunguyena oyosiphasa, phakade naphakade akayikuvuma ukuba olungileyo azanyazanyiswe.
- ²³Kodwa wena Mvelinqangi uyobaphosa egodini kwelabaphansi lababantu abanequngo abakhohlisayo, bangayiphili ingxenye yempilo yabo. Kodwa mina ngokwami ngethembela kuwe.

AmaHubo 56

Umkhuleko womuntu othembele kuNkulunkulu

Elethulwe kumculisi ukuba lihlatshelelwe ngendlela ethi "Ijuba elingakhaliyo lisemthini yakwamamengalahlwa"; inkondlo kaDavide. Wayihaya eseGathi lapho amaFiliste embambile.

- ¹Yiba nomusa Nkulunkulu ungihawukele, izitha zami zingifihlikeza phansi, izilwi zingixina ngempi usuku lonke.
- ²Izitha ziyangifihlikeza lize lishone, baningi abalwayo nami bezigabisa.

- ³Kuthi nxashana ngifikelwa uvalo ngihlale njalo ngethembele kuwe.
- ⁴Ngethembela kuNkulunkulu ngibonga isethembiso sakhe, ngethembela kuNkulunkulu angiyikwesaba nakancane, owasemhlabeni angangenzani na?
- ⁵Balokhu begaxeka kokwami belokhu njalo behlose ukungilimaza.
- ⁶Bangakhela ugohe bahoba esitha, baqaphelisise lapho nginyathela khona befuna ithuba elihle lokungibulala.
- ⁷Baphunyuke kodwa sebone kangaka na? Ngolaka lwakho Nkulunkulu goba izizwe!
- ⁸Uyakwazi konke ukuzulazula kwami. Londa izinyembezi zami esigujini sakho; angithi zilotshiwe encwadini yakho?
- ⁹Yikhona izitha zami ziyokwehlulwa zihlehliselwe emuva mhla ngikhala kuwe. Ngikwazi kahle kakhulu lokhu ukuthi uNkulunkulu umi nami.
- ¹⁰Ngethembela kuNkulunkulu ngibonga isethembiso sakhe, ngethembela kuSimakade ngibonga isethembiso sakhe,
- ¹¹ngethembela kuNkulunkulu angiyikwesaba nakancane, umuntu womhlaba angangenzani na?
- ¹²Nkulunkulu, ngizibophezele kuwe ngezifungo, ngiyozifeza ngeminikelo yokukubonga,
- ¹³ngoba waphephisa ukuphila kwami ekufeni, wavikela izinyawo zami zangakhubeka ukuba ngihambe nginevuso ngoNkulunkulu ngisekukhanyeni okusezweni labaphilayo.

AmaHubo 57

Elokucela ukusindiswa ekuhlushweni

(AmaHubo 108:1-5)

*Elethulwe kumculisi ukuba lihlatshelwe ngendlela ethi "Ungabhuhisi"; inkondlo kaDavide.
Wayihaya esemgedeni lapho ebalekela uSawuli.*

- ¹Ngihawukele Mvelinqangi, ngihawukele, wena siphephelo sokuphila kwami, ngaphansi komthunzi wamaphiko akho ngiyokhosela kuze kudlule lamashwa.
- ²Ngikhala kuMvelinqangi oPhezukonke, kuSomandla ophelisa konke okwami.
- ³Uyothumela esezulwini angisindise lapho ongikhonkothayo engiklolodela. *Kunekhefu*. UMvelinqangi uyothumela akhombise uthando lwakhe nokwethembeka kwakhe.
- ⁴Ngihlezi phakathi kwabayizingonyama, ngilele phakathi kwabantu abavutha bhe. Amazinyo abo ayimikhonto nemicibisholo, ulimi lwabo luyisinkemba esibukhali.
- ⁵Mvelinqangi, akugqame ubukhosi bakho kweliphezulu, udumo lwakho lwande emhlabeni wonke!

⁶Izitha zicuphe izinyawo zami ngesihibe, umoya wami ucwila phansi udangele; zemba igebe ukuba ngikhalakathele, zaphonseka kwakhalakathela zona. *Kunekhefu*.

⁷Inhliziyo yami imi isibindi Nkulunkulu, sengimi isibindi ngineqholo, ngiyocula, ngikuhubele ngikudumise.

⁸Phaphama uvuke mphefumulo wami! Phaphamani luqwabe lwami nomqangala; ngomculo wenu ngiyovusa intathakusa.

⁹Nkosi yami, ngiyokudumisa phakathi kwezizwe, ngikuhubele naphakathi kwezinhlanga.

¹⁰Ubukhulu besihe sothando lwakho bufinyelela ezulwini nakweliphezulu, ukwethembeka kwakho kuye kushaye emafwini.

¹¹E Mvelinqangi! Akugqame ubukhosi bakho kweliphezulu, udumo lwakho lwande emhlabeni wonke!

AmaHubo 58

Elokucela ukuba izonakali zijeziswe

Elethulwe kumculisi ukuba lihlatshelelwe ngendlela ethi: "Ungabhubhisi"; inkondlo kaDavide.

¹Imbala nikhipha zona yini izinqumo zobuqotho nxashana nithule du ningasho lutho na? Nahlulela ngokulunga ningavuni muntu na?

²Phinde, enhliziyweni nakha ubuqili, ezweni nisebenzisa izandla zenu enigcweleza ngazo ezweni lonke.

³Izoni ziphambuka ekulungeni zisanda kuzalwa, baqamba amanga beduke mhla bezalwayo.

⁴Ububi obukubo bunjengobuthi benyoka, unembeza wabo udla umvimbandlebe, bafana nebululu eliyisithulu,

⁵alilizwa iphimbo lomthonyi wenyoka, aliwunaki umculo wengcweti yomlumbi.

⁶Nkulunkulu wohloza amazinyo omlomo wabo, wephule awomhlathi kulamabhongo Simakade!

⁷Mabasaphazeke njengamanzi ezigelezela, nxa onjalo eciba ngemicibisholo yakhe akube sengathi ibuthuntu!

⁸Abancibilike baphele njengomnenke uhamba uminineka injembunjembu, njengozelwe kwase kuphuphuma isisu, akaze alibona ilanga ezalwa.

⁹Umlilo ungakokheli ezinswanini ufudumeze izimbiza zenu zibile, isivunguvungu somoya sizophephula inyama eseluhlaza naleyo evuthiwe.

¹⁰Olungileyo uyojabula angcingcize lapho ebona kuphindiswa kwababi, abhoxoze ezingazini zezonakali.

¹¹Abantu sebeyothi: “Impela ukulunga kuletha umvuzo, ngokwempela ukhona uMvelinqangi uyaphila, nguyena owahlulela umhlaba ngobuqotho.”

AmaHubo 59

Elokucela ukhulengwa ezitheni

Elethulwe kumculisi ukuba lihlatshelelwe ngendlela ethi “Ungabhubhisi”; inkondlo kaDavide.

Wayihaya lapho uSawuli esethumele ukuba baqaphe umuzi kaDavide bambulale.

¹Nkulunkulu wami ngihlengi ezitheni, ngikhweze endaweni ephakemeyo, ungivikele kwabangivukelayo bangihlasele!

²Ngisindise kulababantu abayizigilamkhuba, ngikhulule ungihlengi kwabanequngo!

³Awubheke-ke, baqamekele ukuphila kwami, iziqhwaga zibuthanele ukungihlanganyela, ngingone lutho ngingenasono Nkosi yami.

⁴Bayagijima bayangithathelela ngingenacala. Vuka ungiphuthume ngosizo uzibonele!

⁵Nguwe uSimakade uNkulunkulu, iNkosi yamaviyo, uNkulunkulu kaIsrayeli; vuka ujezise bonke abezizwe, ungabi nasihe nakoyedwa walamambuka anobubi! *Kunekhefu.*

⁶Ayaye abuye agwavume kusihlwa njengezinja zihamba zihequnga umuzi wonke.

⁷Imilomo yawo ibholokoqa inhlamba, amazwi ezindebe zawo ayizinkemba athi: “Akakho ozwa esikushoyo!”

⁸Kepha wena Simakade uwahleka usulu, ubenze ihlaya nenhlele abezizwe bonke.

⁹Wena mandla ami, ngohlala ngikulindele, nqaba yami ephakemeyo Mvelinqangi.

¹⁰UNkulunkulu wami ongithandayo wongihlangabeza angisize, uMvelinqangi wongisiza ngibuke izitha zami ngename.

¹¹Ungabaqedeli hleze abantu bami bakhohlwe! Bahlakaze ubenze imizulane ngamandla akho, ubagobe Nkosi yami sihlangu sethu!

¹²Amazwi abawakhuluma ngezindebe zabo ayisono esiphuma ngomlomo wabo. Mababhajwe ekuzigabiseni kwabo nangenxa yokuqanganisa namanga abo.

¹³Baqothule ngolaka lwakho ubaqede, uqothe imbokodwe nesisekelo, kwazeke ukuthi uMvelinqangi ubusa kwaJakobe nasemikhawulweni yomhlaba. *Kunekhefu.*

¹⁴Bayaye babuye bagwavume kusihlwa njengezinja zihamba zihequnga umuzi wonke.

¹⁵Behla benyuka befuna abangakusobozela, kuthi nxa bengasuthanga bahhahhame.

¹⁶Kodwa mina ngokwami ngiyocula ngibabaze amandla akho, ngihlokome ngenjabulo ekuseni, ngenxa yesihe sothando lwakho, ngoba wena ube yinqaba yami ephakemeyo nesiphephelo sami ngesikhathi sobunzima.

¹⁷Wena mandla ami ngiyokuhubela, nqaba yami ephakemeyo Nkulunkulu, Nkulunkulu ongithanda ungunaphakade.

AmaHubo 60

Elokucela usizo, ukuba isizwe selekelelwe ezitheni

(AmaHubo 108:6-13)

Elethulwe kumculisi ukuba lifundiswe laziwe, lihlatshelwe ngendlela ethi "Ubufakazi bungumnduze"; inkondlo kaDavide. Wayihaya lapho elwa nama-Aramu aseMesophothiya nawaseZobha, uJowabhu wayesephindela emuva wachitha abakwaEdomu abayizinkulungwane eziyishumi nambili endaweni ethiwa yisiGodi seSwayi.

¹Wo Nkulunkulu! usiyekelele wasilahla saze sachithwa ngoba usithukuthelele. Sisize sibuye sidle ngoludala!

²Wazamazamisa umhlaba waqhekeka, vala izimfa zawo ngoba uyaxegezela!

³Abantu bakho ubadlulise ebunzimeni, wabadakisa ngewayini kwaphambana imilenze.

⁴Kodwa lababantu abakwesabayo ubaphakamisele isihlangu nce baqoqane babalekele ugwibisholo lwesitha. *Kunekhefu.*

⁵Ukuze abathandiweyo bakho basindiswe, sinqobise ngesandla sakho sokunene ubuye futhi usizwe sikhuleka!

⁶UMvelinqangi ukhulume esebungcweleni bakhe wathi: "Ngiyozigabisa ngokuphumelela kwami, ngidabule iShekemu ngilabe, ngiklame isigodi saseSukothi.

⁷Izwe lakwaGiliyadi ngelami, ngelami nezwe lakwaManase, uEfrayimu uyisihlangu sokuvikela ikhanda lami, uJuda yintonga yami engibusa ngayo,

⁸elakwaMowabhu lingumcengezi enginqamulela izinyawo kuwo, kwelakwaEdomu kulapho ngikhweza khona izicathulo, nina maFiliste halalisani nihlokome ningikhonze!"

⁹Ngubani oyongisa kulowomuzi oyinqaba, aze angibeke kwelakwaEdomu na?

¹⁰Nkulunkulu, akuwena osidubile wasilahla? Wo Nkulunkulu! Awusaphumi impi namaviyo ethu na?

¹¹Sisize uselekelele komelene nathi, luyize usizo lomuntu womhlaba.

¹²Sonqoba ngoNkulunkulu engakithi, azidovadove phansi izitha zethu.

AmaHubo 61

Elokwethembela ekuvikelweni nguNkulunkulu

Elethulwe kumculisi ukuba lihlatshelelwe ngezingubhu; elikaDavide.

- ¹Nkulunkulu yizwa ukukhala kwami, ubeke indlebe ulalele umkhuleko wami!
- ²Ngikhala kuwe ngikude emajukujukwini, inhliziyo yami idangele ishona phansi. Ngikhuphulele kwelenyoni esiweni eside engingenombe kuso mina ngokwami!
- ³Ngoba wena ubulokhu uyisiphephelo sami, inqaba engumbhoshongo oqinileyo yokungivikela nxa ngihlaselwa yisitha.
- ⁴Sengathi ngingahlala endlini yakho njalo, ngikhosele phansi kwamaphiko akho! *Kunekhefu.*
- ⁵Nkulunkulu, uzwile izethembiso zami; labo abalesabayo igama lakho ubapha isabelo babe yizindlalifa.
- ⁶Yilonde inkosi ikhule ize ikhokhobe, iphile ize idle izinyoni zabantabayo!
- ⁷Ayihlale esihlalweni sobukhosi ibuse, yenganyelwe nguwe Nkulunkulu njalonjalo, isihe sothando lwakho lwafuthi nokwethembeka kwakho kuyilondolozelwe.
- ⁸Yikhona ngiyokuhubela unaphakade, ngifeze izifungo zami nsukuziphuma.

AmaHubo 62

NguNkulunkulu yedwa isiphephelo sethu

Elethulwe kumculisi ukuba lihlatshelelwe ngendlela kaJeduthuni; ihubo likaDavide.

- ¹Umphefumulo wami uzolile kuMvelinqangi yedwa kuphela, kukuye lapho kuvela khona insindiso yami.
- ²Nguye yedwa kuphela idwala nomsindisi nenqaba yami, angisoze ngatatazela kakhulu.
- ³Kuyoze kube nini umuntu nimsukela nina nonke ukuze nimbulele na? Unjengodonga olutshekele ukuwa nogange oludilizwe lwawiswa phansi.
- ⁴Ninenhloso eyodwa kuphela yokuba nimkhiphe esikhundleni sobukhosi, nijabulela ukuba niphote amanga, ningamashayakhothe abusisa ngezindebe, kanti enhliziyweni yenu niyaqanganisa. *Kunekhefu.*
- ⁵Mphefumulo wami thula uzole kuNkulunkulu yedwa kuphela, kukuye lapho kuvela khona ithemba lami.
- ⁶Nguye yedwa kuphela idwala nomsindisi nenqaba yami, empeleni ngeke ngitatazeliswe.
- ⁷Insindiso nodumo lwami lukuNkulunkulu; idwala eliqinileyo nesiphephelo sami, kukuNkulunkulu wami.
- ⁸Thembelani kuye njalo sizwe sami, nibhoboke nimkhiphele isifuba senu; uNkulunkulu uyisiphephelo sethu sokukhosela. *Kunekhefu.*

⁹Abantukazana banjengomoya oheleza udlule; izikhulu ziyize elingento yalutho. Bonke balula bayikhasi lapho bevivinywa, bawubalana kunomoya oheleza udlule.

¹⁰Nize ningabethembi ubudlova, ningabi nagugu ngokuqhewagiweyo, noma ingcebo yanda ningethembeli kuyo!

¹¹UMvelinqangi wake wakhuluma kanye, ngaphinda okwesibili ukukuzwa lokhu, ukuthi uNkulunkulu unguSomandla

¹²nokuthi wena Nkosi yami unesihe nothando. Uphindisa kubo ngamunye ngemisebenzi yabo.

AmaHubo 63

UNKulunkulu wenelisa umphefumulo owomileyo

Ihubo likaDavide alihaya lapho esogwadule lwaseJudiya.

¹Nkulunkulu, Nkulunkulu wami Somandla! Unguyena kanye engimfunisisayo, umphefumulo wami ukomele, uqobo lwami lulangazelela wena kwelesomiso ezweni elintula amanzi.

²Kanjalo ngakufuna endlini engcwele nce ngibone amandla nenkazimulo yakho.

³Luhle uthando lwakho olungapheliyo, lwedlula ukuphila uqobo lwakho, ngakhoke izindebe zami ziyokudumisa.

⁴Ngiyolokhu ngakubonga ngisaphila, ngiphakamisele izandla zami kuwe ngikukhulekele ngenxa yegama lakho.

⁵Umoya wami uyazitika ngawe kungathi ubusa ngamanoni namafutha, ngikudumisa ngikubonge ngithokoze, izindebe zami zihlokome ngenjabulo,

⁶lapha ngilele ocansini ngikukhumbule ngizindle ngawe phakathi kwamabili.

⁷Wena kade wawulokhu ungisiza, ngithokoza ngihlokoma ngenjabulo ngiphansi kompheme wamaphiko akho.

⁸Umphefumulo wami unamathele kuwe, esokunene sakho silokhu singisingethe.

⁹Lababantu abasophe ukungibulala boshona phansi baye kwelabafuleyo,

¹⁰bangenelwe ngomkhonto lapho ibambene, izidumbu zabo zinephulwe yizimpungushe.

¹¹Inkosi ebusayo iyothokoza ngoNkulunkulu, bonke abenza izifungo ngaye bazigabise, kepha umlomo wabanamanga uyovalwa.

AmaHubo 64

Elokucela ukuvikelwa ezitheni ezisithakele

Elethulwe kumculisi; ihubo likaDavide.

¹Mvelinqangi, yizwa izwi lami nxashana ngikhala; ngivikele esitheni esingishayisa uvalo!

- ²Ngicashise ngiphephe ozungwini lwababi nasesiphithiphithini sezigilamkhuba!
- ³Ulimi lwabo lulolwe okwemkemba, bacijisa amazwi ahlabayo njengemicibisholo
- ⁴ukuba bamcibe ongenacala besesitha, bamhlabe isidumo engazelele bengesabi.
- ⁵Bayadudana bavumelana ngeqhinga elibi, bacebisane ukucupha izingibe ekusithekeni, bayaye bathi: “Ngubani osibonayo na?”
- ⁶Bakha amaqhinga bacebisane bathi: “Sesilakhe kahle icebo esilihlongozayo.” Ujulile umqondo nenhliziyo yomuntu.
- ⁷UMvelinqangi abesebanemba ngomcibisholo, khona manjalo balimale babe namanxeba.
- ⁸Ulimi lwabo ngumkhonto abazigwaza ngawo, bonke abababonayo bayobaleka bethukile.
- ⁹Abantu bonke bayoshaywa uvalo bathi lokhu kungukwenza kukaMvelinqangi, bazindle ngemisebenzi yakhe bayiqonde.
- ¹⁰Olungileyo uyothokoza ngoSimakade: uyobaleka afike kuye aphephe, bazigabise bonke abanhliziyo ziqotho.

AmaHubo 65

Elokubonga izicolo zikaNkulunkulu emvelweni

Elethulwe kumculisi; ihubo eliyiculo likaDavide.

- ¹Nkulunkulu, kufanele impela ukuba bakudumise bazole eZiyoni, abantu bafeze izifungo zabo kuwe.
- ²Wena ohlalele ukuzwa imikhuleko, isintu sonke masizilethe kuwena.
- ³Amacala engiwenzileyo angigabhile, kepha mayelana nezeqo zethu wena uyazithethelela zonke.
- ⁴Ubusisiwe umuntu omkethayo umsondeze ahlale ezigodlweni zakho. Sisuthise ngokuhle kwendlu yakho, endaweni engcwele ethempelini lakho!
- ⁵Uyasiphendula ngezindlela ezimangalisayo wena olungileyo, Mvelinqangi msindisi wethu, wena okwethembela kuwe abantu bonke emikhawulweni yonke yomhlaba nasezilwandle ezikude emajukujukwini.
- ⁶Ngamandla akho wagxumeka izintaba, ubuqhawe buyixhama obhince ngalo.
- ⁷Ukhuza ukuduma kolwandle kulothe, ukugubha nokuhlokoma kwamadlambi alo, nesiphithiphithi esixokozelisa izizwe.
- ⁸Labo abahlala emaphethelweni omhlaba bethuswa izibonakaliso ozenzayo; uyabathokozisa bahlokome bajabule abasempumalanga nabasentshonalanga.

⁹Ngomusa wakho uwuhambele umhlaba wachuma, wawuvundisa kwavama nokudla; imifula yakho Mvelinqangi ihlala igcwele. Bese upha abantu inqwaba yokudla, nenhlabathi uyilungisela ukutshalwa.

¹⁰Ulinisa invula eyaneleyo emasimini, uhlelembe kahle amagade atubuzeke, uthambise umhlabathi ngembozisaahlanga, kukhule kahle kuvame invunde.

¹¹Uveza izicolo zakho ngonyakamuhle, lapho uhambe khona kulandela inala.

¹²Amadlelo ehlane ahluma akhephuzele, amagquma embatha uhlaza olujabulisayo.

¹³Imihlambi iklabile emadlelweni nezimfunda zibelethe amabele abomvu, kwethaba abantu bakuhubele.

AmaHubo 66

Elokubonga imisebenzi yamandla kaNkulunkulu

Elethulwe kumculisi; ingoma eyihubo.

¹Hlokomani mhlaba wonke nihubele uNkulunkulu.

²Hlabelelani nihashe igama lakhe, nihlokome udumo lobukhosi bakhe!

³Vumani nimhashe uMvelinqangi nithi: “Imisebenzi yakho mikhulu iyesabeka! Amandla akho makhulu ayesabeka, izitha zakho ziyoza zigaqa ngamadolo.

⁴Abantu bonke bomhlaba bakhothamela wena bayakubonga, badumisa igama lakho.” *Kunekhefu.*

⁵Ake nizobona imimangaliso kaMvelinqangi, kuyesabeka akwenzileyo phakathi kwabantu.

⁶Ulwandle walomisa lwaba umhlabathi, okhokho bawela umfula ngezinyawo; lapho-ke sajabula ngakwenzileyo.

⁷Uyabusa ngamandla akhe unaphakade, iso lakhe lihlezi liqaphele izizwe, amaphikankani awangazidli aziqhayise! *Kunekhefu.*

⁸Mbongeni uNkulunkulu wethu nina zinhlanga, mhasheni udumo lwakhe ngendumiso!

⁹Nguye osingathe impilo yethu sangafa, akavuma izinyawo zethu zishelele.

¹⁰Nguwe Nkulunkulu owasivivinyayo, wasihlambulula njengesiliva esithandweni.

¹¹Wavuma ukuba sibhajwe ogibeni, wasethwesa ubunzima emahlombe ethu,

¹²wavumela izitha zagijima phezu kwethu, sadabula emlilweni nasesikhukhuleni, wabuye wasikhipha kulokho sabusa.

¹³Ngoya endlini yakho neminikelo eshiswayo, ngifeze phambi kwakho izifungo zami,

- ¹⁴lezo engaziphimisa ngezindebe zami ngazikhuluma mhla ngihlezi ngilusizi.
- ¹⁵Ngiyokwethula kuwe izimvu ezinonileyo, nginikele ngazo zosiwe elathini, kunuke usi lokusha kwezinqama, ngikuhlabele izinkunzi nezimpongo. *Kunekhefu.*
- ¹⁶Wozani nizobeka indlebe nina nonke, nisondele nina enesaba uNkulunkulu, nginilandise ngalokho angenzele khona.
- ¹⁷Ngakhala kuye ngamcela usizo, indumiso yakhe yayisiba sesihlokweni solimi.
- ¹⁸Ukuba bengiqonde ububi enhliziyweni iNkosi uSomandla ngabe ayingizwanga.
- ¹⁹Nokho uNkulunkulu wangizwa ngempela, wabeka indlebe walalela umkhuleko wami.
- ²⁰Akubongwe uNkulunkulu ongangifulathelanga lapho ngikhuleka kuye, ongasigodlanga isihe sothando lwakhe.

AmaHubo 67

Izizwe zonke mazidumise uMvelinqangi

Elethulwe kumculisi ukuba lihlatshelwe ngezingubhu; ihubo eliyiculo.

- ¹Mvelinqangi, senzele ububele usibusise, usibuke ngobuso bakho obunomusa, *Kunekhefu,*
- ²ukuze indlela yakho yazeke kwamhlaba nosindiso lwakho ezizweni zonkana.
- ³Azikudumise izizwe Mvelinqangi, zikudumise izizwe ngothi lwazo!
- ⁴Akuhlokome izinhlanga ngentokozo, ngoba wehlulela izizwe ngobuqotho, uholo izinhlanga zawo wonke umhlaba. *Kunekhefu.*
- ⁵Azikudumise izizwe Mvelinqangi, kudumise izizwe ngothi lwazo!
- ⁶Umhlaba unethezekile ngenala yokudla, wena Nkulunkulu wethu usibusisile.
- ⁷UMvelinqangi wasibusisa kakhulu, sengathi bangamesaba bonke abahlala emikhawulweni yomhlaba.

AmaHubo 68

UNkulunkulu waseSinayi nguye osendlini engcwele

Elethulwe kumculisi; elikaDavide; ihubo eliyiculo.

- ¹Nango uMvelinqangi esukuma, izitha zakhe ziyahlakazeka, abamzondayo bayabaleka phambi kwakhe.
- ²Ubahlakaza njengentuthu ipheshethwa; izonakali zibhubha phambi kukaNkulunkulu njengengcina incibilikiswa umlilo.
- ³Kepha abalungileyo bayethaba nokwethaba. Bayajabula baphambi kukaNkulunkulu, bathokoza bathi ngcingci kamjoji.

⁴Culani nidumise uMvelinqangi, nimbonge ngenxa yegama lakhe, nimhashe yena ogibela esibhakabhakeni, lowo ogama lakhe linguSimakade, nihlokome ngenjabulo phambi kwakhe!

⁵Unguyise wezintandane nommeli wabafelokazi, uMvelinqangi esendlini yakhe engcwele.

⁶UMvelinqangi usiza imihambima ayitholele ikhaya lokuhlala, ukhipha iziboshwa zinethezeke; kepha amaphikankani ahlale kwahlongasibi.

⁷Mvelinqangi, waphuma wahola isizwe sakho, wasihola wadabula naso ehlane. *Kunekhefu.*

⁸Kulapho umhlaba wanyikizela khona, izulu lana isibhidli semvula lapho kuza wena Mvelinqangi; leyontaba iSinayi yazamazama lapho kuza wena Mvelinqangi, wena Nkulunkulu kaIsrayeli.

⁹Walinisa isiphihli semvula Mvelinqangi, nguwe owasimamisa isabelo sakho lapho lifile izwe lakho lomisile.

¹⁰Abantu bakho Nkulunkulu bakha kulo, ngesihe sakho wahlinzeka abahlushiweyo.

¹¹INkosi uSomandla yakhipha izwi, kwakikizela umshungu omkhulu womame washumayela indaba emnandi wathi:

¹²“Amakhosi namaviyo awo ayakhumuka ayabaleka, isimame sehlukaniselana impango emakhaya.

¹³Niqubeleni esibayeni sezimvu na? Amaphiko ejuba ambozwe yisiliva elimpappe zalo zicwebezelisa okwegolide.

¹⁴Entabeni iZalimoni kwakhithika iqhwa lapho uSomandla edungula amakhosi.”

¹⁵Uyintaba kaMvelinqangi isibili wena ntaba yaseBhashani! Uyintaba emangelengele ngokuqonga wena ntaba yaseBhashani!

¹⁶Nina ziqongo zezintaba ezithe tshilo, niyintshontshelani ngeso niyifele umona leyontaba ayikhethele uMvelinqangi efuna ukuzinza kuyo na? USimakade uyokwakha kuyo unomphela.

¹⁷Izinqola zikaMvelinqangi ziyizigidi, ziyizinkulungwane ngezinkulungwane; iNkosi uSomandla ihamba igibele kuzo. Ithe ingani ibisentabeni iSinayi, kanti isisendlini yayo engcwele.

¹⁸Wenyukela endaweni yakho ephezulu, wemuka nabaningi abathunjiweyo, abantu bathela kuwe wemukela izipho, ngisho namaphikankani imbala, nce uhlale khona, Nkosi Mvelinqangi.

¹⁹Ayibongwe idunyiswe iNkosi uSomandla, imihla ngemihla isithwala isisingathe! UNkulunkulu uSomandla uyinsindiso yethu. *Kunekhefu.*

- ²⁰UMvelinqangi uSomandla unguNkulunkulu wethu osindisayo, kuSimakade iNkosi yethu sophulwa nasekufeni.
- ²¹Kodwa uMvelinqangi uyophohloza amakhanda ezitha zakhe nokhakhayi olunonwele lwabaphikelela ezonweni.
- ²²INkosi uSomandla yakhuluma yathi: “Izitha zakho ngiyozinqanda naseBhashani, ngizikhalime nezisezinzulwini zolwandle,
- ²³nce ubhoxabhoxe unyawo ezingazini zabafo nezinja zakho zibaxhaphe igazi zidele.”
- ²⁴Mvelinqangi zibonakele izindwendwe zakho, izindwendwe zikudumisa endlini engcwele, Bayede Nkulunkulu wami Somandla!
- ²⁵Ziholwa phambili yiviyo labahlabeleli, emuva kulandela amagagu omculo, phakathi nabo kuhamba izintombi zihamba zikhencezisa okhencekhence,
- ²⁶bonke bathi: “Bongani uMvelinqangi phambi kwamabandla, nidumise iNkosi nina bohlanga lukaIsrayeli!”
- ²⁷Kuza uBhenjamini uthunjana uyababusa, kuza izikhulu zikaJuda ziyisigejane, bese kuza izikhulu zikaZabuloni noNaftali.
- ²⁸UNkulunkulu wenu uninike amandla. Nkulunkulu wena owasisizayo, phinda ubonakalise amandla akho,
- ²⁹wena osethempelini lakho eJerusalema lapho amakhosi ekwethulela khona izipho.
- ³⁰Khuza iGibhithe, lowomdlwembe oquba emhlangeni, uthethise nezizwe, eziyimihlambi yezinkunzi namathole azo, ukuze beze bakukhothamele bonke, bethule kuwe izinhlamvu zesiliva. Uhlakaza izinhlanga ezishisekela impi.
- ³¹Izikhulu ziyovela kwelaseGibhithe, abaseThophiya bayothi: “Bayede Mvelinqangi!” baphuthume bephethe iminikelo ngezandla.
- ³²Nina mibuso yomhlaba wonkana hlabelelani nidumise uMvelinqangi, nihubele iNkosi uSomandla! *Kunekhefu.*
- ³³Igibela ngengidi esibhakabhakeni, esibhakabhakeni somkhathi wakudala. Lalelani lapho iklabalasa ngombhongo, isho ngephimbo layo elesabekayo.
- ³⁴Vumani ukuthi uMvelinqangi unamandla! Wengamele uIsrayeli uyambusa, namandla akhe afinyelele emazulwini.
- ³⁵Mvelinqangi, uyesabeka kawubhekeki, ethempelini lakho lapho ukhona. USomandla uNkulunkulu kaIsrayeli nguye opha abantu bakhe amandla, abanike amandla amakhulu esabekayo. Akubongwe uMvelinqangi!

AmaHubo 69

Ukukhala komuntu ososizini

Elethulwe kumculisi ukuba lihlatshelewe ngendlela ethi "Iminduze"; elikaDavide.

- ¹Ngisindise Nkulunkulu, ngiyaminza, amanzi asengeqa ikhanda imbala.
- ²Ngibisha obhukwini olubikizelayo la kungekho ndawo eqinileyo yokusimama, ngizika kumaminzela wesiziba, nazi izikhukhula zomsinga zingigwilizisa!
- ³Ukukhala kwami kungikhandlile kabi, umphimbo wami womile uyankenketha, amehlo aseze afiphala ayetha ngilindele wena Nkulunkulu wami.
- ⁴Abangizonda kungekho sizathu baningi bedlula izinwele ekhanda, abayizitha zami ngingone lutho badlangile ngonya bafuna ukungisusa, bangihlawulisa noma ngingaphanganga.
- ⁵Wo Nkulunkulu, wena wazi ubuwula bami, nezono zami azifihlakele kuwe.
- ⁶Mabangatheleki amahloni ngenxa yami labo abahlala bethembele kuwe Nkosi yami Simakade, Nkosi yamaviyo. Akungenzeki ukuba bahlazeke ngenxa yami abafuna wena Nkulunkulu kaIsrayeli.
- ⁷Ngithwele ihlazo ngenxa yakho, nganyobozela, ubuso behla izihlathi.
- ⁸Sengiphenduke owezizwe kubafowethu, ngingumfokazi kwesashiyelana nabo ibele.
- ⁹Ukushisekela indlu yakho kungidlile, inhlamba abakuchapha ngayo wena nami futhi bangithuke ngayo.
- ¹⁰Kuthe ngikhala ezimathonsi ngizila ukudla nalokho kwaba inhlamba ngathukwa ngakho.
- ¹¹Ngizilile ngembatha amasaka, ngaphenduka isaga kubo ngabhinqwa.
- ¹²Batekula ngami behlezi ebandla, nezidakwa zichwaya ngami etshwaleni.
- ¹³Kepha mina ngiza kuwe Simakade, ngikhuleka kuwe uma ngisemukeleka ngomusa. Ngizwe Nkulunkulu ungiphendule lokhu unothando olukhulu olungapheliyo, ugcina isethembiso sakho sokusindisa.
- ¹⁴Ngimonyule obhukwini ingaze ngibishe, ungophule kwabangizondayo nasesizibeni samanzi ajulileyo,
- ¹⁵hleze izikhukhula zomsinga zedlule nami nozwa lungibize ngishone kwalasha, igodi lingigwinye ngibhubhe.
- ¹⁶Ngizwe Nkosi yami ungiphendule, ngoba luhle uthando lwakho lwafuthi! Phendukela kimi wena onobubele.
- ¹⁷Ungayincintshi amehlo inceku yakho; ngisenkathazweni, phuthuma ungiphendule!
- ¹⁸Sondela uhlenge ukuphila kwami, ngikhulule ngoba izitha zami ziningi!

- ¹⁹Wena uyakwazi ukuklolodelwa kwami nokuhlazeka kwami ngehlelwa ngamahloni, abamelene nami ubabone bonke.
- ²⁰Ukuhlanjalazwa kungephule umoya wami, ngaphela amandla kwaqaqamba, ngaqalaza ongangizwela akaba bikho, ngafuna abangangiduduza ngabeswela.
- ²¹Kanti futhi bangifakela ubuthi ekudleni kwami, bangiphuzisa uvinika lapho ngomile.
- ²²Isithebe sabo masibe yisihibe nogibe kwabahlezi bengahlushwe lutho!
- ²³Amehlo abo awaqundeke bangaboni, bakhumuke amanyonga bantenge njalo!
- ²⁴Bavuthele ngolaka lwakho ubajezise, bathelekele ngovuthane lwentukuthelo yakho!
- ²⁵Imizi yabo mayiqothulwe ibe yihlane, amadlangala abo akhale ibhungane!
- ²⁶Ingani nakhu bazingela omshayileyo, nampa bekhuluma kabi ngezinhlopheko nezinhlungu zalowo olimeleyo wakho.
- ²⁷Babeke icala phezu kwelinye, lingabathethi baphume phambili.
- ²⁸Ake ubesule encwadini yabaphilayo, bangalokothi babalwe nabalungileyo!
- ²⁹Kepha mina ngilusizi ngisezinhlungwini. Ngivikele ngensindiso yakho Nkulunkulu, ungikhweze endaweni ephakemeyo!
- ³⁰Ngiyohubela igama likaMvelinqangi, ngibabaze ubukhulu bakhe ngezibongo.
- ³¹Kuyothandeka kuSimakade kumjabulise ngaphezu kokunikela kuye ngenkabi, ngenkunzi emise izimpondo yabuye yahlukanisa izinselo.
- ³²Abazithobayo bokubona lokhu bajabule, nina enifuna ukumkhonza uNkulunkulu izinhliziyu zenu ziyovuselelwa.
- ³³USimakade uyabezwa abampofu, akabadeli abangabakhe ababoshiweyo.
- ³⁴Alindumise izulu nomhlaba nolwandle nokutshuzayo konke okukulo!
- ³⁵Ngoba uNkulunkulu uyoindisa abaseZiyoni, ayakhe kabusha imizi yabakwaJuda, abantu bakhe bahlale kuyo babelwe izwe,
- ³⁶abazukulu bezinceku zakhe balidle ifa, abathanda igama lakhe balakhele izwe.

AmaHubo 70

Elokucela ukuhlengwa

(AmaHubo 40:13-17)

Elethulwe kumculisi; elikaDavide eliyisikhumbuzo.

- ¹Nkulunkulu shesha uzongihlenga! Simakade phuthuma uzongisindisa!
- ²Akuhlazeke kudumazeke futhi laba kanye abafuna ukungibulala! Bahlehle nyovane bajabhiswe labo abajabula ngeshwa lami!

- ³Bahlehlele emuva ngenxa yamahloni abo labo abangiklibhizela bathi: “Ashila!”
- ⁴Abethabe bathokoze ngenxa yakho bonke labo abafuna ukukukhonza! Bahlale bethi: “UNkulunkulu mkhulu!” bonke labo abathanda insindiso yakho!
- ⁵Mina ngihluphekile ngimpofu; Nkulunkulu phuthuma uze kimi! Nguwe umhlengi nomkhululi wami, Simakade shesha ungalibali!

AmaHubo 71

Umkhuleko womuntu osemdala

- ¹Ngibalekela kuwe Simakade, ungangijabhisi ngidumale nanini!
- ²Ngihlengi ngokulunga kwakho, ungophule! Beka indlebe ungizwe ungisindise,
- ³yiba yidwala engiyophephela ngihlale kulo, engingabalekela kulo imihla ngemihla. Wakhapha umyalo wokuba ngisinde ngalo, wena uyisiwa esingoje nenqaba yami.
- ⁴Nkulunkulu wami, ngikhulule esandleni sezonakali nakumuntu ongalungile ononya ofuna ukungibhozomela ngamazipho!
- ⁵Uyithemba lami wena Nkosi Simakade, ngethembela kuwe kusukela ebusheni bami.
- ⁶Ngencika kuwe kwasesiswini sikamame, wangihlenga mhla ngifika emhlabeni, ngihlala ngidumisa ngawe njalo.
- ⁷Ngaphenduka umhlola kwabaningi, kepha wena uyisiphephelo namandla ami.
- ⁸Ngohlala ngiphuphuma indumiso yakho, ngihlokome ngenkazimulo yobukhosi bakho.
- ⁹Uze ungangilahli lapho sengigugile, ungangideli lapho sengiyintothololo,
- ¹⁰ngoba izitha zikhuluma kabi ngami, nabangiqamekelayo bahlangene bakha uzungu,
- ¹¹bathi: “UNkulunkulu umdelile wamlahla, asimzingele simbambe, akekho ozomsindisa!”
- ¹²Nkulunkulu ungaqheli ube kude nami! Nkulunkulu wami, phuthuma uzongihlenga!
- ¹³Sengathi labo abafuna ukuphila kwami bangehlulwa behlelwe amahloni babhubhe, nalabo abahlose ububi ngami bathukeke ngenhlamba bahlazeke.
- ¹⁴Kepha mina ngiyohlala ethembeni, ngandise izibongo zakho njalo.
- ¹⁵Ngiyoyixoxa eyokulunga kwakho Sokulunga, ngikhulume njalo ngosindiso lwakho. Izigaba zensindiso yakho azibalwa.

- ¹⁶Nkosi yami Simakade, ngoveza obala imisebenzi yakho emikhulu, ngibabaze ukulunga kwakho, wena wedwa.
- ¹⁷Nkulunkulu wangifundisa kwasebusheni bami, kuze kube manje ngisakhuluma ngemisebenzi yakho emangalisayo.
- ¹⁸Sekothi nalapho sengikhulile ngimpunga, ungangiyekeleli ungilahle Nkulunkulu, ngize ngixoxele abazukulu ngamandla akho nangobukhulu bakho kubo bonke abasazozalwa.
- ¹⁹Mvelinqangi, ukulunga kwakho kugqamile kweliphezulu; wena owenze imisebenzi yamandla, Mvelinqangi ukhona yini onjengawe?
- ²⁰Wangibonisa izinsizi eziningi ezesabekayo, kodwa uyobuye uguquke ungiphilise, ubuye ungikhiphe ezweni labafuleyo.
- ²¹Sengathi ungandisa ubukhulu bami, uphinde ungibheke ungiduduze.
- ²²Nami sengiyobetha uqwabe ngikubonge ngokwethembeka kwakho Nkulunkulu wami. Bese ngikuhubela ngishaye ugubhu, ngikubongele Ngcwele kaIsrayeli.
- ²³Izindebe zami ziyohlokoma ngenjabulo lapho ngikuhubela wena ngikubonga, kuthokoze nomphefumulo wami owuhlengileyo.
- ²⁴Ngiyomemezela njalo ngobuqotho bakho, ngoba labo abahlose ukungilimaza bahlazekile batheleka amahloni.

AmaHubo 72

Ukubusa kwenkosi eqotho

ElikaSolomoni.

- ¹Nkulunkulu, fundisa ingonyama ukuba ikwazi ukwahlulela ngobuqotho, uphe umntanenkosi ukulunga kwakho,
- ²nce yahlulele abantu bakho ngokulunga, ibuse ngobuqotho abahlushwayo bakho.
- ³Ukulunga nobuqotho okubusa ezweni kuyochuma ezintabeni nasemagqumeni, kuhlalise abantu bakho ngokuthula.
- ⁴Iyobabusa kahle abampofu besizwe, ivikele amalungelo ezimpofana, bese ichitha lowo ocindezelayo.
- ⁵Wena Mvelinqangi bayokwesaba, inqobo lisaphuma lishone ilanga, nenyanga isekhona isakhanya, kube yizizukulwane ngezizukulwane.
- ⁶Lenkosi iyotheleka njengemvula emadlelweni, njengezihlanjana ezimatisa umhlabathi.
- ⁷Emihleni yayo abalungileyo bayonethezeka, kube nomlibe wenhlalakahle ezweni kuze kufe inyanga ingabe isakhanya.

- ⁸Umbuso wayo awande umhlaba wonke, imincele yawo ihlanganise nezilwandle, kusukela emfuleni omkhulu iYufrathe kuze kufinyelele emikhawulweni yomhlaba.
- ⁹Ayikhothanyelwe yizizwe ezakhe ogwadule, izitha zayo zigaqazele othulini.
- ¹⁰Amakhosi aseThashishi nawasemazweni agudla ulwandle awathele kuyo ayethulele izipho, awakwaShebha nawakwaSebha alethe iminikelo.
- ¹¹Nempela amakhosi ngothi lwawo eze egaqa ngamadolo phambi kwayo, izizwe zifike zikhonze kuyo.
- ¹²Iyosindisa ompofu ozikhalela kuyo nalowo obuswezi nongenabani ongamsiza.
- ¹³Iyozwela ohluphekayo nompofu, isindise ukuphila kwezimpofana
- ¹⁴ibakhulule ekucindezelweni nasebudloveni, beyigugu elithandekayo emehlweni ayo, iphindise kulowo ochitha igazi labo.
- ¹⁵Bayede nkosi! ume njalo wena ongasenhla! Akwethulwe kuyo igolide lakwaShebha, icelelwe mihla yonke ngemikhuleko, icelelwe njalo isibusiso sikaNkulunkulu!
- ¹⁶Izwe alivame inala yamabele, amagquma embathe iminyani, ihwashazise okwezihlahla zaseLebhanoni, abantu baminyane emanxulumeni, babe ngangotshani bezwe ngobuningi!
- ¹⁷Igama layo alime ungunaphakade idume ibe ngusimayedwa njengelanga, bazifisele izibusiso ebusiswa ngazo, zonke izizwe ziyituse zithi ibusisiwe!
- ¹⁸Akubongwe uSimakade uNkulunkulu, yena Nkulunkulu wakwaIsrayeli; nguye yedwa vo owenza izimangaliso!
- ¹⁹Alibongwe lidunyiswe ungunaphakade igama likaSimakade elidumileyo, umhlaba wonke ugcwale udumo lwakhe! Elethu! Amen!
- ²⁰Isigcino semikhuleko kaDavide umntakaJese.

AmaHubo 73

Isigaba sesithathu

Isiphetho sezonakali

Ihubo lika-Asafu.

- ¹Impela, uNkulunkulu umphatha kahle uIsrayeli, labo abanhliziyo yabo imsulwa.
- ²Kepha mina ngacishe ngakhubeka, izinyawo zami zacishe zashelela,
- ³ngoba ngaba nomona nabazidlayo lapho ngibona izonakali zichuma.
- ⁴Kabezwa zinhlungu msukwana befayo. Bakhuluphele, badedele imikhaba.
- ⁵Izinhlupheko ezehlela isintu azibehleli, kabashaywa umhlaba njengabanye.
- ⁶Ngakhoke balugaxile ucu lokuzidla, ubudlova buyisembatho abasigqokayo.

- ⁷Bakhuluphele bangamaqhumu ngamehlo, abakuhlosa ngenhliziyo akuqedwa.
- ⁸Baklolodela abanye bakhulume okubi, baziqhenye bahlongoze ukubacindezela.
- ⁹Umlomo wabo bawubhekise ezulwini, nolimi lwabo lulawula nasemhlabeni.
- ¹⁰Kanjalo-ke nesizwe esibizwa ngoSimakade sidamane sigijimela kubo, sifike siphuze amanzi size sidele.
- ¹¹Bathi: “UNkulunkulu uSomandla waze kanjani? OPhezukonke ngeke akwazi okwenzekayo.”
- ¹²Banjalo-ke abantu abayizonakali: badamane benethezeka bechuma.
- ¹³Impela, inhliziyo yami ngayihlambululela ize, baba yize ubumsulwa bezandla zami.
- ¹⁴Ngavelelwa ngamashwa nsuku zonke, ngathola isijeziso ngashaywa mihla.
- ¹⁵Ukuba ngakhuluma njengabo Nkosi, ngabe ngahlamuka kubantu bakho.
- ¹⁶Ngangilokhu ngikuzindla lokhu, ngaqundeka amehlo ngangakhanyelwa
- ¹⁷ngaze ngangena endlini yakho engcwele ukuba ngizindle ngesiphetho sabo.
- ¹⁸Impela, wena uyobabeka endaweni eshelelayo ubathanqaze phansi babhubhe nokubhubha.
- ¹⁹Maye! Bachithwa ngokuphazima kweso, bayaphela badliwe yizinhlopheko ezesabekayo.
- ²⁰Nkosi yami, bayonyamalala njengezithunzi lapho uvukayo, babe njengephupho elinqamukayo ngokusa.
- ²¹Umphefumulo wami wawuyaye ube munyu, lihlabe lephukele enhliziyweni yami,
- ²²ngibe yisithutha ngingaqondi, ngaphenduka isilwane phambi kwakho.
- ²³Nokho nginamathela kuwe njalo, ungibambile ngesandla sami sokunene.
- ²⁴Uyangeluleka ungihole endleleni yakho, ekugcineni ubusungamukela ebukhosini.
- ²⁵Nginobani ezulwini ngaphandle kwakho? Nxa nginawe angifuni lutho emhlabeni.
- ²⁶Umzimba nomoya wami kungehluleka, kepha wena Mvelinqangi uyidwala lami, isabelo nefa lami ungunaphakade.
- ²⁷Impela, labo abaqhela kuwe bayobhubha, uchithe zonke iziphingi ezihlubuka kuwe.

²⁸Kepha mina ngijabulela ukuba seduze nawe Nkulunkulu, Nkosi Simakade ngakwenza isiphephelo sami nce ngishumayeke ngemisebenzi yakho yonke.

AmaHubo 74

Elokucela ukuvikelwa kwesizwe ezitheni

Inkondlo enesifundo ka-Asafu.

¹Kungani Nkulunkulu ukuba uze usilahle unomphela, uthukuthelelani ukhiphe umusi emakhaleni, ushunqeke izimvu zedlelo lakho na?

²Khumbula ibandla lakho ungalilibali, ibandla owazizuzela lona kwasemandulo walihlenga laba yisizwe esiyifa lakho, ukhumbule lentaba iZiyoni eyilawu lakho!

³Woza ubone incithakalo engumlibe, isitha sabhidliza konke endlini engcwele.

⁴Abamelene nawe babhonga enkundleni yakho, bakhuza ezabo izaga esikhundleni sezethu.

⁵Wawungathi ngabantu bayagawula baceka ngamazembe udukathole wehlathi.

⁶Izitha seziphohloze ngamazembe nangemigxala konke okubaziweyo okusethempelini lakho.

⁷Zathungela ngomlilo indlu yakho engcwele, zangcolisa lendlu ebizwa ngegama lakho, zayidiliza zaqotha imbokodwe nesisekelo.

⁸Zanquma ukuba zisicindezele phansi, zashisa zonke izigcawu zikaSomandla ezweni.

⁹Wo, izimpawu zethu esizaziyo asisaziboni, phakathi kwethu akusekho mphrofethi nowaziyo ukuthi koze kube nini.

¹⁰Mvelinqangi, koze kube nini izitha zikuklolodela, abakuzondayo bekunukubeza njalo na?

¹¹Ugodlelani amandla esandla sakho, ingalo yesokunene sakho isibukele na? Phakamisa ingalo yakho, ugadle ubachithe!

¹²Mvelinqangi, wena Ngonyama neNkosi yami kwasendulo, nguwe oletha usindiso nomaphi emhlabeni.

¹³Nguwe owadabula ulwandle ngamandla akho. Iwanqamukana lwahlukana phakathi. Nguwe owachoboza amakhanda emikhomo olwandle.

¹⁴Nguwe owaphihliza amakhanda omningi uLeviyathani wamenza ukudla kwabantu abakhe ehlane.

¹⁵Nguwe owavava amadwala kwaqhuma iziphethu. Nguwe owayomisayo yasha imifula egelezayo.

¹⁶Ingeyakho imini, bungobakho nobusuku; nguwe owamisa izikhanyiso kanye nelanga.

- ¹⁷Nguwe owaklama imincele yonke yomhlaba. Nguwe owenza kwahlukana ihlobo nobusika.
- ¹⁸Simakade, khumbula ukuthi isitha sakuklolodela, nesizwe esiwulazekile sanukubeza igama lakho.
- ¹⁹Unganikeli ijubantondo lakho okhozini, ungabakhohlwa unomphela abahlushwayo bakho!
- ²⁰Khumbula isivumelwano owasenza nathi, ngoba nakhu kugcwele ubudlova ezindaweni zonke ezimnyama ezweni.
- ²¹Ocindezelweyo makangahlehli ejabhile, ohlushwayo nompofu adumise igama lakho!
- ²²Yima ngobumo Mvelinqangi, zikhulumele wena odabeni, ukhumbule ukuthi isiwulandini lesi lize lashona silokhu sikuklolodela.
- ²³Ungakhohlwa ukhlokoma kwabamelene nawe, ukuxokozela kwabakuvukelayo okudlange njalo.

AmaHubo 75

UNkulunkulu uthobisa isonakali aphakamise olungileyo

Elethulwe kumculisi ukuba lihlatshelelwe ngendlela ethi "Ungabhuhisi"; ihubo eliyiculo lika-Asafu.

- ¹Siyakubonga Nkulunkulu, siyakubonga! Useduze, igama lakho lisematheni lapho kulandwa ngezimangaliso zakho.
- ²Wena uthi: "Nxa sesifikile isikhathi esimisiweyo mina ngiyokwahlulela ngobuqotho.
- ³Noma umhlaba uncibilika uphele nabahlezi kuwo beshabalala bonke, yimina engimisa izinsika zawo." *Kunekhefu.*
- ⁴Ngithi kwabaziqhayisayo: "Ningaziqhayisi! " Ngixwayise izikhohlakali ngithi kuzo: "Ningaziphakamisi kimi ningichwensele! "
- ⁵Ningawathwali amehlo nizikhukhumeze, ningakhulumi ukuchwensa njengonophondo.
- ⁶Ngokuba amukho onganiphakamisa empumalanga nasentshonalanga nasehlane,
- ⁷kodwa nguye uNkulunkulu umahluleli, uthela othulini lo, aphakamise lowaya.
- ⁸Esandleni sikaSimakade kunesigobongo esiphuphuma ingwebu yotshwala. Uyabuthunga, zibuminye nenzika imbala izonakali gothi lwazo emhlabeni.
- ⁹Mina ngiyobabaza ngaye njalo, ngihubele uNkulunkulu kaJakobe.
- ¹⁰Ngiyonqinda izimpondo zonke zezonakali, kuphakanyiswe izimpondo zolungileyo.

AmaHubo 76

Mvelinqangi uyiqhawe nomahluleli

Elethulwe kumculisi ukuba lihlatshelelwe ngezingubhu; ihubo eliyiculo lika-Asafu.

- ¹Mvelinqangi waziwa kahle kwaJuda, unodumo olubabazeka kwaIsrayeli.
- ²INGonyama emphandu wayo useSalema, isikhungo ephumula kuso eZiyoni!
- ³Yafohloza lapho iminsalo ewunyazi, isihlangu nomkhonto nezikhali zempi. *Kunekhefu.*
- ⁴Mvelinqangi, ukhazimula ngokwesabekayo ebukhosini bakho lapho ubuya ezintabeni zempango.
- ⁵Amaqhawe azazisayo asephangwe aphela, afikelwa ubuthongo alala obokugcina, nezandla zeziqhawaga zonke ziyethile.
- ⁶Ubajakadile wena Nkulunkulu kaJakobe, kwalala izingibeli namahashi unomphela.
- ⁷Awuthintwa wena, maye uyesabeka, ngubani ongema phambi kwakho amele ukuvutha kolaka lwakho?
- ⁸Wahlulele wamemezela usezulwini, umhlaba wathuthumela wathula,
- ⁹mhla uvuka Mvelinqangi ukuba wahlulele, usindise bonke abathobekileyo bomhlaba. *Kunekhefu.*
- ¹⁰Impela, ulaka lwabantu lukwakhela udumo, insalela yalo ibe yixhama olibhincayo.
- ¹¹Thembisani nigomele nenze izifungo, nizifeze kuSimakade uNkulunkulu wenu! Izizwe zonke ezimhaqileyo nxazonke azethule izipho kuyena owesabekayo!
- ¹²Uyawugoba umoya wezikhulu, uyesabeka emakhosini omhlaba.

AmaHubo 77

Siyaduduzeka nxa sikhumbula imisebenzi emikhulu kaNkulunkulu

Elethulwe kumculisi ukuba lihlatshelelwe ngendlela kaJeduthuni; elika-Asafu; ihubo.

- ¹Ngiyokhala ngezwi elikhulu ngimnxuse uMvelinqangi ngizikhalele. Ngiyokhala ngezwi elikhulu ngimcele uMvelinqangi ukuba angizwe.
- ²Ngangimfuna uSimakade mhla ngisosizini, ngaphakamisa izandla ngakhuleka nasebusuku, izandla zami azizange ziyethe, inhliziyo yami yenqaba ukududuzeka.
- ³Ngikhumbula uNkulunkulu bese ngibubula, ngizindle bese kudangala umoya wami. *Kunekhefu.*
- ⁴Ungincisha ubuthongo ngiqwashe, ngiyobayobe ngibe yisimuku.
- ⁵Ngicabanga ngezinsuku zasemandulo, ngikhumbule iminyaka eyadlula kudala.

⁶Ngikhumbula iculo lami lokumbonga, ngizindle enhliziyweni yami ebusuku, umoya ucabange ujule ubuze ukuthi:

⁷“Kanti iNkosi iyongilahla unomphela yini, ingabuye ibe nomusa ingihawukele na?”

⁸Ngabe uthando lwayo olungaguqukiyo selwaphela yini lwashabalala umlibe, izwi lesethembiso sayo eyasenzayo selaphela yini ezizukulwaneni zonke na?

⁹USomandla usekhohlwe ukuba nomusa yini, wathukuthela wagodla ububele bakhe na?” *Kunekhefu.*

¹⁰Bese ngithi: “Okwami okwezandla: esokunene soPhezukonke singiphendukele.”

¹¹Ngokhumbula imisebenzi yakho Simakade, ngikhumbule izimanga zakho zasendulo,

¹²ngizindle ngakho konke okwenzileyo, ngijinge ngicabanga ngemisebenzi yakho.

¹³Mvelinqangi, ezindleleni zakho zonke ungcwele. Yimuphi uNkulunkulu uSomandla njengawe, ngubani ongangawe Mvelinqangi na?

¹⁴Nguwe uSomandla owenza izimangaliso, ubonakalisile amandla akho ezizweni.

¹⁵Ngengalo yakho wahlenga abantu bakho, abozalo lukaJakobe nolukaJosefa. *Kunekhefu.*

¹⁶Amanzi akubona ngamehlo Mvelinqangi, amanzi anele akwelamela athuthumela, nezintwa zolwandlekazi zazamazama.

¹⁷Amafu athela isibhidli semvula, izulu laduma lakleklebula emafwini, imicibisholo yakho yakiwebha emkhathini.

¹⁸Waklabalasa usesijwini sesiphepho, kwaphambana imibani, kwakhanya umhlaba wonke, wamazama umhlaba wathuthumela.

¹⁹Indlela yakho yanqamula olwandle, umzila wakho wadabula ulwandlekazi, kodwa lwangabonakala uhlabo lwakho.

²⁰Welusa abantu bakho njengezimvu, bahamba beholwa nguMose nanguAroni.

AmaHubo 78

UNkulunkulu wethembekile kubantu bakhe abamhlamukayo

Inkondlo enesifundo ka-Asafu.

¹Zwanini imfundiso yami bantu bakithi, nibeke indlebe nilalele engikushoyo!

²Sengizokhuluma ngisebenzise imizekeliso, ngizwakalise ngezimfombe zasemandulo.

³Izindaba esake sazizwa esizaziyo, ababesilandisa ngazo okhokho,

- ⁴kasinakuzigodla kubazukulu babo. Sobikela izuzukulwane ezizayo, sibafundise izibongo zikaSimakade nezimangaliso azenzileyo uSomandla.
- ⁵Wasungula imfundiso kwabakaJakobe, wamisa umthetho esizweni sakwaIsrayeli. Okhokho wayesebakhiphela umyalo wokuba lokhu bakufundise abantababo,
- ⁶nce nesizukulwane esilandelayo sazi, nabazukulu babo abasayozalwa bakhule babikele nabantababo.
- ⁷Wathi ababheke kuNkulunkulu ngethemba, bangayikhohlwa imisebenzi kaSomandla, kepha bahlale bagcine imiyalo yakhe.
- ⁸Bangenzi njengoba babenza okhokho, isizukulwane senkani nokuhlubuka esinhliziyo yaso yayingalungile, esimoya waso ungathembekanga kuSomandla.
- ⁹AbakwaEfrayimu babehlome ngeminsalo, babaleka kodwa mhla ibambene ngezihluthu.
- ¹⁰Kabasigcinanga isivumelwano sikaNkulunkulu, kabavuma ukuhamba ngomthetho wakhe.
- ¹¹Bakhohlwa yimisebenzi ayenzileyo nezimangaliso zakhe ayebakhombise zona.
- ¹²Wabenzela izimangaliso okhokho babo kwesaseZowani ezweni laseGibhithe.
- ¹³Wahlukanisa ulwandle wabaweza kulo, washaya amanzi aba yizindonga.
- ¹⁴Emini wayebahola esesijwini sefu, ebusuku abakhanyisele ngomlilo.
- ¹⁵Waqhekeza amadwala ehlane, wabaphuzisa amanzi badela kwasengathi avela ezinzulwini zozwa.
- ¹⁶Waqhumisa iziphethu edwaleni, wagelezisa amanzi kuhle kwemifula.
- ¹⁷Nokho baqhubeka benza ukona kuye, bamcunula oPhezukonke ehlane.
- ¹⁸Ezinhliziyweni zabo bamlinga uSomandla bembelesela ngokudla abakufisayo.
- ¹⁹Base bekhuluma kabi ngoNkulunkulu bathi: “USomandla lona angasilungisela nje, asicole ngedili sidle ehlane na?”
- ²⁰Walishaya lona idwala kwaphuphuma amanzi, imifula yagcwala yagobhoza, kodwa angasinika yini isinkwa kumbe aphe abantu bakhe inyama na?”
- ²¹Wakuzwa lokho uSimakade wathukuthela, kwavutha umlilo wadla abakwaJakobe, abakwaIsrayeli behlelwa ulaka lwakhe,
- ²²kwazisukuthi kabakholwanga kuNkulunkulu, abakwethembanga ukusindisa kwakhe.
- ²³Wayeseyala isibhakabhaka phezulu, wavula imigoqo yamasango ezulu.
- ²⁴Wabanisela imana ukuba badle, wabapha isinkwa sasezulwini.

- ²⁵Abantu phaqa badla isinkwa sezingilosi, wabathumela umphako owaneleyo.
- ²⁶Wavunguzisa impumalanga emkhathini, labuyisa iningizimu ngamandla akhe.
- ²⁷Wabehlisela inyama sengathi yimvula, izinyoni ezingangezihlabathi zolwandle.
- ²⁸Wayiletha esikhumulweni sabo, yonke indawo eceleni kwamadlangala abo.
- ²⁹Base bedla bashaya esibomvu, wabapha lokho ababekufisa.
- ³⁰Babengakayiyeki inkwankwa yabo, besagwavuma, ukudla kusesemlonyeni,
- ³¹uNkulunkulu wayesebavukela ngolaka, washaya waqothula amashoshozela abo, wacekela phansi izinsizwa zakwalsrayeli.
- ³²Phezu kwakho konke lokhu babeyilokhu bephikelela ukona, babengakholwa yizimangaliso zakhe.
- ³³Wadlulisa izinsuku zokuphila kwabo, zaba njengomoya oshweza udlule, baqedwa uvalo bafa isidumo.
- ³⁴Bekuthi nxa ebulala bamfunisise, baphenduke bese bebuyela kuSomandla.
- ³⁵Bakhumbula ukuthi uNkulunkulu uyidwala labo, uSomandla oPhezukonke ungumhlengi wabo.
- ³⁶Kodwa basimze bakhulume ngomlomo nje bejinge bemkhohlisa ngolimi lwabo,
- ³⁷ngoba babenganamathele kuye ngezinhliziyo, abaligcinanga izwi lesivumelwano sakhe.
- ³⁸Kodwa yena unesihe uthethelela ububi, akasale eseqedela abulale. Kukaningi ezibamba engathukutheli, ulaka lwakhe aluthibe lungavuthi.
- ³⁹Wakhumbula ukuthi bangabasemhlabeni nje, banjengomoya oshweza ungabe usabuya.
- ⁴⁰Angithi kukaningi bemphendukela ehlane bejinge bemdabukisa kwahlongasibi na?
- ⁴¹Bamvivinya kaninginingi uSomandla, bayephula umoya iNgcwele kaIsrayeli.
- ⁴²Sebezikhohliwe iziga zamandla akhe mhla ebahlenga esitheni esibazondayo,
- ⁴³eveza izibonakaliso kwelaseGibhithe, egila izimanga kwesaseZowani.
- ⁴⁴Mhla eguqula imifula iba yigazi ayabe isaphuzeka imithombo yamaGibhithe.
- ⁴⁵Wathuma isishomo sezibawu sawatinyela, nezingxangxa zaba yimbubhiso eqothulayo.
- ⁴⁶Ikhamba lawo walingenela ngemiswenya, isikhonyane sadla isithukuthuku sawo.
- ⁴⁷Wavithiza imivini yawo ngesichotho, kwashazwa nemikhiwane yawo.

- ⁴⁸Waqhobozela impahla yawo ngesangquma, imihlambi yawo wayishaya ngomphezulu.
- ⁴⁹Wawavukela ngolaka lwakhe oluvuthayo: ngentukuthelo nokufutheka nohlupho, wawalethela amashwa alandelana aba yizithunywa zakhe eziqothulayo.
- ⁵⁰Wadedela ulaka lwakhe, akalubamba, akaphephisa ukuphila kwawo ekubhubheni. Waqeda impilo yawo ngobhubhane,
- ⁵¹wabulala amazibulo onke eGibhithe, waceka amakhosana emizini kaHamu.
- ⁵²Kepha abantu bakhe wabakhipha njengezimvu, wabelusa ehlane njengomhlambi.
- ⁵³Wabahola belondekile abaze besaba, kepha ulwandle lwaminzisa izitha zabo.
- ⁵⁴Wabayisa ezweni lakhe elingcwele, kwelezintaba alizuza ngesokunene sakhe.
- ⁵⁵Waxosha izizwe abazifika zakhile, izwe lazo laba yisabelo sefa labo, walabela imindeni yabakwaIsrayeli ukuba yakhe ihlale emadlangaleni azo.
- ⁵⁶Nokho bamqala uNkulunkulu oPhezukonke, babenenkani, bangawugcina umyalo wakhe.
- ⁵⁷Bahlubuka njengokhokho babo, kabethembekanga, baqwenguka njengomgoga okhwibishile.
- ⁵⁸Bamthukuthelisa ngezindawo zabo zamalathi lapho babekhonza khona izithixo zabo, bamcunula ngemiphuhle yabo ebaziweyo.
- ⁵⁹UNkulunkulu wakuzwa lokhu wavutha ulaka, wabenyanya kakhulu abakwaIsrayeli.
- ⁶⁰Wadikila indlu yakhe engcwele yaseShilo, idokodo lakhe ayelimise phakathi kwabantu.
- ⁶¹Wadedela izitha zathumba umphongolo obonakalisa amandla nenkazimulo yakhe.
- ⁶²Wanikela abantu bakhe bagwazwa, wabathukuthelela abantu befa lakhe.
- ⁶³Izinsizwa zabo zaqothulwa ngumlilo, izintombi zangagcagca ngezinkondlo.
- ⁶⁴Abaphristi babo bacekwa ngomkhonto, abafelokazi babo kabaze babalilela.
- ⁶⁵INKosi uSomandla yayisivuka njengophaphama esithongweni, wabhavumula njengeqhawe lempi lidlala lenanyiswe yiwayini.
- ⁶⁶Yehlula izitha zayo zahlehla, yazithela ngehlazo elingapheliyo.
- ⁶⁷Yafulathela abakwaJosefa yabalahla, ayiwukhethanga umndeni wakwaEfrayimu.
- ⁶⁸Kepha yaqoka umndeni wakwaJuda, nentaba iZiyoni eyabe iyithanda kakhulu.

⁶⁹Yakha ithempeli layo elingcwele laphakama njengezulu kweliphezulu, laba njengomhlaba awumisa phakade.

⁷⁰Yakhetha uDavide inceku yayo, yamlanda lapho alusa khona izimvu,

⁷¹lapho alusa khona izimvukazi ezincelisayo, ukuba aluse abakwaJakobe abantu bayo nabakwaIsrayeli isabelo sefa layo.

⁷²Wayesebelusa ngenhliziyo eqotho, wabahola ngesandla esinekhono.

AmaHubo 79

Kukhalwa isililo seJerusalema elibhidliziweyo

Ihubo lika-Asafu.

¹Nkulunkulu, abezizwe bathelekele ifa lakho, banukubeza ithempeli lakho elingcwele, baphendula iJerusalema imibhidlika.

²Base benikela izidumbu zezinceku zakho zaba yingcuba zadliwa amanqe, abangcwele bakho basobozelwa yizilo.

³Bachitha igazi labantu bakho lagobhoza njengamanzi nxazonke eJerusalema, badindiliza bangangcwatshwa muntu.

⁴Sesiphenduke inhlekisa komakhelwane, bayasibhinqa basiklolodela nxazonke.

⁵Koze kube nini Simakade usalokhu ufutheka ngolaka na? Koze kube nini ulaka lwesikhwele sakho luvutha njengekloba lomlilo na?

⁶Yehlisela intukuthelo yolaka lwakho phezu kwabezizwe abangafuni ukukwazi nemibuso engalibiziyo igama lakho!

⁷Sebeqothe imbokodo nesisekelo kwaJakobe, umuzi wakhe bawubhuqa waba yihlane.

⁸Ungasibambeli lutho ngobubi bokhokho, kodwa phuthuma usihlangabeze ngesihe sakho, ngoba thina sithotshisiwe sisosizini.

⁹Wo Nkulunkulu, msindisi wethu! Sisize ngenxa yodumo lwegama lakho, sikhulule usithethelele izono zethu ukuze kubongwe igama lakho lidunyiswe.

¹⁰Abezizwe sebengaze basibhinqe pho bathi: "Useshonephi loNkulunkulu wabo manje?" Asikubone ukuphindisa kwakho kubo, ufune kubo igazi lezinceku zakho, igazi lezinceku zakho elichithiweyo.

¹¹Ukububula kweziboshwa makufinyelele kuwe, ingalo yakho yamandla amakhulu ayophule labo abanqunyelwe ukufa!

¹²Simakade, phindisa kasikhombisa komakhelwane bethu ngenhlamba leyo abakuhlambalaza ngayo, bahlalele ovalweni lwempindiso yakho!

¹³Nkosi, thina sizwe siyizimvu zedlelo lakho, sesiyokudumisa njalo ungunaphakade; ebese siyimemezela indumiso yakho, sishumayeke ngayo ezizukulwaneni zonke.

AmaHubo 80

Elokucela ukuba abakwalsrayeli badle ngoludala

Elethulwe kumculisi ukuba lihlatshelelwe ngendlela ethi "Iminduze", ihubo lika-Asafu elingubufakazi.

¹Beka indlebe malusi kalsrayeli, wena ohola uJosefa njengomhlambi wezimvu! Wena ohlezi esihlalweni sobukhosi esisingethwe yizingilosi amasherabhu, qhamuka uqhakaze ngenkazimulo,

²wena mholi kaEfrayimu noBhenjamini noManase! Vuka ngamandla akho amakhulu, bese uza neno usisindise.

³Nkulunkulu buyisa elakithi usibuke ngobuso bakho obunomusa, yikhona siyophepha sisindile.

⁴Simakade Nkulunkulu, Nkosi yamaviyo. koze kube nini ubathukuthelele abantu bakho abakhuleka kuwe na?

⁵Saze sadla ukudla kwethu sikhala, wasiphuzisa imithayi yezinyembezi.

⁶Usenze sayinto yokubangwa ngomakhelwane, izitha zazikholisa zihlekisa ngathi.

⁷Nkulunkulu, Nkosi yamaviyo buyisa elakithi usibuke ngobuso bakho obunomusa, yikhona siyophepha sisindile.

⁸Wasiphula umvini wawukhipha eGibhithe, waxosha izizwe wawutshala ezweni lazo,

⁹wawucabela indawo lapho ungamila khona. Izimpande zawo zashona phansi zagxila, waba yisihlekehleke, wagcwalisa izwe lonke.

¹⁰Wamboza izintaba ngomthunzi wawo nemikhoba kaSomandla ngamagatsha awo.

¹¹Amagatsha awo afinyelela elwandle, ashaye emfuleni omkhulu iYufrathe.

¹²Pho wena usuludilizeleni uthango oluwubiyeleyo, abedlula ngendlela baze bawunqampune na?

¹³Izingulube zehlathi ziwushaya ziwubhuqe, izilwane zasendle ziwudla ziwuqothule.

¹⁴Nkulunkulu Nkosi yamaviyo, phenduka ubheke usezulwini lakho, ubone lomvini wakho uwucabangele,

¹⁵ihlumela owalitshala ngesokunene sakho, lesisithombo ozikhulisele sona saqina!

¹⁶Bawunqumile bawushisa ngomlilo, bayobhubha lapho ubanyonkoloza.

¹⁷Vikela uIsrayeli ngamandla akho, ulondoloze isizwe sakho osikhethileyo, lomuntu ozikhulisele yena waqina!

¹⁸Yikhona singayikuphinde sikuhlamuke; silondoloze sihlale njalo siphilile, yikhona siyolibiza igama lakho.

¹⁹Simakade Nkulunkulu, Nkosi yamaviyo buyisa elakithi, usibuke ngobuso bakho obunomusa, yikhona siyophepha sisindile.

AmaHubo 81

uNkulunkulu unomusa noma uIsrayeli ezenzela umathanda

Elethulwe kumculisi ukuba lihlatshelelwe ngogubhu lwaseGathi; elika-Asafa.

¹Hlokomani ngenjabulo nimbonge uNkulunkulu ongamandla ethu, nimhubele uNkulunkulu kaJakobe!

²Hlabani ihubo, nishaye izigubhu nezinqwabe nemiqangala ekhala kamnandi!

³Shayani uphondo ekuthwaseni kwenyanga nalapho isidilingene mhla womkhosi wethu!

⁴Ngoba lokhu kuyisimiso kwaIsrayeli, isinqumo sikaNkulunkulu kaJakobe.

⁵Wakwenza kwaba ubufakazi kwabakaJosefa mhla ephuma impi elwa namaGibhithe. Ngamuzwa ekhuluma esho into engejwayelekile kimi ethi:

⁶“Nganethula umthwalo emahlombe, nganiphumuza ekuthwaleni izitini ngamaqoma.

⁷Nangibiza nisebunzimeni nganikhipha, nganizwa ngisemafwini ayemnyama ehlo mile, nganivivinya esiphethwini saseMeribha. *Kunekhefu.*

⁸“Bantu bami, lalelani lapho nginiyala nginivusa! MaIsrayeli, sengathi ningakuzwa engikushoyo kini!

⁹Ningabi nankulunkulu mumbe enimkhonzayo, ningakhuleki nasesithixweni sabezizwe!

¹⁰Yimi uSimakade uNkulunkulu wenu, nganihlenga, nganikhipha kwelaseGibhithe. Khamisani, nginifunze nisuthe!

¹¹Kepha abantu bami abangilalelanga, uIsrayeli akabanga nandaba nami.

¹²Ngakhoke ngabayekela enkanini yezinhliziyo zabo ukuba bahambe benze umathanda.

¹³Sengathi abantu bami bebengangilalela, uIsrayeli alandele iziyalo zami!

¹⁴Izitha zabo bengizozinqoba ngokushesha, ingalo yami imelane nabaphambene nabo.

¹⁵Abangizondayo bebezosobela phambi kwami, ukujeziswa kwabo kuhlale ungunaphakade.

¹⁶Bengiyonondla ngokolweni wekhethelo, ngenenelise ngezinyosi zengoxi yedwala.”

AmaHubo 82

Elokusola abahluleli ababi

Ihubo lika-Asafu.

¹UMvelinqangi uSomandla uhlezi esigcawini, wengamele umgwamanda awumisayo, uthetha icala nalabo abangabahluleli

²Uthi kubo: “Koze kube nini nahlulela ngokungeyikho, nivuna abantu abayizikhohlakali na? *Kunekhefu.*”

³“Melani amalungelo ezimpofana nezintandane, nilwele abacindezelweyo nabantulayo!

⁴Khululani abampofu nababuswezi, nibakhiphe ezandleni zezonakali!

⁵Kanazi lutho nina, kaninakuqonda. Nihamba nidukuza ebumnyameni, izisekelo zobuntu zibhidlikile emhlabeni.

⁶Ngathi kini: ‘Ningabahluleli njengami, nina nonke ningamadodana oPhezukonke.’

⁷Noma kunjalo niyokufa njengabantu bonke, nibhubhe njengazo zonke izikhulu.”

⁸Yima ngobumo wehlulele umhlaba Mvelinqangi, ngoba izizwe zingezakho ngothi lwazo!

AmaHubo 83

Elokucela ukuba kubhujiswe izitha zikaIsrayeli

Ingoma eyihubo lika-Asafu.

¹Nkulunkulu mus' ukuthula ungathi vu, mus' ukuthula uzibe Somandla!

²Nazi izitha zakho zixokozela, nabakuzondayo bavusa umhlwenga!

³Babakhela uzungu abantu bakho, babakhela ugobe abayigugu lakho.

⁴Bathi: “Wozani sisibhubhise lesisizwe, igama likaIsrayeli licinywe, lingabe lisaphushwa nakuphushwa!”

⁵Nampo-ke bavumelene ngazwi linye, bavumelene ukuba bahlanganyele wena.

⁶Kukhandene abasemadlangaleni akwaEdomu nakwaIsamayela nakwaMowabhu nakwaHagari

⁷nakwaGebhali nakwa-Amoni nakwa-Amaleki namaFiliste nalabo abakhe eThire;

⁸abaseAsiriya bahlangene kanye nalabo nce belekelele abozalo lukaLothi. *Kunekhefu.*

⁹Ake ubenze lokhu owakwenza abakwaMidiyane noSisera noJabhini ngasemfuleni oKhishoni,

¹⁰labo ababhubha ngasemzini wasEndori badindiliza baphenduka amalongwe.

¹¹Dlana izikhulu zabo kungabi ndaba zalutho njengoba bake badliwa o-Orebhu noZebe, udle nababusi babo bonke kungabi ndaba zalutho njengoba bake badliwa oZebha noZalimuna,

¹²udle abathi: “Asilidle libe yifa lethu, lelizwe lezimfunda zikaNkulunkulu!”

¹³Nkulunkulu wami, baphephethe bakhwishize njengomungu, njengezibi zibhengulwa yisishingishane!

¹⁴Njengalokhu umlilo ushisa amahlathi nanjengalokhu amakloba ehangule amaqele,

¹⁵badungule kanjalo ngesivunguvungu sakho, ubethuse ngesiphepho sakho bayangazele!

¹⁶Simakade, ubuso babo ake ubujabhise, yikhona bezophendukela kuwe!

¹⁷Mabahlazeke bakhungatheke phakade, futhi badumazeke bese behubha,

¹⁸kwaziwe ukuthi nguwe wedwa kuphela uSimakade igama lakho, uSimayedwa ophakeme obusa umhlaba wonke.

AmaHubo 84

Elokulangazelela indlu kaSimakade

Elethulwe kumculisi ukuba lihlatshelelwe ngogubhu lwaseGathi; elabozalo lukaKhora; ihubo.

¹Simakade Nkosi yamaviyo, yaze yathandeka indlu ohlala kuyo!

²Umphefumulo wami uyalangazela uzondelela amagceke kaSimakade, umzimba wami nomoya wami wethabela uSomandla ophilayo.

³Umzwilili uzitholele indawo yesidleke nenkonjane indawo yokwakhela indlu, lapho iyochamusela khona amaphuphu ayo. Lendawo ingasemalathini endlu yakho wena Simakade Nkosi yamaviyo, Bayede Nkosi, Nkulunkulu wami!

⁴Babusisiwe abahlala endlini yakho bayohlalela ukukudumisa unaphakade. *Kunekhefu.*

⁵Bayadela, babusisekile labo abasiyalu samandla abo sikuwe, abalangazelela ngenhliziyo uhambo lokwenyuka baye emkhosini eZiyoni.

⁶La sebenqamula isigodi sakwahlongamvula siba yimfunda eqhuma iziphethu, simbozwe yizibusiso zembozisamahlanga, imbozisamahlanga ehlumisa amahlungu.

- ⁷Baya ngokuya bethola amandla baze bafike eNkosini komkhulu eZiyoni.
- ⁸Simakade Nkulunkulu Nkosi yamaviyo, ngizwe lapho ngikhuleka kuwe, ubeke indlebe Nkulunkulu kaJakobe! *Kunekhefu*.
- ⁹Nkulunkulu, hlenga oyisihlangu sethu, bheka ubuso benkosi oyigcobileyo!
- ¹⁰Usuku olulodwa emagcekeni akho lumnandi lwedlula ezinye eziyinkulungwane. Ngixolela ukuba ngibe ngumlindisango ethempelini likaNkulunkulu wami kunokutamasa emizini yezonakali.
- ¹¹Ngokubanini uNkulunkulu uSimakade uyilanga lethu nesihlangu sokusivikela, uSimakade usipha umusa asenzele igama, kagodli lutho oluhle kwabahamba ngobuqotho.
- ¹²Simakade Nkosi yamaviyo, ubusisekile umuntu owethembela kuwe.

AmaHubo 85

Elokucelela ulsrayeli umusa kuNkulunkulu

Elethulwe kumculisi; elabozalo lukaKhora; ihubo.

- ¹Simakade, wake walenzela umusa izwe lakho. wabuyisela izinhlahla kwabakwaJakobe, waphinda wabadlisa ngoludala.
- ²Wathethelela amacala abantu bakho, wagubuzela ukona kwabo konkana. *Kunekhefu*
- ³Yapheza nya intukuthelo yakho, wabhodla olakeni lwakho oluvuthayo.
- ⁴Nkulunkulu msindisi wethu, alibuye bese sidla ngoludala, kuphele nya ukusithukuthelela kwakho!
- ⁵Uyosicunukela ungunaphakade yini, usithukuthelele ezizukulwaneni zonke na?
- ⁶Kanti awuzukusivuselela futhi, abantu bakho bathokoze ngawe na?
- ⁷Sitshengise ukuthi unesihe sothando, bese ubuya usisindisa Simakade!
- ⁸Ngiyokuzwa azokusho uSomandla uSimakade; usethembisa inhlalakahle nokuthula thina bantu bakhe nabangcwele bakhe, kuphela nje asingabuyeli ebuwuleni.
- ⁹Uhlala elindele ukubasindisa lababantu abasuke bemesaba, kuvame udumo lwakhe kwelakithi.
- ¹⁰Uthando nokwethembeka kuyohlangana kubumbane, ukulunga nokuthula kube ngamathe nolimi.
- ¹¹Ukwethembeka kuyoqhuma phansi emhlabeni, nokulunga kuyobukela kusezulwini.
- ¹²USimakade uyosigidlabeza ngokuhle, izwe lakithi livame inala.

¹³ukulunga kuyomandulela uSimakade, kumhlahlele indlela ayohamba ngayo.

AmaHubo 86

Elokucela ukuba uNkulunkulu abe nesihe

Umkhuleko kaDavide.

¹Simakade, beka indlebe ungizwe ungiphendule, ngoba ngingumfokazana ontulayo.

²Londa ukuphila kwami, mina engiqotho; nguwe uNkulunkulu wami, sindisa inceku yakho ethembela kuwe!

³Ngihawukele Nkosi ube nomusa, ngokubanini ngilokhu ngikhala kuwe.

⁴Nkosi yami, thokozisa inhliziyo yenceku yakho, inhliziyo yami ngiyibhekise kuwe.

⁵Nkosi yami, wena unomusa ushesha uthethelele; sikhulu isihe sothando lwakho lwafuthi othanda ngalo bonke abakhala kuwe.

⁶Simakade, beka indlebe ulalele umkhuleko wami, ungizwe lapho ngikhala ngicela umusa!

⁷Nxashana ngisosizini ngiyakhala kuwe, ngokubanini uyongizwa ungiphendule.

⁸Akukho nkulunkulu ofana nawe Nkosi, akakho ongenza imisebenzi enjengeyakho.

⁹Izizwe zonke ezadalwa nguwe ziyokuza zikhothame phambi kwakho Nkosi yami, zihlokome udumo lwegama lakho.

¹⁰Umkhulu wena wenza izimangaliso, nguwe uMvelinqangi isimayedwa.

¹¹Simakade, ngifundise indlela ethandeka kuwe nce ngihambe nawe ngokwethembeka, ungenze ngizimisele ngento eyodwa: ukuba ngilesabe igama lakho!

¹²Ngiyokubonga Nkosi Nkulunkulu wami, ngikudumise ngenhliziyo yami yonke, ngibabaze igama lakho ungunaphakade.

¹³Sikhulu isihe sothando lwakho lwafuthi ongithanda ngalo wena ongophulayo, ungikhipha ekujuleni kwelabafuleyo.

¹⁴Mvelinqangi, izedeleli zingivukele zangihlasela, ibutho lezidlova elikwedelelayo wena lihlose ukungisusa.

¹⁵Kepha wena Nkosi yami unguSomandla, uNkulunkulu onesihawu nonomusa, wephuza kakhulu ukuthukuthela, uvame uthando nokwethembeka.

¹⁶Phendukela kimi ube nesihe uyiqinise inceku yakho Somandla, usindise indodana yencekukazi yakho!

¹⁷Nkosi ngenzele isihle sibe uphawu! Abangizodayo mabafojiswe nxa bebona ukuthi kanti uyangisiza uyangiduduza.

AmaHubo 87

Amalungelo okuba ngowaseZiyoni

Elabozalo lukaKhora; ihubo eliyiculo.

- ¹USimakade uthanda umuzi wakhe awusekela ezintabeni ezingcwele,
²amasango aseZiyoni uwathanda ngaphezu kwamaxuluma onke akwaJakobe.
³Uyabatshazwa wena muzi kaNkulunkulu, kumnandi impela akushoyo ngawe. *Kunekhefu.*
⁴Uthi: “Ngiphawula iGibhithe neBhabhiloni kwabangikhonzayo njengoba mina bengazi. AmaFiliste nabaseThire nabaseThophiya bangabantwana abazalelwe lapho, bonke bayiminsinsi yokuzimilela.”
⁵Kuyoshiwo ngeZiyoni kuthiwe: “Nakhu lapho bazalelwa khona bonke.” OPhezukonke uqobo walakha laqina.
⁶USimakade uyobhalisa amagama ezizwe athi: “Nalesi singumnsinsi wokuzimilela.”
⁷Bayosina bahlabelele bathi: “Iziphethu zami ziqhuma kuwe zonke.”

AmaHubo 88

Elokucela ukusindiswa ekufeni

Iculo eliyihubo labozalo lukaKhora; elethulwe kumculisi ukuba lihlatshelelwe ngendlela ethi “Isifo esihluphayo”. Inkondlo enesifundo kaHemani umfokaZera.

- ¹Simakade Nkulunkulu msindisi wami, ngikhala kuwe imini nobusuku.
²Umkhuleko wami mawufinyelele kuwe, ubeke indlebe uzwe ukukhala kwami!
³Umphefumulo wami wesuthi izinhlupheko, impilo yami isondela egodini,
⁴sengibalwe kanye nabasiwa kwagoqanyawo, ngaba njengendoda ephelwe amandla.
⁵Ngiyinhlwa phakathi kwabafuleyo, nginjengababuleweyo abalele emathuneni, laba abangasaphushwa nakuphushwa, ubagodlele isandla sakho esisizayo.
⁶Ungilalisile ekujuleni kwelabafuleyo ebumnyameni obuthe bhuqe ezinzolombeleni.
⁷Isankahlu solaka lwakho siphezu kwami, ungisibekele ngamagagasi olaka lwakho. *Kunekhefu.*
⁸Wabaqhelisa kimi engazana nabo, mina wangenza ngenyanyeka kubo, sengivalelwe ngci, angikwazi ukuphuma;

- ⁹izinhlopheko zingiqunde amehlo. Ngikhala kuwe Simakade mihla yonke, ngelulela kuwe izandla zami.
- ¹⁰Abafileyo uyabenzela yini izimangaliso, amathongo angavuka yini akudumise na? *Kunekhefu.*
- ¹¹Kuyashunyayelwa kambe yini emalibeni ngesihe sothando lwakho lwafuthi, nakwelabafileyo ngokwethembeka kwakho na?
- ¹²Izimangaliso zakho ziyaziwa yini ebumnyameni nokulunga kwakho kwelabangasekho na?
- ¹³Kepha mina ngiyakhala kuwe Nkosi ngicela usizo, umkhuleko wami wenyukela kuwe ekuseni.
- ¹⁴Simakade, kodwa yini ungilahle kanjena na? Yini usitheze ubuso bakho ngakimi na?
- ¹⁵Ngilokhu ngahlupheka kakhulu ngilengela egodini kwasebusheni, wangishaya ngashaywa uvalo, ngadideka.
- ¹⁶Ukuvutha kolaka lwakho kwehlele kimi, ungibulala ngovalo ngiphele nya.
- ¹⁷Lungizungeza njalo okomsinga womfula, lungihlanganisela phakathi gimbici.
- ¹⁸Esingamathe nolimi nabo ubaqhelise kimi, ngubumnyama kuphela osebungumngane wami.

AmaHubo 89

Isivumelwano sikaNkulunkulu noDavide

Inkondlo enesifundo kaEthani umfokaZera.

- ¹Simakade ngiyohlabelela njalonjalo, ngihashe isihe sothando lwakho, izindebe zami zibabaze ukwethembeka kwakho, kwaziwe ezizukulwaneni ngezizukulwane.
- ²Impela, uthando lwakho lwaphakade aluguquki, ezulwini wamisa ukwethembeka kwakho.
- ³Wathi wena: “Ngenze isivumelwano nokhethiweyo wami, ngafunga kuDavide inceku yami ngathi:
- ⁴‘Ngiyobeka uzalo lwakho ungunaphakade, kuyofa abantu kusale umbuso wakho, uphathe isihlalo sobukhosi nanininini.’ ” *Kunekhefu.*
- ⁵Simakade, izimangaliso zakho nokwethembeka kwakho kudunyiswa uquqaba olungcwele ezulwini.
- ⁶Ngubani osemkhathini wezulu ongase alinganiswe nawe Nkosi na? Yisiphi ezidalweni zasezulwini esingase sifaniswe nawe Nkosi na?
- ⁷UNkulunkulu uSomandla uyesabeka emkhandlwini wezingilosi ezingcwele, uhlonishwa yibo bonke abamhaqileyo.

- ⁸Simakade Mvelinqangi Nkosi yamaviyo ngubani ongangawe Somandla Simakade? Ukwethembeka kwakho kuyisembatho osigqokayo.
- ⁹Nguwe obusa ulwandle olugubhayo, nxa kuqubuka amaza alo uyaluthulisa.
- ¹⁰Nguwe owacoboshisa elaseGibhithe, lalokhu lidindilizile njengesidumbu; izitha wazidungula ngomkhono onamandla.
- ¹¹Lingelakho izulu, ngowakho nomhlaba, amazwe onke nokukuwo kwasungulwa nguwe.
- ¹²Wadala inyakatho neningizimu, intaba iThabho nentaba iHermoni zihayela igama lakho ngenjabulo.
- ¹³Usho ngesidlakela somkhono wakho, isandla sakho sinamandla amakhulu, esokunene sakho sidle ngamandla.
- ¹⁴Ukulunga nobuqotho kuyizisekelo owakhele kuzo isihlalo sakho sobukhosi, isihe sothando lwakho lwafuthi nokwethembeka kwakho kuyakwandulela.
- ¹⁵Nkosi siyadela isizwe esiyaziyo injabulo yokuhlokomela wena, esihamba ekukhanyeni kobubele bakho usibuka ngobuso bakho obunomusa.
- ¹⁶Ngenxa yakho sihlala sethabile, siphakanyiswe ngenxa yokulunga kwakho.
- ¹⁷Nguwe udumo lwamandla aso, ngomusa wakho kuphakanyiswa uphondo lwethu.
- ¹⁸Simakade wamkhetha oyisihlangu sethu, ingonyama yabekwa yiNgcwele kaIsrayeli.
- ¹⁹Endulo wazibonakalisa ngombono, wakhuluma kwabangcwele bakho wathi: “Ngimnike usizo ngambeka oyiqhawe, ngamphakamisa engimkhethe esizweni.
- ²⁰Ngazitholela inceku yami uDavide, ngayigcoba ngamafutha ami angcwele.
- ²¹Ngoyelekelela ngamandla esandla sami, ngiyiqinise ngamandla engalo yami.
- ²²Isitha asinakuyizuma ingazelele, nesonakali ngeke sayehlula.
- ²³Ngiyiqothula phambi kwayo abamelene nayo, ngibacekele phansi bonke abayizondayo.
- ²⁴Ngoyithanda ngethembeke kuyo njalo, iyonqoba njalo ngegama lami.
- ²⁵Ngokwenza isandla sayo sibuse kusukela ngasolwandle lwaseMedithera, kubuse amandla esokunene sayo kuze kufinyelele emfuleni iYufrathe.
- ²⁶Yona iyothi kimi: ‘Wena unguBaba, uNkulunkulu wami wena Somandla, idwala lami elingisindisayo.’
- ²⁷Mina ngiyoyenza izibulo lami iphakame phezu kwamakhosi omhlaba.
- ²⁸Ngoyithanda njalo ngothando lwafuthi, nesivumelwano sami nayo siyogxila.

- ²⁹Abazukulu bayo bohlala unaphakade, ngenze umbuso wayo ume njalo inqobo kusekhona isibhakabhaka phezulu.
- ³⁰Nxa abazukulu bayo belahla imfundiso bengahambi ngendlela yezinqumo zami,
- ³¹nxashana bedelela izimiso zami bengayigcini neze imiyalo yami
- ³²ngiyojezisa izono zabo ngentonga, bashaywe imivimbo ngobubi.
- ³³Kepha uthando lwami olungaguqukiyo angisoze ngayigodlela lona, ngeke ngibe ngongathembekile kuyo.
- ³⁴Ngeke ngisiphike isivumelwano sami ngigwiqike emazwini engiwashiloyo.
- ³⁵Ngalikhipha kwakanye, ngafunga ngagomela ngobungcwele bami, ngathi angisoze ngamkhohlisa uDavide.
- ³⁶Abazukulu bakhe bohlala unaphakade, umbuso wakhe ube ulokhu waba khona phambi kwami njengenhlamvu yelanga,
- ³⁷ube njengenyanga emi unaphakade. Ufakazi osemkhathini wethembekile." *Kunekhefu*.
- ³⁸Kepha wena uyilahlile inkosi oyigcobileyo, wayifulathela wayivuthela ngolaka.
- ³⁹Wadikila isivumelwano sakho nenceku yakho, wahlazisa isicoco sayo ngodaka.
- ⁴⁰Wadiliza izingange zayo zonke, nezinqaba zayo zasala ziwumbhidlika.
- ⁴¹Abadlula ngendlela bayebela okwayo, kwabakhelene nayo yaphenduka inhlekisa.
- ⁴²Abamelene nayo wabenza bayinqoba, izitha zayo ngothi lwazo zathokoza.
- ⁴³Nomkhonto wayo awudlanga enyameni, wayenza yehlulwa nasempini.
- ⁴⁴Uyephucile intonga yobukhosi, wayiketula esihlalweni sayo sobukhosi.
- ⁴⁵Wafinyeza izinsuku zokuphila kwayo, wayihlaza yehlelwa ngamahloni. *Kunekhefu*.
- ⁴⁶Simakade, koze kube nini uzifihla unomphela ngingakuboni na? Koze kube nini ulaka lwakho luvutha njengekloba lomlilo na?
- ⁴⁷Khumbula ukuthi impilo yami imfisha nokuthi wadala bonke abasemhlabeni baba njengomoya oshwezayo udlule.
- ⁴⁸Ngubani othi uyophila angafi, eqele umphefumulo wakhe egodini na? *Kunekhefu*.
- ⁴⁹Nkosi yami, ziphi izenzo zesihawu sakudala owazethembisa uDavide ngesifungo na?
- ⁵⁰Nkosi yami, khumbula ukuhlazeka kwezinceku zakho nokubekezelela kwami ukunukubeza kwezizwe eziningi kangaka.

⁵¹Simakade izitha zakho ziyabhinqa, inkosi oyigcobileyo ziyayilandela, ziyayibhinqa zibholokoqa inhlamba.

⁵²Akubongwe uSimakade nanininini! Elethu! Amen!

AmaHubo 90

Isigaba sesine

UNKulunkulu ungophakade, umuntu uyedlula

Umkhuleko kaMose umphrofethi kaNkulunkulu.

¹Nkosi, yilokhu waba yikhaya lethu esihlala kulo izizukulwane zidedelana.

²Kusukela izintaba zingakabi khona, ungakadali mhlaba nezwe lonke, unguMvelinqangi uSomandla, uSimakade ongenasiqalo nasiphetho.

³Uguqula umuntu umenze uthuli, uthi: “Bantwana babantu buyelani othulini enabunjwa ngalo!”

⁴Kuwe inkulungwane yeminyaka ingangosuku lwayizolo olwedlule, imfushane ngangomlindo wasebusuku.

⁵Uyabakhukhula njengesihlambi samanzi, baphele njengobuthongo ekuvukeni, banjengotshani obuhlumayo ekuseni.

⁶Buyahluma bukhephuzele ekuseni, ntambama buyanqunywa bubune.

⁷Intukuthelo yakho iyasiqeda, ulaka lwakho lusususa ngokushesha.

⁸Izono zethu uziklelise phambi kwakho, nezifihlakeleyo kazisithakele kuwe.

⁹Izinsuku zonke zokuphila kwethu ziyedlula ngenxa yentukuthelo yakho, siqeda iminyaka yethu ngokushesha njengehlebezi nje elithatha umzuzwana.

¹⁰Isibalo seminyaka yokuphila kwethu singamashumi ayisikhombisa kuphela, sibe ngamashumi ayisishiyagalombili uma thina sinensimbi elukhuni. Leyominyaka esithi ingcono kuneminye isiphathele ukuhlupheka nosizi nje. Ukuphila kwethu kwedlula ngokushesha bese sindiza simuke isiphelo.

¹¹Ngubani owazi amandla olaka lwakho nongaqonda ngentukuthelo yakho ukuze akwesabe njengokufaneleyo na?

¹²Sifundise ukuba sazi ukuthi izinsuku zokuphila kwethu zimbaleka, sibe nengqondo ekhaliphileyo.

¹³Wo Simakade buyela kithi! Uyolibala kuze kube nini na? Sal' usuhawukela izinceku zakho.

¹⁴Sidelise ngothando lwakho ekuseni ukuba sikuhlokomele ngenjabulo sethabe izinsuku zethu zonke.

¹⁵Sihlelele izinsuku zokuthokoza ezingangezinsuku owasihlupha ngazo, ngangeminyaka sificezelwe usizi.

¹⁶Bonisa izinceku zakho imisebenzi yakho, abazukulu bazo babone ubukhosi bakho.

¹⁷Nkosi Nkulunkulu wethu, izibusiso zakho azehlele phezu kwethu, usichumisele umsebenzi wezandla zethu, yebo, uchumise umsebenzi wezandla zethu!

AmaHubo 91

Ukukhosela phansi komthunzi kaSomandla

¹Lowo okhosela egumeni loPhezukonke ehlala njalo evikelwe uSomandla

²usengase akhulume kuSimakade athi: “Wena uyisiphephelo sami nenqaba yami, uNkulunkulu wami engethembela kuye.”

³Nguye uSimakade ozokophula ogibeni lwabacuphi, akuvikele obhubhaneni oluqothulayo.

⁴Uzokufukamela ngezimpaphe zakhe, akukhoselise ngaphansi kwamaphiko akhe. Ukwethembeka kwakhe kuyisihlangu sokukuvikela.

⁵Ungabi naluvalo ngesidumo sasebusuku namcibisholo oza ushweza emini saka

⁶nobhubhane olumemethaka ebumnyameni nomashayabhuqe obhubhisa eminibebade.

⁷Noma kudindiliza inkulungwane ecakwakho, izigidi zibe yizigingqi kwesokunene sakho, kepha wena uyosala ungenamyocu.

⁸Uyosimze ubuke nje ngamehlo weneliswe lapho ubona izikhohlakali zijeziswa.

⁹Ngoba wamenza uSimakade isiphephelo sakho, oPhezukonke wayikhaya lakho lokuphephela.

¹⁰Akukho lishwa lakwehlela, inhlupheko ayiyukusondela emzini wakho.

¹¹UNkulunkulu uyothuma izingilosi zakhe, zikulonde ekuhambeni kwakho konke.

¹²Ziyokusingatha zikuthwale ngezandla hleze unyawo lwakho luqhuzuke etsheni.

¹³Uyonyathela izimbube nezinyoka, ugxobe izimamba namabhongo ezingonyama.

¹⁴UNkulunkulu uthi: “Ngiyomphephisa ngoba ubambelela kimi, ngimkhweze endaweni ephakemeyo ngokuba uyalazi igama lami.

¹⁵Uyongibiza bese ngimphendula, ngiyoba naye lapho esosizini, ngimkhulule ngimenze abe nedumela,

¹⁶ahlale aze adle izinyoni zabazukulu, awabone amandla ami okusindisa.”

AmaHubo 92

Elokudumisa uSimakade ngezicolo zakhe

Ihubo eliyiculo elihlatshelwa ngosuku lwesabatha.

- ¹Kuyinto enhle ukubonga uSimakade, ngikuhubele izibongo wena oPhezulu,
²ngimemezele uthando lwakho ekuseni nasebusuku ukwethembeka kwakho,
³ngidlale ugubhu oluntambo ziyishumi nomqangala noqwabe olusho kamnandi.
⁴Nkosi ungithokozisile ngokwenzileyo, ngiyethaba ngemisebenzi yezandla zakho.
⁵Simakade, mikhulu yini pho imisebenzi yakho! Imicabango yakho ijulile kakhulu.
⁶Umuntu oyisithutha akakuboni lokhu, isiwula asikwazi ukukuqonda.
⁷Yize izonakali zihluma njengohlaza, ngisho noma izigilamkhuba zichuma, nokho-
ke ziyobhujiswa ungunaphakade.
⁸Kodwa wena Nkosi uphakeme njalonjalo.
⁹Simakade nazi izitha zakho, izitha zakho zibhubha njalo, zonke izigilamkhuba
ziyahlakazeka.
¹⁰Kodwa uwaphakamisile amandla ami njengophondo lwenyathi emisileyo,
wangigcoba ngamafutha akwanokusho.
¹¹Abangiqamekelayo ngababuka ngadela, ngezwa kwagcwala ezindlebeni zami
ngezigilamkhuba lezo ezangivukelayo.
¹²Olungileyo uyohluma njengesundu, akhule njengomkhoba waseLebhanoni.
¹³Labo banjengemithi etshaliweyo ehluma emzini kaSimakade, ichume
esigodlweni sikaNkulunkulu wethu,
¹⁴ithele ivame nalapho isimidala, iwuhlaza lweklume eliqinileyo,
¹⁵nce kwazeke ukuthi uSimakade ulungile, idwala lami elingenabubi kulo.

AmaHubo 93

Ubukhosi bukaSimakade

- ¹USimakade uyabusa, uyiNkosi wembethe ubukhosi, uSimakade wembethe
ubhince amandla. Impela, umhlaba wonke uzinzile awunakuzamazama.
²Simakade, ubukhosi bakho bumi kwasemandulo, wena wawuvele ukhona
kwaphakade.
³Nkosi, imifula idlange ngenhlokomo, imifula idlobe ngesimokololo, imifula
izwakele ngombhongo,
⁴kepha wena Simakade uphakeme, unobukhosi unamandla uyesabeka ngaphezu
kokuhlokoma kwezilwandle zonkana, kunamadlambi asolwandle
ayizindlondlobela.
⁵Ubufakazi bakho bethembekile ngokwempela, ubungcwele bubafanele abendlu
yakho, wena Nkosi, phakade kwaphakade.

AmaHubo 94

Elokucela ukuba kuphindiswe ezitheni

- ¹Simakade Nkulunkulu, wena Somandla ophindisa kufanele! Wena Somandla ophindisa kufanele, qhamuka ugqame ngenkazimulo!
- ²Mahluleli womhlaba vuka, uphindise kulabo abaziqhayisayo!
- ³Koze kube nini Simakade izonakali zihuba ngokunqoba kwazo, koze kube nini izonakali zikhuza iji,
- ⁴zisabholokoqa zikhuluma zihlambalaza, zizithwele lezizigilamkhuba zonke na?
- ⁵Bafohloza abantu bakho Nkosi, bahlupha lababantu okuyibona beyifa lakho.
- ⁶Babulala abafelokazi nabokufika, benzakalisa izintandane ezingenayise.
- ⁷Bathi: “USimakade kaboni esikwenzayo; akasinakile uNkulunkulu kaJakobe.”
- ⁸Qaphelani ziphukuphuku zalesisizwe, ziwula niyohlakanipha nini na?
- ⁹Yena lowo owacabeka indlebe, nithi kambe kungoba engezwa na? Yena lowo owabumba inhlamvu yeso, nithi kambe kungoba engaboni na?
- ¹⁰Yena lowo okhuza izizwe ngeziyalo zakhe, nithi kungoba engekwazi ukujezisa, yena ofundisa abantu ulwazi na?
- ¹¹USimakade wazi izizindlo zabantu abafana nomoya ohelezayo udlule.
- ¹²Simakade, ubusisiwe umuntu omyalayo umambulele imfundiso yakho ayazi
- ¹³aphumule nangezinsuku ezimbi, izonakali zize zimbelwe igodi lazo.
- ¹⁴USimakade kayikubalahla abantu bakhe, kayikubashiya abayisabelo sefa lakhe.
- ¹⁵Kuyobuye kwahlulelwe ngokulunga, bahambe ngokulunga bonke labo abanhliziyo yabo imi ngobuqotho.
- ¹⁶Ngubani oyongiphendulela kwababi, angimele ajamelane nezigilamkhuba na?
- ¹⁷Ukuba bengingasizwanga nguSimakade ngabe ngisheshe ngaya kwelabaphansi.
- ¹⁸Lapho ngithi: “Unyawo lwami luyashelela! ” wangisekela njalo Nkosi yami ngesihe sothando lwakho lwafuthi.
- ¹⁹Mhla inhliziyo iyaluza ngemicabango wangiduduza, umoya wami wethaba.
- ²⁰Abahlulela amacala ngenkohlakalo besebenzisa umthetho ngokungendlela kabanabudlelwane nawe nakanye.
- ²¹Bakha uzungu bahlanganyela olungileyo, banqumele ukufa umuntu ongenacala.
- ²²USimakade uyintaba yami ephakemeyo, uNkulunkulu wami idwala engibalekela kulo.

²³Wobabuyisela ngezenzo zenkohlakalo yabo, babhajwe ezihibeni zobubi babo. USimakade uNkulunkulu wethu uyobachitha.

AmaHubo 95

Elokudumisa nokukhonza uNkulunkulu

¹Wozani sihlabelele ngenjabulo, sihlakome sidumise uSimakade, yena dwala lensindiso yethu!

²Asiye phambi kwakhe simbonga, sihlakome simhubele amahubo!

³Mkhulu uSimakade uMvelinqangi uSomandla, iNkosi enkulu phezu konkulunkulu bonke.

⁴Izinzulu zomhlaba zisesandleni sakhe, neziqongo zezintaba ngezakhe nazo.

⁵Ulwandle ngolwakhe lwadalwa nguye, nomhlaba owomileyo wabunjwa yizandla zakhe.

⁶Wozani sikhuleke sikhothame, siguqe phambi kukaSimakade umenzi wethu!

⁷Ngokuba yena unguNkulunkulu wethu, thina siyizimvu zedlelo lakhe, umhlambi wakhe awelusayo. Sengathi beningalilalela izwi lakhe namhlanje likhuluma lithi:

⁸“Ningazenzi lukhuni izinhliziyu zenu njengokwenza kokhokho benu eMeribha ngalelolanga beseMasa ogwadule,

⁹mhla bengiqala bengivivinya nanxa sebeyibonile imisebenzi yami.

¹⁰Eminyakeni emashumi mane sangithukuthelisa lesosizukulwane, ngaze ngathi: ‘Bayisizwe esihlubukayo, kabahambisani nezindlela zami.’

¹¹Ngabafungela ngithukuthele ngathi: ‘Kabasoze bangena kulelozwe, izwe ababeyophumula kulo.’”

AmaHubo 96

Elokudumisa uSimakade

¹Culelani uSimakade igama elisha, nihubele uSimakade mhlaba wonke!

²Mculeleni uSimakade nibonge igama lakhe, nimemezele ngensindiso yakhe njalo,

³nazise izizwe ngobukhosi bakhe, izinhlanga zonke zizwe ngezimanga zakhe!

⁴Mkhulu uSimakade uyabongeka impela, kahlonishwe phezu konkulunkulu bonke!

⁵Onkulunkulu bezizwe bayizithixo nje, uSimakade unguMvelinqangi wadala izulu.

⁶Uhaqwe udumo nobukhosi, amandla nenkazimulo kusethempelini lakhe.

⁷Phakamisani uSimakade esikhundleni sakhe nina mindeni ngemindeni yezizwe. Phakamisani uSimakade esikhundleni sakhe senkazimulo yodumo nesamandla.

⁸Phakamisani uSimakade esikhundleni sakhe, nibabaze igama lakhe elinodumo, niye emagcekeni akhe neminikelo.

⁹Khothamani nikhuleke kuSimakade, nivunule ngezambatho zobungcwele, nigide phambi kwakhe mhlaba wonke!

¹⁰Memezalani phakathi kwezizwe nithi: “USimakade useyabusa uyiNkosi, umhlaba usekelwe ungezanyazanyiswe, nguye oyokwehlulela izizwe ngobuqotho.”

¹¹Akujabule izulu kwesase nomhlaba, kudume ulwandle nakho konke okukulo!

¹²Akwethabe amadlelo nakho konke okukuwo, kuhlokome yonke imithi yasendle

¹³phambi kukaSimakade ngoba uyeza, uyeza uzokwahlulela umhlaba. Uyokwehlulela amazwe onke ngobuqotho, nezizwe azahlulele ngokwethembeka.

AmaHubo 97

Ukubusa namandla kaSimakade

¹USimakade uyabusa uyiNkosi, akuthokoze umhlaba kudume phansi, kujabule amazwe ngamazwe agudla ulwandle.

²Amafu amnyama ahlomile ayamsibekela, ukulunga nobuqotho kuyisisekelo amise ngakho isihlalo sakhe sobukhosi.

³Phambi kwakhe kunomlilo ovuthayo oqothula izitha zakhe nxazonke.

⁴Imibani yakhe ikhanyisa amazwe onke, umhlaba uyibona ubusuthuthumela.

⁵Izintaba ziyancibilika njengencina, zincibilika phambi kobuso bukaSimakade, phambi kobuso beNkosi yomhlaba wonke.

⁶Izulu lizwakalisa ngokulunga kwakhe, izizwe zonke zibone ubukhosi bakhe.

⁷Bonke abakhonza izithombe abazenzileyo bezigabisa ngazo abehlelwe ngamahloni, onkulunkulumbumbu bonke bamkothamele.

⁸AbaseZiyoni bayajabula nxa bezwa lokhu, nabasemizini yaseJudiya bayathokoza ngenxa yezinqumo zakho Simakade.

⁹Ngokuba wena Nkosi ungoPhezukonke, nguwe obusa umhlaba wonke jikelele, uphakeme ngaphezu konkulunkulu bonke.

¹⁰Abamthandayo uSimakade abazonde okubi, uyakulonda ukuphila kwabangcwele bakhe abakhiphe esandleni sezonakali.

¹¹Kuhlwanyelwa ukukhanya okuyovunywa ngabalungileyo, babekelwe ukuthokoza labo abanhliziyo iqotho.

¹²Thokozani nethabe nina balungileyo, nibonge igama lakhe elingcwele!

AmaHubo 98

Elokudumisa uNkulunkulu uSokulunga

Ihubo.

- ¹USimakade mhayeleni ihubo elisha, ngoba wenzile imisebenzi emangalisayo, wanqoba ngesandla sakhe sokunene nangamandla engalo yakhe engcwele.
- ²USimakade wayizwakalisa insindiso yakhe, wabonakalisa ukulunga kwakhe ezizweni.
- ³Wakhumbula isihe sothando lwakhe nokwethembeka kwakhe kwabakaIsrayeli. Imikhawulo yonkana yomhlaba iyibonile insindiso kaNkulunkulu wethu.
- ⁴Hlokoma mhlaba udumise uSimakade, unkeneze umpompoloze umbonge!
- ⁵Hubelani uSimakade nibethe umqangala, nihlabelele kuvume umqangala!
- ⁶Shayani amacilongo kukhale uphondo, nihlokome kudume phansi nikhuze ubayede phambi kukaSimakade iNgonyama esibusayo!
- ⁷Akuhlokome ulwandle nokukulo konke kanye namazwe onke nabawakheleyo!
- ⁸Imifula ayishaye ihlombe kudume, izintaba zonke zivume ngenjabulo
- ⁹phambi kukaSimakade ngoba uyeza, uyeza uzokwahlulela umhlaba. Uyokwehlulela amazwe onke ngokulunga, nezizwe azahlulele ngobuqotho.

AmaHubo 99

USimakade wethembekile kulisrayeli

- ¹USimakade uyabusa uyiNkosi, izizwe ziyagebha zisovalweni. Uhlezi esihlalweni sakhe sobukhosi esithwelwe yizingilosi amasherabhu, umhlaba uyazamazama uyathuthumela.
- ²Mkhulu uSimakade eZiyoni, uphakeme phezu kwezizwe zonkana.
- ³Mabadumise igama lakho balibabaze, wena Gamaliyesabeka, basho bathi: “Nguye iNgcwele!”
- ⁴Bayede Ngonyama! Unamandla, uthanda okulungileyo; nguwe owenze ubuqotho bagxila, nguwe owahlulela kwaJakobe ungumahluleli olungileyo ongenzeleli.
- ⁵Mphakamiseni uSimakade uNkulunkulu wethu, nizilahle phansi ngasesigqikini sakhe, nisho nithi: “Nguye iNgcwele!”
- ⁶OMose noAroni, babekanye nabaphristi bakhe, noSamuweli wayengomunye wabakhuleka kuye. Bakhala kuSimakade wabaphendula.
- ⁷Wakhuluma kubo esensikeni yefu, bezwa babugcina ubufakazi bakhe nezimiso lezo abanika zona.
- ⁸Simakade, Nkulunkulu wethu wabaphendula wena; Somandla, waba nguNkulunkulu othethelelayo kubo noma wabajezisa ngenxa yezono zabo.

⁹Mphakamiseni uSimakade uNkulunkulu wethu, nimkhonze entabeni yakhe engcwele nithi: “USimakade uNkulunkulu wethu uyiNgcwele!”

AmaHubo 100

Umhlaba mawuhlokome ubonge

Ihubo lomnikelo wokubonga.

¹Hlokoma mhlaba udumise uSimakade!

²Khonzani uSimakade ngentokozo, nivele phambi kwakhe nihayiye!

³Yazini ukuthi uSimakade unguMvelinqangi, sadalwa nguye, kasizenzanga thina, singabantu bakhe, izimvu zedlelo lakhe.

⁴Ngenani emasangweni akhe ngokubonga, niye emabaleni akhe ngendumiso; mbongeni nibabaze igama lakhe.

⁵ngokubanini uSimakade unomusa, unesihe sothando lwaphakade nokwethembeka kwakhe kungokwezizukulwane.

AmaHubo 101

Isethembiso sokuhamba ngobuqotho

ElikaDavide; ihubo.

¹Ngiyocula ngituse umusa nobuqotho, ngikubonge ngalengkondlo Simakade.

²Ngoqaphela ukuhamba ngobuqotho, uyoze ufike nini kimi na? Ngiyohlala ngimsulwa emzini wami,

³amehlo ami anganamatheli kokuyihlazo, ngozonda izenzo ezicezileyo, ngingathatheki yimisebenzi enjalo,

⁴kudede inkohliso enhliziyweni yami, ngingabi nabudlelwane nabenzi bobubi.

⁵Ohleba omunye esitha ngiyombhubhisa, ngingambekezeleli othwele amehlo noqhoshayo.

⁶Izethenjwa zeNkosi endaweni ngiyozikhetha ngizenze izinceku zami, abantu abahamba ngobuqotho ngiyobaphakamisa babe yizikhonzi zami,

⁷ngingabavumeli komkhulu abantu abanozungu, ugedleyihlekisa angahlali phambi kwami.

⁸Ngiyovukela esigcawini nsukuzasa, ngibhubhise bonke ababi ezweni, ngiqede izonakali ziphume ziphele eJerusalema inxuluma likaSimakade.

AmaHubo 102

Ukukhala komuntu osekuhluphekeni

Umkhuleko womuntu ohluphekayo nxa ephelelwe amandla, ethula isikhalo sakhe phambi kukaSimakade.

- ¹Simakade yizwa umkhuleko wami, ukukhala kwami makufinyelele kuwe!
- ²Ungangifulatheli usitheze ubuso bakho mhlazana ngicwwe ukhlopheka; shesha ungihendule mhla ngikhala kuwe!
- ³Izinsuku zami zishabalala njengomusi, amathambo ami avutha njengomlilo.
- ⁴Inhliziyo idangele yabunisa okotshani, inhliziyo imnyama ukudla akusangeni.
- ⁵Ngizacile ngenxa yomsindo wokugquma, ngondile sengimbambo ziyabalwa.
- ⁶Nginjengonozalizingwenya esogwadule, njengesikhova sombhidlika wenxiwa.
- ⁷Ngiqwashile ngibheke ngawayizolo, ngiqhath' umunyu njengenyoni ophahleni.
- ⁸Izitha zami zijinge zingichukuluza, abangizingelayo babhoka ngolaka bese beqanganisa ngegama lami.
- ⁹Ngiyalila, umlotha usungukudla kwami, izinyembezi ziconsela kwengikuphuzayo
- ¹⁰ngenxa yolaka nokungithukuthelela kwakho. Ungithathile wangilahla emajukujukwini.
- ¹¹Zinginciphele izinsuku, selimathunzi, mina luqobo sengibunise okotshani.
- ¹²E Simakade! Nguwe osesihlalweni sobukhosi phakade, wokhunjulwa yizizukulwane ngezizukulwane.
- ¹³Wena uyosukuma ulihawukele iZiyoni, ngoba sekuyinkathi yokuliphatha ngomusa, isikhathi esimiselwe lokhu sesifikile.
- ¹⁴Izinceku zakho zilithanda noma liyimvuthu yamatshe, zilizwela noma lingumbhidlika wothuli.
- ¹⁵Abezizwe bolesaba igama likaSimakade, amakhosi onke azise ubukhosi bakhe.
- ¹⁶Mhla uSimakade elakha kabusha iZiyoni uyogqama ngenkazimulo nangobukhosi.
- ¹⁷Woyizwa ayinake imikhuleko yabadingayo, angayibukeli phansi imithandazo yabo.
- ¹⁸Lokhu sekuyolotshwa phansi, kulondelwe isizukulwane esizayo, isizwe esiyozalwa sidumise uSimakade.
- ¹⁹Ngokuba uSimakade wabuka phansi ekweliphezulu endaweni yakhe engcwele. Wabheka ngasemhlabeni esezulwini,
- ²⁰ukuba ezwe ukububula kwababoshiweyo, akhulule abathunyelwa kwagoqanyawo.
- ²¹Kuyolandwa ngegama lakhe eZiyoni, bamhubele uSimakade eJerusalema,
- ²²lapho izizwe sezibuthene ndawonye kanye nemibuso ukumkhonza uSimakade.

- ²³Waqeda amandla ami ngisesendleleni, wafinyeza izinsuku zokuphila kwami.
- ²⁴Ngithi: “Nkulunkulu wami Somandla, ungasheshi ungithathe ngisakhula. Kuyodlula iminyaka nezizukulwane kepha wena uyobe umi nanini.
- ²⁵Emandulo wabeka izisekelo zomhlaba, izulu lingumsebenzi wezandla zakho.
- ²⁶Kodlula izulu nomhlaba, wena ume njalo, koguga konke kuphele njengengubo, ukulahle maqede uthathe okunye.
- ²⁷Kepha-ke wena uyohlala unguwe njalo, iminyaka yakho ayinqamuki naphakade.
- ²⁸Abazukulu bezinceku zakho bohlala ezweni, inzalo yabo ihlale iphambi kwakho njalo.”

AmaHubo 103

Elokubonga uSimakade ngemisebenzi yakhe yomusa

ElikaDavide.

- ¹Mbonge uSimakade mphefumulo wami, konke okukimi akumdumise kubabaze igama lakhe elingcwele!
- ²Mbonge uSimakade mphefumulo wami, ungayikhohlwa imisebenzi yakhe yomusa!
- ³Uyangithethelela izono zami zonke, angelaphe zonke izifo zami.
- ⁴Uyangihlenga ngisinde ekufeni, angethwese umqhele ekhanda ongububele nothando olungaguqukiyo.
- ⁵Wenelisa ukufisa kwami ngokuhle, ngivuselelwe ubusha bami bubuye, ngithole amandla amasha njengokhozi.
- ⁶USimakade wenza imisebenzi yokulunga, amele abacindezelweyo bonke.
- ⁷Imisebenzi yakhe wayambulela uMose, abakwaIsrayeli wabazisa izenzo zakhe.
- ⁸Unesihawu uSimakade unomusa, kumthatha kade ukuba athukuthele, kuvame kuye uthando olungapheliyo.
- ⁹Akalokhu esithethisa esethwesa icala, akasithukutheleli ungunaphakade.
- ¹⁰Akasiphathi njengokufanele izono zethu, kaphindisi kithi ngokulingene nobubi bethu.
- ¹¹Njengoba izulu liphakeme phezu komhlaba, kanjalo uthando lwakhe olungaguqukiyo lukhulu luphakeme phezu kwabamesabayo.
- ¹²Uzintshinga kude iziphambeko zethu njengokuqhelelana kwempumalanga nentshonalanga.
- ¹³USimakade unesihe kwabamesabayo njengoyise ehawukela abantwana bakhe.

- ¹⁴Ngokuba uyasazi ukudalwa kwethu, abuye akhumbule ukuthi siluthuli nje.
- ¹⁵Umuntu, izinsuku zakhe zinjengotshani, uhluma njengembali yasendle iqhakaza.
- ¹⁶Ipheshethwa umoya inyamalale, ngisho nendawo yayo ingabisayazi.
- ¹⁷Kepha isibusiso sothando lukaSimakade olungaguquki kwaphakade naphakade siphezu kwalabo abamesabayo, unomusa nakubantwana babantwana
- ¹⁸kulabo abagcina isivumelwano sakhe bekhumbula imithetho yakhe bayigcine.
- ¹⁹USimakade wamisa isihlalo sakhe sobukhosi ezulwini, konke okukhona kungaphansi kombuso wakhe.
- ²⁰Mbongeni uSimakade zingilosi zakhe ezingamaqhawe anamandla, nina enikufezayo anithume khona lapho nimuzwa ekhipha umyalo wakhe!
- ²¹Mbongeni uSimakade luquqaba lonke lwamaviyo akhe, nina zincedu enenza akuthandayo!
- ²²Mbongeni uSimakade nina misebenzi yonke ayenzileyo ezindaweni zonke embusweni wakhe! Mbonge uSimakade mphefumulo wami!

AmaHubo 104

USimakade unakekela akudalileyo

- ¹Mbonge uSimakade mphefumulo wami! Simakade Nkulunkulu wami, wena umkhulu ngokwesabekayo. Wewathe ubukhosi nenkazimulo,
- ²uzembesa ingubo yokukhanya. Izulu ulendlalile njengesikhumba,
- ³indlu yakho yobukhosi uyakha phezu kwamanzi. Amafu amnyama ahlomile ayinqola yakho, umoya ungamaphiko akho oshweza ngawo.
- ⁴Uthuma umoya ube yisigijimi sakho, umbani ophambanayo ube yinceku yakho.
- ⁵Wagxumeka umhlaba ezisekelweni zawo nce ungazanyazanyiswa phakade naphakade.
- ⁶Wawugubuzela ngezinzulu zolwandle, amanzi eleka iziqongo zezintaba.
- ⁷Wawakhuza ayesecela empunzini, ngokubhonga kwakho ayesebaleka,
- ⁸adilika ezintabeni ehlela ezigodini eya endaweni owawakhethela yona.
- ⁹Wawabekela umncele ukuba angaweqi, angabuyeli emuva asibekele umhlaba.
- ¹⁰Uqhumisa iziphethu zigobhoze emihosheni, kugeleze imifula phakathi kwezintaba.
- ¹¹Kuyo kuphuza izilwane zonke zasendle, amadube acima ukoma kwawo kuyo.
- ¹²Izinyoni zasendle ziyakhela ngakuyo, emagatsheni emithi zitshwiyoze zicula.

- ¹³Uchela izintaba ngemvula evela phezulu, umhlaba uvame izithelo zemisebenzi yakho:
- ¹⁴uhlumisa utshani nce kuphile impahla, nemifino elinywe ngabantu emasimini, bathole ukudla okuvela emhlabathini,
- ¹⁵newayini elenamisa inhliziyo yabo, namafutha okugcoba ubuso bucwebezele, nokudla okuyinsika yempilo yomuntu.
- ¹⁶Kweneliswa nemithi yasendle kaSimakade, imikhoba yaseLebhanoni ayitshalayo
- ¹⁷izinyoni ezakhela kuyo izidleke zazo; unogolantethe wakhela emithinemide.
- ¹⁸Izintaba ezinde ziyinkundla yamaqhina, ezixhotsheni zamatshe kucasha izimbila.
- ¹⁹Inyanga uyenza yahlukanise izikhathi, ilanga liyasazi isikhathi sokushona.
- ²⁰Ulimboza ngobumnyama bese kuhlwa, kweluke zonke izilwane zasendle.
- ²¹Amabhongo amabhubesi ayazamula ehamba efuna izinyamazane zawo, ecela kuSomandla ukudla kwawo.
- ²²Ekuphumeni kwelanga ahoshekela emuva, alale ecashile emihumeni yawo.
- ²³Umuntu uyaphuma aye emsebenzini wakhe ashikashikeke lize liyoshona ilanga.
- ²⁴Yaze yaminingi imisebenzi yakho Nkosi! Ukwenze konke ngokuhlakanipha okukhulu, umhlaba ugcwele izidalwa zakho.
- ²⁵Nantuya ulwandle lukhulu, lubanzi, kukhona lapho izilwane ezitshuzayo ezincane nezinkulu ezingenakubalwa.
- ²⁶Imikhumbi ihamba intweze kulo, nemikhomo oyidalele ukutshakadula kulo.
- ²⁷Zonke lezizidalwa zibheke kuwe ngethemba ukuba uzifunze ngesikhathi esifaneleyo.
- ²⁸Uzipha ukudla kwazo bese zikuqoqa, uphakele ngesandla esevayo ngesihle bese zaneliswa ngokuhle ezikuphiwayo,
- ²⁹usitheza ubuso bakhe zinyamalale, uzephuca umphefumulo zishabalale, ziphenduke zibe uthuli ezabunjwa ngalo,
- ³⁰uthumela uMoya wakho bese ziyadalwa, uhlumise kabusha okusebusweni bomhlaba.
- ³¹Udumo lukaSimakade alume phakade, athokoze uSimakade ngemisebenzi yakhe!
- ³²Nguye obuka umhlaba ubusuthuthumela, afike athinte izintaba bese zishunqa.

³³Ngiyomculela uSimakade ngisesemhlabeni, ngimhubele uNkulunkulu wami ngisekhona.

³⁴Akwamukeleke kuye ukuzindla kwami; mina ngojabula ngidele ngoSimakade.

³⁵Izoni azinyamalale unomphela emhlabeni, izonakali zingabe zisaphushwa nakuphushwa! Mbonge uSimakade mphefumulo wami! Haleluya, dumisani uSimakade!

AmaHubo 105

Imisebenzi emangalisayo kaSimakade ayenzela ulsrayeli

¹Bongani uSimakade, nishumayele udumo lwegama lakhe, nazise izizwe ngemisebenzi yakhe!

²Hlabelelani nimdumise uSimakade, nikhulume ngezimangalisano zakhe zonke!

³Zigabiseni ngegama lakhe elingcwele; bajabule ngenhliziyo yonkana abantu labo abamfunayo uSimakade!

⁴Khuthalelani ukumazi uSimakade, niwafunde amandla akhe amakhulu, nifunise ubukhona bakhe njalo!

⁵Khumbulani izimangalisano ayezenza, izimanga zakhe nezinqumo azikhiphayo,

⁶nina nzalo ka-Abhrahama inceku yakhe, nina bakaJakobe enakhethwa nguNkulunkulu!

⁷Nguye uSimakade uNkulunkulu wethu, izinqumo zakhe ziqondene nomhlaba wonke.

⁸Usikhumbula njalo isivumelwano sakhe, nezimiso zakhe inkulungwane yezizukulwane,

⁹lesosivumelwano asenza noAbhrahama, isethembiso sakhe asifungela kulsaka,

¹⁰wasiqinisa saba yisimiso nakuJakobe, isivumelwano esimiyo noIsrayeli.

¹¹Wathi: “Wena ngokunika izwe lakwaKhanana, libe yisabelo eniyoba zindlalifa zalo.”

¹²Babembalwa ngesibalo beseyidlanzana, beyimithonselana yezihambi kulelozwe.

¹³Babehamba bezisisa ezizweni ngezizwe bephuma bengena umbuso ngombuso,

¹⁴kodwa kavumelanga muntu ukubacindezela, ngenxa yabo wajezisa namakhosi imbala,

¹⁵wathi: “Ningabathinti abagcotshiweyo bami, ningabalokothi nibalimaze abaphrofethi bami!”

¹⁶Yena waveza indlala kulelozwe, imbuya yadliwa ngothi.

- ¹⁷Wayesethuma indoda eyabandulela, uJosefa wathengiswa waba yisigqila.
- ¹⁸Bamhlupha bambopha izinyawo ngezisinga, bamnsala ngamaketango ensimbi
- ¹⁹kwaze kwagcwaliseka amazwi ayewashilo, uSimakade emfakazela ukuthi uqinisile.
- ²⁰Inkosi uFaro yathumela ukuba akhululwe, lowombusi wezizwe wathi makadedelwe.
- ²¹Yambeka waba ngumphathi womuzi wayo, induna ebheke konke eyayinakho.
- ²²Walawula phezu kweziphakanyiswa zayo, wafundisa izigele zayo ukuhlakanipha.
- ²³UIsrayeli wayesefika kwelaseGibhithe, uJakobe waba yisihambi ezweni lakwaHamu.
- ²⁴USimakade wabandisa kakhulu abantu bakhe, wabapha amandla phezu kwezitha zabo.
- ²⁵Wenza zajika zabazonda abantu bakhe, zasuka zaqilizela izinceku zakhe.
- ²⁶Wayesethumela uMose inceku yakhe, ehambisana noAroni ayemkethile.
- ²⁷Benza izimangaliso zakhe ebantwini, nezimanga ezweni lakwaHamu.
- ²⁸Waletha ubumnyama kwahlwa ngci, abaseGibhithe kabamelananga nakushoyo.
- ²⁹Waguqula amanzi abo aba yigazi, wazishaya wazibhuqa izinhlanzi zakhona.
- ³⁰Izwe labo lagcwala izingxangxa, zaphethuza nasesigodlweni senkosi.
- ³¹Wakhipha umyalo kwabhuza izibawu, kwavela izinsensane ezweni lonke labo.
- ³²Wehlisa isangquma esikhundleni semvula, kwaklwebha amakloba onyazi ezweni labo.
- ³³Waceka imivini nemikhiwane yabo, wephula nemithi ezimfundeni zakhona.
- ³⁴Wakhipha umyalo kwavela isikhonyane nezinkumbi ezingenakubalwa zenkasa
- ³⁵okwalushaya kwalubhuqa uhlaza ezweni labo, kwazidla kwaziqeda izithelo emasimini abo.
- ³⁶Wabulala onke amazibulo ezweni ababezibone ngawo ukuthi bangamadoda.
- ³⁷Wayesekhipha isizwe sakhe eGibhithe, saphuma siphethe isiliva negolide, emindenini yaso akutengezelanga noyedwa.
- ³⁸AmaGibhithe ajabula mhla bemuka ngoba ayeshayana amadolo ngenxa yabo.
- ³⁹Ifu laba ngumpheme wabasithibeza ngalo, kwavela umlilo owabakhanyisela ebusuku.

- ⁴⁰Bacela, wayesebapha izagwaca, wabasuthisa ngesinkwa esivela ezulwini.
- ⁴¹Waqhekeza idwala kwagobhoza amanzi, ageleza ogwadule njengomfula.
- ⁴²Ngoba wakhumbula isethembiso esingcwele asenza kuAbhrahama inceku yakhe.
- ⁴³Wahola abantu bakhe bahamba ngokujabula, abakhethiweyo bakhe bahuba ngokwethaba.
- ⁴⁴Wabanikeza umhlaba owawungowabezizwe, badla ifa eliyisithukuthuku sezinhlanga,
- ⁴⁵nce isizwe sakhe sigcine izimiso zakhe, silondoloze imfundiso yomthetho wakhe. Halleluya, dumisani uSimakade!

AmaHubo 106

Inkani kalsrayeli

- ¹Halleluya, dumisani uSimakade! Bongani uSimakade ngoba unomusa, unesihe sothando lwaphakade!
- ²Ngubani ongalanda ngemisebenzi yamandla kaSimakade, amemezele udumo lwakhe lonke na?
- ³Babusisiwe abahamba ngobuqotho, lababantu abenza okulungileyo njalo.
- ⁴Ngikhumbule nami Nkosi yami lapho wenzela abantu bakho umusa, ngihambele nami ngensindiso yakho
- ⁵nce ngibone abakhethiweyo bakho bechuma, ngithokoze kanye nesizwe sakho, ngigabe ngawe emdibini nabayifa lakho.
- ⁶Sonile thina sikanye nokhokho, sona kakhulu, senza okubi.
- ⁷Okhokho kabazange baziqaphelisise izimangaliso zakho beseseGibhithe. Kabazikhumbulanga izenzo lezo eziningi owawuzenzile ngothando lwakho lwafuthi, kodwa benza ubuhlongandlebe ngasolwandle, beseduze nasoLwandle oluBomvu.
- ⁸Kodwa uSimakade wabasindisa nce kuphakanyiswe igama lakhe, abonakalise amandla akhe esabekayo.
- ⁹Wakhuza uLwandle oluBomvu loma nkwe, wabaweza badabula ekujuleni njengasehlane.
- ¹⁰Wabasindisa esandleni salowo obazondayo, wabahlenga emandleni engalo yesitha.
- ¹¹Amanzi asibekela abamelene nabo, akwasala noyedwa ezitheni zabo.
- ¹²Lapho-ke bawakholwa amazwi akhe, bacula bamhasha ngezibongo.

- ¹³Basheshe bayikhohlwa imisebenzi yakhe, kabalindelanga ukuzwa izeluleko zakhe.
- ¹⁴Bangelwa ukuhaha ogwadule, bamqala uSomandla ehlane.
- ¹⁵Wabanika lezozinto abazicela kuye, kepha wabaqeda ngokufa okwabaqothulayo.
- ¹⁶Endaweni ababegobe kuyo amadlangala baba nomhawu bamfela umona uMose noAroni owayehlukaniselwe uSimakade.
- ¹⁷Umhlaba waqhekezeka waginga uDathani, wagqiba abeqembu lika-Abhiramu.
- ¹⁸Umlilo wavutha wadla abeqembu labo, ilangabi lakhotha izonakali lezo.
- ¹⁹Babumba umphuhle wethole eHorebhu, bakhothamela isithixo esibunjiweyo.
- ²⁰Bamchiliza owayewudumo lwabo, baqoka umphuhle wenkomo ehlabulayo.
- ²¹Bamkhohlwa uSomandla umsindisi wabo owayegile izimanga ezinkulu eGibhithe,
- ²²imisebenzi emangalisayo kwelakwaHamu, izinto ezesabekayo ngasoLwandle oluBomvu.
- ²³Walikhipha wathi uzobaqothula, Mose lowo wakhe owabashwelezelayo, wabakhalela wabalamulela kuNkulunkulu ukuba abhodle ulaka angabaqothi baphele.
- ²⁴Balipiklela leliya elihle kakhulu, kabaze basikholwa isethembiso sakhe.
- ²⁵Bahlala bakhononda emadlangaleni abo, bangalilalela izwi likaSimakade.
- ²⁶Waphakamisa isandla wafungela ukubaceka bafele ehlane,
- ²⁷inzalo yabo ibe yincithakalo kwabezizwe, ichithekele emazweni ngamazwe.
- ²⁸Bayasuka-ke sebezisisa kuBhali wasePheyyori, badla imihlatshelo engeyabafuleyo.
- ²⁹Bamcunula ngemikhuba ababeyenza, kwabheduka imbo yabaqeda.
- ³⁰Kwasuka uFiniyase wabalamulela, kwase kunqamuka isifo esibhubhisayo;
- ³¹ngalokho wasebalelwa ukulunga ezizukulwaneni ngezizukulwane naphakade.
- ³²Babuye bamqala esiphethwini saseMeribha, noMose futhi babuye bamonela,
- ³³ngoba bacunula uMoya kaNkulunkulu, uMose wadinwa wakhuluma weqisa.
- ³⁴Izizwe lezo kabaziqothulanga njengoba uSimakade ayebayalile ngazo,
- ³⁵kepha baba mdibi munye nabezizwe, bafunda ukugila imikhuba yabo.
- ³⁶Bakhothamela izithixo zabafo, zababhabhisa kunoxhaka.

- ³⁷Bahlabisa imimoya emibi, beyihlabisa ngamadodana namadodakazi abo.
- ³⁸Bachitha igazi lezingane ezingenacala, igazi lamadodana namadodakazi abo, banikela ngawo ezithixweni zakwaKhanana, izwe lonke lagobhoza igazi.
- ³⁹Banukubezeka kanjalo ngemisebenzi yabo, ngemikhuba yabo bahlubuka baba yiziphingi.
- ⁴⁰Ngakhoke ulaka lukaSimakade lwavutha, wabathukuthelela abantu bakhe, wabanengwa abayisabelo sefa lakhe.
- ⁴¹Wayesebanikela ezandleni zabezizwe, ababazondayo bababusa babaqonela.
- ⁴²Izitha zabo zabacindezela zabathobisa, zabanyathela ngaphansi kombuso wazo.
- ⁴³Wayelokhu ebasindisa kaninginingi, kepha bahlanganisa ukumchitha angababusi, bangena bathi shi ekonakaleni kwabo.
- ⁴⁴Wabezwela lapho bezikhalela kuye, wanakisisa lapho ebona besosizini.
- ⁴⁵Wakhumbula isivumelwano sakhe wabezwela, uthando lwakhe olukhulu lwafuthi lwamenza ukuba abuye axole.
- ⁴⁶Wenza bonke ababebathumbile ukuba babuye babadabukele.
- ⁴⁷Sisindise Simakade Nkulunkulu wethu, usibuthe ezizweni usiqoqele ndawonye yikhona sizobongela igama lakho elingcwele, sibabaze udumo lwakho sigabe ngalo!
- ⁴⁸USimakade uNkulunkulu kaIsrayeli akadunyiswe phakade naphakade! Umphakathi wonke awuthi: "Elethu! Ameni!" Haleluya, dumisani uSimakade!

AmaHubo 107

Isigaba sesihlanu

USimakade uyakhulula ezingxakekweni

- ¹"Bongani uSimakade ngoba unomusa, unesihe sothando lwaphakade!"
- ²Abahlengiweyo bakaSimakade abasho njalo, abophulayo esandleni sezitha zabo.
- ³Waziqoqela bona emazweni ngamazwe, wabalanda empumalanga nasentshonalanga, enyakatho nasezweni langasolwandle.
- ⁴Babezula ehlane lakwahlongasibi, nokho bangathola muzi abangawuhlala.
- ⁵Babephathwa yindlala nokoma, kwaye kwaphela nasozwanini kubo.
- ⁶Bakhala kuSimakade besekuhluphekeni, wabakhulula ezingxakekweni zabo.
- ⁷Wabafaka emkhondweni owonawona ukuba bawulandele bangenise emzini.
- ⁸Abambonge uSimakade ngothando lwakhe nangemisebenzi yakhe emangalisayo kubantu!

- ⁹Uwudelisile umphefumulo owomileyo, abalambileyo wabasuthisa ngokuhle.
- ¹⁰Babehlezi ethunzini nasesigayegayeni beyiziboshwa ezigigwe ngezisinga,
- ¹¹ngoba babekade bengamaphikankani bengayilaleli imiyalo kaSomandla, bedelela iseluleko soPhezukonke.
- ¹²Wabazuka umoya ngokubagqilaza, bafumbeka phansi bangasizwa muntu.
- ¹³Bakhala kuSimakade besekuhluphekeni, wabakhulula ezingxakekweni zabo.
- ¹⁴Wabakhipha ethunzini nasesigayegayeni, wanqamula izibopho ezazibansinyile.
- ¹⁵Abambonge uSimakade ngothando lwakhe nangemisebenzi yakhe emangalisayo kubantu!
- ¹⁶Wafohloza amasango ethusi, wephula imigoqo yensimbi.
- ¹⁷Baba yiziwula ezonakeleyo ngokweqa umthetho, base behlushelwa icala abalenzileyo;
- ¹⁸izinhliziyiyo zaba mnyama kabaze badla, baba yizidondobala ezilengela ekufeni.
- ¹⁹Bakhala kuSimakade besekuhluphekeni, wabakhulula ezingxakekweni zabo.
- ²⁰Wakhipha umyalo wakhe wabaphilisa, wabophula sebeyela egodini.
- ²¹Abambonge uSimakade ngothando lwakhe nangemisebenzi yakhe emangalisayo kubantu,
- ²²banikele ngomhlatshelo wokubonga, bababaze imisebenzi yakhe bahlokome!
- ²³Babentweza elwandle ngemikhumbi behweba ngempahla olwandle;
- ²⁴bakhangwa yimisebenzi kaSimakade nezimangaliso zakhe olwandle olujulileyo.
- ²⁵Walikhipha kwase kusuka isiphepho, savusa amadlambi alo asho aqonga.
- ²⁶Bathathwa baphoswa phezulu, bagomonqa behliswa, bashona phansi, baphelelwa yisibindi besengcupheni.
- ²⁷Badiyazela bantenga njengesidakwa, ukuhlakanipha kwabo kwaphela nya.
- ²⁸Bakhala kuSimakade besekuhluphekeni, wabakhulula ezingxakekweni zabo.
- ²⁹Wathulisa isiphepho kwathi cwaka, amadlambi olwandle athula athi du.
- ³⁰Bathokoza ngoba kwase kuthe cwaka, wabafikisa kulelothe ku ababeqonde kulo.
- ³¹Abambonge uSimakade ngothando lwakhe nangemisebenzi yakhe emangalisayo kubantu,
- ³²bambabaze bephambi kombuthano webandla, bamdumise emhlanganweni wezigele.
- ³³Washisa imifula yaba ugwadule, imithombo yamanzi yasha yagangadeka,

- ³⁴izwe lenala laba yihlane elineswayi ngenxa yobubi babantu abalakheleyo.
- ³⁵Waguqula ugwadule lwaba yichibi lamanzi, uqwathule lwaqhuma iziphethu zamanzi.
- ³⁶Kulapho abeka khona abalambileyo inxiwa, bahlala bakha imizi yabo bazinza.
- ³⁷Balima amasimu batshala nezivini, bavuna intilibathwa yokudla nezithelo.
- ³⁸Wababusisa baze banda kakhulu, bavunywa yimfuyo yabo yachuma.
- ³⁹Kwabuye kwenzeka futhi bancipha, bathotshiswa ngokucindezelwa nokuhlushwa.
- ⁴⁰Wazibukela phansi izikhulu, wazenza imizulane zahlwathiza ehlane,
- ⁴¹kodwa wamenyula ompofu wamkhipha osizini, wamandisela imizi njengomhlambi.
- ⁴²Abaqotho bayakubona lokhu bajabule, ababi bathunge imilomo bathule.
- ⁴³Ohlakaniphileyo makazibukisise lezizinto aqonde ngesihe sothando lukaSimakade!

AmaHubo 108

Elokucela usizo, isizwe selekelelwe ezitheni

(AmaHubo 57:7-11; 60:5-12)

Ingoma eyihubo likaDavide.

- ¹Inhliziyo yami imi isibindi Mvelinqangi, ngiyocula ngikuhubele ngikudumise, umphefumulo wami uyocula uhube.
- ²Phaphamani luqwabe lwami nomqangala, ngomculo wenu ngiyovusa intathakusa.
- ³Simakade, ngiyokudumisa phakathi kwezizwe, ngikuhubele naphakathi kwezinhlanga.
- ⁴Ubukhulu besihe sothando lwakho bufinyelela ezulwini nakweliphezulu, ukwethembeka kwakho kuye kushaye emafwini.
- ⁵Mvelinqangi, akugqame ubukhosi bakho kweliphezulu, udumo lwakho lwande emhlabeni wonke!
- ⁶Ngingobise ngesokunene sakho ungizwele, ukuze abathandiweyo bakho basindiswe.
- ⁷UMvelinqangi ukhulume esebungcweleni bakhe wathi: “Ngiyozigabisa ngokuphumelela kwami, ngidabule iShekemu ngilabe, ngiklame isigodi saseSukothi.
- ⁸Izwe lakwaGiliyadi ngelami, ngelami nezwe lakwaManase, uEfrayimu uyisihlangu sokuvikela ikhanda lami, uJuda yintonga yami engibusa ngayo,

⁹elakwaMowabhu lingumcengezi enginqamulela izinyawo kuwo, kwelakwaEdomu kulapho ngikhweza khona izicathulo, elamaFiliste ngiyolinqoba ngesase ngikhuze iji.”

¹⁰Ngubani oyongisa kulowomuzi oyinqaba, aze angibeke kwelakwaEdomu na?

¹¹Nkulunkulu, akuwena osidubile wasilahla? Wo Nkulunkulu! Awusaphumi impi namaviyo ethu na?

¹²Sisize uselekelele komelene nathi, luyize usizo lomuntu womhlaba.

¹³Sonqoba ngoNkulunkulu engakithi, azidovadove phansi izitha zethu.

AmaHubo 109

Elokunxusa impindisa ezitheni *Elethulwe kumculisi; elikaDavide; ihubo.*

¹Nkulunkulu wami engimdumisayo, ngizwele ungamane uthule nje!

²Izonakali nabakhohlisi bayangihleba, bangiqambela amanga ngemilomo yabo,

³bangihaqe ngamanga anenzondo, balokhu belwile nami bengisukela nje.

⁴Ngiyabathanda, nokho bayangisentelela, kepha mina ngihlala emkhulekweni.

⁵Ngabenzela okuhle, babuyisela ngokubi, ngabakhombisa uthando, baphindisa ngenzondo.

⁶Lomuntu oyisitha sami akahlulelwe ngumahluleli okhohlakeleyo, kuvele othile amethwese icala!

⁷Akalahlwe icala nxashana ehlulelwa, ngisho nomkhuleko wakhe awuphenduke isono!

⁸Imihla yokuphila kwakhe ayifinyezwe, nesikhundla sakhe sithathwe ngomunye!

⁹Abantwana bakhe ababe yizintandane, nomkakhe abe ngumfelokazi!

¹⁰Abantabakhe ababe yimizulane enqibayo, bahambe benxiba bekude namanxiwa!

¹¹Konke anakho akudliwe ngumtshelikisi, abokufika bamphange isithukuthuku sakhe!

¹²Kungabikho noyedwa omdabukelayo nonesihe kubantabakhe bekhedamisile!

¹³Inzalo yakhe ayiqotheke iphele nya, igama layo lingaziwa neze ngabantababo!

¹⁴Ububi boyise akabukhumbule uSimakade, singesulwa neze isono sikanina.

¹⁵Lokhu akuhlale kuphambi kukaSimakade, enze bangabe besakhunjulwa emhlabeni!

- ¹⁶Lomuntu akakucabanganga ukuba nesihe, elokhu azingela ocindezelweyo nompofu, wabulala onhliziyo yakhe idabukile.
- ¹⁷Wayekhonze ukuqanganisa, kwabuya ngaye, akasijabulelanga isibusiso, ngakho saqhela kuye.
- ¹⁸Ukuqanganisa kwakhe kwaba yinsakavukela umchilo wesidwaba, kwangena njengamanzi emzimbeni wakhe, kwaba njengomnkantsha emathanjeni.
- ¹⁹Iziqalekiso azimnamathe njengesevatho nanjengexhama azibopha ngalo mihla yonke!
- ²⁰Simakade bavuze kanjalo-ke abangimangalelayo bekhuluma kabi ngami.
- ²¹Simakade Nkosi yami ngenzele okuhle ukuba kudunyiswe igama lakho! Ngophule ngoba luhle uthando lwakho!
- ²²Ingani mina ngihluphekile ngimpofu, ngilimele ngaphakathi emoyeni.
- ²³Ngedlula njengomthunzi wantambama, ngithintithwa njengentethe ephephukayo.
- ²⁴Sengizilile kwaze kwaxega amadolo, umzimba wami awuzacile khona, ngiyanuka.
- ²⁵Mina ngiyinsini kubo bonke, bangibuka maqede banikine amakhanda.
- ²⁶Simakade Nkulunkulu wami ngisize, ungisindise ngothando lwakho lwaphakade,
- ²⁷ukuze bazi ukuthi isandla sakho singisindisile nokuthi nguwe Nkosi owenze lokhu!
- ²⁸Nxa beqanganisa bona, wena-ke wongibusisa, uma bengivukela behlelwe ngamahloni, kepha inceku yakho ithokoze nokuthokoza!
- ²⁹Labo abangimangalelayo abahlazeke bembathe amahloni njengengubo!
- ³⁰Ngiyomemezela ngimbonge uSimakade, ngimdumise ngiphambi koquqaba lwabantu.
- ³¹Uyema ngakwesokunene sompofu amvikele, amsindise kulabo abamnqumela ukufa.

AmaHubo 110

USimakade ubeka iNkosi ibuse

ElikaDavide; ihubo.

- ¹USimakade wathi eNkosini yami: “Hlala ngakwesokunene sami ngize ngingqobe izitha zakho zithele kuwe!”

²Bayede! USimakade wokwethwesa amandla eseZiyoni, akunikeze intonga yobukhosi bakho, ubuse izitha umi phakathi kwazo.

³Abantu bakho bayovumela phezulu mhla uyiphaka uhlasela izitha, amabutho akho ayokuza kuwe ehlobe imvunulo engcwele, ayovela njengombethe entathakusa.

⁴USimakade wafunga wagomela, akasoze agwiqika esethembisweni sakhe, wathi: "Wena ungumphristi kwaphakade ngokokuma kukaMelkhizedeki."

⁵USimakade umi ngakwesokunene sakho, mhla wathukuthela uyonqoba amakhosi.

⁶Izizwe kumhla eyozahlulela ngecala, izidumbu zidunuselane empini, ehlule amakhosi emhlabeni wonke.

⁷INkosi iyophuza emthonjeni ngasendleleni, kubuye amandla iqonele bonke.

AmaHubo 111

USimakade unakekela abantu bakhe

¹Haleluya, dumisani uSimakade! Ngiyombonga uSimakade ngenhliziyo yonke lapho ngisemgwamandeni wabaqotho.

²Impela mikhulu imisebenzi kaSimakade, bonke abayithakaselayo bazindla ngayo.

³Kunenkazimulo nobukhosi akwenzileyo, ukulunga kwakhe kuhleli unaphakade.

⁴Wenze isikhumbuzo sezimanga zakhe; uSimakade unomusa unobubele.

⁵Abamesabayo ubapha ukudla, usikhumbula njalo isivumelwano sakhe.

⁶Wabonisa amandla akhe kubantu bakhe ngokubapha umhlaba oyifa labezizwe.

⁷Wethembekile uqotho ngemisebenzi yakhe, imithetho yakhe inokwethenjwa yonke.

⁸Iyoma phakade naphakade ingaguquki, wayibeka ngokwethembeka nangobuqotho.

⁹Wafika wabahlenga abantu bakhe, wamisa isivumelwano esiyisimakade; lingcwele liyababazeka igama lakhe.

¹⁰Indlela okuqalwa ngayo ukuhlakanipha ingukuba kwesatshwe uSimakade. Abakwenzayo lokhu bahluzile. Ufanele ukudunyiswa ungunaphakade.

AmaHubo 112

Owesaba uSimakade uyophumelela

¹Haleluya, dumisani uSimakade! Ibusisiwe indoda eyesaba uSimakade, eyithokozela kakhulu imiyalo yakhe.

- ²Inzalo yayo yoba nodumo emhlabeni; isizukulwane sabaqotho siyobusiswa.
- ³Kuyokwanda ingcebo nemfuyo ekhaya layo, ukulunga kwayo kume ungunaphakade.
- ⁴Kwabaqotho ukhanya njengobhaqa emnyameni yena onomusa nesihe nokulunga.
- ⁵Iyadela indoda enomusa ibolekise, eqotho uma ithengiselana nabantu.
- ⁶Ayisoze yanyakaziswa nanini, olungileyo uyohlala ekhunjulwa njalo.
- ⁷Kanalovalo lwemibiko emibi, inhliziyo yakhe imi lapho ikhona, ulokhu ethembele kuSimakade.
- ⁸Unesibindi, inhliziyo yakhe ayesabi, uyoze abone izitha zakhe zijabhile.
- ⁹Uyephana kwabayizimpofana asaphaze, ukulunga kwakhe kumi ungunaphakade, uyoba namandla nodumo olukhulu.
- ¹⁰Isonakali siyokubona lokhu sihlabeke, sidle imihlathi, sidleke siphele; okuhloswa yizonakali kuyoshabalala.

AmaHubo 113

Elokubonga uSimakade ophakamisa ophansi

- ¹Haleluya, dumisani uSimakade! Mdumiseni nina zinceku zikaSimakade, nilidumise igama likaSimakade!
- ²Akubongwe igama likaSimakade manje naphakade kwaphakade!
- ³Igama likaSimakade alidunyiswe kusukela liphuma lize liyoshona.
- ⁴USimakade uphakeme phezu kwezizwe zonke, inkazimulo yakhe ikhanya kweliphezulu.
- ⁵Ngubani onjengoSimakade uNkulunkulu wethu ohlezi esihlalweni sobukhosi phezu,
- ⁶athobe abheke okuphansi emajukujukwini, ngubani ezulwini nasemhlabeni na?
- ⁷Uphakamisa ohluphekayo esothulini, enyule impofana emqubeni.
- ⁸Umthatha amhlalise nezikhulu, amhlalise namakhosi abantu bakhe.
- ⁹Wenamisa inyumba emendweni, ayenze ibe ngunina wabantwana. Haleluya, dumisani uSimakade!

AmaHubo 114

Ulsrayeli ukhishwa eGibhithe ngezimangaliso zikaNkulunkulu

- ¹Lapho abakwalsrayeli bephuma eGibhithe, abendlu kaJakobe esizweni solunye ulimi,

- ²uJuda waba yindawo engcwele kaSimakade, uIsrayeli isabelo asibusayo.
- ³Ulwandle lwathi nhla lwabaleka, umfula waseJordani waphind' umuva.
- ⁴Izintaba zatshekula njengezinqama, amagquma atshakadula njengamawundlu emvu.
- ⁵Wena lulwandle, mhlola muni lona okubalekisayo, kwenze njani Jordani waphind' umuva na?
- ⁶Zintaba nitshekulelani njengezinqama, magquma nitshakadulelani njengamawundlu na?
- ⁷Wena mhlaba, thuthumela phambi kukaSimakade, phambi kobuso bukaNkulunkulu kaJakobe!
- ⁸Uguqula idwala libe yichibi lamanzi, iqwaqwasi liphenduke umthombo wamanzi.

AmaHubo 115

USimakade nonkulunkulumbumbu

- ¹Simakade makungabi yithi, kungabi yithi nempela, akube yigama lakho elithola udumo ngenxa yesihe sothando lwakho lwafuthi nangenxa yokwethembeka kwakho.
- ²Zikusholani izizwe zithi: “Useye ngaphi manje uNkulunkulu wabo?”
- ³Kodwa thina sinoNkulunkulu ezulwini, wenza lokho athanda ukukwenza.
- ⁴Onkulunkulumbumbu babezizwe bakhandwa ngesiliva nangegolide, benziwa ngezandla zomuntu nje.
- ⁵Banemilomo kepha kayithi vu, banamehlo kepha ayizintundulu nje.
- ⁶Banezindlebe kepha azitholi, banamakhala kepha bangehogele.
- ⁷Banezandla ezingenamuzwa nezinyawo abangehambe ngazo, akuzwakali msindo wephimbo labo.
- ⁸Mabafuze izithixo abazenzileyo bonke laba abethembela kuzo!
- ⁹Wena Israyeli thembela kuSimakade, nguye umsizi nesihlangu sokunivikela.
- ¹⁰Wena ndlu ka-Aroni methembeni uSimakade, nguye umsizi nesihlangu sokunivikela.
- ¹¹Nina enimesabayo thembelani kuSimakade, nguye umsizi nesihlangu sokunivikela.
- ¹²USimakade osikhumbulile uzosibusisa, ababusise abendlu kaIsrayeli, ababusise abendlu ka-Aroni,
- ¹³ababusise abamesabayo uSimakade, abusise untukazana nezikhulu.

- ¹⁴USimakade anibusise nizalane nande, anandise nina nesizukulu senu!
- ¹⁵Sengathi uSimakade anganibusisa, yena menzi wezulu nomhlaba!
- ¹⁶Izulu leli lingelikaSimakade, umhlaba wawunika abasemhlabeni.
- ¹⁷Abafileyo kabamdumisi uSimakade, abamlokothi abehlela kwelabaphansi.
- ¹⁸Kodwa thina siyombonga uSimakade kusukela manje kuze kube phakade. Haleluya, dumisani uSimakade!

AmaHubo 116

Elokubonga ukusindiswa ekufeni

- ¹Ngiyamthanda uSimakade ngokungizwa lapho ngikhala kuye ngicela umusa.
- ²Ngoba ubeke indlebe wangizwa; ngiyokhala kuye ngisadla anhlamvana.
- ³Kwasondela amafolo ethuna angihaqa, ngaficwa usizi lwasezweni labafileyo, ngabanjwa zinhlopheko ngaqatha umunyu.
- ⁴Ngabiza igama likaSimakade ngathi: “Simakade ngisindise ukuphila kwami!”
- ⁵USimakade unesihe ulungile, uNkulunkulu wethu unobubele.
- ⁶USimakade uyamlondoloza ongenabani, wangisindisa lapho ngidangele ngilusizi.
- ⁷Nhliziyo yami, yiba nokuthula ungaxokozeli, uSimakade ungenzele izinto ezinhle.
- ⁸Wahlenga umphefumulo wami ekufeni, ukuba amehlo angacimbi izinyembezi, ukuba izinyawo zami zingakhubeki.
- ⁹Ngiyohamba phambi kobuso bukaSimakade ngiphakathi kwabasaphila emhlabeni.
- ¹⁰Ngangikholwa, kungakho ngakhuluma nje, mina engangihlupheke kakhulu,
- ¹¹nalapho sengishaywe uvalo ngathi: “Abantu bonke banamanga aluhlaza.”
- ¹²Kodwa ngizombonga ngantoni uSimakade ngezibusiso zonke angenzele zona na?
- ¹³Ngiyophakamisa indebe yosindiso, ngibize igama likaSimakade.
- ¹⁴Ngiyofeza izifungo zami kuSimakade ngimi phambi kwabantu bakhe bonke.
- ¹⁵Kuyigugu elikhulu kuSimakade ukufa kwabangcwele bakhe.
- ¹⁶Simakade, mina ngiyinceku yakho, inceku ezalwa yincekukazi yakho, uzigqabulile izintambo ebezingibophile.
- ¹⁷Ngiyonikela ngomhlatshelo wokukubonga, ngibize igama likaSimakade.
- ¹⁸Ngiyofeza izifungo zami kuSimakade ngimi phambi kwabantu bakhe bonke,

¹⁹ngisemagcekeni endlu kaSimakade, ngiphakathi kwezingange zaseJerusalema. Haleluya, dumisani uSimakade!

AmaHubo 117

Elokubonga uthando lukaSimakade

¹Dumisani uSimakade nina zizwe zonke, nina zinhlanga mbabazeni ngothi lwenu!

²Lukhulu uthando lwakhe asithanda ngalo, nokwethembeka kukaSimakade kuhleli phakade. Haleluya, dumisani uSimakade!

AmaHubo 118

Elokubonga insindiso kaSimakade

¹Bongani uSimakade ngoba unomusa, unesihe sothando lwaphakade.

²AbakwaIsrayeli abavume bathi: “Unesihe sothando lwaphakade.”

³Abendlu ka-Aroni abavume bathi: “Unesihe sothando lwaphakade.”

⁴Abamesabayo uSimakade abavume bathi: “Unesihe sothando lwaphakade.”

⁵Ngakhala kuSimakade ngisosizini, wangizwa wangiphendula wangikhulula.

⁶USimakade umi nami angesabi, owasemhlabeni angangenzani na?

⁷USimakade umi nami ungumsizi wami, ngiyobabuka abangizondayo ngename.

⁸Kungcono ukubalekela kuSimakade kunokwethembela kumuntu womhlaba.

⁹Kungcono ukubalekela kuSimakade kunokwethemba ezikhulwini.

¹⁰Abezizwe bangihlanganyele bonke, ngegama likaSimakade ngobacekela phansi.

¹¹Bangihaqile, yebo bangihaqe nxazonke, ngegama likaSimakade ngiyobachitha.

¹²Bangibunganyele njengequlo lezinyosi, bayocinywa njengomlilo wezinswani, ngegama likaSimakade ngiyobachitha.

¹³Ngihlohlolozwe kabi kuthiwa ngiyawiswa, kepha uSimakade waba ngumsizi wami.

¹⁴Ngihuba ngoSimakade ongamandla ami, nguyena kanye owangisindisayo.

¹⁵Abalungileyo bezwakala emakhaya behuba bejabulela insindiso bethi: “Esokunene sikaSimakade sigile izimanga,

¹⁶esokunene sikaSimakade sinqobile, esokunene sikaSimakade senza izimanga.”

¹⁷Angikazukufa mina kodwa ngisazophila, kengibabaze imisebenzi kaSimakade.

¹⁸USimakade wangishaya kabuhlungu, kodwa akavumanga nami ukuba ngife.

- ¹⁹Ngivuleleni amasango kaSokulunga wokulunga, ngongena ngawo ngidumise uSimakade.
- ²⁰Yilo leli isango eliya kuSimakade, abalungileyo bayongena ngalo.
- ²¹Simakade, ngiyakubonga wena ngoba wangiphendula, nguwena kanye owangisindisayo.
- ²²Itshe lokwakha elenqatshwa ngabakhi bethi liyinto engenamkhuba, kwaba yilona sisekelo njengensika ephase indlu.
- ²³Lokhu kwenziwa nguSimakade, kuyasimangalisa kakhulu ukukubona.
- ²⁴Yilolu usuku alwenzile uSimakade, asijabule sithokoze ngalo!
- ²⁵Simakade sisize usisindise! Simakade sisize usichumise!
- ²⁶Akabusiswe ongena lapha , abusiswe ngegama likaSimakade; sinicelela lokho endlini kaSimakade.
- ²⁷USimakade unguNkulunkulu uSomandla, wasipha ukukhanya wasikhanyisela. Hlabani ihele lomkhosi nizungeze, niphethe amahlamvu ngezandla zenu nize nifike ezimpondweni zelathi!
- ²⁸Somandla, nguwe uNkulunkulu wami, ngiyokubonga; Nkulunkulu wami ngokutusa ngikuphakamise.
- ²⁹Bongani uSimakade ngoba unomusa, unesihe sothando lwaphakade.

AmaHubo 119

1

- ¹Babusisiwe abahamba ngobuqotho, ngendlela yemfundiso kaSimakade.
- ²Babusisiwe abagcina iziyalo zakhe, abafuna ukumkhonza ngenhliziyo yonke.
- ³Impela kabakwenzi okungalungile, balokhu behamba ngendlela yakhe.
- ⁴Nguwe owashaya imithetho yakho nce siqikelele njalo ukuyigcina.
- ⁵Sengathi bezingaqonda izindlela zami, ngilandele izimiso zomthetho wakho!
- ⁶Angisoze neze ngitheleke amahloni uma ngiqikelela yonke imiyalelo yakho.
- ⁷Ngiyokubonga ngenhliziyo ethembekileyo lapho ngifunda izinqumo zakho eziqotho.
- ⁸Ngiyogcina izimiso zomthetho wakho, sengathi ungengifulathele unomphelo!

2

- ⁹Ibhungu lingenze njani ukuba lizithibe, ligcine indlela yalo ibe msulwa na? Ngokuqaphela ukuhamba ngokwezwi lakho.

¹⁰Ngikufuna wena ngenhliziyo yonke, mus' ukuvuma ngichezuke emiyalweni yakho!

¹¹Enhliziyweni yami ngilondoloza okushoyo ukuba ngingenzi lutho oluphambene nawe.

¹²Awubongwe udunyiswe Simakade! Ngifundise izimiso zomthetho wakho!

¹³Ngezindebe zomlomo wami ngiyabalandisa ngazo zonke izinqumo ozibekileyo.

¹⁴Ngithokoza ngokuhamba ngobufakazi bakho okunjengokuthokoza ngengebo yonkana.

¹⁵Ngiyozindla ngemithetho yakho efundiswayo, ngazise ubuqotho bezindlela zakho!

¹⁶Mina ngiyozijabulisa ngezimiso zakho, izwi lakho angisoze ngalikhohlwa.

3

¹⁷Phatha ngomusa inceku yakho ukuze iphile, yikhona iyogcina izwi lakho.

¹⁸Ngivule amehlo ukuze ngizibonele izimangaliso ezisemfundisweni yakho!

¹⁹Ngingumhambi kuleli lasemhlabeni, mus' ukungifihlela imiyalo yakho ngingayazi!

²⁰Inhliziyo yami kuthi ayiqhume, ilokhu ilangazelela izinqumo zakho.

²¹Ubakhuzile abazidlayo abaqalekisiweyo, abaphambukayo emiyalweni yakho.

²²Susa kimi lelichilo nokwedelelwa ngoba ngibugcinile ubufakazi bakho.

²³Nakuba izikhulu zingakhela uzungu, nokho inceku yakho izindla ngezimiso zakho.

²⁴Ubufakazi bakho buyangijabulisa, buyangiqondisa bungumeluleki wami.

4

²⁵Ngilele phansi ngithe ja othulini; ngivuselele wena njengokwezwi lakho!

²⁶Ngazivuma kuwe izindlela zami wangizwa; ngifundise izimiso zakho!

²⁷Ngifundise ukuyiqonda indlela yomthetho wakho, yikhona ngozindla ngezimangaliso zakho.

²⁸Izinyembezi zami ziyokophela ngaphakathi; ngilulamise njengesethembiso sezwi lakho!

²⁹Ngingqande ngingahambi ngokungeyikho, ngomusa wakho ngifundise umthetho wakho!

³⁰Sengiziqokele ukuhamba ngokwethembeka, nginevuso lokuqaphela izinqumo zakho.

³¹Ngibambebele impela ebufakazini bakho, Simakade ungangijabhisi ngidumazeke!

³²Ngiyoshisekela imiyalo yakho ngiyilalele, ngoba ukuqonda kwami kwandiswa nguwe.

5

³³Simakade, ngifundise ukuqonda izimiso zakho, ngiyozigcina kuze kube sekupheleni.

³⁴Ngichasisele imfundiso yakho ngiyigcine, ngiyilonde ngenhliziyo yami yonke!

³⁵Ngihambise endleleni yemiyalo yakho, ngokubanini ukujabula kwami kukuyo.

³⁶Ngifundise ukuthanda ubufakazi bakho, ngingahaheli inzuzo engemthetho!

³⁷Amehlo ami awanganamatheli kokuyize, kodwa ngiqinise nqi endleleni yakho.

³⁸Feza encekwini yakho isethembiso owasenza wasiqondanisa nabakwesabayo!

³⁹Gudluza lesisihlamba engisesaba kabi, ngoba zinhle zidelile izinqumo zakho.

⁴⁰Ngiyilangazelela kabi imithetho yakho! Ngivuselele ngoba wena ulungile!

6

⁴¹Nkosi ngikhombise uthando lwakho, ungisindise njengokwesethembiso sakho,

⁴²yikhona ngophendula ongiklolodelayo njengalokhu ngethembela ezwini lakho.

⁴³Mangikhulume izwi lakho leqiniso njalo, ngoba ithemba lami limi ngezinqumo zakho.

⁴⁴Yikhona ngiyogcina imfundiso yakho, ngiyigcine njalo phakade naphakade,

⁴⁵ngihambe ngikhululekile ngingathiywa, ngoba ngizamile ukuhlonipha imithetho yakho.

⁴⁶Ngiyokhuluma ngezimiso zakho emakhosini, ngikhulume phambi kwawo ngingazenyenzi.

⁴⁷Ngiyozijabulisa ngemiyalo yakho ingenamise, ngokubanini ngiyithanda kakhulu.

⁴⁸Ngiphakamisa izandla zami ngiyazithoba, ngilangazelela imiyalo yakho engiyithandayo, ngiyozindla ngezimiso zomthetho wakho.

7

⁴⁹Khumbula izwi owalethembisa encekwini yakho, ngoba ungenzile ngahlala ngingethemba.

⁵⁰Lokhu kwangiduduza ngisosizini, owakushoyo kwangivuselela ngaphila.

⁵¹Izonakali ziyangedelela zingihleka usulu, nokho angichezuki emfundisweni yakho.

- ⁵²Ngikhumbula izahlulelo zakho kwasendulo, yizo engiziduduza ngazo Nkosi.
- ⁵³Ngithukuthela ngigane unwabu ngenxa yababi abahlubuka emthethweni wakho.
- ⁵⁴Izimisiso zakho zingamahubo engiwahubayo ngisemajukujukwini kude nekhaya lami.
- ⁵⁵Nasebusuku ngicabanga ngegama lakho, ngigcina imfundiso yakho Simakade.
- ⁵⁶Mina ngiyabusiseka ngalokhu ukuthi ngiyigcinile imithetho yakho.

8

- ⁵⁷Uyisabelo sefa lami Simakade, ngizimisele ukuwalonda amazwi akho.
- ⁵⁸Ngiyakunxusa ngenhliziyo yami yonke, ngihawukele ube nesihe njengokusho kwakho!
- ⁵⁹Ngizindlile ngabuka ukuhamba kwami, ngizophenduka ngilandele ubufakazi bakho.
- ⁶⁰Ngiyaphangisa angilibali neze, ngiphuthuma ukugcina imiyalo yakho.
- ⁶¹Izonakali zingizungelezela ngesihibe, nokho imfundiso yakho angiyikhohlwa.
- ⁶²Ngivuka kwesikabhadakazi ngikubonge ngenxa yezinqumo zakho ezilungileyo.
- ⁶³Ngimdibi munye ngikanye nabakwesabayo kanye nalabo abagcina imithetho yakho.
- ⁶⁴Umhlaba ugcwele uthando lwakho Nkosi, ngifundise wena izimisiso zakho!

9

- ⁶⁵Uyiphathile ngomusa inceku yakho njengesethembiso sezwi lakho Simakade.
- ⁶⁶Ngiphe ukuhlakanipha nolwazi, ngoba ngethembela emiyalweni yakho.
- ⁶⁷Ngingakahlupheki ngangihleze ngeduka, kepha manje ngiyazigcina iziyalo zakho.
- ⁶⁸Wena ulungile wenza okuhle; ngifundise ngizazi izimisiso zakho!
- ⁶⁹Izedeleli zezonakali zingiphothela ilumbo, kepha ngigcina imithetho ngenhliziyo yonke.
- ⁷⁰Inhliziyo yazo ilukhuni isalitshe, mina ngithokoziswa yimfundiso yakho.
- ⁷¹Kwaba kuhle kimi ukuba ngihlupheke khona ngizoziqonda kahle izimisiso zakho.
- ⁷²Imfundiso yakho inkulu kimi kunenqwaba yegolide nesiliva.

10

- ⁷³Wangidala wangibumba ngezandla zakho, ngiphe ukuqonda ngifunde imiyalo yakho!

⁷⁴Abakwesabayo bayojobula lapho bengibona, ngoba ithemba lami lisezweni lakho.

⁷⁵Ngiyazi ukuthi izahlulelo zakho ziqotho, wangijezisa ngokwethembeka Nkosi yami.

⁷⁶Mangiduduzwe uthando lwakho lwafuthi njengesethembiso sakho encekweni yakho.

⁷⁷Ngihawukele ube nesihe ukuze ngiphile, ngoba imfundiso yakho iyangithokozisa.

⁷⁸Izedeledi zezonakali azehlelwe ngamahloni, ngoba zingibeka icala ngokungemthetho; mina ngiyozindla ngemithetho yakho.

⁷⁹Ababuyele ngakimi abakwesabayo, ngisho labo abazi ubufakazi bakho.

⁸⁰Angigcine izimiso zakho ngenhliziyo yonke ukuze ngingehlelwa ngamahloni ngihlazeke!

11

⁸¹Umoya wami ulangazelela insindiso yakho, ithemba lami lonke likulo izwi lakho.

⁸²Mina sengize ngaba mehlwana, ngenziwa ukulangazelela okushoyo, ngibuza ngithi: "Uyongiduduza nini?"

⁸³Sengiyigxaba lemvaba selalala umule, nokho angizikhohlwa izimiso zakho.

⁸⁴Inceku yakho yolindela kuze kube nini? Uyolinquma nini elalaba abangizingelayo?

⁸⁵Izedeledi zezonakali zingimbele igebe, bona laba abaphambene nomthetho wakho.

⁸⁶Imiyalo yakho yethembekile yonke; ngisize nampa bengizingela ngingenacala!

⁸⁷Bacishe bangisudukisa emhlabeni, kepha angiyiyekanga imithetho yakho.

⁸⁸Ngivuselele ngothando lwakho lwafuthi ukuze ngigcine ubufakazi bomlomo wakho!

12

⁸⁹Simakade izwi lakho limi njalo, liqinile ungunaphakade kweliphezulu.

⁹⁰Kuyofa abantu kusale ukwethembeka kwakho; umhlaba owawumisayo usemi uthe zime.

⁹¹Kusemi nanamuhla ngokwezinqumo zakho, konke okukhona kumele kukukhonze.

⁹²Ukuba bengingazenamisi ngemfundiso yakho bengiyofa ngifele ekuhluphekeni kwami.

- ⁹³Angisoze ngayikhohlwa imithetho yakho, ngoba wangivuselela ngayo ngaphila.
- ⁹⁴Mina ngingowakho, ngalokho ngisindise, ngoba ngizama ukhlonipha imithetho yakho.
- ⁹⁵Izonakali zingiqamekela ukuba zingibulale, kepha ngiqaphelisisa ubufakazi bakho.
- ⁹⁶Angibonanga lutho oluphelele ncimishi, ngumyalo wakho kuphela ongenamkhawulo.

13

- ⁹⁷Angiyithandi khona imfundiso yakho! Ngizindla ngayo lize liyoshona.
- ⁹⁸Imiyalo yakho ihlala kimi nanini, ingenza ngihlakaniphe kunezitha zami.
- ⁹⁹Ukuqonda kwami kwedlula okwabangifundisayo, ngoba ngizindla njalo ngobufakazi bakho.
- ¹⁰⁰Ulwazi lwami lwedlula olwabadala, ngokuba ngigcina imithetho yakho.
- ¹⁰¹Ngiyazexwaya zonke izindlela ezimbi, ngoba ngifuna ukulalela izwi lakho.
- ¹⁰²Izinqumo zakho angichezuka kuzo, ngoba nguwe ongifundise zona.
- ¹⁰³Amazwi akho amnandi ayahlwabusa, anambitheka kamnandi kunoju lwezinyosi.
- ¹⁰⁴Ngizuzwa inhlakanipho emithethweni yakho, ngakhoke ngizonda yonke indlela embi.

14

- ¹⁰⁵Izwi lakho liyisibani lapho ngihamba, ubhaqa olungikhanyisela endleleni.
- ¹⁰⁶Ngifunge ngagomela ngazibophezela ukugcina izinqumo zakho ezilungileyo.
- ¹⁰⁷Simakade ngihlupheke okwedlula ukwenza, ngiqinise ngokwezwi lesethembiso sakho!
- ¹⁰⁸Nkosi yemukela izibongo zomlomo wami enginikela ngazo ngomoya ovumayo; ngifundise ukwazi izinqumo zakho!
- ¹⁰⁹Umoya wami usengozini malangonke, nokho angikhohliwe yimfundiso yakho.
- ¹¹⁰Izonakali zingicuphe ngezihibe, nokho angichezuki emithethweni yakho.
- ¹¹¹Ubufakazi bakho buyifa lami naphakade, ngoba buthokozisa inhliziyo yami.
- ¹¹²Ngizimisele ukugcina izimiso zakho, ngonamathela kuzo kuze kube sekupheleni.

15

- ¹¹³Ngiyabazonda labo abanhliziyombili, kepha ngiyayithanda imfundiso yakho.

114 Wena uyisiphephelo nesihlangu sami, ngethembela ezwini lesethembiso sakho.

115 Dedani kimi nina zigilamkhuba nce ngigcine imiyalo kaNkulunkulu wami!

116 Ngisimamise ngezwi lakho ukuze ngiphile, ungangidumazi ngihlazeke ethembeni lami!

117 Yiba ludondolo lwami ukuze ngisindiswe, yikhona ngozindla njalo ngezimiso zakho.

118 Uchitha bonke abachezuka ezimisweni zakho, ngoba ubuqili babo buyinkohliso eyize.

119 Zonke izoni zomhlaba uzichitha njengezibi, ngakhoke ngiyabuthanda ubufakazi bakho.

120 Ukwesaba wena kuyangithuthumelisa, izinqumo zakho ngiyazesaba kabi.

16

121 Ngikwenzile okungukulunga nokuqotho, ungangiyekeleli kubantu abangicindezelayo!

122 Mela inceku yakho isimame kahle, zingangicindezeli izedeleli zezonakali!

123 Mina sengize ngaba mehlwana ngenxa yokulindela insindiso yakho, ngilangazelela amazwi akho okulunga.

124 Phatha inceku yakho ngomusa nangothando, bese ungifundisa izimiso zakho!

125 Ngiyinceku yakho, ngivule umqondo, ungifundise ukwazi ubufakazi bakho!

126 Sekuyisikhathi sokuba usebenze Nkosi, baweqile umthetho wakho bawululaza.

127 Ngakhoke ngiyayithanda imiyalo yakho kunegolide, yebo, kunegolide elicoliweyo.

128 Imithetho yakho ngiyibona ilungile yonke, ngiyayizonda yonke indlela yenkohliso.

17

129 Ubufakazi bakho bumangalisa kakhulu, ngakhoke ngibugcina ngenhliziyo yonke.

130 Ukwambuleka kwamazwi akho kuyakhanyisa, nongebani abe nokuqonda.

131 Ngiphethwe yinkwankwa yokulangazelela ukuba ngifunde imiyalo yakho.

132 Phendukela ngakimi unghawukele, njengoba wenza kwabathanda igama lakho.

133 Qondisa izinyathelo zami ngeziyalo zakho ukuba ububi bungangibusi nakanye.

134 Ngihlenge kubantu abangicindezelayo, yikhona ngolalela imithetho yakho.

- 135 Buka inceku yakho ngobuso obunomusa, bese ungifundisa izimiso zakho!
 136 Izinyembezi zami zehla njengomfula, ngoba kabayigcinanga imfundiso yakho.

18

- 137 Nguwena Simakade olungileyo, izahlulelo zakho ziqotho zilungile.
 138 Imithetho yakho wayikhipha ngokulunga nangokwethembeka okwedlula ukwenza.
 139 Ukukushisekela kungidle kwangiqeda, ngoba izitha zami zedeleda iziyalo zakho.
 140 Amazwi akho athembeke ngokupheleleyo, inceku yakho iwathanda ngeqiniso.
 141 Ngingomncinyane nowedelekileyo futhi, nokho angikhohliwe yimithetho yakho.
 142 Ukulunga kwakho kungokwaphakade, nemfundiso yakho iyiqiniso elimsulwa.
 143 Zingificile izinhlopheko nosizi, kepha imiyalo yakho iyangithokozisa.
 144 Ubufakazi bakho bulungile unaphakade; ngiphe ukuqonda ukuze ngiphile!

19

- 145 Ngikhala kuwe Nkosi ngenhliziyo yonke; ngizwe, yikhona ngogcina izimiso zakho.
 146 Ngiyazikhalela kuwe, ngisindise, khona-ke ngolonda ubufakazi bakho.
 147 Ngivuka kuseluvivana ngicele usizo, ithemba lami lonke lisezweni lakho.
 148 Ngihlala ngiqwashile nakwesikabhadakazi ukuba ngizindle ngesethembiso sakho.
 149 Yizwa ukukhala kwami ngesihawu sakho, ngiqinise Nkosi ngokwezinqumo zakho!
 150 Abangizingelayo bahlose ububi bayasondela; baqhelile bakude nemfundiso yakho.
 151 Kepha wena Simakade useduze nami, yonke imiyalo yakho iyiqiniso isibili.
 152 Iziyalo zakho zangifundisa kudala ukuthi zamiswa nguwe ungunaphakade.

20

- 153 Bheka usizi lwami ungikhulule kulo, ngoba angikhohliwe yimfundiso yakho.
 154 Ngiphendulele ngithethwe yicala, ngivuselele njengokusho kwakho!
 155 Insindiso ikude nabonakeleyo, ngoba kabanandaba nezimiso zakho.
 156 Ububele bakho bukhulu Simakade; ngivuselele njengokwezinqumo zakho!

157Baningi abangizingelayo nabamelene nami, kepha angichezukunganga ebufakazini bakho.

158Ngiyanengwa uma ngibona abakuhlubukayo, ngoba kabazishayi mkhuba iziyalo zakho.

159Ngiyayithanda imithetho yakho Nkosi; ngivuselele ngesihe sothando lwakho!

160Umongo wezwi lakho uyiqiniso impela, nezinqumo zakho zonke ezilungileyo zimi phakade naphakade.

21

161Noma izikhulu zingizingela ngingenacala, kepha engikwesabayo yizwi lomthetho wakho.

162Ngithokoza nokuthokoza ngamazwi akho, nginjengalowo obuya nempango enkulu.

163Ngiyawazonda amanga ngiyawenyanya, kepha ngiyayithanda imfundiso yakho.

164Ngikudumisa kasikhombisa malangonke ngenxa yezahlulelo zakho ezilungileyo.

165Banokuthula abathanda imfundiso yakho, akukho lutho oluyokubakhubekisa.

166Ngilulindele usindiso lwakho Simakade, ngiyilonda ngokupheleleyo imiyalo yakho.

167Inhliziyo yami igcina ubufakazi bakho, ngibuthandela ukufa nokuphila.

168Ngigcina imithetho yakho nobufakazi bakho, izindlela zami zonke uyazazi.

22

169Ukukhala kwami makufike kuwe Nkosi, ungiphe ukuqonda njengokusho kwakho!

170Ukukunxusa kwami akufinyelele kuwe, ungisindise njengokwethembisa kwakho!

171Izindebe zami azishumayeke udumo lwakho, ngoba ungifundisa ukwazi izimiso zakho.

172Umlomo wami awudumise izwi lakho, ngokuba yonke imiyalo yakho ilungile.

173Isandla sakho asicuphele ukungisiza, ngokuba ngizikhethele imithetho yakho.

174Ngilangazelele insindiso yakho Nkosi, imfundiso yakho ingijabulisa kakhulu.

175Umoya wami awuphilele ukukudumisa, izinqumo zakho zibe usizo kimi!

176Ngidwanguzela njengemvu elahlekileyo, woza uzongifuna mina nceku yakho, ngoba angikhohliwe yimiyalo yakho.

AmaHubo 120

Elokucela ukuhlengwa kwabakhohlisayo

Iculo lapho kuyiwa emkhosini.

- ¹Ngazikhalela kuSimakade ngisosizini, okuthe nginxusa wangiphendula.
- ²Ngihlengi kwabanamanga Simakade, kulaba abalulimi lukhohlisayo!
- ³Wena lulimi oluhlebayo olukhohlisayo, ngabe uyakwazi nje okuzokwehlela nokuthi uyojeziswa kanjani na?
- ⁴Ngemicibisholo ebukhali yeqhawe nangamalahle avuthayo omtholo.
- ⁵Yek' okwami! Nginjengodingiselwe emajukujukwini ezweni lakwaMesheki, ogwadule emadlangaleni akwaKheda.
- ⁶Umoya wami usudiniwe kwenela ukuhlalisana nabangaluthandi uxolo.
- ⁷Mina ngizithulele angiqali muntu, kepha nxa ngikhuluma bayimpi bona.

AmaHubo 121

USimakade ungumlondolozi wakho

Iculo lapho kuyiwa emkhosini.

- ¹Ngenyusa amehlo ngisinga izintaba, usizo lwami luyovelaphi na?
- ²Usizo lwami luvela kuSimakade, yena owenza izulu nomhlaba.
- ³Akaluvumeli unyawo lwakho lushelele, umlondolozi wakho akakaze ozele.
- ⁴Phinde, akozeli akalali yena mlondolozi kaIsrayeli.
- ⁵Nguye uSimakade okulondolozayo, uSimakade ungumthunzi ngakwesokunene sakho.
- ⁶Ilanga alisoze lakuhangula emini, uthwets hulwe unyezi nasebusuku.
- ⁷USimakade. uyokuvikela kukho konke okubi, bese ekulondolozela ukuphila kwakho.
- ⁸USimakade uyokwalusa lapho uphuma nalapho futhi ungena, manje naphakade kwaphakade.

AmaHubo 122

Elokucelela iJerusalema ukuthula

Iculo lapho kuyiwa emkhosini; elikaDavide.

- ¹Ngathokoza nokuthokoza mhla bethi kimi; "Asihambe siye endlini kaSimakade!"
- ²Manje sinyathela ngaphakathi emasangweni akho wena Jerusalema.
- ³Yek' umuzi waseJerusalema! Wakhiwe wayinxuluma elithotheneyo.

⁴Kwenyukela kuwo imindeni, kwenyuka imindeni kaSimakade iyodumisa igama likaSimakade. njengoba yena ayala uIsrayeli.

⁵Kukhona lapho izigcawu zokwahlulela, izigcawu zabendlu yenkosi uDavide.

⁶Thandazelani ukuthula kweJerusalema! Wena Jerusalema, abakuthandayo abachume banethezeke,

⁷kube nokuthula nenhlalakahle ngaphakathi kwezingange zakho nasezigodlweni zakho zobukhosi!

⁸Ngenxa yabazalwane nabangane bami ngithi: “Akuvame ukuthula phakathi kwakho!”

⁹Ngenxa yendlu kaSimakade uNkulunkulu wethu mina ngikucelela izilokotho zodwa.

AmaHubo 123

Elokucela ukuhawukelwa

Iculo lapho kuyiwa emkhosini.

¹Ngenyusa amehlo ngibheka kuwe, wena osesihlalweni sobukhosi ezulwini.

²Yebo, njengezinceku zigqolozile zibheke isandla samakhosi azo namehlo encekukazi enamathele ebheke isandla senkosikazi yomuzi, kanjalo namehlo ethu alindile abheke kuSimakade uNkulunkulu wethu aze abe nomusa kithi asihawukele.

³Sihawukele Nkosi, sihawukele, isicikile indelelo kwenela.

⁴Sesuthi imibhinqo yabanethezekileyo, isidinile indelelo yabaziqhayisayo.

AmaHubo 124

Elokubonga ukukhululwa ezitheni

Iculo lapho kuyiwa emkhosini; elikaDavide.

¹Ukuba wayengengakithi uSimakade — vumani bo, Israyeli! —

²ukuba wayengengakithi uSimakade nxashana abantu besivukela

³ngabe basishwabadela sizwa, basivuthela ngolaka lwabo.

⁴Ngabe semuka nomsinga, sagajwa yisikhukhula saminza,

⁵ngabe seqiwa yisihlambi, seza phezu kwethu sacwila.

⁶Akabongwe uSimakade ongasiyekelelanga ukuba basinephule ngamazinyo!

⁷Thina saphunyuka sabaleka sanjengenyoni idlubha ogibeni. Lugwabukile ugibe lwabacuphi, sasinda-ke saphunyula.

⁸Sisizwa yigama likaSimakade, yena menzi wezulu nomhlaba.

AmaHubo 125

USimakade ubiyele isizwe sakhe

Iculo lapho kuyiwa emkhosini.

- ¹Labo abethembela kuSimakade bafana nentaba iZiyoni, yona ingenakuzanyazanyiswa elokhu imi phakade naphakade.
- ²Njengezintaba ziphahle iJerusalema, noSimakade ubiyele abantu bakhe manje naphakade kwaphakade.
- ³Isonakali esisesihlalweni sobukhosi kasiyikuqhubeka silibuse izwe eliyisabelo sefa labalungileyo hleze nabo bangaze bonakale.
- ⁴Simakade, baphathe kahle abenza okuhle abanhliziyo yabo imi ngobuqotho!
- ⁵Simakade, baxoshe kanye nezigilamkhuba laba abaphambuka endleleni yakho bethatha izindlela zabo ezimazombe! Akube khona ukuthula kwaIsrayeli!

AmaHubo 126

Elokubonga ukuhlengwa

Iculo lapho kuyiwa emkhosini.

- ¹Mdla uSimakade ebuyisa abathunjwa, eletha neno abathunjiweyo baseZiyoni, safana nabantu abaphuphayo.
- ²Kwaqhuma uhleko emilonyeni yethu, sahleka kwaze kwavela elomhlathi, saqhulula izibongo sihayiya. Bezwakala abezizwe bethi ngathi: "USimakade kukhulu abenzele khona!"
- ³Yebo, lukhulu ulwenzile kithi Nkosi, sajabula lokhu okungakhulumekiyo.
- ⁴Ake siphinde sinethezeke Simakade, ngemigobhozo esamvula yezibusiso zemingenela emihosheni yaseNegevu.
- ⁵Ababehlwanyela bekhala izinyembezi bayovuna bahlokome ngenjabulo.
- ⁶Bayophuma bahambahambe belila, besingethe iziqabetho zembewu, bayobuya futhi behlokoma ngenjabulo bephethe amahlukuzo esivuno.

AmaHubo 127

Impumelelo ivela kuSimakade

Iculo lapho kuyiwa emkhosini; elikaSolomoni.

- ¹Uma uSimakade engayakhi indlu bashikashikeka ubala abayakhayo. Uma uSimakade engawulondolozisi umuzi kuyize ukuqapha kogqayinyanga.
- ²Nikhandlekela ubala nina lapho nivuka kusempondozankomo nephuze nokubeka uhlangothi phansi nidle isinkwa sokukhandleka, ngoba uSimakade ubabusisa abadelise noma besaphumule labo asuke ebathanda.
- ³Abantwana bayisipho esivela kuSimakade, inzalo yowesifazane iyibusiso.

⁴Amadodana owazala ebusheni bakho akhula bese efana nemicibisholo exhakwa yiqhawe lihlome ngayo.

⁵Kuhle kudelile kuleyondoda emgodla wayo ugcwele leyomicibisholo. Laba kabayukunyobozela neze nxa bebhekene nezitha zabo esigcawini.

AmaHubo 128

Uyabusiwa lowo omesabayo uSimakade

Iculo lapho kuyiwa emkhosini.

¹Babusiwe abamesabayo uSimakade, abahamba ngesu leziyalo zakhe.

²Uyokudla amandla ezikhwepha zakho, ubusiwe kukuhambele kahle konke,

³umkakho abe njengomvini othelayo ehlezi ngaphakathi emzini wakho, abantabakho bangunge ugqoko lwakho, bahlume njengezithombo zomhlwathi.

⁴Impela, iyobusiwa kanjalo leyondoda emesabayo uSimakade.

⁵Akubusiwe uSimakade eseZiyoni, ubone ukuchuma kweJerusalema imihla yonke yokuphila kwakho, uze udle izinyoni zabazukulu bakho! Akube khona ukuthula kwalsrayeli!

AmaHubo 129

Elokucela ukuba kuchithwe izitha zeZiyoni

Iculo lapho kuyiwa emkhosini.

¹Bangihlupha kakhulu kwasebusheni bami — shonini bo, Israyeli! —

²bangihlupha kakhulu kwasebusheni bami, kepha nokho abangehlulanga neze.

³Bangixebula umhlane ngesiswebhu, kwaphambana imivimbo njengemisele idatshulwa ngabalimi emasimini.

⁴Ulungile uSimakade, wangikhulula, wanqamula izibopho zabangigqilazayo.

⁵Bonke abazonda iZiyoni abafojiswe behlelwe ngamahloni badungulwe,

⁶babe njengotshani obuzimilela edwaleni obuthathe bubune bungakasishulwa,

⁷kungekho muntu obusikayo abuqoqe nobubopha izithungu azithwale.

⁸Khona abedlula ngendlela bengeke basho kubo bathi: “Isibusiso sikaSimakade asehlele kini; sinicelela sona ngegama likaSimakade.”

AmaHubo 130

Elokwethemba ukuthi uSimakade uyosihlenga

Iculo lapho kuyiwa emkhosini.

¹Wo Simakade! ngikhala kuwe ngisezinzulwini zozwa!

²Nkosi yami, yizwa ukunxusa kwami, ubeke indlebe, ungilalele, ungizwe nxashana ngethula kuwe izikhalo zami!

³Simakade, ukuba wena usibalela izono zethu, ngubani ongema phambi kwakho Nkosi na?

⁴Kepha wena uthethelela izono ukuba abantu bahlale bekwesaba.

⁵Ngilindele uSimakade ngenhliziyo yonke, ngibambebele ezwini lakhe lesethembiso.

⁶Umoya wami wethembela eNkosini wedlula isineke sogqayinyanga begqolozele ukufika kokusa, ogqayinyanga belindele ukuba kuse.

⁷Wena Israyeli thembela kuSimakade ngoba uSimakade unothando lwafuthi, unamandla aphindiwe okusihlenga.

⁸Nguye ohlenga abakwalsrayeli, abahlenge ezonweni zabo zonke.

AmaHubo 131

Ukududuzeka njengomntwana kuSimakade

Iculo lapho kuyiwa emkhosini; elikaDavide.

¹Simakade inhliziyo yami kayizigabisi, angizazisi ngithwale amehlo; angizihluphi ngezindaba ezijulile nangezinkinga ezehlula ukuqonda kwami.

²Inhliziyo yami ngiyithunduzele ngayiduduza njengomntwana elunyuliwe egonwe ngunina, iduduzekile njengomntwana osewalunyulwa.

³Wena Israyeli thembela kuSimakade manje naphakade kwaphakade!

AmaHubo 132

Elokucelela ithempeli isibusiso

Iculo lapho kuyiwa emkhosini.

¹Nkosi khumbula uDavide, ukhumbule nokukhathazeka kwakhe konke,

²njengoba afunga wagomela kuSimakade, wethembisa wathi kuSomandla kaJakobe:

³“Ngeke ngilubhade endlini kwami, ngilale ecansini engilendlalelwe,

⁴amehlo ami ngeke abuthi qothu nezinkophe zami zisindwe ubuthongo

⁵ngingakamtholeli indawo uSimakade, ngimakhele umuzi uSomandla kaJakobe.”

⁶Sezwa ngomphongolo weNkosi siseBhetlehema, saye sawuthola esigodini saseJeyarimu.

⁷Asihambe siye elawini likaSimakade, sikhothame esenabelweni sezinyawo zakhe!

⁸Sukuma Simakade, uze endaweni yakho uphumule khona, wena nomphongolo wesivumelwano okuyiwona obonisa amandla akho!

⁹Abaphristi bakho abahlome ukulunga, abangcwele bakho bahlokome ngentokozo!

¹⁰Ungayichilizi inkosi oyigcobileyo, kodwa khumbula inceku yakho uDavide

¹¹njengoba wenza isifungo nesethembiso, ongasoze wagwiqika kuso wathi: “Ngiyokumisela ongowozalo lwakho oyobusa esihlalweni sakho sobukhosi.

¹²Uma abantabakho begcina isivumelwano neziyalo zami engabafundisa zona, nabazukulu babo bayolandela babuse, babe sesihlalweni sobukhosi naphakade.”

¹³USimakade uliqokile iZiyoni, ukuba azinze kulo, uthi:

¹⁴“Yilapha ngiyophumula khona phakade, ngohlala lapha ngoba kuthande mina.

¹⁵Ngiyobusisa ukudla kwalo kuchume, abantulayo babo badle isinkwa badele.

¹⁶Ngohlomisa abaphristi balo ngensindiso, abangcwele balo bahlokome ngentokozo.

¹⁷Ngiyohlumisa lapho uphondo losindiso, ingonyama iyovela kubantabakaDavide, ngilungisele umgcotshwa wami isibani ukuba bukhanye njalo ubukhosi bakhe.

¹⁸Izitha zayo ngiyozithela ngamahloni, ekhanda layo kugqame uphaphe lwendwa.”

AmaHubo 133

Izibusiso zokuzwana kwabazalwane

Iculo lapho kuyiwa emkhosini; elikaDavide.

¹Impela kuhle kabi kuyababazeka ukuhlalisana kwabazalwane bezwana.

²Kuhle kufana nomfuma wakwanokusho lapho uthelwa ekhanda lika-Aroni, udambuluke wehlele esilevini sakhe, uconsele emphethweni wengubo yakhe.

³Kunjengombethe olala emagqumeni aseZiyoni, amazolo anjengawasentabeni iHermoni. USimakade usehlisela lapho-ke isibusiso, ukuphila kwaphakade naphakade.

AmaHubo 134

Abalinda ubusuku ethempelini ababonge uSimakade

Iculo lapho kuyiwa emkhosini.

¹Wozani nimbonge uSimakade nonke nina zinceku zikaSimakade, nina enima nilinde ubusuku nikhonza endlini kaSimakade!

²Phakamisani izandla zenu nikhuleke, nibonge uSimakade endlini engcwele!

³Akakubusise uSimakade eseZiyoni yena menzi wezulu nomhlaba!

AmaHubo 135

USimakade mkhulu, onkulunkulumbumbulu bayize

- ¹Haleluya, dumisani uSimakade! Dumisani igama likaSimakade, nilidumise zinceku zikaSimakade
- ²nina enima endlini kaSimakade, nikhonza emabaleni kaNkulunkulu wethu!
- ³Haleluya, dumisani uSimakade, ngokubanini uSimakade unomusa, hubelani uSimakade ngoba kumnandi!
- ⁴USimakade waziqokela abakwaJakobe, abakwaIsrayeli baba yimpahla yakhe.
- ⁵Ngiyamazi uSimakade ukuthi mkhulu, iNkosi yethu iyabedlula onkulunkulu bonke.
- ⁶USimakade uzenzela lokho akuthandayo phezulu ezulwini kanye nasemhlabeni, olwandle nasezinzulwini zonkana.
- ⁷Nguye ohlomisa izulu lisithe ngamafu avela kude emikhawulweni yomhlaba, libaneke line isibhidli semvula. Nguye odedela isivunguvungu siphume endaweni lapho sikhwezwe khona.
- ⁸Wabhubhisa amazibulo aseGibhithe, awabantu nawezinkomo imbala.
- ⁹Wenza izibonakaliso nezimangaliso phakathi kwakho lizwe laseGibhithe, zehlela uFaro nezinceku zakhe zonke.
- ¹⁰Wabhubhisa izizwe ngezizwe, wahlabana ngamakhosi ayiziqhwaga:
- ¹¹wadla uSihoni inkosi yama-Amori, wadla no-Ogi owayebusa eBhashani, wadla amakhosi onke ayebusa kwaKhanana,
- ¹²walaba izwe labo laba yifa, laba yifa likaIsrayeli abantu bakhe.
- ¹³E Simakade! kuyofa abantu kusale igama lakho, ukhunjulwe yizizukulwane zilandelane.
- ¹⁴USimakade uyokwelekelela abantu bakhe, akhombise izinceku zakhe isihe.
- ¹⁵Onkulunkulumbumbulu basezizweni bakhandwa ngesiliva nangegolide, benziwa ngezandla zomuntu nje.
- ¹⁶Banemilomo kepha kayithi vu, banamehlo kepha ayizintundulu nje.
- ¹⁷Banezindlebe kepha azitholi, akukho mphefumulo emilonyeni yabo.
- ¹⁸Mabafuze izithixo abazenzileyo bonke laba abethembela kuzo!
- ¹⁹Nina bendlu kaIsrayeli bongani uSimakade, nani bendlu ka-Aroni bongani uSimakade!
- ²⁰Nina bendlu kaLevi bongani uSimakade, nani enimesabayo bongani uSimakade!

²¹Bongani uSimakade niseZiyoni, niseJerusalema eliyikhaya lakhe! Halleluya, dumisani uSimakade!

AmaHubo 136

Elokubonga isihe sothando lukaSimakade

- ¹Bongani uSimakade ngoba unomusa, unesihe sothando lwaphakade,
²nibonge uNkulunkulu wonkulunkulu, unesihe sothando lwaphakade,
³nibonge oyiNkosi yamakhosi, unesihe sothando lwaphakade.
⁴Nguye yedwa ogila izimanga ezinkulu, unesihe sothando lwaphakade.
⁵Wenza izulu ngobuhlakani, unesihe sothando lwaphakade.
⁶Wendlala umhlaba waphakama kunamanzi, unesihe sothando lwaphakade.
⁷Wenza izikhanyiso ezinkulu, unesihe sothando lwaphakade,
⁸wenza ilanga ukuba libuse imini, unesihe sothando lwaphakade,
⁹inyanga nezinkanyezi kwabusa ubusuku, unesihe sothando lwaphakade.
¹⁰IGibhithe walibulalela amazibulo alo, unesihe sothando lwaphakade,
¹¹wahola amaIsrayeli wawakhipha khona, unesihe sothando lwaphakade,
¹²ngesandla esinamandla nangezikhwepha, unesihe sothando lwaphakade.
¹³Wahlukanisa kabili uLwandle oluBomvu, unesihe sothando lwaphakade,
¹⁴wadabulisa uIsrayeli waluwela, unesihe sothando lwaphakade,
¹⁵waphosa kulo inkosi uFaro nempi yakhe, unesihe sothando lwaphakade.
¹⁶Wahola abantu bakhe ehlane, unesihe sothando lwaphakade,
¹⁷wabhubhisa amakhosi ayiziqhwaga, unesihe sothando lwaphakade.
¹⁸Wabulala amakhosi adumileyo, unesihe sothando lwaphakade,
¹⁹wadla uSihoni inkosi yama-Amori, unesihe sothando lwaphakade,
²⁰wadla no-Ogi owayebusa eBhashani, unesihe sothando lwaphakade,
²¹walaba izwe labo laba yifa, unesihe sothando lwaphakade,
²²laba yifa likaIsrayeli inceku yakhe, unesihe sothando lwaphakade.
²³Wasikhumbula mhlazana sinqotshiwe, unesihe sothando lwaphakade,
²⁴wasikhulula ekugqilazweni yizitha zethu, unesihe sothando lwaphakade.
²⁵Wondla abantu nezilwane imbala, unesihe sothando lwaphakade.
²⁶Bongani uMvelinqangi osezulwini, unesihe sothando lwaphakade.

AmaHubo 137

Isililo sabadingiselwe eBhabhiloni

- ¹Sahlala ngasemifuleni yaseBhabhiloni, salila lapho sikhumbula iZiyoni.
- ²Saphanyeka izingubhu zethu emagatsheni eminyezane yalapho,
- ³ngoba abasithumbayo bathi asibaculele nabasigqilazayo babefuna sibatekulele bathi: “Siculeleni libe linye laseZiyoni!”
- ⁴Singalihuba kanjani elikaSimakade sihleli lapha kwelabezizwe na?
- ⁵Uma ngikhohlwa uwena Jerusalema okungcono isandla sami sokunene singamane sife umuzwa sibune.
- ⁶Ulimi lwami lunganamathela olwangeneni uma ngingakukhumbuli wena Jerusalema, ngingakwazisi wena gugu lami lamagugu!
- ⁷Simakade khumbula uEdomu ukuthi msukwana lichithwa iJerusalema bagidagida bathi: “Dilizani, dilizani, niqothe imbokodo nesisekelo!”
- ⁸Wena muzi waseBhabhiloni uyochithwa. Uyadela lowomuntu oyophindisa kuwe akujezise ngenxa yezenzo zakho kithi,
- ⁹athathe usana lwabantwana bakho aluphahlaze edwaleni luphihlizeke.

AmaHubo 138

Elokubonga umusa kaSimakade

ElikaDavide.

- ¹Ngiyakubonga Simakade ngenhliziyo yonke, ngikubongela bebukela onkulunkulu,
- ²ngikhothamela ethempelini lakho elingcwele, igama lakho ngilithopha ngezibongo, ngoba unothando lwafuthi uthembekile. Uliphakamisile izwi lakho negama lakho, laba nedumela ngaphezu kwakho konke.
- ³Mhla nginxusa wangizwa wangiphendula, waqinisa umoya wami ngaba namandla.
- ⁴Simakade, amakhosi onke omhlaba ayokubonga lapho esezwile isethembiso owasishoyo,
- ⁵ahaye ihubo ngemisebenzi kaSimakade, ngoba bukhulu ubukhosi bukaSimakade.
- ⁶Nakuba uSimakade ephakeme kangakaya, nokho uyabanaka abazibeke phansi, abazidlayo ubazi kahle esekudeni.
- ⁷Noma ngihamba ngihaqwe yizinhlupheko, wena ukuhlenga kahle ukuphila kwami, uyangivikela Somandla olakeni lwezitha, ungophule ngesandla sakho sokunene.

⁸USimakade uyokufeza akuhlose ngami. Nkosi, unesihe sothando lwaphakade, ungakulahli okungumsebenzi wezandla zakho!

AmaHubo 139

USimakade owazi konke ukhona ezindaweni zonke

Elethulwe kumculisi; elika Davide; ihubo.

¹Simakade ungihlolisile uyangazi,

²wena ungazi ukusuka nokuhlala, uqonda imicabango yami usemajukujukwini.

³Ucwaninga ukuhamba kwami nokulala kwami, wazana nezindlela zami ngothi lwazo.

⁴Ngingakaqali nakukhuluma gama wena Nkosi usuyazi ngokupheleleyo.

⁵Ungihaqile, ukhona emuva nangaphambili, wena ungisibekele ngesandla sakho.

⁶Lolulwazi lwakho ngami luyangehlula, ukujula kwalo kungiqeda amandla.

⁷Ngiyakushonaphi ngibalekele uMoya wakho, ngicashephi ngibalekele ubuso bakho na?

⁸Uma ngithi ngenyukela ezulwini, nakhu ukhona, noma ngingathatha ukhukho lwami lokulala ngilwendlale kwelabafuleyo, ukhona nalapho.

⁹Noma ngingathatha amaphiko ovivi, ngithathele ngesivinini sentathakusa, ngihlale emajukujukwini emikhawulo yolwandle,

¹⁰nalapho-ke ngiyoholwa yisandla sakho, ngisingathwe ngesokunene sakho nakhona le.

¹¹Ukuba bengithi: “Ubumnyama abungigubuzele, nemini engikhanyisele igwinywe ngubusuku!” —

¹²phinde, ngisho nobumnyama kabumnyamele wena, ubusuku bunjengemini engenamayezi, ubumnyama nokukhanya kufana nse.

¹³Nguwe owaphica izibilini zami, wangibumba esiswini sikamame.

¹⁴Ngiyakubonga Mvelinqangi owangidala ngendlela emangalisa kakhulu. Imisebenzi yakho iyababazeka, ngikwazi kahle kamhlophe lokhu.

¹⁵Amathambo ami ayengasithakele kuwe mhla lowo ngidalwa ekusithekeni, ngibunjwa ngobuciko ezinzulwini.

¹⁶Iso lakho langibona ngiseyihlule. Encwadini yakho wagcina umlando wezinsuku zami zonke engazimiselwayo lungakafiki nolulodwa lwazo.

¹⁷Mvelinqangi, imicabango yakho iyimpicabadala kimi, umumo wayo ngeke wabalwa.

¹⁸Ukuba bengingayibala ibingangidida ingaphezu kwezihlabathi zolwandle; uma sengisanguluka ngiyoba ngisenawe.

¹⁹Nkulunkulu, sengathi ungabhubhisa izonakali, izinswelaboya ziqhele kimi,

²⁰laba abakuhlambalazayo bemelana nawe bekhuluma okuyize ngegama lakho.

²¹Angibazondi khona labo abakuzondayo! Ngiyabenyanya abamelene nawe Simakade.

²²Ngibazondela ukufa nokuphila, kimi bayizitha nje kwaphela!

²³Somandla yihlole inhliziyoyami, ungivivinye, wazi nemicabango yami,

²⁴ubone ingabe ngisendleleni enengozi yini, ubusungihola ngendlela engunaphakade!

AmaHubo 140

Elokucela ukuvikelwa ezidloveni

Elethulwe kumculisi; ihubo likaDavide.

¹Ngisindise Simakade kubantu ababi, ngihlenge kubantu abayizidlova

²abanhliziyoyabo zihlosa ububi, bephehla udwishi lwempi njalo.

³Ulimi lwabo lubukhali okolwenyoka, amazwi abo ayisihlungu sebululu. *Kunekhefu*

⁴Ngivikele ezandleni zezonakali, ngihlenge Nkosi yami kwabayizidlova abasophe ukungikhela izinyawo ngiwe!

⁵Abaziqhayisayo bangithukusele ugibe nce bangibhabhe ngesihibe sezintambo; bangibophele amafindo endleleni. *Kunekhefu.*

⁶Ngikhuleka kuwe Simakade ngithi: “Nguwe uSomandla uNkulunkulu wami.” Beka indlebe ungizwe Nkosi yami lapho ngikhala kuwe ngicela umusa!

⁷Simakade Nkosi yami, wena mhlengi wami onamandla, uvikela ikhanda lami ngesihlangu msukwana ibambene ngezihluthu.

⁸Simakade ungavumi ukuba kuphumelele izinhloso nosongo lwezikhohlakali hleze bazigabise bathwale amehlo. *Kunekhefu.*

⁹Amakhanda alababantu abangihaqileyo awagibekelwe ngububi ababucebayo!

¹⁰Baqulelwe ngamalahle avutha umlilo, baphoswe kwalasha, bangabe besaphuma!

¹¹Abagxibhayo abashaywe ngumhlaba, izidlova zijongwe ngamashwa zichithwe!

¹²Ngazi kahle ukuthi wena Simakade uyabamela abacindezelweyo odabeni, umele amalungelo ezimpofana.

¹³Impela abalungileyo bodumisa igama lakho, abaqotho bahlale phambi kobuso bakho.

AmaHubo 141

Elokucela ukulondolozwa nokuhlengwa ebubini

Ihubo likaDavide.

- ¹Ngizazikhalela kuwe Simakade, ngizwele, uphuthume ungisize, ubeke indlebe ulalele ukunxusa kwami!
- ²Yamukela umkhuleko wami owenyukela kuwe, uthunqe njengesisi sempepho esikhuphukayo, ukuphakamisa kwami izandla ngikhuleka kube sengathi umhlatshelo wakusihlwa!
- ³Ngalusele ulimi lwami Simakade, ulubekele ugqayinyanga aluqaphe nce ngingaphimisi mazwi amawala.
- ⁴Inhliziyo yami ayingagebeli ebubini, ingajwayeli ukwenza inkohlakalo, ngingabi mdibi munye nezigilamkhuba, ngingadli zibiliboco zamadili abo!
- ⁵Umuntu olungileyo akangishaye angijezise eqhutshwa uthando, lokhu kunjengomfuma ekhanda, angingawenqabi umgcobo onjalo! Umkhuleko wami uyokuma njalonjalo umelane nemisebenzi yezigilamkhuba.
- ⁶Abaholi babo bayophoswa kwankatha, bakhalakathele eweni kwatotololo, kuyilapho beyokhanyelwa ukuthi engakushoyo kufanele ukwamukelwa.
- ⁷Amathambo ethu ahlakazekile, achitheka eceleni kwamaliba njengomlimi eqatha eqebekula umhlabathi.
- ⁸Ngibheke kuwe Simakade Nkosi yami, siphephelo sami ngivikele ngingafi, lingachithwa igazi lokuphila kwami,
- ⁹ungichushise ogibeni abangicuphe ngalo nasemafindweni engiwaboshelwe zigilamkhuba!
- ¹⁰Izonakali azibhabheke ezihibeni zazo, kepha mina ngiphephe nokuphepha!

AmaHubo 142

Elokucela ukusizwa ezinhluphekweni

Inkondlo enesifundo akhuleka ngayo uDavide lapho esemgedeni.

- ¹Ngiphakamisa izwi ngikhala kuSimakade, ngiphakamisa izwi nginxusa uSimakade.
- ²Ngethula kuye izikhalo zami, ngimenekela izinhlupheko zami zonke.
- ³Nalapho umoya wami usudikibala kepha wena uyazazi izinyathelo zami. Izitha zami zingithukusele ugibe endleleni leyo engihamba ngayo.
- ⁴Ngibhekisisa ngakwesokunene sami, kodwa angitholi mngane ongimelayo, akukho ndlela engingaphunyuka ngayo, akakho onendaba nami nongikhathalelayo.

⁵Ngiyakhala kuwe Simakade ngithi: “Nguwe isiphephelo engibalekela kuso, isabelo sami ezweni labaphilayo.”

⁶Lalela ukuqonga kwami ngikhala, ngidangele usizi ngiphela amandla, ngihlengi kulabo abangizingelayo; bayangehlula banamandla kunami.

⁷Ngikhulule ngilengela esiweni samanqe ukuba ngidumise igama lakho! Uquqaba lwabaqotho luyongihlala lubona izicolo ongenzele zona.

AmaHubo 143

Elokucela ukukhululwa nokwelulekwa

Ihubo likaDavide.

¹Simakade yamukela umkhuleko wami, ubeke indlebe lapho ngizincengela, ngiphendule wena othembekileyo, ngizwele ngenxa yokulunga kwakho!

²Ungayithethisi cala inceku yakho, esigcawini sakho akakho omsulwa.

³Isitha singizingelile sangifuna, singinqobile sangidovoza ngawuthuli, sangihlalisa ebumnyameni obuthe bhuqe njengalabo asebafa kudala emandulo.

⁴Umoya wami ngiwuzwa udangala, inhliziyo yami ngizwa idikibala.

⁵Ngikhumbula imihla yasemandulo, ngicabange ngakho konke owakwenzayo, ngizindle ngemisebenzi yezandla zakho.

⁶Ngelula izandla ngiziphakamisela kuwe, ngikomele njengomhlaba womele imvula. *Kunekhefu.*

⁷Phangisa Nkosi yami ungiphendule, ngoba umphefumulo wami uyayetha! Ungangincintshi amehlo ushalaze hleze ngitholakale ngimdibi munye kanye nalabo abathunyelwa kwagoqanyawo!

⁸Ngizwise uthando lwakho entathakusa, ngokubanini ngethembela kuwe, ungitshengise indlela engizoyithatha, ngoba ngiyethula kuwe inhliziyo yami.

⁹Simakade ngisindise ezitheni zami; kukuwe lapho ngibalekela khona.

¹⁰Ngifundise ukwenza intando yakho ngokuba wena unguNkulunkulu wami, uMoya wakho omuhle awungihole, ngihambe ngendlela ebekileyo!

¹¹Londoloza ukuphila kwami Nkosi ukuba kudunyiswe igama lakho, ungikhiphe osizini wena Sokulunga!

¹²Ngenxa yesihe sothando lwakho lwafuthi bhuhisa labo abayizitha zami, ubachithe bonke abangikhathazayo, ngokubanini ngiyinceku yakho.

AmaHubo 144

Elokucela ukuhlengwa nokuphumelela

ElikaDavide.

- ¹Akudunyiswe uSimakade idwala lami! Nguye ofundisa izandla zami ukulwa, ahlakaniphise iminwe yami empini.
- ²Nkosi ungumthombo wothando kimina, nguwena inqaba yami, inqaba yami ephakemeyo nomkhululi wami, isihlangu sami, ngibalekela kuwe. Ungithobisela abantu bami ngibabuse.
- ³Simakade, ubeyini umuntu ungaze wazi ngaye, owasemhlabeni ubeyini nje ukuba uzihluphe ngaye na?
- ⁴Umuntu unjengomoya oheleza udlule, imihla yakhe yedlula njengethunzi.
- ⁵Simakade, tshekisa umkhathi wezulu kwehle wena, uthinte izintaba zithunqe,
- ⁶ubaphonse ngemibani abafu badunguke, ubacibe ngemicibisholo yakho babhangazele!
- ⁷Yelula izandla zakho wena oPhezulu; ngihlwithe ungophule emsingeni, ungikhulule ezandleni zabafo
- ⁸abamlomo wabo ugcwele inkohliso, bafunga bagomele ngesokunene sabo, baqinise ngobufakazi bamanga.
- ⁹Mvelinqangi ngiyokuculela igama elisha, ngikubonge ngidlale ugubhu oluzintambo ziyishumi.
- ¹⁰Nguwe oyaye unqobise amakhosi, wasindisa uDavide inceku yakho, wamphephisa enkembeni yezitha ezinonya.
- ¹¹Ngisindise ungophule emandleni abafokazi abamlomo wabo ugcwele inkohliso, bafunga bagomele ngesokunene sabo, baqinise ngobufakazi bamanga.
- ¹²Sengathi amadodana ethu angaba nesithombo esihle ebubhungwini bawo njengamaxhantela aphakemeyo, namadodakazi ethu afane nensika yetshe legumbi elibazelwe umuzi wenkosi!
- ¹³Izinqolobane zethu azigcwale isivuno sokudla okunhlobonhlobo, imihlambi yezimvu zethu ibe yizinkulungwane ngezinkulungwane, uchibidolo emaqeleni.
- ¹⁴Izinkabi zethu azisisinge, zisindwe yimithwalo yenala, kungangeni kwazitha zisithumbe kukhalwe ubungqayingqayi enkundleni yakithi.
- ¹⁵Sibusisiwe isizwe esihlezi kanjalo, yebo, sibusisiwe siyadela lesosizwe esiNkulunkulu waso nguSimakade.

AmaHubo 145

Elokubonga isisa namandla kaSimakade

Elendumiso likaDavide.

- ¹Bayede Nkosi Nkulunkulu wami! Ngiyokubabaza wena ophakemeyo, ngibonge igama lakho ungunaphakade.

- ²Imisuku namalanga ngiyokubabaza wena, ngidumise igama lakho ungunaphakade.
- ³Mkhulu uSimakade uyababazeka, ubukhulu bakhe bedlula ukuqonda komuntu.
- ⁴Izizukulwane zobikelana ngokwenzileyo; kuyofa abantu, kusale izibongo, zithethe imisebenzi yakho etusekayo.
- ⁵Ngiozindla ngenkazimulo nesithunzi sakho nangemisebenzi emangalisayo oyenzileyo.
- ⁶Bayowancoma amandla ezenzo zakho, izenzo zakho ezinkulu ezesabekayo, nami ngiyolanda ngobukhulu bakho.
- ⁷Bayoshumayela ngesisa sakho esikhulu, bahlokome ngenjabulo ngokulunga kwakho.
- ⁸USimakade unomusa nesihawu, kumthatha kade ukuthukuthela, isihe sothando lwakhe sikhulu.
- ⁹USimakade ubenzela ubuhle bonke, uyakuzwela konke akudalileyo.
- ¹⁰Simakade, ziyokubonga zonke izidalwa zakho, abangcwele bakho bababaze wena,
- ¹¹udumo lombuso wakho lube sematheni, bashumayele ngamandla akho amakhulu
- ¹²yikhona abantu emhlabeni wonke bezoyazi imisebenzi yakho yobuqhawe nenkazimulo nesithunzi sombuso wakho.
- ¹³Umbuso wakho ungumbuso waphakade, kuyofa abantu kusale ubukhosi bakho.
- ¹⁴USimakade uyabaphasa bonke abawayo, alulamise bonke abaqhothiswe usizi.
- ¹⁵Izidalwa zonke zikugqolozela ngethemba, uzipha ukudla ngesikhathi esifaneleyo,
- ¹⁶isandla sakho sifunza ngesihle, wesuthise ukulangazela kwezidalwa zonke
- ¹⁷USimakade ulungile ekwenzeni kwakhe konke, kukho konke akwenzayo unobubele.
- ¹⁸USimakade useduze nabakhala kuye, labo abakhala kuye ngeqiniso.
- ¹⁹Wenelisa izifiso zabamesabayo, abezwele ekukhaleni kwabo, abasindise.
- ²⁰USimakade ulondoloza bonke abamthandayo, kepha abhubhise zonke izonakali.
- ²¹Ulimi lwami luyobongela uSimakade, igama lakhe elingcwele libongwe yizidalwa zonke phakade naphakade.

AmaHubo 146

Elokubonga izenzo zokulunga zikaSimakade

- ¹Haleluya, dumisani uSimakade! Dumisa uSimakade mphefumulo wami!
- ²Ngiyomdumisa uSimakade ngisesemhlabeni, ngimhubele uNkulunkulu wami ngisaphila.
- ³Ningethembeli ezikhulwini ezinibusayo nakowasemhlabeni ongenisize ngalutho!
- ⁴Umphefumulo wakhe uphuma maqede aphindele emhlabathini avela kuwo, ngalolosuku kuphele izinhloso zakhe.
- ⁵Ubusisiwe lowo olusizo lwakhe luvela kuSomandla uNkulunkulu kaJakobe, ethembele kuSimakade uNkulunkulu wakhe,
- ⁶uMvelinqangi owenza izulu nomhlaba nolwandle nakho konke okukhona. Ugcina isethembiso sakhe naphakade,
- ⁷abamele esigcawini abacindezelweyo, nalabo abalambileyo abaphe ukudla. USimakade ukhulula ababoshiweyo.
- ⁸USimakade uvula izimpumpithe zibone. USimakade ululamisa abaqhothiswe usizi. USimakade uthanda abalungileyo.
- ⁹USimakade ulondoloza abokufika, aphase izintandane nabafelokazi, kepha agwegwise indlela yababi.
- ¹⁰USimakade uyobusa ungunaphakade. Kuyofa abantu, kusale ubukhosi beNkosi uNkulunkulu wakho Ziyoni. Haleluya, dumisani uSimakade!

AmaHubo 147

IJerusalema malibonge izicolo zikaSimakade

- ¹Haleluya, dumisani uSimakade! Kuhle ukubongela uNkulunkulu wethu, kumnandi, indumiso ifanele!
- ²USimakade uyalakha iJerusalema, aqoqe uIsrayeli ohlakazekileyo.
- ³Ududuza abanhliziyi zidabukile, abophe amanxeba abalimeleyo.
- ⁴Uwuhlela ngesu umumo wezinkanyezi, uzazi ngayinye amabizo azo.
- ⁵Inkulu iNkosi yethu, inguSomandla, ukuhlakanipha kwayo akunamkhawulo.
- ⁶USimakade uphakamisa abahluphekayo, izonakali aziqumbe othulini.
- ⁷Hubelani uSimakade nimbonge, nimdumise uNkulunkulu wethu ngezingubhu!
- ⁸Nguye owenza izulu lisibekela, line izihlambi zemvula emhlabeni, utshani buhlume bembese izintaba.
- ⁹Wondla izilwane ngokudla kwazo, afunze amaphuphu egwababa akhalayo.
- ¹⁰Akawajabuleli amandla enjomane, akathokozi ngejubane leqhawe.

- ¹¹USimakade uthokozela abamesabayo, abethemba isihe sothando lwakhe.
- ¹²Wena Jerusalema bonga uSimakade, dumisa uNkulunkulu wakho Ziyoni!
- ¹³Nguye oqinisa imigoqo yamasango akho, abusise abantabakho phakathi kwakho,
- ¹⁴imincele yakho ibe nokuthula, akusuthise nangokolweni omnandi.
- ¹⁵Ukhipha umyalo uye emhlabeni wonke, izwi lakhe lisheshe lifinyelele,
- ¹⁶akhithikise iqhwa elimhlophe qwa kulale isithwathwa njengomlotha weziko,
- ¹⁷asakaze isichotho sakhe njengezinhlamvu — ngubani ongamelana namakhaza akhe na?
- ¹⁸Abesehipha umyalo wakhe kuncibilike, kuphephethe umoya wakhe, amanzi ageleze.
- ¹⁹Umemezela izwi lakhe kuJakobe, izimiso nezinqumo zakhe kuSrayeli.
- ²⁰Akazange apha the nasinye isizwe kanje, izizwe kazizazi izinqumo zakhe. Halleluya, dumisani uSimakade!

AmaHubo 148

Konke okudaliweyo akubonge uSimakade

- ¹Halleluya, dumisani uSimakade! Konke okusezulwini akudumise uSimakade, kumdumise ekuphakameni ezulwini!
- ²Mdumiseni nonke nina zingilosi zakhe, mdumiseni nonke nina beNkosi yamaviyo!
- ³Mdumise wena lilanga nawe nyanga, nani nonke zinkanyezi ezikhazimulayo!
- ⁴Mdumise lizulu elingaphezu kwezulu, nani manzi angalena kwesibhakabhaka!
- ⁵Konke akudumise igama likaSimakade owakhipha umyalo wakhe kwadaleka,
- ⁶wakumisa ngononina ngohlelo lwaphakade, wabeka umthetho okungasoze kwaweqa.
- ⁷Konke okusemhlabeni akudumise uSimakade! Mdumiseni nina mikhomo yasolwandle nani nonke zinzulu zozwa kwatotololo
- ⁸nomlilo nesangquma neqhwa nezinkwezane nomoya ovunguzayo ofeza isimiso sakhe!
- ⁹Mdumiseni nina zintaba namagquma onke nemithi ethelayo nemithi yonke yamahlathi!
- ¹⁰Mdumiseni zilwane zasendle nezifuywayo nezihuquzelayo nezinyoni ezindizayo!

¹¹Mdumiseni makhosi omhlaba nezizwe zonke nezikhulu nababusi bomhlaba wonke!

¹²Mdumiseni nina zinsizwa nezintombi, nimdumise nina maxhegu nabantwana!

¹³Bonke abadumise igama likaSimakade, yilo lodwa eliphakeme kunamanye! Ubukhosi bakhe bengamele umhlaba nezulu.

¹⁴Wavusela abantu bakhe uphondo losindiso ukuba abangcwele bakhe bamdumise, isizwe sakwalsrayeli esiyigugu lakhe. Haleluya, dumisani uSimakade!

AmaHubo 149

Isizwe sakwalsrayeli masibonge uSimakade

¹Haleluya, dumisani uSimakade! Hayelani uSimakade ihubo elisha, nimdumise ebandleni labangcwele!

²MaIsrayeli thokozani ngomenzi wenu, nina baseZiyoni nethabe nikhuze ubayede,

³nidumise igama leNkosi ngokuyisinela, niyihubele nishaye izigubhu nezinqwabe!

⁴USimakade uyathakasa ngabantu bakhe; abahluphekayo ubahlobisa ngosindiso.

⁵Akuthokoze abangcwele ekunqobeni kwabo, bahlokome emikhosini yabo ngenjabulo.

⁶Amaphimbo abo awaphakamise uMvelinqangi, esandleni bahlome ngenhlendla ebukhali.

⁷Bayophindisa kwabezizwe, izinhlanga zithole ukujeziswa ngabo.

⁸Amakhosi azo ayoboshwa ngamaketango nezikhulu zazo ngemichilo yosinga.

⁹Kuyogcwaliseka isinqumo sombhalo wakhe, kube udumo kwabangcwele bakhe bonke. Haleluya, dumisani uSimakade!

AmaHubo 150

Haleluya, dumisani uSimakade!

¹Haleluya, dumisani uSimakade! Dumisani uMvelinqangi endlini yakhe engcwele, mdumiseni esibhakabhakeni samandla akhe!

²Mdumiseni ngemisebenzi yakhe etusekayo, mdumiseni ngoba uyesabeka ngobukhulu!

³Mdumiseni nikhalise uphondo lwenqama, mdumiseni nibethe uqwabe nomqangala!

⁴Mdumiseni nishaye isigubhu nimgidele, mdumiseni nibethe ugubhu nomtshingo!

⁵Mdumiseni nikhencezise okhencekhence, mdumiseni nincencethise okhencekhence!

⁶Konke okuphefumulayo akudumise iNkosi! Haleluya, dumisani uSimakade!

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil